


Tūpa Ñehengagüer



New Testament in Guarayu (BL:gyr:Guarayu)

Tǔpa Ņehengagüer New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 25 Nov 2022 from source files dated 29 Jan 2022
c27c2d97-c359-59f5-b367-83efb2e33739

Contents

SAN MATEO	1
SAN MARCOS	59
SAN LUCAS	94
SAN JUAN	156
LOS HECHOS	200
ROMANOS	255
1 CORINTIOS	279
2 CORINTIOS	304
GALATAS	319
EFESIOS	328
FILIPENSES	336
COLOSENSES	342
1 TESALONICENSES	347
2 TESALONICENSES	352
1 TIMOTEO	355
2 TIMOTEO	362
TITO	367
FILEMÓN	370
HEBREOS	372
SANTIAGO	390
1 SAN PEDRO	396
2 SAN PEDRO	403
1 SAN JUAN	407
2 SAN JUAN	413
3 SAN JUAN	414
SAN JUDAS	415
APOCALIPSIS	417

MATEO REMBICUACHIA JESUS RECOCUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoiyase Jacob, ipare Jacob rahir ahe Judá ambuae tiqehir, tivireta reseve. ³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoiyase Aram. ⁴ Aram rahir Aminadab, Aminadab rahir Naasón, Naasón rahir evocoiyase Salmón, ⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, ⁶ Isaí rahir mborerecuar guasu David, David rahir evocoiyase Salomón, Urías rembirecocuer pipe oyesu vahe.

⁷ Salomón rahir Roboam, Roboam rahir Abías, Abías rahir Asa. ⁸ Asa rahir Josafat, Josafat rahir Joram, Joram rahir evocoiyase Uzías. ⁹ Uzías rahir Jotam, Jotam rahir Acaz, Acaz rahir ahe Ezequías. ¹⁰ Ezequías rahir Manasés, Manasés rahir Amón, Amón rahir evocoiyase Josías. ¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel. ¹³ Zorobabel rahir Abiud, Abiud rahir ahe Eliaquim, Eliaquim rahir evocoiyase Azor. ¹⁴ Azor rahir Sadoc, Sadoc rahir ahe Aquim, Aquim rahir evocoiyase Eliud. ¹⁵ Eliud rahir Eleazar, Eleazar rahir ahe Matán, Matán rahir evocoiyase Jacob. ¹⁶ Jacob rahir José, María mer, María evocoiyase Jesús si secoi. Ahe imembri Tūpa Rembiporavo Poropisirosar.

¹⁷ Evocoiyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota aravíter Poropisirosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoihí viteseve rumo, Espíritu Santo píratasa pipe imembri. ¹⁹ Evocoiyase José, imevi, ahe ava seco catupri vahe, “Tapoiño ayase ava icuáehisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe. ²⁰ Aipo opíhañemoñeta reseve oque. Iquierve rumo, Tūpa rembiguai oyemboycua chupe aipo ehi: “José, David suindar, eresiquíyei rene María rese nde menda áqua. Esepiá, Espíritu Santo sui ou imembirā. ²¹ María virecose omembri, pemondora sererguā Jesús. Esepiá, ahe oipisirora omu judío eta yangaipa sui” ehi.

²² Co rupi opa yaviye yande Yar remimombehugüer aipo ehi vahecuer iñehe mombehusar aracahe:

²³ “Cuña ndaseco marai vahe imembira.
Ahe imembri rer-ra Emanuel” ehi

(Tūpa yande rese ité secoi' oya aipo ehi).

²⁴ Omahese José, Tūpa rembiguai oyeyepe ñehe agüer ombooyeroya ité. Ichui omenda María rese cute. ²⁵ Ndoyapo vitei eté rumo mbahe oyese yuvireco. Yipindar imembira rane ité, ahese José omondo Jesús serergua.

2

Ava yasitata rese oyembohe vahe ari sësa cotindar yuviraso pítani repia

¹ Herodes mbororecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sësa coti sui Jerusalén ve. ² Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepiá niha, caharu coti yasitata orosepia. Sese oroyu ari sësa coti sui imboetei água —ehi yuvireco chupe.

³ Aipo ihese, mbororecuar Herodes oyembosiquiye tēi, ava Jerusalén pendar avei égue ehi pâve yuvireco. ⁴ Iyavei cûriteimi opa omonuha uca pahi rerecuareta, Moisés porocuaita rese oporombohe vahe avei. Ipare oporandu chupe:

—¿Que vo aipo ohara Poropísírosar? —ehi.

⁵ Ahe omboyeví yuvireco chupe:

—Ahe ohara Judea rupi Belén ve —ehi—. Esepiá, Tūpa ñehe mombehusar Miqueas rembicuachiagüer pipe aipo ehi:

⁶ ‘Pe, tecua mini Belén pipendar, ndahei ivi coti tēi vahe ambuae tecua Judá pipendar sui peico.

Esepiá, pe sui oséra mbororecuar che recua iguar Israel yocuai água’ ehi —ehi yuvireco Herodes upe.

⁷ Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pipe ité vo pesepia ramo aipo yasitata?” ehi. ⁸ Oyeupe mombehu pare, omondopa Belén ve aipo ehi chupe:

—Peso evocoiyase, peseca pítani. Acoi peyosuse, co rupi avei peyevi cheu icua uca água. Che avei evocoiyase tasomi imboetei —ehi angahu chupe.

⁹ Aipo oyeupe he pare, yasitata rese oyembohe vahe osiríño voi yuviraso. Ahe pipeve yasitata oyemboyecua iri senonera. Ichui pítani recosa rese tupri tecua Belén ve opita yasitata. ¹⁰ Sepiase, ovihareté yuvireco. ¹¹ Ipare yuviroique oí pipe, osepia pítani ichi María reseve yuvireco. Ichui oñenopihá sovai imboeteisa pipe. Ipare opóhe omabahe ríru pipe yuvireco oicuavéhe vaherá oporerecosa sepiusu vahe oro, itaisi, ambuae mbahe síacua vahe mirra serer vahe avei. ¹² Yuviroyeví güecuave yuviraso, ndoyuviroyeví iri Jerusalén rupi mbororecuar Herodes upe imombehu. Esepiá, Tūpa aipo omombehu iquerue chupe ambuae peri rupi iyevi água.

Jesús pítani seroñemisa Egipto ve

¹³ Aipo ava yepepi pare, José upe oyemboyecua Tūpa rembiguai iquerue, aipo ehi chupe: “Eñiarapuha, eroñemi pítani ichi reseve eraso Egipto ve. Aheve erepitara acoi che amombehuse voi nde yevi água. Esepiá, mbororecuar Herodes osecara pítani yuca água oico” ehi chupe.

¹⁴ Ahe pītu pipeve voi José vīraso pītani ichi reseve Egipto ve. ¹⁵ Aheve yuvirecoi co mborerecuar Herodes mano rāro. Co rupi imboaviyesa Tūpa ñehe mombehusar remimombehugüer: “Egipto sui anose che Rahir” ehi vahe.

Herodes oyuca uca chīhivahe eta

¹⁶ Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuvīraso sundao tecua Belén ve, toyucapa chīhivahe cuimbahemi yuvireco opacatu ñuvirío araviter ovireco vahe, chīhivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cūritei. ¹⁷ Ëgüe ehi yaviye Tūpa ñehe mombehusar Jeremías remimombehugüer aipo ehi vahe:

¹⁸ “Oyeendu ava Ramá ve.

Ahe Raquel oyaseho ité omembireta manose; ndoyembovíha catui eté ipipe” ehi.

¹⁹ Mborerecuar Herodes manore, Egipto ve José upe oñehe iri Tūpa rembiguai iquierve aipo ehi: ²⁰ “Eñarapuha, eroyeví pītani ichi reseve Israel recuave. Esepia, opa omano pītani yuca potasar yuvireco” ehi.

²¹ Aipo oyeupe hese, oñarapuha, viroyeví pītani ichi reseve Israel recuave. ²²⁻²³ Perí rupi oyanduse rumo Arquela vu recocuer mborerecuar chinise, ahese oyembosiquiye aheve oso ãgua. Coiyemi tēi iquierve Tūpa, “Peso Galilea ivi rese” ehi chupe. Ichui yuvīraso tecua Nazaret ve. Aheve opita yuvireco cute. Ëgüe ehi yaviye Tūpa ñehe mombehusar remimombehugüer: “Nazaret pendar’ ehira serecosa” ehi vahe.

3

Juan Oporoãpiramo vahe ivi iporupirēhisa rupi secoi

¹ Ipare Juan Oporoãpiramo vahe Tūpa recocuer rese oñehe oico Judea ivi rupi ava yemboerecuaëhisave ² aipo ehi: “¡Pemboasi pe angaipa; peyeví Tūpa upe! Esepia, co Tūpa mborerecuasa cōimi secoi yandeu” ehi.

³ Co Juan rese niha oñehe yipive Tūpa ñehe mombehusar Isaías aipo ehi güembicuachiagüer pipe:

“Oyeendu ñehesa ava yemboerecuaëhisave:

‘Pemoingatu yande Yar raperã; pemohivi tupri avei’ ehi” ehi aracahe.

⁴ Juan turucuar ahese camello ragüer apopri, sumbicuasa mbahe pirer, sembihu evocoiyase tucru, eiri caha pipendar avei. ⁵ Opacatu ava Jerusalén pendar, Judea rupindar tecua, iai Jordán rerotica pendar avei yuvīraso iñehe rendu ⁶ oangaipagüer mombehu ãgua. Ahese Juan oñapiramo iai Jordán pipe.

⁷ Yugüeru atise rumo fariseo iyavei saduceo oñeapiramo uca ãgua, Juan aipo ehi ahe ava upe: “¡Pe mboi mboetaso tēi peico! ¿Ava vo, ‘Pesera Tūpa ñemoirosa ou vaherā sui’ ehi tupri tēi pēu? ⁸ Yipindar toyecua tupri rane Tūpa upe pe yeyisa pe angaipa mboasisa pipe. ⁹ Iyavei ndapeyeroyai chira ‘ore Abraham suindar oroico’ pe hesa rese tēi pe ñepisiro ãgua. Esepia, Tūpa oicatuño ité co ita sui Abraham suindar nungar tupri apo ãgua oyeupe nara yepi. ¹⁰ Hacha niha imoingatusa voi eté opacatu ivira ndihai vahe sapo rupi yasia ãgua. Ichui yasia pare imondosa tatave. ¹¹ Che i pipe tēi opoãpiramo Tūpa upe pe yevi ãgua. Oura rumo ambuae che raquicuei, ahe pe ãpiramora Espíritu Santo tata nungar pipe. Ahe seco

pírata catu vahe secoi che sui. Sese cheu ndiyai eté ahe ipitaquisã yora água ichui. ¹² Ahe oipehara mbahe rähii ihigüer sui. Sâhii evocoiyase oyapocatura, ihigüer rumo omondora tata apirëhi vahesave” ehi.

Jesús ãpiramosa

¹³ Ipare Jesús oso Galilea sui iai Jordán ve Juan recosave ‘tache ãpiramo’ oya. ¹⁴ Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo água? —ehi.

¹⁵ —Egüe tehiño aipo. Iyacatu yayapora Tûpa porocuaita —ehi Juan upe.

Evocoiyase Juan, “Aviye” ehi chupe. ¹⁶ Oãpiramo pare, osẽ íve sui. Ahe pipevoi iva oyemboi tupri, aheseve avei osepio Tûpa Espíritu ogüeyise ou iharíve apicasu nungar. ¹⁷ Iyavei oyeendu ñehesa iva suindar aipo ehi vahe: “Co che Rahir, che rembiaisú. Sese aviharete vichico” ehi.

4

Jesús recoãhasa

¹ Ipare Tûpa Espíritu víraso Jesús ava yemboerecuaõhisave ‘tosecoãha Caruguar’ ohesa pipe.

² Aheve cuarenta ari, cuarenta pítu ndocarui. Sese ndasiepoi eté oico.

³ Evocoiyase oyemboya Caruguar sese secoãha água, aipo ehi chupe:

—Tûpa Rahir ité nde recose, co ita sui eyapo pan cûritei —ehi.

⁴ Jesús rumo omboyeví chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Êgüe ehi rumo opacatu Tûpa Ñehengagüer reroya pipe ava yuvirecovera yepí’ ehi —ehiño chupe.

⁵ Ichui Caruguar víraso Jesús Jerusalén maranehi pipendar tûparo torre apíterve. ⁶ Aheve aipo ehi chupe:

—Tûpa Rahir ité nde recose, eviapi cohavé sui. Esepio niha, icuachiapri pipe:

Tûpa oyocuaira güembiguai eta nde rârø água.

Ahe nde mopuhara yuvireco que ñepei ita nde momara râgüer sui’ ehi —ehi Caruguar chupe.

⁷ Evocoiyase omboyeví Caruguar upe:

—Icuachiapri pipe rumo aipo ehi avei no: ‘Nderesecoãhai chira nde Yar Tûpa’ ehi —ehi chupe.

⁸ Ipare Caruguar víraso iri ivítri ivate vahe apíterve secoãha água. Aheve aipo opacatu iví pipendar, tecua guasu pipendar mbahe porañete vahe yemboivate aisa omboyecea chupe, ⁹ aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde mahera —ehi Caruguar chupe.

¹⁰ Aipo oyeupe hese:

—Eyepepi che sui cûritei, Caruguar —ehi—. Esepio, icuachiapri: ‘Emboetei nde Yar Tûpa, ahe güeraño tupri avei eremboyeroyara’ ehi —ehi Caruguar upe.

¹¹ Ahese Caruguar oyepepi ichui. Ipare Tûpa rembiguai yuvirogüeyi Jesús rese hañeco água yuvireco.

Jesús omboipí oporombohe Galilea rupi

¹² Jesú斯 oyanduse Juan roquendasa, oso Galilea ivi rese Nazaret ve.

¹³ Ndopítai rumo aheve. Osoño Capernaum ve, aheve opita. Ahe tecua ipa Galilea ivii, ivi Zabulón iyavei Neftalí rupi avei. ¹⁴ Na ehi yavíye Tūpa ñehe mombehusar Isaías rembicuachiagüer aipo ehi vahe aracahe:

¹⁵ “Co ava ivi Zabulón pendar, Neftalí pendar, para guasu ivirindar, iai Jordán rovaindar iyavei Galilea pipendar ndahei vahe judío,

¹⁶ ahe avíye pítumimbisave yuvírecoi vahe, osepia ramo vahe tesapesa yuvíreco; iyavei mano rágüer pipe yuvírecoi vahe upe avei avíye oyecua ramo vahe tesapesa” ehi.

¹⁷ Ahe ari suive Jesú斯 omombehu Tūpa recocuer ava upe: “Pemboasi pe angaipa; peyevi Tūpa upe. Esepia, cōimi eté Tūpa mborerecuasa secoi” ehi.

Jesú斯, “Perio che rupi” ehi irungatu pira mbohasar upe

¹⁸ Coiye ipa Galilea ivii oguatase, Jesú斯 osepia mbia Simón Pedro serer vahe tívri Andrés reseve. Ahe pira omboha yuvíreco. ¹⁹ Evocoiyase:

—Pe pira recasar peico. Perio che rupi. Na peye aveira ava reca água cheu nara —ehi chupe.

²⁰ Aipo he ramoseve, opoi opira mbohasa sui yuvíreco, yuvíraso supi.

²¹ Coi coti catu aipo Jesú斯 osepia ambuae mbia Santiago tívri Juan reseve, ahe oguapi yuvínoi carite pipe oyesupa Zebedeo piri; omoingatu opira mbohasa yuvínoi. ²² “Perio che rupi” he ramoseve, opañó oporavíquisa sui opoi yuvíreco, oseyáño oyesupa, yuvíraso supi.

Jesú斯 ombohe ava rehii

²³ Jesú斯 evocoiyase oguata opacatu Galilea ivi rupi, judío tūparo yacatu rupi oporombohe oico. Aheve ñehesa avíye vahe omombehu Tūpa mborerecuasa resendar. Oporombogüera avei opacatu-catu tēi mbaherasisa ava vireco vahe sui. ²⁴ Oyepotase rumo serâcua opacatu Siria ivi rupindar upe, ahese güeru opacatu iparaisu vahe yuvíreco chupe: imbaheasí vahe, caruguar vireco vahe, que nañaca pôrai vahe iyavei ndoguatai vahe. Ahe opa tupri ombogüera.

²⁵ Ëgüe ehi ava rehii oguata yuvíreco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaindar avei no.

5

Jesú斯 oporombohe ivitrive

¹ Ñepei ari pipe, ava rehii repiase, Jesú斯 oyeupi ivitrí rese. Aheve oguapi oñ. Ahese semimbohe oyemboya yuvíreco sese. ² Ichui omboipi imbohe aipo ehi:

³ “Sorivete catura accoi ava oicuase mbahe ipane vahe Tūpa rese ité güeco tupri água. Esepia niha, chupe nara ité Tūpa mborerecuasa.

⁴ “Sorivete catura accoi ava oyaseho vahe oviharehisa pipe. Esepia niha, Tūpa omboura viharetesa chupe coiye.

⁵ “Sorivete catura ndaseco asiimi vahe. Esepia, ahe chupe imondosara co ivi imahera curi.

⁶ “Sorivete catura ava oipota vahe teco catuprisa Tūpa suindar. Esepia, chupe ité ahe imondosara.

7 “Sorivete catura acoi ava oporoparaisuereco vahe. Esepio, ahe Tūpa oiparaisuerecora.

8 “Sorivete catura acoi ava ipihañemoñeta tupri vahe. Esepio niha, ahe osepiara Tūpa yuvireco curi.

9 “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

10 “Sorivete catura acoi ava seco catupri rese imombaraisupri. Esepio, ahe chupe nara Tūpa mborerecuasa.

11 “Perorivete catura pe acoi ava iñehe-ñehe tēise pēu, iyavei pe mombaraisuse, acoi oyapo-yapo tēise güemira-mira tēi pipe mbahe pe rese che recocuer sui tēi yuvireco. 12 Pe rumo peyembovíhañora. Esepio, ivave tuvichá vahe porerecosa peipisira curi. Ëgüe ehi avei niha yipindar evocoí ava ramoi Tūpa ñehe mombehusareta mombaraisu yuvireco aracahe” ehi.

Jesús reroyasar aviyé yucrī iyavei tesapesa yuvirecoi ava upe

13 “Co ivi pipe pe aviyé yucrī peico opacatu ava upe. Yucrī rumo nasehe irise, ndayaicatui imoehe iri água, ndiporusai chietera; imombopasara ava pirunga água yuvireco.

14 “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatui ñomi água. 15 Iyavei ndayamoendii chira tataendi mbahevriye tēi. Iyacatu rumo yasupi ivate sendave opacatu oi pipendar ava resape água. 16 Pe ëgüe peye aveira pemboycua ava eta upe pe recocuer aviyé vahe. Ipipe sui tomboetei yande Ru Tūpa íva pendar yuvireco” ehi ava rehii upe.

Jesús oporombohe Moisés porocuaita rese

17 “Aní chira, ‘Co mbia revo oporombohe Tūpa ñehe mombehusar rembicuachía mboyeroyaëhi água iyavei Moisés porocuaita cuachiapri mboyeroyaëhi água avei no’ peye tēi cheu. Ëgüe ehi rumo che ayu imboaviye água. 18 Supi eté co íva, ivi avei yandeu oime viitemiseve, ndipoi chietera que ñepei yepe Moisés porocuaita, que ambuae Tūpa ñehe mombehusar rembicuachiagüer ocañi tēi vaherā; ñepei-pei porocuaita imombehupri imboaviyesaño itera. 19 Sese acoi ava ndoviroyai vahe que ñepei mborocuaitamira viña, ombohe avei ava seroyaëhi água, ahe evocoiyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuaita yuvireco iyavei oporombohe vahe yuvireco sese, ahe evocoiyase Tūpa osecomboivate catura omborerecuasave curi. 20 Iyavei amombehu pēu: acoi pe reco ivi tuprisa ndaheise aviyé catu vahe fariseo recocuer sui iyavei ndaheise aviyé catu vahe Moisés porocuaita rese oporombohe vahe recocuer sui avei, ahese ndapeiquei chietera Tūpa mborerecuasave” ehi.

Jesús oporombohe ñemoiroëhi água rese

21 “Pe peicua acoi pe ramoi aracahendar upe aipo ehi vahe: ‘Pe poroyucai rene. Acoi que ava oporoyuca vahe rumo, ahe serasosara mborerecuuar porandusave mbahe sembiapocuer repirā’ ehi. 22 Che rumo aipo ahe pēu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ëgüe ere tēi vahe eico’ ehi vahe ambuae ava upe, ahe serasosara porandu água mborerecuuar ivate catu vahe rovai. Acoi ava rumo oñehe marase seroïrosave ambuae ava upe, ahe iyacatu imondosa ité tata guasuve.

23 “Sese Tūpa upe pe porerecosa reropovēhesave tūparo pipe pemahenduhase ava pe amotarēhimbar rese,²⁴ peseya rane pe porerecosa aheve; peyevi rane pe amotarēhimbar upe pēu iñero ãgua rese. Acoi peñerose oyeupe, ahese voi peyevi, tapeicuavēhe pe porerecosa Tūpa upe.

25 “Iyavei peyeamotarēhise, peñero voi oyeupe peyoepiase. Anise, aviyeteramo coiye catu tēise pe mombehu tēira pe amotarēhimbar mborerecuar upe pe reraso ãgua. Ichui aviyeteramo ahe pe roquenda ucara. ²⁶ Supi eté aipo ahe pēu: Ndapesēi chietera acoi peyemboepipase voi eté pesēra ichui” ehi.

Jesús oporombohe yemboaguasaēhi ãgua rese

27 “Peicua niha Moisés porocuaita yipindar: ‘Peaguasai rene ambuae ava rembireco rese’ ehi vahe. ²⁸ Che rumo aipo ahe pēu: Acoi ava omahese cuña rese ipotasa pipe, ahe inungar oyapo vahe ité mbahe sese opicha pipe yepi.

29 “Iyavei inungar que pe resa pe acato cotindar oipota rai ucase mbahe pēu pe mboangaipa ãgua tēi, iya penose ité, pemombo amombrí peyesui. Aní pe mundo uca opacatu pe recocuer tata guasuve. ³⁰ Iyavei inungar que pe po pe acato cotindar pe mboangaipa ucase, iya peyasia ité imombo amombrí peyesui. Aní pe mundo uca opacatu pe recocuer tata guasuve” ehi.

Jesús oporombohe ava mendasa sui poiēhi ãgua rese

31 “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi. ³² Che rumo aipo ahe pēu: ava opoise güembireco sui, cuña ndoyaviise mbahe, ahese ombopihāñemoñeta tiētera güembireco mboaguasa uca ãgua. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

Jesús oporombohe Vu Tūpa rer poru tēiēhi ãgua rese

33 “Iyavei peicua acoi aipo ehi vahe pe ramoi upe aracahe: ‘Pemboaviye itera pemoingatu tuprise Tūpa rer pipe mbahe pemombehu vahe yepi’ ehi. ³⁴ Che rumo, ‘Ndapeñeheli chira que mbahe rer pipe, iva rer pipe tēi avei’ ahe pēu. Esepia, ahe niha Tūpa renda;³⁵ iví rer pipe tēi avei ndapeñeheli chira. Esepia, ahe Tūpa pirunga; Jerusalén rer pipe avei ndapeñeheli chira. Esepia, ahe niha mborerecuar ivate catu vahe recua. ³⁶ Pe ãca rer pipe avei ndapeñeheli chira. Esepia, ndapeicatui chira que ñepei pe ha momorochi ãgua, imou ãgua avei. ³⁷ Sese niha peñehese, ñepei reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

Jesús oporombohe yande amotarēhisar upe mbahe tēi mboyeviēhi ãgua

38 “Peicua acoi Moisés porocuaita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sāi ichui, sāi avei senosesara’ ehi vahe. ³⁹ Che rumo aipo ahe pēu: Aní chira pemboyevi pēu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe. ⁴⁰ Porandusave pe rerasose pe camisa rerocua ãgua yuvireco pe sui, pe saco avei pemondoñora chupe. ⁴¹ Ñepei legua rupi evosii co mbahe rese cheu’ ehise que ava pēu, pe rumo perasoñora

ñuvirío legua rupi chupe. ⁴² Iyavei oporanduse que pe mbahe rese yuvireco pēu, pemondoño avei chupe. Aní chira perecatéhi sese” ehi.

Pesaisu pe amotaréhimbar

⁴³ “Iyavei pesendu ñehesa yipindar: ‘Pesepia potai rene pe amotaréhimbar, pe mboripar güeraño pesaisu’ ehi vahe. ⁴⁴ Che rumo aipo ahe pēu: Pesaisu catu pe amotaréhimbar iyavei peyeroqui pe momara potasar rese. ⁴⁵ Evoco nungar apo pipe pe Ru Tūpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei. ⁴⁶ Pe raisupar güeraño pesaisu catu tēise, ndapeipisii chietera porerecosa evoco nungar sui. Esepia niha, ava guarePOCHI rerocuasas ndipihai vahe guaisupar tēi osaísu yuvireco yepi. ⁴⁷ Ndahei yande mboripar upe güeraño yayapora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco yepi. ⁴⁸ Sese pe recocuer perecora pe Ru Tūpa iva pendar seco catupri vahe nungar” ehi.

6

Jesús oporombohe mbahe aviye vahe apo áqua rese

¹ “Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ñgue peyese, ndapeipisii chietera pe Ru Tūpa iva pendar porerecosa. ² Evocoiyase iparaísu vahe rese peporerecose, ‘Tamombe-hupa ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbi omoñehe yuvireco ‘Co ava aviye ité yuvirecoi, tehi angahu yuvireco yandeu’ oya tēi. Supi eté aipo ahe pēu: Ñgue ehi vahe rumo opa voi oipisi porerecosa co ivi pipe tēi yuvireco. ³ Pe rumo peporerecose iparaísu vahe rese, aní chira pemombehu ambuae ava upe yepera que pe mboripar ité viña. ⁴ Peoporereco catu ava pe repiaéhisa pipe; pe Ru Tūpa niha mbahe ndoyecuai vahe osepia. Ahe omboura porerecosa pēu opacatu ava rembiepiave curi” ehi.

Jesús oporombohe yerure áqua rese

⁵ “Acoi peyeres, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opúha-púha catu tūparo pipe oyeroqui yuvireco cupiha yacatu avei ‘tayande repia angahu ava’ ohesa pipe tēi. Supi eté che aipo ahe pēu: Ñgue ehi vahe opa voi eté co ivi pipeve tēi oipisi porerecosa yuvireco. ⁶ Iyacatu rumo pe, peyeroqui potase, peiquera pe rēta pipe peyeoquendara pe ae pe yeroqui áqua pe Ru Tūpa upe. Evocoiyase pe Ru Tūpa oicua vahe mbahe pe rembiapo, iporerecora pe rese.

⁷ “Iyavei peyeroquise, ndapemboyevi-yevi chira pe ñehe pe poranduse mbahe rese Tūpa upe inungar ava Tūpa ndoicuai vahe. Ahe omboyevi-yevi oyeruresa ‘Tūpa revo co rupi yande mboyeroya voira’ ohesave yuvireco viña. ⁸ Aní chira inungar tēi peico. Esepia, pe Ru Tūpa oicua pe porandu renondeve mbahe ipane vahe pēu. ⁹ Sese aipo peyera peyeroqui:

‘Ore Ru Tūpa, ivave ereico vahe, imboeteipri nde rer tasecoi.

¹⁰ Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

¹¹ Embou ore rembihu ari yacatundar oreu co ari pipe.

¹² Iyavei ndeñero ore angaipa rese oreu inungar ore oreñero ore amotarëhimbar upe.

¹³ Ore mboangaipa ucai rene eve; eipeha mbahe naporai vahe ore sui' peyera.

¹⁴ "Esepia, pe amotarëhimbar upe peñerose, pe Ru iva pendar avei iñerora pẽu;¹⁵ ndapeñeroise rumo, ahe avei niñeroi chietera pẽu" ehi.

Jesús oporombohe yecuacusa rese

¹⁶ "Acoi peyecuacuse, ndapemboyecuai chira pe viharëhisa, inungar acoi Tüpa reroyasar angahu tẽi yuvireco yepi. Esepia, ahe opa oyeerecomeguapa tupri yuvireco, 'Co oyecuacu vahe, tehi ava yande repiasar yuvireco yandeu' ohesa pipe tẽi. Supi eté aipo ahe pẽu: Ëgüe ehi vahe opa voi oipisi porerecosa ava güepia pipe tẽi yuvireco.¹⁷ Pe rumo peyecuacuse, peñeaca mondoro tuprira, peyovai tupri aveira.¹⁸ Evocoiyase, 'Co oyecuacu vahe' ndehi chira ava yuvireco pẽu. Pe Ru Tüpa, ndayasepiai vahe, güeraño oicuara pe yecuacusa. Ahe evocoiyase iporerecora pe rese curi" ehi.

Mbahe porañeté vahe oime ivave

¹⁹ "Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoi omboaso ati-atí imocañipa, iyavei sâve-sâve tẽi opochi ati-atí oapocatusave, imonda vahe avei evocoiyase imondaño sese pẽu.²⁰ Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi água.²¹ Esepia, pe mbahe pe rembiereco setá catu vahesa rupirupi pe pihañemoñeta yepi, yepera que co ivi pipe, anise que ivave avei" ehi.

Yande resa inungar tataendi yande recocuer uve

²² "Iyavei yande resa inungar tataendi yande retecuer upe. Evocoiyase yande resa aviye, opacatu yande retecuer upe osesape;²³ acoi imarase rumo, opacatu yande retecuer pítumimbisave tẽi secoi. Tesapesa oime vahe yande rese, ahe ogüese rumo yande sui, mbahe tẽi eté, pítumimbi nungar opacatu yande recocuer upe" ehi.

Guarepochi pota raisa; Tüpa mboyeroyaëhisa

²⁴ "Iyavei ndipoi chietera que ava ñuvirío güerecuar omboyeroya vahe. Esepia, ñepei oyamotarëhira imboyeroya potaëhisa pipe, ambuae evocoiyase osaisu catura imboyeroyasa pipe. Ëgüe peye avei, ndapeicatui Tüpa mboyeroya guarepochi pota raisa pipe" ehi.

Tüpa osäro guahireta

²⁵ "Iyavei ndapeyemomahenduha guasu ai chira mbahe pe remihura rese pe recove água, pe ihu água rese, pe turucuarã rese tẽi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no.²⁶ Pesepia vîrai eta oveve vahe: nomahetii vahe, nomonuhai avei, ndoyapocatui avei mbahe yuvireco. Pe Ru Tüpa iva pendar ité niha omoime mbahe itohu. ¡Pe rumo ivate catu vahe ité peico vîrai sui!²⁷ Ndipoi que ñepei pe pâhu pendar oicatu vahe opihañemoñetas pipe tẽi güecocuer mopucu iri água.

²⁸ "Ndahei chira pe turucuarã rese tẽi peyemomahenduha guasu ai. Pemahecua ru mbahe potri caha pipendar rese: ndoporavíquii eté iyavei ndoipiäi oturucuarã.²⁹ Iyavei yepe mborerecuar guasu Salomón vireco

setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese.³⁰ Tūpa niha omboporañete raimi tēi mbahe potri caha pipendar, moviro ari tēi yaselia, ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe!³¹ Sese, ‘¿Mbahe pīha yahura, yaíhura?’ Iyavei, ‘¿mbahe pīha yamondera?’ ndapeyei chira pe yemomahenduha guasu aisa pipe.³² Ava Tūpa reroyasaréhi aipo nungar reseño tēi ipihañemoñeta yuvireco yepi. Pe Ru Tūpa iva pendar rumo oicua ité pēu mbahe ipane vahe.³³ Pemahenduha rane Tūpa rese pe recocuer tupri pipe ipovrīve mbahe pe yapo água semimbotar rupi, ahese omboura opacatu co mbahe ipane vahe pēu.³⁴ Peyemomahenduha guasa ai eme mbahe peyapo vaherā rese. Iyacatu rumo ahe ari oyepotase voi, peyemomahenduhara sese. Esephia, ari yacatu rupi oime mbahe pemoingatu vaherā yepi.

7

Aní, “Oyavi mbahe” peye voi ambuae upe

¹ “Ndiyai, ‘Oyavi ité mbahe’ peye voiñó tēi ambuae ava upe; evocoiyase Tūpa, ‘Oyavi mbahe’ ndehi chira pēu.² Esephia, inungar pe ambuae ava upe peico, égüe ehi aveira niha Tūpa pēu.³ ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia!⁴ Ndiyai pēu, ‘Che toropitivii mbahe nde rembiavi rese’ peye vaherā chupe. Esephia, ¡pe peyaví guasu catu mbahe ichui!⁵ ¡Pe Tūpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiaví tahími vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndapemondoi chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

Peoporandu Tūpa upe pēu mbahe ipane vahe rese

⁷ “Peoporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, égüe peyera pe yeroquisa pipe Tūpa upe, ahese imboisara pe porandusa pēu.⁸ Esephia, acoi oporandu vahe mbahe rese, ahe mbahe oipísira; acoi mbahe oseca vahe, oyosura, iyavei acoi oyeroquisa pipe omota vahe oquenda Tūpa upe, chupe imboisara.

⁹ “Ndipoi eté revo que ñepei pe pāhu pendar omondo vaherā ita tēi guahir upe pan rese oyeupe poranduse.¹⁰ Que pira rese oyeupe poranduse revo, ndomondoi chiaveira mboi tēi chupe.¹¹ Yepe ava ndaseco pōrai vahe peico viña, pe rahir upe rumo pemondono ité mbahe aviye vahe. ¡Tahetru pe Ru iva pendar oipota catu mbahe aviye vahe mondo água acoi ava mbahe rese oporandu vahe upe!

¹² “Acoi mbahe peipota vahe ambuae ava oyapo vaherā pēu, ahe tupri avei peyapora chupe. Ahe niha Moisés porocuaita iyavei Tūpa ñehe mombehusareta porombohesa” ehi.

Oime peri icāhimi vahe ava recocuer upe nara

¹³ “Peique oquendipí icāhimi vahe rupi. Esephia, oquendipí guasu iyavei peri guasu cañí tēisave oso vahe. Ahe supi setá catu ava yuviraso;¹⁴ teco

apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

Ivira aviye vahe icuasa iha rese

¹⁵ “Coiye Yuguerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evoco nungar sui. ¹⁶ Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sāchi ati vahe sui. ¹⁷ Evocoiyase ivira aviye vahe, iha aviye avei; ivira naporai vahe, iha naporai avei no. ¹⁸ Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe. ¹⁹ Sese opacatu ivira iha naporai vahe yasasa yepi. Ichui imondosapa tatave. ²⁰ Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborerecuasave

²¹ “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iva pendar remimbotar aposar año tupri rumo yuviroiquera aheve. ²² Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo caruguar ava sui nde rer pipe, setá poromondiisa oroyapo’ ehi tēira yuvireco cheu. ²³ Che rumo, ‘¡Aní, ndopocuai! ¡Pe mbahe tēi peico vahe, peyepepi che sui!’ aheñora aipo nungar upe” ehi.

Ñuvirío oi apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarā. ²⁵ Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviyapi eté. Esepia, ita harive ité yaposa. ²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriñehisa pipe omopuha vahe ivi cuhi harive tēi güetarā. ²⁷ Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

²⁸ Íñehe renduse ava rehii, “¿Mara ehi rutei?” ehi tēi yuvireco chupe. ²⁹ Esepia, ndahei Moisés porocuaita rese oporombohe vahe nungar; ahe rumo oporombohe güeco píratasa pipe.

8

Jesús ombogüera ava lepra vireco vahe

¹ Ivitri sui ogüeyise Jesús, ava rehii avei yuvirecoi supi. ² Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cüritei! —ehi.

Aipo ihe ramoseve, ocuera voi eté.

⁴ —Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuavéhe nde porerecosa nde cuera agüer resendar Moisés porocuaita rupi. Ipipe sui toicua ava nde cuerasa yuvireco —ehi.

Jesús ombogüera sundao rerecuar remimboacua

⁵ Ipare Jesús oguataño, ēgue ehi tecua Capernaum ve oyepota oso. Aheve oime sundao rerecuar Roma iguar. Ahe ou chupe ⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi mbaherasisa ou —ehi.

⁷ —Aviye, cūritei evocoiyase asora imbogüera —ehi.

⁸ —Aní, che Yar, ndiyai eté che rēta pipe nde reique âgua; iyacatu niha cohapeve ereñeheño tēi icuera âgua. Evocoiyase nde ñiehe pipe tēi che remimboacua ocuerara. ⁹ Esepiá, che niha serecua vahe avei no, areco avei sundao che voya. Ahe chupe, “Eso peve” ahese, cūritei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiai eté ava imbahe reroya vahe yuvireco yepi co ava nungar. ¹¹ Che aipo ahe pēu: Setá ava yuguerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiye. ¹² Judío eta rumo, oyeupe ñehesa reroyaéhi pipe setá pítumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaherasicuer rereco yuvireco —ehi oñehe.

¹³ Evocoiyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipare Jesús oso Pedro rētave. Aheve osepiá Pedro rembireco si sohí iteangase vupave ou. ¹⁵ Opocose ipo rese, ahe ramoseve sohí opituhu ichui. Ocuerare, oñarapuha ava rese ohañeco âgua.

Jesús ombogüera setá ava imbaheasi vahe

¹⁶ Ipare pítu ramose setá caruguar vireco vahe ogüeru yuvireco chupe. Jesús rumo ñepei reseve oñehe pipe tēi omombopa caruguar ava rehii sui, iyavei opacatu imbaheasi vahe ombogüera avei no. ¹⁷ Ēgue ehi omboaviye Tūpa ñehe mombehusar Isaías rembicuachiagüer aipo ehi vahe aracahe: “Ahe ae virocia opacatu yande mbaherasisa yande sui iyavei oiporara opacatu mbahe tasi vahe yande rese” ehi.

Oguata pota tēi vahe ava Jesús rupi yuvireco

¹⁸ Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so âgua” ehi.

¹⁹ Ahese Moisés porocuaita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

²⁰ Jesús rumo aipo ehi imboyevi chupe:

—Yavaira rumo ndeu. Esepiá, vīrai vireco guaiti, iyavei aguara vireco oquesa; che rumo, Ava Riquehír, ndarecoi que che rēta ité che pítuhu âgua yepi —ehi.

²¹ Ipare ñepei ivoya aipo ehi chupe:

—Che Yar, che ru manore voi che nde rupiño ité aicora —ehi.

22 —Aní, cûritei voi eyu che rupi —ehi—. Ëgue tehiño ava secocuer omano vahe nungar, ahe ae toñeñeti yuvireco —ehi chupe.

Jesús omombitihu ivitu ai, ohitu vahe avei

23 Ipare Jesús yuviroha güemimbohe reseve yuviraso carite pipe. ²⁴ Ipa pipe yuviraso pucu ramoseve Jesús oque ou. Ahese aviyeteramo têi ivitu ai opûha ipa pipe; i ohitu vahe ndiguayii eté, seni-seni carite oyopi.

25 Evocoiyase semimbohe yuviraso voi imomahe:

—¡Ore Yar, yande rerasora mo co carite ipive! ¡Yande písiro eve! —ehi yuvireco chupe.

26 Evocoiyase aipo ehi:

—¡Mahera pesiquiye! ¡Ndapeyeroyai eté che rese! —ehi güemimbohe upe.

Ahese oñarapuha aipo ehi iit guasu upe, ivitu ai upe avei no: “Pepituhupa” ehi. Aheseve voi opa tupri opituhu yuvireco.

27 —¿Mara ehi rutei pîha co? —ehi têi semimbohe yuvireco chupe—. ¿Mara ehi vahe pîha co ava secoi?

Esepia niha, ivitu, para guasu avei omboyeroya yuvireco no —ehi.

Jesús omboyepepiña caruguar Gadara pendar sui

28 Jesús oguataño güemimbohe eta reseve oyepota ipa rovai Gadara iví rese yuviraso. Aheve ñuvirío ava caruguar vireco vahe yugüeru sovaichi. Ahe ava tehögürer ruvipa rupi têi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe peri rupi yuvireco yepi. ²⁹ Jesús repia ramoseve rumo, oñehe pîrata yuvireco chupe aipo ehi:

—¡Jesús, Tûpa Rahir, eyepepi ore sui! Esepia niha, ndoyepota vítei arinde ore mombaraísu âgua oreu —ehi têi yuvireco.

30 Namombriimi cuchi rehii yuvirecoi ichui. ³¹ Caruguar evocoiyase aipo ehi yuvireco chupe:

—Ore mombopaño têi eve evocoí cuchi rese —ehi.

32 —Aviye, peso —ehi caruguareta upe.

Aipo hese, caruguar opa yuvinose ava sui, yuviroique cuchi rehii aviterve. Ipare rumo cuchi ndayaracua iri yuvireco; iiví socuer rupi yuvinoña yuviraso, opa ipa pipe ocañi têi yuvireco.

33 Yuvinoña evocoiyase cuchi rârosar tecuave yuviraso opacatu mbahe güembiepia mombehu ava upe yuvireco. ³⁴ Ichui opacatu ava tecua pendar yuvinose ati Jesús upe, “¡Eso coháve sui!” ehi yuvireco chupe.

9

Jesús ombogüera ava ndoguatai vahe

1 Ipare Jesús oha carite pipe osasa iri ipa rovai oso güecua Capernaum ve. ² Aheve, ava ndoguatai vahe omboyovai seraso imbaheasi vahe ríru pipe yuvireco chupe. Ahe oicuase co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopoase, che ñero nde angaipa rese ndeu —ehi.

3 “¡Co mbia oyemboívate ai têi vahe, Tûpa ñehe nungar pipe têi oñehe!” ehi Moisés porocuaita rese oporombohe vahe yuvireco chupe. ⁴ Jesús rumo oicuá ipihañemoñetas, sese aipo ehi chupe:

—¡Mahera pepihañemoñeta rai pe yapisacasa rereco! ⁵ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pîha,

anise, ‘Epūha, eguata’ hesa tie? ⁶ Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoiyase aipo ehi imbaheasi vahe upe:

—Epūha, esupi nde rupa seraso nde rëtave —ehi.

⁷ Ahese opūha voi, oso güëtave. ⁸ “¡Too! ¿Mara ehi rutei vo?” ehi ava rehií yuvireco imboeteisave. “Esepia, ahe niha ombou opíratasa ava upe” ehi yuvireco chupe.

Jesús, “Erio che rupi” ehi Mateo upe

⁹ Ichui osose Jesús, che repia, che Roma pendar mborerecuuar guasu upe guarepochi rerocuasa mesave che rëise. Ipare aipo ehi cheu:

—Erio che rupi —ehi.

Evocoiyase apūha, aso voi supi.

¹⁰ Ahe ari pipeve Jesús güemimbohe reseve yuviroique che rëtave. Ambocaru setá ambuae ava guarepochi Roma pendar mborerecuuar guasu upe monuhasar reseve, ava angaipa viyar yuvirecoi vahe reseve avei.

¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nun gar ava angaipa viyar pâhuve têi? —ehi seroírosa pipe yuvireco chupe.

¹² Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopôsano vahe; imbaheasi vaheño rumo oseca yuvireco. ¹³ Peyapisaca icuachiapri aracahendar aipo ehi vahe rese: ‘Poroparaisuerecosa aipota; ndaiptai mbahe cheu serocuavéhepri têi’ ehi. Esepia, ndayui ava seco catupri vahe reca, ñgue ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

¹⁴ Ipare Juan Oporoäpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoiyase nde remimbohe eta ndoyecuacui yuvireco yepi? —ehi yuvireco chupe.

¹⁵ Ahe rumo omboyevi ahe ava upe:

—¡Ndiyai eté ichohopri mendasave ndoyembovihai yuvireco imer oicovese ipâhuve! Oimera rumo ari imer reraso ãgua ichui curi. Ahese ramo oyecuacura yuvireco cute —ehi.

¹⁶ “Ndipoi chietera revo que ava oturucuar cuacula oyapete vahe turucuar ipiasu vahe pipe. Esepia niha, yapetesu ipiasu vahe oichohoño turucuar cuacula imondoro. Ichorosa evocoiyase tuvicha catu-catuno ité. ¹⁷ Iyavei ndiyai ava uva ricuer piasu oyapocatu siru mbahe pirer cuacula vahe pipe. Ñgue ehise, mbahe pirer opura viña, ocañi têira, uva ricuer avei evocoiyase ocañi têi aveira viña no. Acoi uva ricuer ipiasu vahe mbahe pirer ipiasu vahe pipe yapocatupri rumo oyoya ndoyemomarai yuvireco” ehi.

Jairo rayri iyavei cuña Jesús turucuar rese opoco vahe

¹⁸ Jesús oporombohe viteseve, ou mborerecuuar oñenopihá sovai aipo ehi chupe:

—Che rayri mo cûritei omano pota ité. Yaso, nde eremondose rumo nde po sese oicovera —ehi chupe.

¹⁹ “Aviye” ehi. Evocoiyase opūha yuviraso güemimbohe reseve supi.

²⁰ Ahe pipeve cuña doce araviter rupi suví ndopai vahe opoco saquicuei cotí iturucuar popi rese. ²¹ Esepia, ahe aipo ehi opihá pipe: “Yepe

que iturucuar popi resemi tēi apocora, acuerara rumo” ehi. ²² Jesús evocoiyase oyemboyere cuña rese aipo ehi chupe:

—Che rayri, eyemopoase, erecuera cūritei nde yeroyasa pipe —ehi.

Aipo ihe ramoseve, cuña ocuera voi eté.

²³ Oyepotase Jesús mborerecuar rētave, osepia omimbí vahe iyemoin-gatupase omano vahe tī ãgua, ava yaseho atise avei no. ²⁴ Ahese aipo ehi ava oyaseho vahe upe:

—Pesēpa cohabe sui. Co cuñatai nomanoi; oque tēi ou —ehi.

Ahe ava rumo opucaete atiño seroyaēhisave yuvireco. ²⁵ Ichui opa ava omose, ahese oique oi pipe oipopisi cuñatai. Evocoiyase ahe oñarapuha voi. ²⁶ Co sembiapo evocoiyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoī vahe

²⁷ Acoi osēse evocoí oi sui Jesús, ahese ñuvirío ndasesapisoī vahe osaquiue moña, osapucai yuvireco chupe aipo ehi:

—¡Jesús, David suindar, ore paraisuerecomi tēi eve! —ehi pucu-pucu yuvireco chupe.

²⁸ Oi pipe seíquese, oyemboya ndasesapisoī vahe yuvireco sese. Ahese Jesús oporandu chupe:

—¿Che reroya ité vo pe mbogüera ãgua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pēu —ehi.

³⁰ Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepepi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñehengatui vahe

³² Ichiri ramoseve rumo, ambuae ava viroyepota ava niñehengatui vahe caruguar rerecosar Jesús upe yuvireco. ³³ Ichui omosese caruguar, iñehengatui cute. Sepiase opacatu ava,

—¡Too! —ehi—. ¡Ndasespasiai vahe ité co nungar mbahe yande recua pipe yepi! —ehi tēi yuvireco.

³⁴ Fariseo eta rumo aipo ehiño yuvireco:

—Caruguar rerecuar píratasa pipe co mbia omose caruguar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tūparo yacatu. Omombehu tecovesa aviyé vahe Vu mborerecuasa resendar iyavei oporombogüera opacatu-catú tēi mbaherasisa sui avei no. ³⁶ Osepiase ava rehii, oiparaisuereco yuvireco. Esepiá, ahe oñemosaoño tēi mbahe rasicuer pāhuve inungar ovesa ndovirecoi vahe guārosar yuvireco ³⁷ Evocoiyase aipo ehi güemimbohe upe:

—Supi eté mbahe miti imonuhapirā setá iteanga; sese oporavíqui vahe rumo moviromi tēi. ³⁸ Sese peporandu mbahe miti Yar upe, ahe tomondo ava imonuha ãgua —ehi güemimbohe eta upe.

¹ Evocoiyase, “Perio” ehi Jesús doce güemimbohe upe. Chupe omondo güeco píratasa caruguar ava sui imboyepepi água iyavei iporombogüera água opacatu-catu tēi mbaherasisa sui.

² Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan; ³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; ⁴ iyavei Simón, güecua rese secatéhi vahe pāhu pendarer; ipa vahe Judas Iscariote, ahe Jesús omondo vahe yamotaréhimbar upe.

Jesús oyocuai güemimbohe Vu mborerecuasa mombehu água

⁵⁻⁶ Ipare oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ēgue ehi tēi secocuer yuvireco. Evocoiyase pesoi rene ndahei vahe judío recua rupi iyavei ndapeiquei chira tecua Samaria ve” ehi. ⁷ “Judío recua rupi pesoseve, ‘Cōimi Tūpa mborerecuasa secoi yandeu’ peyera imombehu. ⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei caruguar pemboyepepi serecosar sui. Esepia niha, peipisi píratasa ndasepii vahe. Sese peyapoño evocoi mbahe guarepochi pisiéhisa pipe.

⁹⁻¹⁰ “Ava oporavíqui pipe sui ocaru yepi. Sese ndaperasoi chira guarepochi peyese. Ndaperasoi chiaveira pe mbahe ríru, iyavei ambuae pe turucuar, pe pítaqui; peyesendar güeraño tupri perasora. Pe pococa avei ndaperasoi chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, aheste ramo pesora ichui” ehi. ¹² “Evocoiyase peique ramoseve oi pipe, peyapora, ‘Avírave, Tūpa tape rovasa’ peyera chupe. ¹³ Acoi aviyese oi pipendar ava pēu, ahe oipisira Tūpa porovasasa; acoi ndahaviyeise rumo ava, ndoipisi chira Tūpa porovasasa yuvireco. ¹⁴ Acoi ndosendu potaise pe ñehe, ndape pisi potaise avei yuvireco, aheste pesēño ahe oi pipe sui, anise tecua sui. Peipipetera pe pi ivi rātachigüer sui, pesē pecua ichui ‘toipisi Tūpa ñemoirosa yuvireco’ pe yapave. ¹⁵ Evocoiyase supi eté arí cañi oyepotase co tecua upe, ivate catura Tūpa ñemoirosa ava Sodoma, Gomorra iguar upendar sui curi” ehi.

Yamotaréhimbar Jesús reroyasar

¹⁶ “¡Pesendu tupri che ñehel! Che opomondo ovesa nungar ava mbahe mimba oñaro ai vahe nungar pāhuve. Sese peresaeté tuprira peyese mboi nungar, iyavei inungar apicasu seco tupri vahe peicora. ¹⁷ Iyavei peicua catu peamotaréhimbar sui. Esepia, mborerecuuar rovai pe rerasora iyavei pe nupara otúparo pipe yuvireco, ¹⁸ ichui pe reraso aveira mborerecuarea itave catu vahe rovai yuvireco che recocuer sui tēi, ēgue peyera peñeha che recocuer rese chupe iyavei ava ndahei vahe judío upe avei. ¹⁹ Acoi pe rerasose mborerecuuar upe yuvireco, ‘¿Mbahe pīha amombehura chupe?’ ndapeyei chira; acoi peñeha potase rumo, Tūpa omondora pe ñehe água pēu. ²⁰ Esepia, ndahei chira peyesui tēi peñeha, pe Ru Tūpa Espíritu pemoñeha ucara.

²¹ “Ipare rumo ava vivi omondora oamotaréhisar upe ‘toyuca yuvireco’ oya. ēgue ehi aveira ava guahir upe; tahir avei oyamotaréhira oyesupa yuca uca água yuvireco che recocuer rese. ²² Iyavei opacatu ava

ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipisíopri yuvirecoira curi.²³ Iyavei acoi pe mañeco tēise ñepei tecuave yuvireco, ahese peyepepiñora ichui ambuae tecua pipendar upe che recocuer mombehu água. Supi eté Ava Riquehir oura ndapemboaviye viteiseve pe guatasa judío recua rupi.

²⁴ “Ñepei yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui.²⁵ Iyavei semimbohe, ‘Aviye ité’ ehiñora ombohesar osecoupitise. Ëgüe ehi aveira mbiguai güerecuar upe. Acoi oí yar upe: ‘Caruguar rerecuar Beelzebú’ ehise, aipo ehi aveira niha oí pipendar upe yuvireco no” ehi.

¿Uma sui pīha siquiyesara?

²⁶ “Sese ndapesiquiyei chira ava pe amotarëhimbar sui. Esepiá, yaposa vahe imombehupirëhi cûritei, icuasaño itera curi; iyavei mbahe ñomipri, icuasaño aveira no.²⁷ Acoi che amombehu vahe pítmimbisave pëu, pe mombehu ari pipe coiyé, iyavei acoi amombehu vahe pëuñomi, perosapucaí pe rëta haríve imombehu opacatu ava upe.²⁸ Iyavei ndapesiquiyei chira acoi ava peyuca potasar sui. Esepiá, ndoicatui niha ava hâ mocañí água yuvireco. Tûpa sui rumo pesiquiye catura. Esepiá, ahe oicatu yande retecuer, yande hâ reseve imocañí água tata guasu pipe” ehi.

²⁹ “Yamondo niha ñuvirío vîraimi repirâ ñepei mi guarepoche yepi. Yande Ru Tûpa ndoipotaise rumo, ndoviapi chietera que ñepei vîraimi” ehi.³⁰⁻³¹ “Sese pesiquiye eme. Esepiá, pe niha ivate catu vahe ité peico opacatu vîrai sui. Supi eté Tûpa niha oicua opacatu ñepei-peí pe ha retacuer” ehi.

“Che aicua Jesucristo” ehi vahe opacatu ava rovaque

³² “Acoi ava ‘che aicua Jesucristo’ ehi vahe opacatu ava rovaque, che avei evocoiyase: ‘Co ava che rupindar secoi’ ahera che Ru iva pendar upe.³³ Acoi ava ‘che ndahei Cristo rese aico’ ehi vahe rumo cheu ava rovaque, che avei evocoiyase, ‘Ndahei co che rupindar secoi’ ahera che Ru iva pendar upe.

Jesús reroyasa pipe sui oimera yeamotarëhisa

³⁴ “Mbahe tupri ai revo güeru co ivi pipe’ ndapeyei chira cheu. Ëgüe ehi rumo che yusa omoime ucara yeamotarëhisa.³⁵⁻³⁶ Sese ava oñemu ae oyeamotarëhi-rêhira yuvireco; ava oyesupa oyamotarëhira, iyavei cuña membrí osí oyamotarëhira, cuña vovayar oyamotarëhi aveira.

³⁷ “Iyavei acoi oyesupa tēi osaisu catu vahe che sui, ahe ndiyai eté secoi che voyará; inungar avei osaisu catu vahe guahir, anise guayri che sui.³⁸ Iyavei acoi noñemosai vahe mbahe rasicuer upe, inungar-ra curusu rese ovosíi vahe ité viña che rupi oguata pipe, ahe chupe ndiyai eté che voya seco água.³⁹ Acoi ava oipisíro pota vahe güecocuer tēi, ahe ocañí têira; acoi omocañí vahe rumo güecocuer che recocuer rese, ahe oñepisirora” ehi Jesús güemimbohe eta upe.

Porerecosa resendar ñehesa

⁴⁰ “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar.⁴¹ Acoi ava oipisi tupri vahe ambuae ava Tûpa ñehe mombehusar secosa rese, ahe oipisi aveira porerecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porerecosa inungar tupri.⁴² Iyavei acoi

omondo vahe que chīhi i sōhisa vahe que ñepei seco mbegüemi catu vahe toihu che reroyasar seco rese, ahe oipisi aveira Tūpa suindar porerecosa” ehi.

11

Juan Oporoāpiramo vahe ovoya omondo Jesús recocuer cua uca āqua

¹ Opase Jesús oyocuai doce güemimbohe, ahese yuviraso oporombohe Tūpa Ñehengagüer rese judío recua rupi yuvireco.

² Ahese Juan Oporoāpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese ³ imborporandu āqua: “¿Nde ité vo Tūpa Rembiporavo aipo sārombri ereico? anise, ¿oime tie ambuae orosāro vaherā?” ehi yuvireco chupe.

⁴ Ipare omboyevi chupe aipo ehi: “Peso, pemombehupa Juan upe mbahe pe rembiepia iyavei pesendu vahe. ⁵ ‘Ndasesapisoí vahe osareco tupri cūritei yuvireco, ipāri-pāri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa písirosa resendar ñehesa’ peyera chupe. ⁶ ¡Ovharetera acoi ava oyeroyaño vahe che rese!” ehi Juan rupindar upe.

⁷ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave capihiata ivitú ombova-mbova vahe nungar pīha? ⁸ Anise, ¿pesepia tie iturucuar po-rañete ai vahe iyemboeteise? ¡Aní! Ëgüe ehi vahe rumo secoi mborerecuar guasu rētave yepi. ⁹ Evocoiyase pesepiase, ¿‘Ava’ peye vo pe chupe? ¿Tūpa ñehe mombehusar ité pīha? Taa, ahe ité. Evocoi niha ivate catu vahe Tūpa ñehe mombehusar sui. ¹⁰ Ahe chupe ité Tūpa icuachiapri aracahendar pipe aipo ehi:

‘Che amondora nde renondeve che ñehe mombehusar nde raperā moin-gatu āqua’ ehi.

¹¹ Supi eté ndipoi que ñepei ava seco ivate catu vahe Juan Oporoāpiramo vahe sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

¹² “Juan yusa suive tupri Tūpa povri pendar oiporara mbahe tēi yuvireco. Osāha-sāha ava opíratasa pipe imocañi āqua. ¹³ Opacatu Tūpa ñehe mombehusar rembicuachía pipe, Moisés porocuaita icuachiapri pipe avei imombehusa Juan yusa rupive co Tūpa mborerecuasa resendar. ¹⁴ Yepe yavaira seroya āqua pēu viña, Juan rumo, Tūpa ñehe mombehusar Elías. Ahe imombehupri ou vahe. ¹⁵ Acoi ava osendu pota vahe che ñehe, toyapisacaño sese” ehi.

¹⁶ “¿Mbahe rese pīha amboyoyara ava recocuer cūriteindar? Esepia, co ava inungar acoi chīhivahé iguayi tēi vahe ocar rupi. Ipare oñeho pucu-pucu omborípar upe yuvireco aipo ehi: ¹⁷ ‘Oromoñehe tēi mimbi pēu, ndapepívoi eté rumo iyavei orosapucai tēi sapucaisa viharéhisa resendar pēu, pe rumo ndapeyasehoi eté’ ehi. ¹⁸ Esepia, ouse Juan Oporoāpiramo vahe, ahe ndohui tembihu sepirusu ai vahe iyavei ndohui uva ricuer ipírata vahe, sese, ‘Co mbia caruguar vireco vahe oyese’ peye tupri tēi chupe. ¹⁹ Coiye che ayu, Ava Riquehir; acaru, aihu tupri avei. Ipare, ‘Co icaru guasu ai vahe secoi, iihu guasu ai vahe avei’ peye cheu; ‘Ava angaipa viyar mborípar tēi iyavei guarePOCHI rerocuasar mborípar

tēi' peye avei cheu. Acoi ava supi eté vireco vahe Tūpa mbahecuada, ahe icuasara sembiapo rese yepi" ehi.

Tecua ndiporoyerai vahe

²⁰ Ahese Jesús oñehe pírata moviro tecua pendar upe. Esepiá, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocuerai Tūpa upe nara yuvireco. Evocoiyase aipo ehi chupe: ²¹ "¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepiá, acoi poromondiisa pe pāhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharéhisa resendar, tanimbu avei omondora oāca rese oangaipa mboasisa pipe yuvireco viña no. ²² Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye. ²³ Pe avei no, tecua Capernaum pendar pemoha co ivave pe reco água viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pāhuve yaposara viña, cūritei oime vitera ahe tecua viña. ²⁴ Sese, pe peipisira ivate catu Tūpa ñemoirosa ava Sodoma iguar sui ari cañi pipe coiye" ehi.

Peyu cheu mbituhusa reca

²⁵ Iyavei ahe ari pipe Jesús oyerure: "Che Ru, aviye ndeu. Nde niha iva pendar; ivi pipendar Yar ereico. Esepiá, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe. ²⁶ Ëgüe ere niha mbahe nde remimbotar apo, che Ru" ehi.

²⁷ "Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoí nungar upe aicua uca tuprira. ²⁸ Peyu cheu opacatu icuerai vahe. Che amondora pe pituhu água. ²⁹⁻³⁰ Peico che povriva, peyembohe avei che sui. Esepiá, che ndache reco asii, iyavei che povriva pe recosa ndayavaimi eté. Ahese ramo oimera mbituhusa pēu" ehi.

12

Mbituhusa ari pipe Jesús remimbohe oipoho trigo yuvireco

¹ Mbituhusa ari pipe Jesús yuviraso güemimbohe rese, oguata mbahe miti pāhu rupi. Ahese semimbohe ndasiepoi. Evocoiyase trigo rāhii oipoho-pohomi güemihura yuvireco. ² Fariseo yuvirecoi vahe osepiase, aipo ehi Jesús upe:

—Esepiá nde remimbohe. Oporavíquño mbituhusa ari pipe yuvireco —ehi yuvireco chupe.

³ Ahe rumo omboyevi ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco.

⁴ Ahe niha yuviroique ité tūparo pipe pan imboeteipri Tūpa upendar hu água ondugüer reseve. Ahe chupe acoi ndipotasaí ihu água yuvireco viña. Judío pahi yuvirecoi vahe upeño ité niha ipotasa ihu água yepi.

⁵ ¿Ndapeyeroquii vo Moisés porocuaita resendar pipe? Esepiá, judío pahi tūparo rese hañecasar ndopituhui eté tūparo pipe yuvireco mbituhusa ari

pipe yepi. Ndahei rumo oyemboangaipa ipipe yuvireco.⁶ Cūritei cohavé oime ava ivate catu vahe tūparo sui.⁷ Evocoiyase pe ndapesenducuai eté Tūpa Ñehengagüer aipo ehi vahe: ‘Che aipota peporoparaísuereco, aní chira peropovéhepa porerecosa mbahe mimbá tēi cheu’ ehi vahe. Pesenducuase viña, ahese, “Oyaví mbahe” ndapeye voi chira che remimbohe mbahe ndoyavii vahe upe viña.⁸ Esepio, Ava Riquehir mbituhusa arí rerecuar ité secoi —ehi fariseo eta upe.

Mbia ipo nomii vahe Jesús ombogüera

⁹ Ichui osose Jesús, oique judío tūparove.¹⁰ Aheve oime mbia ipo co cotigüer nomii vahe. Aheve avei fariseo, “Yaiñehengapo angahu Jesús” ehi yuvireco viña. Sese,

—¿Iyaño pīha mbituhusa arí pipe ava imbogüerasa yepi’ —ehi yuvireco chupe.

¹¹ Evocoiyase Jesús aipo ehi imboyevi:

—¿Ava vo pe pāhu pendar acoi mbituhusa arí pipe oviapise seimba ovesa ivicuarve ndosoi chira senose viña?¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa arí pipe yepi —ehi.

¹³ Ahese aipo ehi aipo mbia upe:

—Eichoho nde yiva —ehi.

Evocoiyase oichohose oyiva, ocuera tupri voi inungar ambuae iyiva.

¹⁴ Evocoiyase fariseo opa yuvinose yuviraso oyemoingatu Jesús yuca águia yuvireco.

Yaviye aracahendar imombehupri Jesús recocuer resendar

¹⁵ Evocoiyase Jesús oicuase fariseo piñañemoñetasa, osē oso, ava rehii avei yuviraso supi. Setá avei imbaheasí vahe ombogüera,¹⁶ iyavei, “Che mombehui rene ava upe peyé” ehi.¹⁷ Ëgüe ehi yaviyepa Tūpa ñehe mombehusar Isaías remimombehugüer:

¹⁸ “Co ité che mboyeroyasar che rembiporavo.

Ahe asaisu etepri.

Sese ité ayemboviha.

Amondora che Espíritu chupe.

Ahe omombehu aveira mbahe ihívi vahe opacatu ava ivi pipendar upe.

¹⁹ Noiñehopoepi-epii chira ava, nasase-sasei tēi chiaveira; iyavei ndosendui chietera ava iñehe ocar rupi.

²⁰ Iyavei nomopei chietera que ñepei patavíimi oyeapa vahe; nombogüei chiaveira tataendi sātachiñomi tēi vahe.

Ëgüe ehira mbahe ihívi vahe pipe opacatu secopipa.

²¹ Evocoiyase opacatu tecua pendar ava ndahei vahe judío oyeroyara yuvireco sese’ ehi

Isaías aracahe.

“Jesús vireco caruguar píratasa oyese” ehi tēi ava yuvireco

²² Ichui ava ndasesapisoí vahe, noñehei vahe caruguar rerecosar viraso Jesús upe yuvireco. Evocoiyase Jesús ombogüera. Ahese osareco, oñehe avei.²³ Evocoiyase opacatu ava oyepihamondiisave aipo ehi yuvireco: “¿Tūpa Rembiporavo David suindar pīha co?” ehi yuvireco chupe.

²⁴ Osenduse rumo fariseo, “Co mbia caruguar rerecuar Beelzebú píratasa pipe tēi omboyepepi caruguar ava sui” ehi yuvireco.

25 Oicuaño rumo ipihañemoñeta. Sese aipo ehi: “Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoí mborerecuar píratasa ocañi tēira. Iyavei que tecua pendar, anise, que ava omu rese ovavase oyeupe, oyoya oyemocañi tēira yuvireco. 26 Ëgüe ehi avei caruguar. Esepia, serecuar omboyepepise opovri pendar, ovavara oyeupe yuvireco viña. Evocoiyase ahe oyemocañi tēira yuvireco. 27 Iyavei pe, ‘Beelzebú píratasa pipe sui tēi omboyepepi caruguar ava sui’ peye tēi cheu. Evocoiyase, ¿ava píratasa pipe vo pe voya eta omboyepepi caruguar ava sui yuvireco? Tūpa píratasa pípes, che avei evocoiyase ayapo evocoí nungar ipíratasa pipe. Pe voya ae omboyeecuara pe ñehe pe rembiavi yuvireco pēu. 28 Che rumo Tūpa Espíritu píratasa pipe amboyepepi caruguar ava sui. Sese cûritei pesepia ité Tūpa mborerecuasa.

29 “Iyavei no, que ava oique potase ambuae ava ipírata etepri vahe rētave imbahe rerocua ãgua ichui viña, yipindar opa rane itera oñapichi-pichi. Ipare voi opara vîrocua imbahe ichui.

30 “Iyavei acoi ava ndache mboyoyai vahe, ahe che amotarēhimbar yuvirecoi; acoi ava ndosecai vahe ava cheu nara, ahe omosai tēi yuvireco che sui.

31 “Sese ava upe oimera ñeroisa opacatu angaipa rese iyavei iñehe mara-mara tēi vahe upe avei. Co catu acoi iñehe-ñehe tēi vahe Tūpa Espíritu upe, ahe chupe ndipoi chietera ñeroisa. 32 Iyavei acoi ava oñehe-ñehe tēi vahe che, Ava Riquehir rese, ahe chupe oimeño ñeroisa; acoi oñehe-ñehe tēi vahe rumo Espíritu amotarēhisave, ahe chupe ndipoi chira ñeroisa co ïví pipe iyavei ïvave” ehi Jesús fariseo eta upe.

Ava recocuer icuasa sembiapo rese

33 “Emoatiro tupri ïvira, ahe iha aviyera; nderemoatiro tupriise ïvira, ahe evocoiyase virecora oha naporai vahe. Esepia, ïvira icuasa iha rese. 34 ¡Evocoiyase pe, mboi nungar tēi peico vahe, pe recocuer naporaise, ndapeicatui chira mbahe aviye vahe rese pe ñehe ãgua! Esepia, pe piha pipe sui tēi osē pe ñehe ãgua. 35 Iyavei acoi ava aviye vahe oñehe tupri opichañemoñeta catuprisa pipe; acoi ava recocuer naporai vahe rumo, opichañemoñeta raisa pipe tēi oñehe. 36 Sese ari cañi pipe opacatu ava opara omombehu oñehe-ñehe tēisa Tūpa rovai yuvireco. 37 Esepia, pe ñehe aviye vahe reprí peipisira, pe ñehe naporai vahe reprí peipisi aveira” ehi Jesús.

Ava eta ndaseco pôrai vahe oporandu poromondiisa rese yuvireco

38 Evocoiyase fariseo iyavei Moisés porocuaita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua ãgua —ehi yuvireco.

39 Jesús rumo omboyevi iñehe:

—Pe ava ndaseco pôrai vahe, ndiporeroyai vahe, peporandu tēi poromondiisa tecocuer cua ãgua rese. Che rumo namboyeecuai chira ambuae poromondiisa; Jonás recocuer rese güeraño opomomahenduhara.

40 Esepia, inungar Jonás secoi mbosapi ari pira guasu aviterve aracahe, ëgüe ehi aveira Ava Riquehir mbosapi ari ïvivriye tuira omano vahe pâhuve. 41 Evocoiyase ari cañi pipe ava tecua Nínive pendar porandusave omombehura ava cûriteindar cañipa ãgua. Esepia, Nínive pendar niha

omboasise oangaipa, oyevi Tūpa upe yuvireco Jonás omombehuse Tūpa Ñehengagüer chupe. Cûritei rumo oime Jonás sui aviyé catu vahe pe pâhuve.⁴² Iyavei ari cañí pipe cuña mborerecuar guasu irohi cotí secua vahe porandusave, omombehura cûriteindar ava cañípa ãgua. Esepiá, ahe ou amombrí sui Salomón mbahecusa rendu ãgua. Cûritei rumo oime ívate catu vahe Salomón sui—ehi fariseo eta upe.

Caruguar oyevi iri ava güeco agüerve

⁴³ “Iyavei caruguar osëse ava sui, oguata têi ivi ipiru vahe rupi opituhu ãgua reca. Ipare rumo ndoyosuise, ipihañemoñeta,⁴⁴ ‘Ayevi irira che reco agüerve vicho’ ehi. Aheve oyevise, osepiá iri secocuer inungar oí ndiporusai vahe, sahuvapri tupri.⁴⁵ Sepiase, oso siete caruguar naporai catu vahe reca. Ichui güeruse, oyoya guasu yuviroique co mbia piña pipe. Sese mbahe têi catu ité secocuer yipindar güeco agüer sui. Ëgue ehi aveira ava cûriteindar ndaseco pôrai vahe upe” ehi.

Jesús si, tivireta avei

⁴⁶ Jesúsi oñehe viteseve ava upe, ahese ichí, tivireta reseve ocarve yuvinohai. Ahe oñehe pota yuvireco chupe.⁴⁷ Evocoiyase mbia omombehu Jesúsi upe:

—Nde si, nde rivireta reseve co ocarve yuvinohai. Ahe oñehe pota yuvireco ndeu—ehi.

⁴⁸ Ahe rumo,

—¿Ava piña che si; ava piña che rivri? —ehi ahe mbia upe.

⁴⁹ Evocoiyase omboyecua opo pipe güemimbohe eta aipo ehi:

—Co che si eta, co che rivireta.⁵⁰ Esepiá, acoi che Ru íva pendar remimbotar oyapo vahe, ahe che rivri, che reindrí iyavei ahe che si yuvirecoi—ehi.

13

Mbahe miti sui yembohesa

¹ Ahe ari pipe Jesúsi osë oí sui oso, oguapi ipa popive oí.² Aheve ava oñemonuha atise yuvireco, oha carite pipe oguapi oí, evocoiyase opacatu ava opita ipa popi rupi yuvireco.³ Ahese omboyoya-yoya oporombohesa setá mbahe rese aipo ehi:

“Ñepei mbia osë omaheti oico.⁴ Ahe otiapi-apiise mbahe râhii oso, moviro oiti peri rupi. Vírai ogüeyise rumo sese, opaño yuvirohu.⁵ Iyavei moviro oiti ivi nayanai vahesave ita pâhuve. Sese cûriteimi sori;⁶ ari tasise rumo, opaño ipiru. Esepiá, ndasapoi niha.⁷ Iyavei ambuae mbahe râhii oiti yu pâhuve. Ahe yu rumo sori poyava catu yuvireco ichui. Sese opaño oyopi.⁸ Ambuae rumo oiti ivi aviyé vahesave, ahe setá iha imonuhasa; ñepei ihí sui osë cién iha, ambuae sui osë sesenta, ambuae sui treinta.⁹ Acoi ava osenducua pota vahe che ñehe, toyapisacaño sese” ehi Jesúsi ava eta upe.

¿Mahera piña co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesúsi rese yuvireco mbahe rese oporandu ãgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi.¹¹ Jesúsi aipo ehi: “Pëu rumo Tûpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté.¹² Esepiá, acoi vireco vahe

upe, imondosa catura; acoi ndovirecoi vahe evoco osenducua raimi vahe serocuasañora ichui.¹³ Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tēi, ndosepiacuai rumo yuvireco iyavei osendu tēi, ndosenducuai avei yuvireco no.¹⁴ Na ehi yaviye Tūpa Ñehengagüer Isaías remimombehu: ‘Pe niha pesendu tēira, ndapeicuai chira rumo; iyavei pesepia tēira, ndapesepiacuai chira rumo.

¹⁵ Esepia, evoco ava eta upe yavai eté ipiha pipe imbahe reroya ãgua, ndayapisai eté sendu potaëhisave; ndoyemboesapisoí avei sepia potaëhisave.

Esepia, ndosenducua potai opiha pipe yuvireco cheu oyevi potaëhisave ombogüera ãgua’ ehi

Isaías aracahe.

¹⁶ “Pe rumo perorivete ité sepiacuase, pesenducuase avei no.¹⁷ Supi eté setá Tūpa ñehe mombehusar iyavei ava seco catupri vahe araca-hendar osepia pota tēi mbahe pe rembiepia, ahe rumo ndosepiai eté yuvireco; iyavei osendu pota tēi co pe remiendu, ahe rumo ndosendui avei yuvireco” ehi Jesús güemimbohe eta upe.

Jesús omombehu yembohesa mbahe miti resendar

¹⁸ Ipare aipo ehi: “Peyapisaca omaheti vahe recocuer rese.¹⁹ Acoi osendu tēi vahe Tūpa Ñehengagüer imbororecuasa resendar, ipare rumo ndosenducuai, ahe inungar acoi mbahe rāhii oviapi vahe peri rupi. Ipare rumo caruguar ou chupe. Ahe ipiha pipe osendu vahe Tūpa Ñehengagüer opa tupriño omocañi ichui.²⁰ Iyavei acoi mbahe rāhii seitipri ita pāhuve, ahe inungar ava recocuer yipiño osendu vahe, oipisi vahe avei vorivetesa pipe Tūpa Ñehengagüer.²¹ Ipare rumo inungar co mbahe miti ndovirecoi vahe guapo ovíracua ãgua, ëgue ehi avei evoco nungar ava oimese mbahe-mbahe tēi Tūpa Ñehengagüer sui chupe, cûriteimi seroyaëhisave oyepepi ichui.²² Acoi mbahe rāhii seitipri yu pāhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saisusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Ñehengagüer rupi. Sese secocuer ndaviye iri eté, inungar mbahe miti ndihai vahe.²³ Acoi itisa vahe mbahe rāhii ivi aviye vahe rese, ahe inungar ava osenducua vahe Tūpa Ñehengagüer. Iyavei inungar acoi co mbahe miti ihá iteanga vahe, ëgue ehi avei ava secocuer aviye vahe inungar ñepei-peí sâhii sui osé que cien iha, sesenta iha, anise que treinta” ehi Jesús güemimbohe eta upe.

Trigo pāhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa oyoya vahe: “Tūpa mbororecuasa oyoya tupri ava oivi pipe mbahe rāhii oñotí vahe rese.²⁵ Opacatu ava queseve rumo oyejota yamotarëhisar, caha tēi rāhii oñotí trigo pāhuve oso.²⁶ Acoi trigo iha potase, supive avei sori caha.²⁷ Evocoiyase oporavíquí vahe yuviraso, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rāhii aviye vahe ereñotí nde ivi pipe? ¿Que sui ru caha sori ipāhuve?’ ehi yuvireco chupe.²⁸ Iyar rumo aipo ehi chupe: ‘Oime revo que che amotarëhisar’ ehi. Evocoiyase oporavíquí vahe oporandu yuvireco chupe: ‘¿Ndiyai pīha caha tēi orosapohopara ichui viña?’ ehi.²⁹ Ahe rumo aipo ehi chupe:

‘Aní, aviyeteramo caha rupive pesapoho tiētera trigo’ ehi. ³⁰ ‘Evocoiyase peseya, tocuaucuaño oyoya yuvireco. Yaviyese voi mbahe miti, aheste che ayocuaira oporavíqui vahe caha tēi rane rerocua água imboapuha uca sapi. Ipare oyapocatura trigo rāhii che mbahe apocatusave yuvireco’ ehi ivi yar” ehi Jesús.

Yembohesa mostaza rāhii suindar

³¹ Jesús omombehu iri co ambuae mbahe rese yembohesa oyoya vahe: “Tūpa povri pendar oyoya tupri mostaza rāhii rese. Ahe mbia oñoti vahe oivi pipe. ³² Supi eté co mostaza rāhii tahimi catu opacatu ambuae mbahe rāhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sâca rese vîrai rehii oyapo guaitirâ” ehi oporombohe.

Yembohesa pan mboapeposa sui

³³ Ipare Jesús oporombohe iri ambuae mbahe rese aipo ehi: “Tūpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo água yepi” ehi oporombohe.

Jesús oiporu oporombohe água mbahe rese mbooyoyasa yepi

³⁴ Jesús omombehu opacatu evoco nungar mbahe omboyoya-yoyase oporombohesa ambuae mbahe rese opacatu ava upe. ³⁵ Co rumo na ehi Tūpa ñehe mombehusar rembicuachiagüer aviyé água:
“Che añehese, amboyoyara che porombohesa ambuae mbahe rese. Iyavei amombehura Tūpa ivi apo suive mbahe niperéhii vahe” ehi.

Jesús omombehu tupri oporombohesa caha tēi resendar

³⁶ Aheste Jesús, “Aviyé” ehi ava upe. Ipare oique oí pipe. Aheve semimbohe oyemboyapa yuvireco sese ‘tomombehu trigo pâhuve caha oime vahe resendar yandeu’ oya. ³⁷ Evocoiyase omboyevi chupe: “Acoi ava mbahe rāhii aviyé vahe oñoti vahe, ahe che, Ava Riquehir. ³⁸ Ivi mbahe miti rupa, ahe ava co ivi pipendar. Iyavei mbahe rāhii aviyé vahe, ahe ava Tūpa povri pendar; caha naporai vahe, ahe ava caruguar suindar yuvirecoi vahe. ³⁹ Acoi yamotaréhimbar, oñoti vahe caha, ahe niha Caruguar ité. Evocoiyase arí mbahe miti pohosa, ahe arí cañisa; acoi omonuha vahe mbahe miti, ahe Tūpa rembiguai ivi pendar yuvireco. ⁴⁰ Iyavei inungar acoi caha tēi imonuhapri sapi água, égue ehi aveira arí cañi pipe coiye. ⁴¹ Evocoiyase che, Ava Riquehir, che rembiguai ivi pendar amondora opacatu ava ambuae omboangaipa uca vahe, mbahe-mbahe tēi aposar avei rerocua água che povrîve yuvirecoi vahe pâhu sui. ⁴² Ichui omondopara tata guasuve. Aheve oyaseho tēira iyavei ombotere-tere tēira guái yuvireco. ⁴³ Aheseve voi ava Tūpa reroyasar seco tupri vahe, arí nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

Mbahe repirusu ñomimbrí sui yembohesa

⁴⁴ “Evocoiyase Tūpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tēi oyosura viña. Ahe rumo aheve avei oñomi. Ipare vorivetesu pipe opacatu ombohe omondopa co ivi rerocua água mbahe sepirusu vahe pota raisa pipe” ehi.

Mbohir sepirusu catu vahe sui yembohesa

45 “Iyavei Tūpa mbororecuasa inungar ava mbahe rerocuasar oseca vahe mbohir icatupri vahe yepi. 46 Ahe oyosuse mbohir sepí catu vahe, oso opacatu ombahe mondo co sepí catu vahe rerocua água.

Pira mbohasa sui yembohesa

47 “Iyavei Tūpa mbororecuasa inungar pira mbohasa. Imondopri ipíve. Ipare omboha opacatu-catu tēi pira. 48 Acoi savapipose pira mbohasa, vinose ívi átasave yuvireco. Aheve oiporavo pira aviye vahe oñoñapa ombahe riruve yuvinoi, naporai vahe rumo opaño omombo yuvireco. 49 Ëgüe ehi aveira ari cañi pipe: ahese Tūpa rembiguai iva pendar yuvinosera opacatu ava ndaseco pōrai vahe mboyepepi água ava seco catupri vahe sui. 50 Evocoiyase ava ndaseco pōrai vahe imondosara tata guasuve. Aheve oyaseho tēira iyavei ombotere-tere tēira guái yuvireco” ehi.

Mbahe ipiasu vahe iyavei ocuacua vahe sui yembohesa

51 Evocoiyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

52 Evocoiyase ahe aipo ehi:

—Acoi ava oporombohe vahe porocuaita rese, oyembohe vahe avei che Ru mbororecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

53 Oñehe pare, Jesús osé ichui 54 oyepota güecuave oso. Aheve ombohe ava judío tūparo pipe oico. Evocoiyase ahe pendar ava oyepihamondii tēi:

—¿Que pīha co ava oyembohe catu ombahecua água? iyavei, ¿mara ehi pīha co mbahe poromondiisa apo? —ehi yuvireco—. 55 ¿Ndahei vo acoi carpintero rahir tēi? Ichi niha acoi María, iyavei yuvirecove tivri, ahe Santiago, José, Simón, Judas. 56 Seindri avei niha yuvirecove yande pāhuve. Evocoiyase, ¿que pīha oyembohera viña? —ehi tēi yuvireco chupe.

57 Ipípe sui ndoviroyai yuvireco. Ahe rumo aipo ehi chupe:

—Tūpa ñehe mombehusar niha omboetei opacatu rupi yuvireco yepi. Secua pipendar, sēta pipendar ae rumo nomboetei yuvireco —ehi.

58 Evocoiyase, ahe ava viroyaëhisa rese, moviro tēi oyapo mbahe poromondiisa ipāhuve.

14

Juan Oporoäpiramo vahe mano agüer

1 Ahe ari rupi Herodes, mbororecuuar guasu Galilea pendar, oyandu Jesús reräcua. 2 Evocoiyase aipo ehi opítivíisar upe: “Juan Oporoäpiramo vahe revo ocuerayevi. Sese oyapo poromondiisa ipírata vahe” ehi.

3 Esepio niha, yipíndar Herodes Juan oipisi, oñapichi carena pipe soquenda água vivri Felipe rembireco Herodías sui tēi, 4 “Ndiyai eté nde rembireco nungar ererecora” oyeupe hese.

5 Herodes oyaca pota Juan viña, osiquiyeño rumo ava eta sui. Esepio, ahe, “Tūpa ñehe mombehusar secoi” ehi yuvireco chupe. 6 Acoi Herodes haragüer mboeteisa pipe rumo aipo cuña Herodías membrí osé opívoi ava rehii rembiepiave. Herodes upe evocoiyase aviye ai eté. 7 Sese ahe oyemoingatu ñepei reseve que mbahe oyeupe oporanduse imondo água

chupe.⁸ Evocoiyase ahe cuñatai oyeupe osí remimombehu rupi, aipo ehi Herodes upe:

—Embo Juan Oporoāpiramo vahe ãca poratu pipe cheu —ehi.

⁹ Aipo ñehesa nomboviha eté Herodes; ndiya iri rumo, “Aní” ohe ãgua. Esepiá, opacatu ava güemimbori eta rovaque aipo ehi. Sese, “Taperu chupe” ehiño. ¹⁰ Ahese oporocuai Juan ãca hasia ãgua soquendasave. ¹¹ Ipare víraso poratu pipe cuñatai upe yuvireco. Evocoiyase ahe omondo osí upe.

¹² Ahese Juan remimbohe oyepota yugüeru, víraso sete ñotí yuvireco. Ipare yuviraso Jesús upe imombehu.

Jesús oyopoi cinco mil cuimbahe

¹³ Jesús oyanduse Juan manosa, ahese ahe ae oso ava porēhisave carite pipe. Ava rehii rumo oyanduse, yuvinose voi güecua sui, ivi rupi yuviraso osupití secosave yuvireco. ¹⁴ Evocoiyase osëse carite pipe sui, osepiá ava rehii. Ahese oiparaisuereco ava eta. Sese opa ombogüera imbaheasí vahe serasopri. ¹⁵ Evocoiyase caharuse semimbohe oyemboa yuvireco sese aipo ehi:

—Caharú ité moco cute iyavei ndipoi oí co rupivemi vahe. ¿Ndiyai vo eremondopa ava tecua-tecuami rupi, ahe supi tovirocua mbahe güemihura yuvireco? —ehi yuvireco chupe.

¹⁶—Aní, ndiyai yuviraso. Pe pemondora mbahe semihura yuvireco —ehiño chupe.

¹⁷—Poyandepomi tẽi rumo pan orovireco iyavei ñuviriomi tẽi avei pira —ehiño semimbohe yuvireco chupe.

¹⁸—Peruño ave cheu —ehi güemimbohe upe.

¹⁹ Ipare aipo ehi ava rehii upe: “Peguapi capihi haríve” ehi. Evocoiyase oipisi poyandepomi vahe pan, ñuviriomi vahe pira. Ichui omahese iva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoiyase omboyaho-yaho ava eta upe semihura yuvireco. ²⁰ Evocoiyase opacatu ava ocaru vahe ihitaropa tẽi yuvireco. Ipare semimbohe omboapipopá doce tupri iruova sembihu rumbírer yuvireco. ²¹ Ahe cuimbahe ocaru vahe retacuer cinco mil. Cuña rumo iyavei chihivahe ndipapasai yuvireco.

Jesús oguata i harí rupi

²² Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe. ²³ “Aviye” ohe pare ava upe, oyeupi oso ahe ae ivitri rese oyeroqui ãgua. Pítuse chupe, opitaño ahevè. ²⁴ Aheseve carite oso pucuse ipa popi sui, ivitu ipirata vahe osovaichi yuvireco. Sese ohitu vahe nambegüe-mbegüe ocua sese. ²⁵ Cõhe potase, oguata i harí rupi oso güemimbohe coti. ²⁶ Semimbohe i harí rupi iguatase, oyembosiquíye yuvireco ichui. Sese,

—¡Ndahei vo evocoi háguer secoi! —ehi yuvireco chupe.

²⁷ Güemimbohe upe rumo aipo ehi:

—¡Peyemoviracuaño, che tẽi! ¡Pesiquiye eme che sui! —ehi.

²⁸—Che Yar —ehi Pedro—. Nde ité ereicose, taguata i harí rupi vicho nde piri —ehi.

²⁹—Erio ru —ehi chupe.

Evocoiyase Pedro ogüeyi carite pipe sui, oguata i harí rupi. Osora ipiri viña. ³⁰ Ivitu pírata repiase rumo, osiquiye ichui. Oso senise rumo ipive,

—¡Che Yar! ¡Che p̄isiromi eve! —ehi.

³¹ Ahese cûriteimi voi oipisi Pedro po rese, aipo ehi chupe:

—¡Chihí t̄eí ereyeroya che rese! ¡Mahera ndereyeroya tuprii che rese! —ehi.

³² Oyuvirohase rumo carite pipe, opituhu voi ivitu. ³³ Evocoiyase carite pipe yuvirecoi vahe oñenopiha sovai,

—¡Supi eté catu nde Tûpa Rahir ereico! —ehi yuvireco chupe.

Jesús ombogüera imbaheasi vahe Genesaret pendar

³⁴ Osasase ipa, oyepota Genesaret ivi rese yuviraso. ³⁵ Opacatu ahe pendar ava oicuase Jesús yepota, ahese opacatu tecuami rupi omombehu-mbehu ava upe yuvireco. Evocoiyase viraso imbaheasi vahe chupe, ³⁶ aipo ehi yuvireco: “Topocomi t̄eí nde turucuar popi rese yuvireco” ehi; evocoiyase opacatu sese opoco vahe, ocuerapa voi eté yuvireco.

15

Porombohesa yande mboangaipa vahe resendar

¹ Oyemboya Jesús rese moviro fariseo iyavei Moisés porocuaita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

² —¿Mahera vo nde remimbohe ndoguatai yande ramoi aracahendar aracuasa rupi yuvireco? ¿Mahera vo yande porocuaita mboavíyeéhisa pipe ndoyepoi ocaru água yuvireco yepi? —ehi.

³ Jesús omboyeví aipo ehi chupe:

—Pe no, ¡mahera ndapemboyeroyai Tûpa porocuaita pe ramoi aracahendar aracuasa rupi t̄eí pe guata água! ⁴ Esepia, Tûpa aipo ehi: “Pemboyeroyara iyavei peipítiviira pe ru, pe si avei no. Acoi iñehe mara vahe oyesupa upe, ahe tomanoño” ehi aracahe. ⁵ Pe rumo aipo peye t̄eí: “Acoi ava aipo ehi vahe vu upe, osi upe avei no: ‘Ndiyai chira mbahe mondo água p̄eu. Esepia, che opacatu mbahe areco vahe imondopri Tûpa upe’ ehise, ⁶ ahese ndiyai eté ipítivii água chupe” peye. Ëgüe peye pe aracua raisa pipe pemocañi Tûpa porocuaita peyesui. ⁷ ¡Pe Tûpa reroyasar angahu t̄eí peico vahe! Supi tupri ité Tûpa ñehe mombehusar Isaías rembicuachía aracahendar omombehu pe recocuer:

⁸ ‘Co tecua pendar ava oyuru pipe t̄eí che mboetei yuvireco; ipihañemoñetasa rumo amombri t̄eí che sui.

⁹ Oyerure tupri t̄eí yuvireco cheu.

Esepia, iporombohesa ava porocuaita t̄eí
ehi Isaías rembicuachiagüer pipe aracahe —ehi Jesús imombehu.

¹⁰ Ipare,

—Perio —ehi ava rehii upe—. Peyapisaca, pesenducua tupri che ñehe: ¹¹ mbahe oique vahe ava yuru rupi nomboangaipa ucai. Mbahe osé vahe ava yuru pipe sui, ahe rumo omboangaipa uca —ehi.

¹² Evocoiyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

¹³ Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara sapohosa curi —ehi—. ¹⁴ Ëgüe tehiño yuvireco. Esepia, evocoii inungar ndasesapisoii vahe viroguata ambuae ava ndasesapisoii vahe yuvireco. Ahe evocoiyase oyoya voira oviapi ivicuar pipe yuviraso —ehi.

¹⁵ Evocoiyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

¹⁶ —¿Ndapesenducua vîtei avei catu pe co ñehesa? ¹⁷ ¿Ndapeicuai vo opacatu mbahe acoi ava yuru rupi oique vahe oso yaviterve, ipare osê setecuer sui? ¹⁸ Ava pihañemoñetasa sui osê vahe rumo iyuru rupi, ahe ava omboangaipa. ¹⁹ Esepiá, ava pihañemoñetasa sui osê pihañemoñeta raisa, porapichisa, mendasa sui yemboaguasasa, nomendai vahe yemboaguasa têisa, mondasa, temira iyavei ava rese ñemoñeta têisa. ²⁰ Evoco nungar mbahe rumo omboangaipa ava; ndahei angaipa acoi yande caru renonde yande yepoiëhisa nungar —ehi.

Cuña ndahei vahe judía viroya Jesús

²¹ Ichui osê Jesús oso, oguata Tiro ivi rupi, Sidón ivi rupi avei. ²² Cuña cananea, Tiro, Sidón ivi rese secoi vahe oyemboya Jesús rese aipo ehi:

—¡Che Yar, David suindar, che paraisuerecomi eve! ¡Che membri vireco caruguar oyese! —ehi pucu-pucu ou chupe.

²³ Ahe rumo nomboyevii eté chupe. Evocoiyase semimbohe oyemboya yuvireco sese aipo ehi:

—Emboyepepi co cuña yande sui. Esepiá, sâse pucu-pucu ou yande raquicuei —ehi yuvireco chupe.

²⁴ Evocoiyase aipo ehi güemimbohe upe:

—Che Ru Tûpa rumo che mbou Israel recua pendar upeño. Esepiá, ahe ovesa ocañi têi vahe nungar yuvireco —ehi.

²⁵ Ahe cuña rumo oñenopîha sovai, aipo ehi chupe:

—¡Che Yar, che pîtiviimi eve! —ehi.

²⁶ Ahe rumo aipo ehi chupe:

—Naporai rumo yarocua pan tahir sui cave tohu yamondo vaherä —ehi.

²⁷ —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

²⁸ —¡Cuña, tuvichá nde yeroyasa! Aviye, ëgue tehi eté nde remimbotar rupi —ehi.

Aipo ihe ramoseve, ocuera voi eté imembri.

Jesús setá ombogüera ava imbaheasi vahe

²⁹ Ichui Jesús osê oso ipa Galilea ivii. Ipare oyeupi ivitri rese oguapi oñi. ³⁰ Aheve setá ava oyepota, güeru atí imbaheasi vahe yuvireco chupe: ndipindugüei vahe, ndasesapisoí vahe, ipâri-pâri vahe, niñehengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera. ³¹ Ichui ava niñehengatui vahe oñehé; ipâri-pâri vahe ocuera tupri; ndoguatai vahe oguata avei iyavei ndasesapisoí vahe osareco yuvireco. Sepiase ava rehi oyepihamondii aipo ehi: “Imboeteipri Israel Tûpa tasecoi” ehi yuvireco.

Jesús oyopoi cuatro mil cuimbache

³² Evocoiyase Jesús oñehé güemimbohe upe aipo ehi:

—Iparaisu catu co ava yuvireco cheu. Esepiá, mbosapi ari yuvirecoi yande piri iyavei ndipoi eté mbahe semihura. Ndiyai sétave sie porëhi reseve amondo. Aviyeteramo oviroviapi-api tiëtera tieporëhi peri rupi yuvireco viña —ehi.

³³ Evocoiyase semimbohe aipo ehi yuvireco chupe:

—¿Que sui pīha orosecara tembihu ava rehii upe nara cohave ava porēhisave viña? —ehi yuvireco.

³⁴ —¿Mbovi vo pan pereco? —ehi.

—Orovirecomi siete pan iyavei moviromi tēi pirami —ehi semimbohe yuvireco chupe.

³⁵ Evocoiyase, “Peguapi iví haríve” ehi ava rehii upe. ³⁶ Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoiyase omondopa ava rehii upe yuvireco. ³⁷ Opacatu ava ocaru vahe ihitaro yuvireco. Ipare semimbohe omboapipo iri rane sumbirer siete iruova yuvireco. ³⁸ Cuimbahe ocaru vahe retacuer cuatro mil. Cuña, chihivahé retacuer rumo ndicuasai. ³⁹ Ipare Jesú, “Aviye” ehi ava upe, ahese oha carite piye oso iví Magadán rupi.

16

Fariseo iyavei saduceo oporandu poromondiisa rese yuvireco

¹ Fariseo iyavei saduceo yuviraso Jesú repia secoáha água yuvireco viña. “Emoporéhi Tūpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Arí tupri aira. Esepiá, iva rese pírá iteanga’; ³ iyavei añihive: ‘Co piye arí naporai chira. Esepiá, iva rese píra vai anga, pítu guasu-guasu avei’ peye. Pe niha peicua mbahe iva resendar tēi oyecua vahe mombehu; ndapeicuai rumo mara oyapave co poromondiisa cûriteindar ava upe imombehu. ⁴ Co ava ndaseco pôrai vahe oyepipi vahe Tūpa sui oporandu poromondiisa rese ‘¿Tūpa suindar ité pīha?’ oyapave. Che rumo namboyecuai chira ambuae poromondiisa chupe; acoi poromondiisa Tūpa oyapo Jonás upe güeraño tupri aseyara chupe” ehi.

Ichui oseyapaño ava rehii oso.

Fariseo iyavei saduceo porombohesa inungar pan mboapeposa

⁵ Evocoiyase semimbohe oyepota ipa rovai yuviraso. Pan sui rumo sesarai eté yuvireco. ⁶ Evocoiyase Jesú aipo ehi chupe:

—Peicua catu fariseo iyavei saduceo pan mboapeposa sui —ehi.

⁷ ¡Néhe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tēi oyeupe yuvireco.

⁸ Ahe rumo oicua güemimbohe pihañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tupri che rese!

⁹ ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase? ¹⁰ ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer? ¹¹ ¡Too, mara peye rtei pe aipo senducuaëhi! Ndahei mo pan rese ité añehé. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndahei pan mboapeposa rese ité oñehé, Jesú rumo oñehé fariseo iyavei saduceo eta porombohesa rese tēi.

Pedro oicua uca Jesú Tūpa Rembiporavo secose

¹³ Oye potase Jesús, oso tecua Cesarea cotí Filipo ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? —ehi.

¹⁴ Semimbohe evocoiyase aipo ehi yuvireco chupe:

—Amove ava: “Juan Oporoāpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tūpa ñehe mombehusar mboetasa” ehi yuvireco ndeu —ehi.

¹⁵ —Pe no, ¿Ava co secoi’ peye ru pe cheu no? —ehi güemimbohe upe.

¹⁶ —Nde niha Tūpa supi eté vahe Rembiporavo imombehupri; Tahír ité ereico —ehi Simón Pedro.

¹⁷ —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teiteté omboyecua ndeu —ehi. ¹⁸ Nde Pedro ereico, co ita guasu haríve amopuhara che tūparoguā. Nepei yepe manosa ndosecoreroyii chietera opíratasa pipe. ¹⁹ Evocoiyase che amondo Tūpa mborerecuasa resendar mboisa ndeu; acoi, “Aviye” erese que mbahe uve co ivi pipe, ñgue ehi aveira ivave; iyavei, “Aní” erese que mbahe uve co ivi pipe, ñgue ehi aveira ivave —ehi.

²⁰ Ipare Jesús aipo ehi güemimbohe upe: “Co Tūpa Rembiporavo Poropísiosar’ peye eme ava upe cheu” ehi.

Jesús omombehu omano áqua

²¹ Ichuive tupri Jesús omboipi imombehu güemimbohe upe oico: “Iya niha cheu che so áqua tecua guasu Jerusalén ve. Aheve judío rerecuar, pahi rerecuar ivate catu vahe iyavei Moisés porocuaita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi. ²² Pedro rumo víraso co cotími chupe oñehengata áqua:

—¡Tūpa ndoipotai eté evocoí nungar nde reco áqua, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esiri che sui, Caruguar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tūpa upendar rese, ava nungar tēi nde pihañemoñeta eico —ehi.

²⁴ Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovo sierra viña, toyemoingatu voi che recocuer rese oparaísu áqua iyavei toguata tupri che rupi. ²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisirora. ²⁶ Esepia, ¿aviye ai angahu pīha ava upe opacatu mbahe co ivi pipendar pīsi áqua, ahe ae tēi omocañise güecocuer yuvireco viña? ¿Mbovi pīha omondora ava güecocuer repirá viña? ²⁷ Esepia che, Ava Riquehir, ayevira che Ru reco píratasa pipe che rembiguai íva pendar reseve curi. Che evocoiyase aicuara ñepei-peí ava rembiapiro agüer rupi chupe. ²⁸ Supi eté oimera amove coháve ava nomano vitei chivaherá, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

¹ Seis ari pare Jesús viraso Pedro, Santiago, tivri Juan reseve co cotí ivitri ivate vahesave oyeupi. ² Aheve, aviyeteramo tēi oñecuñaro güemimbohe rovai. Evocoiyase sendi sova inungar ari, iturucuar morochí, sendi avei. ³ Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha. ⁴ Ahese Pedro aipo ehi chupe:

—Che Yar, iaviye ai eté cohaye yaico! Ereipotase, ayapora mbosapi teyupami: ñepei ndeu nara, ambuae Moisés upe, ambuae evocoiyase Elías upe nara —ehi.

⁵ Aviyeteramo tēi iva quihá rese osesapé ogüeyi ou oyopipa tupri ité. Ipáhuve oyeendu ñehesa aipo ehi: “Co che Rahir, che rembiaisu. Che mbovharete; peyapisaca catu iñehe rese” ehi vahe.

⁶ Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui. ⁷ Ahese oyemboya oso güemimbohe rese, oñatoi aipo ehi chupe:

—Pepúha; pesiquiyei rene —ehi.

⁸ Evocoiyase omahe yuvireco sese, ahese ahe güeraño osepia imoha yuvireco.

⁹ Ipare yuvirogüeyi ivitri sui aipo ehi evocoii mbosapi güemimbohe upe:

—Ndapemombehui chietera que ñepei ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoiyase semimbohe oporandu yuvireco:

—¿Mahera ru Moisés porocuaita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoiyase omboyevi güemimbohe upe aipo ehi:

—Elías rane ité niha oura opacatu mbahe moingatu água curi. ¹² Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe ahe aveira niha cheparaisura ahe ava povriva vichico —ehi.

¹³ Evocoiyase semimbohe osenducua ramo iñehe yuvireco. Ëgüe ehi Jesús oñeho Juan Oporoäpiramo vahe rese.

Jesús ombogüera chihivahe caruguar rerecosar

¹⁴ Viroyepota Jesús güemimbohe ava rehiisave seraso. Aheve mbia oyemboya oso sese, oñenopicha sovai aipo ehi chupe:

¹⁵ —Che Yar, ereiparaísurecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer ovíapi tatave, íve avei no. ¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —¡Too, ndapeyeroya tupri vité eté che rese! ¡Co cotí tēi vité pe piñañemoñetas! ¡Mbovi rupi rutei vo aico vitera pe pâhuve che ñemosasa pipe! Peru evocoii chihivahe cheu —ehi.

¹⁸ Ahese oñeho pírata caruguar upe chihivahe sui imose. Aheseve ocuera tupri voi eté.

¹⁹ Ipare semimbohe oporandu co cotimi yuvireco chupe:

—¿Mahera píha ndoromose catui eté caruguar ichui? —ehi yuvireco.

²⁰ —Esepia, ndapeyeroya tuprii Túpa rese. Supi eté sese pe yeroyasa, yepe ndoyavii chira mostaza râhii tahimi vahe viña, aipo peyera co ivitri upe: ‘Esiri, eso coi cotí’ peyera. Evocoiyase ivitri osiriño itera. Ahese ndapemboavaimi chira mbahe. ²¹ Evocoii nungar caruguar imosesa yayerurese yande yecuacusa pipe —ehi.

Jesús omombehu iri omano água

²² Jesú斯 oguata viteseve Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotaréhimbar povrīve.

²³ Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tēi yuvireco.

Jesús omondo guarepochi tūparo uve nara oyeupe oporandu vahe upe

²⁴ Oyepotase Jesú斯 güemimbohe reseve tecua Capernaum ve, aheve guarepochi rerocuasar tūparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondoi guarepochi tūparo upe nara? —ehi.

²⁵ —Omboepi niha —ehi Pedro chupe.

Evocoiyase oiquesse Pedro oí pipe, aheve Jesú斯 rane oñeho chupe aipo ehi:

—¿Mara ehi nde pihañemoñeta, Simón? ¿Ava sui vo virocua guarepochi mborerecuar guasu co ivi pipe yepi? ¿Omu sui pīha, ambuae ava sui tie? —ehi.

²⁶ Pedro evocoiyase omboyevi chupe:

—Ambuae ava sui —ehi.

—¡Taa! —ehi—. Evocoiyase mborerecuar povrī pendar nomboepi chira yuvireco —ehi—. ²⁷ Guarepochi rerocuasar moñemoiroëhi água rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepei guarepochi. Ahe eraso chupe. Ipipe iyacatura imboepi água yandeu —ehi Jesú斯 Pedro upe.

18

¿Ava vo seco ivate catu vahe?

¹ Ahe ari pipeve semimbohe oyemboya Jesú斯 rese yuvireco mbahe rese oporandu água chupe:

—¿Uma vo seco ivate catu vahe Tūpa mborerecuasa pipendar? —ehi.

² Evocoiyase Jesú斯: “Erio” ehi ñepei chihivahemi upe, omundo güemimbohe pāhuve imoha, ³ aipo ehi:

—Supi eté, acoi ndapeñecuñaroise iyavei ndapeicoise chihivahemi nungar, ahese ndapeiquei chira Tūpa mborerecuasa pipe. ⁴ Acoi oñemomini vahe rumo inungar co chihivahemi, evocoí nungar seco ivate catura Tūpa mborerecuasave. ⁵ Acoi ava oipisi vahe co chihivahemi nungar che rer pipe sereco, che ité che pisi yuvireco —ehi.

Iparaisu itera ava oporomboangaipa uca vahe

⁶ “Acoi que ava rumo omboangaipa uca vahe co chihivahemi nungar che reroyasar, iyacatu evocoí nungar ava ñapichisa ita guasu iyesiho rese para guasu pipe imombo água. ⁷ ¡Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroätoisa yepi, jahe imboangaipa ucasar rumo iparaisu itera!

⁸ “Sese inungar pe po, anise que pe pi avei pemboangaipa uca vahe, peyasia, pemombora amombri peyesui viña. Esepia, aviye catu peiquera tecove apiréhisave ñepei pe pi, pe po rese, peso rägüler sui tata guasu apiréhisave ñuvirío pe po, que ñuvirío pe pi reseve. ⁹ Iyavei pe resa pe mboangaipa ucase, penose, pemombo amombri peyesui. Esepia niha, aviye catu peiquera ñepeimi pe resa rese tecove apiréhisave, ñuvirío pe resa rese tata guasu apiréhisave pe reique rägüler sui.

Porombohesa ovesa ocañi tēi vahe resendar

10 “Peroíroi rene que ñepei chihivahemi che reroyasar. Esepio, ivave sembiguai che Ru pirindar ité yuvirecoi yepi” ehi. 11 “Che niha, Ava Riquehir, ayu ava ocañi tēi vahe pisiro água.

12 “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepei ichui viña, evocoiyase oseya ranera noventa y nueve tēi vahe ovesa ivitri rese. Oyevira ocañi vahe reca oso. 13 Ipare oyosuse rumo, oviharete catuñora evocoii ovesa rese ambuae noventa y nueve nocañii vahe sui. 14 Ëgue ehi avei che Ru ivave secoi vahe, ndoipotai eté que ñepei ava che reroyasar chihivahemi nungar cañi água” ehi.

Porombohesa yande ñero água rese

15 “Acoi nde mboetasa Tüpa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute. 16 Nande reroyaise rumo, ahese ereñehera ñepei, anise ñuvirío ava upe nde pítivi água rese. Ahe avei tosendu pe ñehe. Ahese oimera que ñuvirío, anise mbosapi sendusar. 17 Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoiyase Tüpa ndoicuui vahe nungar pereco iyavei inungar mbahe-mbahe tēi aposar, ëgue peye sereco” ehi.

18 “Supi eté acoi, ‘Aviye’ peyese que mbahe upe co ivi pipe; ëgue ehi aveira ivave. Iyavei co ivi pipe, ‘Aní’ peyese que mbahe upe, ëgue ehi aveira ivave.

19 “Iyavei co amombehu potami avei pëu: Acoi ñuvirío co ivi pipe pe pihañemoñetasa oyoya tuprise que mbahe rese peporandu água pe yeruresa pipe, evocoiyase che Ru iva pendar omondora pe porandusa pëu. 20 Esepio, acoi ava ñuvirío, que mbosapi oñemonuhase che rer pipe yuvireco, aheve che aico ipáhuve” ehi.

21 Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tēi cheu oyapose? ¿Siete yupagüer rupi pîha? —ehi.

22 —¡Aní! —ehi. ¡Setenta rupi siete oyupagüer! —ehi Pedro upe.

Yembohesa ava niñero potai vahe resendar

23 “Tüpa mbororecuasa inungar mbororecuuar guasu omoingatu pota vahe güembiguai revesa chupe. 24 Evocoiyase omboipi imoingatu água, ahese ipítiviisar güeru ireve ati catu vahe guarePOCHI rese chupe. 25 Ahe rumo ndovirecoi imboipi água. Sese co mbororecuuar oyocuai opítiviisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa água cheu’ ehi. 26 Evocoiyase sembiguai oñenopiha sovai aipo ehi chupe: ‘¡Too! Che rerecuuar, eñemosañomi tēi cheu. Opara niha amboepi ndeu’ ehi chupe. 27 Ahese oiparaísuereco, opoi irevesa sui.

28 “Aheseve voi rumo sembiguai osëse, osepia ambuae ondugüer oyeupe ndaseta tuprii vahe ireve. Ahe chupe aipo ehi iyesiho pisí: ‘¡Emboepipa acoi nde revesa cheu!’ ehi. 29 ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi. 30 Niñero potai eté rumo. ‘Tomboepipa rane ité orevesa cheu’ ehi soquenda uca. 31 Osepiase rumo ambuae imboetasa, tasí iteanga ipiha pipe. Ahese yuviraso omombehu güerecuuar uve opacatu sembiapocuer

yuvireco. ³² Evocoiyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoño opacatu nde revesa sui. Esepio, ereyemombaraisu catumi ereporandu cheu. ³³ ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi. ³⁴ Ichui serecuar oñemoirosave oyocuai imombaraisu água ‘tomboepipa rane ité orevesa cheu’ oyapave.

³⁵ “Indó, evocoiyase ñgue ehi aveira che Ru iva pendar pēu ndapeñeroise ité peyeupe” ehi Jesús güemimbohe upe.

19

Jesús oporombohe mendasa sui poiēhi água

¹ Ipare Jesús osē Galilea sui, oso Judea ivi rupi ari sēsa coti iai Jordán rovai. ² Ava rehii yuviraso saquicuei. Aheve setá imbaheasi vahe ombogüera.

³ Evocoiyase oyemboya fariseo Jesús rese yuvireco; secoāhasave oporandu yuvireco chupe:

—¿Aviye pīha opoi cuimbahe güembireco sui que mbahe tēi oyapose? —aipo ehi yuvireco chupe.

⁴ Ahe rumo omboyevi fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi? ⁵ Iyavei aipo ehi: ‘Sese niha cuimbahe omendase, oyepepíra oyesupa sui güembireco rese ité yuvirecoi água. Evocoiyase ñuvirío yuvirecoira ñepei ava nungar’ ehi. ⁶ Sese ndahe iri ñuvirío, ñepei vahe ité yuvirecoira. Evocoiyase ava Tūpa omomenda vahe oyese, ndiyai ava tēi omboyepepi yuvireco oyesui —ehi.

⁷ Evocoiyase fariseo oporandu yuvireco chupe:

—¿Mahera ru oyocuai Moisés cuimbahe omondo vaherā güembireco upe cuachiar poisa resendar opoi água ichui? —ehi.

⁸ —Pe poreroyaéhisa pipe niha Moisés ñgue ehi pēu. Yipisuive ité rumo Tūpa ndoipotai oyesui opoi água yuvireco. ⁹ Esepio, acoi opoi vahe güembireco mbahe ndoyavíi vahe sui omendase ambuae cuña rese, ahe oyemboaguasa tēi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ñgue ehise cuimbahe güembireco rese, evocoiyase aviye catu ndayamendai chira —ehi.

¹¹ —Ndahei chira rumo opacatu osenducua che aipo ahe vahe yuvireco. Tūpa ombou vahe sembiaporá, ahe güeraño osenducuara yuvireco —ehi güemimbohe upe—. ¹² Esepio, oime pihañemoñetasava ava mendaéhi água: amove ohasa suive ndatahii vahe, ambuae nomboahi ucai ava yuvireco, ambuae evocoiyase nimendasei. Esepio, ahe oporaviqui pota Tūpa mbororecuasa reseño ité. Acoi oicatu vahe co ñehesa reroya água, toviroyaño —ehi.

Jesús osovasa chīhivahe

¹³ Ipare ahe pendar güeru moviro chīhivahe Jesús upe yuvireco ‘tomondo opo iharíve; toyerure avei sese no’ oyapave; semimbohe rumo, “¿Mahera vo peruno tēi chīhivahe?” ehiño serusar upe yuvireco. ¹⁴ Jesús rumo aipo ehi:

—¡Mahera ndapeipotai iyu água! Toyugüeruño chīhivahe cheu. Esepio, co chīhivahe nungar ava yuviroiquera che Ru povríve —ehi.

15 Ipare omondo opo chīhivahe harīve osovasa. Ichui osē oso.

Mbia chīhivahe imbahe eta vahe omoñeta Jesú

16 Mbía chīhivahe mbahe yar oso Jesú upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco ãgua? —ehi.

17 —¡Mahera ereporandu cheu mbahe aviye vahe rese! —ehi—. Ñepeño ité aviye vahe oime. Erereco potase rumo tecovesa apirēhi vahe, emboyeroya mborocuaita —ehi.

18 —¿Uma vo aipo mborocuaita? —ehi.

Ahese omboyeví chupe:

—Ndereporoyucai chira, nandeaguasai chira, nandemonundai chira, nanderemirai chiaveira ambuae ava rese,¹⁹ eremboyeroyara nde ru, nde sì avei, eresaisura ambuae ava nde yeaisu nungar eico' ehi icuachi-apri pipe —ehi mbahe yar upe.

20 —Co rumo mborocuaita opacatu amboaviye ité yepi. ¿Mbahe vo evocoiyase ipane vité che ayapo vaherā? —ehi.

21 —Ereipotase mbahe tuprī pipe nde reco ãgua, emondopa rane nde mbahe; ahe seprī evocoiyase eremondora ava iparaisu vahe upe. Ichui ererecora mbahe aviye vahe ivave. Ipare ereguateara che rupi —ehi chupe.

22 Aipo oyeupe hese rumo, ahe mbía oyepepiñó ichui oviharēhisave oso. Esepia, mbahe yar ité secoi.

23 Evocoiyase aipo ehi güemimbohe upe:

—Supi eté yavai eteanga imbahe eta vahe upe oique vaherā che Ru mbororecuasave. ²⁴ Aipo ahe iri: Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mbororecuasave seique ãgua —ehi.

25 Aipo iñehesa renduse, semimbohe oyepihamondii aipo ehi:

—¡Ava angahu pīha evocoiyase oñepisirora yuvireco viña! —ehi yuvireco.

26 Omahe güemimbohe rese, aipo ehi:

—Ava tēi upe yavai aipo nungar mbahe apo. Tūpa upe rumo mbahe opacatú ndayavaimi eté —ehi.

27 Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata ãgua. ¿Mbahe evocoiyase oimera oreu? —ehi.

28 —Oime itera niha mbahe pēu. Esepia, acoi ari oyepotase opacatu mbahe recuñaro ãgua, ahese che, Ava Ríquehir, aguapira che rendave che mbororecuasave. Pe avei, che rupindar, peguapira doce tenda harive. Ahese opacatu judío acoi doce ëmar Israel suindar recocuer rese peporandura curi. ²⁹ Acoi opacatu ava oseya vahe güëta, anise que víquehir, anise vivri, güeindri, que vu, anise osi, guahir, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirēhi vahe. ³⁰ Seta vai rumo cüritei yipindar vahe, ipa tēira yuvirecoi; setá aveira cüritei ipa tēi vahe, yipindar yuvirecoira curi —ehi.

20

Yembohesa oporaviqui vahe resendar

¹ “Tūpa mborerecuasa inungar acoi ava ivi yar osē añihiveive oyeupe nara oporaviqui vahe reca ‘toporaviqui che uva tive yuvireco’ oyapave. ² Oyosuse ava, ahese omoingatu oyeupe oporaviqui vaherā upe ñepei ari mboraviqui reprí imboepi água. Ahese opa omundo ocove imboporaviqui. ³ Ipare osē, oso añihivei, arivate catumi osepia ocarusu pipe ambuae ava oporaviquisa ndovirecoi vahe, ⁴ aipo ehi chupe: ‘Peso, tapeporaviqui che uva tive. Amboepi tuprira niha pē’ ehi. Ahe evocoiyase yuviraso oporaviqui água icove. ⁵ Ipare oso iri mbiter ari rupi oyeupe oporaviqui vahe reca, êgue ehi tupri avei caharuse, las tres rupi. ⁶ Ipa osē iri las cinco pipe, aheve avei osepia ambuae ava ndovirecoi vahe oporaviquisa yuvirnoha. Chupe aipo ehi: ‘¿Mahera peyembohi tēi ari momba cohabe pehā?’ ⁷ ‘¡Aní!’ ehi yuvireco, ‘Esepi, ndipoi eté ava, tapeporaviquimi, ehi vahe oreu’ ehi. Evocoiyase, ‘Peso, pe avei peporaviqui tive’ ehi. ⁸ ‘Pitu ramose, cove yar aipo ehi oporaviqui vahe rese yangarecuar upe: ‘Eñehepa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenendar uve’ ehi. ⁹ Evocoiyase las cinco pipe yuviroique vahe oporaviqui, ahe rane tenonde yugüeru. Oyacatu ñepei-peí ñepei ari rupindar oipisi guarepochi yuvireco. ¹⁰ Ipare tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepei ari rupindar yuvireco. ¹¹ Guarepochi pisire rumo oñemoiro cove yar upe yuvireco, ¹² aipo ehi: ‘Co ava yugüeru ipa tēi vahe, ñepei horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosano tēi oroporaviqui ari momba sacucuer upe oroico’ ehi. ¹³ Cove yar rumo aipo ehi ñepei ipāhu pendar upe: ‘Mbori, ndahei mbahe tēi ayapo ndeu. Esepi, amboepi guarepochi ñepei ari resendar ndeu acoi, Aviye, peye vahecuer rese cheu’ ehi. ¹⁴ ‘Evocoiyase ndo co, eipisi nde guarepochi, eraso. Che rumo amondo pota co ava ipa tēi oique vahe upe inungar tupri ndeu amboepi. ¹⁵ Esepi, cheu iyacatu ité che remimbotar rupi mbahe ayapo che guarepochi rese. Nderecatéhi tie ambuae ava mbahe rese che ayapose mbahe aviye vahe chupe’ ehi.

¹⁶ “Indó, êgue ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaherā yuvireco curi” ehi güemimbohe upe.

Jesús omombehu iri omano áqua

¹⁷ Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

¹⁸ —Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuaita rese oporombohe vahe povrīve yuvireco. Ahe, “Tomano” ehira yuvireco cheu. ¹⁹ Ipare che mondora ava ndahei vahe yande mu upe mara-mara tēi che rereco áqua che reroírosa pipe. Ipipe che yucara curusu rese yuvireco. Imombosapisa ari pipe rumo acuerayevira —ehi.

Santiago, Juan si oporandu Jesús upe mbahe rese omembri upe nara

²⁰ Ipare Zebedeo rembireco ñuvirío omembri reseve, oyemboya Jesús rese yuvireco. Ahese oñenopíha sovai oporandu áqua mbahe rese. ²¹ Evocoiyase,

—¿Mbahe vo ereipotami? —aipo ehi ichi upe.

—Che aipota che membrí eremboguapira ndeyepiri ūnepei nde mbahe rese pocosa cotí, ambuae nde mbahe rese pocoēhisa cotí nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura pīha co mbahe-mbahe tēi aiporara vaherā, inungar-ra que igua iro vahe aihu vaherā viña? —ehi.

—Taa, oroicatuño itera —ehi yuvireco.

²³ —Supi eté peiporarara mbahe-mbahe tēi. Co rumo ndiyai cheu, che piri opomboguapi ūagua che mbahe rese pocosa cotí, ambuae che mbahe rese pocoēhisa cotí avei. Che Ru rumo omoingatu güembiporavo upe nara oguapi vaherā che ipive —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei. ²⁵ Evocoiyase, “Perio” ehi oreu.

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe, iyavei acoi ivate catu vahe oyeeçoapirásá omborerescuasa pipe yepi. ²⁶ Pe rumo ēgue ndapeyei chira peico. Iyacatu rumo acoi ava oipota vahe ivate catu güeco ūagua pe pāhuve, ihañeco rane itera opacatu ambuae ava rese. ²⁷ Iyavei acoi pe pāhu pendar oipota vahe tenonde catu güeco ūagua, ihañeco tupri ranera opacatu pe pāhu pendar rese. ²⁸ Esepia, che, Ava Riquehir, ayu ndahei ava che rese ihañeco ūagua, che rumo ayu ava rese che hañeco ūagua iyavei amano vaherā ava eta repirā Caruguar povri sui senose ūagua —ehi.

Jesús ombogüera ñuvirío ndasesapisoí vahe

²⁹ Ipare Jesús, güemimbohe reseve oñociuase tecua Jericó yuvireco, ahese ava rehii yuviraso saquicuei. ³⁰ Aheve peri popive ñuvirío ava ndasesapisoí vahe oguapi yuvirinoi. Evocoiyase osenduse Jesús ocuase supi, osapucai pírata yuvireco chupe aipo ehi:

—¡Ore Yar, mborerecuar guasu David suindar, ore paraísuerecomí tēi eve! —ehi yuvirinoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucai pírata catuño ité yuvireco aipo ehi:

—¡Ore Yar, David suindar, ore paraísuerecomí tēira eve viña! —ehi iriño ité yuvireco.

³² Evocoiyase osendu iñehé, opita, “Perio” ehi chupe. Ipare,

—¿Mbahe vo peipota ayapo vaherā pēu? —ehi.

³³ —¡Ore Yar, ore mbosarecomí tēi eve! —ehi.

³⁴ Evocoiyase saisusave opoco sesa rese. Ahe ramoseve ndasesapisoí vahe osareco tupri ai eté yuvireco. Ipare yuvirasoño ité supi.

21

Jesús oique Jerusalén pipe

¹ Acoi orovirovise Jerusalén, oroyepota tecuami Betfagé popive, ivitri Olivo serer vahe ūpiimi. Aheve omondo ñuvirío güemimbohe ² aipo ehi chupe:

—Peso co tecuami yande rovaindarve. Aheve pesepiara guaricu imembri reseve ūapichimbrí imoha. Ahe peyorañora seru cheu. ³ Acoi que ava oporanduse yuvireco pēu sese, “Yar oiporu pota, ipare niha omboyeví voiñora” peyera chupe —ehi güemimbohe upe.

⁴ Co ēgue ehi chupe aracahendar Tūpa ñehe mombehusar ñehengagüer mboaviye ãgua, aipo ehi vahe:

⁵ “Pemombehu Sión pendar upe:

‘Pesepia, pe rerecuar guasu ou oico güeco mbegüesa pipe pēu guaricu harive imembrí reseve’ peyera” ehi.

⁶ Evocoiyase evocoi semimbohe yuviraso, oyapo ité ocuaisa yuvireco.

⁷ Güeru guaricu imembrí reseve yuvireco chupe. Omundo oturucuar icupeao ãgua yuvireco. Ipare Jesús oyeupi iharive. ⁸ Iyavei ava rehii oipipira oturucuar peri rupi imboetei guasusa pipe. Ambuae evocoiyase oyasia pindo omundo peri rupi yuvireco saperā. ⁹ Ava rehii senonde, saquicuei avei oguata vahe osapucai yuvireco aipo ehi:

—¡Co mborerecuar guasu David suindar, imboeteipri tasecoi! —ehi—
· ¡Sovasapri secoi ou vahe yande Yar rer pipe! ¡Ivave imboeteipri tasecoi!
—ehi yuvireco.

¹⁰ Oiqueso Jerusalén pipe, opacatu co tecua pipendar oyepihamondii yuvireco. Iyavei setá oporandu-randu yuvireco:

—¿Ava pīha co mbia? —ehi tēi yuvireco.

¹¹ Ava rehii oguata vahe Jesús rupi aipo ehi yuvireco chupe:

—Co niha Jesús, Tūpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar tūparo pipe sui

¹² Ipare Jesús oique judío tūparo guasu pipe. Ipiendar opa omombo ichui ava mbahe mondosar, mbahe rerocuasar. Iyavei ava guarePOCHI recuñarosar mesa opa omboviapi ichui; apicasu mondosar renda avei omboviapi imondo. ¹³ Ipare aipo ehi chupe:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo imonda rai vahe rēta nungar tēi pereco —ehi.

¹⁴ Aheve oyemboya Jesús rese yugüeru ava ndasesapisoí vahe, ipāri-pāri vahe avei. Ahe opa ombogüera. ¹⁵ Osepia rumo pahi rerecuar guasu iyavei judío porocuaita rese oporombohe vahe yuvireco mbahe ndayasepiai vahe sembiapo, iyavei tūparo pipe osenduse chīhivahe sa-pucaisa: “¡Imboeteipri David suindar tasecoi!” ehise, ahese oñemoiro yuvireco ¹⁶ aipo ehi chupe:

—¡Eresendu vo aipo ehi tēi vahe chīhivahe yuvireco! —ehi.

—Taa, asendu ité —ehi—. Pe no, ¿ndapeyeroquí vo sesendar ñehesa icuachiapri pipe:

‘Chīhivahemi, pītanimi avei osapuaira nde mboeteisa pipe yuvireco’ ehi vahe? —ehi.

¹⁷ Ipare opaño oseya ava oso tecua Betania ve. Aheve ñepei pītu oque.

Jesús omomara ivira higuera ndihai vahe oñeho pipe

¹⁸ Ahere ayihive añihiveive, oyevise tecua Jerusalén ve, Jesús ndasiepoi oico. ¹⁹ Aheve peri popive osepia ivira higuera. Ahe sese oyemboya oso ‘¿iha pīha?’ oya viña. So güeraño tēi rumo osepia. Evocoiyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru. ²⁰ Ahe mbahe repiase, ore,

—¡Too, mara ehi rutei pīha co cūriteimi opa voi ipiru! —orohe tēi chupe.

²¹ Ahese omboyeví oreu:

—Acoi peyeroyase ité Tūpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoiyase osiriño itera. ²² Indó, acoi peyerurese mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

Jesús mborerecuasa

²³ Ichui Jesús oique iri judío tūparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā ndeu? —ehi.

²⁴ Evocoiyase ahe aipo ehi chupe:

—Che avei aporandura mbahe rese pēu. Pemboyevise che porandusa, ahese che avei amombehura ava porocuaita rupi eté pīha ayapo co mbahe vichico. ²⁵ ¿Ava vo Juan ombou ava āpiramo āgua? ¿Tūpa pīha, ava tēi tie? —ehi.

Evocoiyase oñemoñeta aipo ehi oyeupe yuvireco: “ ‘Tūpa ombou’ yahese chupe, ahe evocoiyase omboyevira yandeu: ‘¿Mahera ru evocoiyase ndaperoyai?’ ehira. ²⁶ Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe” ehi.

²⁷ Sese,

—Ndoroicuai eté Juan mbousar —ehiño yuvireco.

Ahese ahe aipo ehi:

—Evocoiyase che avei, “Ahe iporocuaita pipe co mbahe ayapo” ndahei chietera pēu —ehi mborerecuar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:

—¿Mara ehi pe pihañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, eporavíqui cove’ ehi. ²⁹ ¡Nachequerēhii! ehi voiño. Coiye rumo, ‘¿Mahera ēgüe ahe?’ ehi. Ipare osoño ité, oporavíqui. ³⁰ Ipare oso ambuae guahir upe: ‘Eresora, eporavíqui cove’ ehi tuprī avei. Evocoiyase, ‘Asora, che ru’ ehi angahu. Ipare rumo ndosoi eté. ³¹ ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui. ³² Esepia, Juan Oporoāpiramo vahe ou co tecocuer ihīvi vahe mboyecua āgua pēu pe reco tuprī āgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroí pe recocuerai sui seroya āgua —ehi mborerecuar guasu yuvirecoi vahe upe.

Ava mbahe tēi oporavíqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tuprī sereco, oyapo uva riñavii āgua; oyapo avei oí ivate vahe ahe sese mahemoha āgua. Ipare oseya oivi ava oporavíqui vahe upe iporu āgua. Ichui osē oso amombrī vahesa rupi. ³⁴ Coiye

oyepotase ari uva pohosa, ahese omondo güembiguai oporavíqui vahe upe imboporandu água ‘taipisi uva pohopri cheundar cute’ oyapave viña.
³⁵ Ipare rumo oporavíqui vahe oipisi sembiguai yuvireco: amove oinupanupa yuvireco, amove oyuca, oyapi-yapi avei amove ita pipe yuvireco.
³⁶ Ipare rumo ivi yar setá catu omondo iri güembiguai. Oporavíqui vahe rumo mara-mara tēño avei vireco yuvireco.

³⁷ “Coije rumo guahir teieteté omondo chupe cute. Ahe ipihañemoñeta: ‘Ombooyeroya catura revo che rahir yuvireco’ ehi viña. ³⁸ Evocoiyase ahe ava tahir repiase, ‘Co aipo oipisira vu mbahe; yayucaño, evocoiyase co ivi opitara yandeu nara’ ehi oyeupe yuvireco. ³⁹ Evocoiyase oipisi, vinose miti pāhu sui, oyuca ité yuvireco” ehi.

⁴⁰ “Acoi ouse ivi yar, ¿mbahe vo oyapora oporavíqui vahe upe?” ehi oñehe rendusar upe.

⁴¹ Ahe evocoiyase,

—Opara revo oyuca saisuēhisa pipe ité co ava ndipihai vahe yuvireco. Ipare revo omondora oivi ambuae ava oporavíqui vahe uve iporu água ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:

—¿Ndapeyeroquii vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo avíye catu vahe oi moviracua tupri água.

Égüe ehi niha Yar yapo yandea mohapisí ai eté’

ehi icuachiapri pipe. ⁴³ Sese che Ru Tūpa mborerecuasa serocuasara pe sui. Ambuae ava upe rumo imondosara. Ahe virasora che Ru mombahesa chupe. ⁴⁴ Acoi que oviapi vahe evocoit aha haríve, opa tēira ahe ae oyemomara; iyavei acoi ovipaise evocoit aha que ava haríve, ahese opa tupri aveira omocañi —ehi Jesús oñehe oyese.

⁴⁵ Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco. ⁴⁶ Aheseve oipisi pota voi yuvireco viña. Osiquiyeño rumo ava rehii sui yuvireco. Esepio, opacatu ava ipihañemoñeta: “Co ité Tūpa pīratasa pipe oñehe” ehi yuvireco chupe.

22

Jesús oporombohe carusa mendasa resendar rese

¹ Ipare Jesús oporombohe iri ambuae ava recocuer rese aipo ehi:

² “Tūpa omborerecuasave inungar mborerecuar guasu guahir mendase oyapo pieta. ³ Ipare oyocuai güembiguai eta ‘ava ichohopri upe toyugüeru cute’ oya. Ichohopri rumo niqueréhi iri yugüeru aheve. ⁴ Ipare oyocuai iri ambuae güembiguai eta aipo ehi: ‘Aipo peyera ichohopri upe: ¡Toyugüeruño ité! Esepio, opa ité oingatu tembihu iyavei ayuca uca tivi iyavei ambuae mbahe mimba iquira vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembiguai upe.

⁵ Ichohopri rumo ndoviroyai eté yuvireco. Evocoiyase ñipei osoño ocove, ambuae oso ombahe movendesave, ⁶ ambuae rumo oipisi sembiguai mara-mara tēi sereco água. Ahe ipiye oyuca yuvireco. ⁷ Evocoiyase mborerecuar guasu oñemoiro eteprisave omondo osundao eta co ava oporapichi vahe yuca ucapa água, iyavei secua rapipa água. ⁸ Ipare aipo ehi ambuae güembiguai eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vaherā cohabe. ⁹ Sese

peso opacatu ava guata catusa rupi, peñehe mendasave yugüeru vaherā opacatu pe rovañchisar upe' ehi.¹⁰ Evocoiyase sembiguai eta yuvínosepa yuviraso ocar rupi. Ahe osovañchi vahe setá omonuha yuvireco que seco tupri vahe, seco rai vahe avei; ēgue ehi ava savapipo tupri oí guasu mendasave yuvireco.

¹¹ "Evocoiyase acoi mborerecuar oique ava ichohopri repia. Ipare omahecua tupri ñepei ava ipáhu pendar rese. Ahe rumo ndomondei turucuar mendasave resendar.¹² Evocoiyase aipo ehi chupe: 'Che mboripar, ¿mara ere eique ave co turucuar mendasave resendar poréhi?' ehi. Ahe rumo noñeheiño ité chupe.¹³ Evocoiyase, 'Peipisi co mbia, peñapichi ipi, ipo avei, pemose ocarve pítumimbisave. Aheve oyaseho tēira, sāitere-tere tēira mbaherasicuer rereco' ehi ichohopri rese hañecosar upe.¹⁴ Esepias, setá tēi ichohopri, moviromi tēi rumo iporavopri ipáhu sui" ehi mborerecuareta uve.

Fariseo osecoña iri tēi Jesús guarePOCHI rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavi uca água mborerecuar rovai imomara-mara tēi água.¹⁶ Ahe evocoiyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe mbahe supi tupri vahe Tūpa recocuer rese. Nde niha ndereroyai vahe ava ñehesa tēi. Esepias, ava pihañemoñeta rupi ndereicoi vahe; nde pihañemoñeta rumo ñepei reseve erereco.¹⁷ ¿Mara ehi nde pihañemoñeta? ¿Aviyera pīha yamondo guarePOCHI rese operanduse Roma pendar mborerecuar ivate catu vahe upe viña, aní tie? —ehi yuvireco.

¹⁸ Oicua rumo fariseo pihañemoñeta raisa. Sese aipo ehi chupe:

—Pe seco tupri angahu tēi vahe peico. ¡Mahera che moingue pota mbahe tēi pipe peye!¹⁹ Pemboyecua ru ñepei guarePOCHI mborerecuar guasu upendar cheu —ehi.

Evocoiyase güeru yuvireco chupe.

²⁰ —¿Ava rahanga vo co guarePOCHI rese chini iyavei ava rer vo co chini sese no? —ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoiyase mborerecuar upe mbahe chupendar, Tūpa upendar mbahe evocoiyase pemondora Tūpa upe —ehi fariseo upe.

²² Osenduse, oyepihamondii tēi yuvireco. Evocoiyase yuvínose yuviraso ichui.

Saduceo oporandu Jesús upe cuerayevisa rese secoñhasave

²³ Ahe ari pipe saduceo "ndipoi eté cuerayevisa" ehi vahe yugüeru Jesús upe, oporandu tēi angahu yuvireco chupe:

—Porombohesar, Moisés aipo ehi aracahe:

'Que cuimbahe omanose guahiñhiseve, ahese tivri omendara sembirecocuer rese ahe víquehir omano vahecuer upe nara tahirā oico' ehi —ehi yuvireco chupe—.

²⁵ Cohave, ore pāhuve, oime siete tupri oyesuindar pāve yuvirecoi vahe. Yipindar vahe omenda. Ipare omanoño guahiñhiseve. Evocoiyase tivri omenda sembirecocuer rese.²⁶ Ahe omano guahiñhiseve avei no. Ēgue ehi avei opacatu ambuae tivri, omano avei guahiñhiseve yuvireco.

27 Opacatu imano pare, cuña avei omano cute. 28 Evocoiyase opase ocuerayevi yuvireco, ¿uma rese ité pīha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

29 —Pe pīhañemoñetasa co coti tēi eté. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pīratasa —ehi—. 30 Esepia, acoi omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira iva —ehi—. 31 Co cuerayevisa resendar rumo amombehura pēu. Aviye ndapeyeroquii anga vahe acoi Tūpa omombehu vahecuer rese. Supi eté ahe aipo ehi aracahe: 32 ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

33 “¡Too!” ehi ava rehii. “¡Mara ehi rutei iporombohesa!” ehi tēi yuvireco.

Porocuaita aviye catu vahe

34 Ipare fariseo oyanduse yuvireco Jesús omonguiriripaño se saduceo oyesui, ahese oñemonuha yuvireco. 35 Ñepei ipāhu pendar Moisés porocuaita rese oporombohe vahe, ahe oyemboya oso Jesús rese oporandu ‘toyaví oñehe Moisés porocuaita sui yandeu’ oyapave viña:

36 —Porombohesar, ¿uma ité vo porocuaita aviye catu vahe opacatu ambuae porocuaita sui? —ehi.

37 Evocoiyase ahe aipo ehi chupe:

—‘Eresaisura nde Yar Tūpa opacatu nde pīhañemoñetasa pipe, opacatu nde recocuer pipe, nde yapisacasa pipe avei’ ehi. 38 Co porocuaita aviye catu vahe ambuae porocuaita sui. 39 Imoñuvírosa inungar tupri avei aipo ehi no: ‘Eresaisura ambuae ava nde yeaisu nungar’ ehi. 40 Co ñuvirío porocuaita rupi oguata opacatu Moisés porocuaita icuachiapri, opacatu Tūpa ñehe mombehusar rembicuachía avei —ehi.

¿Ava suindar pīha Poropīsirosar?

41 Fariseo ñemonuha viteseve, 42 Jesús oporandu chupe:

—¿Mara ehi pepihañemoñeta acoi Tūpa Rembiporavo ou vaherā ava pīsiro água rese? ¿Ava suindar-ra pīha secoi? —ehi.

—Ahe niha David suindar secoira —ehi fariseo yuvireco chupe.

43 Ahese aipo ehi fariseo upe:

—¿Mahera pīha evocoiyase David oñehese Espíritu pīratasa pipe aracahe, “Che Yar” ehi chupe? Esepia, ahe aipo ehi:

44 ‘Yar aipo ehi che Yar upe:

Eguapi che acato coti acoi che amondose voi eté nde amotarëhimbar nde povriva yuvireco’

ehi David aracahe. 45 Evocoiyase, ¿mahera ru: “Poropīsirosar David suindar secoira” peye, David teiteté, “Che Yar” ehise chupe? —ehi fariseo upe.

46 Evocoiyase ndoicatu iri imboyevi água yuvireco cute. Ahe ari pipe sui ndipo iri que ñepei iquerëhi vahe iñehe aví uca água oñehe pipe yuvireco.

23

Jesús oicua uca fariseo iyavei Moisés porocuaita rese oporombohe vahe recocuerai

¹ Ipare Jesús aipo ehi ava eta upe, oreu avei no: ² “Co Moisés porocuaita rese oporombohe vahe iyavei fariseo eta, ahe icuaita Moisés porocuaita mombehu tupri äqua yuvireco. ³ Sese iya peroyaño ité iyavei peyapo opacatu mbahe semimombehu; aní chira rumo peyapo mbahe semi-biapo ai. Esepio, omombehu tupri tēi mbahe viña, ipare rumo co coti tēi mbahe oyapo yuvireco. ⁴ Iyavei omondo porocuaita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepei oporocuaita yuvireco no. ⁵ Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tēi. Osiva rese, oyiva rese avei iper guasu vahe vireco-reco tēi oturucuar rese Tūpa Ñehengagüer cuachiapri yuvireco. Iyavei ipi catu vahe oturucuar popi moaro äqua omondo yuvireco. ⁶ Oipota carusa rupi güenara aviye catu vahe yuvireco, oseca avei tenda porañete catu vahe güenara otúparo pipe yuvireco no. ⁷ Oipota avei ava oyeupe ‘avirave’ apo äqua omboeteisave ocar rupi iyavei oipota, ‘Porombohesar’ oyeupe he yuvireco.

⁸ “Pe rumo, ‘Porombohesar’ ndapembohe ucai chira ava peyeupe. Esepio, pe opacatu guasu peyeivri peico, iyavei ñepeñio ité pereco pe Mbohesar. ⁹ Iyavei, ‘Che ru’ ndapeyei chira que ava co ivi pipendar tēi upe. Esepio, ñepeñio ité pe Ru pereco, ahe niha iva pendar. ¹⁰ Ndiyai avei, ‘Mborerescuar’ pembohe uca ava peyeupe. Esepio, Poropísiosar güeraño ité pe rerecuar secoi. ¹¹ Acoi ava seco ivate catu vahe, ahe toporopitivi güeco mbegüesa pipe. ¹² Esepio, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

¹³ “¡Pepraisu catu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tēi vahe peico! Pemombitaño ava Tūpa povrīve seique rāgürer sui peico yepi. Pe avei eté ndapeiquei ipovrīve, iyavei acoi yuviroique pota vahe pemombitaño seique rāgürer sui.

¹⁴ “¡Pepraisu catu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tēi vahe peico! Esepio, perocua-rocuñaño tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tūpa ñemoirosa ipírata catu vahe curi.

¹⁵ “¡Pepraisu catu itera pe Moisés porocuaita rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar caruguar ratave nara tēi pereco uca.

¹⁶ “¡Pepraisu catu itera, pe ava mbohesar ndasesapisoi vahe nungar peico! Pe aipo peye tēi vahe: ‘Yamombehuse mbahe tūparo rer pipe yande ñehe mboaviye äqua, ëgue yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi’ aipo peye tēi. ¹⁷ ¡Pe ndapembahecuai vahe nungar, ndasesapisoi vahe nungar avei peico! ¿Uma vo aviyé catu vahe: oro pīha, anise tūparo tie? Tūparo pipe niha oro rovasasa yepi. ¹⁸ Iyavei co uve avei aipo peye tēi peico: ‘Yamombehuse mbahe seropovëhepri renda rer pipe yande ñehe mboaviye äqua, ëgue yahe tēi eté; co rumo mbahe yamombehuse mbahe seropovëhepri renda harí pendar rer pipe yande ñehe mboaviye

água, ahese iya ité yamboaviyera yande ñehe yepi' aipo peye tēi. ¹⁹ ¡Pe ndasesapisoí vahe nungar peico yepi! ¿Uma vo aviye catu vahe? ¿Evocoí porerecosa seropovéhepri pīha, anise mbahe seropovéhepri renda tie? Ahe tenda harive niha porerecosa sovasasa yepi. ²⁰ Sese acoi mbahe omombehu vahe mbahe seropovéhepri renda rer pipe oñehe mboaviye água, ndahei serer pipe güeraño, omombehu avei opacatu ihari pendar mbahe seropovéhepri rer pipe, ²¹ iyavei acoi ava omombehu vahe mbahe tūparo rer pipe oñehe mboaviye água, ahe omombehu ipipendar rer pipe avei. Ahe niha Tūpa secoi. ²² Iyavei acoi omombehu vahe mbahe que ambuae ava upe iva resendar rer pipe oñehe mboaviye água, omombehu avei Tūpa recua rer pipe, Tūpa rer pipe avei. Esepiá, Tūpa aheve ité secoi.

²³ “¡Peparaísu catu itera, pe Moisés porocuaita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yele pemondo ñepei-peí diez pe remiti menta, anis, comino pereco vahe sui ñepei Tūpa uve nara viña, pe rumo pepoi co porombohesa aviye catu vahe porocuaita resendar sui. Ahe peyapora mbahe ihívi vahe, peporoparaísuerecora iyavei pemboaviye tuprira pe cuaita yepi. Iyacatu rumo ahe pemboaviye aveira viña. ²⁴ ¡Pe ava mboher-sar ndasesapisoí vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoiyase. Ëgüe peye co mborocuaita upe.

²⁵ “¡Peparaísu itera pe Moisés porocuaita rese oporombohe vahe iyavei pe fariseo peico vahe, pe seco tuprì angahu tēi vahe! Esepiá, inungar igua riru iyavei tembihu riru icupe rupi tēi yoseipri. Ipipe rumo iquiha opitaño ité. Ëgüe ehi tēi pe recocuer pe monda raisave, mbahe pota-pota tēisave avei. ²⁶ ¡Pe fariseo peico vahe, ndapepiñañemoñetai vahe mbahe pe rembiapo ai rese, pemoatiro rane pe piha pipe mbahe yavaeté vahe sui! Ahese ramo pe rembiapo icatuprira cute.

²⁷ “¡Peparaísu catu itera, pe Moisés porocuaita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvípa imomorochimbrì tēi. Iharive tēi icatuprì chupe. Ipipe rumo tehögür cangüer iyavei opacatu mbahe yavaeté vahe ovireco oyese. ²⁸ Ëgüe peye: ava rembiepiave aviye pe reco ihívi vahe viña, pe piha pipe rumo oime pe porombopasa iyavei opacatu mbahe-mbahe tēi.

²⁹ “¡Peparaísu catu itera pe Moisés porocuaita rese oporombohe vahe, pe fariseo peico vahe, pe reco tuprì angahu tēi vahe! Esepiá, pemoin-gatu Tūpa ñehe mombehusar ruvipagüer peico sese pe yemomahenduha água iyavei pemoporañete ai tēi ava seco ihívi vahe ruvipagüer yepi viña. ³⁰ Ipare aipo: ‘Yande yaicose revo aracahe yande ramoi recose, ndayaipítivii chietera Tūpa ñehe mombehusar yuca água yuvireco viña’ peye tuprì tēi. ³¹ Aipo peyese rumo, pemboyecua Tūpa ñehe mombehusarer yucasar suindar pe yesusa. ³² ¡Pemboyecua iriño evocoiyase pe ramoi rembiapocuerai!

³³ “¡Pe mboi vai suindar tēi peico! Ndapesoyepei chira rumo Tūpa ñemoírosa sui, pesora rumo tata guasuve. ³⁴ Evocoiyase che amboura pēu Tūpa ñehe mombehusar ava yaracua vahe iyavei ava pe mbohe água yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei

ambuae peseca-secara peico tecua yacatu rupi. ³⁵ Sese pēuño ité oura Tūpa ñemoirosa opacatu ava aviyé vahe yuca agüer rese co ivi pipe; Abel seco ivi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zácarías sui avei, ahe peyuca vahe tūparo pipe mbahe seropovéhepri renda rovai. ³⁶ Supi eté opacatu co mbahe tēi oura pe recove viteseve” ehi.

Jesús oyaseho Jerusalén pendar rese

³⁷ “¡Too rutei, pe Jerusalén pendar, peyuca vahe Tūpa ñehe mombehusar, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrīve! Ëgüe ahe pota tēi pe rereco viña, pe rumo ndapeipotai eté evoco nungar pe rereco água. ³⁸ Sese seyapirā tēi peicora. ³⁹ Esepiá, ndache repiai chira peye acoi, ‘¡Imboeteipri Yar remimbou tasecoi!’ peyese voi che repia irira peye” ehi Jesús ava eta upé.

24

Jesús omombehu judío tūparo guasu moçañi água

¹ Ipare Jesús osé judío tūparo pipe sui oso. Aheseve ore semimbohe oroyemboya sese aipo orohe chupe: “¡Ore Yar, eseplia co tūparo!” orohe. ² Ahe rumo:

—Supi eté amombehu pēu: co opacatu pesepia vahe, ndipoi chietera que ñepei ita oyeha vite vahe. Opacatu ité imondurusara curi—ehi oreu.

Jesús omombehu mbahe oime vaherā ari cañi renonde

³ Ipare Jesús oso ivitri Olivo ve oguapi oí. Aheve ore güeraño tupri oroso chupe mbahe rese ore porandu água:

—Emombehu catu oreu: ¿Mbahese vo aipo mbahe yaviyera? ¿Mbahese poromondiisa rese rane vo icuasara nde yu água iyavei ari cañi água? —orohe chupe.

⁴ —Peyembopa ucai rene ambuae ava upé peico. ⁵ Esepiá, setá ava yugüerura, ‘Che aico Tūpa remimbou ava písiró água’ ehi tēira ava eta mbopa yuvireco. ⁶ Iyavei pesendura ñehesa vavasa resendar cohabe iyavei que rupi. Ndapeyembosiquíyei chira rumo ichui. Esepiá, ëgüe ehi rane itera niha; ndehi vitei chira rumo ari cañisa. ⁷ Esepiá, ñepei ivi pipendar ovavara ambuae ivi pipendar rese oyeupe yuvireco. Ahese oimera tiavor, ivi ríri opacatu-catú tēi tecua rupi. ⁸ Opacatu evoco mbahe rumo omboipi ramomi vahe mbahe tēi porarasa.

⁹ “Ahese pe pisira yuvireco mara-mara tēi pe rereco água, pe yuca água avei. Iyavei opacatu ava-ava tēi ndape ambotai chira che recocuer sui tēi yuvireco. ¹⁰ Ahe ari rupi evocoiyase setá ava ndache reroya iri chira yuvireco. Ahe oyeamotaréhira iyavei omondora ambuae omboetasagüer yamotaréhimbar povrīve yuvireco. ¹¹ Iyavei setá Tūpa ñehe mombehusar angahu tēi oimera, ahe ava ombopa-mbopa tēira yuvireco. ¹² Ombouvicha catura mbahe-mbahe tēi naporai vahe. Ipipe sui ndoyeaisu tupri iri chira ava yuvireco. ¹³ Acói ava oyemoviracua vaheño rumo ari ipa vahe rupi, ipísiróprí yuvirecoira. ¹⁴ Iyavei co ñehesa icatupri vahe Tūpa mborerecuasa resendar imombehusapa ranera opacatu ivi rupi icua uca água. Ahese ramo oimera cañisa co ivi pipe” ehi oreu.

15 “Tūpa ñehe mombehusar Daniel oicuachía mbahe-mbahe tēi aposa resendar oime vaherā tūparo guasu maranehi vahe pipe aracahe. Ahe pesepiase oi maranehi pipe —acoí oyoeroqui vahe, ahe tosenducua tupri yuvireco—,¹⁶ evocoiyase Judea ve yuvirecoi vahe toñemipa poyava ivitri rese yuvireco ichui;¹⁷ iyavei acoí güéta haríve yuvirecoi vahe ogüeyise, toique iri eme güëtave ombahe reca;¹⁸ iyavei acoí que rupi tēi yuvirecoi vahe, toyevi iri eme güëtave que oyeosa renose água yuvireco.¹⁹ ¡Iparaisu itera cuña ipuruha vahe, imembí pítani vahe avei yuvireco! ²⁰ Peporandu Tūpa upe pe recua pipe sui pe sēehí água irohi pipe, mbituhusa arí pipe avei.²¹ Esepia, ahe arí pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evoco nungar.²² Iyavei nomombituhuise Tūpa co arí naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombituhura” ehi.

²³ “Iyavei que ava, ‘Esepia co Poropísicosar secoi’; anise, ‘Peve secoi’ ehise yuvireco pēu, aní chira peroya aipo ehi vahe. ²⁴ Esepia, yuguerura ava ‘che Poropísicosar aico’ ehi tēi vahe iyavei ‘che amombehu vahe Tūpa Ñehengagüer’ ehi angahu tēi vahe; iyavei oyapora mbahe ava ndoyapoi vahe poromondiisa güeco píratasa mboyecua água yuvireco. Ipípe osecoähara Tūpa rembiporavo imbopa água yuvireco. ²⁵ Opa aipo co senonede amombehu pēu. ²⁶ Sese que ava pēu: ‘Pesepia pe ivi iporupiréhísave secoi’ ehise, pesoi rene aheve seroyasave, aní chiaveira peroya acoí ‘pesepia co secoi oi pipe’ ehi vahe yuvireco. ²⁷ Che rumo inungar overa vahe sendi añihivei sui caharu coti ocua iva rese, ñgue ahera che, Ava Riquehir, opacatu ava rembiepiave ayevi irise vitu curi. ²⁸ Esepia, mbahe rehögüer reimesave, uruvu oñemonuha ati yuvireco yepi” ehi güemimbohe eta upe.

Jesús yevi água resendar

²⁹ “Ahe arí pipe mbahe-mbahe tēi pare cûriteimi ndoyecua iri chira arí, yasi avei ndosesape iri chira, yasitata avei opara ovíapi iva sui iyavei iva resendar mbahe oririira yuvireco. ³⁰ Ahese oimera iva rese iporéhi vahe che, Ava Riquehir, yu água resendar. Evocoiyase opacatu ava ava tēi co ivi pipendar oyaseho tēira osiquiyepave yuvireco. Che repia aveira yuvireco agüeyise iva quiha rese che píratasa rendigüer porañetesa pipe. ³¹ Iyavei amboura che rembiguai eta iva pendar. Ahe evocoiyase güemimbí omoñehe píratara opacatu che rembiporavo co ivi rupindar que amombrí rupi yuvirecoi vahe monuha água” ehi.

³² “Peyembohera ivira higuera recocuer sui: Co ivira soquí ramose, yaicua cõimi arí sacu vahe yepota água yandeu yepi. ³³ Na ehi aveira pēu che ñehe rupi tupri mbahe pesepiase, sese peicuara cõimi eté che yevi água. ³⁴ Supi eté yuvirecove vitera ava osepia vahe co mbahe opase yaviye. ³⁵ Iva, ivi opara ocañi, che ñehengagüer rumo imboavíyesa rane itera.

³⁶ “Ndipoi eté rumo ava oicua vahe arí iyavei hora che yevi água. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

³⁷ “Inungar ava Noé recose yuvirecoi aracahe, ñgue ehi tupri aveira che, Ava Riquehir, yevi água renonde. ³⁸ Yipive amarusu renonde, ahese ava ocaru, oihu; guahir, guayri avei omomendaño yuvireco. Noé arca pipe seiques, ñgue ehi vite yuvireco. ³⁹ Nomohai eté rumo amarusu

viapi ãgua yuvireco oyeupe viña, ñgue ehi rumo aviyeteramo tẽi amar oviaipi imocañipa. Ñgue ahe aveira che, Ava Riquehir, ayevi aviyeteramo tẽi.⁴⁰ Evocoi ari pipe oimera ñuvirio ava amombri güecua sui yuvirecoi vahe: ñepei serasosara, induguer rumo opitara.⁴¹ Ñgue ehi aveira ñuvirio cuña ohicho vahe upe: ñepei serasosara, induguer rumo opitara.

⁴² “Sese pemahemoha yepi. Esephia, ndapeicuai mbahe ari pipe che, pe Yar, ayevira iwa sui.⁴³ Iyavei peyapisaca tupri co rese: inungar acoi oi yar oicuase revo que hora pítu pipe imonda vahe yepota ãgua, ahese imahemohara sese güeta pipe seiqueëhi ãgua viña.⁴⁴ Ñgue peye aveira peyemoingatu che yevi ãgua rese. Esephia niha, che, Ava Riquehir, aporoesapiha tẽira vitu curi” ehi.

Mbiguai omboavíye vahe ocuaita, nomboavíyei vahe avei

⁴⁵ “Acoi ava mbahe rese ñangarecuar omboavíye tupri vahe ocuaita, yaracua vahe avei, ahe chupe serecuar oseyá icuaitarã güeta pipendar rese hañeco ãgua ‘tembihu tomondo che rẽta pipendar upe che porocuaita rupi’ ohesave.⁴⁶ Acoi omboavíyese ocuaita, ahese oviharetera gürecuar yevise.⁴⁷ Supi eté niha serecuar oyocuaira opacatu ombahe rese hañeco ãgua.⁴⁸ Ahe mbiguai rumo ndipihaise ‘ndoyepota vitei chira revo che rerecuar’ oya,⁴⁹ omboetasa omboipi mara-mara tẽi sereco iyavei oyemboya caguar tẽi rese ipiri ocaru iyavei oihu tẽi ãgua.⁵⁰ Ipare rumo serecuar oyepotara imahemohaëhiseve.⁵¹ Ahese omombaraisu catura, ‘Tinupasa, ava seco tupri ai angahu tẽi vahe nupasa nungar pipe’ ehira chupe. Ahese oyaseho tẽira, oyemoaitere-tere tẽi aveira” ehi güemimbohe upe.

25

Diez cuñatai ndaseco marai vahe resendar ñehesa

¹ “Evocoi ari pipe Tüpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña meví pisí ãgua yuvireco.² Ipähuve yuvirecove cinco ndipihäñemoñetai vahe, ambuae cinco rumo ipihäñemoñeta tupri vahe yuvireco.³ Ipare ndipihäñemoñetai vahe oipisi guataendirã yuvireco, ndovirasoi rumo yandi guataendi ríru mboapipo iri ãgua yuvireco;⁴ evocoi ipihäñemoñeta tupri vahe rumo viraso yandi siru pipe guataendi reseve yuvireco.⁵ Acoi ndoyepota apihaise cuña meví, ahese sopesii tẽi yuvireco. Coiye opaño yuviroque yuvireco ichui.⁶ Pítu mbiter senise rumo, osendu ñehesa aipo ehi vahe yuvireco: ‘¡Coi imeví turi! ¡Pesé ipisi ãgua cute!’ ehi.⁷ Evocoiyase opacatu evocoi cuñatai oñarapuha voi iyavei omoingatu guataendi yuvireco.⁸ Ahese nimahemohai vahe aipo ehi ambuae imahemoha vahe upe yuvireco: ‘Pemboumi tẽi chihí pe yandi oreu. Esephia, ogüe pota ité ore rataendi’ ehi tẽi yuvireco.⁹ ‘Aní, ndiyai chira revo oromondo vaherã pẽu. Iyacatu revo peso imboepisave serocua peyeupe nara’ ehi.¹⁰ Imboopi yuviraso viteseve, ou cuña meví cute. Oyemoingatu vahe rumo yuviroique supi mendasave. Evocoiyase saquicuerive voi ombooya oquenda rãrosar.¹¹ Ipare oyepotase ambuae cinco cuñatai yugüero aipo ehi yuvireco oí yar upe: ‘¡Emboimi tẽi oreu!’ ehi tẽi yuvinotha.¹² ‘Aní, ndopocuai vahe ité’ ehiño chupe.

¹³ “Pe evocoiyase pemahemohara. Esephia, ndapeicuai mbahe ari pipe, mbahe hora pipe che, Ava Riquehir, ayevira” ehi Jesús oreu.

Ñehesa guarepochi mondosa resendar

¹⁴ “Iyavei Tūpa omborerecuasave inungar-ra ava mbahe yar oso ãgua renonde ivi amombrisave omonuha güembiguai oguarepochi rāro ãgua viña. ¹⁵ Yipindar ñepei upe omondo cinco mil guarepochi, ambuae upe omundo dos mil, iyavei imombosapisa upe omondo mil tēi: ahe omondo ñepei-peí upe seco etegüer rupi-rupi. Ipare voi oso cute. ¹⁶ Evocoiyase evocoi mbiguai oipisi vahe cinco mil guarepochi, ahe oporavíqui co guarepochi rese. Ipipe sui coiye oipisi catu iri ambuae cinco. ¹⁷ Inungar avei ambuae oipisi vahe dos mil, ichui oipisi catu iri ambuae dos mil. ¹⁸ Ambuae oipisi vahe rumo ñepei guarepochi, ahe oyoho ivicuar. Aheve oñoti güerecuar guarepochi.

¹⁹ “Ipare coiye oyevise serecuar, ahese oñehe güembiguai upe oguarepochi retacuer cua ãgua. ²⁰ Yipindar cinco mil guarepochi oipisi vahe ranengatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi. ²¹ ‘Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovhara che rese’ ehi chupe. ²² Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: ‘Ndo co erembou vahe dos mil cheu. Ipipe sui co ambuae aipisi irimi dos mil avei ndeu’ ehi. ²³ ‘Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovhara che rese’ ehi avei chupe.

²⁴ “Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: ‘Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovevepirer tēi avei ereipisi ndeyeupe nara. ²⁵ Sese che siquyesa pipe añomi ivivriye nde guarepochi. Ndo co nde mbahe’ ehi chupe. ²⁶ ‘Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañotii vahe sui. ²⁷ Ereyapocatumira che guarepochi guarepochi apocatusave cuese rahe viña che yeviser voi senose ãgua cheu imboyevi catumi ãgua viña’ ehi. ²⁸ Ipare aipo ehi: ‘Perocua guarepochi ichui, pemondora evocoi diez rupi guarepochi omboeta vahe upe’ ehi. ²⁹ ‘Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui. ³⁰ Sese pemose co mbiguai ëgue ehi tēi vahe ocarve pítumimbisave. Aheve toyaseho, tasáitere tēi oí’ ehira serecuar chupe” ehi Jesús oreu.

Jesús oura opacatu ava recocuer rese porandu ãgua

³¹ “Che, Ava Ríquehir, ayevise, opacatu che Ru rembiguai iva pendar reseve che reco ivategüer pipe, ahese aguapira che renda porañete vahesave ava recocuer rese porandu ãgua. ³² Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rārosar oipeha vahe ovesa cavara sui. ³³ Che evocoiyase ovesa aipehara mbahe rese che pocosa coti, cavara mbahe rese che pocoëhisa coti. ³⁴ Ahese che mborerecuar ivate catu vahe aipo ahera che acato cotindar upe: ‘Perio pe opacatu che Ru sui sovasapri

peico vahe, peique che Ru mborererecuasa pipe; ahe acoi yipive ivi apo ramo suive imoingatupri pēu nara. ³⁵ Esepio, ndacheriepoise, pe evocoiyase pembou mbahe che remihura; iyavei che huseise, pe evocoiyase pembou taihu; che aguata tēise pe recua rupi vichico, pe avei oi pembou che que āgua. ³⁶ Turucuar cheu ipanese, pe avei pembou che turucuarā; chembahreasise, peso avei che piri; che roquendasave peso avei che repia no' ehi. ³⁷ Evocoiyase evocoi seco catupri vahe aipo ehira yuvireco cheu: 'Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? ³⁸ ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarā, ore aipo evocoiyase oromondo ndeu? ³⁹ Iyavei, ¿mbahese vo aipo nde repiasa nembahreasise, anise que nde roquendasave, aheve aipo oroso nde repia yepi?' ehira yuvireco cheu. ⁴⁰ Evocoiyase che, mborererecuar ivate vahe, amboyevira yuvireco chupe aipo ahera: 'Supi eté, opacatu mbahe peyapoise que ñepei seco mbegüemi vahe che reroyasar pāhu pendar upe viña, cheu rumo ēgue peye' ahera.

⁴¹ "Ahese aipo ahera cute che mbahe rese pocoēhisa cotindar upe: 'Pesiri che sui. Esepio, pe peico Tūpa ñemoirosavri pendar. Pesopa tata guasu apirēhisave, evocoi imoingatupri opacatu caruguar upe nara serecular reseve. ⁴² Esepio, ndacheriepoise, pe evocoiyase: Yamondomi icaru āgua, ndapeyei eté cheu; che huseise, ahese, Yamondomi toihu, ndapeyei avei cheu; ⁴³ ambuae tecua pipe aguata tēise vichico, ahese, Eique che rētave che piri, ndapeyei eté cheu. Ipanese che turucuarā, pe rumo ndapemboui cheu, chembahreasise vichico, iyavei che roquendasave, Yasomi tēi sepia, ndapeyei eté cheu' ahera. ⁴⁴ 'Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarā ndeu no, nembahreasise, anise nde roquendasave, marase vo mbahe rese nande pītiviisai?' ehi tēira yuvireco cheu. ⁴⁵ 'Supi eté acoi amove mbahe ndapeyapoise que seco mbegüemi vahe upe viña. Ipipe rumo cheu avei mbahe ndapeyapoi eté' ahera. ⁴⁶ Ahe ava yuvirasora Tūpa ñemoirosa apirēhi vahesave. Seco ivi vahe rumo teco ori opaēhisave yuvirasora' ehi Jesús oreu.

26

Jesús yamotarēhimbar omboguai yuca āgua yuvireco

¹ Ipare Jesús aipo ehi oreu:

² —Pe peicua ñuvirío ari tēi ipane vīte co Pascua pieta yepota āgua yandeu. Ahese che, Ava Riquehir, imondopri aicora che atica āgua curusu rese yuvireco —ehi.

³ Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecular ivate catu vahe Caifás rētave.

⁴ Aheve oñemoñeta: 'Yambopa ipisi yuca āgua' ehi yuvireco oyeupe. ⁵ Ahe rumo:

—Ndiyai pieta pipe ité yaipisi ava rehii yemondii guasuēhi āgua yandeu —ehi.

Cuña oipiyere Jesús áca rese mbahe sīacuá vahe

⁶ Jesús tecua Betania ve secoi, Simón lepra vireco vahecuer rētave.

⁷ Aheve mesave chiniseve, cuña vireco vahe mbahe sīacuá vahe siru

reseve víroyepota chupe. Ahe oipiyere Jesús ãca rese. ⁸Orosepiase rumo oroñemoiro aipo orohe oreyeupe:

—¡Mahera vo co omocañi tō! ⁹Omondo vahe ité tie co setá guarePOCHI rupi ava iparaísu vahe pítiviã água viña —orohe tēi chupe.

¹⁰Jesús rumo oicua ore pihañemoñetas. Sese aipo ehi oreu:

—¡Mahera vo co cuña pemañeco tēi! EsePIA, co mbahe oyapo vahe aviye ité cheu. ¹¹Ava iparaísu vahe niha yuvirecoiñó itera pe pāhuve. Che rumo ēgüe ndahe vitéñoi chira vichico pe pāhuve. ¹²EsePIA, co cuña oipiyere mbahe siacuá vahe che rese che tēi água renondeve. ¹³Supi eté aipo ahe pēu: co ñehesa písirosa resendar mombehuse opacatu tecua rupi, imombehusa aveira co cuña rembiapo sese mahenduha água —ehi.

Judas Iscariote oyemoingatu Jesús mundo áqua yamotaréhimbar povrive

¹⁴Ipare ñepei ore pāhu pendar, Judas Iscariote, oso, oñehe pahi eta rerecuar yuvirecoi vahe upe ¹⁵aipo ehi:

—¿Mboví rupi vo pemboepira cheu amondose Jesús pēu viña? —ehi.

“Treinta guarePOCHI rupi” ehi yuvireco chupe. ¹⁶Ahesa reseve voi oseca Jesús mundo áqua yamotaréhimbar upe.

Jesús caru agüer ipa vahe güemimbohe rese

¹⁷Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboa sese aipo orohe:

—¿Que vo ereipota oromoingatura carusa Pascua pieta resendar yan-deu? —orohe chupe.

¹⁸Evocoiyase,

—Peso tecua guasuwe che cua vahe rētave aipo peyera chupe: ‘Ore Mbohesar aipo ehi: Cōimi che mano áqua, sese ayapo potami sētave Pascua pieta che remimbohe reseve, ehi ndeu’ peyera chupe —ehi.

¹⁹Evocoiyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

²⁰Pitu ramomise, opacatu oroguapi mesave Jesús piri ore caru áqua. ²¹Ore carusave aipo ehi oreu:

—Supi eté aipo ahe pēu: ñepei pe pāhu pendar che mondora che amotaréhisar upe —ehi.

²²—Che Yar, ¿che pīha? —orohe-rohe tēi ñepei-peí ore yacatu ore viharéhisa pipe chupe.

²³—Omondo vahe opo che caro pipe, ahe che mondora che amo-taréhisar upe —ehi. ²⁴Imboavíyesa itera che, Ava Ríquehir, rese ñehesa icuachiapri. ¡lparaisu catura rumo acoi mbia che mondosar! Avíye catura ndoyesuise viña —ehi.

²⁵Ahese Judas imondosaví oporandu:

—Ore Mbohesar, ¿che tie? —ehi.

—Taa, ¡nde ité niha ēgüe erera! —ehi chupe.

²⁶Ore caru viteseve, Jesús oipisi pan, “Avíye ndeu” ehi Vu upe. Aipo ohe pare, ombohi-mbohi oreu imondo, aipo ehi:

—Ndo co, pehu co che rete —ehi.

²⁷Ipare oipisi igua riru, “Avíye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui. ²⁸EsePIA, co che ruvi, ahe omoimera che Ru remimbotar ipiasu vahe pēu, ahe oyepiyerera ava rehii angaipa rese

ñero água. ²⁹ Ndaihu iri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ipiasu vahe —ehi oreu.

Jesús, “Ndaicuai vahe ité aipo mbia’ erera cheu” ehi Pedro upe

³⁰ Ore sapucaire, oroso ivitri Olivo ve. ³¹ Evocoiyase Jesús aipo ehi oreu:

—Opara pemocañi che rese yeroyasa peyesui co pítu pipe. Esepia, acoi icuachiapri pipe aipo ehi: ‘Ayucara ovesa rārosar, ahese oñemosai tēira ovesa opacatu rupi yuvireco’ ehi vahe. ³² Che cuerayevire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya iri chira yuvireco, che rumo ndayepepii chietera nde sui —ehi chupe.

³⁴—Che rumo supi eté aipo ahe ndeu: co pítu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe pâve tupri têi chupe.

Jesús oyeroqui Getsemaní ve

³⁶ Ipare Jesús rupi orosoño Getsemaní ve. Aheve aipo ehi oreu:

—Peguapi cohabe; che aso ranera peve catumi, ayeroqui —ehi.

³⁷ Aheve viraso Pedro oyeupi iyavei ñuvirío Zebedeo rahir. Ahese oyandu oviharëhisa oico. ³⁸ Evocoiyase ahe aipo ehi chupe:

—Ndavihai eté. Esepia, che hâ oyandu ité manosa. Pepita rane cohabe iyavei pemahemohara pe yeroqui pipe che rese —ehi.

³⁹ Evocoiyase oso tenonde catumi. Aheve oñenopicha ovapi ivi rese oyeroqui Vu upe aipo ehi: “Che Ru, iyase ndeu che renose mbahe-mbahe têi sui eve; tayapo eme ru che remimbotar têi, nde remimbotar rupi catu tayapo” ehi.

⁴⁰ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—¡Ndapeñemosai eté vo pe ropesii upe che râro água que ñepei hora che mondugüe água peye! ⁴¹ Pemahemoha, peyeroqui mbahe têi pipe pe viapiëhi água. Supi eté pequerëhi ité viña, pe retecuer têi niha nimiratai pêu —ehi.

⁴² Ichui imoñuviriosa rupi oso iri oyeroqui aipo ehi: “Che Ru, ereipotase che reique água co mbahe têi pipe, eyapo nde remimbotar che rese” ehi.

⁴³ Ipare oyevise, osesapiha iri iqueseve ou. Esepia, sopesii nomboyeroyai eté yuvireco. ⁴⁴ Evocoiyase oseyapa iri oso oyeroqui água imombosapisa rupi. Aipo ehi tupriño avei oyeroqui Vu upe. ⁴⁵ Ipare oyevi iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mundo água ava yangaipa vahe povrîve. ⁴⁶ Pepûha, yaso. Esepia, cõimi eté che amotarëhisar upe che mundo vaherâ secoi —ehi.

Jesús oipisi yuvireco

⁴⁷ Jesús ñehe viteseve, Judas oyepota oso chupe. Ahe ñepei semimbohe ore pâhu pendar, iyavei setá iteanga ava yugüeru quise pucu, ivira

reseve-seve supi. Ahe pahi eta rerecuuar yuvirecoi vahe judío rerecuarea porocuaita rupi oyapo yuvireco.⁴⁸ Yipindar rumo imondosar Judas aipo ehi: "Asovaupitese, ahese peicuara; ahe peipisira" ehi.⁴⁹ Ipare oyemboya voi oso sese.

—¡Avirave, Porombohesar! —ehi sovaupite.

⁵⁰ —Che mborípar —ehi Jesús—, eyapoño mbahe nde remimbotar cheu—ehi.

Aheseve voi oipisi yuvireco.

⁵¹ Evocoiyase semimbohe secoi vahe supi vinose oquise pucu, oyasia pahi rerecuuar ivate catu vahe rembiguai nambi.

⁵² —¡Aní! —ehi güemimbohe upe—. Emoingue siru pipe nde quise pucu. Esepio, acoi ava opacatu ovava vahe oquise pipe yuvireco, ipipe avei opara yucasa yuvireco.⁵³ ¿Ndereicuau vo aporanduse che Ru uve viña, ahe evocoiyase cüritei voi omboura doce mil sui setá catu vahe güembiguai che repi áqua viña?⁵⁴ Ëgüe ehise rumo Tüpa Ñehengagüer icuachiapri ndayavíyei chietera viña, ahe co cüritei osupiti —ehi.

⁵⁵ Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisí áqua imonda rai vahe nungar che rereco peye. Che ari yacatu rupi aguapise pe pâhuve pe mbohe áqua tûparo pipe, ndapeyapoi eté co nun gar cheu.⁵⁶ Co rumo opacatu égüe peye Tüpa ñehe mombehusar rembicuachiagüer mboaviye áqua cute —ehi ava rehii upe.

Ahese voi opacatu oroñemosipa, oroseya ahe aetemi Jesús ava rehii upe imoha.

Jesús serasosa pahi rerecuuar ivate catu vahe rovai

⁵⁷ Ahese Jesús pisísa viraso Caifás rëtave yuvireco, ahe pahi rerecuuar ivate catu vahe secoi. Aheve oñemonuha Moisés porocuaita rese oporombohe vahe, judío rerecuuar yuvirecoi vahe avei no.⁵⁸ Pedro rumo amombrí rupive tēi osaquicue moña oso. Ëgüe ehi oyepota pahi rerecuuar ivate catu vahe rëta rocar áchisave. Aheve oique ipipe, iyavei oguapi oí sundao pâhuve '¿mara ehi etera pîha sereco yuvireco?' oya.

⁵⁹ Ahese pahi eta rerecuuar iyavei opacatu porandusa ivate catu vahe pendar, ahe oñehengapo-ngapo uca tēi ava Jesús amotarëhisave yuca uca áqua yuvireco,⁶⁰ yepe oyemboyecua setá iteanga yamotarëhisar semiramira tēi vahe yuvireco viña, ndoyosui eté rumo mbahe sembiapo naporai vahe yuca uca áqua yuvireco. Aheseve yugüeru ñuvirío yamotarëhisar oporombopa-mbopa tēi vahe yuvireco cute.

⁶¹ —Co mbia aipo ehi: 'Che aicatu co tûparo monduru; aicatu aveira imopuha iri mbosapi ari rupi' ehi —ehi tēi yuvireco chupe.

⁶² Ahese pahi rerecuuar ivate catu vahe opúha, oporandu Jesús upe:

—¿Mahera vo nderemboyevii eté iñehe yuvireco chupe? ¿Mbahe ehi vo aipo nde amotarëhisar nde rese oñehe? —ehi.

⁶³ Noñehei eté rumo. Ahese,

—Che orocuai Tüpa supi eté vahe rer pipe emombehu oreu: ¿Poropísiosar ité nde ereico, Tüpa Rahir? —ehi pahi rerecuuar ivate catu vahe chupe.

⁶⁴ —Taa, supi eté niha aipo aipo ere cheu, co catu amombehura pêu, che repiara niha peye che, Ava Riquehir, aguapise Tüpa mbahe mboavaisarëhi acato cotí, ayevise avei iwa quiha rese curi —ehi.

⁶⁵ Evocoiyase pahi rerecuar ivate catu vahe imboasipave omondoro oturucuar aipo ehi:

—Ilndó, mbahe tēi eté iñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūritei. ⁶⁶ ¿Mara ehi aipo pe pihave? —ehi.

—Supi eté, oyaví mbahe. ¡Tomanoño ité! —ehiño ivoya eta yuvireco chupe.

⁶⁷ Ahese ondivi-ndivi sova rese iyavei yuvirocua-rocu a yuvireco sese. Ambuae osovapete-pete, ⁶⁸ aipo ehi yuvireco chupe:

—Nde niha aipo ereico Tūpa remimbou Poropísirosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹ Pedro evocoiyase oguapi sāro ocarve ñachimbrí pipe oī. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombahu:

—Co ava avei acoi secoi Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepiá, nde ñehe pārigüer rese nde cuasaño —ehi yuvireco.

⁷⁴ Ahe evocoiyase,

¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehe. ⁷⁵ Ahese Pedro oyemomahenduha Jesús oyeupe, ‘Acoi tacura ñehe renondeve mbosapi oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osē, oyasehó iteanga oso.

27

Jesús serasosa Pilato rovai

¹ Cōhe ramose, ahese opacatu pahi eta rerecuar, judío rerecuar avei oñemonuha atí oyemboyoya guasu ‘Jesús tayucasa ité’ oyapave yuvireco.

² Ipare oipocua-pocua seraso mborerecuar guasu Pilato upe yuvireco.

Judas yeyuca agüer

³ Judas, acoi Jesús omundo vahe yamotarēhisar uve oicua, ‘Jesús tayucasa cute’ ehise, ahese tasí iteanga chupe. Evocoiyase oso voi tēi tūparo guasuva pahi eta rerecuar yuvirecoi vahe upe iyavei judío rerecuareta upe treinta guarepochi mboyevi água aipo ehi:

⁴ —Che ayemboangaipa tiête vichico. Esepiá, amondoño tēi mbia seco catupri vahe pēu yuca uca água —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoiyase opaño guarepochi omombó tūparo pipe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pipe. Esepia, ava yucapirā reprí tēi—ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporavíqui vahe ivi rerocua água ‘toime ava secua ambuae vahe rehōgür tī água’ oyapave yuvireco. ⁸ Sese cūritei co ivi upe, “Ava ruví reprí tēi” ehi yuvireco yepi. ⁹ Ëgüe ehi co imboavíye ité Tūpa ñehe mombehusar Jeremías remimombehugür aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugür rupi eté evocoí mbia pisi água. ¹⁰ Ipípe virocua ñaihu rese oporavíqui vahe ivi yuvireco. Cheu che Ýar omombehu vahecuer rupi tupri ité oyapo yuvireco” ehi Tūpa ñehe mombehusar aracahendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyeví Pilato upe.

¹² Evocoiyase acoi pahi eta rerecuar iyavei judío rerecuareta oñemonuha vahe eipeve oíñehengapo-ngapo tēi yuvireco. Nomboyevíi eté rumo iñehe chupe oyeepi água. ¹³ Evocoiyase:

—¿Nderesendui vo aipo co opacatu ndeu ñehe-ñehe tēisa? —ehi Pilato chupe.

¹⁴ Nomboyevíi eté rumo que ñepei angara ñehesa chupe viña. “¡Too, mara ehi rutei vo co!” ehi-ehi tēi mborerecuar chupe.

“¡Tayaticasa!” ehi Jesús upe ava yuvireco

¹⁵ Mborerecuar guasu recosa ité ñepei ava soquendaprí renose água Pascua pieta pipe ava rehii remimbotar rupi yepi. ¹⁶ Aheve oime soquendaprí mbia icuapri vahe ité Barrabás serer vahe; ¹⁷ evocoiyase ava rehii oñemonuha atise, Pilato oporandu chupe yuvireco:

—¿Uma peipota che amose ucara pēu: Barrabás pīha, anise Jesús “Poropísirosar” ehi vahe yuvireco chupe tie? —ehi.

¹⁸ Esepia, ahe oicuaño ité ava rese yemoecatéhisa pipe sui imondoprí secoise.

¹⁹ Pilato güendave chini viteseve, sembireco omondo oñeho chupe aipo ehi: “Ereyapoi rene mbahe evocoí ava seco catuprí vahe upe. Esepia, che querve asepia mbahe tēi eté sesendar” ehi.

²⁰ Evocoí pahi eta rerecuar iyavei judío rerecuareta rumo ava rehii omongueréhi, “Barrabás tosē; Jesús evocoiyase tomano” he água yuvireco. ²¹ Evocoiyase Pilato oporandu iri ava rehii upe:

—¿Uma peipota catu co ñuvirío yuvirecoi vahe sui amose vaherā pēu? —ehi.

—¡Barrabás tosē! —ehi yuvireco.

²² —¿Mbahe vo evocoiyase che ayapora Jesús rese chupe acoi ava, “Poropísirosar” ehi yuvireco? —ehi.

—¡Tayaticasa curusu rese! —ehi ati-atíño yuvireco chupe.

²³ —¿Mbahe ité vo oyapo naporai vahe? —ehi tēi ava rehii upe.

Ahe rumo:

—¡Tayaticasa ité curusu rese! —ehi ati-atí iriño yuvireco chupe.

²⁴ Evocoiyase Pilato: “Ndaicatui mbahe moingatu sepi ãgua” ehi tēi oyeupe. Sese ava yaívú guasu catu-catu irise, ogüeru uca i. Ipípe oyepoi opacatu ava rehii rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

²⁵ —¡Ore rese ité, ore rahir rese avei toviapi que mbahe tēi co mbia mano sui! —ehi atiño ité yuvireco.

²⁶ Ahese Pilato omose uca Barrabás; Jesús rumo oinupá iteanga uca tucumbo tupeicha nungar pipe imondo curusu rese yatica ãgua.

²⁷ Evocoiyase mborerecuar sundao viroique Jesús ambuae oí pipe. Aheve opacatu omboetasa omboyere tupri uca sese yuvireco. ²⁸ Ahese osequiipa iturucuar ichui. Ipare omonde turucuar píra vahe yuvireco sese ²⁹ iyavei omonde ñaca rese yu piapri, omondo avei ñepei tacuarmi mbahe rese ipocosa cotí ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayí tēisa pipe yuvireco.

³⁰ Iyavei ondivi-ndivi yuvireco sese. Ipare yuvirocua-rocua ipo pendar tacuarmi pipe ñaca rese yuvireco. ³¹ Ëgüe ehi yoyai catu-catu yuvireco. Ipare virocua se turucuar píra vahe ichui, ahese omonde iturucuar ité yuvireco sese. Ichui víraso curusu rese yatica ãgua yuvireco cute.

Jesús yaticasa curusu rese

³² Acoi yuvinosese yuviraso, osepia mbia Cirene pendar, Simón serer vahe. Ahe chupe, “Erio, terevosii co curusu Jesús vireco vahe rese” ehi voiño tēi yuvireco.

³³ Oyepotase yuviraso Gólgota serer vahesave, ahe ‘ava ãcagüer’ oya aipo ehi chupe, ³⁴ aheve uva ricuer imboyesehapri mbahe pihaupiar rese omondo tēi yuvireco Jesús toihu. Osáha tēi, ndoihu potai rumo.

³⁵ Ipare oyatica curusu rese yuvireco. Ahese sundao iguayíño oyeupe iturucuar mboyaho-yaho ãgua rese. ³⁶ Ipare aheve oguapi yuvínoi sáro.

³⁷ Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecuar guasu” ehi icuachiapri oí.

³⁸ Ñuvirío imonda rai vahe yaticasa avei curusu rese supive yuvireco, ñepei mbahe rese ipocosa cotí, ambuae evocoiyase mbahe rese ipocoëhisa cotí yuvireco. ³⁹ Acoi ava ñocuasar iñehe-ñehe tēi, oñeaca mbovava, ⁴⁰ aipo ehi yuvireco chupe:

—Nde acoi, “Opara tūparo amonduru. Ipare mbosapi arí rupi opa irira amopuha” ere acoi cuese. ¡Eñepisiro ru nde ae cute! ¡Tūpa Rahir nde recose, egüeyí curusu sui! —ehi tēi yuvireco chupe.

⁴¹ Aipo ehi avei pahi eta rerecuar, Moisés porocuaita rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

⁴² —Oipísiro ambuae, ahe ae rumo ndoicatui oñepisiro. Israel rerecuar guasu secoise, ¡tögüeyí curusu sui cûritei, ahese voi seroyasara! ⁴³ Ahe oyeroya Tūpa rese, Tūpa evocoiyase oipotase, toipísiro cûritei. Esepia, ahe, “Che Tūpa Rahir aico” ehi yandeu cuese —ehi yuvireco.

⁴⁴ Imonda rai vahe avei rumo acoi yaticapri supive, ahe avei mara ehi-ehi tēi chupe.

Jesús mano agüer

⁴⁵ Ahese mbiter ari pipe, opa tupri pítu ivi rupi. Ëgüe ehi las tres rupi.
⁴⁶ Ahese tupri avei Jesús oñeho pírata aipo ehi: “Elí, Elí, ¿lema sabactani?” ehi, (ahe ‘che Ru Túpa, che Ru Túpa, ¿mahera vo che reya eve?’ oyapave aipo ehi).

⁴⁷ Ava aheve yuvirecoi vahe osenduse iñehe, aipo ehi yuvireco:
—Esendu co mbia, Túpa ñehe mombehusar Elías upe oñeho —ehi yuvireco chupe.

⁴⁸ Aheseve voi imboetasa oña, oso mbahe saviyu vahe reca, omoaqui vinagre pipe imondo ivira aprí rese chupe ‘toihu’ oya. ⁴⁹ Ambuae rumo aipo ehiño yuvireco:

—Ëgüe tehiño rane, ¿oura píha Elías ipísiro água? —ehi yuvireco.
⁵⁰ Ahese Jesús sâse pírata iri, omano. ⁵¹ Ahe pipeve voi tûparo guasu turucuar ivate cotí sui ovo tupri. Aheseve avei ivi oríri iyavei ita guasu-guasu oyeca. ⁵² Tehögür ruvípa ita apoprí avei oyemboi yuvireco iyavei setá Túpa reroyasar omano vahecuer, ahe avei opa ocuerayevi yuvireco. ⁵³ Ëgüe ehi Jesús cuerayevire, ahe opa yuvinose tehögür ruvípa sui. Ipare yuviroique Jerusalén maranehí pipe. Aheve setá ava upo oyemboyecua yuvireco.

⁵⁴ Evocoiyase co sundao rerecuar iyavei Jesús rârosareta, ahe oyanduse ivi ríri yuvireco iyavei ambuae mbahe ëgüe ehi vahecuer repiase, ahese oyembosiquiye guasu aipo ehi yuvireco:

—¡Supi eté catu co mbia Túpa Rahir ité secoi! —ehi têi yuvireco.
⁵⁵ Iyavei setá cuña aheve amombríve osepia catu yuvinoha, ahe acoi Galilea sui yugüeru vahecuer Jesús rupi iyavei setá rupi oipítivi yuvireco yepi. ⁵⁶ Ahe ipâhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

Jesús apocatu agüer tuvípa pipe

⁵⁷ Pítu potase, ou mbia mbahe yar José serer vahe, ahe Jesús reroyasar tecua Arimatea pendar. ⁵⁸ Evocoiyase ahe oso Pilato upe oporandu Jesús rehögür rese. Evocoiyase Pilato aipo ehi: “Aviye, timondosaño chupe” ehi. ⁵⁹ José evocoiyase víraso sehögür. Ipare oimama tupri turucuar secose vahe ndiquihai vahe pipe. ⁶⁰ Ichui omoingue ombahe tuvípa ipiasu vahe, ita oyoho uca vahe pipe. Ipare osovapí ita guasu yapayere vahe pipe oso. ⁶¹ Aheve María Magdalena ambuae María rese suvípa rovai oguapi yuvinoi.

Jesús ruvípa osâro sundao yuvireco

⁶² Ahere ayihive mbítuhusa ari pipe, yuviraso pahi eta rerecuar iyavei fariseo Pilato upe mbahe rese oporandu água ⁶³ aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosapí ari pare omano vahe pâhu sui” ehi acoi cuese oicove vîtese —ehi yuvireco—. ⁶⁴ Sese emondo sundao sehögür ruvípa râro tupri água mbosapí ari rupi semimbohe ñomiëhi água pítu pipe yuvireco. Aviyeteramo, “Ocuerayevi omano vahe pâhu sui” aipo ehi tupri têi tiétera ava upe yuvireco. Aipo ehise yuvireco, yipindar semira têi vahe sui ivate catura serecosa —ehi yuvireco.

⁶⁵ Pilato evocoiyase aipo ehi chupe yuvireco:
—Aviye —ehi—. Amondora sundao pêu. Peraso, pemovíracua tupri ité sâro água —ehi.

⁶⁶ Evocoiyase yuviraso tehōgüler ruvipa rāro tupri āgua yuvireco. Ahese omundo tehōgüler rovapisa ita guasu rese mbahe imomiisa cua āgua yuvireco. Ipare oseya aheve sundao sāro āgua yuvireco cute.

28

Jesús ocuerayevi

¹ Cōhe ramomise, domingu pipe, María Magdalena iyavei ambuae María yuviraso tehōgüler ruvipa repia yuvireco. ² Aviyeteramo tēi oriri pīratá ivi Tūpa rembiguai ivi sui igüeyise. Ëgue ehi oyepota tehōgüler ruvipave ou, ahe virocua itape guasu sovapisa ichui. Ipare iharive oguapi oī. ³ Ëgue ehi sendí iteanga aviye acoi overa vahe. Iturucuar evocoiyase morochí eté. ⁴ Osepiase sundao, oririí eteanga osiquiyepave yuvireco ichui, opa oyuca pucu-pucu tēi yuvireco. ⁵ Tūpa rembiguai rumo aipo ehi voi eté cuña upe:

—Pesiquiyei rene. Esepi, che aicua pe peseca Jesús yaticapirer. ⁶ Ndipoi eté cohave. Esepi, ahe ocuerayevi güemimombehu rupi eté. Tapesepia ru supagüer —ehi.

Ipare aipo ehi:

⁷ —Peso poyava voi, tapemombehu semimbohe eta upe: ‘Ocuerayevi omano vahe pāhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu āgua pēu —ehi Tūpa rembiguai cuña upe.

⁸ Evocoiyase cuña yuviraso poyava voi suvípa sui, osiquiye pāhuve rumo ovihāño yuvireco; ëgue ehi yuvinoñá iteanga imombehu yugüeru oreu. ⁹ Ahese Jesús oyemboyecua cuña upe cute omboavirave. Ahe cuña evocoiyase oyemboya sese oñenopihā ipicuhaguā imboeteisave yuvireco. ¹⁰ Evocoiyase ahe aipo ehi chupe:

—Pesiquiyei rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

¹¹ Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepi vahecuer yuvireco. ¹² Evocoiyase pahi rerecuarea oñemoñeta judío rerecuar rese opihāñemoñeta mboyoya āgua. Ichui omundo setá guarePOCHI sundao upe yuvireco, ¹³ aipo ehiño yuvireco chupe:

—Aipo peyera ava uve: “Oroque viteseve pītu pipe, ahese revo Jesús remimbohe yugüeru sehōgüler ñomi āgua ore sui” peyera —ehi mborerecuar yuvireco chupe—. ¹⁴ Acoi oyanduse rumo mborerecuar guasu curi, ahese opoviroya ucara chupe. Evocoiyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoiyase oipisipa guarePOCHI yuvireco. Ipare yuviraso oyapo oyeupe imombehu agüer yuvireco. Ëgue ehi vite cūritei judío Jesús cuerayevisa reroyaëhi yuvireco yepi.

Jesús omondo güemimbohe ivi yacatu rupi oñehengagüer mombehu āgua

¹⁶ Evocoiyase ëgue orohe oroso semimbohe once oroico vahe Jesús remimombehu ivi Galilea pendar ivitrive. ¹⁷ Acoi orosepiase rumo Jesús, ahese oromboetei oroico, yepe moviro tēi ore pāhu pendar ndoviroya

tupri vítei yuvireco viña. ¹⁸ Evocoiyase ahe oyemboya ore rese aipo ehi oreu:

—Tūpa che mbou mborerecuar ívate catu vahe che reco ãgua ívave, ívive nara avei no —ehi—. ¹⁹ Peso ava upe opacatú íví rupi iyavei pembohe che recocuer rupi eté yuvirecoi vaherã; peñapiramo avei che Ru rer pipe, che rer pipe, Espíritu Santo rer pipe avei no. ²⁰ Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

MARCOS REMBICUACHIA JESUS RECOCUER RESENDAR San Marcos

Juan Oporoāpiramo vahe ivi iporupirēhisa rupi secoi

¹ Co yipindar aviyé vahe ñehesa Jesucristo, Tūpa Rahír, recocuer resendar amombehu potami pēu. ² Yipiindar Tūpa aipo ehi imombehu oñeho mombehusar Isaías rembicuachía pipe aracahe:

“Amondora che ñehe mombehusar nde renonera, ndeu peri moatiro água” ehi.

³ “Oyeendu ñehesa ipírata vahe ava poréhisave: ‘Pemoingatu yande Yar raperá; pemohivi tupri avei’ ehi” ehi aracahe.

⁴ Ëgüe ehi Juan ou ava ápiramo ivi iporupirēhisa rupi oico, aipo ehi: “Pemboasi pe angaipa, peyevi Tūpa upe, ahese opoāpiramora Tūpa pēu ñero água pe angaipa rese” ehi ava upe. ⁵ Opacatu ava oyugüeru iñeho rendu água ivi Judea rupindar, iyavei tecua Jerusalén pendar oangaipagüer mombehu água. Ahese Juan oñapiramo iai Jordán pipe.

⁶ Juan turucuar camello ragüer apopri, sumbiuasa mbahe pirer, sembihu evocoiyase tucru, eiri caha pipendar avei. ⁷ Ahe aipo ehi oñeho ava upe oico: “Che raquicuei oura seco pírata catu vahe che sui, sese cheu ndiyai chira ayeaiví ipitaquisã yora água. ⁸ Che supi eté opoāpiramo i pipe tēi; ahe rumo pe ápiramora Espíritu Santo pipe” ehi.

Jesús ápiramo agüer

⁹ Ipare Jesús osé tecua Nazaret sui oso Galilea rupi. Aheve Juan oñapiramo iai Jordán pipe. ¹⁰ Osé ramoseve i sui, Jesús osepia iva oyemboi tupri, ahese Espíritu ogüeyi iharive apicasu nungar. ¹¹ Ahese oyeendu ñehesa iva sui aipo ehi: “Nde che Rahír ereico, che rembiaisu, aviha etepri nde rese” ehi vahe.

Jesús recoāhasa

¹² Ipare voi, Espíritu Santo viroguata Jesús ava poréhisa rupi. ¹³ Aheve Jesús secoi cuarenta ari mbahe mimbá vai pâhuve. Aheve avei Caruguar osecoáha; Tūpa rembiguai iva pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviyé vahe Vu recocuer resendar ava upe oico ¹⁵ aipo ehi: “Oyepota ari iyavei cõimi eté Tūpa mborerecuasa yandeu. Sese, pemboasi pe angaipa, peyevi Tūpa upe, iyavei peroya co ñehesa aviyé vahe Tūpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepei ari Jesús oguata ipa Galilea ivii. Ahese osepia Simón, tivri Andrés avei, ahe pira omboha yuvireco. ¹⁷ Ahese Jesús aipo ehi chupe:

—Pe pira recasar peico, perio che rupi, na peye aveira ava reca água cheu nara —ehi.

¹⁸ Aipo he ramoseve voi, opoi opira mbohasa sui yuvireco, yuviraso supi.

¹⁹ Ipare chihí oguata irimise, ahese osepia Santiago, Zebedeo rahír, tivri Juan reseve carite pipe omoingatu opira mbohasa yuvínoi vu piri.

20 Ahe chupe avei: “Perio che rupi” ehi, evocoiyase vu oseya carite pípe ipitiviar reseve, yuviraso supi.

Mbia caruguar vireco vahe oyese

21 Oyepotase tecua Capernaum ve yuvireco mbituhusa ari pípe, Jesús oique oporombohe tūparove. 22 Evocoiyase ava osenduse iporombohesa, “¿Mara ehi rutei?” ehi tēi yuvireco chupe. Esepias, ahe oporombohe güeco píratasa pípe, ndahei Moisés porocuaita rese oporombohe vahe nungar. 23 Aheve mbia ahe tecua pendar vireco vahe caruguar oyese, oñeho pírata chupe aipo ehi:

24 —¿Mahera vo ereyuño tēi cohabe oreu, Jesús Nazaret pendar? ¿Ereyu vo ore mocañi água tēi? Che orocua ité, nde Tūpa suindar ndaseco marai vahe ereico —ehi chupe.

25 Oñeho pírata rumo caruguar upe aipo ehi: —¡Quiriri, esē co mbia sui! —ehi chupe.

26 Evocoiyase caruguar mbia rese secoi vahe omoehoha seití ivive, sāse, osē oso ichui. 27 Opacatu ava ombosiquiye, ichui oporandu-randu oyeupe yuvireco aipo ehi:

—¿Mbahe píha co? ¡lporombohesa ipiasu vahe ité! ¡Co mbia vireco ité omborerecuasa! ¡Caruguar avei eté omboyeroya oyeupe iñehesel! —ehi tēi ava yuvireco.

28 Cūriteimi voi yandusa serācua opacatu ivi Galilea rupi.

Jesús ombogüera Pedro rembireco si

29 Jesús yuvinoñese tūparo sui, yuviraso Santiago, Juan rese Simón, Andrés rētave. 30 Aheve Simón rembireco si sohí iteanga vupave ou. Evocoiyase omombehu Jesús upe imbaherasisa yuvireco. 31 Ahese oso chupe oipisi ipo rese imopuha, ahe ramoseve, sohí opituhu ichui. Ipare voi ahe cuña ihañeco semihura rese.

Jesús setá ombogüera ava imbaheasi vahe

32 Pitu ramose opacatu imbaheasi vahe iyavei caruguar vireco vahe viraso yuvireco chupe imbogüera água. 33 Opacatu ava ahe tecua pendar oñemonuha oquendipive yuvireco. 34 Evocoiyase setá ombogüera mbaherasi-rasí tēi vireco vahe, iyavei omboyepepi setá caruguar ava sui. Ndoipotai rumo caruguar ñehe. Esepias, ahe oicua ité evocoiya seco yuvireco.

Jesús Vu Tūpa Ñehengagüer omombehu judío tūparo rupi

35 Ayihiteve Jesús oñarapuha oso ava porëhisave oyeroqui água. 36 Evocoiyase Simón ondugüer reseve yuviraso seca. 37 Osepiase, —Opacatu ava nde reca tēi yuvireco —ehi yuvireco chupe.

38 Ahe rumo,

—Yaso ambuae tecua namombrii vahesa rupi Tūpa Ñehengagüer mombehu água aheve; evocoii nungar apo água niha che ayu —ehi.

39 Ëgüe ehi oguata opacatu Galilea ivi rupi, omombehu Vu Tūpa Ñehengagüer judío tūparo yacatu rupi oico, iyavei setá omose caruguar ava sui.

Jesús ombogüera mbia lepra vireco vahe

40 Ñepei mbia lepra rerecosar oyemboya Jesús rese, oñenopíha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cûritei! —ehi chupe.

⁴² Aipo ihe ramoseve, ocuera voi eté. ⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa resendar Moisés porocuaita rupi. Evocoiyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatú ava upe. Sese Jesús ndoicatu iri güeique água güecocuer mombehuse tecua rupi; secoño tēi tecua popi rupi ava poréhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepei arí pipe Jesús oyevi ou tecua Capernaum ve, ahese opacatu oyandu ñepei oive secoise yuvireco. ² Cûriteimi voi eté setá ava oñemonuha yuvireco secosave. Sese ndipoi eté ava reique iri áqua oí pipe oquendipí rupi. Ahe rumo omombehuño ité Vu Ñehengagüer. ³ Aheseve irungatu mbia viroyepota ndoguatai vahe yuvireco chupe. ⁴ Ahe rumo ndiyai seroique áqua Jesús uve ava rehiisave yuvireco. Sese viroyeupi oí haríve seraso yuvireco. Aheve teca virocua oí sui yuvireco; supi víroyi supa reseve imondo Jesús rovai tupri yuvireco. ⁵ Ahe oicuase co mbia yuvirecoi vahe oyese yeroya, aipo ehi imbaheasi vahe upe:

—Che rahír, che ñero nde angaipa rese ndeu —ehi.

⁶ Moisés porocuaita rese oporombohe vahe rumo ipihañemoñeta aheve yuvinoi: ⁷ “¿Mahera co mbia aipo ehiño tēi oñehe? Ahe oyemboívate ai tēi vahe Tūpa ñehe nungar pipe tēi oñehe. Tūpaño ité niha oicatu ava angaipa upe oñeroi áqua” ehi. ⁸ Ahe rumo oicuaño ipihañemoñetas, sese aipo ehi:

—¿Mahera vo pepihañemoñeta rai tēi che rese? ⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa píha, anise: “Eñarapuha, esupi nde rupa, eguata” hesa tie? ¹⁰ Tapeicua ru che, Ava Riquehír, areco mborerecuasa co ívi pipe ava angaipa upe che ñero áqua —ehi.

Evocoiyase aipo ehi imbaheasi vahe upe:

¹¹ —Eñarapuha, esupi nde rupa, eso nde rëtave —ehi.

¹² Imbaheasi vahe aipo ihe ramoseve, oñarapuha, osupi vupagüer, osé oso ichui opacatu ava rembiepiave. Sese opacatu oyepihamondii yuvireco, omboetei Tūpa yuvireco aipo ehi:

—Yipisuive ndayasepiai vahe ité co nungar mbahe —ehi tēi yuvireco.

Jesús oñehe mbia Leví serer vahe upe

¹³ Ipare Jesús oso iri ipa ívii. Aheve oporombohe oyese ava rehi yemboyase. ¹⁴ Ichui oguata vitese, osepia Leví, Alfeo rahír, guarepochi rerocuasave chinise, aipo ehi chupe:

—Erio che rupi —ehi.

Evocoiyase Leví opúha, oso voi supi.

¹⁵ Ipare ocaru Leví rëtave güemimbohe reseve yuvireco, ava sui guarepochi rerocuasar iyavei ava yangaipa vahe pâhuve. Esepia, setá ava osaquicue moñaño ité yuvireco. ¹⁶ Evocoiyase Jesús ocaruse ipâhuve,

fariseo eta, oporombohe vahe Moisés porocuaita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuasar iyavei yangaipa guasu vahe pāhuve tēi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasí vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

¹⁸ Ñepei ari pipe Juan Oporoñpiramo vahe remimbohe oyecuacu yuvireco, fariseo eta avei oyecuacu yuvireco no. Evocoiyase moviro mbia ipāhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

¹⁹ Evocoiyase omboyevi ahe ava upe:

—¡Ndiyai eté ichohoprí mendasave iyecuacu água imer oicove vitese ipāhuve! ²⁰ Oimera rumo ari imer reraso água ichui curi, ahese ramo oyecuacura yuvireco cute —ehi.

²¹ “Ndiyai yayapete turucuar cuacula turucuar ipiasu vahe pipe. Esepia niha, ipiasu vahe oichohó turucuar cuacula imondoro iri água, ichorosa evocoiyase tuvicha catu-catuño ité. ²² Iyavei uva ricuer ipiasu vahe ndiyai iñasa mbahe pirer cuacula pipe. Esepia, uva ricuer ipiasu vahe osose mbahe pirer cuacula vahe pipe, ombopuñora, uva ricuer evocoiyase ocañipa tēira, iyavei mbahe pirer ocañi tēi aveira. Sese uva ricuer ipiasu vahe ñoñasara mbahe pirer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

²³ Ñepei mbituhusa ari pipe, Jesús oguata güemimbohe rese trigo pāhu rupi fariseo rembiepiave yuvireco. Ahese semimbohe oipoho-poho sāhií yuvireco. ²⁴ Evocoiyase fariseo aipo ehi:

—¡Mahera nde remimbohe mbituhusa ari pipe oporaviquiño yuvireco! —ehi yuvireco chupe.

²⁵ Ahe rumo aipo ehi:

—Peyeroqui niha icuachiapri aracahendar pipe mborerecuar guasu David rembiapogüer rese acoi ndasiepoise ondugüer rese yuvireco aracahe. ²⁶ Pahi rerecuar ivate catu vahe Abiatar serer vahe recose, ahese David oique Tūpa rēta pipe pan imboeteipri Tūpa upendar reca ondugüer rese yuvirohu água. Ahe chupe acoi ndipotasaí ihu água yuvireco viña; judío pahi yuvirecoi vahe upeño ité niha ipotasa ihu água yepi. Ahe rumo ohuño, omondo avei ava oyeupindar tohu aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara. ²⁸ Sese Ava Riquehir mbituhusa ari rerecuar secoi —ehi Jesús fariseo upe.

3

Mbia ipo nomii vahe Jesús ombogüera

¹ Jesús oique iri judío tūparove. Aheve oime mbia ipo co cotigüer nomii vahe. ² Aheve avei fariseo ‘ombogüerara pīha mbituhusa ari

pipe?" oya omahengatu yuvireco sese 'yaiñehengapo angahu' oyapave tēi.
³ Evocoiyase Jesús aipo ehi co mbia ipo nomii vahe upe:

—Epūha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi: mbahe avīye vahe pīha, mbahe naporai vahe tie? ¿Yaipīsiro pīha ava recocuer, yamocañi uca tēi tie? —ehi chupe.

Ahe rumo opaño iquiriri tupri yuvireco. ⁵ Evocoiyase omahe ava oyese oyere tupri vahe rese voriēhisave iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yīva —ehi.

Evocoiyase oichoho oyiva, ocuera tupri ité. ⁶ Ahese fariseo opa yuvinose yuviraso oyemoingatu Herodes rupindar rese Jesús yuca ãgua yuvireco.

Ava rehii ipa popi rupi yuvirecoi

⁷ Ipare Jesús yuviraso güemimbohe reseve ipa popi rupi, ava rehii avei ivi Galilea rupindar yuviraso supi. ⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia ãgua. ⁹ Sese oyocuai güemimbohe vireco voi vaherā ñepei carite yuvireco ava omboti etepriēhi ãgua yuvireco. ¹⁰ Esepia, setá imbaheasí vahe ombogüera. Sese opacatu ambuae imbaheasí vahe yuviraso chupe sese opoco ãgua.

¹¹ Iyavei ava caruguar vireco vahe sepiase, oñenopīha sovai, oñehe pucu-pucu yuvireco:

—¡Nde Tūpa Rahir ereico! —ehi.

¹² Jesús rumo oñehe pīrata chupe: "Che mombehui rene ava rovaque peye" ehiño imondo.

Jesús oiporavo doce tupri güemimboherā

¹³ Ipare Jesús oyeupi ivitri rese oso. Aheve ava viroyasar upe oñehe iporavo ãgua güemimbotar rupi. Ichui oyugüeru yuvireco chupe. ¹⁴ Ahe ipāhu pendar osenoi doce tupri güemimboherā 'togaataño che rupi, tomombehu Tūpa Ñehengagüer opacatu ivi rupi' oya. Ahe osero "apóstol" ¹⁵ 'toipisi avei mborerecuasa caruguar ava sui imboyepipi ãgua yuvireco' oyapave. ¹⁶ Evocoí doce yuvirecoi vahe, ahe: Simón (sererguā acoi omondo Pedro), ¹⁷ Santiago iyavei tivri Juan Zebideo rahir, ahe avei omondo sererguā Boanerges ('osunu vahe rahir' oya aipo ehi); ¹⁸ iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatéhi vahe pāhu pendarer; ¹⁹ iyavei Judas Iscariote, ahe omondo vaherā Jesús yamotarēhisar upe.

"Jesús caruguar pīratasa vireco oyese" ehi tēi ava yuvireco

²⁰ Ipare Jesús oique oí pipe güemimbohe reseve. Aheve oñemonuha ati irise ava yuvireco sese, ndiyai icaru ãgua yuvireco. ²¹ Oyanduse imu secocuer yuvireco, oyugüeru seraso ãgua 'ndayaracua iri revo' oya.

²² Iyavei oporombohe vahe Moisés porocuaita rese oyugüeru vahe Jerusalén sui aipo ehi: "Co mbia caruguar rerecuar Beelzebú oyocuai vahe, ipíratasa pipe tēi omboyepipi caruguar ava sui" ehi yuvireco.

²³ Evocoiyase Jesús omombehu caruguar recocuer aipo ehi: "¿Mara ehira aipo caruguar ahe ae oyeenose ava sui viña?" ²⁴ Acoi mborerecuar

guasu povri pendar, ahe ovava-vavase oyeupe; evocoii nungar mborerecuar píratasa ocañi tēira. ²⁵ Acoi oñemu oyese ae oyeamotaréhise, oyemboyahose yuvireco viña, ahe ndipocopii chiaveira yuvireco. ²⁶ Acoi caruguar oyemboyahose ovava água oyeupe ae yuvireco, ndipocopii chiaveira yuvireco, ahe evocoiyase secocuer ocañi tēi vaherā ité yuvireco.

²⁷ “Ndipoi eté niha ava oique vahe que ava ipírata etepri vahe rēta pipe imbahe rerocuapa água ichui; oñapichi rane itera. Ipare voi opara imbahe vīrocua ichui.

²⁸ “Supi eté aipo ahe pēu: Acoi ava yangaipa vahe upe Tūpa iñerora opacatu yangaipa rese, iñehe-ñehe tēisa rese avei. ²⁹ Acoi iñehe-ñehe tēi vahe rumo Espíritu Santo rese, ahe chupe ndipo iri chietera ñerosa apiréhi vaherā ité” ehi.

³⁰ Aipo ehi Jesús imboyevi ava upe. Esepia, “Caruguar tēi erereco” ehiño ava yuvireco chupe.

Jesús si, rivireta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichē água. ³² Yivii yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tēi yuvireco —ehi.

³³ Ahe rumo,

—¿Ava pīha che si; ava pīha che rivireta yuvireco? —ehi.

³⁴ Evocoiyase omahe ava oivirindar yuvinoi vahe rese aipo ehi iri chupe:

—Co che si eta; co che rivireta. ³⁵ Esepia, acoi Tūpa remimbotar oyapo vahe yuvireco, ahe che rivri, che reindri, che si avei yuvirecoi —ehi.

4

Mbahe miti sui yembohesa

¹ Jesús oporombohe iri ipa popi rupi. Aheve ava rehii oyemboa yuvireco sese. Ipare oha carite imbehive tui vahe pipe. Aheve oguapi oñ oñehe. Ava rumo opacatu ivi átasa rupi opitaño yuvireco. ² Evocoiyase ava mbohe água omboyoya tecocuer mbahe tīsa rese aipo ehi:

³ “Pesendu co ñehesa: Ñepei mbia osē omaheti. ⁴ Ahe otíapi-apiise mbahe rāhii oso, moviro oviapi peri rupi. Vīrai yugueruse rumo, opaño yuvirohu. ⁵ Iyavei moviro oiti ivi nayanai vahesave, ita pāhuve. Sese cūriteimi sorí. ⁶ Ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rāhii oiti yu pāhuve; ahe yu rumo sorí poyava catu. Sese opaño oyopi. Evocoiyase ahe miti ndihai eté. ⁸ Ambuae mbahe rāhii oiti ivi avíye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco” ehi.

⁹ Evocoiyase, “Acoi osendu pota vahe che ñehe, toyapisacaño sese” ehi Jesús ava rehii upe.

¿Mahera pīha co yembohesa imboyoyasa ambuae mbahe rese?

¹⁰ Ipare Jesús opita ahe ae. Ava opita vite vahe semimbohe eta reseve oyemboa yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe. ¹¹ Ahe aipo ehi: “Pēu niha Tūpa oicua uca mbahe ndicuasai vahe omborerescuasa resendar. Ndache reroya potai vahe upe rumo imboyoyasa mbahe ambuae mbahe rese

yepi.¹² Yepe osepia tēira, ndosepiacuai chietera rumo yuvireco. Iyavei yepe osendu tēira, ahe rumo ndosenducuai chietera yuvireco, Tūpa upe oyevi potaēhisave, ipiē sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tīsa resendar

¹³ Iyavei aipo ehi: “¿Ndapesenducuaimi vo aipo porombohesa? ¿Mara peyera ru opacatu ambuae che porombohesa cua tupri ãgua?¹⁴ Evocoí mbahe rāhii oñotí vahe, Tūpa Ñehengagüer mombehusar nungar.¹⁵ Amove ava recocuer inungar co mbahe rāhii seitípri peri rupi: osendu angahu Tūpa Ñehengagüer. Sendu pare rumo, ou Caruguar ovirocuapaño oique vahe ipiha pipe ichui.¹⁶ Ambuae ava recocuer inungar mbahe rāhii seitípri ita pāhu rupi: osendu Tūpa Ñehengagüer, oipisi tupri angahu oyeupe nara vorivetesha pipe;¹⁷ ndovirecoi rumo guapo oyese opírata ãgua. Evocoiyase yuvirecoise mbahe-mbahe tēi pipe Tūpa Ñehengagüer sui tēi, cûriteimi seroyaēhisave, ‘Apóira ichui’ ehi yuvireco.¹⁸ Ambuae ava recocuer inungar mbahe rāhii ñotimbrí yu pāhu rupi: osenduse ñehesa Tūpa suindar,¹⁹ ahe rumo ipihañemoñeta catu opacatu ombahe eta co ivi pipendar rese saisusave. Oyembopa uca rumo ombahe eta upe. ‘Opacatu ité mbahe tareco’ ehi tiête viña. Ipiē sui omocañi tēi Tūpa Ñehengagüer. Ndoyapo ucai avei mbahe eta aviye vahe evocoí nungar ava upe.²⁰ Ambuae ava rumo osendu vahe Tūpa Ñehengagüer seroyasa pipe, oyapoño ité mbahe aviye vahe. Ahe inungar mbahe rāhii ñotimbrí ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvrīve nara tēi iyavei yande rupavrīve nara tēi no? Aní, tataendi imondosa ivate poroesape ãgua.²² Ndipoi chietera mbahe ñomipri ndayasepiai vaherá curi.²³ Acoi osendu pota vahe che ñehe, toyapisacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pēu. Iharié amondo iri catura pēu.²⁵ Vireco tupri vahe upe, imondosa catura. Acoi ndovireco tuprii vahe sui, serocuasañora” ehi.

Yembohesa mbahe rāhii rorisa resendar

²⁶ Aipo ehi iri avei Jesús: “Tūpa mborerescuasa co ivi pipe inungar que ava oñotí vahe mbahe rāhii.²⁷ Omaheti pare, oso oque. Ipare coiye catu oñarapuha. Ahe oñocua pītu, ari avei, evocoiyase mbahe rāhii sori poyava yuvireco. Itísar rumo ndoicuai mara ehi vori.²⁸ Ivi rese niha oyesu miti: yipindar sori, ipare iha, ipare sâhi yuvinose sese.²⁹ Evocoiyase co mbia mbahe ha yaviyese, oipoho. Esepiá, oyepota ari ipoho ãgua chupe” ehi.

Yembohesa mostaza rāhii suindar

³⁰ Iyavei aipo ehi: “¿Mara ehi vo Tūpa povri pendar co ivi pipe pēu; mbahe rese pīha iyacatu imboyoyasa icua ãgua?³¹ Ahe oyoya tupri mostaza rāhii rese. Ahe tahimi catu opacatu ambuae mbahe rāhii sui.³² Ñotí pare rumo, sori, ocuacuase tuvichá catu ambuae mbahe miti sui. Sâca tuvichá ité, sese vîrai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ëgüe ehi Jesús oporombohe Tüpa Ñehengagüer rese, omboyoya-
yoya ñepei mbahe ambuae mbahe rese ava mbahecuagüer rupi.
³⁴ Nomombuhui eté mbahe ambuae mbahe rese imboyoayaëhi pipe. Ahe
rumo omombehu tupri güemimbohe upe ahe aemi yuvirecoise.

Jesús omombihu i ohitu vahe, ivitu ai reseve

³⁵ Ahe ari pipe pítu ramomise, aipo ehi güemimbohe upe:
—Yaso ipa rovai —ehi.

³⁶ Evocoiyase ava sui osiri yuvireco, yuviraso carite pipe. Ambuae
carite pipendar avei yuviraso supi. ³⁷ Oyepotase rumo ivitu ai ipírata
vahe, i ohitu vahe oha guasu-gasu carite pipe, omboapipo seni yuvireco
chupe. ³⁸ Jesús rumo oyeatocoño, oque ou supita coti. Evocoiyase
omomahe voi yuvireco, aipo ehi chupe:

—¡Porombohesar! ¿Nandemahemohaimi rutei vo yande rese? ¡Opara moco
yaso ipive! —ehi.

³⁹ Evocoiyase aipo hese, omahe, oñeho pírata ivitu ai upe, ipa upe avei:
—¡Pepituhu! —ehi.

Aheseve voi opituhu tupri. ⁴⁰ Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroya Vitei vo che rese? —ehi.

⁴¹ Ahe rumo osiquiyepave oporandu-randu oyeupe yuvireco:

—¿Ava píha co mbia secoi? Esepiña niha, ivitu ai, ipa avei omboyeroya
—ehi tēi yuvireco chupe.

5

Mbia Gerasa iguar vireco vahe caruguar oyese

¹ Jesús güemimbohe reseve oyepota ipa rovai Gerasa ivi rese yuviraso.
² Yuvinose pare carite pipe sui, ahese mbia caruguar rerecosar tuvípa
páhu rupi secoi vahe oso Jesús upe. ³ Co mbia tuvípa páhu rupi secoi vahe
yepi. Ndipoi eté ava secopisar, carena avei eté opa-opaño omondoso.
⁴ Setá yupagüer rupi tēi ñapichisa carena pipe ipi, ipo rupi avei yepi. Ahe
rumo opa-opaño ité omondoso carena yepi. Ndipoi eté ava osecoreroyi
vahe. ⁵ Ari, pítu rupi oguata, osapucaí oico ivitrí mahugüer rupi, tuvípa
mahugüer rupi avei; ocua-ocua ita pipe oyese yepi. ⁶ Amombri Jesús
repia ramoseve, oña senonde oñenopíha voi sovai, ⁷ oñeho pírata chupe:

—¡Eyepepi che sui Jesús, Tüpa seco ivate catu vahe Rahir! ¡Aporandu Tüpa
rer pipe che mombaraisuëhi água eve! —ehi.

⁸ Aipo ehi, esepiña, yipindar Jesús aipo ehi chupe:

—¡Caruguar mbahe tēi vahe, esë co mbia sui! —ehi chupe.

⁹ Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepiña, ore rehii eté —ehi.

¹⁰ Oporanduño chupe omondopaëhi água co ivi sui. ¹¹ Ichui
namombriimi setá cuchi ocaru vahe ivitrí rese yuvireco. ¹² Sese caruguar
oporandu yuvireco chupe:

—Ore mondopaño cuchi aviterve eve —ehi yuvireco.

¹³ Evocoiyase Jesús omundo caruguar së água ahe mbia sui. Ahe opa
yuviroique cuchi aviterve. Ahe cuchi retacuer dos mil tupri vahe, ahe
yuvinoña yuviraso ivivate sui ipa pipe ocañipa.

¹⁴ Evocoiyase cuchi rārosar yuvinoña osiquiyepave yuviraso imombehu âgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pīha?’ oya yuvireco. ¹⁵ Oyepotase Jesús recosave, aheve osepia mbia caruguar vireco vahecuer yuvireco oyemonde tuprise oĩ, yaracua tuprise avei. Ahese oyembosiquiye tēi yuvireco. ¹⁶ Mbahe oime vahe caruguar vireco vahe rese, cuchi rese avei, ahe sepiasar omombehupa ambuae ava upe yuvireco. ¹⁷ Evocoiyase ava Jesús upe: “Esẽ cohabe sui” ehi yuvireco.

¹⁸ Oha irise Jesús carite pipe, co mbia caruguar rerecosarer oporandu chupe supi oso âgua. ¹⁹ Ahe rumo,

—Esoño nde rētave, nde mu piri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoiyase ava opacatu, “¡Mara ehi rutei!” ehi tēi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyevise Jesús carite pipe ipa rovai oso, aheve oñemonuha ati ava yuvireco chupe. Ahe evocoiyase opitaño ipa popive. ²² Evocoiyase oyepota mbia mborerecuar tūparo pendar, ahe serer Jairo. Jesús repiese, oñenopiha sovai, ²³ aipo ehi chupe:

—Che rayri omano pota. Yaso, teremondomi tēi nde po iharive imbogüera âgua —ehi.

²⁴ Evocoiyase oso supi. Ava rehii avei yuviraso supi. ²⁵ Ipāhuve avei oime cuña doce araviter rupi suví yepiyere-yere vahe. ²⁶ Iparaisú iteanga, setá oporoposano vahe ndoicatui imbogüera yuvireco omomandaivete catu iposanosa pipe yuvireco. Opa tupri tēi omondo mbahe vireco vahe, ivate catuño rumo imbaherasisa chupe. ²⁷ Co cuña osenduse Jesús rese ñiehesa, oguata saquicuei oso ava rehii pāhuve, iturucuar rese opoco. ²⁸ Aipo ehi oyeyupe oico: “Iturucuar rese apocese rumo, acuerara” ehi. ²⁹ Ahe ramoseve voi ndasuví yepiyere iri. Ipare oyandu güetecuer yemoingatu tuprisa, ocuerase ombaherasisa sui. ³⁰ Jesús rumo oyandu osẽe opíratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

³¹ Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

³² Ahe rumo omaheño vite ité ava oiviindar rese ‘¿uma ité pīha opoco che turucuar rese?’ oya. ³³ Evocoiyase co cuña oicuase mbahe oyessendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe. ³⁴ Evocoiyase Jesús aipo ehi chupe:

—Che rayri, erecuera cūritei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

³⁵ Iñehe viteseve, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vite Porombohesar —ehi yuvireco chupe.

³⁶ Ahe rumo Jairo upe aipo ehi:

—Aní eresiquiye. Eyeroya catuño —ehi.

³⁷ Ndoipotai rumo ambuae ava oyeupi icho água; Pedro, Santiago, Juan güeraño oipota. ³⁸ Oyepotase Jairo rētave, osepia ava yemondii oyaseho vahe. ³⁹ Ichui oiqueso oi pipe, aipo ehi:

—¿Mahera vo perāse guasu tēi peyaseho peyu? Co cuñatai nomanoi, oque tēi ou —ehi ava upe.

⁴⁰ Ava rumo opucaete-eteño seroyaéhisave yuvireco. Evocoiyase omose opacatu ava. Ipare omoingue iyesupa, ichi, oyeupindar reseve cuñatai rehōgüersave. ⁴¹ Ipare oipopisi aipo ehi:

—Talita, cum —ehi chupe ('cuñatai, eñarapuha, ahe ndeu' ohesave aipo ehi).

⁴² Ahe ramoseve voi cuñatai doce araviter vahe oñarapuha, ipare oguata. Sepiase ava, oyembosiquíye guasu yuvireco. ⁴³ Jesús rumo oyocuai imombehüehi água ambuae ava upe. Ipare,

—Pembocaru co cuñatai —ehi.

6

Jesús Nazaret ve secoi

¹ Jesús osē co tecua sui oso güecuave; semimbohe avei yuviraso supi.

² Oyepotase mbituhusa ari, ahese oporombohe tūparo pipe. Setá ava ñehe rendusar oyepihamondiisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pīha vīnose co mbahecusa co poromondiisa apo água? —ehi yuvireco oyeupe—.

³ Co niha carpintero, María membri; Santiago, José, Judas iyavei Simón riquehir, seindrí avei yuvirecove yande pāhuve —ehi.

Sese ndoviroyai yuvireco. ⁴ Jesús rumo aipo ehi ahe ava eta upe:

—Tūpa ñehe mombehusar avei niha ava omboetei opacatu rupi yuvireco yepi, imu sēta pipendar ae rumo nomboetei yuvireco —ehi.

⁵ Ndoicatui mbahe oporomondii vahe apo água ava viroyaéhisa pipe, sese moviro tēi imbaheasi vahe harive omondo opo imbogüera água.

⁶ Ndoyembovihai ava viroyaéhisa rese.

Jesús oyocuai güemimbohe Tūpa mborerecuasa mombehu água

Ipare Jesús oso, oguata tecua-tecuami namombrii vahe rupi oporombohe oico.

⁷ Evocoiyase, “Perio” ehi güemimbohe doce vahe upe. Ipare oyocuai ñuvirío-río, iyavei omondo güeco pīratasa caruguar mboyepipi água chupe.

⁸ —Ndaperasoi chira rumo mbahe peguataso rupi, pe pococa güeraño ité perasora —ehi—. Ndiyai avei peraso mbahe riru, pan, guarePOCHI avei. ⁹ Iyavei pemondera pītaqui güeraño. Ndapemondugüei chiaveira pe camisa seraso.

¹⁰ —Que pesosave peiqueso oi pipe, pepitaño ipipe, ichuive tupriño ité pesera pecua. ¹¹ Acoi ambuae tecua pendar ndape pisí potaise, ndosendu potaise avei pe ñehe yuvireco, peyepepiñora ichui. Peipipeteño aveira pe pi ivi rātachigüer sui. Ëgüe pe hesa omboyequara cañisa apiréhi yuvireco chupe —ehi.

¹² Evocoiyase semimbohe eta yuviraso, “Pemboasi pe angaipa, peyevi Tūpa upe” ohe água yuvireco. ¹³ Iyavei setá omboyepepi caruguar ava sui, setá avei omondo mbahe quira ava imbaheasi vahe rese imbogüera água yuvireco.

Juan Oporoāpiramo vahe mano agüer

¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoāpiramo vahe revo ocuerayevi. Sese oyapo poromondiisa ipírata vahe —ehi.

¹⁵ Ambuae rumo,

—Tüpa ñehe mombehusar Elías mo evoco —ehi yuvireco.

Ambuae evocoiyase,

—Tüpa ñehe mombehusar aracahendar mo evoco —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evoco che añaca asia uca vahecuer, ahe cûritei ocuerayevi —ehi.

¹⁷ Herodías recocuer sui tēi niha Herodes Juan oñapichi uca carena pipe soquenda. Esepi, co cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese. ¹⁸ Juan aipo ehi Herodes upe: “Ndiyai eté nde ererecora nde rivri rembireco” ehi.

¹⁹ Herodías evocoiyase oyuca pota Juan yamotareñisave; ndoicatui rumo yuca. ²⁰ Esepi, Herodes osiquiyeño ichui oicuase co mbia reco tupri aisa iyavei seco maranehise. Sese osepi ité; yepe ndoyembohe catui osenduse iñehe viña, ahe rumo osendu pota raiño ité. ²¹ Coiye rumo osupiti ari Herodías remimbotar apo água, ahese Herodes ohargüer pipe oyapo carusa guasu mborerecuareta rese, ava Galilea pendar icuaprí ivate catu yuvirecoi vahe rese avei. ²² Herodías membrí cuñatai oique carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoiyase amondora ndeu —ehi.

²³ Ipare aipo ehi iri opacatu ava rovaque chupe: “Ammondora nde remimbotar ndeu, anise, che mbahe eta amboyahora ndeu” ehi. ²⁴ Ahe cuñatai osë oso, osí upe oporandu:

—¿Mbahe rese píha aporandura chupe? —ehi.

Ichi aipo ehi chupe:

—Eporandu Juan Oporoāpiramo vahe áca rese —ehi chupe.

²⁵ Ipare cuñatai oña, oique oso mborerecuar guapisave, aipo ehi chupe:

—Che aipota co pipeve voi eremboura Juan Oporoāpiramo vahe áca poratu pipe cheu —ehi.

²⁶ Mborerecuar rumo ndoyembovhai tēi. Esepi, ava ichohopri rovaque ité yipindar oñehe. Sese ndoicatui, “Aní” ohe água. ²⁷ Evocoiyase ipare voi mborerecuar oyocuái sundao Juan áca reru água. ²⁸ Sundao oso soquendasave, oyasia Juan áca, seru poratu pipe. Mborerecuar omondo co cuñatai upe, evocoiyase cuñatai omondo osí upe.

²⁹ Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

Jesús oyopoi cinco mil cuimbache

³⁰ Co pare, apóstol oñemonuha Jesús piri yuvireco. Ipare omombahu mbahe güembiapogüer, oporombohe agüer avei yuvireco chupe. ³¹ Ahese aipo ehi oapóstol upe:

—Perio cohabe, yaso, yapituhumi rane co cotí —ehi.

Esepio, oyepindecuaño ité ava yugüeru chupe, sese ndiyai icaru âgua yuvireco. ³² Evocoiyase ahe güeraño apóstol reseve yuviraso carite pipe co coti ava sui. ³³ Setá rumo ava osepia ichose. Ichui opacatu ava tecua rupindar osaquinue moñaño; ahe ranengatu oyepotapa yuvireco ichui. ³⁴ Ogüeyise rumo carite pipe sui, osepia ava rehii, ahese iparaisu ava eta chupe, inungar ovesa ndovirecoi vahe guārosar. Ipare ombohe opacatu mbahe rese. ³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu eteprí moco, iyavei ndipoi oí co rupivemi vahe. ³⁶ ¿Ndiyai vo eremondopa ava tecua-tecuami cõi vahesa rupi? Aheve tovirocua ocaru âgua yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura píha oreu dosciento denario pan reprirâ ava mbocaru âgua?
—ehi.

³⁸ Jesús aipo ehi:

—¿Mboví vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoiyase omboyaho-yaho ava imboguapí capihi harí rupi.

⁴⁰ Cincuenta, cien rupí-rupí oyemboyaho yuvireco. ⁴¹ Ichui Jesús oipisi poyandepo pan, ñuvirío pira. Ipare omahe íva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo âgua yuvireco. Pira ñuvirío vahe avei omboyaho-yaho opacatu ava upe. ⁴² Evocoiyase opacatu ava ocaru vahe ihítaropa tẽi yuvireco. ⁴³ Ipare semimbohe omboapipopá doce tuprì iruova pan iyavei pira rumbirer yuvireco. ⁴⁴ Cuimbahe ocaru vahe retacuer cinco mil tupri.

Jesús oguata i harí rupi

⁴⁵ Ipare Jesús, “Peha pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe.

⁴⁶ “Aviye” ohe pare ava upe, oyeupi oso ívitri rese oyeroqui âgua. ⁴⁷ Pítuse carite ipa mbiterve ité secoi. Jesús rumo ahe ae opitaño ívive. ⁴⁸ Ahese omahe güemimbohe rese iyeapicui catuêhise. Esepio, ívitu ipírata vahe osovañchi yuvireco. Cõhe potase, oguata i harí rupi güemimbohe coti oso. Aviye ité acoi oñocuaño vaherâ oso. ⁴⁹ Sepiase rumo ‘háguer tẽi revo’ oya, sâse pucu-pucu i harí rupi iguatase semimbohe yuvireco. ⁵⁰ Esepio, opacatu osepiase osiquiye yuvireco ichui. Ahe rumo aipo ehi:

—¡Peyemoviracuaño, che tẽl! ¡Pesikiye eme che sui! —ehi güemimbohe upe.

⁵¹ Ahe ohase carite pipe, opituhu voi ívitu. Evocoiyase, “¡Mara ehi rutei!” ehi tẽi yuvireco. ⁵² Esepio, ndoicua vitei eté pan apo atí agüer yuvireco, yavai vite seroya âgua yuvireco chupe.

Jesús ombogüera ava imbaheasi vahe Genesaret pendar

⁵³ Osasase ipa, oyepota Genesaret íví rese yuviraso, ahe imbehive oñapichiño carite yuvireco. ⁵⁴ Yuvinosepa ramomiseve, ava oicua voi Jesús yuvireco. ⁵⁵ Ichui opacatu ahe íví pipendar güeru imbaheasi vahe Jesús upe yuvireco. ⁵⁶ Oyepotase que tecuamive, anise tecua guasuve, caha pipe oí-oími rupi, ahe supi imbaheasi vahe ocar rupi vínosepa voi

yuvireco. “Topocomi tēi nde turucuar popi rese” ehi yuvireco chupe. Evocoiyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

¹ Evocoiyase fariseo eta, Moisés porocuaita rese oporombohe vahe avei yugüeru Jerusalén sui oyemboya Jesús rese yuvireco. ² Ahese ahe osepiá Jesú remimbohe ocaru água iyepoiéhise porocuaita mboavíyeéhise yuvireco, sese oñemoiro yuvireco chupe. ³ (Esepia, fariseo iyavei opacatu judío eta aracahendar recocuer sui ndipoisai eté yuvireco, sese oyepoiéhise ndocarui eté yuvireco yepi. ⁴ Mbahe rerocuasa sui oyevise, ndocarui oyepoiéhi viteseve yuvireco. Iyavei tecocuer aracahendar tēi oyapo vite yuvireco inungar ígua ríru piisa, mbahe ríru guareepochi apopri iyavei vupa moatíro tuprisa.) ⁵ Sese fariseo eta iyavei Moisés porocuaita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi aracahendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.

⁶ Jesús rumo aipo ehi chupe:

—Pe Tūpa reroyasar angahu tēi peico vahe, supi tupri ité Tūpa ñehe mombehusar Isaías rembicuachía aracahendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombrí tēi che sui.

⁷ Oyerure tupri tēi yuvireco cheu.

Esepia, iporombohesa ava porocuaita tēi’ ehi.

⁸ Ëgüe peye pepoipa Tūpa porocuaita sui ava recocuer aracahendar rupi tēi pe guata água —ehi.

⁹ Iyavei aipo ehi iri chupe:

—Pe ramoi recocuer aracahendar pipe tēi peseyaño co coti Tūpa porocuaita. ¹⁰ Esepia, Moisés aipo ehi: ‘Pemboyeroyara iyavei peipitivíira pe ru, pe si avei no. Acoi ñehe mara vahe oyesupa upe ahe, Tomanoño, ehi’ ehi aracahe. ¹¹ Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mundo água pēu. Esepia, che opacatu mbahe areco vahe Tūpa upe imondopri, ahe Corbán, ehi’ peye; ¹² pe evocoiyase, aipo ehi vahe upe, ‘Ndiyai eté oyesupa pítivíi água’ peye. ¹³ Co nungar apo pipe Tūpa porocuaita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

¹⁴ Ipare, “Perio” ehi iri ava rehii upe.

Peyapisaca, pesenducua tupri che ñehe: ¹⁵ Ndahei ocar sui tēi ou ava recocuer monguiha água. Ahe rumo osē ipiha sui. ¹⁶ Acoi osendu pota vahe che ñehe, toyapisacaño sese —ehi.

¹⁷ Ipare oseyapase ava, oique oí pipe. Aheve semimbohe eta oporandu yuvireco co porombohesa omombehu vahe rese chupe. ¹⁸ Ahe evocoiyase aipo ehi güemimbohe upe:

—Evocoiyase pe avei no, ¿ndapesenducuai? ¿Ndapeicuai vo acoi ocar sui oique vahe ava aviterve nomboangaipai eté? ¹⁹ Esepia niha, ndahei ipiha oso, ahe rumo oso yaviterve. Ipare osē ichui —ehi ‘opacatu tembihu aviyéño ité’ oyapave aipo ehi.

²⁰ Ipare aipo ehi:

—Ava piha sui osē vahe rumo mbahe, ahe omonguiha ava recocuer. ²¹ Esepio, ava pihañemoñetasu sui osē pihañemoñeta raisa, yemboaguasasa, mondasa, porapichisa, ²² mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasu nihivi vahe. ²³ Co mbahe opacatu naporai vahe yuvínose ava sui imboanganipa uca água —ehi.

Cuña ndahei vahe judía viroya Jesús

²⁴ Ichui Jesús osē oso tecua Tiro cotí. Aheve oique oí pipe, ndoyecua uca potai ava upe viña; ndoicatui rumo ava sui oñemi. ²⁵ Oime cuña vireco vahe omembrí cuñatai, ahe vireco caruguar oyese; ahe cuña oicuase Jesús recosa, oso voi sovai oñenopíha. ²⁶ Ahe rumo ndahei judía, sirofenícia iguar ité. Ahe aipo ehi Jesús upe: “Enose che membrí sui caruguar” ehi. ²⁷ Jesús rumo aipo ehi chupe:

—Tahir judío rane toipisi mbahe yuvíreco. Esepio, naporai yarocua pan tahir sui cave tohu imondo água —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer ovíapi vahe tahir mesavrí pendar —ehi.

²⁹ Aipo ihese, aipo ehi:

—Aviye ité nde ñehe. Eyeví eso. Caruguar osē nde membrí sui —ehi chupe.

³⁰ Co cuña oyepotase güëtave, osepio omembrí supave; yipíve rumo osē caruguar ichui.

Jesús ombogüera mbia ndayapisai, iñehe ipiti-piti vahe

³¹ Jesús oyeví oso Tiro íví sui. Ipare osasa Sidón rupi oso, ambuae tecua eta Decápolis íví rupi avei. Ichui oyepota ípa Galilea ve. ³² Aheve mbia ndayapisai, iñehe ipiti-piti vahe rerasosar: “Emondomi tēi nde po iharive” ehi yuvíreco chupe. ³³ Ichui Jesús viraso coi cotimi ava sui. Aheve ocuã omonde yapisa pipe. Ipare omundo güëndi ñapecu rese. ³⁴ Ipare omahe íva rese, ipítuhe pucu aipo ehi: “¡Efatal!” ehi (‘timboisa’ ohesave aipo ehi).

³⁵ Ahe pipevo voi yapisa tupri, oñehe tupri avei. ³⁶ “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvíreco. ³⁷ Evocoiyase ava oyemboviha guasusave, aipo ehi yuvíreco: “Aviye ité rumo mbahe sembiapo. ¡Esepio, ndayapisai vahe omboapisa, iñehe ipiti-piti vahe avei omoñehengatu tupri!” ehi yuvíreco.

8

Jesús oyopoi cuatro mil cuimbahe

¹ Ñepei ari pipe setá ava oyemboya iri Jesús rese yuvíreco. Ndipoi rumo mbahe icaru água. Sese oñehe güemimbohe eta upe aipo ehi:

² —Iparaisu catu co ava yuvíreco cheu. Esepio, mbosapi ari yuvíreco iyande píri, iyavei ndipoi eté mbahe semihura. ³ Amondopase sétave sieporéhi reseve, virovíapi-api tiétera tieporéhi peri rupi yuvíreco viña. Esepio, setami ava yugüeru amombrí sui —ehi.

⁴ Semibohe aipo ehi yuvíreco chupe:

—¿Mara yahera vo ava tohu mbahe mondo cohave ava poréhisave? —ehi.

5 Ahe oporandu:

—¿Mboví vo pan pereco? —ehi.

—Orovireco siete pan —ehi semimbohe yuvireco chupe.

6 Evocoiyase, “Peguapi iví haríve” ehi ava rehii upe. Ahese oipisi siete pan, “Aviye ndeu” ehi Túpa upe. Ichui omboyaho-yaho pan imondo güemimbohe upe, semimbohe evocoiyase omundo ava rehii upe yuvireco.

7 Iyavei vireco moviro pirami yuvireco, sese avei, “Aviye ndeu” ehi iri Túpa upe. Ichui güemimbohe upe, “Pemboyaho-yaho ava upe” ehi.

8 Opacatu ité ava ocaru vahe ihítaró yuvireco. Ipare rumo semimbohe omboapipo iri rane sumbirer siete iruova yuvireco. **9** Ava rehii ocaru vahe retacuer cuatro mil tupri. Ipare Jesús, “Aviye, peso tupri” ehi ava upe. **10** Ipare voi eté yuviraso güemimbohe eta reseve carite pipe Dalmanuta iví rese.

Fariseo eta oporandu poromondiisa rese yuvireco

11 Ipare fariseo eta oyepota Jesús ñehe poepi-epi áqua yuvireco. Jesús recoáha áqua, oporandu íva pendar poromondiisa rese ‘¿Túpa sui eté piña ou?’ oya yuvireco chupe. **12** Sese Jesús ipítuhe pucu, aipo ehi:

—¡Mahera vo co ava oipota íva pendar poromondiisa che recocuer cua áqua yuvireco! Namboyeucuai chietera rumo que ñepei evocoí nungar mbahe pēu —ehi.

13 Ipare oseyapaño ava. Ichui yuviroha iri carite pipe, osasapa ipa yuviraso sovai.

Fariseo porombohesa inungar pan mboapeposa

14 Jesús remimbohe sesarai pan sui yuvireco, ñepeimi tēi pan viraso güemihura yuvireco. **15** Evocoiyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

16 Aipo ehise, semimbohe: “Pan ndayaruise revo aipo ehi yandeu” ehi-ehi tēi oyeupe yuvireco.

17 Ahe rumo oicua güemimbohe piñañemoñetasa, aipo ehi:

—¿Mahera, “Pan ndayarui” peye? ¿Ndapeicua vítei vo che rembiapo? ¿Yavai víte tie seroya áqua pēu? **18** Oime tēi pe resa, ndapesepiai rumo; oime tēi pe nambi, ndapesendui rumo mbahe. ¿Ndapeyemomahenduha iri vo **19** acoi amboyaho-yahose cinco pan sui ava cinco mil vahe tohu? ¿Mboví iruova vo acoi sumbirer pemonuha iri? —ehi.

—Doce iruova —ehi yuvireco chupe.

20 —Iyavei acoi amboyaho-yahose siete pan sui ava cuatro mil vahe tohu, ¿mboví iruova vo acoi pemonuha sumbirer no? —ehi.

—Siete iruova —ehi yuvireco chupe.

21 Ipare aipo ehi:

—¿Ndapesenducua vítei vo? —ehi güemimbohe upe.

Jesús ombogüera ava ndasesapisoí vahe tecua Betsaida ve

22 Oyepotase Jesús tecua Betsaida ve, ahe ramoseve voi ogüera ndasesapisoí vahe yuvireco chupe ‘epocomi tēi sese’ oya yuvireco.

23 Evocoiyase oipopisi ndasesapisoí vahe seraso co cotimi tecua sui. Aheve omundo güendi sesa rese, omundo avei opo iharíve. Ipare oporandu chupe: “¿Eresepia vo mbahe?” ehi. **24** Ndasesapisoí vahe omahese, aipo ehi:

—Asepiá ava inungar ivira oguata vahe yuvireco —ehi.

²⁵ Evocoiyase omondo iri opo sesa rese. Ipare co mbia omahe tupri ité cute, ocuera ité, opacatu mbahe osepia tupri. ²⁶ Ichui Jesús omundo sētave aipo ehi chupe:

—Ereyevi iri eme tecuave —ehi.

Pedro oicua uca Jesús Tūpa Rembiporavo seco rese

²⁷ Ipare yuviraso Jesús güemimbohe reseve ivi Galilea sui tecua Cesarea coti, Filipo ivi rese. Peri rupi oporandu güemimbohe upe:

—¿Mara ehi vo ava oñeho yuvireco che rese? —ehi.

²⁸ Semimbohe evocoiyase omboyevi yuvireco chupe:

—Amove ava, “Juan Oporoāpiramo vahe” ehi yuvireco ndeu; ambuae evocoiyase, “Elías” ehi; ambuae, “Tūpa ñehe mombehusar mboetasa” ehi yuvireco ndeu —ehi.

²⁹ Evocoiyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoiyase aipo ehi chupe:

—Nde niha Tūpa Rembiporavo Poropísiosar ereico —ehi.

³⁰ Jesús rumo, “Pemombehui rene que ñepei ava upe” ehi.

Jesús omombehu omano áqua

³¹ Evocoiyase Jesús omboipi oporombohe: “Che, Ava Ríquehir, che paraisu itera, iyavei opacatu judío rerecuarea, pahi rerecuarea catu vahe iyavei Moisés porocuaita rese oporombohe vahe remiamotarehi aicora. Ahe avei che yuca ucara yuvireco. Acuerayevira rumo mbosapi ari rupi” ehi. ³² Ahe omboycua tupri ité chupe. Evocoiyase Pedro viraso co cotimi chupe oñehengata áqua. ³³ Oyemboyere rumo, omahe güemimbohe eta rese, oñehengata Pedro upe aipo ehi:

—¡Esiri che sui, Caruguar! Esepiá, nde nandepihañemoñetai mbahe Tūpa upendar rese; ava nungar tēi nde pihañemoñeta eico —ehi.

³⁴ Evocoiyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosiira viña, toyemoingatu voi che recocuer rese oparaisu áqua iyavei toguata tupri che rupi. ³⁵ Esepiá, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisirora. ³⁶ ¿Aviye ai angahu pīha ava upe opacatu mbahe ivi pipendar pisí áqua tēi, ahe ae tēi omocañi güecocuer yuvireco viña? ³⁷ ¿Mbovi pīha omondora ava güecocuer repirā viña? ³⁸ Esepiá, acoi ava yuvinochi ai vahe che sui iyavei che ñehengagüer sui ava angaipa viyar ndaseco tupri vahe rovai, che avei, Ava Ríquehir, égüe ahera acoi ayevise che Ru reco pīrata porañetesu pīpe, sembiguai rehii ivi pendar maranehi reseve curi —ehi.

9

¹ Ipare Jesús aipo ehi iri:

—Supi eté, oimera amove cohabe ava nomano vītei chivaherā, osepia rane itera ouse Tūpa mborerecuasa ipíratasa pīpe yuvireco curi —ehi.

Jesús ñecuñaro agüer

² Seis ari pare, Jesús viraso Pedro, Santiago, Juan reseve ivitri ivate vahesave oyeupi. Aheve aviyeteramo tēi oñecuñaro güemimbohe rovai.

³ Iturucuar sendí, morochí eteanga. Ndipoi eté que ava co nungar co íví pipe turucuar oyosei vahe. ⁴ Iyavei aviyeteramo tēi oyemboycua Elías, Moisés reseve Jesús rese oñemoñeta yuvínaha. ⁵ Ipare Pedro aipo ehi chupe:

—Ore mbohesar, ¡aviye ai eté cohaye yaico! Toroyapo mbosapi teypami: ñepei ndeu nara, ambuae Moisés upe, ambuae evocoiyase Elías upe nara —ehi.

⁶ Osiquiye tēi semimbohe yuvireco. Sese Pedro ndoicuaise oñehé água, aipo ehiño tēi. ⁷ Ahe ramoseve avei ogüeyí íva quiha iharíve, oyopipa tupri yuvireco. Ahe ipáhuve oyeendu ñehesa aipo ehi vahe: “Co che Rahír, che rembiaisu; peyapisaca catu iñehé rese” ehi vahe. ⁸ Ahe ramoseve avei omahese oivíi yuvireco, ndosepiai eté que ambuae ava, Jesús güeraño tupri ité osepia opáhuve yuvireco.

⁹ Ipare ogüeyí ivitri sui yuvireco, aipo ehi güemimbohe upe ou: “Ndapemombehui chietera que ñepei ava upe co mbahe pesepia vahe, pemombehura rumo acoi che, Ava Riquehir, acuerayevise voi” ehi. ¹⁰ Oyeupeñomi tēi vireco aipo ñehesa yuvireco, ahe rumo oporandu randu oyeupe: “¿Mara oya píha aipo, ‘Acuerayevira’ ehise?” ehi tēi yuvireco. ¹¹ Evocoiyase semimbohe oporandu chupe:

—¿Mahera ru Moisés porocuaita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoiyase aipo ehi chupe:

—Elías rane ité niha oura opacatu mbahe moingatu água. ¿Mahera aracahendar icuachiapri pipe aipo ehi: “Ava Riquehir oiporarara mbahe, yamotaréhimbri avei secoira” ehi? ¹³ Che niha aipo ahe pēu: Elías rumo ou ité, ava evocoiyase opacatu güemimbotar tēi oyapo yuvireco sese. Ëgüe ehi opacatu yaviye aracahendar icuachiapirer sese —ehi.

Jesús ombogüera chihivahe caruguar rerecosar

¹⁴ Ipare oyeví yuvireco güemimbohe recosave. Aheve osepia ava rehí oyere guasuse yuvireco sese, iyavei oime aheve Moisés porocuaita rese oporombohe vahe oíñehopepi-epí semimbohe yuvireco. ¹⁵ Ichui Jesús repiase, opacatu yuvínoña yuviraso chupe “avirave” apo. ¹⁶ Evocoiyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepei ipáhu pendar omboyevi chupe:

—Porombohesar, co aru che rahír ndeu, vireco vahe caruguar oyese, nomoñehengatu ucai vahe yepi. ¹⁸ Iyavei que iguatasa rupi co caruguar aviyeteramo tēi opocose sese, oítí voi ivive iyavei sendiriyuisu, sáiteretere avei; sese cûritei nimirata iri eté. “Penosemi caruguar ichui” ahe tēi nde remimbohe eta upe. Ahe rumo ndoicatui eté yuvireco —ehi.

¹⁹ Jesús omboyevi chupe:

—¡Too, ndapeyeroya tupri vitei eté che rese! ¿Mbovi rupi rutei vo aico vitera pe pâhuve che ñemosasa pipe? Peru evocoí chihivahe cheu —ehi.

²⁰ Evocoiyase ogüeru yuvireco chupe. Osepiase caruguar Jesús, oítí uca iri chihivahe ivive. Omboapayere-yere iyavei sendiriyui guasu-guasu.

²¹ Sese oporandu tu upe:

—¿Mbahese vo na ehi chupe? —ehi.

Tu evocoiyase aipo ehi:

—Ichīhivahemi suive ité. ²² Amove co caruguar oiti uca tatave, i've avei yuca pota uca ãgua yepi. Sese ereicatuse, ore pītīviiñomi tēi catu eve ore paraisuerecosave —ehi.

²³ Jesús aipo ehi chupe:

—¡Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che pītīvii ru eve nde reroya catu ãgua! —ehi pīrata chupe.

²⁵ Osepiase Jesús ava rehīi, oyemboyase sese, oñehe pīrata caruguar upe aipo ehi:

—Caruguar noñehei vahe, ndayapisai vahe, che orocuai, epoi co chīhivahé sui, ereique iri eme secocuer rese —ehi.

²⁶ Caruguar sāse pucu chīhivahé yuca tupri oso. “Omano ité co chīhivahé” ehi ambuae ava yuvireco. ²⁷ Jesús rumo oipopisi imopuha; evocoiyase chīhivahé opūha tupri voi eté.

²⁸ Ichui oique oí pipe. Aheve semimbohe ahe aemi oporandu yuvireco chupe:

—¿Mahera pīha ndoromose catui eté caruguar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar caruguar yaicatu imombo —ehi.

Jesús omombehu iri omano ãgua

³⁰ Ichui yuvinosepase, yuviraso ivi Galilea rupi. Jesús rumo ndoyemboyecua uca potai eté que ambuae ava upe. ³¹ Esepia, güemimbohe güeraño ité ómbohe aipo ehi:

—Che, Ava Ríquehir, imondopri aicora che amotaréhimbar povrīve, che yuca aveira yuvireco, mbosapi ari rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu ãgua yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroiqueso oí pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

³⁴ Ahe rumo noñehei tupri yuvireco chupe. Esepia, peri rupi, “¿Ava pīha ivate catu vahe?” ehi asi-asi oyeupe yuvireco. ³⁵ Evocoiyase oguapisave, “Periopa” ehi güemimbohe upe, aipo ehi avei:

—Oimese pe pāhu pendar oyemboivate ai vahe, ahe rumo seco ivi coti catura opacatu sui ava eta pītīvii ãgua —ehi.

³⁶ Ipare oipisi chīhivahé güemimbohe pāhuve senoha aipo ehi:

³⁷ —Acoi ava oipisi vahe co chīhivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

Acoi ndahei vahe yande amotaréhimbar, ahe yande mboyoyasar secoi

³⁸ Evocoiyase Juan aipo ehi chupe:

—Ore mbohesar, orosepia mbia nde rer pipe omombo vahe caruguar. Ahe rumo ndoguatai cūritei ore rupi; ore ité ndoroipotai chupe —ehi.

³⁹ Jesús rumo,

—Aní ëgüe peye —ehi—. Esephia, ndipoi eté que ambuae oyapo vahe poromondiisa che rer pipe, oicatu vaherã oñehe rai che rese.⁴⁰ Sese ndayande amotarëhi vahe, ahe yande mboyoyasar secoi.⁴¹ Acoi que omondo vahe i vaso pipe che rupi pe recosa pipe pëu, evoco nungar oipisi itera porerecosa oyeupe nara —ehi.

Yaicua catura mbahe tẽi apoëhi ãgua

⁴² “Acoi que ava omboangaipa uca vahe co chihivahemi nungar che reroyasar, iyacatu evoco nungar ñapichisa ita mbahe mbocuhisa iyesiho rese para guasu pipe imombo ãgua.⁴³ Sese pe po pe mboangaipa uca vahe peyasia ité peyesui. Esephia, aviyé catu peiquera tecove apirëhisave ñepei pe po rese, peso rägür sui que ñuvirío pe po rese tata guasu apirëhisave.⁴⁴ Aheve acoi uru nomanoi vahe, tata ndogüei vahe avei.⁴⁵ Pe pi pe mboangaipa ucase, peyasia avei peyesui. Esephia, aviyé catu ndape pindugüei peique tecovesave, que ñuvirío pe pi rese peique rägür sui tata guasu ndopai vahesave.⁴⁶ Aheve acoi uru nomanoi vahe, tata ndogüei vahe avei.⁴⁷ Pe resa avei pe mboangaipa ucase, penose ité peyesui. Esephia, aviyé catu peique ñepei pe resa rese Tüpa mbororecuasave que ñuvirío pe resa rese tata guasu apirëhisave pe reique rägür sui.⁴⁸ Aheve acoi uru nomanoi vahe, tata ndogüei vahe avei.

⁴⁹ “Esephia, opacatu ava imoehesara tata nungar pipe.⁵⁰ Sese yucrì aviyé ai eté. Nasehe irise rumo, ndayaicatui chira imoeha iri ãgua. Peico catu yucrì nungar mbahe tupri pipe peyeupe nara” ehi.

10

Jesús oporombohe mendasa sui poiëhi ãgua

¹ Ipare Jesús osé tecua Capernaum sui, oso Judea ivi rupi iai Jordán roval ari sësa coti. Aheve ava rehii oñemonuha iri yuvireco sese. Iyavei ombohe iri ava güecocuer rupi tupri.² Evocoiyase fariseo oyemboya seco râha ãgua tẽi yuvireco sese, “¿Aviye pîha cuimbahe omenda vahe opoi güembireco sui?” ehi yuvireco chupe.³ Ahe rumo omboyevi chupe:

—¿Mara ehi vo acoi Moisés porocuaita pipe? —ehi.

⁴ Ahe evocoiyase omboyevi yuvireco chupe:

—Moisés remimombehu aipo ehi: “Pemondora pe rembireco upe cuachiar poisa resendar pe poi ãgua pe rembireco sui” ehi —ehi fariseo yuvireco chupe.

⁵ Evocoiyase fariseo upe aipo ehi:

—Moisés omundo co porocuaita pe poreroyaëhisa pipe sui pëu.⁶ Yipisuive ité niha, ‘Tüpa oyapo opacatu mbahe, oyapo avei cuimbahe, cuña reseve.⁷ Sese niha cuimbahe omendase, oyepepíra oyesupa sui güembireco rese ité yuvirecoi ãgua.⁸ Evocoiyase ñuvirío yuvirecoira ñepei ava nungar.’ Sese ndahe iri ñuvirío, ñepei nungar ité yuvirecoira.⁹ Evocoiyase ava Tüpa omomenda vahe oyese, ndiyai ava tẽi omboyepepi yuvireco oyesui —ehi.

¹⁰ Oíve yuvirecoi vitese, semimbohe oporandu iri co mbahe rese yuvireco chupe.¹¹ Evocoiyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui.¹² Acoi cuña opoise omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upe.

Jesús osovasa chīhivahe

¹³ Ipare ogüeru chīhivahe Jesús upe yuvíreco sese ipoco ãgua. Semimbohe rumo, “¿Mahera vo peruno tēi chīhivahe?” ehi opíha vīracuasa pipe serusar upe yuvíreco.¹⁴ Evocoiyase Jesús osepiase, ndasorii güemimbohe upe aipo ehi:

—¡Mahera ndapeipotai iyu ãgua! Toyugüeruño chīhivahe cheu. Esepi, co chīhivahe nungar ava yuvíroihera che Ru Tūpa mborerecuasave.¹⁵ Supi eté, acoi ndoipisii vahe che Ru Tūpa mborerecuasa chīhivahe nungar yuvíreco, ahe evocoiyase ndoyuvíroihera chietera ipípe —ehi.

¹⁶ Evocoiyase oipisi, omondo opo iharíve osovasa.

Ñepei mbia chīhivahe imbahe eta vahe oñeho Jesús upe

¹⁷ Oguata vitese Jesús yuvíreco, aheseve mbia chīhivahe oña oso sovai, oñenopicha, oporandu chupe:

—Porombohesar avíye vahe, ¿mbahe vo ayapora tecovesa apiréhi vahe rereco ãgua? —ehi.

¹⁸ Jesús evocoiyase aipo ehi ahe mbia upe:

—¿Mahera vo, “Avíye vahe” ere cheu? Oime rumo ñepei avíye vahe ité, ahe Tūpa secoi.¹⁹ Ereicua niha Tūpa porocuaita: ‘Ndereporoyucái chira, nandeaguasai chira, nandemonundai chira, nanderemirai chira ambuae ava rese, ndereporombopai chira, eremboyero yara nde ru, nde si avei’ ehi vahe —ehi.

²⁰ Ahe mbia rumo,

—Porombohesar, che aipo nungar opacatu amboaviye ité che chīhivahe suive —ehi.

²¹ Evocoiyase omahe saisusave sese, aipo ehi chupe:

—Ñepei mbahe rumo ipane vité ndeu: eso, emondopa rane nde mbahe; ahe sepri evocoiyase emondo ava iparaisu vahe upe. Ichui ereretora mbahe avíye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui ovíharéhisave oso. Esepi, ahe mbahe yar ité secoi.

²³ Evocoiyase omahe oivíndar güemimbohe rese, aipo ehi:

—¡Yavai eté rumo ava mbahe yar reique ãgua che Ru Tūpa mborerecuasave! —ehi.

²⁴ Semimbohe evocoiyase, “¡Mara ehi rutei!” ehi tēi iñehe renduse yuvíreco. Ahe rumo omombehu iri:

—Che rahireta, ¡yavai eté Tūpa mborerecuasave imbahe eta vahe reique ãgua ombahe eta rese tēi ipihañemoñeta vahe upe!²⁵ Yavai rai camello upe yucuar rupi seique ãgua, ava imbahe eta vahe upe rumo yavai catu che Ru mborerecuasave seique ãgua —ehi.

²⁶ Aipo nungar renduse oyepihamondii guasas yuvíreco. Oporandu randu tēi oyeupe yuvíreco: “¿Ava angahu píha oñepisirora yuvíreco viña?” ehi.

²⁷ Evocoiyase omahe güemimbohe rese aipo ehi:

—Ava tēi upe rumo yavai aipo nungar mbahe apo ãgua; Tūpa upe rumo ndayavaimi eté. Esepi, Tūpa opacatu mbahe mboavaisaréhi secoi —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata ãgua —ehi chupe.

²⁹ Omboyeví rumo Pedro upe:

—Supi eté co aipo ahe pẽu: acoi che raisusa pipe iyavei ñehesa ñepisirosa raisusa pipe oseyapa vahe güëta, víquehir, vívri, güéindri, vu, osi, guahir iyavei oívi, ³⁰ ahe oipísira omahera co ívi pipe cien yupagüer rupi avei oí, vívri, güéindri, osi, guahir iyavei ívi. Yepe oiporarara mbahe-mbahe tēi viña. Ipare rumo tecua ambuaeve oipísi aveira tecovesa apiréhi vahe curi. ³¹ Setá vai rumo cûrитеi yipindar vahe; ipa tēira yuvirecoi. Setá aveira cûrитеi ipa tēi vahe, yipindar yuvirecoira curi —ehi.

Jesús omombehu imombosapisa rupi omano ãgua

³² Yuvirasose Jerusalén ve, Jesús tenonde secoi güemimbohe upe. Semimbohe rumo ndoyembovhai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboípi imombehu co mbahe-mbahe tēi reime ãgua chupe aipo ehi: ³³ “Peicua niha, yasora tecua Jerusalén ve, aheve rumo che, Ava Ríquehir, che pisira che mundo pahi eta rerecuar iyavei Moisés porocuaita rese oporombohe vahe povriva yuvireco. Ahe, ‘Tomano’ ehira yuvireco cheu. Ipare che mundo aveira ava ndahei vahe yande mu upe yuvireco. ³⁴ Mara ehi-ehi tēira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

Mbahe aviye vahe rese operando Santiago, Juan rese yuvireco

³⁵ Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroiptota ereyapo mbahe aviye vahe oreu —ehi.

³⁶ Ahe evocoiyase,

—¿Mbahe vo peipota ayapo vaherã pẽu? —ehi chupe.

³⁷ —Ore oroiptota nde mborerecuia porañetesave ore mboguapira ndeyepíri eve, ñepei nde mbahe rese pocosa cotí, ambuae nde mbahe rese pocoéhisa cotí —ehi yuvireco chupe.

³⁸ Evocoiyase omboyevi:

—Pe ndapeicuau mbahe rese pe porandu. ¿Peiporara catura pîha che co mbahe-mbahe tēi aiporara vaherã, inungar-ra que igua iro vahe aihu vaherã viña? Iyavei, ¿peicatura pîha che ápiramosa aipisi vaherã pisi? —ehi.

³⁹ —Taa, oroicatuño itera —ehi yuvireco.

Evocoiyase ahe aipo ehi chupe:

—Supi eté peihura co mbahe iro vahe, peipisi aveira ápiramosa che aipisi vaherã nungar. ⁴⁰ Co rumo ndiyai cheu che piri pe guapi ãgua, che mbahe rese pocosa cotí, ambuae che mbahe rese pocoéhisa cotí. Che Ru Túpa omoingatu güembiporavo upe nara oguapi vaherã che ipive —ehi.

⁴¹ Evocoiyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco. ⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuia guasu yuvirecoi vahe Túpa cuaparéhi oporocuau oporoyuca ai têisa pipe. Iyavei acoi ivate catu vahe oyeeocoapirasá iteanga omborerecuasa pipe yepi. ⁴³ Pe rumo égue ndapeyei chira pe yeereco. Iyacatu rumo acoi ava oipota vahe ivate catu güeco

água pe pâhuve, ihañeco rane itera opacatu ambuae ava rese. ⁴⁴ Iyavei acoi pe pâhu pendar oipota vahe tenonde catu güeco água, ihañeco tupri ranera opacatu pe pâhu pendar rese. ⁴⁵ Aherã niha che, Ava Riquehir, ayu ndahei ava che rese ihañeco água; che rumo ayu ava rese che hañeco água, iyavei amondo vaherã che recocuer manosave ava eta repirã Caruguar povrã sui senose água —ehi.

Jesús ombogüera Bartimeo sesapisoēhisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehií avei, aheve peri popive mbia ndasesapisoí vahe Bartimeo serer vahe, Timoteo rahir, oguapi oí. ⁴⁷ Osenduse, “Jesús Nazaret pendar” hesa, osapucai pírata:

—¡Jesús, David suindar, che paraísuerecomi têi eve! —ehi chupe.

⁴⁸ Ava rumo oyaca-yacaño, “¡Quirir!” ehi yuvireco chupe. Ahe rumo,

—¡David suindar, che paraísuerecomi têi eve! —ehi pírataño ité chupe.

⁴⁹ Evocoiyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemongueréhi, epúha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opúha yesapiha oso chupe. ⁵¹ Evocoiyase oporandu ndasesapisoí vahe upe:

—¿Mbahe vo ereipota ayapo vaherã ndeu? —ehi.

Ahe evocoiyase,

—Porombohesar, che mbosarecomi têira eve viña —ehi.

⁵² Evocoiyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapisoí vahe osareco tupri ité. Ipare osoño ité Jesús raquicuei peri rupi.

11

Jesús oique Jerusalén pipe

¹ Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ípiimi. Aheve Jesús omondo ñuvirío güemimbohe, ² aipo ehi chupe:

—Peso evocoi tecuami yande rovaindarve. Peyepotase aheve, pesepiara guaricu ñapichimbri imoha, ava ndoyeupi vitei vahe yuvireco sese, ahe peyorañora seru. ³ Acoi que ava: “¿Mahera vo ëgüe peye?” ehise pëu, “Ore Yar oiporu pota, ipare niha omboyeví voiñora” peyera chupe —ehi.

⁴ Evocoiyase ahe yuviraso peri rupi. Aheve guaricu ñapichimbri osepia imoha yuvireco oquendipive. Ichui oyoraño seru yuvireco.

⁵ Evocoiyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohesa rupi tupri ité omboyeví yuvireco chupe. Evocoiyase, “Tovirasoño” ehi yuvireco chupe. ⁷ Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive. ⁸ Setá ava oipipira oturucuar peri rupi, ambuae ava evocoiyase oyasia pindo omondo peri rupi saperã yuvireco. ⁹ Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pírata yuvireco chupe—. ¹⁰ ¡Sovasapri yande ramoi David mborerecuasa tasecoi ou vahe oico! ¡Vave imboeteipri tasecoi! —ehi yuvireco chupe.

¹¹ Égüe ehi Jesús oiqueso Jerusalén ve. Ipare oique tūparo pipe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

¹² Ahere ayihive, yuvinose Jesú tecua Betania sui, ndasiepoi oico. ¹³ Osepiase amombrí ivira higuera so atí vahe, oso chupe ‘¿iha píha?’ oyapave. Ahe rumo osepia so pâve tēi sese. Esepia, ahe ivira upe ndosupití vitei iha água. ¹⁴ Evocoiyase aipo ehi ahe ivira upe:

—¡Co pipe suive ndipo iri chira ava nde ha yuvirohu vaherá! —ehi.
Semimbohe osendu iñehe yuvireco.

Jesús omombopa ava mbahe mboepisar tūparo pipe sui

¹⁵ Ipare oyepota Jerusalén ve yuvireco. Aheve Jesús oiqueso judío tūparo guasu pipe, omboipi ava mbahe mondosar, mbahe rerocuasar mombopa tupri ocarve oico iyavei ava guarePOCHI recuñarosar opa ombovapi mesa imondo, apicasu mondosar renda avei omboviapi imondo. ¹⁶ Ndoipotai eté que ambuae mbahe seroquepirá tūparo pipe. ¹⁷ Ipare oporombohe aipo ehi:

—Icuachiapri aracahendar pipe aipo ehi: ‘Co che rēta yeruresa rētará opacatu ava ivi pípendar uve nara’ ehi. Pe rumo imonda rai vahe rēta nungar tēi pereco —ehi.

¹⁸ Pahi eta rerecuar iyavei oporombohe vahe Moisés porocuaita rese osenduse, “¿Mara yahera píha sereco yuca uca água?” ehi voi yuvireco chupe. Osiquiye rumo opacatu ava sui. Esepia, ahe ndoyembovhai iporombohesa rese yuviraso. ¹⁹ Pítu ramomise, Jesús yuvinose güemimbohe eta reseve yuviraso ahe tecua sui.

Ivira higuera ndihai vahe ipiru

²⁰ Ahere ayihive, añihiveive yuviraso, osepia ivira higuera sapo suive ipirupa vahe yuvireco. ²¹ Evocoiyase Pedro oyemomahenduha voi iñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoiyase,

—Peyeroya Tüpa rese —ehi—. ²³ Supi eté aipo ahe pēu: acoi que ava ivitri upe: ‘Esiri ave sui, eso para guasu pipe’ ehi vahe oyeroaya tuprise ité aipo hesa rese, égüe ehi etera chupe. ²⁴ Sese aipo ahe pēu: opacatu que mbahe rese peporanduse pe yeroquisa pipe, peyeroaya itera mbahe oime vaherá rese pēu, ahese peipisi itera. ²⁵ Acoi peyeroquise, yipindar peñero rane que pe amotaréhimbar upe, ahese égüe ehi aveira pe Ru iva pendar iñero pe angaipa rese pēu. ²⁶ Égüe ndapeyeise, pe Ru iva pendar avei niñeroi chira pe angaipa rese pēu —ehi.

Jesús mborerecuasa

²⁷ Ipare oyevi Jerusalén ve yuvireco. Aheve Jesús secoise judío tūparo guasu pipe, pahi eta rerecuar, Moisés porocuaita rese oporombohe vahe, ava rerecuar guasu avei oyemoya yuvireco sese. ²⁸ Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā ndeu co nungar apo āgua? —ehi yuvireco chupe.

29-30 Evocoiyase omboyevi chupe:

—Che avei aporandura mbahe rese pēu: ¿Ava vo Juan ombou ava āpiramo āgua; Tūpa pīha, ava tēi tie? Pemboyevise cheu, ahese che avei amombehura pēu ava porocuaita rupi eté pīha ayapo co mbahe vichico —ehi.

31 Evocoiyase oñemoñeta aipo ehi oyeupe yuvireco: “Tūpa ombou’ yahese chupe viña, ahe evocoiyase: ‘¿Mahera ru ndaperoyai?’ ehira yandeu. 32 ‘Ava tēi remimbou’ ndayahei chiaveira chupe” ehi. Ahe osiquiye tēi ambuae ava sui yuvireco. Esepiá, opacatu ité oicua Juan oñehe Tūpa suindar ñehesa rese yepi. 33 Evocoiyase omboyevi chupe yuvireco:

—Ndoroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuaita pipe co mbahe ayapo” ndahei chietera pēu —ehi mborerecuar guasu upe.

12

Ava mbahe tēi oporavíqui vahe recocuer sui yembohesa

1 Evocoiyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oiví pipe, ahe oñachi tupri sereco iyavei oyapo mbahe uva ricuer renose āgua. Oyapo avei oí ivate vahe opacatu mbahe moha āgua. Ipare oseya oiví ava oporavíqui vahe upe iporu āgua. Ichui osẽ, oso amombri vahesa rupi. 2 Oyepotase arí uva pohosa, ahese omondo güembigui oporavíqui vahe upe imboporandu ‘tomboumi uva pohoprí cheundar cheu cute’ oyapave viña. 3 Ahe rumo oipisiño, inupanupa imboyevi tupri tēi yuvireco. 4 Evocoiyase ahe iví yar omondo iri ambuae güembigui. Ahe oyapicha-pichaño ñaca rupi, iñehe mara-mara tēiño avei yuvireco chupe. 5 Ipare omondo iri ambuae. Ahe oyucaño yuvireco. Ichui omondo atí iri tēi. Ahe ipāhu pendar rese yuvirocuerocuaño yuvireco, oyucaño avei ambuae yuvireco.

6 “Iyavei ñepei opita vite, tahir ité, sembiaisu. Ahe omondo ipa ‘co ombooyeroyara yuvireco’ oyapave viña. 7 Oporavíqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pâve topita co iví’ ehi yuvireco. 8 Ichui oipisi, oyucaño yuvireco. Ipare ovinoce sehögüer ahe miti sui co cotí yuvireco.

9 “¿Mbahe vo evocoiyase oyapora iví yar? Osora chupe, opara oyuca oporavíqui vahe, iyavei omondopara oiví ambuae ava upe.

10 “¿Ndapeyeroquí vo pe co icuachiapri pipe? Aipo ehi niha acoi: ‘Co ita oí aposar opaño omombo yuvireco.

Ahe ita rumo avíye catu vahe oí moviracua tupri āgua.

11 Êgue ehi niha yande Yar yapo.

¡Mara ehi rutei revo! ehi icuachiapri pipe” ehi.

12 Evocoiyase oviraso pota voi Jesús soquenda āgua yuvireco. Esenia, ahe osenducua ité oyesendar iporombohesa yuvireco. Ava sui osiquiye pave rumo opoíño yuvireco ichui.

Fariseo osecoña iri tēi Jesús guarePOCHI rese yuvireco

¹³ Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe. ¹⁴ Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tēi. Esepi, “Ñgue ehi co mbia” nderei eté ava upe iyavei ereporombohe mbahe supi tupri vahe Tūpa remimbotar apo ãqua rese. ¿Aviyera pīha yamondo guarePOCHI rese oporanduse Roma pendar mborerecuar iivate catu vahe upe viña, aní tie? —ehi yuvireco.

¹⁵ Oicua ité rumo fariseo pīhaëhisa, sese aipo ehi voi chupe:

—¿Mahera che moingue pota mbahe tēi pīpe peye? Peru evocoiyase ñepei guarePOCHI cheu, tasepi —ehi.

¹⁶ Ipare fariseo güeru yuvireco chupe, ahe guarePOCHI repiase, oportandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoiyase aipo ehi fariseo upe:

—Pemondora mborerecuar upe mbahe chupendar; Tūpa upendar mbahe evocoiyase pemondora Tūpa upe —ehi.

Evocoiyase oyepihamondii tēi aipo oyeupe hese yuvireco.

Saduceo oporandu Jesús upe cuerayevisa rese secoñhasave

¹⁸ Evocoiyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

¹⁹ —Porombohesar, Moisés niha oseyá güembicuachiagüer yandeu aipo ehi: “Que cuimbahe omenda vahe omanose guahiëhiseve, tivri evocoiyase omendara sembirecocuer rese ahe víquehir omano vahecuer upe nara tahira oico.” ²⁰ Oime siete tupri oyesuindar pāve yuvirecoi vahe. Yipindar vahe omenda. Ichui omanoño, ndatahii eté rumo.

²¹ Ipare tivri omenda víquehir rembirecocuer rese. Ahe rumo omanoño, ndatahii avei rumo. Ñgue ehi tupri avei tivri imombosapisa. ²² Ñgue ehi co siete tupri omenda ahe cuña rese, ndatahii eté rumo yuvireco. Coiye rumo cuña omano avei no. ²³ Evocoiyase opase ocuerayevi yuvireco, ¿uma rembireco itera pīha? Esepi niha, siete tupri ité omenda tēi yuvireco sese —ehi yuvireco chupe.

²⁴ Evocoiyase Jesús omboyevi chupe:

—Pe pīhañemoñeta pipe peyaví. Esepi, ndapeicuai eté Tūpa ñehe icuachiapri aracahendar, ndapeicuai avei Tūpa pīratasa. ²⁵ Supi eté omano vahe ocuerayevise, chupe ndipo iri chira mendasa. Ahe rumo Tūpa rembiguai iava pendar nungar yuvirecoira iwave. ²⁶ Co cuerayevisa resendar rumo amombehura pēu: avije ndapeyeroquii anga vahe Moisés rembicuachiagüer pipe, acoi caha rese sendi guasu vahe aviterve Tūpa aipo ehise chupe: ‘Che Abraham, Isaac, iyavei Jacob Tūpa aico’ ehi vahe. ²⁷ ¡Tūpa ndahei omano vahecuer Tūpa! ¡Ahe rumo oicove vahe Tūpa secoi! Sese pe pīhañemoñeta pipe peyaví —ehi saduceo yuvirecoi vahe upe.

Porocuaita avije catu vahe

²⁸ Ñepei Moisés porocuaita rese oporombohe vahe osendu iñehe píratase oyeupe yuvireco, oicua avei Jesús omboyeví tuprise iñehe yuvireco chupe, evocoiyase oyemboya sese oporandu chupe:

—¿Uma vo porocuaita aviye catu vahe opacatu sui? —ehi.

²⁹ Jesús omboyeví chupe:

—Yípindar mborocuaita aviye catu vahe aipo ehi: ‘Pesendu Israel: yande Yar Tüpa aheño ité ñepei yande Yar secoi.’ ³⁰ Eresaisura nde Yar Tüpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde píratasa pipe’ ehi. ³¹ Iyavei imoñuviriossa porocuaita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuaita aviye catu vahe co sui —ehi.

³² Evocoiyase porocuaita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepei Tüpa iyavei ndipoi eté ambuae. ³³ Iyavei yasaísura Tüpa opacatu yande pihá pipe, opacatu yande yapisacasa pipe, opacatu yande píratasa pipe, iyavei yasaísura ava yande yeaisu nungar. Ahe ité aviye catu mbahe seropovëhepri sui iyavei opacatu porerecosa sapipri tēi sui —ehi.

³⁴ Evocoiyase Jesús icuase co ava pihañemoñeta tuprisa, aipo ehi chupe:

—Namombriumi ereico Tüpa mborerecuasa sui —ehi.

Ipare ndipo iri oyemonguerëhi vahe oporandu vaherä mbahe rese yuvireco chupe.

¿Ava suindar pihá Poropísiosar?

³⁵ Jesús oporombohese tūparo pipe aipo ehi:

—¿Mahera ru Moisés porocuaita rese oporombohe vahe: ‘Poropísiosar David suindar ité’ ehi yuvireco? ³⁶ Esepia, David ité aipo ehi Espíritu Santo píratasa pipe:

‘Yar aipo ehi che Yar upe:

Eguapi che acato coti, acoi che amondose voi eté nde amotarëhimbar nde povriva yuvireco’

ehi David aracahe. ³⁷ ¿Mahera ru, ‘Poropísiosar David suindar secoira’ peye, David teieté, ‘Che Yar’ ehise chupe? —ehi.

Ava rehii oquerëhísave ité osendu Jesús ñehe yuvireco.

Jesús oicua uca Moisés porocuaita rese oporombohe vahe recocuerai

³⁸ Jesús aipo ehi oporombohesave: ‘Peicua catu Moisés porocuaita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo âgua ocar rupi omboeteisa pipe yuvireco. ³⁹ Oseca avei tenda porañete catu vahe güenara otüparo pipe yuvireco yepi, iyavei carusave tenda aviye catu vahesave oguapi yuvireco yepi no. ⁴⁰ Iyavei cuña imer mano vahecuer rëta virocsa-rocsa tēi ichui. Oarondaguä tēi avei oyeroqui pucu-pucu yuvireco. Ahe rumo oipisira Tüpa ñemoírosa ipírata catu vahe yuvireco curi’ ehi.

Cuña imer mano vahecuer porerecosa

⁴¹ Ñepei ari Jesús oguapi oí porerecosa ríru rovai ava repia âgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco. ⁴² Ahe pipeve oyepota cuña imer mano vahecuer iparaísu vahe. Ahe avei omondo ñuviriomi guarepochi oporerecosa ipipe. ⁴³ Evocoiyase Jesús oñehe güemimbohe upe aipo ehi:

—Supi eté che aipo ahe pēu: co cuña imer mano vahecuer iparaisu vahe setá catu guarePOCHI oporerecosa omundo ambuae ava eta sui co guarePOCHI rīru pipe.⁴⁴ Ambuae ava eta rumo oguarePOCHI rumbirermi tēi omundo oporereco água yuvireco; co cuña rumo oparaisuSA pipe opa ité omundo oguarePOCHI —ehi güemimbohe upe.

13

“Imondurusara tūparo guasu” ehi Jesús

¹ Jesús osëse tūparo guasu pipe sui, ahese ñepei semimbohe aipo ehi chupe:

—Ore mbohesar, jesepia oí ita imopuhapri, icatupri ai! —ehi.

² Jesús rumo omboyevi chupe:

—¿Pesepia co oí tuvichá vahe ité? Ndipoi chietera rumo que ñepei ita oyeha vité vahe; opacatu ité imondurusara curi —ehi.

Cañi renonde mbahe oime vaherā

³ Evocoiyase Jesús yuviraso ivitri Olivo ve, ahe ivitri tūparo guasu rovai tupri. Aheve Jesús oguapise oí, Pedro, Santiago, Juan iyavei Andrés oporandu co cotimi mbahe rese yuvireco chupe: ⁴ “¿Mbahese vo aipo mbahe yaviyera? ¿Mbahese poromondiisa rese rane vo icuasara?” ehi.

⁵ Jesús rumo omboyevi chupe: “Peicua catu, peyembopa ucai rene ambuae ava upe. ⁶ Esepia, setá ava yuguerura, ‘Che niha Poropísiosar aico’ ehi tēira ava eta mbopa yuvireco.

⁷ “Pesenduse rumo ñehesa vavasa resendar cohave, iyavei que rupi, ndapeyembosiquíei chietera. Esepia niha, ñgue ehi rane itera; ndehi vitei chira rumo ari cañi. ⁸ Esepia, ñepei ivi pipendar ovavara ambuae ivi pipendar rese oyeupe yuvireco; iyavei oimera ivi rīri opacatu-catu tēi tecua rupi, tiavor avei. Co rumo omboipi ramomira mbahe tēi porarasa.

⁹ “Peñearo catu. Esepia, pe rerasora mborerecuar rovai yuvireco, iyavei pe nupara tūparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tēi yuvireco. Ñgue peyera peñeha che recocuer rese chupe. ¹⁰ Cañi renonde rumo co ñehesa písrosa resendar opacatu rane ité ava upe icua ucasara ivi rupi. ¹¹ Iyavei, ‘¿Mbahese píha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyeecuara Tūpa pe ñehe água pēu. Esepia, ndaei chira peyesui tēi peñeha, Espíritu Santo ité ofiehera. ¹² Ipare rumo ava omondoñora vivri yamotaréhisor upe ‘toyucu yuvireco’ oya. Ñgue ehi aveira ava guahir upe; tahir avei oyamotaréhisor oyesupa yuca uca água yuvireco che recocuer rese. ¹³ Opacatu avei ava ndape ambotai chira che recocuer sui tēi yuvireco. Acoi ava oyemovíracua vaheño rumo ari ipa vahe rupi, ahe ipísropri yuvirecoira.

¹⁴ “Tūparo guasu maranehi pipe pesepiase mbahe-mbahe tēi aposa —acoí oyeroqui vahe, ahe tosenducua tupri yuvireco —, evocoiyase acoí yuvirecoi vahe ivi Judea rupi, toñemipa poyava ivitri rese yuvireco.

¹⁵ Acoi güéta harive secoi vahe, ahe ari toique iri eme güetave mbahe renose água. ¹⁶ Acoi que rupi tēi secoi vahe, toyevi eme avei güetave oyeosa renose água. ¹⁷ ¡Iparaisu itera cuña ipuruha vahe ahe ari pipe, imembí pítani vahe avei! ¹⁸ Peporandu Tūpa upe, toime eme co nungar mbahe sôhisa vahe pipe pēu. ¹⁹ Esepia, ahe ari pipe ava iparaisu catura

opacatu yipive ava ivi apo ramo suive yuvirecoi vahe sui; ipare ndipo iri chietera evoco nungar. ²⁰ Iyavei yande Yar nomombihuise ari naporai vahe, ndipoi chietera oñepisiro vahe yuvireco viña; ahe rumo güembiporavo raisusa pipe omombihuera.

²¹ “Que oimese aipo ehi vahe: ‘Esepias, co Poropisirosar secoi’ ehi, anise, ‘Peve secoi’ ehise yuvireco pēu, aní chira peroya aipo ehi vahe. ²² Esepias, yugüerura ava, ‘Che Poropisirosar aico’ ehi tēi vahe, iyavei, ‘Che amombehu vahe Tūpa Ñehengagüer’ ehi angahu tēi vahe, iyavei oyapora mbahe ava ndoyapoi vahe poromondiisa güeco pīratasa mboyecua água yuvireco. Aviyeteramo ombopa aveira ava Tūpa reroyasar. ²³ ¡Peicua catura! opa aipo co senondeve amombehu pēu” ehi.

Mara ehira Tūpa Rahir oyevise

²⁴ “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira, ²⁵ yasitata avei opara ovíapi iva sui, iyavei iva resendar mbahe oririira yuvireco. ²⁶ Ahese che, Ava Riquehir, iva quiha rese ayecua itera vitu che pīratasa pipe che rendigüer porañetesa pipe avei. ²⁷ Ipare amboura che rembiguai eta iva pendar. Ahe evocoiyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que iva rese yuvirecoi vahe avei.

²⁸ “Peyembohera ivira higuera recocuer sui: co ivira soquí ramose, yaicua cōimi ari sacu vahe yepota água yandeu yepi. ²⁹ Na ehi aveira niha pēu che ñehe rupi tupri mbahe pesepiase. Sese peicuara che, Ava Riquehir, cōimi eté che yevi água. ³⁰ Supi eté yuvirecove vitera ava osepia vahe, co mbahe opase yaviye. ³¹ Iva, ivi opara ocañi; che ñehengagüer rumo imboaviyesa rane itera.

³² “Ndipoi eté rumo ava oicua vahe ari iyavei hora che yevi água yuvireco, che Ru rembiguai iva pendar avei ndoicuau yuvireco, che avei ndaicuau eté. Che Ru güeraño ité rumo oicua.

³³ “Sese niha pemahemohara yepi, che rārora peye. Esepias niha, ndicuasai che yevi água. ³⁴ Inungar que mbia amombri oso pota água renonde, güembiguai oseyapa güēta rāro água, omondo avei ñepei-peí upe iporavíqui água, iyavei omondo güēta roquendipi rāro água. ³⁵ Pe evocoiyase pemahemohara. Esepias, ndapeicuau marase che oi yar ayevira pēu, aviyeteramo pītu ramose, pītu mbiter, tacura ñehese, anise añihivei. ³⁶ Ndaipotai pemahemohaëhiseve tēi ayevira. ³⁷ Che aipo ahe pēu, opacatu upe avei: ¡Pemahemohaño ité yepi!” ehi güemimbohe eta upe.

14

Oyemomborandu Jesús yuca água rese yuvireco

¹ Ipare ñuvirío ari judío Pascua pieta água ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuaita rese oporombohe vahe avei oyemomborandu: “¿Mara yahera Jesús mbopa ipisi yuca água?” ehi yuvireco. ² Ambuae rumo aipo ehi yuvireco:

—Ndiyai pieta pipe ité yaipisi ava rehii yemondiiëhi água yandeu —ehi.

Cuña Jesús rese mbahe sīacua vahe oipiyere

³ Ahese Jesús secoi Betania ve Simón lepra vireco vahecuer rētave. Aheve mesave chiniseve, cuña güeru mbahe sīacua vahe sīru reseve

sepí iteanga vahe. Ahe osovapisa rerocua, ipare oipiyere Jesús ãca rese.
⁴ Ambuae ava aheve yuvinoi vahe rumo oñemoiro tēi aipo ehi yuvireco oyeupe:

—¿Mahera vo co omocañi tēi mbahe sīacua vahe? ⁵ Omondo vahe ité tie co tresciento arí rupindar mboravíqui reprí rupi ava iparaísu vahe pītivíi ãgua viña —ehi yuvireco.

Omañeco tēi avei ahe cuña yuvireco.

⁶ Jesús rumo aipo ehi ahe ava upe:

—Teheni, égue tehiño, ¿mahera vo pemañeco tēi? Co mbahe oyapo vahe rumo cheu aviye ité. ⁷ Ava iparaísu vahe niha yuvirecoño itera pe pāhuve, iyavei peyapoño itera mbahe aviye vahe peyapo potase chupe; che rumo égue ndahe viteñoi chira vichico pe pāhuve. ⁸ Iyavei co cuña oyapo mbahe ocatugüer rupi; opa voi omoiacua che rete che manoëhi viteseve. ⁹ Supi eté aipo ahe pēu: ñehesa pīsirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas oyemoingatu Jesús mundo ãgua yamotaréhimbar upe

¹⁰ Evocoiyase Judas Iscariote, semimbohe doce vahe pāhu pendar, oso pahi eta rerecuar upe imoñeta Jesús mundo ãgua. ¹¹ Senduse, oyembovharete: “Yamondo guarepochi chupe” ehi voi eté yuvireco. Evocoiyase Judas oseca voi Jesús mundo ãgua yamotaréhimbar upe.

Jesús caru agüer ipa vahe güemimbohe rese

¹² Yipindar arí pan ndayapepoi vahe husa pipe, ahese avei ovesa Pascua resendar yucapri seropovéhesa yepi, ahe arí pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora, ¹⁴ seiquesave aipo peyera sēta vahe upe: ‘Ore mbohesar oporandu: ¿Uma oí pipe vo Pascua pieta resendar orohura che remimbohe reseve? ehi’ peyera. ¹⁵ Evocoiyase ahe omboyecuara oí guasu ivatendar imoingatupri pēu. Aheve pemoingatu mbahe yahu vaherá —ehi güemimbohe upe.

¹⁶ Evocoiyase semimbohe yuviraso tecuave. Aheve semimombehu rupi tupri osepia mbahe yuvireco. Ichui omoingatu carusa Pascua pieta resendar yuvireco.

¹⁷ Pītu ramomise, Jesús doce güemimbohe rese aheve oyepota yuviraso. ¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pēu: ñepei pe pāhu pendar yande piri ocaru vahe che mondora che amotaréhimbar upe —ehi.

¹⁹ Evocoiyase semimbohe ndoyembovhai tēi yuvireco, iyavei oporandu-randu tēi ñepei-peí chupe yuvireco:

—¿Che pīha? —ehi yuvireco.

²⁰ Omboyevi rumo güemimbohe upe:

—Ñepei eté pe pāhu pendar ahe co omoaqui pan che caro pipe. ²¹ Supi eté che, Ava Riquehir, amboaviyera icuachiapri; jiparaísu catura rumo acoi mbia che mondoso! Aviye catura ahe mbia ndoyesuisse viña —ehi.

²² Yuvirocaru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipisi; co che rete —ehi.

²³ Ipare oipisi igua riru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuviroihu. ²⁴Ahese aipo ehi:

—Co che ruvi, ahe che Ru remimbotar ipiasu vahe pēu nara. Oyepiyerera ava rehii recocuer rese nara. ²⁵Supi eté aipo ahe pēu: ndaihu iri chietera uva ricuer cheu arí oyepotase voi che Ru Tūpa mborerecuasave aihura uva ricuer ipiasu vahe —ehi.

“Pedro, ‘Ndaicuai vahe evocoī mbia’ erera cheu” ehi Jesús Pedro upe

²⁶ Osapucaire, opa yuviraso ivitri Olivo ve. ²⁷Ahese Jesús aipo ehi:

—Opara pemocañi che rese yeroysa peyesui. Esepia, acoi icuachiapri pipe aipo ehi: ‘Ayucara ovesa rārosar, ahese oñemosai tēira ovesa opacatu rupi yuvireco’ ehi. ²⁸Che cuerayevire rumo aso voi etera pe renonera Galilea ve —ehi.

²⁹Evocoiyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ēgue ndahei chietera —ehi.

³⁰Aipo ehi rumo Pedro upe:

—Che rumo supi eté aipo ahe ndeu: co pītu pipeve voi eté tacura ñehe yupagüe renondeve, “Ndaicuai vahe evocoī mbia” erera mbosapi oyupagüer rupi cheu —ehi.

³¹Ahe rumo,

—Yepe che amano tēira nde rupi viña, che rumo, “Ndaicuai vahe evocoī mbia” ndahei chietera —ehi—ehi catuño ité chupe.

Ambuae opacatu aipo ehi tupri tēi avei yuvireco chupe.

Jesús oyeroqui Getsemaní ve

³² Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapi cohabe, che aso ranera ayeroqui peve —ehi.

³³ Aheve viraso Pedro, Santiago, Juan oyeupi. Ahese ndoyepihambovihai eté oico ³⁴aipo ehi:

—Che cūritei ndavihai eté. Esepia, che hā oyandu ité manosa. Pepita rane cohabe, iyavei pemahemohara pe yeroqui pipe —ehi güemimbohe viraso vahe upe.

³⁵ Evocoiyase oso tenonde catumi. Aheve oyaivi ivi rese oso, oporandu Tūpa upe mbahe tasí vahe reimeëhi água oyeupe. ³⁶Oyeroqui pipe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe tēi sui eve; tayapo eme che remimbotar tēi, nde remimbotar rupi catu tayapo” ehi.

³⁷ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepei hora nde ropsii upe?

³⁸ Pemahemoha, peyeroqui mbahe tēi pipe pe viapiëhi água. Pe niha pequerëhi ité viña, pe retecuer tēi rumo nimiratai pēu —ehi.

³⁹ Ichui oso iri oyeroqui, aipo ehi tupri avei oñehe. ⁴⁰ Ipare oyevise, osesapiha iri iqueseve tēi avei. Esepia, sopesii nomboyeroyai eté yuvireco, ahese ndoicatui eté iñehe mboyevi yuvireco. ⁴¹ Imombosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehir, mundo água ava yangaipa vahe povriva. ⁴² Pepūha, yaso. Esepi, cōimi eté che amotarēhisar upe che mundo vaherā secoi —ehi.

Jesús ipísisa

⁴³ Jesús oñehe viteseve ohā, Judas oyepota oso chupe, ahe doce pāhu pendar semimbohe, iyavei setá ava yuguéreru quise pucu, ivira reseve-seve supi. Ahe pahi eta rerecuar, Moisés porocuaita rese oporombohe vahe, judío rerecuareta porocuaita rupi oyapo yuvireco. ⁴⁴ Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi. ⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

⁴⁶ Ahese oipisi Jesús yuvireco.

⁴⁷ Semimbohe secoi vahe supi ovinoce oquise pucu. Ipípe oyasia pahi rerecuar ivate catu vahe rembiguai nambi. ⁴⁸ Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisí água. Imonda rai vahe nungar che rereco peye. ⁴⁹ Arí yacatu rupi niha pe pāhuve aporombohese tūparove vichico, na ndapeyei eté cheu. Co rumo égue peye icuachiapri mboavíye água cute —ehi.

⁵⁰ Ahese semimbohe oñemosipa oseya Jesús ahe ae tupri imoha yuvireco. ⁵¹ Mbía chihivahé rumo turucuar pípe güerañomi oñemama vahe supive secoi viña; ⁵² ahe avei oipisi yuvireco. Oipoequiñó rumo oturucuar reya oso nani tupri.

Jesús serasosa pahi rerecuar ivate catu vahe rovai

⁵³ Evocoiyase Jesús víraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuaita rese oporombohe vahe avei no. ⁵⁴ Pedro avei amombri rupive tēi oique ité oso pahi rerecuar ivate catu vahe rēta áchisa pípe. Aheve oguapiñó mbía sundao pāhuve tata ipíve oyepehe oí.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tēi ava oñehe-ñehe tēi vaherā Jesús rese yamatarēhisave yuca uca água yuvireco; ndoicatui eté rumo yuvireco. ⁵⁶ Iyavei setá iteanga tēi semira yuvireco sese; oyecopi-copí tēi rumo güemira pípe. ⁵⁷ Amove aipo ehi tēi yuvireco seco momara água:

⁵⁸—Ore orosendu iñehe aipo ehise: ‘Che opara amonduru co tūparo ava tēi rembiapo. Ipare rumo mbosapí arí rupi opara amopuha. Ndahe iri chira evocoiyase ava tēi rembiapo’ ehi —ehi tēi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahi rerecuar ivate catu vahe opūha oporandu Jesús upe:

—¿Nderemboyevii chira vo iñehe yuvireco chupe? ¿Mbahe vo aipo nde amotarēhimbar oñehe nde rese? —ehi chupe.

⁶¹ Noñeheiñó ité rumo chupe. Pahi rerecuar ivate catu vahe rumo oporandu iri chupe:

—¿Poropísirosar ité vo nde ereico, Tūpa imboeteipri Rahir? —ehi.

⁶²—Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisaréhi acato coti; ayevise avei iva quiha rese curi —ehi chupe.

⁶³ Evocoiyase pahi rerecuar ivate catu vahe omondoro oturucuar aipo ehi:

—¿Mbahe iri vo yande yaipota vīte yaico? ⁶⁴ Yasendupa niha aipo Tūpa upe iñehe-ñehe tēisa, ¿mara ehi aipo evocoiyase pe pīhave? —ehi.

Ipare opacatu guasu ava, “¡Tomanoñio ité!” ehi yuvireco chupe.

⁶⁵ Ahese amove ava ondivi-ndiví sese iyavei osesacua, ipare yuvirocua-rocua sese aipo ehi yuvireco:

—¡Eicua ité ru, ava evocoí ocua nde rese! —ehi-ehi yuvireco chupe.

Sundai tūparo rārosar avei osovapete-pete yuvireco.

Pedro, “Ndaicuai vahe evocoí mbia” ehi Jesús upe

⁶⁶ Pedro ivive ñachimbrí pipe secoi. Aheve cuña oyepota ou pahi mbor-erecuar ivate catu vahe rembiguai chupe. ⁶⁷ Osepiase Pedro iyepehese tata ipive, omahengatu ohā sese aipo ehi chupe:

—Nde avei acoi Jesús Nazaret pendar rupindar ereico —ehi.

⁶⁸ Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osēse oquendi-pive ohā, ahese oñehe tacura. ⁶⁹ Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndahei eté che” ehiño. Iparemi tēi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoiyase,

—¡Tūpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehe imoñuviriosa rupi. Ahese Pedro oye-momahenduha, “Tacura ñehe yupagüesa renondeve, mbosapi oyupagüer rupi, ‘Ndaicuai vahe evocoí mbia’ erera cheu” ihe agüer rese. Sese oyasehó iteanga.

15

Jesús serasosa Pilato rovai

¹ Cōhe potase, pahi eta rerecuar, judío rerecuar, Moisés porocuaita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco. ² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tēi mbahe sembiaviëhi yuvireco chupe. ⁴ Evocoiyase Pilato oporandu iri chupe aipo ehi:

—¿Mahera vo ndereñehei eté? Esepia, setá mbahe nde rembiavi omombehu yuvireco —ehi.

⁵ Nomboyevii eté rumo Pilato upe. Evocoiyase, “¿Mara ehi rutei pīha?” ehi tēi.

“¡Tayaticasa!” ehi ava Jesús upe yuvireco

⁶ Mborerrecuar guasu recosa ité ñiepei ava soquendapri renose ãgua Pascua pieta pipe ava rehii porandusa rupi yepi. ⁷ Mbía Barrabás serer vahe, ahe pipeve avei soquendasa yuvireco ambuae oporapichi vahe

reseve. ⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco. ⁹ Pilato rumo aipo ehi:

—¿Peipota amose vaherā judío rerecuar? —ehi.

¹⁰ Esepiá, Pilato oicuaño ité ava rese yemoecatēhisa pipe sui pahi eta rerecuar remimondo secoise. ¹¹ Pahi eta rerecuar rumo ‘Barrabás tosē’ ombohe ati-atí uca ava yuvireco. ¹² Evocoiyase Pilato oporandu ahe ava upe:

—¿Mbahe vo peipota ayapora co mbia chupe acoi, ‘Judío rerecuar’ peye vahe rese? —ehi.

¹³ Ahe rumo omboyeví Pilato upe:

—¡Tayaticasa curusu rese! —ehi ati-atíñ yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-atíñ iriño yuvireco.

¹⁵ Evocoiyase Pilato, mbahe tupri opita água ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica água.

¹⁶ Ahese sundao viraso mbororecuar rēta sui ambuae oí pipe, aheve opacatu omboetasá omonuha yuvireco. ¹⁷ Aheve omboyemonde turucuar píraumbi vahe pipe yuvireco, ipare yu piapri omonde ñaca rese.

¹⁸ Sáse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

¹⁹ Iyavei yuvirocua-rocua ívira pipe ñaca rupi yuvireco sese, ondiñividi avei oñenopiha-piha avei sovai yuvireco imboeteisave angahu. ²⁰ Mara-mara tēi sereco pare, ovirocua iturucuar píraumbi vahe yuvireco ichui, ahese omonde iturucuar ité yuvireco sese. Ichui vinose ocarve yatica água yuvireco.

Jesús yaticasa curusu rese

²¹ Ñepei mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co cotí rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voiño tēi yuvireco chupe.

²² Jesús oviraso Gólgota serer vahesave yuvireco (‘Ava Áca Cangüer’ oyapave aipo ehi). ²³ Iyavei uva ricuer oyeseha vahe mirra rese omondo tēi yuvireco chupe. Ahe rumo ndohui eté. ²⁴ Evocoiyase oyatica yuvireco. Ipare sundao iguayiño Jesús turucuar rese ‘¿uma píha virasora oyeupe’ oyapave yuvireco.

²⁵ Ahe oyatica añihivei la nueve rupi yuvireco. ²⁶ Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oí. ²⁷ Supive avei yaticasa ñuvirío imonda rai vahe ñepei mbahe rese ipocosa cotí, ambuae mbahe rese ipocoëhisa cotí. ²⁸ Ëgüe ehi imboavíye icuachiapri aipo ehi vahe: “Ava mbahe-mbahe tēi aposar nungar ipáhuve serecosa” ehi.

²⁹ Acoi ava ñocuasar iñehe-ñehe tēi, oñeaca mbovava aipo ehi yuvireco chupe:

—Nde acoi, “Opara tūparo amonduru. Ipare mbosapi arí rupi opa irira amopuha” ere acoi cuese. ³⁰ ¡Eñepisiro ru nde ae cute; egüeyí curusu sui! —ehi yuvireco chupe.

³¹ Ëgüe ehi avei pahi eta rerecuar, oporombohe vahe avei Moisés porocuaita rese iñehe mara-mara tēi yuvireco chupe, aipo ehi yuvireco oyeupe:

—Oipisiro ambuae. Ahe ae rumo ndoicatui oñepisiro. ³² ¡Poropisirosar Israel rerecuar guasu, toyeroysi ahe ae curusu sui cūritei, ahese voi seroyasara —ehi.

Iyavei supive yaticapri mara ehi-ehi tēi avei chupe.

Jesús mano agüer

³³ Osupitise rumo mbiter arí, opa tupri pítu ivi rupi. Ëgüe ehi las tres rupi. ³⁴ Ahese tupri avei Jesús oñehe pírata aipo ehi: “Eloí, Eloí, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tūpa ñehe mombehusar Elías upe oñehe —ehi yuvireco chupe.

³⁶ Evocoiyase ñepei imboetasa oña oso mbahe saviyu vahe reca. Ahe omoaquí vinagre pipe imondo ivira aprí rese chupe ‘toihu’ oya:

—Ëgüe tehiño rane, ¿oura píha Elías seroyi água curusu sui? —ehi.

³⁷ Ahese Jesús sâse pírata. Ipare omano. ³⁸ Aheseve tūparo asiaa turucuar ivate coti sui ovo tupri. ³⁹ Iyavei sundao rerecuar Roma iguar, ahe Jesús rehögür rese omahengatu ohā. Osenduse Jesús rāse iyavei osepiase imano, aipo ehi:

—Supi eté catu, co mbia Tūpa Rahir ité —ehi.

⁴⁰ Iyavei cuña aheve amombrive osephia catu yuvinoha; ahe yuvirecoi María Magdalena, José si María, ahe avei Santiago chihivahé catu vahe si iyavei ambuae cuña Salomé. ⁴¹ Co cuña eta yuvirecoiño vahe ité Jesús rupi, oipítivi vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

Jesús apocatu agüer tuvípa pipe

⁴² Pítu ramose, ahe arí pipe oyemoingatu ava yuvireco arí mbituhusa upe nara yepi, ⁴³ ahese José, tecua Arimatea pendar, porandusa ivate catu vahe pendar, acoi Tūpa mbororecuasa osáro vahe oico, oqueréhisa pipe ité oique oso Pilato upe oporandu água Jesús rehögür rese. ⁴⁴ Pilato rumo oyepihamondii tēi, “Omano” hese. Oñehe sundao rerecuar upe oporandu água ‘¿marase vo ëgüe ehi?’ ⁴⁵ Sundao rerecuar omombehuse chupe, ahese omondo sehögür José upe. ⁴⁶ Evocoiyase José virocua turucuar secose vahe. Curusu sui seroyi pare, oimama voi eté ipipe. Ipare omoingue tuvípa ita yohopri pipe. Ichui ita yapayere vahe pipe osovapi. ⁴⁷ María Magdalena iyavei María, José si, osepião yapocatuse yuvireco.

16

Jesús ocuerayevi

¹ Mbituhusa arí pare, María Magdalena, María, Santiago si, Salomé avei, ahe virocua mbahe sīacua vahe Jesús rehögür rese nara yuvireco.

² Iyavei añihiveive, yipindar arí semana pipe, oyepota Jesús ruvípave icatu ramose yuviraso. ³ Aheve aipo ehi oyeupe yuvireco:

—¿Ava píha co tehögür rovapisa virocuarda yandeu? —ehi.

⁴ Osepiase rumo ita guasu yuvireco, ndahe irise güendave ihāi, ⁵ yuviroiquese tehōgür ruvipave yuvireco, aheve osepia ombahe rese pocosa coti mbia chīhivahe, iturucuar pucu morochi vahe oguapise oī. Ahese cuña oyembosiquiye yuvireco. ⁶ Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohave. Pesepia ru supagür. ⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiara mbahe che remimombehu rupi tupri’ peyera —ehi.

⁸ Evocoiyase ahe cuña yuvinosese tuvípa sui, yuvinoña yuviraso, oríri avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihive domingu pipe, oyemboyecua yipindar María Magdalena upe, ahe ichui acoi siete tupri caruguar opa omboyepepi. ¹⁰ Ahe oso imombehu supindar upe. Ahe rumo oyaseho vite oviharēhisave yuvireco. ¹¹ Osenduse cuña ñehe: “Jesús ocuerayevi, che ité asepi” ehise, ndoviroyai eté yuvireco.

Jesús oyemboyecua ñuvirío güemimbohe upe

¹² Ipare Jesús oyemboyecua iri ñuvirío güemimbohe upe ambuae güepiaca pipe peri rupi. ¹³ Ahe avei yuviraso omboetasa upe imombehu; ndoviroya viteño avei rumo yuvireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñehengata ahe oyese yeroyaēhisa rese chupe, iyavei ocuerayevisa mombehusar reroyaēhi rese avei. ¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa písrosa resendar peico. ¹⁶ Acoi viroya vahe, iyavei oñeapiramo vahe, ahe oñepisirora yuvireco; acoi ndoviroyai vahe rumo, ahe imocañipirā tēi yuvirecoira. ¹⁷ Co mbahe poromondiisa omboyecuara che rer pipe omboyepepira caruguar ava sui. Oñehe aveira ñehesa ndicuasai vahe pipe yuvireco. ¹⁸ Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapi Vu Tūpa acato coti oī. ²⁰ Semimbohe evocoiyase opa yuviraso opacatu ivi rupi ñehesa písrosa resendar mombehu. Yande Yar avei oipitivi, iyavei mbahe poromondiisa pipe omboyeccua uca ité ñehesa písrosa resendar supi eté vahe. Aipo rupive.

LUCAS REMBICUACHIA JESUS RECOCUER RESENDAR SAN LUCAS

Lucas oicuachía Teófilo upe

¹⁻² Imboeteipri Teófilo, setá ava oicuachía yuvireco opacatu aracahendar mbahe imombehupri mboavíyesa cüritei yande pâhuve co Jesucristo recocuer resendar. Acoi ava yípisuive osepio vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu. ³ Sese che avei opa aseca tupri yípisuive opacatu co mbahe cua tupri água, Teófilo. Ichui che amoingatu tupri pota icuachiapri sesendar ndeu nara avei sereco. ⁴ Evocoiyase nde ereicua tuprira co porombohesa supi eté vahe acoi nde mbohe agüer.

Túpa rembiguai omombehu Juan Oporoãpiramo vahe ha água

⁵ Yipindar Jesús ha renondeve, Herodes mborerescuar ivi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel. ⁶ Co fñuvirío secocuer aviye tupri Túpa upe; viroya tupri opacatu Yar porocuaita yuvireco. Evocoiyase ndipoi eté que ava “mara” ehi vahe yuvireco chupe. ⁷ Zacarías rumo yípisuive ndatahii vahe. Esepio, sembireco ndimembii vahe ité, iyavei oyoya ité ocuacuacuamí yuvireco.

⁸ Ñepei ari aipo osupiti icuaita tûparo pipe imboetasa reseve iporavíqui água Túpa rovaque yuvireco. ⁹ Pahi recosa ité ëgue ehi aracahe suive, ahese iporavosa Zacarías yipindar yasiapri tûparo maranehi pipe oique vaherá itaisi rapi água. ¹⁰ Itaisi rapi viteseve aipo, opacatu ava oyerure yuvireco ocarve. ¹¹ Aheseve aipo oyemboyecua yande Yar rembiguai itaisi renda maranehi ique coti chupe. ¹² Túpa rembiguai repiase aipo, oyembosiquiyé iteanga. ¹³ Túpa rembiguai rumo aipo ehiño chupe:

—Zacarías —ehi—, eresiquiye eme. Túpa osendu nde yeruresa. Sese nde rembireco Isabel imembira ndeu. Ahe nde rahir rer-ra Juan. ¹⁴ Ereviharetera sese, iyavei oyembovharetera opacatu ava yuvireco nde rahir ohase. ¹⁵ Esepio niha, nde rahir secocuer tuvichara oico Túpa rovaque. Ndoihui chietera uva ricuer sai vahe, iyavei que ambuae mbahe sai vahe; secoira rumo Espíritu Santo rese ohaëhi viteseve. ¹⁶ Ëgue ehira omonguerëhi setá ava judío Yar Túpa reroya iri água oico. ¹⁷ Ahe virecora espíritu píratasa oyese oyoyara Túpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroya água rese’ oyapave. Ëgue ehira ava mbohe imoingatu yande Yar pisi água sereco —ehi chupe.

¹⁸ Evocoiyase,

—¿Mara ahera pîha aipo reroya? Che rumo acuacuami eté vichico, iyavei che rembireco ocuacuami avei no —ehi Túpa rembiguai upe.

¹⁹ —Aní —ehi chupe—. Che aico Túpa rembiguai Gabriel, Túpa rovaindar. Ahe niha che mbou ndeu che ñehe água iyavei co ñehesa aviye vahe mombehu água. ²⁰ Nde rumo ndereroyai acoi amombehu vahe

ndeū. Sese co pipe suive ité nandeñehengatui chira eico. Osupitise voi che remimombehugüer, acoi ohase nde rahir, ahese ramo ndeñehengatura — ehi aipo Tūpa rembiguai chupe.

²¹ Osāro pucu tēi aipo ocarve ambuae imboetasa eta yuvireco. “¿Mahera pīha nose vītei tūparo pipe sui?” ehi tēi yuvireco chupe. ²² Osēse aipo tūparo pipe sui, niñehengatui voi eté. “Ñaro osepia mbahe tūparo pipe” ehiño ité aipo imboetasa eta yuvireco chupe. Ipo ãta-ãta tēi aipo oñehengatuëhise mbahe mombehu oico.

²³ Ipare omboaviyese ocuaita tūparo pipe, oyevi oso güëtave. ²⁴ Coiye aipo sembireco Isabel ipuruha oico. Judío porocuaita mboyeroyasave nose iri eté ambuae ava piri poyandepo yasi rupi. Ipihañemoñeta: ²⁵ “Yar Tūpa ité ëgue ehi cheu ava che rese ñeheëhi iri äqua yuvireco” ehi vorivetespa pipe aracahe.

Tūpa rembiguai Jesùs yesu äqua omombahu

²⁶ Coiye seis yasi pipe Tūpa omondo güembiguai Gabriel tecua Nazaret ve ivi Galilea rupi ²⁷ cuñatai ndaseco marai vahe upe iñehe äqua; ahe serer María. Ahe omenda pota vahe cuimbahe mborerecuar guasu David suindar José serer vahe rese. ²⁸ Tūpa rembiguai oique co cuña rëtave aipo ehi chupe:

—¡María, Tūpa nde rovasa, erereco mbahe icatupri vahe pítiyiisa Yar Tūpa suindar! Tūpa nde rese ité secoi; nde rovasa catu opacatu cuña sui —ehi chupe.

²⁹ Tūpa rembiguai repiase, “¿Mara oya pīha co aipo ehi cheu?” ehi tēi osiquiyepave opihañemoñeta rereco. ³⁰ Evocoiyase Tūpa rembiguai aipo ehi chupe:

—María, eresiquiye eme. Esepia niha, Tūpa ité nde poravo nde rovasa äqua. ³¹ Cûritei voira rumo ndemembira: ererecora nde membrí; ahe serer-ra Jesùs. ³² Ahe niha secouvicha catu vaherä secoira; “Tūpa seco ivate vahe Rahir secoi” ehira yuvireco chupe. Iyavei niha Yar Tūpa ité omoinguera mborerecuar guasu seco äqua inungar tamoi David aracahe. ³³ Mborerecuar guasu secoira judío recua rupi apirëhi vaherä; imborerecuasa niha apirëhi vaherä ité secoira —ehi.

³⁴ Evocoiyase aipo ehi:

—¿Mara ahera vo aipo che membí viña? Esepia niha, ndaico vītei vahe cuimbahe rese —ehi Tūpa rembiguai upe.

³⁵ —Espíritu Santo ogüeyira nde harive iva quiha nungar; Tūpa güeco píratasa pipe nde momembira. Sese acoi ohase nde membrí seco maranehi vahe, “Tūpa Rahir” hesara chupe. ³⁶ Cûritei nde mu Isabel avei ocuacuami pipe imembí oico; ahe niha ndimembí vahe yipindar viña, cûritei rumo vireco seis yasi omembrí vie pipe. ³⁷ Esepia niha, Tūpa upe ndipoi eté mbahe yavai vahe —ehi.

³⁸ Evocoiyase María aipo ehi:

—Che Yar rembiguai aico, tayaviye ayase Tūpa remimbotar cheu nde ñehe rupi —ehi.

Aipo ihe pare, Tūpa rembiguai oyepepi oso ichui.

María oso omu Isabel piri

³⁹ Ahese María oso voi eté ivitri rupi tecua ivi Judea ve. ⁴⁰ Aheve aipo Zacarías rëta pipe oiqueso oso, oyapo “avirave” omu Isabel upe.

⁴¹ Evocoiyase Isabel rie pipe omii imembrí iñehe renduse. Ahese Espíritu

Santo oique Isabel aviterve. 42 Ipare osapucai pírata aipo ehi chupe vorivetesave:

—¡Túpa nde rovasa cuña opacatu sui, iyavei osovasa nde membrí! 43 Noromohai eté che piri ereyu vaherā viña, che Yar sī. 44 Esepio, cheu “avirave” ereyapose, che membrí omii voi vorivetesave che rie pipe. 45 ¡Sovasaprí ereico! Esepio, ereroya ité ñehesa ndeundar. Iyavei Túpa omboaviyera güemimombehu nde rese —ehi Isabel chupe.

46 Evocoiyase aipo ihese,
“Che niha amboetei che Yar vichico;
47 cheroriveté Túpa che Písicosar rese.

48 Esepio, ahe omahe che rese che reco yemominisa pipe seroyasar che recosave.

Co pipe suive, ‘Sovasaprí secoi’ ehira opacatu ava yuvireco cheu.

49 Esepio niha, Túpa mbahe mboavaisaréhi, oyapo mbahe tuvichá vahe cheu.

¡Túpa imboeteipri catu tasecoi yepi!

50 Ahe oiparaísueroco opacatu omboeteisar yepi.

51 Nomboavai eté mbahe yapo.

Osecoreroyi ava oyemboivate ai tēi vahe.

52 Viroyi mborerecuar seco pírata vahe píratasa sui; ava seco mbegüemi vahe rumo osecomboivate.

53 Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

54 Oipítiñi niha opacatu viroyasareta judío yuvirecoi vahe.

Esepio, ndasesarai eté poroparaísuerecosa mundo água

55 güemimombehugüer rupi yande ramoi aracahendar Abraham upe, ichuindar upe avei yepi no” ehi vorivetesava pipe omu

Isabel upe.

56 Ipare María opita Isabel piri mbosapi yasi rupi. Ichui oyevi oso güëtave.

Juan Oporoãpiramo vahe haragüer

57 Osupitise ari Isabel upe, imembira. Ahe imembrí cuimbahemi.

58 Imu iyavei icotindar oyanduse Túpa rembiapo mbahe avíye vahe, aipo ehi yuvireco chupe: “Avíye ai catu Yar Túpa secoi co cuña rese” ehi vorivetesave yuvireco. 59 Ocho ari pipe aipo, ahe pítani ombocircuncida yuvireco judío porocuaita mboyeroyasa pipe. Ipare aipo omundo pota iyesupa Zacarías rer yuvireco sese viña, 60 ichi rumo,

—Aní —ehiño—. Juan itera rumo serer —ehi.

61 —¿Mahera vo? Ndipoi eté rumo nde mu rer aipo nungar —ehi yuvireco chupe.

62 Evocoiyase aipo omahe pítani yesupa rese yuvireco ‘mbahe píha ahe omundo pota sererguá viña?’ oyapave yuvireco. 63 Evocoiyase aipo iyesupa oporandu ivírapemi rese sese serer oicuachía vaherā. Ahe serer oicuachía: ‘Juan sererguá’ ehi imoi. Ahese aipo opacatu ava: ‘Mara ehi rutei píha co?’ ehi tēi oyeupe yuvireco. 64 Ahese ramo Zacarías iñehengatu, omboipi Túpa upe osapucai oico. 65 Opacatu aipo sēta cotindar oyembosiquíye tēi yuvireco, iyavei aipo opacatu Judea recua rupi omombehu-mbehu mbahe osepia vahecuer yuvireco. 66 Mbahe osendu vahecuer rese avei aipo oporandu-randu oyeupe yuvireco: ‘Mbahe píha aipo pítani oyapora curi?’ ehi. Esepio niha, supi eté Túpa osovasa.

Zacarías sapucái agüer

⁶⁷ Zacarías, Espíritu Santo píratasa pipe, oñehe Tūpa oyeupe ñehesa pipe aipo ehi:

⁶⁸ “¡Yande Yar Tūpa imboeteipri tasecoi!

¡Esepia niha, ahe ou yande judío yaico vahe písirō ãgua!

⁶⁹ Ombou niha Poropísicos güembigui David suindar yandeu.

⁷⁰ Ëgüe ehi imombehu opacatu oñehengagüer mombehusar seco maranehi vahe upe aracahe.

⁷¹ Ahe yande písirora yande amotarëhimbar sui.

⁷² Ëgüe ehi Tūpa imbou oporoparaísosuerecosa yande ramoi aracahendar upe, iyavei iyemomahenduha ãgua güemimbotar maranehi mombehu agüer rese.

⁷³ Evocoiyase, ‘Che supi eté ayapora evocoi mbahe’ ehi yande ramoi Abraham upe aracahe

⁷⁴ yande renose ãgua yande amotarëhimbar povri sui ‘tache mboetei osiquiyeéhisa pipe yuvireco’ oya;

⁷⁵ ‘toyuvirecoi che rembiepiave güeco ívisa pipe iyavei güeco maranehisa pipe ari yacatu rupi’ oyapave.

⁷⁶ Nde, che rahir, ‘Co Tūpa ívate vahe ñehe mombehusar secoi’ ehira ava yuvireco ndeu.

Esepia, nde eremoingatura ava recocuer Yar pisi ãgua senondeve eico.

⁷⁷ Supi eté nde niha eremboyecuara opacatu ava Tūpa upendar yuvirecoi vahe upe angaipa sui ñeroisa pisi ãgua iñepisiro ãgua.

⁷⁸ Esepia, yande Ru Tūpa, oporoparaísosuerecosa pipe ombou oporoesapesa íva pendar yandeu yande reco mbopiasu ãgua

⁷⁹ iyavei ava Tūpa cuaparéhi resape ãgua ‘toyuvirecoi mbahe tupri pipe’ oyapave.

Esepia, ahe inungar ava pítumimbisave yuvirecoi vahe, ocañi tēi vaherá yuvireco”

ehi Zacarías.

⁸⁰ Ichui pítani ocuacua iyavei vireco píratasa Espíritu suindar oyese. Ipare rumo oso oyemboerecua ívi iporupiréhi rupi. Colye oyemboyecua omu Israel pendar upe oico.

2

Jesús yesu agüer

¹ Yipindar mborerecuar guasu Augusto oporocuai oico, “Tayecuachiasa opacatu tecua rupi” ehi. ² Ahe yipindar yecuachiasa mborerecuar Cirenio, Siria pendar rēise. ³ Opacatu ava yuviraso güecua yacatu rupi oyecuachía ãgua yuvireco.

⁴ Sese José avei osē Nazaret, Galilea ívi rupi sui oso ívi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secoi. ⁵ Ëgüe ehi oyoya yuviraso güembirecoví María rese oyecuachía ãgua. María rumo imembira pota ité oico. ⁶ Aheve oyepota ramose, osupiti ari imembira ãgua. ⁷ Aheve oha imembri yipindar vahe cuimbahemi. Ahese María oyaomembrí turucuar pipe, ëgüe ehi imoñeno imondo mbahe mimba rembihu riru pipe. Esepia niha, ndoyosui eté oque ãgua aheve yuvireco.

Tūpa rembiguai eta omombehu Jesú haragüer ovesa rārosar upe yuvireco

⁸ Namombríimi Belén sui ovesa rārosar yuvirecoi. Aheve osāro ovesa pītu pipe yuvireco. ⁹ Aviyeteramo tēi oyemboynecua Tūpa rembiguai iva pendar chupe. Tūpa porañetesa avei sendi yivii chupe yuvireco. Ahe sepiase, oyembosiquiyé iteanga tēi yuvireco ichui. ¹⁰ Ahe rumo aipo ehi chupe: “Pesiquiye eme. Esepiá, che ayu mbahe icatupri vahe mombehu água pēu pe mboviharete água iyavei opacatu ava mboviharete água avei no. ¹¹ Co pipe oha David recua Belén ve Poropísiosar pēu nara. Ahe niha Tūpa Rembiporavo, pe Yarguā secoi. ¹² Icua água peyosura pītani yaopri tuprīmi vahe tui mbahe mimbā rembihu rīru pipe” ehi.

¹³ Aviyeteramo tēi oyemboynecua ambuae setá Tūpa rembiguai iva pendar yivii yuvireco. Tūpa upe osapucai yuvireco aipo ehi:

¹⁴ “¡Imboeteipri tasecoi Tūpa ivave!
¡Vive ava Tūpa rembiaisu toyuvirecoi tupri oyeaisusa pipe!” ehi osapucai yuvireco.

¹⁵ Opase oyevi Tūpa rembiguai ivave yuviraso, ahese ovesa rārosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

¹⁶ Evocoiyase ipoyava yuviraso. Ipare osepiá María, José, Jesús pītani avei yuvireco cute. Ahe pītani omoñenomi mbahe mimbā rembihu rīru pipe ino. ¹⁷ Ipare yuvinose omombehu-mbehu ambuae ava upe Tūpa rembiguai remimombehugüer pītani resendar ñehesa yuvireco. ¹⁸ Evocoiyase opacatu ava oyepihamondii co ñehesa renduse yuvireco. ¹⁹ María rumo opacatu co mbahe rese oyapisacaño; ahe ehiño ité ipihañemoñetasa. ²⁰ Oyevise ovesa rārosar yuviraso, omboetei iyavei osapucai Tūpa upe yuvireco. Esepiá niha, opacatu mbahe osendu vahe, osepiá vahecuer yuvireco imombehupri rupi tupri ité.

Jesús pītani seropovēhesa Tūpa upe tūparo pipe

²¹ Ocho arí pipe ahe pītani ombocircundia yuvireco; omondo sererguā Jesús yuvireco, ahe terer tupri avei acoi Tūpa rembiguai omombehu María upe imembiehí viteseve.

²² Ipare omboaviyese ohari güētave oñemoatiro água, ahe aipo ēgüe ehi Moisés porocuaita rupi yuvireco yepi, ahese vīnose pītani seraso tecua guasu Jerusalén tūparo pipe seropovēhe água Yar upe yuvireco. ²³ Ēgüe ehi yuvireco. Esepiá, Yar porocuaita aipo ehi icuachiapri pipe aracahe: “Opacatu yipindar pītani cuimbahe mini yuviroha vahe ipehasara Tūpa upe nara yepi” ehi. ²⁴ Yuviraso oporerecosa reropovēhe água yuvireco yande Yar porocuaita rupi: “Ñepei oyovaichor reseve picuhi, anise ñuvirío apicasu peropovēhera” ehi vahe.

²⁵ Ahe pipe mbia Jerusalén ve secoi Simeón serer vahe. Ahe mbia aviyeteprí vahe. Oyerure vahe Tūpa upe, osāro vahe avei Israel recua pendar Písiosar imombehupri. Ahe secoi vahe ité Espíritu Santo rese. ²⁶ Ahe chupe Espíritu Santo opa uca oicua “eresepia rane itera Poropísiosar Tūpa remimbou nde mano renondeve” ehi vahe. ²⁷ Ahe arí pipe Espíritu Santo vīroguata tūparove. Oyepotase José, María reseve yuvireco tūparove Jesús pītani reropovēhe água Tūpa porocuaita rupi tupri, ²⁸ ahese Simeón oyemboya oso sese, osupi ichi sui, vīroyeroqui Tūpa upe señoha aipo ehi:

29 “Che Yar, cûritei che, nde rembiguai, amano tupriño itera.

Esepia niha, nde remimombehugüer eremboaviye ité cheu.

30 Asepia ité niha Poropísiosar vichico cute.

31 Nde niha erembou opacatu ava rembiepiave.

32 Ahe niha poroesapesa ité secoi.

Esepia, omboyecuara mbahe supi eté vahe ava ndahei vahe judío yuvirecoi vahe upe,
iyavei omondara poromboeteisa nde recua Israel pendar judío yuvirecoi
vahe upe”

ehi oyeroqui.

33 José iyavei María ndoyembovihai tēi yuvireco pítani rese Simeón yeroqui renduse. 34 Evocoiyase Simeón osovasa ahe pítani iyesupa reseve. Ipare aipo ehi ichí María upe:

—Esendu, co pítani reroyaëhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecuara mbahe ava upe. Amove rumo viroñoñora yuvireco. 35 Ipipe sui ava pihañemoñetasica icuasara curi. Iyavei co opacatu mbahe tasira nde piha pipe inungar quise pucu osasara nde piha viña —ehi chupe.

36 Aheve avei cuña cuacuami yaracua vahe secoi, ahe serer Ana, Fanuel rayri, Aser suindar. Ocuñataimiseve rumo omenda, iyavei secoi raimi tēi omer rese siete aravíter rupive. 37 Cûritei secoi omer mano pare ochenta y cuatro aravíter. Nosei eté tūparo pipe sui oico. Ëgue ehi yande Yar mboetei pítu, ari rupi oyecuacusa pipe iyavei oyeruresa pipe avei oico no. 38 Ahe evocoiyase ahesa reseve avei ou pítani upe, “Aviye ndeū” ehi Tūpa upe. Ipare oñehe secocuer rese opacatu ava Jerusalén pendar osáro vahe güecua písiro água upe oico.

Jesús pítani reroyevi agüer Nazaret ve

39 Evocoiyase opacatu Moisés porocuaita mboavyere, opa oyevi Galilea pendar güecua Nazaret ve yuvireco. 40 Ahese pítani ocuacua catumi imbahecua-ecua irimi eté oico iyavei ipírata catu irimi. Esepia, Tūpa osovasa ité sereco no.

Jesús chihivahé tūparo pipe secoi

41 Iyesupa yuviraso aravíter yacatu Jerusalén ve Pascua pieta repia yepi. 42 Jesús doce aravíter virecose, ahese viraso iyesupa Jerusalén ve oyeupi pieta repia yuvireco. Esepia, ëgue ehi eté judío recocuer pietase yuvireco yepi. 43 Ahe pieta pare voi, oyevise yuvireco güecosave, ahese Jesús opitaño Jerusalén ve; ichí rumo iyavei tu José ndoicuai eté ipitase yuvireco. 44 “Ouño revo ava pāhu rupi” ehi yuvireco chupe viña; aipo ehiño ité ñepei ari pipe yuvireco chupe. Oseca tēise rumo omu pāhu rupi, iyavei omboripar pāhu rupi avei no, 45 ndoyosui eté yuvireco. Ahese oyevi iri tēi Jerusalén ve seca yuvireco.

46 Imombosapisa ari pipe oyoso ramo tūparo pipe yuvireco. Aheve oguapi ava Tūpa porocuaita rese oporombohe vahe pāhuve oī; oyapisaca iñehe rese iyavei oporandu-randu ahe ava upe Tūpa Ñehengagüer rese oī. 47 Evocoiyase opacatu ava ndoyembovihai tēi imbahecua vaisa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa. 48 Oyosuse iyesupa, oyepihamondii yuvireco. Ahese ichí aipo ehi chupe:

—Che membri, ¿mahera vo ñgue ere eico oreu? Nde recasa tēi opacatu rupi, ore mopihañemoñeta ati uca eve —ehi.

⁴⁹ Evocoiyase,

—¿Mahera vo che reca co coti rupi tēi peye peico? ¿Ndapeicuai vo che Ru rēta pipe aico vaherā? —ehi osi upe.

⁵⁰ Iyesupa rumo ndosenducuai eté aipo oyeupe hesa yuvireco.

⁵¹ Evocoiyase oyevi Nazaret ve oso supi. Aheve omboyeroyaño ité oyesupa. Ichi niha opacatu co mbahe rese oyapisacaño ité. ⁵² Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tūpa upe iyavei ava eta upe avei no.

3

Juan Oporoāpiramo vahe secoi ivi iporupirēhisa rupi

¹ Quince araviter pipe mborerecuar guasu Tiberio recose, Poncio Pilato evocoiyase mborerecuar secoi Judea rupi, Herodes avei mborerecuar secoi Galilea ve, tīvrí Felipe evocoiyase mborerecuar secoi Iturea ve iyavei Traconite ve, Lisanias avei mborerecuar secoi Abilinia ve. ² Anás iyavei Caifás ahe pahi rerecuar ivate catu vahe yuvirecoi. Ahese Tūpa, “Emombehu che ñehe ava upe cute” ehi Zacarias rahir Juan upe oico ivi iporupirēhisave. ³ Juan evocoiyase oso opacatu iai Jordán ivii oico, supi aipo ehi ava upe: “Pemboasi pe angaipa, peyevi Tūpa upe, ahese opoāpiramora Tūpa pēu ñero ãqua pe angaipa rese” ehi. ⁴ Co yaviye ité Tūpa ñehe mombehusar Isaías rembicuachiagüer pipendar aipo ehi vahe: “Sendusa ivi iporupirēhisave ava sapucaisa aipo ehi vahe:

‘Pemoingatu yande Yar raperā, pemohivi tupri avei’ ehi.

⁵ ‘Evocoiyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyoyasa tupri no.

Acoi perí ipāri vahe, ahe imohivisapara; perí ipicucu ati vahe opara imboapiposa tupri chupe.

⁶ Iyavei opacatu ava osendura ñehesa písirosa resendar Tūpa remimbou yuvireco cute’ ehi vahe” ehi.

⁷ Ava rehii yuvinosepa chupe ‘tayande āpiramo’ oyapave yuvireco viña. Ahe rumo aipo ehi: “¡Pe mboi mboetasa tēi peico! ¿Ava vo, ‘Pesēra Tūpa ñemoírosa ou vaherā sui’ ehi tupri tēi pēu? ⁸ Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tēi peñepisiro ãqua. Esepiá, Tūpa oicatuño ité co ita sui Abraham suindar nungar tupri apo ãqua oyeupe nara yepi. ⁹ Hacha niha imoingatusa voi eté opacatu ivira iha naporai vahe sapo rupi yasia ãqua yepi. Yasiapri evocoiyase imondosapara tatave” ehi.

¹⁰ —¿Mbahe pīha evocoiyase oroyapora ore recocuer recuñaro ãqua oroico? —ehi ava rehii oporandu yuvireco chupe.

¹¹ —Pe pereco vahe ñuvirío pe camisa, ñepei pemondo ava ndovirecoi vahe upe; iyavei pe pereco vahe tembihu, pemboyahomi tēi ambuae ava ndovirecoi vahe upe —ehi imboyevi ava upe.

¹² Yugüeru avei moviro ava sui guarePOCHI rerocuasar ‘tayande āpiramo’ oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tūpa rupi ore guata ãqua oroico? —ehi yuvireco chupe.

13 Evocoiyase aipo ehi ahe ava yuvirecoi vahe upe:

—Aní perocua catu iri guarepochi pêu imombehusa sui —ehi.

14 Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehéñehé tēi chira ava upe sembiapoëhi rese, iyavei peyemboviñañora pe poraviquí reprí rese —ehi sundao upe.

15 Ava rumo, “¿Ndahei pîha co Poropisírosar sârombri secoi?” ehi tēi Juan upe yuvireco. 16 Juan rumo aipo ehi opacatu ava upe: “Che opoäpiramo i pipe tēi; oura rumo ambuae che raquicuei, ahe pe äpiramora Espíritu Santo tata nungar pipe. Ahe seco pîrata catu vahe secoi che sui. Sese cheu ndiyai eté ahe ipitaquisâ yora áqua ichui” ehi. 17 “Ahe güeru trigo mbovevesa ihigüer sui ipeha áqua. Sâhii evocoiyase yapocatusa, ihigüer rumo imondosa tata apirëhi vahesave” ehi ava upe.

18 Omombehu-mbehu vîte ñehesa aviye vahe ava upe ‘toyemonguerëhi güecocuer recuñaro áqua yuvireco’ oya. 19 Ipare rumo Juan oñehe pîrata mborerecuar Herodes upe secocuerai rese. Esepia, vivri Felipe rembireco Herodías rese secoi, iyavei setá ambuae mbahe naporai vahe sembiapo. 20 Sese Herodes oyapoño ambuae mbahe tēi: seroyaëhisa pipe osoquenda ucaño Juan sereco.

Jesús äpiramosa

21 Yipindar rumo voquenda viteëhiseve Juan oñapiramo setá ava oico, aheseve avei oñapiramo Jesús. Jesús yerure vîteseve, aviyeteramo tēi oyemboi tupri iva. 22 Ipare Espíritu Santo ogüeyi ou iharive apicasu nungar, iyavei oyeendu ñehesa iva sui aipo ehi vahe:

—Nde che Rahir ereico, che rembiasu; sese avîha ité nde rese —ehi.

Ava eta oyesu vahe Jesucristo yesu renondeve

23 Jesús virecose treinta araviter, ahese ramo omboipi oporombohe. Ahe icuaprí vahe ité José rahir secose viña. José Elí rahir secoi, 24 Elí evocoiyase Matat rahir, ahe Matat evocoiyase Leví rahir, Leví evocoiyase Melqui rahir, ahe Melqui evocoiyase Jana rahir, Jana evocoiyase José rahir, 25 ahe José Matatías rahir, Matatías evocoiyase Amós rahir, ahe Amós evocoiyase Nahúm rahir, Nahúm evocoiyase Esli rahir, ahe Esli Nagai rahir, 26 Nagai evocoiyase Maat rahir, ahe Maat Matatías rahir, Matatías evocoiyase Semei rahir, ahe Semei evocoiyase Josec rahir, Josec evocoiyase Judá rahir, 27 ahe Judá Joanán rahir, Joanán evocoiyase Resa rahir, ahe Resa evocoiyase Zorobabel rahir, Zorobabel evocoiyase Salatiel rahir, ahe Salatiel Neri rahir, 28 Neri evocoiyase Melqui rahir, ahe Melqui Adi rahir, Adi evocoiyase Cosam rahir, Cosam evocoiyase Elmadam rahir, Elmadam evocoiyase Er rahir, 29 ahe Er Jesús rahir, Jesús evocoiyase Eliezer rahir, ahe Eliezer Jorim rahir, Jorim evocoiyase Matat rahir, 30 ahe Matat Leví rahir, Leví evocoiyase Simeón rahir, ahe Simeón evocoiyase Judá rahir, Judá evocoiyase José rahir, ahe José Jonam rahir, Jonam evocoiyase Eliaquim rahir, 31 Eliaquim Melea rahir, ahe Melea Mena rahir, Mena evocoiyase Matata rahir, ahe Matata evocoiyase Natán rahir, 32 Natán David rahir, ahe David evocoiyase Isaí rahir, Isaí Obed rahir, ahe Obed evocoiyase Booz rahir, Booz Sala rahir, ahe Sala evocoiyase Naasón rahir, 33 Naasón Aminadab rahir, ahe Aminadab evocoiyase Admin rahir, Admin evocoiyase Arni rahir, Arni evocoiyase

Esrom rahir, ahe Esrom evocoiyase Fares rahir, Fares evocoiyase Judá rahir,³⁴ ahe Judá Jacob rahir, Jacob evocoiyase Isaac rahir, ahe Isaac Abraham rahir, Abraham evocoiyase Taré rahir, Taré evocoiyase Nacor rahir,³⁵ ahe Nacor Serug rahir, Serug evocoiyase Ragau rahir, ahe Ragau evocoiyase Peleg rahir, Peleg Heber rahir, ahe Heber evocoiyase Sala rahir,³⁶ Sala Cainán rahir, ahe Cainán evocoiyase Arfaxad rahir, Arfaxad evocoiyase Sem rahir, ahe Sem evocoiyase Noé rahir, Noé evocoiyase Lamec rahir,³⁷ ahe Lamec Matusalén rahir, Matusalén evocoiyase Enoc rahir, Enoc evocoiyase Jared rahir, ahe Jared Mahalaleel rahir, Mahalaleel evocoiyase Cainán rahir,³⁸ ahe Cainán evocoiyase Enós rahir, Enós evocoiyase Set rahir, ahe Set Adán rahir, Adán evocoiyase Túpa rahir.

4

Jesús recoāhasa

¹ Jesús Espíritu Santo rese ité secoi. Ahe osē iai Jordán sui oso. Ipare Espíritu viroguata ivi iporupirēhisa rupi. ² Aheve cuarenta ari secoise Caruguar osecoāha. Ndocarui avei oico. Sese ndasiepoi eté. ³ Caruguar evocoiyase aipo ehi chupe:

—Túpa Rahir ité nde recose, co ita sui eyapo pan cūritei —ehi.

⁴ Evocoiyase Jesús omboyevi chupe:

—Che Ru ñehe rumo icuachiapri pipe aipo ehi: ‘Ndahei chira pan suño ava yuvirecovera’ ehi —ehi Caruguar upe.

⁵ Ipare Caruguar víraso ivate vahesave. Aheve ñepei reseve opacatu ava-ava tēi mborerecuasa ivi pipendar omboyecua chupe. ⁶ Ipare aipo ehi chupe:

—Che amondora opacatu ivi rupindar mborerecuuar pīratasa iyavei mbahe porañete vahe nde povrīve. Esepia niha, co opacatu cheu im-boupri; iya ité amondo vaherā ava upe che remimbotar rupi. ⁷ Acoi ereñenopiphase cheu che mboetei água, ahese opacatu co mbahe ereipisira nde mahera —ehi tēi Caruguar chupe.

⁸ —Icuachiapri pipe rumo: ‘Emboetei nde Yar Túpa, ahe güeraño tupri avei eremboyeroyara’ ehi —ehi Caruguar upe.

⁹ Ipare Caruguar víraso oyeupi tecua guasu Jerusalén ve. Aheve oviroyeupi tūparo apiterve. Aheve Caruguar aipo ehi chupe:

—Túpa Rahir ité nde recose, eviapi cohabe sui. ¹⁰ Esepia niha, icuachiapri pipe:

‘Túpa oyocuaira güembiguai eta nde rāro água.

¹¹ Ahe nde mopuhara yuvireco que ñepei ita nde momara rāgürer sui’ ehi —ehi Caruguar chupe.

¹² Evocoiyase omboyevi Caruguar upe:

—¡Aní! Icuachiapri pipe niha aipo ehi avei: ‘Nderesecoāhai chira nde Yar Túpa’ ehi —ehi chupe.

¹³ Ahese Caruguar ndoicatu iri eté Jesús recoāha água oico. Ipare oyepepiño raimi tēi oso ichui.

Jesús omboipi oporombohe Galilea rupi

¹⁴ Jesús, Espíritu Santo reco pīratasa pipe, oyevi oso Galilea ve. Ipare serācua oguata opacatu tecua-tecuami rupi. ¹⁵ Esepia, ahe oporombohe judío tūparo pipe oico. Ahese opacatu ava omboetei yuvireco.

Jesús oyevi Nazaret ve

16 Ichui Jesús oyevi Nazaret ve ocuacua agüerve. Aheve judío mbituhusa ari pipe oique tūparove inungar oyapo yepi. Ahese opūha 'tayeroqui icuachiapri maranehi pipe' oya. 17 Evocoiyase tūparo rese ñangarecuar pítiviisar omondo Tūpa ñehe mombehusar Isaías rembicuachía chupe. Oyorase ahe cuachiar, oyeroqui icuachiapri aipo ehi vahe pipe ohā:

18 —“Yar Espíritu secoi che rese.

Esepia niha, ahe ombou che cuaitarā cheu co ñehesa aviye vahe mombehu água ava iparaísu vahe upe.

Che cuaita avei ava mbahe-mbahe tēivrive yuvirecoi vahe senose água ichui, iyavei ava ndasesapisoí vahe ambosarecora; iyavei che cuaita ava mbahe-mbahe tēi rasicuer oiporara vahe sui senose água,

19 iyavei ‘cūritei Yar oyemoingatu oporovasasa mundo água pēu’ he água”
—ehi icuachiapri pipe

—ehi oyeroqui.

20 Sese oyeroqui pare, oyapoapipa cuachiar imondo tūparo rese ñangarecuar pítiviisar upe. Ipare oguapi oí ava rembiepiave. Ahese opacatu tūparo pipendar omahe atí yuvireco sese. 21 Evocoiyase ahe oñehe aipo ehi:

—Cūritei yaviye co icuachiapri pipendar opacatu pe rovaque —ehi.

22 Opacatu ava oñehe tupriño ité yuvireco sese. Ndoyembovíhai tēi ñehe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tēi? —ehi yuvireco chupe.

23 Ahe rumo aipo ehi ava upe:

—Pe aipo peyera cheu: ‘Oprombogüera vahe, eñeposano nde ae eico’ peyera. Ipare aipo peyera cheu: ‘Acoi orosendu vahe nde rembiapogüer Capernaum pipe, ñgue ere avei eyapo cohabe nde recua pipe ité’ peyera cheu —ehi.

24 —Supi eté, ndipoi eté niha que ñepei yepe Tūpa ñehe mombehusar oipisi tupri vahe güecua pipe yuvireco yepi. 25 Supi tupri ité Tūpa ñehe mombehusar Elías recose, iñehe rupi tuprindoquii eté mbosapi aravíter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña, 26 Tūpa rumo nomondoi Elías cuña imer mano vahecuer Israel pendar upe ipítivii água. Ñgue ehi rumo omundo cuña ndahei vahe Israel pendar ipítivii água. Ahe cuña tecua Sarepta pendar, ahe Sarepta Sidón ñipiimindar. 27 Iyavei setá ava oime Israel recua pipendar imbaheasi vahe lepra rerecosar yuvireco evocoi Tūpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepei ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

28 Ahese opacatu ava judío tūparo pipendar oñemoiró iteanga yuvireco sese aipo mbahe renduse. 29 Sese opa voi eté opūha Jesús reraso água tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña. 30 Jesús rumo ipāhu sui osē tupriño oso.

Jesús ombogüera mbia caruguar vireco vahe oyese

31 Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pipe. 32 Ipare opacatu ava, “¡Mara ehi

rutei!” ehi tēi iporombohesa renduse yuvireco. Esepio niha, ahe oñehe güeco píratasa pipe.

³³ Aheve judío tūparo pipe oime mbia vireco vahe caruguar oyese, ahe oñehe pírata Jesús upe:

³⁴ —¡Ore mañeco tēi eme eve! ¡Mahera ereyuño tēi cohove oreu, nde, Jesús Nazaret pendar! ¿Ereyu vo ore mocañi água tēi? Che orocua ité. Nde niha seco maranehí vahe ereico Tūpa suindar —ehi chupe.

³⁵ Evocoiyase,

—¡Quiriri, esē co mbia sui! —ehi oñehe pírata caruguar upe.

Ahese caruguar omboviapi ahe mbia ava rovai, osē ocua ichui; nomomarai eté rumo. ³⁶ Opacatu ava oyembosiquíye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepio, co mbia opíratasa pipe oyocuai caruguar ava sui imose águal —ehi yuvireco.

³⁷ Sese Jesús rerācua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

³⁸ Evocoiyase Jesús osē judío tūparo pipe sui oso, oique Simón Pedro rētave. Simón rembireco si sohí iteanga ou. Evocoiyase oñehe ahe pendar sese Jesús upe ‘tombogüerami tēi’ oyapave yuvireco. ³⁹ Evocoiyase Jesús oyeavivi oso chupe sohí sui imbogüera água. Ocuera pare voi ahe cuña ofiarapuha; ohañeco ahe ava yuvirecoi vahe rese.

Jesús ombogüera setá ava imbaheasi vahe

⁴⁰ Ari so ramomise opacatu ava imbaherasisa ambuae tēi vahe güeru Jesús upe yuvireco. Ahe evocoiyase opo omundo iyacatu iharive ñepei-peí imbogüera. ⁴¹ Iyavei setá ava sui opa omose caruguar. Evocoiyase caruguar osapucái tēi aipo ehi yuvireco:

—¡Nde acoi Tūpa Rahir ité ereico! —ehi.

Ahe rumo oñehe pírata caruguar upe, nomoñehe iri. Esepio niha, caruguar oicua ité ahe Tūpa Rembiporavo seco rese yuvireco.

Jesús oporombohe judío tūparo rupi oico

⁴² Ahere ayihive cōhe ramomise, Jesús osē tecua pipe sui, oso ivi iporupirēhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyessi ichoëhi água ité yuvireco vinā.

⁴³ Ahe rumo aipo ehi ava eta upe:

—Tamombehú rane catu ambuae tecuave avei ñehesa aviye vahe Tūpa mbororecuasa resendar ava upe. Esepio, aherā niha che mbousa —ehi.

⁴⁴ Égüe ehi Jesús oguata oporombohe Judea tūparo rupi oico.

5

Pira mboha ati agüer

¹ Ñepei ari Jesús secoi ipa Genesaret popi rupi. Aheve ava rehii oyepota yuvireco chupe, oyere ati yuvireco sese. Esepio niha, ahe osendu pota ité Tūpa Ñehengagüer yuvireco. ² Aheve oime ñuvirío carite imbehi popive. Ahe ava pira mbohasar opa yuvinose evocoi carite pipe sui yuvireco. Ipare opira mbohasa oyosei yuvinoi. ³ Evocoiyase Jesús osepiase, oha Simón carite pipe iyavei aipo ehi chupe: “Tosirí catumi tēi chihí coi cotí iai popi sui” ehi. Ipare oguapi oí carite pipe. Aheve ombohe ava cute. ⁴ Oñehe pare aipo ehi Simón upe:

—Yaso ipa tipi catu vahesave. Aheve erembohara pira —ehi.

⁵ Simón rumo omboyevi chupe:

—Porombohesar, orosāha tēi niha pītu momba pira mboha oroico. Nde porocuaita pipe rumo amondo irira pira mbohasa īve —ehi.

⁶ Ēgue ehise, pira rehii omendoromi ombohasa yuvireco. ⁷ Ahese oyaiti yuvireco omboetasa evocoai ambuae carite pipe yuvirecoi vahe upe ‘toyugüerumi yande pītivii’ oyapave yuvireco chupe. Ahe yugüeru chupe. Ipare opa ūuvirío carite omboapipo tupri yuvireco; seni iri rumo omondo ipive. ⁸ Co mbahe repiase, Simón Pedro oñenopīha oso sovai aipo ehi chupe:

—¡Eyepepimi tēi che sui, che Yar! ¡Esepiá, che yangaipa vahe tēi aico! —ehi.

⁹ Esepiá, Simón iyavei opacatu ava yuvirecoi vahe supi osiquiyé iteanga co pira rehii repiase yuvireco. ¹⁰ Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ēgue ere aveira ava reca cheu nara —ehi.

¹¹ Evocoiyase opa vīnose carite īvī ītasave yuvireco, oseyapaño opacatu mbahe. Ipare yuviraso supi.

Jesús ombogüera ava lepra rerecosar

¹² Ñepei ari Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopīha oyeaīvī oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

¹³ Evocoiyase, opocose sese,

—Aipota. ¡Erecuerara cūritei! —ehi chupe.

Aipo ihe ramoseve voi eté ocuera. ¹⁴ Ipare oyocuai aipo ehi chupe:

—Eremombahu eme nde cuerasa ambuae ava upe; esoño, eyemboyecua judío pahi upe. Ipare eicuavēhe nde porerecosa nde cuerasa resendar Moisés porocuaita rupi. Ipípe sui toicua opacatu ava nde cuerasa yuvireco —ehi chupe.

¹⁵ Jesús rerācua rumo oyembouvicha catu-catu iri eté. Evocoiyase setá ava oyemboya yuvireco sese iñehe rendu āgua ‘tayande mbogüerami tēi yande mbaherasisa sui’ oyapave yuvireco. ¹⁶ Ava rehii sui rumo amove Jesús oyepepiño ahe aemioyerure āgua yepi.

Jesús ombogüera ava ndoguatai vahe

¹⁷ Ñepei ari Jesús oporombohe oico. Yar Tūpa pīratasa vireco oyese ava mbogüera āgua. Aheve avei oguapi yuvinoi fariseo, Moisés porocuaita rese oporombohe vahe avei ipiri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no. ¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyi āgua yuvireco viña; ¹⁹ ndoicatui eté rumo seroique yuvireco ava rehii pāhu rupi. Evocoiyase viroyeupi yeupisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai. ²⁰ Ahe oicuase co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mborípar, che ñero nde angaipa rese ndeu —ehi.

²¹ Ichui oporombohe vahe Moisés porocuaita rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpaño ité niha oicatu ava angaipa upe oñero água” ehi tēi oyeupe yuvireco.

²² Ahe rumo oicuaño ité ahe ava pihañemoñetasa. Evocoiyase aipo ehi chupe:

—¡Mahera vo pepihañemoñeta rai tēi che rese! ²³ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise: ‘Epūha, eguata’ hesa tie? ²⁴ Tapeicua ru che, Ava Riquehir, areco ité mbororecuasa co ivi pipe ava angaipa upe che ñero água —ehi.

Evocoiyase,

—Eñarapuha, esupi nde rupa, eso nde rētave —ehi imbaheasi vahe upe.

²⁵ Ahese opūha voi ava rovaque, osupi vupagüer. Ipare osapucai oso güëtave Tūpa upe. ²⁶ Ahese opacatu tupri ité ava, “¡Too! ¿Mara ehi rutaí pīha co?” ehi tēi imboeteisave yuvireco. Iyavei osiquiyepave aipo ehi yuvireco:

—Co pipe yaselia mbahe ndayasepiai vahe ité —ehi.

Jesús oñeho Leví upe

²⁷ Ichui osése Jesús, oseelia mbia Roma ve nara guarePOCHI rerocuasar Leví serer vahe, ahe guarePOCHI rerocuasave chini. Sepiase,

—Erio che rupi —ehi chupe.

²⁸ Evocoiyase Leví opūha. Oseyapa oporaviquisa, oso supi.

²⁹ Ipare Leví oyapo pieta guasu chupe nara güëtave. Aheve iyemborisave setá imboetasava ava guarePOCHI rerocuasar iyavei ambuae ava ocaru yuvínoi ipiri. ³⁰ Pieta repiasar fariseo yuvirecoi vahe rumo iyavei ipāhu pendar Moisés porocuaita rese oporombohe vahe avei, ahe omboipí semimbohe upe oñeho mara aipo ehi yuvireco chupe:

—¡Mahera ru pecaru iyavei pecahu guarePOCHI rerocuasar rese iyavei ambuae ava yangaipa guasu vahe rese tēi avei no! —ehi.

³¹ Jesús rumo aipo ehi chupe:

—Ava nimarai vahe ndosecái eté oporoposano vahe; imbaheasi vaheño rumo oseca yuvireco. ³² Eseelia, che ndayui ava seco catupri vahe reca; che rumo ayu ava yangaipa vahe reca Tūpa uve iyevi água yuvireco —ehi.

Yecuacula rese ñehesa

³³ Ipare ava oporandu yuvireco chupe:

—¡Mahera vo oyecuacu serai iyavei oyerure Juan Oporoápiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyevi chupe aipo ehi:

—Ndiyai eté ichohopri mboyecuacu mendasave imer oicove viteseve ipāhuve. ³⁵ Oimera rumo ari imer reraso água ichui, ahese ramo oye-cuacula yuvireco cute —ehi.

³⁶ Iyavei ambuae mbahe rese oporombohe imboyevi água:

—Ndiyai eté ava upe virocua vaherā turucuar ipiasu vahe sui ambuae turucuar cuacuami vahe apete água. Eseelia niha, ñgue ehise evocoiyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi. ³⁷ Iyavei no, ndiyai eté ñoñasa uva ricuer piasu mbahe pirer cuacula pipe no. Eseelia niha, ñgue ehise, uva ricuer piasu evocoiyase opara ombopu mbahe pirer cuacula

viña, ēgue ehira oyepiyerepa, mbahe pirer avei evocoiyase ocañi tēira viña.³⁸ Uva ricuer piasu rumo yamondora mbahe pirer piasu pipe.³⁹ Iyavei ndipoi eté que ava oihu vahe uva ricuer ipiasu vahe yuvireco uva ricuer cuacula vahe yusei ai pare. Esepiá niha, ava aipo, ‘Co uva ricuer cuacula vahe aviyé catu vahe yepi’ ehi yuvireco —ehi ava upe.

6

Jesús remimbohe oipoho trigo mbituhusa ari pipe yuvireco

1 Nepei mbituhusa ari pipe Jesús viroguata güemimbohe mbahe miti pāhu rupi. Semimbohe evocoiyase oipoho-poho yuviraso trigo rāhii. Ipare oyequii opo pipe sāhii yuvireco igua.² Evocoiyase fariseo osepiase, aipo ehi yuvireco semimbohe eta upe:

—¡Mahera peporavíquño tēi co mbituhusa ari pipe peico! —ehi.

3 Jesús rumo omboyeví chupe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco.⁴ Ahe niha oique ité Tūpa rēta pipe, opoco pan imboeteipri Tūpa upendar rese evocoi pahi upe güeraño ipotasa vahe ihu ägua yepi. Ahe rumo ohu, ondugüer tohu avei omondo —ehi.

5 Iyavei aipo ehi chupe:

—Ava Ríquehir mbituhusa ari rerecuar ité secoi —ehi fariseo upe.

Jesús ombogüera mbia ipo nomii vahe

6 Ambuae mbituhusa ari pipe, Jesús oique judío tūparo pipe oporombohe oico. Aheve mbia yasu coti ipo nomii vahe secoi.⁷ Moisés porocuaita rese oporombohe vahe, fariseo avei omahengatu Jesús rese yuvireco ‘¿ombogüerara pīha co mbia mbituhusa ari pipe?’ oya; ‘yaiñehengapo angahu’ oyapave tēi yuvireco.⁸ Ahe rumo oicuaño ité ipīhañemoñetasa oico. Ipare aipo ehi evocoi mbia ipo nomii vahe upe:

—Epūha cohabe terehā ava pāhuve —ehi.

Ahe mbia evocoiyase opūha, opita aheve ohā⁹ Ahese Jesús oporandu ahe ava upe:

—Aporandura mbahe rese pēu —ehi—. ¿Mbahe vo yaposara mbituhusa ari pipe yepi, mbahe tupri pīha, anise mbahe naporai vahe tie? ¿Yaipísiro pīha ava recocuer; yamocañi uca tēi tie? —ehi.

10 Evocoiyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yīva —ehi.

Ahe mbia evocoiyase oichoho oyīva; evocoiyase ipo ocuera tupri ité.¹¹ Evocoiyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pīha imomara ägua?’ oya.

Jesús oiporavo doce tupri güemimboheră

12 Ahe ari rupi Jesús oso ivitrive,oyerure pītu momba tupri Vu upe oico.¹³ Cōhese, “Perió” ehi güemimbohe eta upe. Ipāhu sui oiporavo doce tupri, ahe chupe, “Apóstol” ehi.¹⁴ Co ahe yuvirecoi: Simón, ahe acoi Pedro avei serer; Andrés Simón rivri; Santiago, Juan, Felipe, iyavei Bartolomé;¹⁵ Mateo, Tomás, Santiago Alfeo rahir; Simón, ava güecua rese secatēhí vahe pāhu pendarer;¹⁶ Judas Santiago rivri; iyavei Judas Iscariote, ahe omondo vahe Jesús yamotarēhimbar uve.

Jesús ombohe ava rehii

¹⁷ Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava ñgue ehi iñehe rendu potasave yuvireco ‘tayande mbogüerami tēi yande mbaherasisa sui’ oyapave yuvireco. ¹⁸ Acoi espíritu naporai vahe remimombaraisu avei ocuera tupri yuvireco. ¹⁹ Evocoiyase opacatu ava opoco pota ité sese yuvireco. Esepiá niha, ahe oporombogüera opacatu güeco píratasa pipe oico.

Ava sorivete vahe iyavei ava ndoyemboviha!

²⁰ Ipare omahe Jesús güemimbohe rese aipo ehi chupe:
“Perorivete catu pe iparaisu vahe. Esepiá niha, Tūpa mborerecuasa pēu nara ité secoi.

²¹ “Perorivete catu cūriteindar ndasiepoi vahe. Esepiá niha, pehitarora peico curi.

“Perorivete catu pe acoi ava cūritei oyaseho vahe. Esepiá niha, pevharetera coiye peico.

²² “Perorivete catu pe acoi ava pe amotarēhise, pe mboyepepiñose avei oyesui yuvireco, iñehe-ñehe tēise yuvireco pēu pe amotarēhisave, iyavei acoi viroñrose pe rer mbahe tēi pipe che, Ava Riquehir, recocuer sui tēi yuvireco. ²³ Peyerembovihaño iyavei perorivete catuñora ahe arí pipe peico. Esepiá niha, ipare peipisira porerecosa tuvichá vahe ivave. Ñgue ehi tupri avei evocoi ava ramoi aracahendar mara-mara tēi Tūpa ñehe mombehusar sereco yuvireco” ehi.

²⁴ “¡Peparaisu catu rumo cūritei mbahe yar peico vahe! ¡Esepiá niha, pemboaviye pe rorivetes peico!

²⁵ “¡Peparaisu catu acoi pe ihitaro vahe cūritei! ¡Esepiá niha, ndaperiepoi chira peico coiye!

“¡Peparaisu catu acoi pevhā vahe pe pietase cūritei! ¡Esepiá, peyasehora pe viharēhisa pipe peico coiye!

²⁶ “¡Peparaisu catu acoi peipisi vahe pe mboeteisa opacatu co ivi pipendar ava tēi sui! ¡Esepiá niha, ñgue ehi tupri tamoi Tūpa ñehe mombehusar angahu tēi vahe upe yuvireco aracahe!” ehi.

Iyacatu yasaisu yande amotarēhimbar

²⁷ “Pe che ñehe rese peyapisaca vahe upe rumo aipo ahe: Pesaisu ava pe amotarēhimbar; peyapo tupri mbahe aviyé vahe ava nape ambotai vahe upe. ²⁸ Peporandu Tūpa porovasasa rese ava pēu iñehe-ñehe tēi vahe upe nara; peyerure Tūpa upe pēu mbahe tēi oyapo vahe recocuer rese. ²⁹ Acoi que pe amotarēhimbar pe rovapetese, co cotindar avei pemoporehíñora chupe. Iyavei acoi que ava virocuaño tēise pe yeaosa pe sui, toviraso avei pe yemondesa güemimbotar rupi” ehi. ³⁰ “Acoi oporanduse que pe mbahe rese yuvireco pēu, pemondoño avei chupe. Iyavei acoi que ava virocuaño tēise pe mbahe pe sui, ndapeporandui chira pēu imboyevi água rese. ³¹ Acoi mbahe peipota vahe ambuae ava oyapo vaherā pēu, ahe tupri avei peyapora chupe.

³² “Acoi ava pe raisupar güeraño pesaisu catu tēise, ndipoi eté mbahe aviyé vahe ipipe. Esepiá niha, ava naporai vahe ñgue ehi yuvireco yepi.

³³ Anise, acoi ava mbahe tupri ai oyapo vahe pēu, chupe güeraño mbahe

tupri peyapose, ḡmbahe vo evocoiyase oime aviye vahe ipipe? Esepio niha, ava angaipa viyar avei ēgüe ehi yuvireco yepi. ³⁴ Acoi pemondoño tēise mbahe ava upe ‘tomboyevi mbahe cheu’ pe hesave, ḡmbahe vo evocoiyase oime aviye vahe ipipe? Esepio niha, ava angaipa viyar ēgüe ehi avei yuvireco. ³⁵ Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasārōño rane mbahe cheu imboyevi ḡqua vichico’ ndapeyei chitera. Ahese oimera porerecosa aviye catu vahe pēu. Pe evocoiyase Tūpa seco ivate catu vahe rahir peicora. Esepio niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei. ³⁶ Pe peporoparaisuereco inungar pe Ru Tūpa oporoparaisuereco yepi” ehi.

Ndiyai ambuae ava seroñrosa

³⁷ “Ndiyai, ‘Oyaví ité mbahe’ peye voiño tēi ambuae ava upe. Evocoiyase Tūpa, ‘Oyaví mbahe’ ndehi chira pēu. Pemocañi uca tēi eme ambuae ava. Evocoiyase Tūpa ndape mocañi tēi chira. Peñeroño catu ambuae ava upe, ahese Tūpa iñero itera pēu. ³⁸ Pemondose mbahe ava upe, evocoiyase Tūpa omondoño itera mbahe aviye vahe pēu inungarra omundo pe mbahe ríru pipe pēu sāhambrí tupri aviye vahe viña. Ēgüe ehira mbahe imondo pēu. Tūpa oicua tupri itera pēu inungar pe mbahe pemondo ambuae ava upe” ehi.

³⁹ Ipare Jesús omombehu co ambuae porombohesa: “¿Oicatu pīha ñepei ndasesapisoí vahe ambuae ndasesapisoí vahe reroguata? ¡Aní eté! Esepio, oyoya voi oviapira que ivicuar pipe yuvireco viña. ⁴⁰ Ñepei yepe niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitíra ombohesar” ehi.

⁴¹ “¿Mahera ambuae ava rembiavími rese tēi pemahe? Iya rumo peyese rane mbahe tuvicha catu vahe pesepiara. ⁴² Ndiyai pēu, ‘Che toropítivii mbahe nde rembiaví rese’ peye vaherā chupe. Esepio, pe peyaví guasu catu mbahe. ¡Pe Tūpa reroyasar angahu tēi peico vahe! Penose uca rane pe rembiaví tuvicha catu vahe peyesui, ahese ramo ambuae ava rembiaví tahími vahe moingatu peicatura” ehi oporombohe.

Ava recocuer icuasa sembiapo rese

⁴³⁻⁴⁴ “Ivíra aviye vahe icuasa iha rese. Esepio, ivíra aviye vahe, iha aviye avei; ivíra naporai vahe, iha naporai avei no. Supi eté ndipohosai ivíra sāchi atí vahe sui higuera ha, iyavei ndahipohosai uva, yu pāhu sui. ⁴⁵ Ēgüe ehi avei ava upe. Ava aviye vahe oyapo mbahe tupri. Esepio, ahe vireco mbahe tupri opíha pipe yepi. Iyavei acoi ava ndaseco pōrai vahe oyapo mbahe tēi. Esepio niha, ahe vireco mbahe tēi eté opíha pipe yepi. Esepio niha, pe piha pipe sui tēi osē pe ñehe ḡqua” ehi.

Ava oyemoviracua vahe iyavei ndoyemoviracuai vahe Jesús reroyasave

⁴⁶ “¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu? ⁴⁷ Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu: ⁴⁸ ahe inungar tupri ité acoi ava oyapo vahe güétara ita harive yepi. Yipindar rumo oyoho picucu rane ité ita harive imopuha ḡqua. Yepe ahe oí upe oyepota tēi ivitú ai, amarusu reseve oinupa pírata tēi, nomboyerocuai eté rumo. Esepio niha, vireco ité ovíracuasa. ⁴⁹ Acoi ava che ñehengagüer rese ndoyapiscacai

vahe rumo, ahe ndoyavii acoi ava oyapo vahe gǖetara īvi cuhi harive t̄ei, ndovirecoi eté ovíracuasa. Ipare amar, īvitu ai reseve oinupa píratá, opaño omonduru; ocañi t̄ei eté evocoiyase” ehi Jesús ava mbohe.

7

Jesús ombogüera chihivahe sundao rerecuar Roma iguar remimboacua

¹ Jesú oñehepase ava upe oico, oso Capernaum ve. ² Ahe tecua pipe sundao rerecuar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité. ³ Jesú rerácu anduse rumo, oyocuai moviro t̄ei mboripar judío imboeteipri chupe iñehe água ‘toumi t̄ei che remimboacua mbogüera’ oyapave. ⁴ Ahe judío evocoiyase oyemboya Jesú rese yuvireco iyavei oporandu yuvireco chupe aipo ehi:

—Ore mboripar sundao rerecuar oipota nde ereyapomi t̄eira mbahe icatupri vahe chupe viña. ⁵ Esepia niha, ore raisu iyavei ahe teieté oyapo uca t̄uparo oreu nara —ehi yuvireco chupe.

⁶ Evocoiyase oso ahe yuvirecoi vahe rupi. Virovise rumo s̄eta yuvireco, ahese sundao rerecuar omondo ambuae mboripar chupe. Imboripar evocoiyase omombehu iñehe aipo ehi vahe: “ ‘Che Yar, ereyemañecoi rene. Esepia niha, ndiyai eté che r̄eta pipe nde reique água. ⁷ Sese niha che teieté ndasoi nde reca. Nde ñehe pipe t̄ei rumo che remimboacua erembogüerara. ⁸ Esepia, che avei niha areco che cuaita. Iyavei areco sundao che voya. Eso peve, ahese ñepei upe, ahe evocoiyase oso voi eté; ambuae upe: Erio, ahese, ou voiño ité cheu. Ipare, Ereyapora co mbahe, ahese che rembiguai upe, ahe evocoiyase che reroyaño voi’ ehi ore mboripar” ehi Jesús upe yuvireco.

⁹ Aipo oyeupe hese Jesús, “¡Too!” ehi. Ipare aipo ehi vupindareta upe:

—Supi eté ndasepiai vahe ité co mbia che reroya tupri vahe nungar judío eta pâhuve —ehi.

¹⁰ Yuviroyevipase sundao rerecuar mboripar s̄etave yuvireco, aheve osepia evoco semimboacua yuvireco ocuera tprise.

Jesús ombogüerayevi cuña imer mano vahecuer membre cuimbahé

¹¹ Ipare voi Jesús oso tecua Naín ve, iyavei semimbohe yuvirasoño ité supi ava rehii reseve avei no. ¹² Virovise tecua oso, osepia tehögüer ava virocuae yuvireco ñoti água. Ahe cuña imer mano vahecuer membre ñepei vahe ité viña. Tecua pipendar setá iteanga ava yuviraso supi. ¹³ Cuña repiase rumo, oiparaisuereco. Ipare aipo ehi chupe:

—Ereyaseho eme —ehi.

¹⁴ Evocoiyase oyemboya oso, opoco tehögüer ríru rese. Sese ovosii vahe evocoiyase viropitaño yuvireco chupe. Ipare aipo ehi tehögüer upe:

—Mbia chihivahe, che aipo ahe ndeu: ¡Eñarapuha! —ehi.

¹⁵ Evocoiyase omano vahecuer oñarapuha oñi iyavei oñehe no. Ichui Jesús omondo ichi upe. ¹⁶ Opacatu tupri ité ava oyembosiquiye sepiase yuvireco:

—Cûritei oyemboyecua Tûpa ñehe mombehusar seco ivate vahe yande pâhuve cute —ehi yuvireco.

Iyavei,

—Tûpa niha ou güecua pítivíi água oico —ehi avei yuvireco.

17 Ipare co Jesús rerācua yandusa opacatu Judea rupi, yivirindar rupi avei no.

Juan Oporoāpiramo vahe omondo vupindar Jesús recocuer cua uca āgua

18 Juan avei oyandu opacatu co mbahe oico. Esepiá niha, supindareta omombehupa co mbahe yuvireco chupe. ¹⁹ Evocoiyase omondo ñuvirío vupindar Jesús upe mbahe rese porandu āgua ‘¿nde ité vo Tūpa Rembiporavo aipo sārombri ereico, anise oime tie ambuae orosārō vaherā?’ oyapave. ²⁰ Evocoiyase oyepota yuviraso Jesús upe aipo ehi yuvireco chupe:

—Juan Oporoāpiramo vahe ore mbou ndeu co mbahe rese porandu āgua: ¿Nde ité vo Tūpa Rembiporavo ereico imombehupri ereyu vaherā, anise ambuae pīha orosārora orico? —ehi yuvireco chupe.

21 Ahe arí pipeve voi Jesús ombogüera setá ava imbaherasisa sui oico, ava caruguar rerecosar sui avei no. Iyavei ava ndasesapísoi vahe setá ombogüera. ²² Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pessendu vahe: “Ndasesapísoi vahe osareco tupri cūritei yuvireco, ipāri-pāri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaísu vahe upe imombehusa pīsirosa resendar ñehesa” peyera chupe. ²³ ¡Ovharetera acoi ava oyeroño vahe che rese! —ehi Juan rupindar upe.

24 Juan rupindar yuviraso pare, Jesús omboípi imombehu ava upe Juan recocuer: “¿Pesepiase Juan recocuer ava porēhisave, capihita ivitú ombova-mbova vahe nungar pīha? ²⁵ Anise, ¿pesepiá tie ifurucuar po-rañete ai vahe iyemboeteise? Êgue ehi vahe rumo secoi mbororecuar guasu guapisave yepi. ²⁶ ¿‘Mara ehi secocuer’ peye vo chupe? ¿Tūpa ñehe mombehusar ité pīha? Ahe ité, iyavei evocoi niha ivate catu vahe Tūpa ñehe mombehusar sui. ²⁷ Ahe chupe ité Tūpa icuachiapri aracahendar pipe aipo ehi: ‘Amondora che ñehe mombehusar nde renondeve nde raperā moingatu āgua’ ehi.

28 Aracahe suive ndipoi eté ivate catu vahe Juan sui. Yepe ahe ivate catu vahe viña, Tūpa mbororecuasave rumo ava seco mbegüemi catu vahe ivate catu ichui.

29 “Co iñehe renduse opacatu ava, opacatu guarepochi rerocuasar yuvirecoi vahe avei oñeaipiramo uca vahecuer Juan upe yuvireco: ‘Supi eté Tūpa aviye vahe ité’ ehi eté yuvireco cute. ³⁰ Fariseo eta rumo iyavei Moisés porocuaita rese oporombohe vahe ahe noñeaipiramo uca potai vahe Juan upe yuvireco, ahe viroño Tūpa remimbotar oyeupendar yuvireco.

31 “¿Mabahe rese pīha amboyoyara ava recocuer cūriteindar? ¿Mara ehi pīha secocuer? ³² Ahe inungar chīhivahe iguayi tēi vahe ocar rupi. Ipare oñehe pucu-pucu omboipar upe yuvireco aipo ehi: ‘Oromoñehe tēi mimbi pēu, ndapepívoi eté rumo; iyavei orosapucai tēi sapucaisa viharéhisa resendar pēu, ndapeyasehoi avei’ ehi. ³³ Esepiá, ou Juan Oporoāpiramo vahe oico. Ahe ndohui vahe pan iyavei ndoihui vahe uva ricuer. Pe evocoiyase, ‘Co mbia caruguar vireco vahe’ peye tupri tēi chupe no. ³⁴ Coiye che ayu, Ava Riquehir, acaru iyavei aihu tupri avei. Ipare, ‘Co mbia icaru guasu ai vahe secoi, iihu guasu ai vahe avei no’ peye

cheu; ‘Ava angaipa viyar mboripar tēi iyavei ava guarepochi rerocuasar mboripar tēi’ peye avei cheu. ³⁵ Ava Tūpa mbahecuasa vireco vahe rumo icuasara sembiapo rese” ehi.

Fariseo Simón serer vahe rētave Jesús secoi

³⁶ Fariseo Simón serer vahe oñeho Jesús upe: “Terecarumi che piri” ehi. Jesús evocoiyase oso sētave oguapi oñ mesave. ³⁷ Ahese cuña angaipa viyar evocoi tecua pendar secoi vahe oyandu ichose Simón rētave icaru água. Sese viroyepota aheve mbahe sīacua vahe siru pipe seraso sepirusu vahe chupe. ³⁸ Aheve oyasehó ite oñenopiha Jesús pive iyavei güesai pipe opa tupri omoaquí ipi. Ipare opaño omombiru oha aprí pipe ichui, iyavei oipirupite, oipiyere avei mbahe sīacua vahe ipi rese. ³⁹ Sepiase fariseo, ipihañemoñeta tēi: “Co mbia Tūpa ñehe mombehusar itese, oicuaño itera co cuña opoco vahe oyese ndipihai vahe viña” ehi tēi fariseo chupe. ⁴⁰ Evocoiyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

⁴¹ Evocoiyase Jesús aipo ehi chupe:

—Ñuvirío mbia oime virocua guarepochi mbia guarepochi mondosar sui yuvireco. Ñepei virocua guarepochi quiniento tupri mboravíqui repirā ichui. Ambuae evocoiyase cincuenta rupive virocua. ⁴² Ipare ndoicatu irise ité imboyevi água yuvireco chupe, evocoi mbia guarepochi mondosar iñeroño chupe yuvireco —ehi. Esáha, emombehu cheu, ¿uma evocoiyase osaisu catura mbia guarepochi mondosar? —ehi fariseo upe.

⁴³ —Cheu ndoyavíi guarepochi virocua catu vahe ichui —ehi Simón.

—Taa, supi eté aipo ere —ehi Simón upe:

⁴⁴ Evocoiyase omahe cuña rese aipo ehi Simón upe:

—¡Emahe co cuña rese! Aiqueso acoi nde rēta pipe, nde nderembouimi eté i che pisei água cheu; co cuña rumo güesai pipe oyosei che pi. Ipare omombiru oha aprí pipe ae no. ⁴⁵ Iyavei nde ndache rovarupitei eve; co cuña rumo, acoi nde rēta pipe che reique ramomiseve che pírupite voi eté.

⁴⁶ “Nde nderemondoi mbahe sīacua vahe che áca rese; co cuña rumo opa tupri voi oipichi mbahe sīacua vahe che pi rese. ⁴⁷ Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tupri vahe rumo, ahe ndoporoaisu tupri avei” ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoiyase ambuae ava ichohopri oguapi vahe yuvínoi aheve, ahe aipo ehi oyeupe yuvireco:

—¡Uma píha co mbia iñero vahe ité angaipa upe! —ehi.

⁵⁰ Jesús rumo aipo ehiño cuña upe:

—Nde yeroyasa pipe ereipisi písrosa. Sese eso tupriño eico —ehi.

8

Cuña oipítivi vahe Jesús yuvireco

¹ Ipare Jesús oguata opacatu tecua rupi, omombehu ñehesa aviye vahe Tūpa mborerecuasa resendar oico. Doce vahe apóstol supive yuvirecoi.

² Cuña avei yuviraso supi, ahe ombogüera vahecuer caruguar rerecosa sui imbaherasisa sui avei no. Ahe ipáhuve avei María secoi, Magdalena

serer yoapisa vahe, ahe ichui osē vahecuer siete tuprī caruguar; ³ iyavei Juana Cuza rembireco, ahe mbia Herodes mbahe rese fiangarecuar; Susana iyavei ambuae setá cuña oip̄itivii mbahe güembiereco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvinose tecua yacatu rupi pipe sui Jesús repia água yuvireco. Ipare oñemonuha guasuse yuvireco, ahese Jesús setá mbahe rese omboyoya-yoya oporombohe aipo ehi: ⁵ “Ñepei mbia osē omaheti oico. Ahe otiapí-apipiise mbahe rāhii oso, moviro oiti peri rupi. Ahe opa tēi oicambe yuvireco, iyavei vīrai opa tēi yuvirohu. ⁶ Iyavei moviro tēi oiti ivi nayanai vahesave ita pāhuve. Sese cūritei sorí; opaño rumo ipiru. Esepia niha, ivi nañaquii chupe. ⁷ Iyavei ambuae oiti yu pāhuve. Ipare oyoya tuprī sorí yuvireco; yu rumo opaño oyopi. ⁸ Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tuprī ité ñepei-peí mbahe miti sui osē” ehi.

Aipo ohe pare, Jesús oñeho pīratá iteanga aipo ehi: “¡Acoi ava osendu-cua pota vahe che ñehe, toyapisacaño sese!” ehi ava rehii upe.

¿Mahera pīha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi. ¹⁰ Evocoiyase omboyevi chupe: “Pēu Tūpa oicua uca ité mbahe ndicuasai vahe omborerecuasa resendar; ambuae ava rumo ambohe tēi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

Jesús omombehu tuprī yembohesa mbahe tīsa resendar

¹¹ “Co yembohesa resendar aipo oyapave aipo ehi: Mbahe rāhii ahe inungar Tūpa Ñehengagüer; ¹² iyavei mbahe rāhii peri rupi seitipri, ahe inungar acoi ava osendu tēi vahe Tūpa Ñehengagüer yuvireco oyapave. Ipare rumo ou vīrai chupe, ahe inungar caruguar ou vahe chupe opaño oyaracua mocafí Tūpa Ñehengagüer sui ‘toviroya eme iyavei toñepisiro eme yuvireco’ oyapave tēi. ¹³ Acoi mbahe rāhii seitipri ita mahugüer rupi, ahe inungar acoi ava osendu tēi vahe Tūpa Ñehengagüer yuvireco iyavei oipisi tuprī oviharetesa pipe yuvireco viña no. Ahe rumo inungar co mbahe miti ndovirecoi vahe guapo ovíracua água; viroya raimi tēi yuvireco. Oyepotase rumo mbahe tēi chupe, oyepepi voiño yuvireco ichui. ¹⁴ Acoi mbahe rāhii seitipri yu pāhu rupi, ahe inungar acoi osendu tēi vahe. Ipare rumo oyemboyepepi uca mbegüeño ambuae mbahe rese opichañemoñetá iteangasa pipe tēi, ombahe eta rese iyavei güemimbotarai mbahe tēi potasa pipe avei. Ëgüe ehi ahe ava inungar mbahe miti ndihai vahe ité. ¹⁵ Acoi mbahe rāhii seitipri rumo ivi aviye vahesave, ahe inungar ava vireco vahe opichañemoñetasava aviye vahe iyavei oyemoin-gatu voi Tūpa Ñehengagüer rese oyapisaca água yepi; viroya tuprī ité no; yuvirecoiño ité sese. Ëgüe ehise, oyapo mbahe aviye vahe yuvireco” ehi.

Yembohesa tataendi resendar

¹⁶ “Ndiyai eté ava upe guataendi omoendise omoha vahe que mbahe pipe, ‘Tamondo che rupavrīve’ ndehi eté chupe; osupiño ivate imoi opacatu oí pipe yuviroique vahe resape água. ¹⁷ Esepia, ndipoi eté mbahe

ñomipri, ndayasepiai vaherā curi. Iyavei yaposa vahe imombehupirēhi, icuasaño itera curi.

¹⁸“Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroja oyese, ichui serocuasaño itera” ehi oporombohe.

Jesús si, tivireta avei

¹⁹Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vaherā yuvireco ava rehii sui. ²⁰Oime rumo ambuae ava imombehusar chupe,

—Nde si, nde rivireta reseve nde repia pota tēi ocarve yuvireco —ehi chupe.

²¹Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che si, che rívrí yuvirecoi —ehiño Jesús chupe.

Jesús omombihu i ohitu vahe, ivitu ai reseve

²²Ñepei ari Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoiyase ahe yuviraso. ²³Yuviroguata viteseve, oqueño Jesús ou. Ahese ipa pipe aviyeteramo tēi ivitu ai omboha guasu-guasu carite pipe i, omondo pota ité ipive viña. ²⁴Evocoiyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pīrata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri. ²⁵Evocoiyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyeño, ndoyembovhaiño iyavei oporandu-randu tēi oyeupe yuvireco:

—¡Mara ehi vahe pīha co mbia! Esepia niha, ivitu ai, para guasu avei omboyeroja —ehi tēi oyeupe yuvireco.

Mbia Gerasa iguar vireco vahe caruguar oyese

²⁶Coije oyepota yuviraso Gerasa ivi rese cute, ahe ambuae ipa coti ivi Galilea rovai. ²⁷⁻²⁹Aheve mbia tecua iguar caruguar vireco vahe secoi. Aracahe suive nani tupri ité secoi iyavei ndopitai vahe ité oí pipe yepi; égue ehi rumo ahe tehögüer ruvípa rupindar tēi secoi. Setá rupi caruguar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme caruguar’ oyapave yuvireco chupe viña, ahe rumo ombosando-sandoño ité iyavei caruguar omoñemi ucaño ava poréhisa rupi sereco. Evocoiyase Jesús osëse carite pipe sui, osovaichi ahe mbia. Sepiase rumo, ahe mbia oñenopiha voi oso sovai oñehe pīrata chupe:

—¡Eyepepi che sui, Jesús, Tūpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai caruguar sereco ‘tosé ichui’ oyapave.

³⁰—¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri caruguar yuviroique yaviterve. ³¹⁻³²Oimese rumo cuchi setá ocaru vahe ivitri ruambesave, caruguar

evocoiyase oporandu chupe aipo ehi: “Toroiqueñomi tēi co cuchi aviterve” ehi yuvireco chupe ‘tayande mondo eme cañi tēisa apirēhi vahe pīpe’ oyapave viña. “Peiqueño sese” ehi caruguar upe.³³ Ahese opa yuvinose mbia sui yuviroique cuchi aviterve cute. Aheseve voi cuchi opa yuvinoña yuviraso ivivate sui ipa pīpe. Aheve ipive opa tēi eté ocañi yuvireco.

³⁴ Cuchi rārosar osepiase ahe mbahe yuvireco, opa yuvinoña yuviraso co mbahe mombehu tecua pīpe ava upe, cove rupi avei no.³⁵ Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osephia ahe mbia caruguar rerecosarer oguapi oñipíimi, oyemonde tupri, yaracua tupri avei oico. Ahese oyembosiquiye tēi yuvireco.³⁶ Acoi ava osephia vahecuer, ahe opa mbahe omombehu yuvireco co mbia caruguar rerecosar cuera agüer.³⁷ Ahese opacatu ava Gerasa pendar, yivirindar avei Jesús upe, “Esiri cohavé sui” ehi yuvireco. Esephia niha, osiquiyé iteanga yuvireco ichui. Evocoiyase oha carite pīpe. Ipare osoño.³⁸ Yipindar rumo evocoi mbia caruguar vireco vahecuer, “Tasomi tēi nde rupi” ehi viña. Ahe rumo, “Epitaño” ehi.

³⁹ —Eyevi nde rētave, emombehupa opacatu mbahe Tūpa oyapo vahecuer nde rese —ehi.

Ahe mbia evocoiyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰ Oyevise Jesús ipa rovai oso, aheve ava rehii oviharetesa pīpe oipisi tupri yuvireco. Esephia niha, ava opacatu ité osaro yuvireco.⁴¹ Ahese Jairo serer vahe oyepota oso Jesús upe, evocoi judío tūparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tēi che rētave che rayri mbogüera’ oyapave.⁴² Esephia niha, vireco guayri ñepeimi vahe ité, doce aravíter vireco vahe. Ahe omano potami eté ou.

Osose Jairo rētave, aheve peri rupi ava rehii yuvirasoño supi; oyemboti tupri ité yuvireco.⁴³ Ahe ipāhu rupi oime cuña doce aravíter rupi suvi yepiyere-yere vahe. Opa-opa tēi omondo ombahe ocuera água repirā yepi; ndocuerai eté rumo.⁴⁴ Ahe cuña evocoiyase oyemboya oso saquicuei coti opoco iturucuar popi rese. Ipare ahe pīpeve voi opituhu suvi ichui.⁴⁵ Evocoiyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoiyase aipo ehi chupe:

—Porombohesar, ava rehii mo oyemboya nde rese iyavei nde moañi-añi yuvireco opacatu rupi —ehi.

⁴⁶ —Che rumo aicua oime ava opoco vahe che turucuar rese. Esephia, ayandu che pīratasa osēse che sui —ehi Pedro upe.

⁴⁷ Ahe cuña ndoicatui oñemi. Sese oririi oñenopiha sovai. Oyemombehu chupe opacatu ava rovaque: “Che apoco nde turucuar rese. Esephia, ‘Acuera tuprira apocese iturucuar rese’ ahe ndeu” ehi.⁴⁸ Ahese aipo ehi cuña upe:

—Che rayri, erecuera tupri ité. Esephia niha, che rese ereyeroya ité. Sese eso tupriño —ehi cuña upe.

⁴⁹ Jesús ñehe viteseve, ahese oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar—ehiño Jairo upe.

⁵⁰ Evocoiyase iñehe renduse aipo ehi Jairo upe:

—Aní eresiquiye; nde che rese yero yasa pipe ité nde rayri ocuerayevira —ehi.

⁵¹ Oye potase Jairo rētave oso, aheve ndomoingue uca potai eté ava oye upi. Pedro, Santiago, Juan iyavei cuñatai yesupa upeño oipota seique água. ⁵² Aheseve opacatu ava oyaseho ati, ndoyemboviha tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

⁵³ Ava rumo opuca ete-eteño seroyaëhisave yuvireco. Esepiña niha, ahe oicua ité imanose yuvireco viña. ⁵⁴ Evocoiyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

⁵⁵ Ahe evocoiyase oñarapuha voi eté ocuerayevi. Ipare Jesús, “Pembo-caru” ehi iyesupa upe. ⁵⁶ Iyesupa evocoiyase, “¿Mara ehi rutei pīha co?” ehi tēi yuvireco chupe. Jesús rumo omombehu chupe: “Ndapemombe-hui chietera que ñepei ava upe” ehi.

9

Jesús doce güemimbohe omundo Vu Tūpa mbororecuasa resendar mombehu água

¹ Jesús opa omonuha güemimbohe doce vahe oyeupe. Ipare omundo opíratasa opacatu upe caruguuar ambuae—ae tēi vahe imboyepepi água ava sui iyavei ava mbogüera água imbaherasisa sui. ² Opa omundo Vu Tūpa mbororecuasa resendar mombehu água, ava imbaheasi vahe mbogüera água avei. ³ Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe ríru, tembihu, que guarePOCHI avei no. Perasora rumo ñepei güeraño pe turucuar; ndahei chira ñuvirío peraso. ⁴ Pepitami ranera ñepei oi pipe güeraño tecua yacatu peico. ⁵ Acói ava ndape moingue uca potaise güëta pipe yuvireco, peyepepiñora ichui iyavei peipipetera pe pi sui ivi cuhi ‘toicua Tūpa ñemoirosa oyeupendar yuvireco’ pe hesave —ehi güemimbohe eta mundo.

⁶ Evocoiyase opa yuvinose yuviraso, iyavei oñemosai opacatu tecua rupi omombehu Tūpa Ñehengagüer písirosa resendar yuvireco iyavei om-bogüera-güera ité ava imbaherasisa sui opacatu oguatasa rupi yuvireco.

Herodes, “¿Mara ehi pīha?” ehi Jesús upe

⁷ Co mbororecuuar guasu Herodes oyandu opacatu mbahe Jesús rembiapo. Evocoiyase, “¿Mara ahera pīha?” ehi tēi. Esepiña niha, aipo, “Juan ocuerayevi” ehi yuvireco chupe. ⁸ Ambuae aipo ehi: “Tūpa ñehe mombehusar Elías, ahe tēi oñemoporéhi iri” ehi yuvireco. Ambuae aipo ehi: “Que ñepei Tūpa ñehe mombehusar aracahendar revo, ahe tēi ocuerayevi” ehi yuvireco viña. ⁹ Herodes rumo aipo ehi:

—Che niha ayasia uca Juan ãca —ehi—. ¿Uma reräcua pīha evocoiyase ayandu? —ehi tēi.

Sese Herodes osepiña pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepepi ava rehii sui, viraso ivi iporupirēhisave tecua Betsaida cotive. ¹¹ Ahe ava rehii rumo oyanduse yuvireco, yuvirasoño saquicuei. Evocoiyase, “Perioño” ehi chupe. Ipare oñeho Vu Tūpa mborererecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepia niha, cohabe ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviríomi tēi avei pira, toroso ayase co ava opacatu remihura rerocua —ehi yuvireco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ëgue ehi semimbohe yuvireco chupe. Ipare oguapi opacatu ava yuvireco. ¹⁶ Evocoiyase oipisi poyandepo pan iyavei ñuvirío pira. Ipare omahe ivi rese, “Aviye ndeu, che Ru” ehi. Imbohimbohi pare, opa omondo güemimbohe upe ava rehii upe imondo água yuvireco. ¹⁷ Evocoiyase opacatu ava ocaru vahe ihitaropa tēi yuvireco. Ipare semimbohe omboapipopla doce tupri iruova sembihu rumbirer yuvireco.

Pedro, “Jesús, Tūpa Rembiporavo Poropísiosar secoi” ehi

¹⁸ Ñepei ari pipe Jesús oyeroqui ahe ae güemimbohe pāhuve. Ahese oporandu güemimbohe upe:

—¿Mara ehi vo ava oñeho yuvireco che rese? —ehi.

¹⁹ —Amove ava, “Juan Oporoāpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tūpa ñehe mombehusar aracahendar ocuerayevi” ehi yuvireco ndeu —ehi.

²⁰ Evocoiyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tūpa Rembiporavo Poropísiosar ereico —ehi Pedro imboyevi chupe.

Jesús omombehu omano áqua

²¹ Ahe rumo aipo ehi güemimbohe eta upe: “Pemombehui rene Tūpa Rembiporavo che recosa ava upe” ehi. ²² Iyavei aipo ehi chupe:

—Che, Ava Riquehir, che paraisu itera, iyavei opacatu judío rerecureta, pahi rerecuuar ivate catu vahe iyavei Moisés porocuaita rese oporombohe vahe remiamotaréhi aicora. Ahe avei che yuca ucara yuvireco; mbosapi ari rupi rumo acuerayevira —ehi.

²³ Ipare aipo ehi opacatu upe:

—Acoi oguata pota vahe che rupi, topoi mbahe güemimbotar tēi aposa sui iyavei inungar-ra curusu rese ovosiira viña, toyemoingatu voi che recocuer rese oparaísu áqua ari yacatu rupi iyavei toguata tupri che

rupi. ²⁴ Esepiá, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisirora. ²⁵ Esepiá, ¿avíye ai angahu pīha ava upe opacatu mbahe co ivi pipendar pisí ãgua tēi, ahe ae tēi omocañise güecocuer yuvireco viña? ²⁶ Esepiá, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ēgue ahera ichui acoi ayevise che reco pīratasa pipe, che Ru reco pīrata porañetesa pipe avei sembiguai rehii iva pendar maranehi reseve curi. ²⁷ Supi eté, oimera amove coháve ava nomano vitéi chivaherā, osepiá rane itera ouse Tūpa mborerecuasa yuvireco curi —ehi.

Jesús ñecuñaro agüer

²⁸ Ocho ari pare Jesús oyeupi ivitri rese oso oyerure ãgua. Pedro, Santiago iyavei Juan ahe víraso oyeupi. ²⁹ Oyerure viteseve, oñecuñaro sepiaca. Iturucuar evocoiyase sendi, morochí eteanga. ³⁰ Ahese ñuvirío ava oyemboyecua yivii imoñeta yuvinoha. Evocoi ava yuvirecoi vahe ahe Moisés, Elías avei. ³¹ Oyere tupri sendigüer iporañetesa yuvireco sese, iyavei co ñuvirío mbia oñeho imano ãgua rese yuvireco chupe: “Nde niha ereyemomborara nde mano ãgua Jerusalén pipe eico” ehi yuvireco chupe. ³² Yepe Pedro, ondugüer reseve sopesí eteanga yuvireco viña. Aviyeteramo tēi opa sopesí yuvireco ichui. Ahese osepiá Jesús porañetesa yuvireco iyavei co ñuvirío mbia yuvinoha vahe yivii no. ³³ Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, ¡avíye ai eté coháve yaico! Toroyapo mbosapi teypami: ñepei ndeu nara, ambuae Moisés upe, ambuae evocoiyase Elías upe nara —ehi.

Pedro rumo ndoicuai eté aipo ohesa. ³⁴ Iyavei iñehe viteseve, aviyeteramo tēi iporéhi iva quiha, oyopipa tupri ité. Evocoiyase osiquiye tēi yuvireco. ³⁵ Ipähuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu iñehe rese” ehi.

³⁶ Opase osendu co ñehesa yuvireco, ahese osepiá Jesús, ahe ae ihäise yuvireco. Semimbohe rumo oyeupe tēi ovireco yuvireco; ndomombehu vitéi eté ava upe mbahe osepiá vahecuer yuvireco.

Jesús ombogüera chihivahé caruguar rerecosar

³⁷ Ahere ayihive, ogüeyise ivitri sui yuvireco, setá ava oyugüero Jesús rovaichi yuvireco. ³⁸ Ahese mbia ava pähuve aipo ehi pīrata voi eté:

—Porombohesar, ereyapomira mbahe icatupri vahe cheu viña. Es epia, che rahir ñepeimí vahe ité; ³⁹ caruguar rumo opoco sese, omoase pucu-pucu uca yepi iyavei omoeõha-õha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui. ⁴⁰ Amombehu tēi niha nde remimbohe upe ‘tomboyepepími tēi caruguar ichui’ che yapave viña; nomboyepepíi eté rumo ichui yuvireco —ehi.

⁴¹ Ahe omboyevi:

—¡Too, ndapeyeroya tupri vitéi eté che rese, co coti tēi vite pe pihañemoñetas! ¿Mboví rupi rutei vo aico vitera pe pähuve che ñemosasa pipe? Eru nde rahir coháve cheu —ehi ahe mbia upe.

⁴² Chihivahé oyemboyase rumo sese, caruguar ombovíapi voi imondo ivive, imoeõha iri. Jesús rumo oñeho pīrata caruguar upe imose ãgua chihivahé sui. Ahese chihivahé ocuera tupri ité. Ipare omboyevi tu upe.

⁴³ Ahese opacatu ava, “¡Mara ehi rutei!” ehi tēi yuvireco Tūpa pīratasa rembiapo aviye vahe repiase.

Jesús omombehu iri omano água

Opacatu ava ndoyembovihai viteseve yuvireco, ahese aipo ehi güemimbohe upe:

⁴⁴ —Pesendu tupri che ñehe; peresarai eme ichui: che, Ava Riquehir, imondoprí aicora che amotaréhímbar povrīve —ehi.

⁴⁵ Semimbohe rumo ndosenducuai eté oyeupe ñehesa yuvireco. Esepi niha, Tūpa ndoiptai eté senducua água chupe; osiquiye chupe oporandu água yuvireco yepi.

¿Ava vo seco ivate catu vahe?

⁴⁶ Coiye semimbohe eta omboipi oyecopi-copi yuvireco ‘¿ava ité pīha ivate catu vaherā curi?’ oyapave. ⁴⁷ Jesú rumo oicuaño ipihañemoñetas yuvireco. Evocoiyase oipisi chihivahemi seru oipive imoha. ⁴⁸ Ipare aipo ehi güemimbohe eta upe:

—Acoi ava oipisi vahe co chihivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepi, acoi ava seco mbegüemi catu vahe pe pāhu pendar, ahe aviye catu vahe —ehi.

Acoi yande mboyoyasar; ahe ndahei yande amotaréhisar

⁴⁹ Evocoiyase Juan aipo ehi chupe:

—Ore mbohesar, orosepi niha mbia ombogüera vahe caruguar pīratasa sui ava nde rer pipe oico; ore rumo ndoroipotai chupe evocoiya seco água. Esepi niha, ndahei yande rupindar secoi —ehi.

⁵⁰ Jesú rumo,

—¡Aní ndapeipotai chupe! —ehi—. Esepi niha, evoco nungar ava ndahei yande amotaréhisar; ahe rumo yande mboyoyasar —ehi güemimbohe eta upe.

Jesús oñehengata Santiago upe, Juan upe avei

⁵¹ Virovíse rumo arí ivave Jesú so água, ahese ahe aipo ehi: “Yaso ru Jerusalén ve cūritei” ehi. ⁵² Evocoiyase omondo ava güenorera. Ahe yuviraso tecua Samaria ivi rupi ipituhu água moingatu viña; ⁵³ Samaria iguar rumo nomoingue potai eté güetave yuvireco. Esepi, oicua Jerusalén ve ichose yuvireco. ⁵⁴ Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata íva sui co ava mocañi água —ehi yuvireco chupe viña.

⁵⁵ “¡Aní!” ehi oyemboyere chupe. ⁵⁶ Ipare yuviraso ambuae tecuave.

Oguata pota vahe Jesú rupi

⁵⁷ Yuvirasose peri rupi aipo ehi mbia Jesú upe:

—Che Yar, che nde rupi aso pota opacatu nde guatasa rupi —ehi.

⁵⁸ Ahe rumo aipo ehi:

—Aguara vireco güetara, vírai avei vireco guaiti; che rumo, Ava Riquehir, ndarecoi que che rēta che pituhu água —ehi chupe.

⁵⁹ Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

⁶⁰—Aní—ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tūpa mborerecuasa resendar ava upe—ehi.

⁶¹ Evocoiyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rētave mbahe moingatu che so ãgua—ehi.

⁶² —¡Aní!—ehi ahe mbia upe—. Esepiá, inungar acoi oipisi vahe ivi mboyeresa imohiví tupri ãgua, omahese rumo guaquicuei cotí, evocoí nungar naporai Tūpa mborerecuasave yuviroique vaherā—ehi.

10

Jesús oyocuái setenta y dos tupri güemimbohe

¹ Ipare yande Yar oiporavo setenta y dos ava ñepei-peí tecua rupi ñuvirío-rio güenonera.

² Yipindar rumo aipo ehi: “Supi eté mbahe imonuhapirā setá iteanga; sese oporavíqui vahe rumo moviromi tēi. Sese peporandu mbahe mití Yar upe, tombou ava imonuha ãgua” ehi. ³ “Peso, opomondo ovesami nungar ava mbahe mimba oñaro vahe nungar pâhuve. ⁴ Perasoi rene mbahe ríru iyavei guarepochi siru reseve. Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi. ⁵ Acoi peiques que oí pipe, yipindar rumo peyapo ranera: ‘Avirave. Tūpa tape rovasa’ peyera. ⁶ Acoi aheve oimese ava aviye vahe, ahe oipisira Tūpa porovasasa; anise evocoiyase ndipoi chira porovasasa chupe nara. ⁷ Acoi pe pisise, aheve ité pepitañora; pecarura iyavei peihura ahe sembiereco. Esepiá, ava poravíquise imboepisa chupe. Sese ndapeguatai chira ambuae ava rēta rupi-rupi tēi. Ñepei oí pipe güeraño pepitañora. ⁸ Acoi que tecuave peyepotase, ahe pendar pe repia potaño yuvireco, acoi ahe ombose mbahe yuvireco tapehu, pehuñora ichui. ⁹ Ahe pendar imbaheasi vahe evocoiyase pemboguerara, iyavei aipo peyera chupe: ‘Tūpa mborerecuasa namombriimi pe sui’ peyera. ¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera: ¹¹ ‘¡Co pe recua pipendar ivi chimborer oya vahe ore pi rese oroipipete oreyesui, peicua catu, ore hesa pipe. Peicua tupri rumo Tūpa mborerecuasa namombriimi pe sui’ peyera chupe. ¹² Supi eté acoi ari cañi oyepotase, oimera Tūpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

Opacatu tecua ndiporeroysi vahe

¹³ “¡Peparaísu ava tecua Corazín pendar, pe avei peparaísu tecua Bet-saida pendar! Esepiá, acoi poromondiisa pe pâhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharéhisa resendar, tanimbu avei omondora oâca rese oangaipa mboasisa pipe yuvireco viña no. ¹⁴ Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye. ¹⁵ Pe avei no tecua Capernaum pendar, ¡pemoha co ivave pe reco ãgua viña! ¡Pe mombosapara rumo ivicuar ipicucu catu vahesave!

¹⁶ “Acoi ava oyapisaca vahe pe ñehe rese yuvireco, ahe evocoiyase oyapisaca avei che ñehe rese. Iyavei acoi ava pe mboyepepiño vahe oyesui, ahe evocoiyase che avei che mboyepepi oyesui yuvireco. Acoi

ava rumo che mboyepipiño vahe oyesui, ahe evocoiyase che mbousar avei omboyepipiño oyesui” ehi güemimbohe upe.

Oyevipa iri ava setenta y dos vahe

¹⁷ Oyevipase ava setenta y dos vahe, oviharetetesave aipo ehi yuvireco chupe:

—¡Ore Yar, caruguar avei eté niha ore mboyeroya eteprí yuvireco nde rer pipe! —ehi.

¹⁸ Evocoiyase aipo ehi güemimbohe eta upe:

—Taa, asepio ité niha caruguar rerecuar ovíapise iva sui overa vahe nungar. ¹⁹ Che niha amondo píratasa pēu peguata vaherā mboi iyavei mbahe rumbiquíape hari rupi opacatu pe amotarēhisar píratasa reroyí água, que mbahe pe momaraéhi água avei. ²⁰ Peyembovharetei rene caruguarella pe mboyeroyase. Iya rumo peyemboviha pe rer iva pendar icuachiapri rese —ehi güemimbohe eta upe.

Jesús oviharete

²¹ Ahe pipeve voi Jesús, Espíritu Santo rese, vorívetesa pipe aipo ehi: “Che Ru, che oromboetei. Nde niha iva Yar, ivi Yar avei no. Esepio niha, ereñomi co mbahe ava oyesui tēi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tuprii vahe upe nde rese oyeroyase. Ahe niha ereipota ité, che Ru” ehi.

²² “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tuprii vahe yuvireco no; che güeraño ité aicua. Iyavei acoi que ava upe aicua uca potase, aicua uca tuprii aveira” ehi ava eta upe.

²³ Evocoiyase omahe güemimbohe eta rese, chupe güeraño aipo ehi: “Perorívete catu co mbahe pesepia vahe rese. ²⁴ Esepio niha, setá eteprí ava Tūpa ñiehe mombehusar yuvirecoi vahe iyavei mborerecuar guasu eta aracahendar osepio pota tēi mbahe pe rembiepia; ndosepiai eté rumo yuvireco. Osedu pota tēi co pe remiendo yuvireco; ahe rumo ndosendui avei yuvireco” ehi güemimbohe upe.

Jesús porombohesa Samaria iguar recocuer sui

²⁵ Iyavei no Tūpa porocuaita rese oporombohe vahe oso Jesús upe secoáha água, mbahe rese oporandu:

—Porombohesar, ¿mara ahera vo vichico teco apiréhi vahe rereco água? —ehi chupe.

²⁶ Ahe omboyevi:

—¿Mara ehi vo Moisés porocuaita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

²⁷ Evocoiyase oporombohe vahe omboyevi:

—“Eresaisura nde Yar Tūpa opacatu nde pihá pipe, opacatu nde recocuer pipe, opacatu nde píratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuaita —ehi chupe.

²⁸ —Supi eté —ehi—. Eremboyevi tuprii ndeyeupe porandusa cheu. Eremboaviyese evocoi, ahese ererecora tecovesa apiréhi vahe —ehi co mbia upe.

²⁹ Co mbia rumo oyeeipi pota. Sese aipo ehi chupe:

—¿Ava vo aipo che cotindar secoi? —ehi.

³⁰ Evocoiyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvinose ava ndipihai vahe yuvireco chupe. Ahe virocuapa imbahe yuvireco ichui, iturucuar opacatu reseve; iyavei yuvirocua-rocua yuvireco sese. Ipare oyuca seni seja peri rupi yuviraso. ³¹ Ahese judío pahi ou ahe peri rupi. Evoco mbia repiase rumo, co cotí rupi oñacuasaño oso. ³² Ëgue ehi tupri avei ambuae mbia pahi pítiviisar levita, osepiase, oñacuasa tupriño avei oso no. ³³ Ipare rumo mbia sepia potapiréhi Samaria iguar oso ahe peri rupi avei. Ahe osepiase, oiparaisuereco. ³⁴ Evocoiyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, viraso ava quesave. Aheve ihañeco sese. ³⁵ Ahere ayihive Samaria iguar osose, omondo guarePOCHI ahe pendar oíyar upe. Ipare aipo ehi chupe: “Esáro tuprímí tēi co ava cheu. Acoi ndehañeco catuse sese, amboepi catu irira che yevisé nde” ehi sēta vahe upe. ³⁶ Indó, ¿uma vo co evocoiyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoiyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuaita rese oporombohe vahe upe.

Jesús oso Marta iyavei María rētave

³⁸ Ipare Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güeta pipe. ³⁹ Icupiñir evocoiyase María serer. Ahe oguapi Jesús pive ifehe rendu oí. ⁴⁰ Marta rumo oyembopihavíracua opacatu mbahe rese oico. Ipare oyemboya oso Jesús rese oipihavíracuasa pipe aipo ehi chupe:

—Che Yar, ¿aviye ai vo evocoí che cupiñir chini tēi nde piri che poraviqui viteseve? Emombehu chupe, tou, tache pítivii rane —ehi chupe.

⁴¹ Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo áqua eico? ⁴² Iya rumo ñepei mbahe yaposa. Co nde cupiñir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaherā ichui —ehi Jesús Marta upe.

11

Jesús ombohe güemimbohe eta yerure áqua rese

¹ Ñepei ari Jesúsoyerure. Iyerure pare semimbohe aipo ehi chupe:

—Ore Yar, ore mbohemí tēi ore yerure áqua rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera:

‘Ore Ru Túpa, ivave ereico vahe, imboeteipri nde rer tasecoi.

Tou nde mborerecuasa oreu.

Tayaposa nde remimbotar co ívi pipe, iva pendar nungar.

³ Embou ore rembihu ari yacatundar oreu.

⁴ Iyavei ndeñero ore angaipa rese oreu.

Esepia niha, ore oreñero opacatu ore amotaréhimbár upe.

Ore mboangaipa ucai rene eve, ore renose catu mbahe tēi sui eve’ peyera —ehi

⁵ Iyavei aipo ehi no:

—Inungar co perecora pe mboripar viña. Ipare pesora ahe sētave pītu mbiter rupi aipo peyera chupe: ‘Che mboripar, emboumi tēi mbosapi pan cheu tamboyevire ndeu. ⁶ Esephia, ambuae che mboripar oyepota ou che rētave; ndarecoi eté rumo mbahe amondomi vaherā chupe’ peyera chupe. ⁷ Ipare ahe, ‘Che mañeco tēi rene eve. Esephia, opa ayoquenda, iyavei co che rahir opa aropituhu seru. Sese ndiyai apūha mbahe mundo ndeu’ ehiñora pēu viña. ⁸ Supi eté, yepe nopolai chietera mbahe mundo pēu pe mboripar secose viña, opūhaño itera rumo ‘tache mañeco iri eme’ oyapave. Ipare omondoño itera opacatu mbahe pe porandusa pēu. ⁹ Sese aipo ahe pēu: Peporandura mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera peyeroquisa pipe Tūpa upe, ahese imboisara mbahe mbou âgua pēu. ¹⁰ Esephia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeroquisa pipe omota vahe oquenda Tūpa upe, chupe imboisara.

¹¹ “Oimese tahí vahe pe pāhuve, tahir oporanduse pira rese vu upe, ¿omondora pīha mboi tēi guahir upe viña? ¹² anise, ¿omondora pīha oporanduse mbahe rupiha rese, mbahe rumbiquiāpe tēi chupe viña? ¹³ ¡Aní! Esephia, pe yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru íva pendar omondo catura Espíritu Santo acoi ava oyeupe porandusar upe!” ehi güemimbohe eta upe.

“Jesús vireco caruguar pīratasa oyese” ehi tupri tēi ava yuvireco

¹⁴ Ambuae ari pipe, Jesús osephia mbia caruguar nomoñehengatui vahe. Evocoiyase omose caruguar ichui. Ahesevoi iñehengatu. Ipare ava rehii sepiase, ndoyembovihi tēi yuvireco. ¹⁵ Amove rumo ava aipo ehi tēi yuvireco: “Beelzebú, caruguar rerecuar pīratasa pipe revo omboyepepi caruguar oico” ehi tēi yuvireco chupe.

¹⁶ Ambuae ava secoāhasa pipe oporandu yuvireco chupe: “Eyapo ru mbahe nde rembiapo íva pendar nde recocuer cua âgua” ehi tēi. ¹⁷ Ahe rumo oicuaño ipihañemoñetasa. Evocoiyase aipo ehi chupe:

“Que mborerecuar guasu povri pendar ovava-vavase oyeupe oyeamotarēhisave yuvireco, ahese evoco mborerecuar pīratasa ocañi tēira. Iyavei ava omu rese ae oyeamotarēhi vahe, oyemocañi aveira yuvireco no. ¹⁸ Ēgüe ehi avei niha caruguar. Esephia, sererucar omboyepepise opovri pendar, ovavara oyeupe yuvireco viña. Ahese oyemocañi tēira yuvireco. Co ñehesa aipo ahe pēu. Esephia pe, ‘Beelzebú pīratasa pipe tēi opa omose caruguar ava sui oico’ peye tēi cheu. ¹⁹ Ēgüe ahese rumo viña, ¿ava pīratasa pipe ru evocoiyase pe voya omboyepepi caruguar ava sui? Pe voya ae omboyeecuara pe ñehe pe rembiavi yuvireco pēu. ²⁰ Che rumo Tūpa pīratasa pipe caruguar amboyepepi ava sui. Sese cūritei Tūpa mborerecuasa oyepota ité pēu.

²¹ “Inungar oime ava ipīrata etepri vahe, iyavei vireco oyeroyasa. Ipipe osāro güëta opacatu mbahe ipipendar avei icañiēhi âgua. ²² Acoi ouse rumo ambuae ipīrata catu vahe chupe, ahe osecoreroyise, opa virocua iyeroyasa ichui. Evocoiyase güembierocua ahe opa viraso oyeupe.

²³ “Acoi ava ndache mboyoyai vahe, ahe che amotarēhimbar yuvirecoi; iyavei acoi ava ndosecai vahe ava cheu, ahe omosai tēi yuvireco che sui” ehi.

Caruguar oyevi iri güeco agüerve

²⁴ “Acoi osēse caruguar ava sui, oguata tēi ivi ipiru vahe rupi opituhu äqua reca. Ipare rumo ndoyosuise, ipihañemoñeta oyeupe, ‘Ayevi irira che reco agüerve vicho’ ehi. ²⁵ Aheve oyevise, osepia iri secocuer inungar oi sahuvapri tupri. ²⁶ Sepiase, oso siete caruguar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui” ehi Jesús ava rehii upe.

Tūpa Ñehengagüer viroya vahe sovasaprí secoira

²⁷ Oñehe viteseve aipo mbahe rese, cuña ava rehii pāhu pendar oñehe pírata aipo ehi:

—¡Evocoí mbia sui ereha vahe iyavei nde mboacua vahe, ahe sovasaprí tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tūpa Ñehengagüer iyavei viroya vahe ité, ahe sovasaprí secoira che Ru Tūpa rovaque! —ehi ahe cuña upe.

Ava eta ndaseco pōrai vahe oporandu poromondiisa rese yuvireco

²⁹ Ava rehii oyere ati vitese Jesús rese yuvireco, ahe aipo ehi: “Pe cūriteindar ava ndaseco pōrai vahe, peporandu tēi poromondiisa che recocuer cua äqua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara.

³⁰ Inungar Jonás poromondiisa secoi ava Nínive pendar upe, ägüe ehi aveira niha Ava Riquehir reco pipe oimera poromondiisa ava cūriteindar upe. ³¹ Acoi ari cañi pipe cuña mborerecuar guasu irohi coti secua vahe porandusave omombehura co ava cūriteindar cañipa äqua. Esepio, ahe ou amombri ivi sui Salomón mbahecuada rendu äqua; cūritei rumo oime ivate catu vahe cohaye Salomón sui. ³² Iyavei ari cañi pipe ava tecua Nínive pendar porandusave omombehura ava cūriteindar cañipa äqua. Esepio niha, omboasise oangaipa, oyevi Tūpa upe yuvireco Jonás omombehuse Tūpa Ñehengagüer chupe; cūritei rumo oime ivate catu vahe Jonás sui pe pāhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondoi chiaeira que mbahevriye. Iyacatu rumo yamondora ivate tataendi rendave ‘tosesape opacatu ava oique vahe oí pipe’ yande yapave. ³⁴ Iyavei pe resa inungar tataendi pe retecuer upe. Esepio, aviyese pe resa, opacatu pe retecuer upe osesape. Acoi imarase rumo, pe retecuer pítumimbi vahe nungar tēi. ³⁵ Sese peicua catu co poroesapesa pereco vahe, tape rereco eme pítumimbi vahe nungar. ³⁶ Co supi eté vahe osesape tuprise opacatu pe pihave, ndipoise que pítumimbisa nungar mbahe ipipe, evocoiyase ahe inungar tataendi osesape vahe opacatu pe recocuer pipe. Ahese ndipoi que pítu vahe pēu” ehi.

Jesús omombehu fariseo iyavei Moisés porocuaita rese oporombohe vahe recocuerai

³⁷ Opase oñehe Jesús, fariseo viraso güetave imbocaru. Oiquesse sētave oso, oguapi mesave oí. ³⁸ Ocaru renondeve ndoyepoise rumo, ahese

fariseo ndoyembovihai tēi nomboaviyeise judío porocuaita.³⁹ Ahe rumo aipo ehi fariseo upe:

—Inungar igua riru iyavei tembihu riru icupe rupi tēi yoseipri, ipipe rumo iquīha opitaño ité, ēgue ehi tupri avei pe recocuer pe monda raisave mbahe-mbahe tēi pe reco pipe.⁴⁰ ¡Pe ndayaracuai vahe peico! ¿Ndapeicuai vo pe rete aposar, pe piha aposar avei?⁴¹ Sese pemondo porerecosa ava iparaisu vahe upe pe recatehiēhisa pipe. Evocoiyase ipipe sui opacatu imoatirombri peicora.

⁴² “¡Peparaisu pe fariseo! Esepia, yepe pe remiti sui pemondo peyacatu ñepei-peí diez vahe sui Tūpa upe viña, pe rumo ndaperoyai teco ívisa iyavei peseyaoño tēi Tūpa poroaísusa. Iyacatu rumo peyapora evocoí mbahe pe porerecosa sui pe poiēhisa pipe viña.

⁴³ “¡Peparaisu pe fariseo! Esepia, peipota pe renda porañete catu vahe pe guapi ãqua tūparo pipe, iyavei peipota pēu opacatu ‘avirave’ oyapora ava pe mboeteisave ocar rupi yuvireco.

⁴⁴ “¡Peparaisu! Esepia, pe recocuerai inungar tehōgür ruvipa icuaēhise ava oguata ihari rupi yuvireco” ehi chupe.

⁴⁵ Evocoiyase Moisés porocuaita rese oporombohe vahe,

—Porombohesar —ehi—, aipo eremombahu vahe pipe niha ava ore amotarēhīño yuvireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuaita rese oporombohe vahe! Esepia, pemondo porocuaita yavai vahe ava upe; pe rumo evocoiyase ndapeipitiviimi eté ahe ava imboaviye ãqua rese yuvireco.

⁴⁷ “¡Peparaisu! Esepia, pemoingatu Tūpa ñehe mombehusar ruvipagüer peico Tūpa mboeteisa angahu pipe tēi. Pe ramoi teiteté rumo oyuca yuvireco.⁴⁸ Evocoiyase pemboyecua co pe ramoi eta piñañemoñeta agüer secocuer moña pipe peico. Esepia, ahe oyuca Tūpa ñehe mombehusar yuvireco. Pe evocoiyase cûritei pemoingatu vite suvipagüer peico.

⁴⁹ “Sese Tūpa ombahecusa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipāhu pendar oyucara yuvireco. Iyavei ambuae mara-mara tēi virecora yuvireco’ ehi.⁵⁰ Esepia, ava ndiporeroyai vahe cûriteindar upe ité omondora oñemoírosa opacatu oñehe mombehusar yucagüer rese aracahe suive, cûriteindar avei oyucase yuvireco.⁵¹ Abel yuca agüer suive oyepotara Zacarías yuca agüerve oso. Ahe oyuca tūparo maranehi rocar mbahe reropovēhesa rovai. Supi eté aipo ahe pēu: Tūpa opara omondo oñemoírosa ahe yuca agüer rese ava ndiporeroyai vahe cûriteindar upe curi.

⁵² “¡Peparaisu pe Moisés porocuaita rese oporombohe tēi vahe! Esepia, pe mbahecusa avíye soquendapri pereco ava sui. Pe niha ndaperoyai, iyavei ambuae ava upe ndapeipotai seroya ãqua” ehi chupe.

⁵³ Ipare Jesús osē oso ichui. Ahese Moisés porocuaita rese oporombohe vahe iyavei fariseo eta oñemoíró iteanga yuvireco sese. Ahe omañeco tēi, oporandu-randu mbahe rese yuvireco chupe,⁵⁴ osecoâha-âha tēi mbahe pipe ‘toyaví angahu oñehe yandeu’ ohesa pipe yuvireco.

12

¹ Ahe pipeve avei ava oñemonuha atí iteanga oyemboti tupri oyemombo guasu-guasu yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepi, ahe ndoyavii supi tupri vahe viña; ndahei eté rumo. ² Esepi, yaposva he imombehupiréhi cüritei icuasaño itera curi. Iyavei mbahe ñomipri icuasaño aveira no. ³ Supi eté opacatu mbahe pemombehu vahe pitumimbisave, ahe sendusa tuprira ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oí harive opacatú ava rovaque” ehi.

¿Uma sui pīha siquyesara?

⁴ “Iyavei aipo ahe pēu, che mboripareta: ndapesiquiyei chira acoi ava pe yuca potasar sui. Esepi, ipare ndoicatu iri ambuae mbahe apo água pēu. ⁵ Che rumo amombehura pēu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

⁶ “Pe pemondo poyandepo vīrai ñuvirío guarePOCHI rupivemi tēi yepi. Tūpa rumo ndasesarai eté que ñepei sui. ⁷ Tūpa niha oicua ñepei-peí yande ha retacuer. Sese, pesiquiyéeme; pe niha ívate catu vahe ité peico opacatu vīrai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riquehir, ‘Co che reroyasar secoi’ aipo ahera che Ru upe sembiguai rovaque. ⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoiyase, ‘Co ndahei che reroyasar secoi’ ahe aveira che Ru Tūpa upe sembiguai rovaque” ehi.

¹⁰ “Iyavei opacatu oñehe-ñehe tēi vahe che, Ava Riquehir, rese, ahe chupe oimeño ñeroisa. Acoi que ava iñehe-ñehe tēi vahe rumo Espíritu Santo amotaréhisave, ahe chupe ndipoi chietera ñeroisa” ehi.

¹¹ “Acoi pe amotaréhisar che recocuer sui tēi pe rerasose porandusave pe recoáha água yuvireco, anise mbororecuuar mbahe moingatusar rovai, que ambuae mbororecuareta upe avei no, ‘¿Mbahe pīha amombehura?’ ndapeyei chira. ¹² Esepi niha, ahe pipeve voi Espíritu Santo pe mbohera aviyeteramo tēi mbahe mombehu água rese” ehi güemimbohe eta upe.

Ñearosa mbahe pota raisa sui

¹³ Ñepei mbia ava rehii pāhu pendar aipo ehi Jesús upe:

—Porombohesar, emombehumi che riquehir upe, tomboyahomi tēi mbahe che mombahesa cheu —ehi.

¹⁴ Ahe rumo ombooyevi chupe:

—Che mboripar, che ndachecuaitai mbahe moingatu água, mbahe mboyaho-yaho água avei —ehi ahe mbia upe.

¹⁵ Ipare aipo ehi:

—Peñearo tupri opacatu mbahe pota raisa sui. Esepi niha, ndahei mbahe rereco atí água pe recocuer —ehi.

¹⁶ Ipare ombooyoya ambuae mbahe rese imbohe: “Oime mbia mbahe yar, iha tupri ai eté semiti. ¹⁷ Ahese ipihañemoñeta oico oyeupe: ‘¿Mara ahera pīha che rembipoho rereco?’ ehi tēi. ‘Ndareco iri eté yapocatu água’ ehi. ¹⁸ Ipare ipihañemoñeta cute: ‘Aicua mbahe che rembiaporã. Opara aroyi tembihu rēta. Ichui ayapo irira ambuae tuvichá catu vahe. Aheve ayapocatura che remiti rāhii opacatu mbahe areco vahe

avei no. ¹⁹ Evocoiyase aipo ahera cheyeupe: Che mboripar, oime setá mbahe cheu araviter momba-momba âgua; sese cûritei apituhura vichico, acarura, acahura iyavei ayembovharetera no, ahera' ehi. ²⁰ Tûpa rumo aipo ehira chupe: 'Mbía, nandearacuai eté eico, co pítu pipeve voi eté eremanora. Co mbahe nde rembiapocatu, ¿ava mahera pîha evocoiyase?' ehira chupe. ²¹ Êgüe ehi eté niha que ava oyeupeñomi tîi mbahe omonuha ati vahe, iparaisu rumo Tûpa rovaque" ehi ahe mbia upe.

Tûpa osâro opacatu guahir

²² Ipare aipo ehi Jesús güemimbohe upe: "Co amombehura pêu: Ndapeyemomahenduha guasu ai chira pe remihura rese pe recove âgua, pe turucuarâ rese tîi avei no. ²³ Yande recovesa rumo aviye catu vahe tembihu sui; yande retecuer avei aviye catu turucuar sui no. ²⁴ Pesepia vîrai: nomahetii vahe, nomonuhai vahe avei, ndovirecoi vahe avei mbahe râhii rëta yuvireco. Tûpa rumo omoime mbahe itohu. ¡Pe rumo ivate catu vahe ité peico vîrai sui! ²⁵ Ndipoi eté que ñepei pe pâhu pendar oicatu vahe opîhañemoñetá iteangasa pipe tîi güecocuer mbosasaviño âgua. ²⁶ Supi eté ndapeicatuise yapo, ndiyai peyemomahenduha guasu aí mbahe rese.

²⁷ "Pemahecua ru mbahe potri caha pipendar rese: ndoporaviqui eté iyavei ndoipiai oturucuarâ. Iyavei no yepe mborerecuar guasu Salomón vireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ²⁸ Tûpa niha omboporañete raimi tîi mbahe potri caha pipendar. Ichui sapisapaño horno pipe. ¡Ahe rumo omundo catura turucuar pêu, pe ava nimbahe reroya tuprii vahe! ²⁹ Sese, '¿Mbahe pîha yahura, mbahe pîha yamondera?' ndapeyei chira pe yemomahenduha guasu aisa pipe. ³⁰ Esepia, ava Tûpa reroyasarëhi co ivi pipendar aipo nungar mbahe reseño tîi ipîhañemoñeta yuvireco yepi. Pe Ru Tûpa rumo oicua ité pêu mbahe ipane vahe. ³¹ Aviye catu rumo pesecara pe Yar Tûpa povrîve pe reco âgua, ahese omboura que mbahe ipane vahe pêu" ehi.

Ivave mbahe eta oime vahe yandeu

³² "Aní pesiquiye, che ovesa nungar, yepe pe moviromi tîi peico viña, pe Ru rumo oporoaisusa pipe oipota opovrive pe rereco âgua. ³³ Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda rai vahe ndoquei chira ñomi âgua pe sui iyavei mbahe rasoi nomomarai chiaveira. ³⁴ Esepia, pe mbahe pe rembiereco setá catu vahesa rupi-rupi pe pihañemoñeta yepi" ehi.

Peyemoingatu Tûpa Rahir yevi âgua

³⁵ "Peyemoingatu tupri che yevi âgua. Inungar tataendi ndogüei vahe, pemboyecua tupriño ité che recocuer pe recocuer pipe ava upe. ³⁶ Peico imboacuaprí güerecuar osâro vahe nungar mendasa sui iyevise, oquenda imotase, omboi voi vahe yuvireco chupe. ³⁷ Aviye itera serescuar upe osepiase iyemoingatu voi; evocoiyase serescuar ae niha ihañecora sese, omboguapira mesave imbocaru. ³⁸ Yepe serescuar oyepotara pítu mbiter ou viña, anise añihiveve, ahe rumo osâroño itera chupe imboi âgua yuvireco. Evocoiyase serescuar aviye ai etera chupe. ³⁹ Peyapisaca tupri co rese: acoi oí yar oicuase mbahe hora imonda vahe yepota âgua, ahese

opitara imonda vahe rāro güēta pipe sui mbahe renoseēhi ãgua. ⁴⁰ Ēgue peye aveira peyemoingatu che yevi ãgua. Esepio niha, che, Ava Riquehir, aporoesapiha tēira vitu curi” ehi Jesús viroyasareta upe.

Mbiguai omboavíye vahe ocuaita iyavei nomboavíyei vahe

⁴¹ Evocoiyase Pedro oporandu Jesús upe aipo ehi:

—Che Yar, ¿oreuñomi pīha eremombehu co porombohesa eremboyoya vahe ambuae mbahe rese, opacatu upe tie? —ehi.

⁴² Evocoiyase omboyevi Pedro upe aipo ehi: “Acoi ava mbahe rese ñangarecuar omboavíye tupri vahe ocuaita, yaracua vahe avei, ahe chupe serecuar oseya icuaitarā güēta pipendar rese hañeco ãgua ‘tembihu tomondo che rēta pipendar upe che porocuaita rupi’ ohesave. ⁴³ Acoi omboavíyese ocuaita, ahese oviharetera güerecuar yevise. ⁴⁴ Supi eté niha, serecuar oyocuaira opacatu ombahe rese hañeco ãgua. ⁴⁵ Ahe mbiguai rumo ‘ndoyepota vitéi chira revo che rerecuar’ oya omboetasa cuimbahe iyavei cuña omboipi mara-mara tēi sereco iyavei ocaru, oihu tēi osavaipo-ipño avei oico. ⁴⁶ Ipare rumo serecuar oyepotara ima-mohaëhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua tēise mbahe güerecuar remimbotar, noyemoingatuse rumo iyavei ndoviroyaise oico, ahe evocoiyase serecuar oinupara. ⁴⁸ Acoi mbiguai nomboavíyei vahe ocuaita icua tupriëhisa pipe, nañemoirosa rutei chira chupe. Esepio niha, acoi imondosa catu vahe icuaitarā, porandusa catura chupe. Acoi oyeroaya catu vahe, oporandu catu aveira sese” ehi.

Jesús rерoyasa pipe sui oimera yeamotarëhisa

⁴⁹ “Che ayu tata nungar yavai vahe reru ãgua co ivi pipendar upe ‘joyandu tarahu yuvireco cute viña’ viya. ⁵⁰ Aique ranera rumo mbahe tēi che recoähasa pipe, jégüe ahera che paraísú itera imboavíye ãgua! ⁵¹ ‘Mbahe tupri ai revo güeru co ivi pipe’ ndapeyei chira cheu. Ēgue ehi rumo che ayu che sui ava yeamotarëhi ãgua. ⁵² Esepio niha, co pipe suive ité que poyandepo tupri revo oñemu yuvirecoi vahe amove oyamotarëhira yuvireco che recocuer sui: mbosapi oyamotarëhira ñuvirío vahe, ñuvirío vahe evocoiyase oyamotarëhira mbosapi vahe yuvireco. ⁵³ Que ava oyamotarëhira guahir, anise tahir evocoiyase oyamotarëhira vu; cuña oyamotarëhira omembri, imembri evocoiyase oyamotarëhira osi; sovayar oyamotarëhira vovayar” ehi güemimbohe upe.

Iva pendar poromondiisa mboyecuasa

⁵⁴ Ipare Jesús aipo ehi ava rehii upe: “Pe pesepiase mbahe pítu arí sosa cotí sui opühase, ahese, ‘Oquira’ peye. Ēgue ehi eté oqui. ⁵⁵ Iyavei acoi ivitú oipeyuse irohi cotí sui, ahese, ‘Sacú iteangara’ peye. Ipare ēgue ehi eté. ⁵⁶ ¡Pe Tūpa rерoyasar angahu tēi peico vahe! Pe niha peicua mbahe ivi rese oyecua vahe tēi iyavei ivi rese mbahe oyecua vahe tēi mombehu, ¡mahera ru ndapeicuai peyeupe mbahe cūritei oime vaherā mombehu peico!” ehi.

Peñero pe amotarëhimbar upe

⁵⁷ “¿Mahera napesäha ranei pe ae ité co mbahe supi eté vahe? ⁵⁸ Acoi que ava nde amotarëhisar nde soho ucase nde mundo ãgua mborerecuar rovai, emoingatu tupri voi mbahe eico chupe tenondeve nde rerasoëhi

āgua sovai; anise, mborerecuar nde mondora ava naporai vahe rarōsar upe. Ahe evocoiyase nde roquendara.⁵⁹ Supi eté nderesēi chietera acoi eremboepipase voi eté eresēra ichui” ehi ava rehii upe.

13

Aviye catu ité yañecuñaro

¹ Ahe píipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovéhese mbahe mimba yucapri yuvireco chupe. Ahe suvi oyeseha mbahe mimba ruví rese.

² Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui ēgüe ehi mbahe chupe viña. ³ ¡Aní rumo! Acoi ndapemboasiise pe angaipa Tūpa upe pe yevi āgua, pe avei opara pecañi tēi. ⁴ Peroya avei acoi ava dieciocho tupri yuvirecoi vahe omanopase Siloé torre ovipaise iharive, ‘Ahe yangaipa catu yuvireco ambuae ava Jerusalén pipendar sui’ peye viña no. ⁵ Aní rumo; acoi ndapemboasiise pe angaipa Tūpa upe peyevi āgua, pe avei opara pecañi tēi” ehi.

Yembohesa ivira higuera ndihai vahe resendar

⁶ Evocoiyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pīha?’ oyapave. Ndosecai eté rumo iha sese. ⁷ Ahese aipo ehi mbia oco rārosar upe: ‘Esedu, che ayu pihi tēi higuera ha reca mbosapi araviter rupi. Ndasepiai eté rumo que ñepei iha sese yepi’ ehi. ‘Eyasiapa; ndiyai ihāi tupri tēi cohabe’ ehi. ⁸ Ico rarōsar rumo omboyevi chupe aipo ehi: ‘Che rerecuar, ēgüe tehiño vite tēi rane co araviter; amonguhira ivi chupe. Ipare amondora ivi sū vahe mbahe repochi resendar sese. ⁹ Ahese revo ambuae araviter ihara cute; anise ité rumo, ereyasía ucaño itera’ ehi ico rārosar güerecuar upe” ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepei mbituhusa ari pipe Jesús oporombohe judío tūparo pipe. ¹¹ Aheve oime cuña imbaheasi vahe, dieciocho araviter rupi ahe mbaherasisa vireco, caruguar tēi omboyeapami uca sereco. Sese ndoicatui opūha tupri oguata. ¹² Osepiase rumo Jesús, “Erio” ehi chupe.

—Cuña, cūritei nanembaheasi iri eico cute —ehi.

¹³ Evocoiyase omondose opo sese, aheseve voi cuña oyemohivi. Ipareomboetei Tūpa oico. ¹⁴ Judío tūparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboravíqui āgua; ahe ari pipe peyura peposano āgua, ndahei chira mbituhusa ari pipe —ehi.

¹⁵ Evocoiyase ahe mbia upe omboyevi aipo ehi:

—Pe Tūpa reroyasar angahu tēi peico vahe, ¿nomboihui vo pe pāhu pendar acoi güeimba tiví iyavei guaricu mbituhusa ari pipe yuvireco yepi no? ¹⁶ Co rumo cuña, Abraham suindar Caruguar omombaheasi vahe dieciocho araviter suive sereco, ¿ndiyai eté pīha evocoiyase imbogüerasa mbituhusa ari pipe? —ehi tūparo pendar rerecuar upe.

¹⁷ Aipo ehise, opacatu yamotaréhisar yuvinochi tēi yuvireco ichui. Ambuae ava rumo oyembovhāño opacatu Jesús rembiapo osepiase yuvireco.

Yembohesa mostaza rāhi suindar

¹⁸ Evocoiyase Jesús aipo ehi avei: “¿Mbahe nungar pīha Tūpa povri pendar, iyavei mbahe rese vo amboyoyara? ¹⁹ Oyoya tupri ité mostaza rāhi rese, inungar acoi mbia oñotí vahe oco pipe. Ichui ocuacua, tuvichá iteanga. Ahe sāca rese vīrai rehii oyapo guaitirā” ehi oporombohe.

Yembohesa pan mboapeposa sui

²⁰ Evocoiyase Jesús aipo ehi iri: “¿Mbahe rese pīha amboyoyara Tūpa povri pendar? ²¹ Oyoya tupri co pan mboapeposa rese, acoi cuña omboyeseha tupri vahe mbosapi sāhambri trigo cuhi rese opacatu imboapepo água yepi” ehi oporombohe.

Jesús peri icāhimi vahe nungar

²² Ipare Jesús osoño Jerusalén ve, opita-pita tecua yacatu rupi oporombohe oico. ²³ Ahe supi ichose, ñepei mbia oporandu chupe aipo ehi:

—Che Yar, ¿supi eté pīha moviromi tēi ava oñepisirora yuvireco? —ehi.
Ahe evocoiyase omboyevi chupe:

²⁴ —Peyemoviracua tupri catu peique água oquendipí cāhimi rupi. Esepi niha, supi eté setá ava osāha tēira yuviroique vaherā ahe oquenda rupi yuvireco viña, ndoyuviroique catui chira rumo yuvireco. ²⁵ Supi eté ahe inungar oí yar ouse oquenda mboya viña. Amove ava evocoiyase ocarve yuvirecoi vite vahe omota tēira oquenda, ‘Ore yar, emboimi tēi oreu’ ehi tēira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe. ²⁶ Evocoiyase ahe aipo ehi tēira yuvireco: ‘Ore niha orocaru vahe, oroihu vahe nde piri, iyavei ore mbohe ore rocar rupi eve yepi’ ehi tēira yuvireco chupe. ²⁷ Ahe rumo aipo ehira: ‘Ñepei reseve niha acoi, Ndopocuai vahe, ahe pēu. ¡Pesiri che sui, pe opacatu mbahe-mbahe tēi aposar!’ ehiñora chupe. ²⁸ Pe rumo imomboprira pe recocuer Tūpa povri sui, sese peyaseho tēira, peyemoaitere tēira peico pesepiase Abraham, Isaac, Jacob iyavei opacatu Tūpa ñehe mombehusareta yuvirecoise Tūpa povrīve ivave. ²⁹ Iyavei ava yuguerura añihivei cotí sui, caharu cotí sui, norte cotí sui iyavei irohi cotí sui, ahe evocoiyase yuviroguapira ocaru Tūpa mborerecuasave ipiri yuvireco. ³⁰ Supi eté amove ava ndoyavii ipa tēi vahe seique água ivave Tūpa piri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavii ahe rane oique vaherā ivave viña. Ahe rumo ipa tēi yuviroiquera —ehi Jesús ava rehii upe.

Jesús oyaseho Jerusalén pendar rese

³¹ Ahe arí pipe oyepota moviro fariseo aipo ehi tēi Jesús upe yuvireco:
—Eyepepiño ave sui. Esepi, Herodes niha nde yuca pota oico —ehi tēi yuvireco chupe.

³² Ahe rumo,

—Peso, tapemombehu aipo mbia aguara nungar tēi upe: ‘Esepi, co pipe iyavei ayihive amboyepepiñora ava sui caruguareta vichico, ambogüerañora ava imbaherasisa sui, curi ayihive evocoiyase amombara che cuaita’ peyera. ³³ Che rumo aporavíquiño itera co pipe, ayihive iyavei curi ayihive vichico. Ipare asora Jerusalén ve. Esepi niha, ndiyai Tūpa ñehe mombehusr omano co cotí tēi Jerusalén sui yuvireco —ehi.

³⁴ “¡Too rutei pe Jerusalén pendar, peyuca vahe Tūpa ñehe mombehusr, iyavei ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha

vahe omembri opepovrīve, ēgūe ahe pota tēi pe rereco viña, pe rumo ndapeipotai eté! ³⁵ Sese seyapirā tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repiai irira peye” ehi Jerusalén pendar upe.

14

Jesús ombogüera mbia iruru sui

¹ Ñepei mbituhusa ari pipe Jesús oso ocaru mbororecuar fariseo rētave. Aheve ambuae fariseo eta oiviro yuvireco. ² Aheve avei mbia iruru vahe secoi. ³ Evocoiyase Jesús oporandu Moisés porocuaita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera água; anítie? —ehi.

⁴ Ahe rumo noñeheiño yuvireco chupe. Ahese ahe opoco imbaheasi vahe rese, ombogüera. Ipare, “Eso tupriño” ehi chupe. ⁵ Fariseo eta upe evocoiyase aipo ehi:

—¿Ava pīha pe pāhu pendar novinose voi chira güeimba guaricu, anise tivi oviapise ivicuar pipe mbituhusa ari pipe viña? —ehi.

⁶ Ahese nomboyevi catui eté iñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imbooyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucase mendasave yuvireco, ndayaguapii chira ava imboeteipri catu vahe renda harive. Esepiá, aviyeteramo que ambuae ava ichohopri oyepotara yande sui imboeteipri catu vahe yuvireco. ⁹ Ipare yande soho ucasar aipo ehira yandeu: ‘Epūha evocoí sui, co mbia toguapi eiurve’ ehira yandeu. Evocoiyase yande yachī tēira yaso ipami tēi yaguapi. ¹⁰ Yande soho ucase rumo yuvireco, yaguapira evocoiyase ipa; yande soho ucasar ouse, aipo ehira yandeu: ‘Mbori, erio cohabe tenda imboeteipri catu vahesave ore piri’ ehira. Ēgūe yahera imboeteipri yaico acoi ava yuviroguapi vahe rovaque yande piri. ¹¹ Esepiá niha, acoi ava oyemboívate ai vahe opara seco reroyisa; acoi ava seco mbegüe vahe rumo, ahe seco mboívate catusara curi —ehi.

¹² Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rīvri, que nde mu iyavei que nde rēta cotindar imbahe eta vahe. Esepiá niha, ahe omboyevira ndeu, nde soho ucara oyepiri yuvireco; ēgūe ehira evocoiyase mbahe imboyevípa yuvireco ndeu. ¹³ Ereyapose rumo pieta, ereichoho ucara ava iparaísu vahe, ava ipo ichutu vahe, anise ipi chutu vahe, ipāri-pāri vahe, ndasesapisoí vahe avei. ¹⁴ Esepiá niha, ahe ndoicatui mbahe mboyeví yuvireco ndeu. Opase rumo ocuerayevi ava seco catupri vahe yuvireco, ahese erevharetera eico. Esepiá, ereipísira mbahe avíye vahe Tūpa suindar —ehi.

Jesús oporombohe carusa rese

¹⁵ Iñehe renduse rumo, ñepei mbia yuviroguapi vahe mesave, ahe aipo ehi Jesús upe:

—¡Sovasapri catu ava Tūpa piri ocaru vahe imbororecuasave! —ehi.

¹⁶ Evocoiyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri.

¹⁷ Ipare oyepotase ari caru água, ahese aipo ehi güembiguai mundo: ‘Toyugüerupa che piri ichohopri. Esepio niha, mbahe opa oingatu cute’ ehi. ¹⁸ Opacatu rumo ava, ‘Eñemosáñomi tēi cheu’ ehi pâve yuvireco. Yipindar mbia aipo ehi: ‘Che rumo arocua ívi; iya ité aso sepia. Sese eñemosáño cheu’ ehi chupe. ¹⁹ Ambuae mbia aipo ehi: ‘Che arocua ramo diez tupri tívi, ahe asáha ranera. Sese eñemosáño cheu’ ehi chupe. ²⁰ Ambuae aipo ehi no: ‘Che amenda ramomí vichico. Sese tēi ndasoi chira’ ehi. ²¹ Oyevise mbiguai, opa tupri omombehu mbahe güerecuar upe. Ahese serecuar aipo ehi oñemoirosa pipe güembiguai upe: ‘Eso voi evocoiyase opacatu ocar rupi. Supi sui eru ava iparaísumi vahe, que ava ipo chutu vahe, anise ipi chutu vahe, que ndasesapisoí vahe, anise que ava ipári-pári vahe avei no’ ehi. ²² Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane víte rumo ava’ ehi. ²³ Evocoiyase aipo ehi güembiguai upe: ‘Eguata iri ambuae peri tecua ívirindar rupi avei toyugüerumi che rëtave yuvireco che piri, tomboapipopa ité che rëta yuvireco’ ehi. ²⁴ Esepio niha, acoi yipindar ava aichoho uca vahe ndipoi chietera que ñepei ocaru vaherá che piri’ ehi güembiguai upe —ehi Jesús ahe mbia mbohe.

Yavai Cristo rupi guata água

²⁵ Ava rehii Jesús raquicuei oguata yuvireco. Sese ahe oyemboyere aipo ehi ava upe: ²⁶ “Acoi oimese que ava oipota vahe che rupi oguata água, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. Ëgüe ndehise, evocoiyase ndiyai chupe che remimbohe seco água. ²⁷ Iyavei que ava noñemosáñoi vahe mbahe-mbahe tēi upe oiporarase ari yacatu rupi inungar-ra ocurusu rese ovosii vahe viña che rupi oguata água, ahe chupe ndiyai che remimbohe seco água” ehi. ²⁸ “Que ava pe pâhu pendar omopuha potase oi, ¿ndoyapisaca ranei chira ‘¿amomba angara pîha?’ oyapave? ²⁹ Esepio niha, omondose oi renara yipindar. Ipare rumo nomboaviye catuisse, ahese opacatu ava sepiase viroírora ³⁰ aipo ehira yuvireco: ‘Aye evocoí mbia omopuha pota tēi oi viña, ndoicatui eté rumo imboaviye’ ehira yuvireco chupe. ³¹ Iyavei que mborerecuar guasu diez mil sundao vireco vahe oyeepi potase ambuae mborerecuar veinte mil ava vireco vahe sui, oyapisaca ranera yipindar icua tupri água ‘¿yaicatura pîha setá catu vahe rese yavava?’ ohesave. ³² Esepio, ndoicatuisse, evocoiyase ambuae mborerecuar guasu amombri vite secoise, omondora mbahe mombehusar mbahe tupri rese porandu água chupe. ³³ Ëgüe ehi avei pe recocuer ndapeseya potaise pe mbahe opacatu, ëgüe ehi vahe ndahei eté che remimbohe” ehi.

Yande recocuer inungar yucrì

³⁴ “Yucrì aviye vahe ité yandeu; nasehe irise rumo, ndayaicatui chietera imoehe iri água. ³⁵ Naporai eté ívi upe nara; ndiyai avei ívi mbahe repochi resendar rese oyeseha vaherá. Evocoiyase ahe imombopri tēi vaherá. Sese aipo ahe acoi ava oyapisaca pota vahe, toyapisacaño” ehi.

¹Opacatu ava sui guarepochi rerocuasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu água yuvireco. ²Sese fariseo yuvirecoi vahe iyavei Moisés porocuaita rese oporombohe vahe yuvireco, ahe oviroíro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipāhuve no —ehi.

³Evocoiyase Jesús omombehu ovesa resendar yembohesa: ⁴“Que ñepei pe pāhuve virecose cien ovesa güeimba, ipare co ocañira ñepei ichui viña, oseya ranera evocoiyase evocoi noventa y nueve tēi aviye vahesave seco áqua. Ipare oyevira ocañi vahe reca oso, oyosu rane itera viña. ⁵Oyosuse, osupira oachihive vorivetes pipe. ⁶Ipare oyepotase güetave, omonuhara omboripareta, ocotindareta avei no. Ipare aipo ehira chupe: ‘Yayembovhara che piri. Esepia niha, ayosu ité ovesa ocañi vahecuer cute’ ehira. ⁷Supi eté ñgue ehi aveira oime torivetes guasu catu ivave acoi ñepei ava yangaipa guasu vahe oñecuñarose güecocuerai sui noventa y nueve yuvirecoi tupri vahe sui yuvireco” ehi.

Yembohesa guarepochi ocañi vahe resendar

⁸“Acoi que cuña omocañise ñepei guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera. ⁹Evocoiyase oyosuse, omonuhara omboripareta, ocotindareta avei no chupe aipo ehira: ‘Yayembovhara che piri. Esepia niha, ayosu guarepochi che sui ocañi vahecuer cute’ ehira. ¹⁰Supi eté ñgue ehi aveira oime torivetes Tūpa rembiguai iva pendar rehii upe que ñepei ava yangaipa guasu vahe oñecuñarose güecocuerai sui” ehi.

Yembohesa mbia rahir ocañi vahe resendar

¹¹Aipo ehi avei oporombohe: “Oime mbia vireco vahe ñuvirío guahir. ¹²Chihivahe catu vahe aipo ehi oyesupa upe: ‘Che ru, embou mbahe che mombahesa cheu’ ehi. Iyesupa evocoiyase omboyahoh ombahe imondo chupe. ¹³Ipare coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pipe. ¹⁴Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoiyase ndasiepoi tēi oico. ¹⁵Evocoiyase oso mboravíqui reca mbia piri aheve. Ahe mbia evocoiyase omundo obove güeimba cuchi rāro áqua. ¹⁶Aheve oyemohitaro pota tēi cuchi rembihu pipe oico viña. Ndipoi eté rumo omundo vahe chupe. ¹⁷Evocoiyase oyemomahenduha tēi güeta pendar oporavíqui vahe rese: ‘¡Che ru rētave oporavíqui vahe rumo co omoumbire guasu-gasu tēi güembihu yuvireco! ¡Che rumo che yuca pota tēi che rieporéhi che rereco cohabe! ¹⁸Sese ayevira che ru rētave. Aipo ahera chupe: Ayemboangaipa Tūpa rese, nde rese avei no. ¹⁹Ahese che ndahe iri chira nde rahir nungar aico; iyacatu revo ndeu, oporavíqui vahe nungar tēi che rerecoñora eve, ahera’ ehi. ²⁰Evocoiyase oyevi iri oso vu rētave cute.

“Amombri vitemi tahir recose rumo iparaisu catu chupe, oña voi oso guahir rovaichi, oyaco osovaupite avei. ²¹Ahese tahir aipo ehi chupe: ‘Che ru, ayemboangaipa Tūpa rese, nde rese avei; ndiya iri nde rahir che reco áqua’ ehi. ²²Tu rumo aipo ehi güembiguai upe: ‘Peso, taperumi aviye catu vahe turucuar pembboyemonde, pemonde avei cuã penda sese, pitaqui avei. ²³Iyavei guaca iquira catu vahe peyuca. ¡Yayapora pieta guasul!’ ehi. ²⁴‘Esepia, co che rahir aviye omano vahe secoi viña,

cūritei rumo oyevi iri cheu' ehi. Ëgue ehi opacatu sorivete yuvireco pieta apo.

²⁵ "Tahir cuacua catu vahe rumo ocove vîte secoi. Oyevise ou güëta rerovicave, osendu voi ipieta guasu vahe yuvireco. ²⁶ Evocoiyase oportandu mbiguai upe mbahe oime vahe rese. ²⁷ 'Nde rivri mo co oyevi tupri iri ou. Sese nde ru oyuca uca guaca iquira vahe iyevisa resendar' ehiñó. ²⁸ Evocoiyase tiquehir oñemoirosa pipe, ndoique potai oyesupa uve oi pipe; tu rumo oséño ité ocarve 'eique' oya chupe. ²⁹ Evocoiyase tahir omboyevi chupe aipo ehi: 'Che niha setá araviter rupi oropítivii vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mborípar rese ore pieta água' ehi vu upe. ³⁰ 'Indó, cûritei oyepota ndeu nde rahir, omocañi tēi vahe nde guarePOCHI cuña ndipihai vahe rese tēi. Ahe eremboetei catú che sui; ereyuca uca routei guaca iquira vahe chupe' ehi.

³¹ "Evocoiyase tu: 'Eyapisacaño, che rahir, nde niha nderesiri vahe che sui. Opacatu che areco vahe rumo nde mbahe ité yepi. ³² Cûritei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe iri' ehi guahir upe" ehi Jesús ava eta mbohe.

16

Mbahe yar mbahe rese ñangarecuar ndoyemboaracuai vahe resendar yembohesa

¹ Jesús aipo ehi avei güemimbohe eta upe: "Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe mocañi tēi agüer mombehu. ² Evocoiyase serecuar ñepei opítiviisar omundo seca, ahe güeruse, '¿Mbahe vo aipo ereyapo eico; ayandu cûritei nde rerâcua? Emoingatupa tupri voiño nde poraviquisa resendar cheu' ehi, 'Nandehañeco iri chira cohaye mbahe rese cheu' ehi, 'Nandehañeco iri chira cohaye mbahe rese cheu' ehi chupe. ³ Evocoiyase mbahe rese ñangarecuar: '¿Mara ahera pîha co evocoiyase vichico imombopri che recose che poraviquisa sui? Ndareco iri rumo píratasa cheyese ivi rese che poraviqui água. Achí eteanga aveira rumo mbahe rese che porandu água' ehi tēi. ⁴ 'Aicua rumo cute mara ahera vichico: che poraviquisa sui opa che momboise, oimera che pisí tupri vaherã oyepiri' ehi. ⁵ Evocoiyase oñehe ñepei-peí güerecuar sui mbahe vinose tēi vahe rese chupe. Yipindar vahe upe oporandu: '¿Mbovi mbahe erenose tēi yande rerecuar sui?' ehi. ⁶ 'Cien tupri chereve aceite siru tuvichagüe vahe rese' ehi. Evocoiyase, 'Eguapi ru, co oime cuachiar sesendar nde yecuachía agüer. Emondoro, eyapo iri ambuae cincuenta rupindar año' ehi chupe. ⁷ Ichui ambuae mbahe vinose tēi vahe upe oporandu no: '¿Mbovi mbahe vo erenose tēi yande rerecuar sui?' 'Cuatro ciento quintar rupindar' ehi. Evocoiyase, 'Co oime cuachiar sesendar. Yaicuachiara rumo tresciento veinte quintar rupindar' ehi. ⁸ Evocoiyase serecuar oyanduse, 'Too, oicua ité mbahe apo' ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu água. Supi eté ava ndoicuai vahe Tûpa oicua catu mbahe moingatu água oyeupe Tûpa reroyasar sui.

⁹ "Sese che aipo ahe pêu: peiporu pe guarePOCHI pereco vahe co ivi pipe pe mborípar reime água. Ichui opa têise pe guarePOCHI, oimera pe pisí vaherã tecu apirëhisave.

10 “Acoi ava mbahe tupri chīhi oyapo vahe, ahe oyapo tupri catura mbahe tuvichá vahe. Iyavei acoi ēgue ndehi vahe chīhi vahe rese, ēgue ndehi chiaveira mbahe tuvichá vahe rese. 11 Evocoiyase ndapemboaviyeise co ivi pipendar pe cuaita guarePOCHI rese, ahese ndaperecoi chira ivave mbahe rese hañeco ãgua. 12 Iyavei acoi ndapemboaviye tupriise pe cuaita ambuae ava mbahe rāro pipe, ¿ava pīha evocoiyase omondora pe mbahe ité pēu viña?

13 “Iyavei ndipoi chietera ñepei mbiguaiombooyeroya vahe ñuvirío güerecular. Esepia, ñepei osaisu catura imbooyeroyasa pipe, ambuae evocoiyase ndoyambotai chira imbooyeroya potaēhisa pipe. Ēgue peye avei ndapeicatui Tūpa mbooyeroya guarePOCHI pota raisa pipe” ehi güemimbohe eta upe.

14 Aipo ñehesa renduse, fariseo yuvirecoi vahe oguarePOCHI raisusa pipe oviroíro yuvireco. 15 Evocoiyase aipo ehi fariseo eta upe: “Pe co ava rembiepiave pe recocuer aviye angahu pe reco viña. Tūpa rumo oicua opacatu pe pihañemoñetasa. Esepia, yepe ava rovaque ndoyavii aviye ai vahe pe recocuer viña, Tūpa uve rumo mbahe tēi eté” ehi.

Mborocuaita iyavei Tūpa mbororecuasa rese ñehesa

16 “Yipisuve Moisés porocuaita iyavei Tūpa ñehe mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tūpa mbororecuasa resendar, sese ava iquerēhi catu cūritei aheve yuviroique vaherā.

17 “Yavai catura que ñepei Tūpa porocuaita mboaviyeēhi ãgua co iva, ivi opa vaherā sui” ehi.

Jesús oporombohe mendasa sui poiēhi ãgua

18 “Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei” ehi Jesús.

Ava mbahe yar iyavei Lázaro

19 “Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe. 20 Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive. 21 Co mbia iparaisu catu vahe aipo ehi oyeupe, ‘Tomboumi tēi que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco. 22 Omanose co mbia iparaisu vahe, ahese Tūpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

23 “Ahese oso Tūpa ñemoirosave. Aheve oparaísuse, omahe ivate coti, osepia amombri aracahendar Abraham Lázaro reseve. 24 Evocoiyase osapucai pírata: ‘¡Che ramoi Abraham, che paraísurecomi tēi eve! Emboumi tēi Lázaro che ápecu morohisa ãgua ive ocuā pipe. Esepia, che paraísu etepri co tata píratagüer pipe vitu’ ehi. 25 Evocoiyase Abraham omboyevi aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaísumi tēi oico’ ehi. ‘Cūritei rumo Lázaro oviharete oico cohavé, nde evocoiyase nde paraísu eipeve eico. 26 Iyavei oime co ivicuar ipicucu vahe rasaēhi ãgua oreu iyavei pēu no’ ehi.

²⁷ “Ahe mbia aipo ehi: ‘Che ramoi Abraham, emondomi tēi Lázaro
²⁸ che rivri poyandepo vahe upe, chupe iñehe água. Ahe tosecuñaro güecocuer yugüeruēhi água co tecocuer mbahe tēisave’ ehi. ²⁹ Abraham rumo, ‘Vireco niha Moisés porocuaita iyavei Tūpa ñehe mombehusar rembicuachiaguer yuvireco. ¡Ahe toviroya yuvirecol!’ ehiño chupe.
³⁰ Evocoiyase, ‘Taa, che ramoi Abraham, que omano vahecuer pāhu pendar rumo yuvirasose chupe, ahe evocoiyase omoingatura güecocuer yuvireco viña’ ehi. ³¹ Abraham rumo aipo ehi chupe: ‘Acoi ndoyapisaca potaise Moisés porocuaita rese iyavei ambuae Tūpa ñehe mombehusar remimombehu rese no, ndoviroyai chiaveira que ava omano vahecuer ocuerayevise yuvireco’ ehi Abraham ava mbahe yar upe” ehi.

17

Iparaisu itera ava oporomboangaipa uca vahe

¹ Jesús aipo ehi güemimbohe eta upe: “Oimeño itera poroátoisa che reroyasar reiti água. ¡Ahe imboangaipa ucasar rumo iparaisu itera!
² Iyacatu evoco nungar ava ñapichisa ita mbahe mbocuhisa iyesiho rese para guasu pipe imombo água chihivahemi nungar mboangaipa uca ráguer sui. ³ ¡Sese peñearo tupri!

“Acoi nde mboetasa Tūpa reroyasar oyemboangaipase, pemboaracuara. Omboasi pare oyevise güecocuer tupri pipe, ahese peñerora chupe. ⁴ Supi eté acoi que ambuae ava pe amotarehi vitese rumo siete yupagüer ñepei ari pipe, acoi ouse pēu siete yupagüer avei, ‘Égue ndaha iri chira’ ehise, peñero chupe” ehi Jesús güemimbohe upe.

Yayeroyase Tūpa rese oime pīratasa

⁵ Co doce tupri apóstol aipo ehi chupe:

—Emboumi oreu Tūpa rese ore yeroya catu água —ehi yuvireco chupe.

⁶ Evocoiyase yande Yar omboyevi chupe:

—Supi eté, Tūpa rese pe yeroysa, yepe ndoyavii chira mostaza rāhii tahimi vahe viña, co ivira tuvicha vahe upe rumo, ‘Eyeapoho ave sui. Eso eñeñeti para guasu aviterve’ peye Tūpa rese pe yeroysa pipe, ahe evocoiyase pe mboyeroya itera —ehi.

Ambuae ava rese hañecosar cuaita

⁷ “Inungar que pe pāhu pendar virecora güembiguai oporavíqui vahe ivi mboyere cove, anise que guaca rāro yuvi rupi viña; ichui iyevise, ¿‘Eique, eguapi terecaru’ ehira pīha serecuar chupe? ⁸ Aní eté, ahe rumo aipo ehiñora chupe: ‘Emoingatu voi mbahe che tohu, che toihurā avei. Ipare nde erecarura, ereihura’ ehira chupe. ⁹ ‘Aviye ndeu’ ndehi chietera icuai pare chupe. ¹⁰ Égue peye avei mbiguai nungar pe opacatu Tūpa pe cuaitarā ombou vahe mboaviyere, ‘Yande niha mbiguai tēi yaico. Esepiá, yande cuaita mboaviyesar tēi yaico’ peyeñora” ehi.

Jesús ombogüera diez tupri ava lepra pipe imbaheasí vahe

¹¹ Osose Jesús Jerusalén ve, oguata ivi Samaria iyavei ivi Galilea rupi.

¹² Oyepotase tecuamive oso, ahese yuvinose diez ava lepra pipe imbaheasí vahe yuvireco chupe. Amombrive rumo opitaño yuvireco ichui.

¹³ Osapucai yuvireco chupe aipo ehi:

—¡Jesús, Porombohesar, ore paraísuerecomí tēi eve! —ehi.

¹⁴ Sepiase aipo ehi lepra vireco vahe upe:

—Peyevi, peso, tapeyemboyecua pahi eta yuvirecoi vahe upe —ehi.

Oyevise rumo yuviraso, opa ocuera tupri ombaherasisa sui yuvireco. 15-16 Evocoiyase ñepei ipāhu pendar, Samaria pendar, osepiase ocuerasa, oyevi chupe osapucai pírata Tūpa upe imboeteisave. Ofñenopihā oso sovai, oyaivi, “Aviye ndeu” ehi Jesús upe. 17 Evocoiyase ahe aipo ehi:

—¿Ndahei vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe? 18 ¡Co mbia ambuae ivi pendar güeraño rumo oyevi ‘aviye ndeu’ ohesave Tūpa uve! —ehi.

19 Evocoiyase aipo ehi ahe mbia upe:

—Eñarapuha, eso tupriño. Nde poreroyasa pipe niha erecuera eico — ehi Jesús chupe.

Tūpa mbororecuasa yande pāhuve secoi

20 Ñepei ari pipe fariseo eta, “¿Marase vo aipo oura Tūpa ombororecuasa pipe mbahe moingatu äqua?” ehi Jesús upe yuvireco. Ahe omboyevi chupe:

—Tūpa mbororecuasa ndahei acoi yaselia vahe. 21 ‘Co secoi, aheve secoi’ ndapeyei chira chupe. Esephia, ahe oicove ité pe pāhuve —ehi fariseo eta upe.

22 Ipare aipo ehi güemimbohe eta upe:

—Oimera ari pe peipota tēira aico vaherā pe piri que ñepei ari rupi che, Ava Riquehir, che recosa pipe; ndache repiai chira rumo peye. 23 Iyavei ava, ‘Co secoi, aheve aipo secoi’ ehi tēira yuvireco cheu. Ndapesaquicue moñai chira rumo. 24 Esephia, inungar acoi overa vahe osesape guasu iva rese ocua yepi, ëgue ahera che, Ava Riquehir, vitu ari osupitise che yevi äqua curi. 25 Yipindar rumo co ivi pipe che paraísu ranera ava cüriteindar mara-mara tēi che rerecose yuvireco che repia potaëhisave. 26 Inungar ava Noé recose yuvirecoi aracahe, ëgue ehi tupri aveira che, Ava Riquehir, yevi äqua renonde. 27 Esephia, ocaru, oihu, omendaño avei yuvireco. Oyepotase rumo ari ipapapri amarusu viapi äqua, ahese Noé yuviroique arca pipe. Ambuae ava rumo opa ocañi tēi yuvireco. 28 Ëgue ehi avei aracahe Lot recose, ava ocaru tēi, oihu tēi, virocua tēi mbahe omahera yuvireco iyavei mbahe mondosar tēi, mbahe tīsar tēi, oí aposar tēi avei yuvirecoi oyapisacaëhisa pipe. 29 Osëse rumo Lot tecua Sodoma sui, aviyeteramo tēi oviapi tata amar nungar iva sui. Opa tupri oyuca ava rehii aracahe. 30 Ëgue ahe aveira aviyeteramo tēi che, Ava Riquehir, ayemboyecuara curi.

31 “Ahe ari pipe acoi ava güëta harive secoi vahe, ahe toique iri eme güëta pipe ombahe renose. Iyavei ava que rupi tēi secoi vahe, toyevi iri eme güëtave. 32 Sese peyemomahenduha co aracahendar Lot rembireco rese. 33 Opacatu güecocuer osaisu vahe, ahe ocañi tēira. Iyavei setecuer tēi ocañi vahe, ahe rumo oñepisirora” ehi.

34 “Ahe pítu pipe oimera que ñuvirío ava vupave yuviroque vahe yugüeru: ñepei acoi che reroyasar serasosara, ambuae rumo opitara. 35 Ahese avei ñuvirío cuña ohichora yuvireco: ñepei serasosara, indugüer rumo opitara. 36 Ëgue ehi aveira ñuvirío ava amombri güecua sui yuvirecoi vahe: ñepei serasosara, indugüer rumo opitara” ehi.

37 Aipo ñehesa renduse, oporandu yuvireco chupe:

—Ore Yar, ¿que vo aipo ëgue ehira mbahe curi? —ehi.

Ahe evocoiyase,

—Mbahe rehōgürer reimesave uruvu oñemonuha atira yuvireco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborere-cuar mbahe moingatusar recocuer rese

¹ Jesús omboyoya ambuae ava recocuer sui querēhisa pipe yerureño áqua ari yacatu rupi ² aipo ehi: “Ñepei tecuave oime mbia mborere-cuar mbahe moingatusar ndasiquiyei vahe Tūpa sui, ambuae ava sui avei. ³ Ahe tecuave avei oime cuña imer mano vahecuer. Ahe oso co mborerecuar rētave, ‘Oime ava oyapo mbahe tēi eté cheu, tomboepi cheu’ ehi chupe. ⁴ Yipindar rumo noipitivii potai. Coiye catu rumo cuña ombopihavíracua tēise, ipihañemoñeta iri: ‘Yepe che ndasiquiyei vahe Tūpa sui, ava sui avei ndasiquiyei vahe ité, ⁵ amoingatunora rumo mbahe co cuña che mañeco tēisar upe. Ayapoñora semimbotar cheu iyu pīhiēhi áqua’ ehi opihañemoñetasave” ehi.

⁶ Ipare yande Yar aipo ehi: “Peyapisaca aipo mborerecuar naporai vahe ñehe rese. ⁷ Tūpa avei niha omoingatura mbahe güembiporavo oyeupe yeruresar ari, pítu rupindar upe yepi. Nosaro tēi chiranera opitivii áqua yuvireco. ⁸ Supi eté Tūpa omoingatu voira mbahe aviye vahe yande porandusa pipe yandeu. Co rumo che, Ava Riquehir, ayevise co ivi pipe vitu, oimera ava moviromi tēi oyeroya vité vahe che rese yuvireco” ehi Jesús.

Yembohesa fariseo sui iyavei guarepochi rerocuasar sui

⁹ Ichui Jesús oporombohe iri ambuae ava recocuer rese. Esepia, oime amove ava aviye ai angahu secoi oyeupe viña, iharive rumo víroíro ambuae ava. ¹⁰ “Ñuvirío ava yuviraso tūparove oyeroqui. Ñepei ava fariseo, ambuae evocoiyase ava sui guarepochi rerocuasar. ¹¹ Evocoiyase fariseo oso tenonde ava rembiepiave oyeroqui aipo ehi: ‘Tūpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tēi vahe. Iyavei ndahei eté che recocuer co mbia ava sui guarepochi rerocuasar nungar tēi aico no. ¹² Iyavei ñuvirío yupagüer ñepei semana pipe ayecuacu ité nde recocuer rese, iyavei ñepei-peí cien guarepochi che poravíqui reprí aipisi vahe sui amboyaho diez che porerecosa ndeu’ ehi. ¹³ Ava sui guarepochi rerocuasar rumo opitaño amombri ichui. Aheve nomahei íva rese oyeroqui áqua oangaipa mboasisa pipe. Oyepochihanupa-nupa aipo ehi: ‘iTūpa, che paraísuerocomi eve, che angaipa viyar aicó! ehi oyeroqui’ ehi. ¹⁴ “Sese aipo ahe pēu: co mbia ava sui guarepochi rerocuasar opa oipisi ñerosa Tūpa suindar güétave oso. Fariseo rumo aní eté. Esepia niha, opacatu acoi oyemboivate ai vahe, opara seco reroyisa. Acoi ava seco mbegüe vahe rumo seco mboivate catusara curi” ehi.

Jesús osovasa chīhivahe eta

¹⁵ Iyavei chīhivahe güeru Jesús uve yuvireco sovasapirā. Evocoiyase semimbohe osepiase yuvireco, “¿Mahera vo peruno tēi chīhivahe?” ehi opihañracuasa pipe serusar upe yuvireco. ¹⁶ Jesús rumo aipo ehi:

—¡Mahera ndapeipotai iyu áqua! Toyugüeruño chīhivahe cheu. Esepia, co chīhivahe nungar ava yuviroiquera che Ru Tūpa povrīve. ¹⁷ Supi

eté acoi ndoipisií vahe che Ru Tūpa mborerecuasa chihivahe nungar yuvireco, ahe evocoiyase ndoyuviroiquei chietera ipipe —ehi.

Ñepei mbia mborerecuuar imbahe eta vahe omoñeta Jesús

18 Ñepei mbia mborerecuuar oporandu Jesús upe:

—Porombohesar aviye vahe, ¿mbahe vo ayapora tecovesa apiréhi vahe rereco água? —ehi.

19 Jesús evocoiyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepei aviye vahe ité, ahe Tūpa secoi. 20 Ereicua niha co porocuaita aipo ehi vahe: ‘Nandeaguasai chira, ndereporoyucái chira, nandemonday chira, nanderemirai chira ambuae ava rese, eremboyeroyara nde ru, nde si avei’ ehi vahe —ehi chupe.

21 Ahe mbia rumo,

—Che aipo nungar opacatu amboaviye ité che chihivahemi suive —ehiño chupe

22 Aipo ihese rumo,

—Ipane vité mbahe ndeu —ehi—. Emondopa rane nde mbahe, ahe sepri evocoiyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.

23 Aipo oyeupe hese rumo, ahe mbia ndoyembovihai tēi. Esepia niha, mbahe yar ité secoi. 24 Sese omahe aipo ehi:

—¡Yavai eté rumo ava mbahe yar reique água che Ru Tūpa mborerecuasave! —ehi—. 25 Yavai rai camello upe yucuar rupi seique água; ava imbahe eta vahe upe rumo yavai catu che Ru mborerecuasave seique água —ehi.

26 —¿Ava angahu pīha evocoiyase oñepisirora yuvireco viña? —ehi sendusar chupe.

27 Evocoiyase ahe chupe aipo ehi:

—Ava tēi upe mbahe yavai eté, Tūpa upe rumo ndayavaimi eté —ehi.

28 Evocoiyase Pedro aipo ehi:

—Che Yar, ore rumo opa oroseya ore mbahe nde rupi ore guata água —ehi chupe.

29 Evocoiyase aipo ehi güemimbohe upe:

—Supi eté acoi oseya vahe que güëta, güembireco, viquehir, vivri, oyesupa, que guahir Tūpa mborerecuasa rese, 30 ahe setá iteanga catu oipisira mbahe aviye catu vahe co ivi pipe oseya vahe sui. Ipare rumo tecua ambuaeve oipisi aveira tecovesa apiréhi vahe curi —ehi.

Jesús omombehu iri omano água

31 Evocoiyase yande Yar opa viraso co cotimi doce güemimbohe. Aheve aipo ehi: “Cüritei yasora tecua Jerusalén ve yaico, aheve omboaviyera co Tūpa ñehe mombehesar rembicuachiagüer co che, Ava Riquehir, resendar ñehesa. 32 Che imondopri aicora ndahei vahe yande mu upe mara-mara tēi che rereco água. Che reroiro-irora iyavei ondivi-ndivira yuvireco che rese” ehi. 33 “Iyavei che nupa-nupara. Ipare che yucara yuvireco. Imombosapisa ari pipe rumo acuerayevira omano vahe pāhu sui” ehi.

34 Semimbohe rumo ndosenducuai eté iñehe yuvireco. Esepia niha, yavai eté senducua água yuvireco chupe.

Jesús ombogüera ñepei mbia ndasesapisoí vahe

³⁵ Evocoiyase Jesús ovirovise tecua Jericó oso, aheve mbia ndas-esapisoí vahe oguapi oíperi popive porerecosa oyeupe mondo água rese. ³⁶ Osenduse ahe ndasesapisoí vahe ava rehii piambu, ahese, “¿Mbahe vo pěu?” ehi ava upe. ³⁷ Ahe evocoiyase, “Jesús, Nazaret pendar, ocuara co rupi” ehi yuvireco chupe. ³⁸ Evocoiyase ahe güendapeve oñehe pírata:

—¡Jesús, David suindar, che paraísuerecomi tēi eve! —ehi chupe.

³⁹ Evocoiyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,

—¡David suindar, che paraísuerecomi tēi eve! —ehi pírataño ité chupe.

⁴⁰ Evocoiyase Jesús opitase aheve, oyocuai ava seru água. Ovirovise seru yuvireco, aipo ehi ndasesapisoí vahe upe:

⁴¹ —¿Mbahe vo ereipota ayapo vaherā ndeu? —ehi.

—Che Yar, che mbosarecomi tēira eve viña —ehi chupe.

⁴² —¡Esareco, erecuera niha! Esepia, ereyeroya ité che rese —ehi chupe.

⁴³ Ahe ramoseve ndasesapisoí vahe, osareco tupri ité; osoño ité Jesús rupi imboeteisave. Opacatu ava osepia vahe avei omboetei Tūpa yuvireco.

19

Zaqueo osepia pota Jesús

¹ Ichui Jesús oique tecua Jericó pipe oguata oico. ² Aheve mbia mbahe yar Zaqueo serer vahe secoi. Ahe ava sui guarePOCHI rerocuasar rerecuar. ³ Osepia pota tēi Jesús ‘taicua ité’ oya viña. Ndoicatui rumo opucuēhise ava rehii pāhuve sepia água. ⁴ Evocoiyase ahe oña tenonde oso ‘tasepia ité’ oyapave, oyeupi ivira rese ivate oísenonera. ⁵ Evocoiyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rētave nde piri —ehi.

⁶ Aipo oyeupe he ramoseve, Zaqueo ogüeyi voi vorivetesu pipe oipisi. ⁷ Sepiase rumo opacatu ava, “Yangaipa guasu vahe rētave tēi oso” ehi yuvireco chupe. ⁸ Evocoiyase Zaqueo opūha aipo ehi chupe:

—Che Yar, esendu rane, amboyaho tuprira che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboyevi água —ehi chupe.

⁹ —Co pipe Tūpa oipisiro ité co mbia. Esepia, ahe niha Abraham suindar avei secoi. ¹⁰ Esepia, che, Ava Riquehir, ayu co ivi pipe ava ocañi tēi vahe písiro água —ehi Jesús Zaqueo upe.

GuarePOCHI sui yembohesa

¹¹ Aipo ñehesa rendu viteseve, Jesús oporombohe ambuae tecocuer resendar rese. Esepia, viroví Jerusalén, “Oyepota voi etera revo Tūpa mborerecuasa” ehi ava yuvireco viña.

¹² Ahe rumo aipo ehi ava upe imbohe: “Oime mbia imboyeroyapri, ahe senoipri oso vaherā amombrí oivi pendareta rerecuarā oyevise. ¹³ Oso água renonde oichohopa uca diez tupri güembiguai. Ahese opa omondo ñepei-peí upe guarePOCHI sepirusu vahe, aipo ehi chupe: ‘Peporavíqui co guarePOCHI rese imboeta água che yevise nara’ ehi. Ipare oso. ¹⁴ Setá ava rumo secua pendar saquicuei tēi viroiro yuvireco. Sese omondo moviro ava ‘tomombehu: Ore rumo ndoroipotai ore rerecuarā secoi água, tehi yuvireco’ oya viña.

15 “Ahe rumo mborerecuar guasu güecosa pipe oyevi ou cute. Opa uca oichoho oguarepochi pisísañer ‘¿mbovi-mbovi píha oipisi oyacatu yuvireco?’ oya. 16 Evocoiyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi. 17 Evocoiyase mborerecuar guasu omboyevi chupe: ‘Mbiguai aviye vahe ereico, nde cuaita co nde poravíquisa chíhimi vahe eremboaviye ité. Sese ereicora diez tecua guasu pendar rese hañeco águia’ ehi chupe. 18 Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. 19 Aipo ehi tupri avei ahe chupe: ‘Nde evocoiyase ereicora cinco tecua pendar rese hañeco águia’ ehi.

20 “Ipare voi ambuae ou chupe, ‘Che rerecuar, ndo co nde guarepochi aipoqueño turucuarmi pipe sereco. 21 Esepiá, che asiquiye nde sui. Nderecatéhí mete ai vahe mbahe rese. Ambuae ava poravíqui sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe. 22 Evocoiyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehe sui aicuara nde recocuer. Ereicuase égüe che hesa viña, 23 evocoiyase, ‘Mahera ru ndereyapocatui che guarepochi apocatusave che yevisé voi senose águia cheu imboyevi catumi águia viña?’ ehi. 24 Evocoiyase, ‘Perocua guarepochi ichui. Pemondora acoi diez rupi guarepochi omboeta vahe upe’ ehi vupindar upe. 25 Supindar rumo aipo ehi: ‘Ore rerecuar, ovireco rumo evocoí diez tupri avei iharive guarepochi’ ehi tēi yuvireco chupe. 26 Evocoiyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi. 27 ‘Acoi ava che amotaréhimbar, ndache potai vahe mborerecuar yuvireco, ahe opara peru coháve che rovai yucapa águia’ ehi” ehi Jesús ava eta upe.

Jesús oique Jerusalén pipe

28 Jesús aipo ohe pare, oguata vité oso Jerusalén coti. 29 Evocoiyase coiye catu tecua Betfagé iyavei Betania rerovicave, ivitri Olivo ípiimi, aheve omondo ñuvirío güemimbohe 30 aipo ehi chupe:

—Peso co tecuamive, yande rovaindarve. Peyepotase aheve, pesepiara guaricu ñapichimbri imoha ava ndoyeupi vitéi vahe yuvireco sese. Ahe peyorañora seru. 31 Acoi, ‘¿Mahera vo peyora?’ ehise que ava pēu, ‘Yar oiporu pota’ peyeñiora chupe —ehi güemimbohe upe.

32 Evocoiyase semimbohe yuviraso, semimombehu rupi tupri ité os epia mbahe yuvireco. 33 Evocoiyase oyorase guaricu,

—¿Mahera vo peyora ore reimba? —ehi iyar yuvireco.

34 —Yar oiporu pota —ehiño yuvireco chupe.

35 Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso águia. 36 Oyeupise oso guaricu harive, oipípira ava oturucuar peri rupi senonera imboetei guasusave yuvireco. 37 Ovirovise ivitri Olivo sui ogüeyi águia oso, opacatu ava seroyasar supi oguata vahe omboipi osapucai yuvireco vorivetesave mbahe poromondiisa sembiapogüer rese Tūpa upe 38 aipo ehi yuvireco:

—¡Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tūpa tasecoi! —ehi.

39 Evocoiyase amove fariseo yuvirecoi vahe supi aipo ehi chupe:

—Porombohesar, eñehe nde rupi oguata vahe upe imonguiriri água — ehi tēi yuvireco.

⁴⁰ Evocoiyase aipo ehi:

—Supi eté amombehu pēu: co ava iquiririse yuvireco, ita rumo evocoiyase osapucai píratara che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese ⁴² aipo ehi: “¡Pesenducuara tarahu co co arí pipe teco tuprisa amondo pota vahe pēu viña, cûrите rumo ocañi tupriño pe sui, ndapeicatui eté sepi!” ehi oyaseho. ⁴³ “Oimera rumo arí imombehupri naporai vahe pēu curi. Pe amotaréhimbar oñachi irira pe recua. Ipare oyere tuprira yuvireco pe rese pēu ovava água. ⁴⁴ Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepei oya vahe ambuae rese. Esepio, ndapeicuui eté Tūpa ouse pēu pe písiro água” ehi Jerusalén pendar rese oyaseho.

Jesús omombopa ava mbahe rerecosar tūparo pipe sui

⁴⁵ Ichui Jesús oique judío tūparo guasu pipe. Aheve omboipi ava mbahe mondoso mombopa tupri ocarve oico ⁴⁶ aipo ehi:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo, imonda rai vahe rēta nungar tēi pereco —ehi.

⁴⁷ Ichui ahe tūparo guasu pipe arí yacatu oporombohe oico. Aheve avei rumo pahi eta rerecuar yuvirecoi vahe, Moisés porocuaita rese oporombohe vahe iyavei tecua rerecuar guasu yuvirecoi vahe, ‘¿Mara yahera pīha yuca uca água viña?’ ehi yuvireco chupe. ⁴⁸ Ndoicatui rumo yuvireco. Esepio, ava rehii oyapisaca iporombohesa rese yuvireco.

20

Jesús mborerecuasa

¹ Ñepei arí Jesús judío tūparo guasu pipe güecose, ombohe ava eta, omombehu ñehesa písirosa resendar oico. Ahese yugüeru pahi eta rerecuar guasu yuvireco iyavei Moisés porocuaita rese oporombohe vahe, ava rerecuar guasu yuvirecoi vahe avei ² aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā? —ehi ahe ava yuvireco chupe.

³ Ahe omboyevi chupe:

—Che avei aporandura mbahe rese pēu. Pemboyevira cheu —ehi—.

⁴ ¿Ava vo Juan ombou ava ãpiramo água: Tūpa pīha, ava tēi tie? —ehi ahe ava yuvirecoi vahe upe.

⁵ Ahese, “¿Mara yahera pīha?” ehi-ehi tēi oyeupe yuvireco. “Tūpa” yahese chupe, ‘¿Mahera ru ndaperoyai?’ ehira yandeu. ⁶ Anise, ‘Ava tēi remimbou’ yahese chupe, opacatu seroyasar evocoiyase yande apipira ita pipe yuvireco. Esepio, ava, ‘Juan omombehu vahe ñehesa Tūpa suindar’ ehi eté yuvireco chupe” ehi tēi oyeupe yuvireco. ⁷ Evocoiyase ahe ava, “Ndoroicuui rumo Juan mbousar, que sui oporoãpiramo oico” ehiño yuvireco chupe. ⁸ Sese aipo ehi ahe ava upe:

—Sese che avei, ‘Ahe iporocuaita pipe co mbahe ayapo’ ndahei chietera pēu —ehi mborerecuar guasu upe.

Ava mbahe tēi oporavíqui vahe recocuer sui yembohesa

⁹ Ipare Jesús oñeha ava eta upe ambuae ava recocuer rese aipo ehi: “Oime mbia oñotí vahe uva oívi pipe. Ipare oseyá oívi ava oporavíqui

vahe upe iporu ãgua. Ichui oso pucu que amombri vahesa rupi. ¹⁰ Evocoiyase oyepotase arí uva pohosa, ahese omondo ñepei güembiguai oporavíqui vahe upe imboporandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyevi tupri tēi yuvireco serecuar upe. ¹¹ Ipare ambuae güembiguai omondo iri no. Ahe oinupa-nupaño, iñehe mara-mara tēi avei ipogüer tēi imboyevi imondo yuvireco. ¹² Ichui omondo iri tēi imombosapisa rese ambuae güembiguai no. Ahe oyapicha-pichaño imosé imondo yuvireco.

¹³ “Coije miti yar aipo ehi: ‘¿Mara ahera pīha? Amondora revo che rahir, che rembiaisu. Ahe tie revo, osepiase, ombooyeroyara yuvireco’ ehi. ¹⁴ Evocoiyase ahe ava tahir repiase, ‘Co aipo oipisira vu mbahe. Yayucaño. Yandeu nara pāve topita co iví’ ehi oyeupe yuvireco. ¹⁵ Evocoiyase ovinoce miti pāhu sui, oyuca ité yuvireco.

“¿Mbahe vo evocoiyase oyapora iví yar ahe ava naporai vahe upe? ¹⁶ Oura evocoiyase ahe ava mocañipa ãgua, omondora ambuae ava upe oívi rese oporavíqui vaherā” ehi.

Aipo renduse,

—¡Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

‘Co ita oi aposar opaño omombo yuvireco, ahe ita rumo aviyé catu vahe oi moviracua tupri ãgua’ ehi.

¹⁸ Acoi que oviapi vahe evocoi ita haríve, opa tēira ahe ae oyemomara. Iyavei oviapise que ava haríve, opa tupri aveira omocañi —ehi Jesús judío rerecuarea upe.

¹⁹ Pahi eta rerecuuar guasu iyavei oporombohe vahe Moisés porocuaita rese, iñehe viteseve, oipisi pota tēi Jesús yuvireco. Esepiá, osenducua ité oyesendar iporombohesa yuvireco. Osiquiyeño rumo ava rehii sui yuvireco.

Judío rerecuuar osecoáha iri tēi Jesús guarePOCHI rese yuvireco

²⁰ Ahe judío rerecuuar evocoiyase omundo ava ndaseco asíimi angahu vahe iviro, chupe iñehe ãgua ‘toyavi angahu oñehe’ oya viraso vaherā mborerecuuar Pilato rovai. ²¹ Ahe evocoiyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoaviratii vahe nde ñehe yepi. Nde rumo ereporombohe mbahe supi tupri vahe Tūpa recocuer rese. ²² ¿Aviyera pīha yamondo guarePOCHI Roma pendar mborerecuuar ívate catu vahe upe viña? ¿Aní tie? —ehi yuvireco chupe.

²³ Opa rumo oicua iñehe porombopasa tēi. Sese,

²⁴ —Pemboycua ru ñepei guarePOCHI cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuuar guasu —ehiño yuvireco chupe.

²⁵ —Taa, pemondo ru mborerecuuar uve chupendar, iyavei Tūpa upendar pemondoño ité Tūpa upe —ehi ahe ava upe.

²⁶ Ndoyaví uca catui eté iñehe ava rovaque ipisi ãgua yuvireco. Ahe rumo oyeupe imboyevise, iquiriripa tupriño oyepihamondiisa pipe yuvireco.

Porandusa cuerayevisa rese

²⁷ Ipare saduceo, ahe “ndipo eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

²⁸—Porombohesar, Moisés niha oseyá güembicuachiagüer yandeu aipo ehi: ‘Que cuimbahe omenda vahe omanose guahiēhiseve, tivri evo-coiyase omendara sembirecocuer rese. Ahe viquehir omano vahecuer upe nara tahira oico’ ehi. ²⁹ Evocoiyase oime siete tupri oyesuindar pāve yuvirecoi vahe. Yipindar vahe omenda. Ipare omanoño guahiēhiseve. ³⁰ Ichui tivri omenda sese. Ahe omanoño avei guahiēhiseve. ³¹ Ipare imombosapisa tivri omenda iri tēi sese. Ëgue ehi tupriño avei chupe. Ambuae ichuindar ëgue ehi tupri avei omanopa yuvireco guahiēhiseve. ³² Coiye cuña avei omano cute. ³³ Evocoiyase opase ocuerayevi yuvireco, ¿uma rembireco itera pīha omendase opacatu siete yuvirecoi vahe rese? —ehi saduceo yuvireco chupe.

³⁴ Ahe rumo omboyevi chupe:

—Co ivi pipe cuimbahe iyavei cuña omenda vahe yuvireco yepi. ³⁵ Ocuerayevi pare oicatu vahe ivave yuviroique vaherā, chupe ndipo iri chira mendas. ³⁶ Iyavei nomanoi chietera aheve. Esepia, yuvirecoira Tūpa rahir, Tūpa rembiguai eta iva pendar nungar yuvireco. ³⁷ Moisés rembicuachía agüer pipe niha caha pāhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tūpa” ehi. ³⁸ ¡Tūpa ndahei omano vahe Tūpal! ¡Ahe rumo oicove vahe ité Tūpa secol! Esepia, chupe opacatu yuvirecove vahe —ehi saduceo upe.

³⁹ Evocoiyase moviro Moisés porocuaita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

⁴⁰ Sese niquerēhi iri eté mbahe rese oporandu äqua yuvireco chupe.

¿Ava suindar pīha Poropisirosar?

⁴¹ Evocoiyase Jesús aipo ehi ahe ava upe:

—¿Mahera ru, “Poropisirosar David suindar ité” ehi yuvireco? ⁴² David teieté niha aipo ehi güembicuachía pipe:

‘Yar aipo ehi che Yar upe:

Eguapi che acato coti ⁴³ acoi che amondose voi eté nde amotarēhimbar ñenopihä äqua nde povrīve yuvireco’ ehi David aracahe.

⁴⁴ ¿Mahera ru, “Poropisirosar David suindar secoira” peye? David teieté, “Che Yar” ehise chupe —ehi Jesús ahe ava upe.

Jesús oicua uca Moisés porocuaita rese oporombohe vahe recocuerai

⁴⁵ Opacatu ava oñeha rendu viteseve, Jesús aipo ehi güemimbohe upe: ⁴⁶ “Peicua catu co Moisés porocuaita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo äqua ocar rupi omboeteisa pipe yuvireco. Oseca avei tenda porañete catu vahe güenara otūparo pipe, carusave avei oseca tenda aviye catu vahe yuvireco. ⁴⁷ Iyavei virocua-rocuña tēi cuña imer mano vahecuer rēta ichui. Oarondaguña tēi avei oyeroqui pucu-pucu yuvireco. Ahe rumo oipisira Tūpa ñemoirosa ipírata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porerecosa

¹ Ipare Jesús osepia ava imbahe eta vahe omondose oporerecosa guarepochi ríru pípe yuvireco. ² Aheve avei cuña imer mano vahecuer iparaisu vahe, omondo ñuviriomi guarepochi oporerecosa. ³ Evocoiyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui. ⁴ Esepia, ava imbahe eta vahe, oguarepochi rumbirer tēi omondo oporerecosa Tūpa upe yuvireco. Co cuña rumo oparaísusa pípe virecomi vahe guarepochi oyeupe, opacatu ité omondo oporereco água Tūpa upe —ehi.

Jesús omombehu tūparo guasu monduru água

⁵ Evocoiyase amove semimbohe oñehe yuvireco tūparo guasu recocuer rese: “Co tūparo niha icatupri vahe, ita mopuhapri, porerecosa sui opacatu mbahe icatupri ipípe” ehi yuvireco. Jesús rumo aipo ehi:

⁶ —Oimera ari opacatu co mbahe cüritei pesepia vahe pípe ndipoi chietera que ñepei ita oyeha víte vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa íva rese

⁷ Evocoiyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

⁸ Evocoiyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropísírosar aico, cüritei osupiti ari imombehupri yandeu’ ehi tēira yuvireco. Ndaperoyai chira rumo ava aipo ehi vahe. ⁹ Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serācua anduse ichui. Evoco nungar rane ité niha oimera. Ndehi vítei chira rumo ari cañi” ehi.

¹⁰ Ñepei íví pipendar ovavara ambuae íví pipendar rese oyeupe yuvireco. ¹¹ Ahese avei oimera íví rírii tuvichá vahe, tiavor, mbaherasisa opacatu-catu tēi tecua rupi. Iyavei pesepiara íva rese mbahe pe mbosiquiye vahe, poromondiisa tuvichá vahe avei curi.

¹² “Co mbahe-mbahe tēi reime renondeve rumo pe pisira yuvireco che recocuer sui mara-mara tēi pe rereco água. Pe reraso aveira pēu porandu água tūparove, pe roquenda aveira, iyavei pe rerasora mborerecuar rovai, mborerecuar ívate catu vahe rovai avei yuvireco che recocuer sui tēi. ¹³ Ipípe pemombehura che recocuer chupe yuvireco. ¹⁴ ‘Aipo ahera añahe’ ndapeyei chira pepiñañemoñeta rereco pe yeipi água. ¹⁵ Esepia, che amondora che mbahecuada pe ñehe água. Ndoicatui chietera evocoiyase pe amotaréhimbar imboyevi yuvireco pēu. ¹⁶ Pe amotaréhira rumo pe yesupa, pe mu, pe rívrí, pe ríquehir, pe mboripar avei. Iyavei oyucara amove pe pāhu pendar yuvireco. ¹⁷ Opacatu ava ndape ambotai chira che recocuer sui tēi yuvireco. ¹⁸ Nocañi chietera rumo que ñepei pe ha pe áca sui. ¹⁹ ¡Peyemoviracua evoco nungar mbahe upe pe ñepisiro água!

²⁰ “Iyavei pesepiase ava Jerusalén rese sundao oyere tuprise, peicuara evocoiyase mbahe-mbahe tēi reime água yuvireco chupe. ²¹ Evocoiyase Judea ve yuvirecoi vahe toñemipa poyava voi ívitrí rese yuvireco ichui; tecua Jerusalén pípe yuvirecoi vahe, ahe toyuvínose poyava avei ichui. Iyavei acoi que rupi yuvirecoi vahe, ahe toyevi iri eme yuvireco.

22 Esepio, ahe ari oimera Tūpa ñemoirosa. Ahe omboaviyera icuachi-apri aracahendar pipe imombehupri. ²³ ¡Iparaisu itera ahe ari pipe cuña ipuruha vahe, imembi pítani vahe avei! Esepio, oimera tecoadisa co ivi pipendar upe, ñemoirosa tuvichá vahe ahe ava recocuer rese. ²⁴ Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

Ava Riquehir yevisa

²⁵ “Iva rese iporéhira poromondiisa, ari rese, yasi rese, yasitata rese; iyavei ivi pipe, opacatú tecua rupi ava ndayaracua iri chira yuvireco. Oyembosiquiye guasu-guasu tēi aveira yuvireco para guasu riapugüer renduse. ²⁶ Ahese ava setá yaracua cañi tēira osiquiyepave yuvireco opíhañemoñeta guasu aise co ivi pipe mbahe oime vaherā sui. Ahese avei iwa resendar opacatu mbahe oririira. ²⁷ Ahese ramo opacatu ava che, Ava Riquehir, che repiara yuvireco, agüeyise iwa quiha rese che píratasa rendigüer porañetesa pipe. ²⁸ Omboipise evoco nungar mbahe, peyemongueréhi catura, peyemopoase pe queréhisa pipe. Esepio, pe renosesa pihaivira mbahe tēi sui” ehi.

²⁹ Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei. ³⁰ Co ivira soqui ramose, yaicua cōimi ari sacu vahe yepota água yandeu yepi. ³¹ Na ehi aveira pēu che ñehe rupi tupri mbahe pesepiase. Sese peicuara Tūpa mborerecuasa cōimi eté secoise.

³² “Supi eté yuvirecove vitera ava osepio vahe co mbahe opase yaviye. ³³ Iva, ivi opara ocañi, che ñehengagüer rumo imboaviyesa rane itera” ehi güemimbohe upe.

³⁴ “Peicua catu, aní pemboavai etepri pe mbahe reroya água mbahe tēi aposa pipe, pe caguar tēisa pipe, co ivi pipendar tecocuer rese pe pihañemoñeta tēisa pipe avei. Evocoiyase topoesapiha eme ³⁵ inungar ivonde oviapi vahe ahe ari pipe. Esepio, opacatu ava eta upe oimera evoco nungar mbahe. ³⁶ Sese peyemoingatu, peyeroqui ari rupi co mbahe tēi sui pe yepepi água, pe yemboyecua tupri água che, Ava Riquehir, rovai” ehi güemimbohe eta upe.

³⁷ Ëgüe ehi Jesús oporombohe ari rupi tūparo guasu pipe. Pītu pipe evocoyase opita ivitri Olivo rese. ³⁸ Iyavei opacatu ava yuviraso añihiveive tūparo guasu pipe iñehe rendu água yepi.

22

Yemomborandusa Jesús yuca água

¹ Ovírovise Pascua pieta pan ndayapepoi vahe hu água, ² ahese pahi rerecuareta, Moisés porocuaita rese oporombohe vahe avei ava sui osiquiyepave, oseca-seca tēi Jesús yuca água yuvireco.

³ Evocoiyase Caruguar oique Judas piha pipe, ahe acoi doce tupri semimbohe pāhu pendar Iscariote serer vahe. ⁴ Ahe oso pahi eta rerecuar yuvirecoi vahe upe, tūparo rārosar yuvirecoi vahe upe avei imoñeta água, “Tamondo Jesús pe povrīve” ehi. ⁵ Ahe evocoiyase oyemboviñarete yuvireco. “Yamondo guareepochi chupe” ehi voi eté yuvireco. ⁶ Judas

evocoiyase, “Aviye” ehi. Oseca voi ava porēhiseve Jesús mundo ãgua yamotarēhimbar upe.

Yande Yar caru agüer ipa vahe

⁷ Oyepota ari yipindar vahe pan ndayapepoi vahe hu ãgua. Ahe pipeve avei ovesa Pascua pieta resendar yucapri seropovēhesa yepi.

⁸ Evocoiyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru ãgua Pascua pieta resendar —ehi.

⁹ Semimbohe rumo,

—¿Que vo ereipota oromoingatura? —ehi yuvireco chupe.

¹⁰ Evocoiyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sētave supi. ¹¹ Aipo peyera peñeho oí yar upe: “Ore mbohesar oporandu: ‘¿Uma oí pipe vo Pascua pieta resendar orohura che remimbohe rese?’ ehi” peyera. ¹² Evocoiyase ahe omboyecuara oí guasu, ivatendar pēu. Aheve pemoingatura yande caru ãgua —ehi güemimbohe upe.

¹³ Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

¹⁴ Osupitise icaru ãgua apóstol reseve yuviroguapi mesave.

¹⁵ Evocoiyase aipo ehi:

—¡Cueseve tēi eté niha aipota acaru vaherā pe piri Pascua pieta resendar rese che mano ãgua renonde! ¹⁶ Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pipe —ehi.

¹⁷ Evocoiyase oipisi igua ríru, “Aviye ndeu” ehi Vu upe, iyavei aipo ehi:

—Co amondora pēu, perova-rova peyacatu. ¹⁸ Esepia, co pipe suive ndaihu iri chira uva ricuer acoi ouse voi Tūpa mborerecuasa —ehi.

¹⁹ Ipare oipisi pan, “Aviye ndeu” ehi Vu upe. Aipo ohe pare ombohimbohi imondo güemimbohe upe.

—Co che rete, omboyecua imondopirā pe recocuer rese. Na peyera pe mahenduhasa pipe che rese yepi —ehi.

²⁰ Ëgüe ehi avei carusa pare yapo igua ríru rese aipo ehi:

—Co igua ríru pipendar omboyecua che Ru remimbotar ipiasu vahe pēu nara, ahe che ruví ipiyerepirā pe recocuer rese nara. ²¹ Cûritei rumo oime mbia mesave yande piri che mundo vaherā che amotarēhimbar upe. ²² Supi eté imboaviyesa itera che, Ava Riquehir, rese ñehesa yipive imombehupri. ¡Iparaisu catura rumo acoi mbia che mondosar! —ehi.

²³ Evocoiyase aipo ehise, semimbohe oporandu-randu tēi oyeupe: “¿Ava píha Ëgüe ehi?” ehi tēi yuvireco.

¿Ava vo ivate catu vahe?

²⁴ Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ oħesave yuvireco. ²⁵ Evocoiyase Jesús aipo ehi: “Ava mborerecuar co ívi pipendar oyocuai pírata ava yuvireco yepi. Ahe chupe rumo, ‘Mbahe tupri aposar’ ehi yuvireco. ²⁶ Pe rumo Ëgüe ndapeyei chira. Acoi oyemboivate pota vahe, toyemochihivaheño güeco mbegüesa pipe. Acoi ava cuaisar, tihañeco catu ambuae ava rese. ²⁷ ¿Uma píha ivate catu vahe: co mesave oguapi vahe ocaru yuvireco? ¿Sese

ihañeco vahe tie? Acoi mesave oguapi vahe niha. Che rumo co aico pe pâhuve inungar pe rese ihañeco vahe.

²⁸ “Pe rumo peico vahe che rupi yepi opacatú che recoãhasa pipe. ²⁹ Sese che amondo pêu pe mborerecuasa inungar che Ru ombou cheu che mborerecuasa água. ³⁰ Esepiá, pecarura iyavei peihura che mborerecuasave che píri. Iyavei peguapira opacatu judío recocuer rese porandu agua” ehi güemimbohe upe.

Jesús, “Ndaicuai vahe evocoí mbia’ erera cheu” ehi Pedro upe

³¹ Aipo ehi avei yande Yar:

—Simón, Simón, esendu: Caruguar oporandu pe recoãha água rese. ³² Che rumo ayeroqui nde rese nde yeroyasa paneëhi água. Ereyevise cheu, emonguerëhi catu ambuae nde rivireta imoviracua uca água yuvireco oyese —ehi Pedro upe.

³³ —Che Yar, che rumo ayemoingatu voi eté nde rupi che so água nde roquendasave iyavei che mano água nde rupi —ehi Pedro chupe.

³⁴ —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoí mbia” erera mbosapi oyupagüer rupi cheu —ehi.

Virovi ité Jesús recoãha água

³⁵ Evocoiyase Jesús oporandu güemimbohe eta upe:

—Opomondose acoi mbahe riru porëhi, guarepochi riru porëhi, ambuae pe pitaqui ndugüer rerasoëhise, ¿ipane vo acoi mbahe ahese pêu? —ehi.

—Aní eté —ehi yuvireco chupe.

³⁶ Evocoiyase,

—Cûritei, acoi mbahe riru vireco vahe, tovirecoveño, guarepochi riru vireco vahe, tovirecoveño avei; acoi ndovirecoi vahe quise pucu, tomundo oyeaosa quise repirâ. ³⁷ Supi eté amombehu pêu: iyacatu ité imboaviye tupri água co che rese ñehesa imombehupri aipo ehi vahe: ‘Ava vireco ndaseco pôrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

³⁸ Evocoiyase semimbohe aipo ehi yuvireco:

—Ore Yar, cohabe oime ñuvirío quise pucu —ehi.

—Ahe güeraño ité avkiye —ehi güemimbohe eta upe.

Jesús oyeroqui Getsemaní ve

³⁹ Ipare Jesús osẽ oso ivitri Olivo ve. Ahe ivitrive oso yepi, aheve semimbohe yuviraso yuvireco supi. ⁴⁰ Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoëhi água —ehi.

⁴¹ Ipare oyepipi güemimbohe sui, inungar ita imombosa vahe amombrimi, aheve oñenopîha, oyeroqui ⁴² aipo ehi: “Che Ru, ereipotase, che renose eve co mbahe têi sui; tayapo eme che remimbotar fêi, nde remimbotar rupira rumo” ehi.

⁴³ Evocoiyase oyemboycua Tûpa rembiguai chupe, seco momirata água. ⁴⁴ Mbahe-mbahe têi porarasa pipe oyeroqui catu. Ahese sacuvor inungar tuví osẽ ichui otiqui ivive.

⁴⁵ Oñarapuhase oyeroquisa sui, oyevi oso güemimbohe uve. Ahe rumo opaño yuviroque yuvirocua oviharëhisa pipe. ⁴⁶ Evocoiyase,

—¡Mahera opaño peque! Peñarapuha, peyeroqui catu pe viapiëhi ãgua mbahe tẽi pípe —ehi güemimbohe upe.

Jesús oipisi yuvireco

47 Jesúis ñehe viteseve, oyepota ati ava yuvireco chupe. Judas doce semimbohe păhu pendar tenonde secoi. Ahe oyemboa oso sese sovaupite ãgua. 48 Evocoiyase aipo ehi Judas upe:

—Judas, ¿mahera vo che, Ava Riquehir, rovaupitesa pípe che mondo eve che amotarëhimbar upe? —ehi.

49 Semimbohe eta rumo, mbahe-mbahe tẽi repiase, oporandu yuvireco:

—Ore Yar, ¿yawavara yande quise pucu pípe? —ehi yuvireco chupe.

50 Ñepei rumo supindar, pahi rerecuar ivate catu vahe rembiguai nambi yasu cotindar oyasia. 51 Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. 52 Ichui aipo ehi güecasar opacatu pahi eta rerecuar upe, tūparo rārosar upe, tecua pípendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye? 53 Aicose tūparo pípe pe păhuve arí yacatu rupi, na ndapeyapoi eté co nungar cheu. Aviyeño rumo, oyepota ité niha pêu imombehupri Caruguar píratasa pípe mbahe-mbahe tẽi apo ãgua —ehi.

Pedro, "Ndaicuai vahe evocoi mbia" ehi Jesús upe

54 Evocoiyase Jesús oipisi yuvireco, ovíraso pahi eta rerecuar ivate catu vahe rētave yuvireco. Pedro rumo amombri rupive tẽi osaquicue moñaño oso. 55 Aheve ñachimbri pipe oyatapi yuvireco, oyere tupri tata rese oyephe yuvínoi. Aheve avei Pedro ipăhuve chini. 56 Evocoiyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

57 Ahe rumo aipo ehiño:

—Cuña, ndaicuai vahe ité ahe mbia —ehi.

58 Iparemi tẽi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tẽi, ndahei eté rumo che supindar aico —ehi.

59 Ñepei hora paremi tẽi, ambuae aipo ehi chupe:

—Supi eté rumo co ité supi secoi vahe. Esepiá, Galilea iguar ité niha —ehi.

60 Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura. 61 Evocoiyase yande Yar oyemboyere sese. Ahe ramoseve oyemomahenduha: “Co pípe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese. 62 Ahese osë, oyasehó iteanga oso.

Sârosar mara-mara tẽi Jesús vireco yuvireco

63 Evocoiyase ava Jesús rârosar iguayí tẽi yuvirocua-rocua yuvireco sese. 64 Osesacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

65 Iyavei setá mbahe rese oñehe-ñehe tẽi yuvireco chupe.

Jesús serasosa ava ñemonuhasa ivate catu vahesave

⁶⁶ Ahe ari pipe, cōhese, oñemonuha ava judío rerecuar, pahi eta rerecuar iyavei opacatu Moisés porocuaita rese oporombohe vahe yuvireco Jesús reraso uca água ava ñemonuhasa ivate catu vahesave, oporandu mbahe rese yuvireco chupe:

⁶⁷ —¿Supi eté vo nde Poropísiosar ereico? Emombehu ru oreu —ehi yuvireco chupe.

—Amombehuse rumo pēu, ndache reroyai chietera peye —ehi judío rerecuar upé. ⁶⁸ Inungar che aporanduse mbahe rese pēu, pe avei ndapemboyeví chietera cheu viña no. ⁶⁹ Co pipe suive rumo che, Ava Riquehir, aguapira Tūpa mbahe mboavaisaréhi acato cotí —ehi.

⁷⁰ Ichui opacatu ava oporandu yuvireco chupe:

—Evocoiyase, ¿nde ité ereico Tūpa Rahir? —ehi.

—Supi eté niha aipo aipo peye cheu —ehi mborerecuareta upé.

⁷¹ Evocoiyase ahe aipo ehi yuvireco:

—¡Indó! ¿Ava iri vo evocoiyase mbahe omombenhura yandeu? Yasendu niha iñehe ité cute —ehi mborerecuareta oyeupe yuvireco.

23

Jesús serasosa mborerecuareta Pilato rovai

¹ Evocoiyase opacatu ava opūha yuvireco Jesús reraso água mborerecuareta Pilato rovai. ² Aheve oñehengapo aipo ehi yuvireco:

—Orosepia co mbia oipihañemoñeta rerova atí uca ava yande recua rupindar aipo ehi: “Pemondoi rene Roma pendar mborerecuareta ivate catu vahe upé guarePOCHI” ehi. Iyavei, “Che Poropísiosar mborerecuareta catu vahe aico” ehi oico —ehi yuvireco Pilato upé.

³ Evocoiyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyeví Pilato upé.

⁴ Evocoiyase Pilato aipo ehi pahi eta rerecuar upé opacatu ava upé avei:

—Che rumo namohai eté co mbia que mbahe oyapo vaherá —ehi

⁵ Ahe ava eta rumo,

—Supi eté opacatu ava oipihañemoñeta mboyeviratí uca opacatu tecua rupindar. Yipindar omboipí Galilea rupi oico. Cúritei co Judea ve ñegüe ehiño ité —ehi ava eta Pilato upé yuvireco.

Jesús imondosa mborerecuareta Herodes rovai

⁶ Pilato osenduse aipo ñehesa oporandu, “¿Supi eté píha co mbia Galilea iguar?” ehi. ⁷ “Ahe pendar ité” ehise yuvireco chupe, ahese omondo Herodes upé, ahe acoi mborerecuareta Galilea rupindar. Ahese avei secoi Jerusalén ve. ⁸ Herodes sorivete Jesús repiase. Esepiá, setá ari osepiá pota tēi serácula anduse yepi. Evocoiyase oipota ité poromondiisa oyapo vaherá oyeoaque viña. ⁹ Sese oporandu atí mbahe rese chupe. Nomboyeví eté rumo Herodes upé. ¹⁰ Aheve opacatu pahi eta rerecuar iyavei Moisés porocuaita rese oporombohe vahe eta seroñrosave oñemoñetañeta tēi sese Herodes rovaque yuvireco. ¹¹ Evocoiyase Herodes osundao eta reseve iñehe mara-mara tēi Jesús upé sese oguayí tēisa pipe yuvireco. Omboyemonde avei turucuar iporañete vahe pipe yuvireco. Ñegüe ehi imboyeví Herodes Pilato upé. ¹² Ahe ari pipe suive oyembori Pilato Herodes rese. Ndoyeambotai vahe tie yipindar yuvireco viña.

“¡Tayaticasa!” ehi Jesús upe yuvireco

¹³ Evocoiyase Pilato opa uca omonuha opacatu pahi eta rerecuuar, judío rerecuareta, opacatu ava eta avei. ¹⁴ Ipare aipo ehi chupe:

—Pe niha Peru co mbia cohabe cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi. ¹⁵ Herodes avei, ‘Ndipoi mbahe sembiapo naporai vahe imano águas’ ehi. Sese omboyeviño Jesús imbou cheu. ¹⁶ Ainupa ucara rumo. Ipare amoseñora —ehi Pilato.

¹⁷ Pascua pieta pipe iya ité Pilato ava upe ñepei soquendapri mose águas.

¹⁸ Opacatú guasu rumo ava oñehe pírata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

¹⁹ Co mbia Barrabás tecua pipe mbahe tēi mopuhasa sui iyavei oportapichisa sui oyeoquenda uca vahe. ²⁰ Pilato rumo omose pota Jesús viña. Sese oporandu iri ava upe imose águas. ²¹ Ahe rumo osapucai pírata catu yuvireco:

—¡Aní, tayaticasa! ¡Tayaticasa curusu rese! —ehi ati-atíño yuvireco.

²² Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca águas, ainupa uca tēira rumo. Ipare amoseñora —ehi.

²³⁻²⁴ Ava rehii rumo osapucai píratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoiyase semimbotar yuvireco” ehiño Pilato ava eta upe. ²⁵ Égüe ehi imose co mbia Barrabás, acoi soquendapri mbahe-mbahe tēi mopuhasa sui, iporapichisa sui avei ava remimbotar rupi. Ipare omondo Jesús sārosar upe ava remimbotar apo águas sese.

Jesús yaticasa curusu rese

²⁶ Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yática águave, ahe mbia upe, “Nde terevosii curusu rese Jesús raquicuei” ehi voiño tēi yuvireco.

²⁷ Ava rehii yuviraso saquicuei. Cuña avei setá oyaseho oviharéhisa ve yuvireco sese. ²⁸ Omaheste rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membrí rese avei. ²⁹ Esepia, oura arí naporai vahe. Ahese aipo peye tēira: ‘Aviye catu acoi cuña nimembíi vahe iyavei ndoicuai vahe imocambu omembri’ peye tēira. ³⁰ Ahese avei ava ivitri uve aipo ehira yuvireco: ‘¡Toviapi ore haríve!’ ehira osiquiyepave. Iyavei ivivate vahe upe: ‘¡Tore mi!’ ehi tēira yuvireco. ³¹ Esepia, égüe ehise ivira yívive vitese, ¿mara ehira vo catu oipise? —ehi cuña eta upe.

³² Iyavei viraso ñuvirío mbia ndaseco pōrai vahe supive yaticapirá yuvireco. ³³ Oyepotase Ava Áca Cangüer serer vahesave, aheve oyatica curusu rese yuvireco. Iyavei oyatica ñuvirío mbia, ñepei mbahe rese ipocosa coti, ambuae evocoiyase mbahe rese ipocoéhisa coti. ³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembiajo yuvireco —ehi.

Sundao evocoiyase iguayiño Jesús turucuar rese oyeupe imboyaho-yaho águas yuvireco. ³⁵ Ava rehii osepia yuvireco; mborerecuareta avei seroñrosave aipo ehi yuvireco chupe:

—Oip̄isiro ambuae ava, toñep̄isiro ru ahe ae ité cute Tūpa Rembiporavo Porop̄isirosar güecosa pipe —ehi yuvireco.

³⁶Iyavei sundao seroñropare omondo vinagre itoihu yuvireco, ³⁷iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñep̄isiro ru nde ae ité! —ehi sundao eta yuvireco chupe.

³⁸Curusu rese ñaca haríve icuachiapri aipo ehi oĩ: “Co judío rerecuar guasu” ehi.

³⁹Evocoiyase ndaseco pōrai vahe yaticapri iñehe mara tēi chupe aipo ehi:

—¡Nde Porop̄isirosar ereicose, eñep̄isiro ru nde ae, ore avei ru ore p̄isiro eve! —ehi chupe.

⁴⁰Ambuae evocoiyase aipo ehi voi ondugüer uve:

—¿Nderesiquiyeimi rutaí vo Tūpa sui? Nde avei niha ocañi tēi vaherā. ⁴¹Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoëhi pipe sui tēi na ehi serecosa —ehi ondugüer upe.

⁴²Evocoiyase aipo ehi iri:

—Jesús, che paraísuerecomi tēi eve nde eremboipise nde mborerecuasa —ehi.

⁴³Evocoiyase omboyevi chupe:

—Supi eté co pipe ereicora tecua apirëhi vahesave che rupi —ehi Jesús ahe mbia upe.

Jesús mano agüer

⁴⁴Osupitise rumo mbiter ari, opa tupri p̄itu ivi rupi; las tres pipe rumo opa icatu. ⁴⁵Ari avei ogüe tupri, turucuar guasu tūparo asiasa avei mbiter rupi tupri ovo. ⁴⁶Evocoiyase Jesús oñehe p̄irata:

—¡Che Ru, amondo che espíritu ndeu! —ehi.

Aipo ohe pare voi omano.

⁴⁷Evocoiyase Roma iguar sundao rerecuar osepiase co mbahe poromondiisa Tūpa mboeteisa pipe aipo ehi:

—Supi eté co mbia ndaseco marai vahe —ehi.

⁴⁸Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tēi oyepihamondiisa pipe yuvireco.

⁴⁹Opacatu avei ava oicua vahe Jesús, ipähuve cuña Galilea sui yugüeru vahe, osepiáño tēi amombrive co nungar mbahe yuvireco.

Jesús apocatu agüer tuvipa pipe

⁵⁰⁻⁵¹Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar secoi. Ahe mbia viroya vahe ité Tūpa ombou vaherā ombererecuasa pipe mbahe moingatu água. Sese ndahei ipihañemoñeta rupi co mborerecuar oyapo vahe mbahe Jesús upe yuvireco. ⁵²Evocoiyase ahe oso Pilato rëtave oporandu água Jesús rehögüer rese. ⁵³Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohoprí ndiporusa vítei vaheve yuvireco. ⁵⁴Esepia, ahe ari omoingatu mbahe mbituhusa ari upe nara, ahe mbituhusa rumo osupiti pota ité.

55 Cuña yugüeru vahe Jesús rupi Galilea sui, yuvirasoño ité suvipave, osepia sehögür apocatuse yuvireco. ⁵⁶ Oyevise güetave yuvireco omoin-gatu mbahe siacua vahe tehögür resendar ipichi água.

24

Jesús ocuerayevi

Ahe cuña opituhu mbituhusa ari pipe judío porocuaita reroyasave yuvireco. ¹ Cõhe ramomise domingu pipe, oyevi yuviraso tuvipave mbahe siacua vahe reseve. ² Oyepotase yuvireco tuvipave, osepia soquendasas ita guasu ndipo irise güendagüerve. ³ Evocoiyase yuviroique voi tuvipa pipe. Ndoyosui rumo yande Yar rehögür yuvireco. ⁴ Ndoyembovihai tẽi; ndoicatu iri. Ahese aviyeteramo tẽi osepia ñuvirío mbia iturucuar sendi vahe oipive yuvireco. ⁵ Opaño ñaca iviso ivi coti yuvireco osiquiyepave. Evocoiyase co mbia aipo ehi yuvireco chupe:

—¡Mahera peseca tuvipa pãhu rupi ava oicove vahe! ⁶ Ndipoi mo cohabe; ocuerayevi mo ahe. Peyemomahenduha iñehengagüer ivi Galilea rupi omombehu vahecuer rese, ⁷ “Che, Ava Ríquehir, imondoprira ava angaipa viyar povrîve, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

⁸ Evocoiyase cuña oyemomahenduha voi Jesús ñehengagüer rese yuvireco. ⁹ Oyevise tuvipa sui yuvireco, omombehu opacatu co once apóstol yuvirecoi vahe upe, opacatu ambuae upe avei. ¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no. ¹¹ Apóstol upe rumo oyeupe mombehuse aviyé aipo ehi tẽi vahe; ndoviroyai eté yuvireco.

¹² Pedro rumo yandu ramoseve voi, osẽ, oña oso tuvipave. Omahese tuvipa pipe, turucuar güeraño osepia co cotimi tuise. Evocoiyase oyepihamondii tẽi ‘¿mara ehi rutei pîha?’ oya oyevi oive oso.

Jesús oyemboyecua ñuvirío güemimbohe upe tecua Emaúspiar rupi

¹³ Ahe ari pipeve caharuse, ñuvirío semimbohe yuviraso tecua Emaús ve. Ahe once kilómetro tecua Jerusalén sui. ¹⁴ Ahe perí rupi oñemoñeta yuviraso opacatu co mbahe oime vahecuer rese. ¹⁵ Oñemoñeta viteseve, Jesús teiteté oyemboya sese, oguata supi. ¹⁶ Yepe osepia tẽi, ahe rumo ndoyepiacua ucai eté chupe. ¹⁷ Evocoiyase Jesús oporandum chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovihai yuvinoha. ¹⁸ Ipãhu pendar Cleofas serer vahe omboyevi chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

¹⁹ Evocoiyase,

—¿Mbahe vo oime yandeu? —ehi.

—Jesús mo Nazaret pendar, ahe Túpa ñehe mombehusar seco pírata vahe opacatu mbahe apo água, mbahe mombehu água avei Túpa rovaque iyavei opacatu ava rovaque. ²⁰ Omondo pahi rerecuuar iyavei yande rerecuareta yamotaréhísave yuca uca água curusu rese yuvireco. ²¹ Ore rumo oroyeroya ité sese. “Ahe yande písrora yande amotaréhimbar sui” orohe chupe viña. Cûritei rumo opa mbosapi ari yucare. ²² Ore

pāhu pendar cuña ndore mbovihai eté oyevise suvipa sui yuvireco. Esepiá, yipindar yuvirasose añihiveive tuvipave,²³ ndoyosui eté sehōgür yuvireco. Ahese aipo osepiá Tūpa rembiguai aipo ehi vahe yuvireco chupe: "Jesús mo oicove cûritei" ehi. Ahe evocoiyase yugüeru imombehu oreu.²⁴ Iyavei ambuae ore ndugür yuvirasose tuvipave cuña remimombehu rupi tupri avei. Ndosepiai eté rumo Jesús yuvireco —ehi Cleofas chupe tupri ité.

²⁵ Evocoiyase aipo ehi ahe ñuvirío mbia upe:

—¡Ndapeicuái eté rumo pe piha pipe seroya tupri água opacatu Tūpa ñehe mombehusar remimombehugür!²⁶ ¿Ndapeicuái vo Poropísírosar iparaisu rane itera mbahe-mbahe tēi virecosa pipe güecua porañetesave güeique água renondeve? —ehi.

²⁷ Ipare opa omombehu icuachiapri Moisés cuachiar pipendar iyavei opacatu Tūpa ñehe mombehusar cuachiar pipendar oyese ñehe agüer.

²⁸ Oyepotase ahe tecuave yuviraso, Jesús rumo aviyé oguataño vite vaherá senonde.²⁹ Co mbia rumo oñeho yuvireco chupe:

—Epitaño ore piri, caharu etepri. Pítura moco ndeu —ehi yuvireco chupe.

Evocoiyase oique, opitaño ipiri yuvireco.³⁰ Oguapise yuvínoi mesave, oipisi pan, "Aviye ndeu" ehi Tūpa upe. Ipare ombohi co ñuvirío mbia upe imondo.³¹ Ahese voi semimbohe omahecua ramo yuvireco sese, ahe rumo cûriteimi ndoyemboyecua iri sovai chupe.³² Evocoiyase aipo ehi oyeupe yuvireco:

—Yande mbopihañemoñeta píratami eté peri rupi oñehese yandeu co tecocuer icuachiapri rese —ehi yuvireco.

³³ Ipare ndopita pucu iri; oyeviño voi yuviraso tecua Jerusalén ve. Aheve osepiá once tupri vahe apóstol, omboetasa avei.³⁴ Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepiá, oyemboyecua ité Simón upe —ehi.

³⁵ Evocoiyase ahe avei omombehu, "Oreu avei oyemboyecua oroguatase peri rupi. Ombohise pan ore piri, ahese ramo oroicua" ehi yuvireco omboetasa upe.

Jesús oyemboyecua güemimbohe eta upe

³⁶ Ahe oñeho viteseve yuvireco co tecocuer rese, ahese Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

³⁷ Ahe rumo oyembosiquiye guasu yuvireco 'hágür revo' oyapave.

³⁸ —¡Mahera pesiquiye! ¡Mahera pereco vite pe poreroyaëhisa pe piha pipe!³⁹ Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepiá, ava hā ndovirecoi voho iyavei ocangüer; che rumo areco ité —ehi güemimbohe eta upe.

⁴⁰ Aipo ohe viteseve omboyeapa opo, opí avei chupe.⁴¹ Ahe rumo vorivetesá pipe iyavei oyepihambosiquiye vitesa sui ndoviroya tupri vitei eté yuvireco. Evocoiyase aipo ehi:

—¿Perecomi vo mbahe yande caru água? —ehi güemimbohe upe.

⁴² Evocoiyase omondo pira apiremi oyí vahe yuvireco chupe.⁴³ Ipare oipisi, ohu opacatu güemimbohe rovaque.⁴⁴ Ipare aipo ehi:

—Co rese acoi añehe vichico cuese pe rese aico vitese che mano renondeve. Yaviye ranera opacatu ñehesa che resendar Moisés porocuaita cuachiapri pipe, iyavei Tüpa ñehe mombehusar yuvirecoi vahe rembicuachiagüer pipe, Salmo pipe avei —ehi.

⁴⁵ Ëgüe ehi evocoiyase opacatu osenducua uca aracahendar icuachiapirer güemimbohe upe ⁴⁶ aipo ehi:

—Co icuachiasa Poropísiosar iparaísura omano ãgua. Ipare mbosapi arí pare ocuerayevira. ⁴⁷ Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tüpa upe pẽu ñeroi ãgua” hesara. ⁴⁸ Pe niha peico opacatu co nungar mbahe repiasar imombehu ãgua. ⁴⁹ Che amboura che Ru remimombehu pe harive. Pepitañora rumo cohabe tecua Jerusalén ve acoi peipisise voi píratasa íva suindar —ehi güemimbohe eta upe.

Ivave Jesús so agüer

⁵⁰ Evocoiyase Jesús yuvirase tecua sui yuviraso tecua Betania popive. Aheve ñuvirío opo omopuha, osovasa mbahe tupri reime ãgua chupe.

⁵¹ Ipare oyepepi güemimbohe sui. Ahe ramoseve serasosa ivave.

⁵² Semimbohe evocoiyase osapucai imboeteisave. Ipare oyevi Jerusalén ve vorivetesu pipe yuvireco. ⁵³ Iyavei ahe arí yacatu rupi yuviraso túparo guasu pipe osapucai Tüpa mboeteisave yuvireco yepi. Aipo rupive.

JUAN REMBICUACHIA JESUS RECOCUER RESENDAR SAN JUAN

Tūpa Ñehe oyeapo ava

¹⁻² Jesúz yipisuive ité Tūpa Ñehe secoi. Ahe oicove mbahe apoëhi viteseve Tūpa rese. Esepia, ahe niha Tūpa secoi. ³ Ipipe avei Tūpa opacatu mbahe oime vahe oyapo; ndipoi eté mbahe sembiapoëhi. ⁴ Jesúz niha vireco tecovesa apirëhi vahe oyese. Ahe tecovesa tesapesa nungar secoi opacatu ava upe. ⁵ Ahe tesapesa omboycua tecocuer supi eté vahe pitumimbi nungar mbahe naporai vahe aposar pâhuve. Ahe mbahe tēi aposar rumo ndoicatui eté secopi yuvireco.

⁶ Oime mbia Tūpa remimbou. Ahe Juan serer vahe. ⁷ Ahe rumo ou co tesapesa cua uca ägua ‘toviroya opacatu ava yuvireco’ ohesave. ⁸ Ahe rumo ndahei eté tesapesa; imombehusar tēi rumo secoi. ⁹ Co tesapesa supi eté vahe osesape opacatu ava. Ahe ou ité co ivi pipe.

¹⁰ Yepe tie ipipe yapopri opacatu ava viña, sembiapo rumo ndoicuai co ivi pipe secoise yuvireco. ¹¹ Supi eté ouse güecuave, secua pendar ae rumo ndoipisi yuvireco. ¹² Opacatu rumo acoi oipisi vahe seroyasave yuvireco, ahe chupe omondo ñecuñarosa Tūpa rahir seco ägua yuvireco. ¹³ Ndahei rumo co ivi pipendar rahir nungar que oha vahe ambuae ava remimbotar pipe tēi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande pâhuve co ivi pipe oporoaisusave mbahe supi eté vahe aposa pipe. Iyavei orosepia ité seco porañetesa. Co seco porañetesa oipisi vahe Vu sui Tahir ñepei vahe güeco pipe. ¹⁵ Juan niha oñeha sese ava upe aipo ehi: “Co uve niha acoi aipo ahe vahe cuese: ‘Acoi ou vaherä che raquicuei, ahe ivate catu vahe che sui. Esepia, yipive ité secoi che yesuëhi viteseve’ ahe” ehi.

¹⁶ Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi. ¹⁷ Mborocuaita yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu. ¹⁸ Ndipoi eté ava osepia vahe Tūpa; Tahir ñepei vahe, secoi vahe ité ipiri, ahe oicua uca yandeu.

Juan Oporoäpiramo vahe oñeha Jesucristo rese

¹⁹ Judío rerecuar guasu tecua Jerusalén pendar oyocuai pahi eta iyavei ipitivisareta imondo Juan uve ‘¿Ava vo nde? tehi yuvireco chupe’ oyapave icua ägua. ²⁰ Ahe rumo oyemombehu ité aipo ehi:

—Che ndahei eté Poropísiosar aico —ehi.

²¹ Evocoiyase oporandum iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoiyase,

—¿Nde tie acoi Tūpa ñehe mombehusar ou vaherä? —ehi yuvireco chupe.

—Aní eté —ehi.

²² —¿Ava rutei vo evocoiyase nde? ¡Emombehu oreu ore oromombehu vaherä ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

23 —Che aico oñeho vahe ivi iporupirēhisa rupi aipo ahe: ‘Pemoingatu pe recocuer yande Yar yepotase nara’ ahe pēu. Ahe inungar acoi Tūpa ñehe mombehusar Isaías aipo ehi vahe aracahe —ehi.

24 Ahe yuviraso vahe chupe, fariseo remimondo yuvirecoi,
25 oporandu yuvireco chupe:

—Evocoiyase ndahei niha aipo nde Poropisírosar, ndahei avei Elías, ndahei eté Tūpa ñehe mombehusar imombehupri ereico. ¿Mahera ru evocoiyase ereporoāpiramo? —ehi yuvireco chupe.

26 Evocoiyase fariseo upe aipo ehi:

—Che rumo i pipe aporoāpiramo; oime rumo mbia pe pāhuve ndapeicuai vahe. 27 Ahe co ivi pipe ou vaherā che raquicuei. Che rumo ndahei eté seco catupri vahe aico ipitaquisā yora água —ehi.

28 Co opacatu mbahe yaposa tecua Betania ve, iai Jordán rovai añihivei coti. Aheve Juan oporoāpiramo yepi.

Tūpa remimbou Ovesa nungar opacatu ava angaipa repirā

29 Ahere ayihive Juan osephia Jesús oyemboyase oyese aipo ehi: “¡Pe-se-pia, co Tūpa remimbou Ovesa nungar seropovēhepirā opacatu ava angaipa mocañi água! 30 Añehese sese aipo ahe: ‘Che raquicuei oura mbia ivate catu vahe che sui. Esephia, yipive vahe ité che sui’ ahe acoi cuese. 31 Che rumo yipindar ndaicuai ahe yande remiaro ou vaherā. Sese niha aporoāpiramo i pipe vichico imboyecua água che mu judío yuvirecoi vahe upe” ehi.

32 “Che asephia Espíritu Santo ogüeyise iva sui inungar apicasu, opita tupri iharive” ehi. 33 “Yipindar rumo ndaicuai eté. Tūpa che cuai vahe rumo che poroāpiramo água i pipe, aipo ehi cheu: ‘Acoi eresepiase Espíritu Santo ogüeyise, opitase mbia harive, ahe mbia oporoāpiramora Espíritu Santo pipe’ ehi. 34 Che niha asephia ité. Sese, ‘Co Tūpa Rahir ité secoi’ ahe pēu” ehi.

Yipindar vahe Jesús remimbohe

35 Ahere ayihive Juan secoi aheve avei ore ñuvirío mbia oroico vahe reseve. 36 Jesús ore cuñse, Juan aipo ehi oreu:

—¡Pe-se-pia, ndo co mbia Tūpa remimbou Ovesa nungar seropovēhepirā! —ehi oreu.

37 Aipo ihe ramoseve, oroguata voi eté supi. 38 Evocoiyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoiyase,

—Porombohesar, ¿que vo nde recosa? —orohe chupe.

39 —Yaso, tapesepia ru —ehi oreu.

Evocoiyase oroso, oroyepota las cuatro pipe secosave. Aheve ore pítu ité ipiri.

40 Simón Pedro rívrí, Andrés, ahe che nduguer ahese. 41 Ahe rane aipo oseca viquehir Simón aipo ehi chupe:

—Orosephia ité Poropisírosar —ehi (‘Cristo’ oyapave).

42 Ipare voi, víraso Simón Jesús uve. Osepiase, Jesús aipo ehi chupe:

—Nde Simón, Juan rahir, ndererguā rumo Cefas —ehi (‘Pedro’ oyapave).

Jesús oñeho Felipe upe, Natanael upe avei oyeupi iguata água

⁴³ Ahere ayihive voi Jesús ipihañemoñeta oso áqua iví Galilea rupi. Aheve osephia Felipe, aipo ehi chupe:

—Erio che rupi —ehi.

⁴⁴ “Aviye” ehi Felipe, ahe Pedro iyavei Andrés recua Betsaida pendar secoi. ⁴⁵ Ipare oso Natanael reca, aipo ehi chupe:

—Orosephia Poropisírosar, sesendar acoi Moisés oicuachía cuachiar porocuaita resendar pipe aracahe, oicuachía avei sesendar Túpa ñehe mombehusareta yuvireco. Ahe Jesús, José rahir, tecua Nazaret pendar —ehi.

⁴⁶ Natanael rumo aipo ehi:

—¿Oime píha yuvinose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe —ehi.

⁴⁸ —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira higueravrive ereicose —ehi Natanael upe.

⁴⁹ —Porombohesar, jnde niha Túpa Rahir ereico, Israel iguar rerecuar guasu! —ehi Natanael chupe.

⁵⁰ —¡Che reroya voi eté acoi, “Oroepia iviravrive” che he sui tēi eve! Eresepiara rumo co mbahe sui aviye catu vahe —ehi.

⁵¹ Iyavei aipo ehi opacatu upe:

—Supi eté pesepiara iva oyemboi tuprise iyavei Túpa rembiguai eta igüeyise che, Ava Riquehir, upe, iyevise avei ivave yuvireco —ehi.

2

Mendas tecua Caná ve

¹ Ipare imombosapisa ari pipe, oime mendasa tecua Caná ve, Galilea iví rupi. Jesús si avei secoi aheve, ² iyavei Jesús ore semimbohe oroco vahe reseve ore soho avei yuvireco aheve. ³ Ëgüe ehi rumo opa tēi uva ricuer. Evocoiyase Jesús si,

—Ndipo iri uva ricuer —ehi chupe.

⁴ —Cuña, ¿mahera vo aipo ere cheu? Che remimbotar rumo ari ndoyepota vitéi cheu —ehi osi upe.

⁵ Ichi rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

⁶ Aheve oime seis cambuchi guasu ita cuhi apopri, ñepei-peí cambuchi pipe oique cincuenta litro, amove oique setenta litro i pipe. Ahe judío oiporu pietase oyepoi áqua yuvireco Túpa porocuaita mboaviye áqua yepi.

⁷ Evocoiyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Omboapipopa tupri yuvireco. ⁸ Evocoiyase aipo ehi ava ihañeco vahe upe:

—Penosemi chihí, peraso pieta rese hañecasar uve —ehi.

Ëgüe ehi eté yuvireco. ⁹ Ihañeco vahe pieta rese osâha i oyeapo vahe uva ricuer. Ndoicuái eté que sui osé ahe uva ricuer; igua rese ihañeco vahe güeraño tupri oicua yuvireco. Evocoiyase pieta rese hañecasar oñehé cuimbahe omenda vahe upe ¹⁰ aipo ehi chupe:

—Opacatu ava omondo uva ricuer aviyé catu vahe yipindar. Ipare acoi ava hitaropase yuvireco, omondo ndasepii vahe. Nde rumo ereyapocatupaño aviyé catu vahe, ahe cüritei ramo erenose —ehi.

¹¹ Co yipindar vahe poromondiisa Jesús oyapo vahe aheve. Ipipe omboyeecua güeco píratasa. Sese semimbohe viroya ité yuvireco.

¹² Ipare oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro arí tēi.

Jesús omombopa ava mbahe rerecosar tūparo pipe sui

¹³ Ipare judío upendar Pascua pieta yepota senise, Jesús oso Jerusalén ve. ¹⁴ Aheve osepia tūparo guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvínoi. ¹⁵ Co mbahe repiase rumo, Jesús oyapo tucumbo omombopa tupri tūparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otíapi-apíi iguarepochi ivi rupi, iyavei imesa opa omombo. ¹⁶ Apicasu mondosarea uve aipo ehi:

—¡Penosepa co mbahe cüritei ave sui! —ehi—. ¡Aní che Ru rēta mbahe mondosa tēi pereco! —ehi.

¹⁷ Aipo hese, ore oroyemomahenduha ñehesa icuachiapri aracahendar aipo ehi vahe rese: “Nde rēta rese che recatéhisa sui che mochañira” ehi vahe.

¹⁸ Evocoiyase judío mborerescuar yuvirecoi vahe oporandu yuvireco chupe:

—¿Mbahe vo ereyapora nde mborerescuasa moporéhi água oreu cüritei? —ehi yuvireco chupe.

¹⁹ Evocoiyase,

—Pemondurupa co tūparo, che evocoiyase mbosapi arí rupive amopuha irira —ehi judío eta upé.

²⁰ Aipo hese, mborerescuar aipo ehi yuvireco chupe:

—Co tūparo rumo imopuhasa cuarenta y seis aravíter rupi, ¿ereicatura píha aipo nde imopuha irí mbosapi arí rupive? —ehi yuvireco chupe.

²¹ Oñehese Jesús tūparo rese, güete upé tēi rumo aipo ehi.

²² Ocuerayevise rumo manosa sui, ore oroyemomahenduha ñehesa icuachiapri pipe iyavei semimombehugüer.

Jesús oicua opacatu ava recocuer

²³ Jesús secoi vitese Jerusalén ve Pascua pieta pipe, setá ité ava viroya osepiase poromondiisa sembiapo yuvireco. ²⁴ Ndoyeroyai eté rumo ahe ava eta rese. Esepia, opacatu ité ava recocuer oicua. ²⁵ Ndipoi eté que ambuae ava piñañemoñeta mombehu água chupe. Esepia, ahe ité opa oicua.

3

Nicodemo omoñeta Jesús

¹ Oime mbia fariseo, Nicodemo serer vahe, ahe mbia mborerescuar judío pähuve secoi vahe. ² Ahe oso Jesús piri pítu pipe, aipo ehi chupe:

—Porombohesar, orocua ité Tūpa nde mbouse ore mbohe água —ehi—. Esepia, ndipoi eté que ava oicatu vahe evocoi nungar poromondiisa apo Tūpa oyese secoéhise —ehi.

³ Evocoiyase,

—Supi eté aipo ahe ndeu: acoi ava ndoyesu piasu iri vahe, ndoiquei chietera Tūpa mbororecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyesu piasu iri ocuacua pipe viña? —ehi—.
¿Oicatu irira pīha osi aviterve oique oyesu iri águia? —ehi Jesús upe.

⁵ Jesús omboyevi chupe:

—Supi eté aipo ahe ndeu: acoi ava i pipe iyavei Espíritu pipe ndoyesui vahe, evocoi nungar ndoyuviroiquei chira Tūpa mbororecuasave. ⁶ Acoi oyesu vahe co ivi pipendar oyesupa sui, inungar tupri avei ahe; Espíritu pipe oyesu vahe rumo, ahe espíritu. ⁷ Ereyepihamondii rene, ‘Peyesu piasu irira’ ahese ndeu. ⁸ Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Ëgüe ehi avei ava oyesu vahe Espíritu pipe —ehi Jesús chupe.

⁹ —¿Mara ehi pīha aipo evocoiyase? —ehi Jesús upe.

¹⁰ —¡Nde niha porombohesar ivate vahe Israel pendar ereico, nderesenducuai eté rumo co nungar mbahe! —ehi chupe—. ¹¹ Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu. ¹² Añehet tēi niha mbahe co ivi pipendar rese pēu; ndache reroyai eté rumo peye. Tahetru revo mbahe ivi pendar amombuhuse pēu ndaperoyai chietera viña —ehi.

¹³ “Esepia, ndipoi eté ambuae ava ivave oyeupi vahe; che güeraño, Ava Riquehir, ivi sui agüeyi vahe pēu. ¹⁴ Inungar Moisés osupi ivate mboi rahanga ivi iporupirēhisa rupi aracahe. Ëgüe ehi aveira che, Ava Riquehir, rerecosa ivate che rupira yuvireco ¹⁵ opacatu ava che reroyasar tecovesa apirēhi rereco água yuvireco” ehi Jesús Nicodemo upe.

Tūpa poroaisusa ava upe nara

¹⁶ “Supi eté Tūpa osaisú iteanga opacatu ava. Sese ombou Guahir ñepei vahe ‘tocañi tēi eme che Rahir reroyasar yuvireco’ oya, ‘tovireco tecovesa apirēhi vahe’ ohesave. ¹⁷ Esepia, nombou Tūpa Guahir co ivi pipe ava mocañi tēi água; ahe rumo ombou ava písiró água.

¹⁸ “Ava viroya vahe Tūpa Rahir, ndahei eté ocañi tēi vaherā; acoi ava ndoviroyai vahe rumo, oipisi itera cañisa yuvireco Tūpa Rahir ñepei vahe reroyaēhisa pipe. ¹⁹ Ëgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Caruguar suindar pítumimbi vahesave güeco água yuvireco. ²⁰ Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaēhisave. ²¹ Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tūpa remimbotar oyapo vahe cua uca água opacatu ambuae ava upe —ehi.

Juan Oporoāpiramo vahe oñeho iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secoi pucu raimi oporoāpiramo. ²³ Iyavei Juan oporoāpiramo vité Enón ve, Salim rericavé. Esepia, aheve tuvichá i oime. Aheve ava yugüeru oñepiramo uca água. ²⁴ Co rumo mbahe yaposa Juan roquendaēhi viteseve.

²⁵ Evocoiyase Juan remimbohe omboipi ambuae omu judío rese oyecopi-copi vaherā i pipe ñeapiramosa resendar sui tēi yuvireco. ²⁶ Sese yuviraso Juan uve aipo ehi:

—Ore mbohesar, acoi secoi vahe nde rese iai Jordán rovai, sese acoi ereñehé oreu, cūritei ahe oporoāpiramoño tēi iyavei opacatu yuviraso supi —ehi semimbohe yuvireco chupe.

²⁷ Evocoiyase aipo ehi güemimbohe upe:

—Ava ndoicatui mbahe apo Tūpa nombouise chupe. ²⁸ Pesendu tupri té che ñehe cuese: “Che ndahei Poropísicos aico, che rumo senonde imbourpri tēi aico” ahese pēu. ²⁹ Esepia, acoi mendasa oimese, vireco vahe güembircovi ahe imevi, osenduse rumo imboripar iñehe yiví ohá, oyemboviharete sese. Ñgüe ahe avei che cūritei, ayemboviharete Jesús rese. ³⁰ Ahe niha seco ivate catu-catuño itera ari rupi oico; che rumo iví cotí catu aicora ichui —ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co iví pipe oyesu vahe rumo co iví pipendar ité. Sese niha mbahe iví pipendar rese tēi oñehe. Acoi ou vahe rumo iva sui, ivate catu ité opacatu sui. ³² Iyavei mbahe güembiepa osendu vahe reseño ité oñehe. Ndipoi eté rumo semimombehu viroya vahe yuvireco. ³³ Acoi ava viroya vahe rumo iñehe, “Supi tupri ité Tūpa omombehu mbahe” ehi. ³⁴ Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese. ³⁵ Tūpa osaísu Guahir iyavei opacatu mbahe omondo ipove. ³⁶ Opacatu ava viroya vahe Tūpa Rahir, vireco ité tecovesa apiréhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tūpa ñemoirosa ipírata vahe ité yuvireco.

4

Jesús oñehe Samaria pendar cuña upe

¹ Fariseo eta oyandu yuvireco Jesús vireco catuse ava oyeupi oguata vahe iyavei oporoāpiramo catuse avei Juan sui ² (ndahei eté rumo Jesús oporoāpiramo; semimbohe tēi rumo ñgüe ehi yuvireco). ³⁻⁴ Jesús oicuase aipo nungar, osẽ Judea sui, oyevi iri iví Samaria rupi, Galilea ve yuviraso.

⁵ Aheve Samaria iví rese oyepota tecua Sicar serer vaheve yuvireco. Ahe tecua rerovicave oime iví Jacob omondo vahecuer guahir José upe aracahe. ⁶ Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús oguapi mbiter ari potase ocueraise oí. ⁷⁻⁸ Semimbohe eta rumo opacatu yuviraso tecuave mbahe tembihu rerocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chīhi nde i taihu —ehi.

⁹ Cuña, Samaria pendar, rumo omboyevi chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

¹⁰ Evocoiyase omboyevi cuña upe:

—Ereicuase Tūpa porerecosa ndeundar viña iyavei ereicuase ahe ava ndeu i rese oporandu vahe, nde evocoiyase ereporandura sese chupe. Ahe evocoiyase omondora i ndopai vahe ndeu viña —ehi cuña upe.

¹¹—Nderererecoi rumo i renose ãgua. Esephia, co igua ipicucú ité. ¿Que sui vo aipo evocoiyase eremboura i ndopai vahe cheu viña? —ehi cuña chupe—. ¹²Esephia, co igua ore ramoi Jacob oseya oreu. Cohave suiño ité niha ahe oihu, tahir avei oihu yuvireco ichui iyavei opacatu seimba. ¿Nde pîha ivate catu ereico ichui? —ehi cuña chupe.

¹³—Opacatu ava oihu vahe co i, ihuseiño itera yepi, —ehi cuña upe—. ¹⁴Acoi ava oihu vahe rumo i che remimondo, ndihusei iri chietera. Esephia, che amondo vahe i ndopai vaherâ ité. Ahe omboura tecovesa ndopai vahe ava upe —ehi cuña upe.

¹⁵—Nde ava, emboumi ahe i taihu che husei iriêhi ãgua, tanose iri eme i cohabe sui —ehi.

¹⁶—Eso rane nde mer reca, seseve peyu cohabe —ehi cuña upe.

¹⁷—Ndarecoi rumo che mer —ehiño cuña chupe.

—Supi eté aipo ere, nderererecoi eté nde mer. ¹⁸Esephia, cinco tupri erereco nde mer iyavei cûritei erereco vahe nde resendar têi. Supi eté aipo ere: “Ndarecoi che mer” ere cheu —ehi cuña upe.

¹⁹—Nde ava aviye moco Tûpa ñehe mombehusar ereico cheu —ehi—.

²⁰Ore ramoi eta omboetei Tûpa co ivitri rese yuvireco. Pe rumo, judío peico vahe, “Jerusalén ve yamboeteira Tûpa yepi” peye —ehi.

²¹—Che reroya eve cuña, viroví ari pêu peso iriêhi ãgua Tûpa mboetei co ivitri rese iyavei Jerusalén ve. ²²Pe Samaria pendar peico vahe pemboetei têi pe rembiguaëhi. Ore rumo oroicua oromboetei vahe. Esephia, ñepisirosa ou judío sui. ²³Oyepota rumo ari cute, ahe ité co cûritei co pipe suive supi eté Tûpa omboetei vahe, Tûpa Espíritu pipe omboeteira yuvireco. Supi eté Tûpa, “Ëgue tehi che mboetei yuvireco” ehi. ²⁴Esephia, Tûpa niha Espíritu secoi. Sese acoi omboetei vahe oyapora Espíritu pipe supi tupri vahe ité yuvireco —ehi cuña upe.

²⁵Cuña evocoiyase aipo ehi chupe:

—Che aicua Poropisirosar yu ãgua (ahe ‘Cristo’). Acoi ahe ouse, omombehu tuprira opacatu mbahe yandeu —ehi cuña chupe.

²⁶—Che niha ahe aico añehe vahe ndeu —ehi cuña upe.

²⁷Aheseve semimbohe eta oyeví yuvireco, nombovihaipri güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe. ²⁸Ahese cuña oseya tupriño ocambuchi, oso güecuave aipo ehi ava eta upe:

²⁹—Perio, tapesepia pe ava omombehupa tupri vahe che recocuer cheu. ¿Ndahei pîha ahe Poropisirosar? —ehi omu eta upe.

³⁰Evocoiyase ava rehii yuvinose tecua sui, yuviraso Jesús recosave sepia. ³¹Ava yepotaëhi vîteseve, semimbohe eta,

—Ore mbohesar, ecarumi —ehi têi yuvireco chupe.

³²—Oimera rumo ambuae mbahe cheu che moviracua ãgua. Ahe ndapeicuau vahe —ehi güemimbohe eta upe.

³³Semimbohe aipo hese oporandu-randu têi oyeupe yuvireco:

—¿Oime pîha que ava güeru vahe mbahe semihura? —ehi têi yuvireco.

³⁴Güemimbohe upe rumo aipo ehi:

—Che moviracuasa rumo che mbousar porocuaita, ahe ayapora iyavei amboavíye rane itera iporavíqui —ehi—. ³⁵Esephia, pe aipo peye: ‘Ipane vite irungatu yasi mbahe miti ha monuha ãgua’ peye yepi; che rumo aipo ahe pêu: pemahe pe ivirindar ava eta rese. Opa ité opîha omoingatu

yuvireco, ahe inungar mbahe miti ha yaviye vahe. ³⁶ Acoi oporaviqui vahe Tūpa upe ava hā pisi ãgua rese, ahe oipisira sepri yuvireco iyavei semimonuha tecovesa ndopai vaheve nara ité yuvirecoira. Evocoiyase ava upe oñehe vahe iyavei oipisi vahe ava hā ivave nara, oyoya guasu oviharetera ipisipri rese yuvireco. ³⁷ Supi eté co ñehesa aipo ehi vahe: ‘Ñepei eté omaheti vahe; imonuhasar rumo ambuae ité’ ehi. ³⁸ Che opocuai ava hā pisi ãgua ambuae ava poraviquisave; yipindar rumo ambuae oporaviqui ité yuvireco sese. Pe evocoiyase peique iporaviqui agüer rupi —ehi güemimbohe eta upe.

³⁹ Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. ⁴⁰ Evocoiyase ava rehii Samaria pendar yuviraso chupe ‘epítami ore piri’ oya. Evocoiyase opita ipiri ñuvirío ari rupi. ⁴¹ Setá catu iri ava viroya yuvireco iñehe ité renduse. ⁴² Evocoiyase ava eta aipo ehi cuña upe yuvireco:

—Cûritei oroviroya ité cute, ndahei nde ñehe suiño oroviroya. Esepia, ore ité orosendu iñehe cute, oroicua avei ahe supi eté opacatu ava pisirosar ou vahe —ehi ava eta cuña upe yuvireco.

Jesús ombogüera mborerecuar rahir

⁴³ Ñuvirío ari pare, Jesús osē ivi Samaria sui, osoño ivi Galilea ve. ⁴⁴ Ahe ae ité aipo ehi: “Tūpa ñehe mombehusar ndasaísusai ivi rese yuvireco yepi” ehi. ⁴⁵ Oyepotase oiví Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoiyase oyevi iri tecua Caná ve Galilea ivi rese, aheve acoi i tēi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. ⁴⁷ Oyanduse co mbia mborerecuar Jesú yepota Judea sui ivi Galilea ve, ahe ramoseve oso voi seca ‘toso che rêtave, tombogüerami che rahir omano pota vahe cheu’ oya. ⁴⁸ Evocoiyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

⁴⁹ —Che Yar, eyu poyavañomi tēi che rahir mano viteñhiseve —ehi mborerecuar chupe.

⁵⁰ —Eyevi nde rêtave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güëtave. ⁵¹ Amombrí seco viteseve, yuvínoña voi sovañchi sembiguai imombehu:

—¡Nde rahir oicove! —ehi yuvireco chupe.

⁵² Evocoiyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoiyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca ãgua ivi Judea sui oyevise Galilea ve.

¹ Ipare oime judío pieta guasu Jerusalén ve, aheve Jesús oso. ² Ahe tecua roquendipi, Ovesa serer vahe cotí, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe pâve. ³ Aheve ava eta imbaheasi vahe oñeno yugüeru ivi rupi: ndasesapisoí vahe, ndoguatai vahe, ndipindugüei vahe avei i ñemomiisa osáro yuvireco yepi. ⁴Esepia, amove tēi Tūpa rembiguai ogüeyi ahe ivicuarve i momii água, “Acoi ahe rane ocui vahe i ñemomiiseve iye, ocuera voi eté ombaherasisa sui” ehi yuvireco chupe. ⁵Aheve oime mbia ombaherasisa vireco vahe treinta y ocho aravíter rupi. ⁶Osepiase Jesús, ocuera voi eté vireco pucuse ombaherasisa. Evocoiyase oporandu chupe:
—¿Ereipota vo nde cuera água? —ehi chupe.

⁷ Imbaheasi vahe omboyevi:

—Nde mbia, ndipoi eté que ava che mongui vaherā i pipe i ñemomiise. Asáha tēi ‘tacui’ viya. Ambuae rane-raneño rumo yuvírocui che sui yepi —ehi.

⁸ Evocoiyase,

—Epúha, esupi nde rupa, eguata —ehi imbaheasi vahe upe.

⁹ Ahe ramoseve ahe mbia ocuera tupri, osupi vupa, oguata voi oico. Mbituhusa ari pipe tupri rumo ēgüe ehi. ¹⁰Evocoiyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii água —ehi yuvireco chupe.

¹¹ Ahe mbia evocoiyase,

—Che mbögüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

¹²—¿Uma vo aipo ehi ndeu? —ehi judío yuvireco chupe.

¹³ Ahe mbia rumo ndoicua iri ombögüerasar. Sese ndoicatui imboyevi água. Esepia, Jesús aviyeteramo tēi ndoyecua iri ava rehii pâhuve. ¹⁴Coiye rumo Jesús osepia iri tūparove ahe mbia, aipo ehi chupe:

—Ereicua co nde cuerasa cûritei, aní ereyemboangaipa iri mbahe tēi catu reime iri água ndeu —ehi chupe.

¹⁵ Ahe mbia evocoiyase oso voi eté judío eta rerecuar upe ‘Jesús che mbögüera’ oya. ¹⁶Sese judío osaquicue moña iyavei oyuca pota yuvireco mbituhusa ari pipe iporombögüera rese tēi. ¹⁷Ahe rumo aipo ehi:

—Che Ru niha oporavíquiño ité co ari rupi iyavei che aporavíquiño avei —ehiño judío upe.

¹⁸ Aipo hese, judío, “Yayuca ité” ehi. “Esepia, ndahei mbituhusa ari güeraño nomboyeroysi, ahe rumo oyeapo Tūpa nungar, Tūpa uve ‘che Ru’ ohe angahu tēisa pipe” ehi yuvireco chupe.

Tūpa Rahir mbororecuasa

¹⁹ Evocoiyase Jesús aipo ehi judío upe: “Supi eté aipo ahe: Tūpa Rahir ndoicatui eté mbahe apo oyesui tēi, Vu rembiapo mbahe oicua; aheño tupri avei oyapo yepi. ²⁰Esepia, Tu Guahir raisupave omboyeecua opacatu mbahe güembiapo chupe iyavei omboyeecuaño vite itera mbahe poromondiisa tuvicha catu vahe sembiaporã, ‘¡Mara ehi rutei col!’ pehe tēi água chupe. ²¹Esepia, che Ru ombögüerayevi omano vahe iyavei omondo tecovesa chupe. Égüe ehi avei Tahir omondo tecovesa ava upe güemimbotar rupi. ²²Iyavei Tu nomondo iri ava upe sembiapo reprí. Esepia, ombou Guahir upe opacatu píratasa ava upe sembiapo reprí

mondo água.²³ Ëgüe ehi Guahir upe opacatu ava imboetei água yuvireco inungar Tu imboeteipri. Acoi ava Tahir nomboetei vahe, Tu imbousar avei nomboetei yuvireco.

²⁴ “Supi eté aipo ahe pẽu: acoi oyapisaca vahe che ñehe rese, viroya vahe avei che mbousar, ahe virecora tecovesa apirëhi vahe; ndahei chietera imocañipri. Esepia, osẽ manosa sui oipisi tecovesa.²⁵ Supi eté aicua uca pẽu: oura ari imombehupri, cûritei eté co ari oyepota, ava eta omano vahecuer osendura Tûpa Rahir ñehe. Acoi osendu vahe, oicoveño itera.²⁶ Esepia, Tu vireco tecovesa oyese. Ëgüe ehi avei Guahir upe imondo tecovesa rereco água.²⁷ Ombou avei imbororecuá água chupe ava recocuer rese iporandu água. Esepia, ahe Ava Riquehir secoi.²⁸ Peyepihamondii rene aipo che hesa sui. Esepia, oyepotara ari imombehupri, ahese opacatu ava omano vahecuer osendura iñehe.²⁹ Ahese yuvinosera vuvipa sui. Oyapo vahe mbahe tupri, ocuerayevira yuvireco tecovesa apirëhi rereco água; acoi oyapo vahe rumo mbahe naporai vahe, ocuerayevira yuvireco Tûpa ñemoirosa pisí água” ehi Jesús judío rerecuar upe.

Jesús omboyecka tupri ombororecuasa

³⁰ “Che ndaicatui mbahe apo cheyesui tẽi. Che, ‘Pe peyaví vahe mbahe, peipisira che Ru ñemoirosa’ ahe ava ndaseco pôrai vahe upe che cuaita rupi iyavei che amombehu vahe supi tupri ité. Esepia, che ndaipotai che remimbotar tẽi mbahe apo água. Che Ru, che mbousar remimbotar rumo ayapo.³¹ Que cheyese ae tẽi añehese, ahese ndache reroyai chira peye viña.³² Oime rumo ambuae che mombehusar. Ahe supi eté che mombehu pe seroya água; ahe Juan.³³ Pe niha, pemondo ava chupe imbororandu mbahe rese. Ahe semimombehu niha supi tupri vahe ité.³⁴ Yepe ahe supi eté viña, che rumo ndayeroyai ava tẽi che mombehusa rese. Che rumo aipota peñepisiro água. Sese aipo ahe pẽu.³⁵ Juan niha inungar tataendi, ëgüe ehi omboyecka mbahe supi eté vahe. Sese pe peyemboviha raimi tẽi iporombohesa tesapesa nungar pipe peico.³⁶ Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo água. Co mbahe ayapo vahe, ahe ité omboyecka che Ru Tûpa che mbousar.³⁷ Iyavei che Ru avei eté che cuia ucasar. Ahe iñehe rumo ndapesendui vahe ité, iyavei ahe ndapesepiai eté.³⁸ Iñehengaguer icuachiapri avei ndoiquei eté pe rese. Ipipe niha ndache reroyai eté peye che Ru che mbouse.³⁹ Pe peicua tupri pota icuachiapri ‘icuapa tupri pipe revo tecovesa apirëhi yarecora’ peye viña. Co rumo cuachiar che mombehu vahe:⁴⁰ pe rumo ndapeyuu potai eté cheu co tecovesa apirëhi rereco água.

⁴¹ “Ndaipisii eté ava che mboeteisa tẽi.⁴² Iyavei opocua Tûpa ndapesaisuisse.⁴³ Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tẽi oñehe vahe, evocoii nun-gar tẽi peroyara.⁴⁴ Ndapeicatui eté che reroya água peye. Esepia, pe ae tẽi peyemboetei; ndapesecai eté Tûpa ñepei vahe suindar yemboeteisa.⁴⁵ Ndapepiñañemoñetai chira che pe recocuer mombehu água rese che Ru rovai. Moisés peroya vahe ité niha oicuachía pe Tûpa reroyaëhisa chupe imombehu água.⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuachía che resendar ñehesa.

47 Ndaperoyaise ahe sembicuachía, evocoiyase ndapeicatui chietera che remimombehu reroya ãgua” ehi Jesús oamotarëhimbar upe.

6

Jesús oyopoi cinco mil ava

1-4 Ipare Pascua pieta ̄piimi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepiá, osepiá ité yuvireco oyapose mbahe poromondiisa guasu imbaheasí vahe mbogüerase. Oyepotase ̄vi rese yuviraso, evocoiyase oyeupi ̄vitri rese. Aheve oguapi opacatu güemimbohe eta reseve yuvínoi. 5-6 Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã. 7 Evocoiyase Felipe omboyeví chupe:

—Dosciento denario pan ndosupiti chietera que chihí-chihimi ava retacuer viña —ehi.

8 Aipo hese, ñepei semimbohe pâhu pendar, Simón Pedro rivri, Andrés aipo ehi chupe:

9 —Co chihivahe vireco cinco pan, iyavei ñuvirío pira, ¿iyacatura vo co ava retacuer? —ehi.

10 Evocoiyase aipo ehi:

—Pemombehu opacatu upe toguapi yuvireco —ehi güemimbohe upe.

Capihi reimesave opa omboguapi yuvireco cinco mil ava. 11 Evocoiyase oipisi cinco vahe pan, “Aviye ndeu” ohe pare Vu Tûpa upe, opa ombohi-mbohi imondo ava rehii upe. Ëgue ehi avei pira upe, imondopa semimbotar rupi-rupi yuvireco. 12 Opase ava ihitaro,

—Pemonuhapa sumbirer iyemombucaëhi ãgua —ehi güemimbohe upe.

13 Evocoiyase momonuha doce ̄ruova sumbirer yuvireco pan cincomi vahe sui. 14 Evocoiyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tûpa ñehe mombehusar ̄vi pipe” ehi icuachiapri aracahendar pipe —ehi yuvireco.

15 Jesús rumo oicuase ava opíratasa pipe têi güeraso pota ãgua mborere-cuar guasu vireco ãgua oyeupe nara yuvireco, ahese oyeupi iri oso ivate catu. Aheve ahe ae güeco ãgua.

Jesús oguata i hari rupi

16 Pitu ramose ogüeyi yuviraso Jesús remimbohe ipave, 17 yuviroha carite pipe sasa ãgua yuvireco tecua Capernaum ve yuviraso. Ahese pitu ité. Jesús rumo ndoyevi vîtei eté. 18 Ahese oipeyu pîrata ̄vitu, i avei ohitu pîrata. 19 Yuviraso pucumi têi cinco, anise seis kilómetro rupi. Ahese osepiá Jesús yuvireco osupiti senise carite. Ahe i hari rupi oguata oso chupe. Evocoiyase osiquiye ité yuvireco ichui. 20 Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

21 Evocoiyase sorivete yuvireco carite pipe seroha. Iparemi têi oyepota yuviraso oyuvirasosave.

Ava eta oseca Jesús

²² Ahere ayihive ava rehii opita vahe sovai yuvireco, “Semimbohe año rumo yuviraso ñepei vahe carite pipe. Jesú rumo ndosoi eté güemimbohe rupi” ehi tēi yuvireco. ²³ Aheseve rumo ambuae carite viroyepota seru yuvireco tecua Tiberias pendar, acoi Jesú ava remihura pan reroyereroqui agüer rerovicave. ²⁴ Evocoiyase ava rehii oicuase Jesú semimbohe reseve iporéhise yuvireco, yuviroha yuviraso água co ambuae carite pipe tecua Capernaum ve seca.

Jesús, pan nungar; tecovesa apírēhi vahe secoi

²⁵ Oyepotase ava rehii ipa rovai, aheve osepio Jesús yuvireco.

—Ore mbohesar, ¿marase vo ereyepota cohabe? —ehi yuvireco chupe.

²⁶ Evocoiyase aipo ehi chupe:

—Supi eté aipo ahe pēu. Pe rumo che reca peye che pe mbocarusa rese tēi,, ndahei co che poromondiisa reroyasave ité peico pota che rupi. ²⁷ Peporavíqui eme catu tembihu ndasecosei vahe rese; iyacatu rumo peporavíqui tembihu secose vahe rese omondo vahe tecovesa apírēhi. Co tembihu che, Ava Riquehir, amondora pēu. Esepia, che Ru Tūpa omboynecua ité che ichuindar aicose —ehi.

²⁸ Aipo hese,

—¿Mbahe mboravíqui vo oroyapora Tūpa upe? —ehi yuvireco.

²⁹ —Tūpa oipota pe che reroyara peye che semimbou che recose —ehi ava eta upe.

³⁰ Evocoiyase,

—¿Mbahe poromondiisa vo eremboynecua irimira oreu orosepia vaherā nde reroya tupri catu água? ³¹ Esepia, aracahe ore ramoi eta yuvirohu ivi iporupiréhisa rupi. Icuachiapri aracahendar pipe omombahu: ‘Omondo pan ivi pendar semihura’ ehi —ehi ava eta yuvireco chupe.

³² —Supi eté amombahu pēu: ndahei Moisés omundo pan ivi pendar chupe, che Ru rumo omundo chupe. Cūritei che Ru ombou pēu pan supi eté vahe ivi sui. ³³ Esepia, co pan ombou vahe Tūpa ivi suindar ité. Ahe omondora tecovesa ivi pipendar upe —ehi ava eta upe.

³⁴ Evocoiyase,

—Ore mbohesar, embouño catu co pipe suive aipo pan oreu —ehi yuvireco chupe.

³⁵ —Che ité ahe pan aico tecovesa mundo água. Acoi ou vahe cheu ndiyumbiasi iri chietera iyavei acoi che reroya vahe ndihusei chiaveira.

³⁶ Aipo ahe niha acoi pēu. Yepe pe che repia peye viña, pe rumo ndache reroyai eté peye. ³⁷ Opacatu ombou vahe ava che Ru cheu, cheu ité yuguerura; acoi yugueru vahe cheu, aipisira; ndamomboi chietera cheyesui. ³⁸ Esepia, ndayui ivi sui mbahe che remimbotar apo água tēi; ayu rumo che mbousar porocuaita apo água. ³⁹ Che Ru che mbousar ndoipotai que ñepei ava ombou vahe cheu amocañira. Ahe semimbotar rumo che ambogüerayevira ahe ari ipa vahe pipe. ⁴⁰ Che Ru oipota avei opacatu ava oyeroya vaherā che, Tūpa Rahir, che recosa rese. Ipipe vireco aveira tecovesa apírēhi vahe yuvireco. Supi eté ambogüerayevira ari ipa vahe pipe curi —ehi ava eta upe.

⁴¹ Evocoiyase judío eta oñehe-ñehe tēi sese yuvireco, “Che pan aico, agüeyi vahe ivi sui” ihesa rese ⁴² aipo ehi:

—Co niha acoi Jesú, José rahir. Yande yaicua ité tu, ichi avei. ¿Mahera ru, ‘Che agüeyi vahe ivi sui’ ehi no? —ehi yuvireco chupe.

⁴³ Evocoiyase judío eta upe aipo ehi:

—Pepoiño che reroñrosa sui. ⁴⁴ Ndipoi chietera que oicatu vahe ou cheu, nomonguerëhiise che Ru che mbousar; omonguerëhi vahe rumo oicatu yugüeru cheu. Ahe ambogüerayevira ari ipa vahe pipe. ⁴⁵ Tüpa ñehe mombehusar cuachiar pipe aipo ehi: ‘Tüpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evoco nungar yugüerura cheu.

⁴⁶ “Ndipoi eté que ñepei ava osephia vahe che Ru; acoi ichui ou vaheño ité, ahe güeraño tupri ité osephia. ⁴⁷ Supi eté aipo ahe pëu: acoi che reroya vahe vireco tecovesa apirëhi. ⁴⁸ Che pan nungar aico amondo vahe tecovesa. ⁴⁹ Aracahe pe ramoi eta niha yuvirohu ité tembihu maná serer vahe iví iporupirëhisa rupi. Ahe rumo opa iriño ité omano yuvireco. ⁵⁰ Che rumo añahe pan iva sui ogüeyi vahe rese, acoi ava ohu vahe, nomanoi chietera. ⁵¹ Ahe pan oicove vahe niha che aico iva sui ogüeyi vahe; acoi ohu vahe co pan, oicovera apirëhi vaherä ité. Co pan amondo vaherä, ahe che rete ité. Ahe amondora ava recocuer rese” ehi judío eta upe.

⁵² Aipo hese, judío rerecuar oyecopi-copi yuvireco aipo ehi:

—¿Mara ehira vo aipo co imbou tēi güete yande tohu viña? —ehi yuvireco.

⁵³—Supi eté aipo ahe pëu: ndapehuise Ava Riquehir rete, ndapeihuise avei suvi, ndaperecoi chietera tecovesa. ⁵⁴ Acoi ohu vahe che rete, oihu vahe avei che ruvi, vireco tecovesa apirëhi iyavei che ambogüerayevira ari ipa vahe pipe. ⁵⁵ Esephia, che rete supi eté vahe tembihu; che ruvi supi eté vahe avei igua. ⁵⁶ Acoi ohu vahe che rete, oihu vahe avei che ruvi, secoi che rese, che avei aico sese. ⁵⁷ Che Ru, che mbousar, vireco tecovesa. Ichui che aicove; ëgue ehi aveira che husar che sui yuvirecovera. ⁵⁸ Añahe pan iva sui ogüeyi vahe rese. Co pan ndahei maná pe ramoi eta yuvirohu vahe nungar. Esephia, yande ramoi opaño ité omano yuvireco. Acoi ohu vahe rumo co che rete, oicovera apirëhi vaherä ité —ehi ava eta upe.

⁵⁹ Jesúsporombohe co mbahe rese judío ñemonuhasave tecua Caper-naum ve.

Ñehesa tecove apirëhisa resendar

⁶⁰ Osenduse co yembohesa, setá Jesúspuri oguata vahe aipo ehi oyeupe yuvireco:

—Aipo semimombehu yavai eté seroya ãgua; ¿ava vo viroya tēira viña? —ehi yuvireco.

⁶¹ Jesúspumo oicua voi eté iñehe-ñehe tēise co mbahe rese yuvireco, evocoiyase oporandu:

—¿Pemboasiño tie che ñehe? ⁶² ¿Mara peyera pïha che repiase peye che, Ava Riquehir, ayeupise che reco agüerve vicho viña? ⁶³ Espíritu ité niha omundo tecovesa; yande retecuer rumo ëgue ehi tēi vahe. Co amombehu vahe pëu ahe espíritu iyavei tecovesa. ⁶⁴ Oime vité rumo amove pe pâhuve ndache reroyai vahe —ehi ava rehii upe.

Esephia, Jesúspumo oicua ité yipisuive uma ndoviroyai chira, oicua avei uma ava omondora yamotarëhimbar upe ⁶⁵ aipo ehi:

—Sese niha acoi aipo ahe pëu: “Ndipoi chietera que ava ou vaherä cheu che Ru nomonguerëhiise imbou” ahe —ehi.

⁶⁶ Ichuive tupri Jesú斯 rupi oguata vahe setá oseya yuvireco; ndoguata iri eté yuvireco supi. ⁶⁷ Evocoiyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyevi chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apiréhi vahe. ⁶⁹ Ore nde reroyasar ité oroico iyavei oroicua nde ndaseco marai vahe, Tūpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepei rumo pe pāhu pendar caruguar ité —ehi Simón upe.

⁷¹ Jesú斯 oñeha Simón Iscariote rahir, Judas, rese. Yepe doce semimbohe pāhu pendar viña, ahe rumo omondora ava yamotaréhimbár upe.

7

Jesú斯 ndoviroyai tīvri yuvireco

¹ Ipare Jesú斯 oguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco. ²⁻³ Virovise judío pieta guasu teyupa apo ãgua yuvireco, ahese tīvri aipo ehi yuvireco chupe:

—Erepita eme cohabe. Eso ivi Judea ve; ahe pendar nde rupi oguata vahe avei tosepia poromondiisa nde rembiapo yuvireco. ⁴ Esepia, acoi oyapo pota vahe mbahe, noñomi eté mbahe güembia. Nde ereyapo ité mbahe poromondiisa. Sese iya eremboyecua opacatu ava upe —ehi tīvri yuvireco chupe.

⁵ Seroyaéhisave tēi avei tīvri aipo ehi yuvireco chupe. ⁶ Evocoiyase vivri upe aipo ehi:

—Ndehi vītei rumo ari che so ãgua. Pe guata ãgua rumo opacatu aríño tēi avíye. ⁷ Esepia, pe ndape amotaréhii eté ava co ivi pipendar; che rumo che amotaréhi ité yuvireco. Esepia, che amboyecua ité mbahe sembiapo naporai vahe chupe. ⁸ Pesoño pe pieta repia; che rumo ndaso vītei chira. Esepia, ndosupití vītei ari cheundar —ehi vivri upe.

⁹ Evocoiyase Jesú斯 opitaño Galilea ve.

Jesú斯 oso omu judío eta pietasave

¹⁰ Vivireta so pare, Jesú斯 avei oso pietasave. Ndoymboyecuai eté rumo ava upe. ¹¹ Judío eta oseca tēi yuvireco pietasave aipo ehi:

—¿Que pīha acoi mbia? —ehi tēi yuvireco.

¹² Ava rehii pāhuve setá iteanga oñeha yuvireco sese. Amove aipo ehi yuvireco: “Ahe mbia avíye vahe”; ambuae rumo aipo ehi: “Ndahei avíye vahe; ahe rumo ombopa tēi vahe ava” ehi yuvireco.

¹³ Nomboyecuai eté rumo oñeha yuvireco sese güerecuar sui osiquiyepave.

¹⁴ Pieta mbiterse, Jesú斯 aviyeteramo tēi oique ava pāhuve tūparo pipe ava mbohe. ¹⁵ Judío eta rerecuar evocoiyase,

—¡Too, mara ehi rutei! —ehi tēi. —¿Mara ehi vo co mbahecúá iteanga? ¡Ndoymbohei vahe niha yande yeroquisave! —ehi tēi yuvireco.

¹⁶ Judío rerecuar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi. ¹⁷ Que ñepei pe pāhu pendar oyapo potase Tūpa remimbotar, oicuara che porombohesa ndahei vahe che suindar, ahe

Tūpa suindar ité. ¹⁸ Esepio, acoi ava oñeho vahe oyesui tēi, ahe ‘tache mboetei ava yuvireco’ ohesave tēi ēgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

¹⁹ “Moisés niha omundo tēi mborocuaita pēu. Que ñepei pe pāhu pendar rumo ndipoi eté omboyeroya vahe. ¿Mahera ru che yuca pota peye?” ehi.

²⁰ —¡Nde erereco caruguar ndeyese! ¿Ava vo nde yuca pota? —ehiño ava eta yuvireco chupe.

²¹ Aipo ehi ava upe:

—Cuese acoi ayapose mbahe mbituhusa ari pipe, ahese, “¡Too, mahera ēgüe ehi!” peyeño acoi cheu. ²² Pe avei rumo amove peporavíqui mbituhusa ari pipe peporombocircuncidase porocuaita Moisés omundo vahe reroyasave. (Ahe circuncisión rumo ndahei Moisés suindar, ahe rumo yipive vahe pe ramoi suindar ité.) ²³ Oyepotase rumo chihivahé mbocircundida água mbituhusa ari pipe tupri pēu, peyapoño rane ité mborocuaita mboaviye água. ¿Mahera ru cheuño pemboasi ñepei mbia mbituhusa ari pipe ambogüera tupri vahe rese? ²⁴ “Oyaví evocoí” peye voi rene catu ava upe; peicua tupri rane ‘¿supi eté pīha?’ pe yapave —ehi Jesús ava eta upe.

Jesús oñeho güecocuer Tūpa suindar rese

²⁵ Evocoiyase amove Jerusalén pendar mbia aipo ehi oyeupe yuvireco:

—¿Ndahei vo acoi co oseca tēi yuca água yuvireco? —ehi—. ²⁶ Ahe ité co niha co ava pāhuve oñeho oico, ndipoi eté que mara ehi vahe yuvireco chupe. ¿Omoha pīha mborerescuar co mbia Poropísiosar seco água yuvireco? ²⁷ Yande rumo yaicua que sui turi. Acoi ouse rumo Poropísiosar ité coiye, ndipoi chietera que ava oicua vahe iyusa —ehi yuvireco.

²⁸ Evocoiyase aipo renduse oporombohe viteseve tūparove, oñeho pīrata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tēi. Oime rumo che mbousar, ahe seroyapri ité. Ahe pe ndapeicuau vahe. ²⁹ Che rumo aicua ité. Esepio, che ichui ayu iyavei ahe ité che mbou pēu —ehi.

³⁰ Aipo ihese, oipisi pota yuvireco soquenda água viña. Aní eté rumo. Esepio, ndoyepota vitéi ihari chupe. ³¹ Setá iteanga rumo ava viroya iyavei aipo ehi yuvireco:

—Ouse Poropísiosar, ¿oyapo catura pīha mbahe poromondiisa co mbia sui? —ehi yuvireco.

Fariseo oyocuai sundao tūparo rārosareta Jesús pisi água

³² Fariseo eta osendu ava ñehesa Jesús resendar yuvireco. Ahe ité iyavei pahi eta rerecuar omundo sundao tūparo rārosar Jesús pisi água yuvireco.

³³ Jesús rumo aipo ehi:

—Aicove vitemira pe rese chihí rupive. Ipare voi ayevíra che mbousar piri vicho —ehi—. ³⁴ Che reca tēira peye, ndapeicatui chietera rumo che reca. Esepio, ndapeicatui chiaveira peso vaherā che recosave —ehi ava eta upe.

³⁵ Evocoiyase judío oporandu-randu oyeupe yuvireco:

—¿Que pīha aipo osora yande sui seca iriëhi água? ¿Osora tie que amombri yande mu oñemosai vahe pāhu rupi ambuae ava ndahei vahe

yande mu mbohe ãgua? ³⁶ ¿Mara oya pîha evocoiyase aipo, ‘Che reca têira peye, ndapeicatui chietera rumo che reca. Esepiá, ndapeicatui chiaveira peso vaherâ che recosave’ ehi yandeu? —ehi-ehi têi oyeupe yuvireco.

Espíritu iai ndopai vahe nungar

³⁷ Pieta ipa, ahe imboeteisa catu vahe, ahe arî pipe Jesús oñehe pîrata ohâ aipo ehi:

—Acoi que ava ihusei vahe, toyugüeru cheu. Che evocoiyase tamboihu —ehi—. ³⁸ Esepiá, inungar aipo ehi vahe icuachiapri pipe, che reroyasar piha sui osëra iai ndopai vahe nungar —ehi.

³⁹ ‘Che reroyasar oipisira Espíritu curi’ ohesave aipo ehi. Espíritu rumo ndou vitei ahese. Esepiá, Jesús ahese ndoyevi vitei avei güecosa porañetesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi:

—Supi eté co mbia Tûpa ñehe mombehusar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropísiosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui têi oura Poropísiosar viña? —ehi—.

⁴² Icuachiapri pipe rumo aipo ehi Poropísiosar oyesura mborerecuar guasu David sui iyavei ahera Belén pendar, David recua pendar itera —ehi.

⁴³ Evocoiyase ava oyemboyaho-yaho yuvireco Jesús recocuer sui têi.

⁴⁴ Amove ava vîraso pota têi yuvireco soquenda; ndipoi eté rumo ëgue ehi vahe yuvireco chupe.

Judío rerecuar ndovirroyai Jesús yuvireco

⁴⁵ Sundao tûparo rârosar oyevi yuvireco Jesús recosa sui. Fariseo eta iyavei pahi eta rerecuar evocoiyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tûparo rârosar evocoiyase aipo ehi:

—¡Ndipoi eté que ava oñehe vahe ahe mbia nungar! —ehiño yuvireco.

⁴⁷ Fariseo eta iyavei mborerecuareta evocoiyase aipo ehi yuvireco:

—¿Pe avei eté rumo peyembopa uca chupe? —ehi—. ⁴⁸ Ndipoi eté niha ore mboetasa mborerecuar iyavei fariseo viroya vahe yuvireco. ⁴⁹ Co ava rehii têi ëgue ehi yuvireco. Ahe rumo ndoicuai vahe Tûpa porocuaita yuvireco, sese iñemoirosavrive ité yuvirecoi —ehi sundao tûparo rârosar upé yuvireco.

⁵⁰ Evocoiyase Nicodemo, acoi oso vahe pîtu pipe Jesús piri, ahe avei eté fariseo pâhuve secoi, ahe aipo ehi:

⁵¹ —Yandeundar porocuaita mboaviye ãgua ndiyai, “Ereyavî mbahe” yahe voiño têi que ava mbahe sembiapocuaëhi viteseve —ehi.

⁵² Evocoiyase omboyevi yuvireco:

—¿Nde avei tie ereico Galilea pendar? Eyemohe tupri icuachiapri pipe. Ipípe eresepiara ndipoi eté que ñepei ou vahe Galilea sui Tûpa ñehe mombehusar —ehi mborerecuareta Nicodemo upé yuvireco.

Cuña oyemboaguasa têi vahe resendar

⁵³ Ipare opa yuviraso ñepei-peí güëta rupi.

8

¹ Jesú rumo oso ivitri Olivo ve. ² Ahere ayihive cōhese, oyevi tūparove. Ahese opacatu ava oyemboya yuvireco sese. Ahe evocoiyase oguapi oī oporombohe.

³ Evocoiyase Moisés porocuaita rese oporombohe vahe, fariseo eta avei güeru Jesú upe cuña oyemboaguasa tēi vahe yuvireco ava rehií rovai, ⁴ aipo ehi yuvireco chupe:

—Porombohesar, co cuña iyemboaguasase cuimbahe rese osesapiha ñepei ava. ⁵ Moisés porocuaita rumo ore cuai co nungar cuña yuca ãgua ita pipe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoāhasave tēi aipo ehi yuvireco ‘toyaví angahu oñeho yandeu’ oya tēi. Ahe rumo oyaiví, omabahecuaachía ocuā pipe ivi rese.

⁷ Evocoiyase oporandu vitese ava yuvireco, opūha aipo ehi:

—Que ñepei pe pāhu pendar ndoyemboangaipai vahe, ahe rane toyapi ita pipe —ehi.

⁸ Oyaiví iri, omabahecuaachía ivi rese. ⁹ Osenduse rumo judío rerecuartera, omboípi ñepei-peí yuvinose yuvireco, cuacula catu vahe sui rane yuvinose. Opacatu yuvinosepase, Jesú güerañomi cuña rese opita yuvireco. ¹⁰ Evocoiyase opūhase, ahese aipo ehi chupe:

—Cuña, ¿que que ru ava? ¿Ndipoi eté que ñepei opita vahe nde mocañi ãgua? —ehi

¹¹ —Aní eté, che Yar, ndipoi eté —ehi.

Evocoiyase aipo ehi chupe:

—Che avei ndoromocañi tēi potai. Sese cūritei eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesú oñeho iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apiréhi vahe iyavei ndaseco iri chietera pítumimbisa nungar mbahe-mbahe tēi vahe pipe —ehi.

¹³ Evocoiyase fariseo eta aipo ehi yuvireco:

—Nde ereñehe ndeyese ae tēi. Sese nde ñiehesa ndaseroyapri eté —ehi yuvireco chupe.

¹⁴ —Che ñehe rumo supi vahe ité. Yepe cheyese ae añahe viña, che rumo aicua que sui ayu, que asora no. Pe rumo ndapeicuai eté. ¹⁵ Pe peseca ava rembiapo cua tupri ãgua ava tēi pihañemoñeta rupi. Che rumo ndayui evocoí nungar mbahe apo. ¹⁶ Asecase ava rembiapo cua tupri ãgua, ahe supi tupri vahe ité. Esepia, ndahei che ae tēi ëgue ahe, che Ru, che mbousar rumo secoi che rese. ¹⁷ Porocuaita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi. ¹⁸ Supi eté che ae ité niha añahe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo iñese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuara viña —ehi fariseo eta upe.

²⁰ Jesú aipo ehi tūparo pipe, guarepochi monuhapri ríru ipive oporombohe ohā. Ndipoi eté rumo ahese osoquenda vaherā. Esepia, ndoyepota vítei eté ahese ihari chupe.

Jesús, “Che sosave pe ndapeicatui chira peso” ehi

²¹ Jesúz aipo ehi iri:

—Che asose, che reca tēira peye. Pe rumo opara pemano pe angaipa reseve. Che sosave ndapeicatui chietera peso vaherā —ehi.

²² Aipo ihese, judío eta aipo ehi yuvireco:

—¿Oyeyucara pīha ahe ae; ayeve pīha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico.

²⁴ Sese niha acoi aipo ahe pēu: “Pemanopao iterá pe angaipa reseve” ahe. Esepiá, ndache reroysaise peye, pe angaipa reseve ité pemanoñora —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pēu. ²⁶ Setá iteanga areco che ñehe ãqua pēu mbahe pe rembiaví rese. Che mbousar niha supi eté vahe. Ahe iñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese iñehese yuvireco. ²⁸ Sese aipo ehi fariseo upe:

—Pesupise rumo Ava Riquehir ivira rese, ahese voi peicuara che recocuer, ahese avei peicuara cheyesui tēi mbahe ndayapoise; che rumo amombehu che Ru che mbohesa güeraño. ²⁹ Che mbousar niha che rupive ité secoi; ndache reyai eté. Esepiá, ayapoño ité mbahe semimbotar yepi —ehi ava eta upe.

³⁰ Aipo ihese, setá iteanga ava viroya yuvireco.

Ava Tūpa rahir ité yuvirecoi vahe iyavei ava angaipa pipe tēi yuvirecoi vahe

³¹ Evocoiyase Jesúz aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe.

³² Peicua aveira mbahe supi eté vahe. Ahe evocoiyase pe renosera mbiuai nungar pe recosa sui —ehi.

³³ Judío evocoiyase aipo ehi:

—Ore rumo Abraham suindar ité oroico, ndoroicoi vahe ité que ava rembiuai tēi. ¿Mahera ru aipo nde, “Pesëra mbiuai nungar pe recosa sui” ere oreu? —ehiño judío eta yuvireco chupe.

³⁴ Evocoiyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiuai tēi, ñgue ehi oangaipa rereco yuvireco. ³⁵ Mbiuai tēi ndahei güerecuar rēta pipe nara ité; tahir rumo opitaño iterá güeta pipe nara. ³⁶ Sese Tahir pe renosese mbiuai tēi pe recosa sui, supi eté ndapeico iri mbiuai nungar. ³⁷ Aicua niha Abraham suindar pe recosa. Pe rumo che yuca potaño peye. Esepiá, ndaperoyai eté che ñehe. ³⁸ Che niha amombehu che Ru mbahe omboyeucua vahe cheu, pe avei peyapo mbahe pe yesupa remimombehu —ehi judío eta upe.

³⁹ —¡Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña. ⁴⁰ Che rumo, “Tūpa che mbohe mbahe supi eté vahe rese” ahe tēi pēu. Pe evocoiyase che yuca potaño ité peye. ¡Abraham rumo ndoyapoi

eté co nungar mbahe! ⁴¹ Esepiá, pe peyapo mbahe peyesupa rembiapo tēi eté —ehi.

Evocoiyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeíño ité ore yesupa, ahe Tūpa! —ehiño yuvireco.

⁴² Evocoiyase aipo ehi co judío eta upe:

—Tūpa ité pe yesupase rumo, che rāsura peye viña. Esepiá, che ayu Tūpa sui. Sese cūritei coháve aico. Ndahei cheyesui tēi ayu, Tūpa rumo che mbou. ⁴³ ¿Mahera pīha ndapesenducua catui eté mbahe che remimombehú? Esepiá, ndapeyapisaca potai eté che ñehe rese. ⁴⁴ Peyesupa niha Caruguar ité, sese niha pe ahe tuprī avei peico. Peyapo pota mbahe semimbotar tēi. Esepiá, Caruguar yipisuive ité oporoyuca serai vahe. Ndoyapoi vahe ité mbahe supi tuprī vahe, noñehei avei mbahe supi eté vahe rese. Semirasa iñehe ité. Esepiá, semirañete ai vahe ité; ahe ité niha yipindar semira tēi vahe. ⁴⁵ Che rumo añehese mbahe supi tuprī vahe rese, ndache reroyai eté peye. ⁴⁶ ¿Ava pīha pe pāhu pendar oicua mbahe che rembiavi? ¡Aní eté! Che añehé mbahe supi eté vahe rese pēu, ¿mahera ru evocoiyase ndache reroyai eté peye? ⁴⁷ Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

Porop̄isirosar yipive catu vahe Abraham sui

⁴⁸ Evocoiyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, caruguar ité erereco ndeyese —ehi yuvireco chupe.

⁴⁹—Che ndarecoi eté caruguar cheyese. Che rumo che Ru amboetei; pe rumo ndache mboetei eté peye. ⁵⁰ Iyavei che ndasecai ava che mboetei áqua. Oime rumo ñepei oipota vahe. Ahe niha omondora ava rembiapo repri chupe. ⁵¹ Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

⁵² Evocoiyase judío omboyevi yuvireco chupe aipo ehi:

—Cūritei oroicua ité cute nde ererecose caruguar ndeyese. Esepiá, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere? ⁵³ ¿Nde tie ivate catu ereico ore ramoi Abraham sui? Esepiá, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoiyase eremoha ndeyese! —ehi yuvireco chupe.

⁵⁴—Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye. ⁵⁵ Pe rumo ndapeicuai eté. Che rumo aicua. “Ndaicuai” ahese, evocoiyase semirañete ai vahe aicora viña inungar pe peico. Che rumo supi eté aicua. Sese niha omboyeroya iñehe. ⁵⁶ Esepiá, pe ramoi Abraham oyemboviha ‘asepiara ihari oyepotase’ oya cheu. Osepiá ité niha. Sese oviharete ité —ehi judío eta upe.

⁵⁷ Evocoiyase judío eta:

—¿Mara erera vo aipo Abraham repia ndererecomi vitéise cincuenta aravíter? —ehiño yuvireco chupe.

⁵⁸—Supi eté aipo ahe pēu: che aicove vahe Abraham yesuëhi vitéseve —ehi.

⁵⁹ Aipo ihese, oipisipa ita yuvireco yapi áqua. Ahe rumo ahe ramoseve oñemi ava eta pāhuve, osẽño ité oso tūparo sui.

9

Jesús ombogüera mbia ohasa suive ndasesapisoí vahe

¹ Jesú斯 oguatase ocar rupi, osepio mbia ohasa suive ndasesapisoí vahe.

² Ore semimbohe oroico vahe, oroporandu chupe:

—Ore mbohesar, ¿mahera pīha co mbia ndasesapisoí eté oha? ¿Oyesupa angaipa sui pīha? ¿Oangaipa sui ae tie? —orohe chupe.

³ Ndahei eté oangaipa sui, ndahei avei oyesupa angaipa sui; co rumo ēgue ehi Tūpa mbahe sese mboyecua água. ⁴ Sese oime vitese ari yandeu che mbousar poravíquisa apo água, iya ité ahe yayapo. Esepio, pītura, ahese ndayaicatuí chietera mbahe apo. ⁵ Co ivi pipe che recove vitese rumo, che aico ava upe tesapesa nungar —ehi oreu.

⁶ Aipo ohe pare, ondívì ivive, güéndi pipe omoaquí vahe ivi omondo ndasesapisoí vahe resa rese. ⁷ Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondoprí’ oya aipo ehi).

Ndasesapisoí vahe evocoiyase oso, oyovai. Oyevise ichui, omahe tuprī ité. ⁸ Evocoiyase sēta ivirindar iyavei ava oicua vahe sesapisoëhise oporanduse guarePOCHI rese aipo ehi yuvireco:

—¿Ndahei vo acoi co oguapi oí guarePOCHI rese oporandu yepi? —ehi yuvireco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Aviye tuprī ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoiyase oporandu yuvireco chupe:

—¿Mara ere vo co esareco? —ehi.

¹¹ —Acoi mbia, Jesú斯 serer vahe, ahe omoaquimi güéndi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoiyase aso, ayovaise, ahese amahe tuprī ité —ehi.

¹² —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güéta cotindar uve.

Fariseo oporandu ndasesapisoí vahe cuera agüer rese yuvireco

¹³⁻¹⁴ Mbituhusa ari pipe aipo Jesú斯 omoaquimi güéndi pipe ivi ndasesapisoí vahe mbogüera água. Sese viraso ndasesapisoí vahecuer fariseo eta rovai yuvireco. ¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güéndi pipe omoaquí vahe che resa rese. Ichui ayovai. Ipare voi asareco —ehi.

¹⁶ Evocoiyase ambuae aipo ehi yuvireco chupe:

—Aipo mbia ndahei eté revo Tūpa suindar. Esepio niha, nomboetei eté mbituhusa ari —ehi yuvireco.

Ambuae evocoiyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyeavirati tēi ipihañemoñetas. ¹⁷ Sese oporandu iri ndasesapisoí vahecuer upe yuvireco aipo ehi:

—Nde no, ¿mara ehi nde pihañemoñeta co mbia rese? —ehi.

Ahe evocoiyase aipo ehi:

—Che amoha ité Tūpa ñehe mombehusar secose —ehi.

¹⁸ Ahe fariseo rumo ndovíroyai eté icuerasa yuvíreco, oichoho uca rane ité iyesupa yuvíreco. ¹⁹ Chupe oporandu aipo ehi:

—¿Pe rahir ité vo co? ¿Ndasesapiso oha? ¿Mara ehi vo co cūritei osareco no? —ehi iyesupa upe yuvíreco.

²⁰ —Ore rahir ité niha co, ndasesapiso oha. ²¹ ¿Mara ehi vo catu co cūritei osareco? iyavei ¿ava vo catu ombogüera? ¡Ndoroicuai eté! Peporandu chupe. Ocuacua niha; ahe ae oicua ucara pēu —ehiño iyesupa yuvíreco fariseo upe.

²² Iyesupa rumo osiquiyepave tēi aipo ehiño yuvíreco. Esepiá, fariseo opa ité oyemoingatu yuvíreco ava “Jesús Poropísicosar secoi” ehi vahe oñemonuhasa sui ñepei reseve imombo água. ²³ Sese niha iyesupa aipo ehiño yuvíreco: “Peporandu chupe. Ocuacua niha” ehiño.

²⁴ Evocoiyase fariseo güeru uca iri acoi mbia imbogüerapri yuvíreco, aipo ehi yuvíreco chupe:

—Emombehuño oreu Tūpa rovaque mbahe supi tupri vahe. Esepiá, ore oroicua ité evocoí mbia angaipa viyar seco rese —ehi.

²⁵ Ahe evocoiyase omboyeví chupe:

—Che ndaicuai eté angaipa viyar tie revo. Co güeraño catu che aicua: che ndacheresapiso vahecuer aico; cūritei rumo asareco —ehi.

²⁶ Evocoiyase oporandu iri yuvíreco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvíreco chupe.

²⁷ —Amombehu niha acoi pēu. Pe rumo ndache reroyai eté peye. ¿Mahera vo peipota amombehu vité vaherā pēu? ¿Pe avei tie peguata pota supi? —ehi fariseo eta upe.

²⁸ Ahese oñeho rai tēi yuvíreco chupe:

—Nde ahe mbia rupindar tēi ereico. Ore rumo yande ramoi aracahendar Moisés rupi oroguata vahe. ²⁹ Esepiá, oroicua ité Tūpa oñehese Moisés upe. Aipo mbia rumo ndoroicuai eté que sui osé —ehi yuvíreco chupe.

³⁰ —¡Mara peye rutei pe ndapeicuai que suindar ahe! Che rumo che mbosareco. ³¹ Supi eté, yaicua Tūpa ndosendui eté ava angaipa viyar ñehe; ava omboeteisar iyavei víroyasar ñehe güeraño ité niha osendu. ³² Esepiá, ndipoi eté que avaño tēi ava oyeshu sui ndasesapiso vahe ombogüera vahe. ³³ Ahe rumo ndaheise Tūpa suindar ou vahe viña, ndoicatui chietera revo mbahe apo viña —ehi fariseo eta upe.

³⁴ Evocoiyase fariseo eta aipo ehi yuvíreco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi.

Ipare omose ñepei reseve oñemonuhasa sui yuvíreco.

Jesús reroyasareñhi ndasesapiso vahe nungar tēi

³⁵ Jesúz oicua ndasesapiso vahecuer mombosa. Vupitise aipo ehi chupe:

—¿Ereyeroya nde Ava Riquehir rese? —ehi.

³⁶ Mbia evocoiyase aipo ehi chupe:

—Che mbohesar, emombeumi cheu; tayeroya catu ru sese —ehi.

³⁷ —Eremahe niha co sese; che ité ahe aico —ehi ndasesapiso vahe cuer upe.

³⁸ Evocoiyase mbia oñenopíha sovai:

—Orovíroya, che Yar —ehi chupe.

39 Ichui aipo ehi:

—Che ayu co ivi pipe mbahe supi tupri vahe apo āgua; ava ndasesapisoí vahe nungar upe mbahe supi eté vahe che Ru suindar mboyecua āgua iyavei ava oicua tēi vahe mbahe Tūpa suindar mboesapisoéhi iri āgua —ehi.

40 Evocoiyase ambuae fariseo eta yuvirecoi vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapisoí vahe nungar oroico? —ehi.

41 Evocoiyase omboyeví ahe fariseo upe:

—Peicose ndasesapisoí vahe nungar viña, “Peyaví mbahe” ndehi chitera Tūpa pe angaipa rese pēu viña. Pe rumo, “Ore oroicua tupri Tūpa suindar mbahe” peye tēi. Sese Tūpa, “Peyaví mbahe” ehi eté pēu —ehi Jesús fariseo eta upe.

10

Jesús ovesa rārosar nungar

1 “Supi eté aipo ahe pēu: acoi ava co coti rupi tēi yuviroique vahe ovesa rēta pipe, ahe imonda rai vahe tēi yuvirecoi. **2** Oique vahe rumo oquendipí rupi eté, ahe sārosar ité secoi. **3** Oquendipí rārosar omboi chupe. Evocoiyase ovesa rārosar oñehe serer rupi güeimba ovesa upe senose āgua sēta sui. Ahe evocoiyase oicua iñehe yuvireco. **4** Güeimba ovesa renose pare oguata senonde; seimba ovesa evocoiyase oguata saquicuerive. Esepia, oicua ité iñehe yuvireco. **5** Ndoguatai eté rumo oyarehí rupi yuvireco; yuvinoña-noñaño ichui. Esepia, ndoicuai eté iñehe” ehi **6** omboyoza güecocuer ovesa rārosar rese. Ava rumo ndosenducuai eté yuvireco.

Jesús ava rārosar aviye vahe

7 Evocoiyase Jesús aipo ehi iri: “Supi eté, aipo ahe pēu: che año ité oquendipí nungar aico ovesa upe. **8** Opacatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco. **9** Che rumo oquenda nungar aico. Acoi oique vahe che rupi, ahera ipisiropirá yuvirecoi. Iyavei inungar acoi ovesa oique vahe güeta pipe, ichui osē capihi reca āgua igua yepi, ēgue ehira che reroyasar yuvireco.

10 “Imonda rai vahe rumo omonda āgua tēi ou, oporoyuca āgua, mbahe moçañi āgua tēi avei. Che rumo ayu ‘tovireco ava tecovesa ndopai vaherā ité yuvireco’ viya. **11** Che ité ava rārosar aviye vahe aico. Sese ayemoingatu tupri che recocuer mondo āgua ava cheundar repirá; **12** acoi guarepochi repirá tēi oporavíqui vahe rumo, osepiase mahembiar oñaro ai vahe, oseyapaño güemiaro, oña oso. Esepia niha, ovesa ndahei eté seimba, ndahei avei eté ahe sārosar ité secoi. Evocoiyase mahembiar oñaro ai vahe omundi-mondii eté ipisi āgua. **13** Evocoi mbia oñaño. Esepia, guarepochi repirá tēi oporavíqui. Sese niha ndosaisui eté güemiaro ovesa.

14-15 “Che rumo ava rārosar aviye vahe ité aico; che Ru che cua ité. Che evocoiyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepíra yuvireco. **16** Areco avei ambuae ité che reimba ovesa. Ahe avei aru pota che mboyeroza vaherā yuvireco. Ahese ñepei reseve guasu che remiaro yuvirecoira.

¹⁷ “Che Ru niha che raisu ité. Esepio, amondo iterá che recocuer manosave. Ipare rumo acuerayevira. ¹⁸ Ndoicatui chira ava ahe ae tēi che yuca ãguia; che teiteté rumo amondora che récocuer che remimbotar rupi eté. Che areco ité píratasa imondo ãguia, che cuerayevi iri ãguia avei. Sese ité niha che Ru che cuai” ehi güemimbohe eta upe.

¹⁹ Osenduse judío eta aipo nungar ñehesa, opa ipihañemoñeta yoavirati yuvireco. ²⁰ Setá iteanga ipáhu pendar aipo ehi:

—¿Mahera vo co pemboyeroya? Vireco ité caruguar oyese, ndayaracuai eté —ehi yuvireco chupe.

²¹ Ambuae rumo aipo ehi yuvireco:

—Ndipoi eté rumo que ava na ehi vahe oñeha caruguar rerecosar. ¿Omboesapiso tie caruguar rerecosar ava? —ehi amove judío yuvireco Jesús upe.

Judío rerecuar ndoyambotai Jesús yuvireco

²² Ari sôhisa vahe pipe tecua Jerusalén ve tûparo rovasagüer pieta oyepota. ²³ Ahese Jesús oguata oico tûparo Salomón oyapo vahecuer rocuce ivii rupi. ²⁴ Evocoiyase judío rerecuarea oyere tupri yuvireco sese aipo ehi yuvireco chupe:

—¿Marase rutaí vo eremombehu tuprira Poropísicosar nde recosa oreu? Emombehu tupri catu ñepei rese oreu —ehi yuvireco chupe.

²⁵ —Amombehu niha acci pêu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropísicosar che recosa; ²⁶ pe rumo ndache reroyai eté peye. Esepio, pe ndahei eté che remiaro ovesa peico. ²⁷ Che remiaro ovesa rumo oicua che ñehe. Che avei aicua ahe yuvireco. Ahe evocoiyase che rupi oguata yuvireco. ²⁸ Amondo avei tecovesa apírehí yuvireco chupe icañiêhi ãguia; ndipoi chietera que ava virocua iri vaherá che sui. ²⁹ Che Ru niha ombou cheu. Esepio, ahe ipírata catu opacatu ava sui. Ndipoi chietera que ñepei ava oicatu vahe serocua che Ru sui. ³⁰ Che Ru iyavei che oroico ñepeiño ité —ehi judío rerecuarea upe.

³¹ Aipo ihese, judío rerecuarea osupipa iri ita yuvireco yapi ãguia.

³² Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru píratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuarea upe.

³³ Judío rerecuarea omboyeví yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo ñegüe orohera ndeu. Esepio, nde ereñeha rai tēi Tûpa rese. Nde moco ava tēi ereico. Nde rumo ereyeapo Tûpa ndeyeupe ae —ehi yuvireco chupe.

³⁴ Evocoiyase aipo ehi ahe ava upe:

—Pêundar mborocuaita icuachiapri pipe niha aipo ehi: ‘Che aipo ahe pêu: pe tûpa pâve ité peico’ ehi. ³⁵ Yaicua niha icuachiapri pipendar ndiyai yayamotarêhi. Esepio, Tûpa aipo ehi: ‘Pe tûpa pâve ité peico’ ehi evocoí ava oñeha pisistar upe. ³⁶ Che niha che Ru Rembiporavo aico. Ahe che mbou co ivi pipe. ¿Mahera ru evocoiyase, ‘Nde ereñeha rai tēi Tûpa rese’ peye cheu, ‘Che Tûpa Rahir aico’ ahese pêu? ³⁷ Esepio, acci ndayapoise mbahe che Ru remimbotar, ahese ndache reroyai chietera peye viña. ³⁸ Yepe ndache reroyai chira che recocuer rese peye viña,

mbahe ayapose rumo ahe tēi peroyara. Sese tapeicua ñepei reseve che Ru secoise che rese iyavei che sese che recosa —ehi oamotarēhimbareta upe.

³⁹ Osoquenda pota iri yuvireco viña; Jesús rumo osoño ipāhu sui.

⁴⁰ Oyevi iai Jordán rovai. Aheve acoi Juan yipindar oporoāpiramo. Aheve opita. ⁴¹ Ava rehii yuviraso sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

⁴² Setá iteanga ava Jesús viroya yuvireco aheve.

11

Lázaro mano agüer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve. ² Ahe María, oipiyere vahe mbahe sīacua vahe yande Yar pi rese. Ipare oiquití oha pi pe. ³ Ahe seindri omundo oñeho Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano āgua ité. Ēgüe ehi rumo Tūparaco porañetes a mboyecua āgua iyavei Tahir reco porañetes a mboyecua āgua avei —ehi.

⁵ Yepe osaisú iteanga Marta icupihir reseve iyavei iquivri Lázaro viña, ⁶ oyanduse rumo Lázaro mbaherasisa, opita viteño ité ñuvirío ari güecosave. ⁷ Ipare omombehu ore supi oroico vahe upe:

—Yayevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pi pe yuvireco; ¿cūritei co ereso pota iri aheve? —orohe chupe.

⁹ Oreu rumo aipo ehi:

—Ñepei ari niha vireco doce hora. Supi eté acoi oguata vahe ari pi pe ndoyepiapi eté. Esepia, osepia ité co ivi resapesa; ¹⁰ acoi oguata vahe rumo pītu pi pe, oyepiapi eté. Esepia, ipane tesapesa chupe —ehi oreu.

¹¹ Ipare aipo ehi:

—Yande mboripar Lázaro oque tēi. Che rumo amomahera —ehi.

¹² Evocoiyase ore aipo orohe chupe:

—Ore Yar, oque tēise, ocuerara —orohe.

¹³ ‘Omano ité’ oyapave tēi aipo ehi. Ore rumo orepihañemoñeta: “Oque tēi revo” orohe chupe viña. ¹⁴ Ipare rumo omombehu tupri ité aipo ehi oreu:

—Lázaro omano ité. ¹⁵ Aviharete che ndaicoise aheve. Esepia, ēgüe ehise ité aviye catura pēu pe che reroya āgua. Yaso ru catu sepia —ehi oreu.

¹⁶ Evocoiyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaherā supi —ehi.

Jesús cuerayevisa secoi iyavei tecovesa

¹⁷⁻¹⁸ Betania namombríimi Jerusalén sui, tres kilómetro tupri. Evocoiyase ore oroyepota senise ahe tecuave, orosendu “cūritei irungatu ari opa Lázaro tīre” ehi vahe. ¹⁹ Setá judío yuviraso Marta iyavei María pīri

iquívrí mano agüer sui imboviha ãgua.²⁰ Oicuase Marta Jesús yepota seni, oso voi eté sapeve; María rumo opitaño oí pi-pe.²¹ Evocoiyase Marta aipo ehi voi chupe:

—Che Yar, ehi coháve ereicose, nomanoi chietera revo ore quívrí viña.²² Che rumo aicua Túpa omboura opacatu nde porandusa ndeu —ehi Marta chupe.

²³—Nde quívrí rumo ocuerayeví irira —ehi Marta upe.

²⁴—Supi eté aicua niha ocuerayevíra opacatu omano vahecuer reseve ari ipa vahe pipe —ehi Marta.

²⁵—Che niha cuerayevísa aico iyavei tecovesa. Acoi ava che reroya vahe, yepe omano tēira viña, oicoveño itera rumo.²⁶ Acoi che reroya vahe güecoveseve, nomanoi chietera. ¿Ereroya aipo che hesa? —ehi Marta upe.

²⁷—Oroviroya ité, che Yar. Nde niha Poropísiosar ereico Túpa Rahir, ore remiaro ereyu vaherá co iví pipe oreu nara —ehi Marta Jesús upe.

Jesús oyaseho Lázaro ruvipa rovai

²⁸ Aipo ohe pare, Marta oso ocupihir María reca, chupeñomi aipo ehi:

—Porombohesar oicove coháve, “Tou” ehi ndeu —ehi chupe.

²⁹ Evocoiyase María oso voi eté sepia.³⁰ Jesús rumo ndoique vítei eté tecua pi-pe; Marta rese oyoepiasave víteño ité secoi.³¹ Osepiase María sē poyava, judío eta sētave yuvirecoi vahe imbovihasar yuviraso voi saquicuerive, “Oquivrí ruvipave revo osora oyaseho” ehi yuvireco viña.

³² Evocoiyase María oyepotase chupe, oñenopiha sovai aipo ehi:

—Che Yar, ehi revo ereicoveño itese coháve, che quívrí nomanoi chietera viña —ehi María chupe.

³³ Osepiase María yaseho iyavei judío eta yuviraso vahe supi, opiha pipe oyandu ité oviharéhisa.³⁴ Evocoiyase oporandu:

—¿Que vo peñotí? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

³⁵ Ahese Jesús oyaseho.³⁶ Judío evocoiyase aipo ehi yuvireco:

—¡Esepiá, osaisu ité! —ehi oyeupe yuvireco.

³⁷ Ambuae rumo ipāhu pendar aipo ehi yuvireco:

—Co mbia omomahe vahe acoi mbia ndasesapisoí vahe, ¿ndoicatui chira pīha Lázaro manoëhi ãgua mbahe apo cuese rahe viña? —ehi yuvireco.

Lázaro mbogüerayeví agüer

³⁸ Jesús oyemboya suvipave oviharéhisa pi-pe; ahe suvipa ita hopri, sovapisa ita avei.

³⁹—Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepiá, opa niha irungatu ari imanore —ehi.

⁴⁰—¿“Che reroyase eve, Túpa pīratasa eresepiara” ndahei vo acoi ndeu? —ehi Marta upe.

⁴¹ Aipo ihe pare, virocua ita yuvireco ichui. Evocoiyase omahe iva rese aipo ehi:

—Che Ru, “Aviye ndeu” ahe ndeu. Esepiá, eresendu che ñehe.⁴² Che aicua nde eresenduño ité che ñehe yepi, che rumo aipo ahe co ava eta

rembiepiave ‘toviroya avei nde che mbousa co ivi pipe yuvireco’ che yapave —ehi.

43 Aipo ohe pare, oñehe pírata aipo ehi:
—iLázaro, esé eipeve sui! —ehi.

44 Omano vahe evocoiyase osé voi opacatu turucuar omamasa reseve.
Jesús evocoiyase aipo ehi ava upe:
—Peyorapa imamasa ichui, toguata —ehi.

Judío rerecuareta oyemomborandu Jesús pisí água yuvireco

45 Osepiase co poromondiisa, judío eta yuviraso vahe María rupi setá ité Jesús viroya yuvireco. 46 Ipáhu pendar rumo moviro yuviraso voi ava fariseo rerecuareta uve sembiapo mombehu água. 47 Evocoiyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico. 48 Ndayayapoise mbahe chupe, opacatu tiête ava viroyara yuvireco viña iyavei aviyeteramo mborerecuar Roma iguar yanduse, yuguérura yande túparo mondurupa iyavei omocañi tēi uca aveira yande recua yande sui —ehi oyeupe yuvireco.

49 Ñepei rumo mbia ipáhu pendar Caifás serer vahe, ahe ité pahi eta rerecuar ivate catu vahe ahe araviter piye, aipo ehi ava upe:

—Pe ndapeicuai eté mbahe,⁵⁰ ndapesenducuai avei co tecocuer; aviyecatura ñepei mbia omanose yande recocuer rese, ndahei que opacatu yande mocafíi tēi água —ehi omboetasa eta upe.

51 Ahe rumo ndahei oyesui tēi aipo ehi; Túpa ité aipo ombohe uca. Esepia, ahe ité mborerecuar guasu chini ahese. Sese aipo ehi: “Jesús omanora yande recocuer rese” ehi. 52 Iyavei ndahei chira ahe ava reseño, omanora opacatu ava Túpa Rahir oñemosai tēi vahe ñepei reseve imonuha água. 53 Égüe ehi ahe ari piyeve judío eta rerecuar oyemoingatupa voi yuca água yuvireco.

54 Sese ndoguata iri ava judío eta pāhu rupi. Ahe rumo osé ivi Judea sui, oso ivi iporupiréhi vahe rerovicave, tecua Efraín ve. Aheve opacatu oropita supi.

55 Virovise judío Pascua pieta apo água, setá iteanga ava ambuae tecua rupindar yuviraso tecua Jerusalén ve oyeecocuer moatiro ahe pieta mboetei água renondeve. 56 Oseca tēi Jesús yuvireco. Ipare tūparove yuviroquese, oporandu-randu oyeupe yuvireco:

—¿Mara peye pe, oura pīha pieta repia, aní chira tie? —ehi-ehi oyeupe yuvireco.

57 Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi água” ehi yuvireco chupe.

12

Ñepei cuña omundo Jesús rese mbahe sīacua vahe

1 Seis ari ipane vitese Pascua pieta água, Jesús oso tecua Betania ve, aheve acoi Lázaro ombogüerayevi. 2 Eipeve ocaru yuvireco Jesús mboeteisave. Marta ihañeco sese; Lázaro evocoiyase ocaru yuvinoi mesave ipiri. 3 Evocoiyase María güeru medio litro mbahe sīacua vahe nardo, sepí iteanga vahe. Omundo ipí rese. Ipare oiquiti ohavapri piye ichui. Sīacuá iteanga evocoiyase opacatu oí pipe. 4 Evocoiyase ore

mboetasa Judas Iscariote, ahe acoi omondo vaherā ava yamotarēhimbar uve, aipo ehi:

⁵ —¿Mahera vo ndimondosai co mbahe sīacua vahe tresciento denario rupi ava iparaisu vahe pītvii ãgua? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe tēi. Setá rupi guarepoche virocua güembiporuguā tēi.

⁷ Evocoiyase Jesús aipo ehi:

—Toyapoño cheu. Esepio, ahe che mano ãgua renonde ēgue ehi cheu.

⁸ Yuvirecoveño itera ava iparaisu vahe pe pāhuve yepi; che rumo ndaico pucu iri chira pe pāhuve —ehi Judas upe.

Pahi rerecuar oyamotarēhi Lázaro yuvireco

⁹ Setá iteanga ava judío oyandu yuvireco Jesús rerācua Betania ve secoise. Sese yuviraso aheve; ndahei Jesús repia güeraño yuviraso, ēgue ehi rumo imbogüerayevipri Lázaro repia avei. ¹⁰ Evocoiyase pahi rerecuar, “Yayuca avei Lázaro” ehi yuvireco oyeupe. ¹¹ Esepio, ahe ichui tēi niha setá iteanga judío oyepepi pahi rerecuar sui Jesús reroya ãgua yuvireco.

Jesús oique Jerusalén pipe

¹² Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota ãgua ahe tecuave yuvireco. ¹³ Ahese oyasia pindo yuvireco. Oyacatu viraso Jesús rovañchi ãgua, osapucai yuvireco chupe:

—¡Imboeteipri, sovasaprí secoi ou vahe yande Yar Tūpa rer pipe! ¡Tūpa tosovasa Israel rerecuar guasu! —ehi yuvireco.

¹⁴ Yipindar rumo opa Jesús oseca uca guaricum. Ipare oyeupi sese icuachiapri aracahendar rupi tupri ité aipo ehi vahe:

¹⁵ “Pesiquiyei rene, Sión pendar; pesepia, pe rerecuar guasu guaricum harive ou pēu” ehi.

¹⁶ Yipindar, ore semimbohe eta, ndorosenducuai eté co aracahendar imombehupri. Ipare rumo oyevise güecosa porañetesave, ahese orema-henduha aracahendar sesendar icuachiapri rese, “Supi eté omombehu” orohe tēi sepiase.

¹⁷ Acoi ava yuvirecoi vahe Jesús rupi, Lázaro mbogüerayevisa osepia vahecuer, ahe opa omombehu-mbehu ambuae ava upe yuvireco. ¹⁸ Sese ava eta yuvinose voi sovañchi ipisi ãgua. Esepio, oicua ité ahe mbahe poromondiisa guasu yapose yuvireco. ¹⁹ Evocoiyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, jopacatu guasu ité ava oguata cūritei yuvireco supi! —ehi yuvireco.

Oime griego oseca vahe Jesús yuvireco

²⁰ Griego oime ava rehii pāhuve yuviraso vahe pieta repia Tūpa mboetei ãgua tecua Jerusalén ve. ²¹ Ahe oyemboya Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

²² Felipe evocoiyase oso imombehu Andrés upe; ichui yuviraso ñuvirío voi Jesús upe imombehu. ²³ Evocoiyase chupe aipo ehi:

—Oyepota ari cheundar che, Ava Ríquehir, che yeví iri ãgua che recua porañetesave. ²⁴ Supi eté aipo ahe pēu: inungar acoi trigo rāhii nañotisaise, ahese ndihai chietera; ñotise rumo, ahese iha vaira. ²⁵ Acoi

ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pipendar tēi che recocuer rese, evocoai nungar virecora tecovesa apirēhi.²⁶ Acoi ava che mboyeroya pota vahe, toguata che rupi yuvireco. Esepia, acoi che mboyeroyasar yuvirecoi vahe, ahe avei yuvirecoira che piri ivave. Che Ru Tūpa evocoiyase omboeteira ahe sereco —ehi chupe.

Jesús omombehu omano água

27 “¡Cûritei ayandu ité mbahe-mbahe tēi oime vaherā cheu! ‘¿Mara ahera pîha?’ ahe tēi. ¿Aipo ahera: ‘Che Ru, che pîsiro eve cûritei cheu oime vaherā mbahe tēi sui’ ahera viña? ¡Che rumo aicua evocoai nungarā ité ayu! 28 Che Ru, emboyecua nde pîratasa nde rer porañetesa mboetei água” ehi oyeroqui.

Ichui oyeendu iva sui ñehesa aipo ehi vahe: “Êgüe ahe niha amboyecua che pîratasa vichico, êgüe ahe iri aveira” ehi.

29 Aheve ava yuvirecoi vahe, “Osunu revo” ehi yuvireco viña; ambuae ava,

—Tūpa rembiguai revo oñeho Jesús upe —ehi yuvireco.

30 Evocoiyase aipo ehi ava eta upe:

—Ndahei cheundar ñehesa pesendu, ahe rumo pêundar. 31 Cûritei oimera ñemoírosa co ivi pipendar ndache reroyai vahe upe, cûritei avei imombosara Caruguar co ivi pipendar imborerecuasa sui. 32 Acoi che rupise ivate, opacatu ava arura cheyeupi —ehi.

33 Aipo ñehesa pipe omboyecua tupri ité mara ehira omano. 34 Aipo ihese ava eta aipo ehi:

—Ore rumo orosendu mborocuaita icuachiapri pipe aipo ehi vahe: “Poropísírosar apirêhi vaherā ité” ehi. ¿Mahera ru aipo nde: “Ava Riquehir osupira ivate yuvireco” ere no? ¿Uma ru aipo Ava Riquehir, ambuae tie? —ehi ava eta yuvireco chupe.

35 Evocoiyase aipo ehi ava upe:

—Pe pereco vitemira chîhi rupive tesapesa pe pâhuve. Peguata catu supi seime viteseve. Aviyeteramo pe resapiha têira pítumimbi vahe. Esepia, acoi oguata vahe pítumimbisa rupi, ndoicuai que güecosa. 36 Peroya co tesapesa cûritei pereco viteseve, ipipe ité pe reco áqua —ehi.

Aipo ohe pare, Jesús osë ava rehii pâhu sui; ndoyemboyecua iri chupe.

Setá judío rerecuar ndoviroya vîtei eté Jesús yuvireco

37 Yepe Jesús setá iteanga oyapo mbahe poromondiisa judío rerecuar rovaque viña, ahe rumo ndoviroyai eté yuvireco. 38 Esepia, imboavíyesa rane itera Tūpa ñehe mombehusar Isaías rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pîratasa eremboyecuase chupe” ehi.

39 Co rese avei ava ndoicatui eté senducua yuvireco. Inungar oicuachía Isaías aipo ehi:

40 “Tūpa nomboesapisoí ava iyavei nombopîhañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevi catui yuvireco chupe ombogüera áqua” ehi.

41 Isaías aipo ehi. Esepia, osepia ité Jesús reco porañetesa. Evocoiyase ahe oñeho sese.

⁴² Setá ité rumo judío viroya yuvireco, seco ivate vahe avei. Ahe rumo nomboyeucuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepei reseve yuvireco’ oya. ⁴³ Esepia, ahe oipota catu ava tēi suindar yemboeteisa Tūpa suindar yemboeteisa sui yuvireco.

Jesús ñehe reroyasa rese porandusara

⁴⁴ Yipindar rumo, Jesús oñehe vitese ava rehii upe, oñehe pírata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco. ⁴⁵ Iyavei acoi che repia vahe, che mbousar avei osepia. ⁴⁶ Che tesapesa aico. Ayu co ivi pipe ava che reroyasar pítmimbisave yuvirecoihí água. ⁴⁷ Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pipendar mocañi água, che rumo ayu ipísiro água. ⁴⁸ Acoi ava che reroíro vahe, ndovíroyai vahe avei che ñehe, oime rumo imocañi água: Co che ñehesa supi eté vahe reroyaëhisa pipe oyemocañi ucara ari ipa vahe pipe. ⁴⁹ Esepia, che nañehei eté cheyesui tēi; che Ru, che mbousar rumo che cuai che ñehe água, che porombohe água avei. ⁵⁰ Che aicua co cheundar porocuaita güeru tecovesa apirëhi ava upe. Sese niha amombehu che Ru che cuaisa” ehi Jesús ava rehii upe.

13

Jesús oyosei güemimbohe pi

¹ Pascua pieta renonde Jesús oicua ité ohari yepota co ivi reya água oso vaherá Vu piri. Ahe osaisu vahe ité ava oyeupendar co ivi pipe yepi. Ëgüe ehi saisu ari ipa vahe rupi.

²⁻⁴ Caruguar oique ité Simón rahir, Judas Iscariote, piha pipe imondo água yamotarëhimbar uve. Jesús rumo oicua ité Vu Tūpa sui ousa, oicua avei oyevi iri água Vu Tūpa piri iyavei Tu omundo opacatu omborerecuasa chupe. Sese ocaruse güemimbohe eta reseve, mesa sui opüha, osequií oturucuar yohasa. Ipare omonde ambuae turucuar vumbicuasa rese. ⁵ Evocoiyase omondo i yepoisa ríru pipe, oyosei güemimbohe pi, omombiru turucuar vumbicuasa rese vireco vahe pipe oico.

⁶ Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

⁷ —Nde rumo nderesenducuai mbahe che rembiapo cüritei. Ipare rumo eresenducuara —ehi Pedro upe.

⁸ Pedro rumo aipo ehi chupe:

—¡Che pi rumo ndereyosei chietera! —ehi.

—Ndayoseise rumo nde pi, ndahei chietera evocoiyase che rupindar ereico —ehi Pedro upe.

⁹ Pedro evocoiyase aipo ehi:

—¡Che Yar, aní catu che pi año ereyosei; oyosei che po, che rova avei! —ehi chupe.

¹⁰ —Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseisa. Ëgüe peye ndipoi eté mbahe pe rese; ndaopacatui rumo ëgüe peye —ehi.

¹¹ Ahe aipo ehi: “Ndaopacatui rumo ëgüe peye” ehi. Esepia, oicua ité uma omondora yamotarëhimbar upe.

12 Güemimbohe pi sei pare, omonde iri oturucuar yohasa, oguapi mesave aipo ehi:

—Peicua vo co mbahe ayapo vahe pēu? —ehi—. ¹³ Pe niha, “Ore mbohesar, ore Yar” peye cheu. Supi eté niha. Esepiá, ahe ité che aico. ¹⁴ Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepei-peí peyacatu peyosei aveira pe pi. ¹⁵ Che niha ‘na tehi avei yuvireco’ viya opombohe pe rereco, ñgue ahe pēu. ¹⁶ Supi eté aipo ahe pēu: ava mbiguai tēi, ahe ndahei ivate catu güerecuar sui; ñgue ehi avei imboupri ndahei ivate catu secoi ombousar sui. ¹⁷ Pesenducuase co nungar mbahe, peyapo tuprise, ahese pevharete catura peico —ehi.

¹⁸ “Che nañehi opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotaréhí’ ehi vahe. ¹⁹ Senondeve amombehu pēu. Evocoiyase ñgue ehise ité cheu, che reroyara peye che ité niha aipo ahe vahe vichico. ²⁰ Supi eté aipo ahe pēu: acoi che remimondo oipisi tupri vahe, ahe che pisí tupri avei; acoi ava che pisí vahe, oipisi tupri avei che Ru yuvireco” ehi.

Jesús omombehu: “Ñepei pe pāhu pendar che mondora che amotaréhimbar upe” ehi

²¹ Aipo ohe pare, Jesús ndoyembovíhai eté iyavei mbahe oime vaherá omboycua tupri ité,

—Supi eté aipo ahe pēu: ñepei pe pāhu pendar che mondora che amotaréhimbar upe —ehi.

²² Evocoiyase ore oromahe-mahe tēi oreye, “¿Ava upe pīha aipo ehi?” orohe tēi oreyeupe. ²³ Che sembiaisu catu yípive acaru vīte. ²⁴ Ipare Pedro oyaiti-iti ‘¿Ava upe vo aipo ere? tehi chupe’ oyapave cheu.

²⁵ Evocoiyase che asiri catu irimi yípive, aporandu chupe:

—Che Yar, ¿ava ité vo? —ahe.

²⁶ Ahe aipo ehi cheu:

—Cūritei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaquí pan rahicuer imondo Simón Iscariote rahir, Judas, upe. ²⁷ Judas oipisise pan, oguapi voi eté Caruguar sese. Evocoiyase aipo ehi Judas upe:

—Evocoi ereyapo pota vahe, eyapo voiño ité ru —ehi chupe.

²⁸ Que ñepei rumo mesave orocaru vahe, ndorosenducuai eté aipo ihesa. ²⁹ Esepiá, Judas guarePOCHI ríru rārosar secoi yepi. Sese amove ore pāhu pendar ipihañemoñeta: “Tererocua mbahe pietase nara’ anise, ‘emondo mbahe ava iparaísu vahe upe nara’ aipo oya revo omose imondo” ehi yuvireco chupe viña.

³⁰ Pan pisí pare, Judas osé voi eté oso pītuse.

Porocuaita ipiasu vahe

³¹ Judas sē pare, Jesús aipo ehi:

—Cūritei oyecuara che, Ava Ríquehir, reco porañetesa. Che Ru Tūpa reco porañetesa avei oyecuara che rese. ³² Acoi amboycuase che Ru Tūpa reco porañetesa, ahe avei omboycuara che reco porañetesa, ñgue ehira imboycuaria pīaivi. ³³ Che rahireta, che rembiaisu, ndaico pucu iri chira pe rese. Che reca tēira peye; inungar acoi judío rerecuar upe aipo ahe: “Ndiyai chietera peso che sosave” ahe. ³⁴ Sese co amondo

porocuaita ipiasu vahe pēu ñepei-peí peyeaisu água inungar che opoaisu.
³⁵ Peyeaisuse ñepei-peí, opacatu tupri ité ava oicuara yuvireco che remimbohe supi eté pe recosa —ehi.

Jesús, “Ndaicuai eté co mbia’ erera cheu” ehi Pedro upe

³⁶ Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyeví Pedro upe:

—Cūritei ndiyai peso vaherã che sosave che rupi; pesorera rumo che rupi curi —ehi.

³⁷ —Che Yar, ¿mahera ru cūritei voi ndiyai nde rupi che so água?
 ¡Ayemoingatu ité amano vaherã nde rese! —ehi Pedro chupe.

³⁸ —¿Supi eté pīha ereyemoingatu ité che rese nde mano água? Nde rumo cōhe potase tacura ñehe renondeve, mbosapi oyupagüer rupi,
 “Ndaicuai eté co mbia” erera cheu —ehi Pedro upe.

14

Jesús, Tūpa raper yandeu

¹ Ipare Jesús aipo ehi opacatu oreu: “Pepihañemoñeta atii rene;
 peyeroya Tūpa rese, che rese avei peyeroya. ² Esepiá, che Ru rētave setá
 oime pe reco água; ñgue ndehise rumo, namombehui chira aipo pēu viña.
 Sese che asora pe recuarã moingatu. ³ Imoingatu pare ayevira pe reca
 che recosave pe reraso água cheyepiri. ⁴ Pe peicua que vo asora iyavei
 peicua mara peyera pe yepota água che recosave” ehi oreu.

⁵ Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua
 ore so água? —ehi.

⁶ —Che niha peri aico supi eté vahe iyavei tecovesa. Che rupi güeraño
 ité peyepotara che Ru upe —ehi—. ⁷ Pe peicua tuprise ité che recocuer
 viña, peicua aveira che Ru viña no. Cūritei suive rumo peicua, pesepia
 avei cute —ehi oreu.

⁸ Evocoiyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

⁹ —Felipe, setá ari aico pe rese, ¿ndapeicua vîtei eté vo che recocuer?
 Acoi ava che repia vahe, ahe osepiá ité che Ru; ¿mahera ru evocoiyase,
 “Torosepia rane ité nde Ru” ere vite cheu no? ¹⁰ ¿Ndache reroyai vo peye
 che Ru rese ité aicose, che rese avei che Ru secoise? Opacatu mbahe
 amombehui vahe pēu, ndahei cheyesui tēi amombehui. Che Ru secoi vahe
 che rese, ahe ité oyapo güemimbotar che recocuer rese —ehi—. ¹¹ Che
 reroya peye che Ru rese che recose, ahe avei secoise che rese. Anise,
 che reroyañomi tēi catu peye mbahe che rembiapo rese —ehi—. ¹² Supi
 eté aipo ahe pēu: acoi ava che reroya vahe, ahe avei oyapora mbahe che
 rembiapo nungar, tuvicha catura rumo. Esepiá, che asora che Ru piri —
 ehi—. ¹³ Acoi peporanduse que mbahe rese che rer pipe, che amondoño
 itera pēu. Ipipé che amboyecuara che Ru reco píratasa. ¹⁴ Che ayapora
 que mbahe che rer pipe pe porandusa —ehi oreu.

Jesús, “Che amboura Espíritu Santo pēu” ehi viroyasar upe

¹⁵ “Che raisuse ité peye, pemboyeroya catu che porocuaita. ¹⁶ Che
 aporandura che Ru upe ombou vaherã Espíritu supi eté vahe pe píñivii
 água, ahe secoi vaherã ité pe rese. ¹⁷ Ava Tūpa ndoicuai vahe rumo,

ndoicatui chietera ipisi. Esephia, ndosepiai, ndoicuai avei yuvireco. Pe rumo peicua ité. Esephia, ahe ité secoi pe rese. Ipare oique itera pe piha pipe.

¹⁸ “Ndopoeysi chira pe güeraño tēi; ayevira niha pe rese aico vaherā.

¹⁹ Chīhi tēi oime vite ari che reroyasarēhi che repia vite vaherā yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esephia, che aicoveño avei. ²⁰ Ahe ari pipe peicuara che Ru rese che recosa, che rese pe recosa avei iyavei che aicose pe rese. ²¹ Acoi oicua vahe che porocuaita, ombooyeroya vahe avei, ahe ombooyerucua ité che raisusa yuvireco. Che Ru osaisura che raisusar; che avei asaisura, ayembooyerucua aveira chupe” ehi.

²² Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboycuara; mahera ru ndereyemboycuara iri chira ava nde reroyasarēhi upe? —ehi chupe.

²³ Evocoiyase aipo ehi Judas upe:

—Acoi che raisu vahe, ombooyeroya vahe che ñehe yuvireco, che Ru evocoiyase osaisura iyavei che Ru reseve oroyura oroico vaherā sese.

²⁴ Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui tēi; ahe rumo che Ru, che mbousar suindar —ehi.

²⁵ “Pe rese che reco vitese, opa co mbahe amombehu vichico pēu.

²⁶ Espíritu Santo rumo, Poropítiviisar, che Ru ombou vahe che rer pipe, ahe pe mbohera opacatu mbahe aviye vahe rese. Pe momahenduha aveira opacatu pēu che ñehe agüer rese.

²⁷ “Aseyá teco tuprisa pēu, ahe che reco tuprisa; ndahei rumo avaño tēi rembiapo nungar amondo pēu. Aní, ‘¿Mara yahera pīha?’ peyera; aní chiaveira pesiquiye. ²⁸ Pesendupa niha acoi, ‘Asora, ipare ayevi irira pe rese aico vaherā’ che hesa. Supi eté che raisuse peye, pevharetera peicuase che Ru piri che sosa. Esephia, ahe ivate catu vahe ité che sui. ²⁹ Sese amombehupa voi co mbahe tenondeve pēu, ñgue ehise ité, ahese peroyara.

³⁰ “Namombehu pucu iri chira mbahe pēu. Esephia, ou ité co ivi pipe oporocuai tēi vahe. Ahe rumo ndahei ivate catu vahe che sui ³¹ ‘toicua ava che reroyasarēhi che Ru raisusa yuvireco’ che hesa pipe. Ayapoño ité che Ru che cuaita.

“Pepūha. Yaso cohavé sui” ehi güemimbohe eta upe.

15

Jesús uva hi nungar

¹ Ipare Jesús oñehe iri oreu aipo ehi: “Che aico inungar uva hi supi eté vahe; che Ru evocoiyase inungar sese ihañeco vahe secoi. ² Ahe oyasia sāca ndihai vahe ichui yepi; iha vahe rumo omoatiro tupri iha catu água. ³ Pe pe recocuer imoatiropri ité che pe mbohesa pipe. ⁴ Peicoño ité catu che rese inungar che aicoño ité avei pe rese. Uva rāca oise ohi sui, ndiha iri ahe ae tēi; pe avei ñgue peyera peyepepise che sui” ehi oreu.

⁵ “Che niha uva hi nungar aico; pe evocoiyase sāca nungar peico. Acoi secoi vahe che rese, che avei aico sese. Inungar mbahe miti iha ati vahe, ñgue ehira ahe. Supi eté ndapeicatui chietera che porēhi mbahe apo.

⁶ Acoi ndasecoi vahe che rese, ahe imombosara inungar acoi uva rāca yipi vahe. Ipare imonuhasa sapi água” ehi oreu.

7 “Pe peicoñoſe ité che reſe ndaperesaraife avei che poromboheſa ſui, peporanduňo mbahe pe remimbotar reſe, ahese imondosara pēu” ehi.

8 “Che Ru oipisira omboeteiſa pe ſui acoi peyapo tupriſe opacatu che remimbotar. Pemboyecua evocoiyase che remimbohe ſupi tupri vahe pe recosa. 9 Che opoaiſu ité, inungar che Ru che raiſu. Sese peicoño ité catu che poroaiſusa pipe. 10 Eſepia, pemboyeroyase che porocuaita, peicoveño itera co che poroaiſusa pipe. Inungar che che Ru amboyeroya che cuaiſa iyavei aicoveño ité che Ru poroaiſusa pipe vichico.

11 “Che aipo ahe pēu ‘tovireco che vihaza oyese yuvireco’ viya; ‘toyemboviharete catu yuvireco’ che hesa pipe. 12 Co che porocuaita: Peyeaiſu ñepei-pe, inungar che opoaiſu. 13 Ndipoi eté que poroaiſusa ivate catu vahe co ſui omondoſe que ava güecocuer omboripar reſe nara. 14 Pe che mboyeroyase peye, ahese che mboripar peico. 15 ‘Pe mbiguai peico’ ndahe iri pēu. Eſepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pēu. Eſepia, aicua ucupa ñehesa che Ru cheu omombehu vahe pēu. 16 Pe niha ndache poravoi peye. Che rumo opoporavo iyavei opocuai peporaviquí vaherā ava reru águia cheu ‘che reſe ité toyuvireco’ che yapave. Evocoiyase che Ru omboura mbahe pe porandusa che rer pipe pēu. 17 Co reſe opocuai: Peyeaiſu catu ñepei-pe peyacatu” ehi Jesús güemimbohe upe.

Jesús amotarēhimbar, supindar amotarēhimbar avei

18 “Acoi ava ndoicuai vahe Tūpa pe amotarēhise, peicuaño che rane che amotarēhi yuvireco yipindar. 19 Pe peico vitese ava Tūpa ndoicuai vahe pāhuve, evocoiyase pe raiſu aira yuvireco viña. Che rumo opoporavo ipāhu ſui yuvireco. Sese tēi ndape ambota iri yuvireco. Eſepia, pe ndahe iri ipāhu pendar peico. 20 Peyemomahenduha pēu aipo che hesa reſe: ‘Ndipoi eté que mbiguai ivate catu vahe güerecuar ſui’ ahe. Che niha yipindar yamotarēhimbi aico, pe avei pe amotarēhira yuvireco. Acoi omboyeroya vahe rumo che poromboheſa, pe poromboheſa avei omboyeroya yuvireco. 21 Co opacatu mbahe che recocuer ſui tēi ēgūe ehira pēu. Eſepia, ndoicuai niha che mbousar yuvireco.

22-24 “Che ndayuise ahe ava upe mbahe ſembiaví mombehu viña, evocoiyase, ‘Peyaví mbahe’ ndehi chira Tūpa chupe yuvireco viña. Che rumo ayu ité, amombehu mbahe ſembiaví yuvireco chupe, ayapo avei mbahe ava ndoyapoi vahe yuvireco ipāhuve; ahe rumo yepe oſepia co mbahe yuvireco viña, che amotarēhiño, che Ru avei oyamotarēhi yuvireco. Sese, ‘Pereco ité mbahe pe rembiaví peyese’ ehi Tūpa chupe. Eſepia, acoi che amotarēhi vahe, che Ru avei oyamotarēhi yuvireco. 25 Co rumo ēgūe ehi. Eſepia, imboaviyesa rane itera ñehesa ſesendar icuachiapri pipe aipo ehi vahe: ‘Mbahe apoēhi pipe ſui tēi che amotarēhi yuvireco’ ehi vahe.

26 “Acoi ambouse rumo Poropítiviſar, Espíritu ſupi eté vahe che Ru ſui pēu, ahe omombehura che recocuer. 27 Pe avei pemombehura che recocuer. Eſepia, yipisuive ité peico che rupi” ehi.

16

1-2 “Pe močañiehi águia che reſe pe yerojaya aipo ahe opacatu co mbahe imombehu pēu: pe mombora judío rerecuar oñemonuhasa ſui yuvireco, pe yuca aveira yuvireco. Ahe rumo omohara, ‘Tūpa uve nara revo na yahe’ ehira yuvireco viña. 3 Evocoi rumo ēgūe ehira yuvireco che Ru

cuaēhi pipe iyavei che cuāhi pipe yuvireco. ⁴ Amombehu aipo pēu acoi ēgue ehise, peyemomahenduhara che remimombehuguer rese.

Espíritu Santo rembiapo

“Yipisuive rumo namombehui co mbahe pēu. Esepia, aicoveño ité pe rese. ⁵ Cūritei rumo asora che mbousar piri iyavei ndipoi que ñepei pe pāhu pendar ‘¿que vo aipo eresora?’ ehi vahe cūritei cheu. ⁶ Pe rumo ndapeyembovihaiño aipo mbahe amombehuse pēu. ⁷ Supi eté rumo aipo ahe pēu: aviyé catura pēu che asose. Esepia, ndasoise viña, ndoui chietera pe rese Poropitivisar. Asose rumo, che amboura pēu. ⁸ Ouse ahe, oicua ucara ava che cuāhisar upe yangaipa, oicua uca aveira tecocuer īvisa iyavei cañisa ndaseco pōrai vahe upendar. ⁹ Oicua ucara yangaipa chupe ndache reroyaise yuvireco; ¹⁰ oicuara rumo che reco ihīvi tupri vahe yuvireco. Esepia, asora che Ru recosave, ahese pe ndache repia iri chietera peye; ¹¹ iyavei oicuara Tūpa poromocañisa. Esepia niha, Caruguar, ahe co īvī pipendar rerecuar oipisira che Ru Tūpa ñemoirosa.

¹² “Setá iteanga mbahe oime amombehu vaherā pēu. Pe rumo ndapeicatu chira cūritei senducua. ¹³ Ouse rumo Espíritu supi eté vahe, ahe pe mbohera mbahe supi eté vahe rese. Esepia, noñehei chira oyesui tēi, ahe rumo omombehura mbahe osendu vahe güeraño, oicua uca aveira mbahe coiye oime vaherā. ¹⁴ Ahe che mboeteira. Esepia, oicua ucara opacatu mbahe cheundar pēu. ¹⁵ Opacatu mbahe che Ru vireco vahe, che mbahe. Sese niha, ‘Espíritu oipisira opacatu mbahe cheundar, oicua uca aveira pēu’ ahe.

¹⁶ “Aviyeteramo tēi ndache repia iri chira peye. Ipare rumo coiye catumi che repia irira peye” ehi oreu.

Yepe semimbohe ndovihai chira viña, coiye catu rumo oviharetera yuvireco

¹⁷ Evocoiyase ore oroporandu-randu tēi oreyeupe aipo orohe:

—¿Mara oya pīha: ‘Aviyeteramo tēi ndache repia iri chira peye’ ehi yandeu; ipare rumo aipo coiye catumi yasepiara iyavei aipo osora Vu piri no? ¹⁸ ¿Mara oya vo aipo: ‘Aviyeteramo tēi’ ehi? Ndayasenducuai mo aipo iñehesa —orohe oreyeupe.

¹⁹ Ipare rumo ‘oporandura co mbahe rese yuvireco cheu’ oya aipo ehi voi oreu:

—¿‘Ipare rumo coiye catumi che repia irira peye’ che he agüer rese co pe porandu vīte peyeupe? —ehi—. ²⁰ Supi eté aipo ahe pēu: peyasehora pe vīharēhisa pipe, ava angaipa viyar rumo ovihareteñora yuvireco. Yepe pe, ndapevihai chira viña, coiye catu rumo pevharetera. ²¹ Inungar acoi que cuña imembira potase, tasí chupe oyepotase ari imembira áqua; pītani oha pare rumo, nimahenduha iri tasíquier rese; soriveteño omembrí rese. ²² Ëgue peye avei; pe cūritei tasí avei pēu, ayeví irira rumo pe repia áqua, ahese pevharetera. Ahe vīharetesa ndipoi chietera que ava virocua vaherā pe sui.

²³ “Ahe ari pipe, ndapeporandu iri chietera mbahe rese cheu. Supi eté aipo ahe pēu: che Ru omboura opacatu mbahe pēu che rer pipe peporanduse. ²⁴ Cūritei rumo ndapeporandu vītei mbahe rese che rer pipe. Peporandu catu sese, ahese peipisira. Ipípe sui perorivete catura.

Jesucristo mbahe-mbahe tēi recopisar

²⁵ “Opacatu mbahe rese niha amboyoya tecocuer pēu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pēu che Ru recocuer resendar. ²⁶ Ahe ari pipe pe peporandura mbahe rese che rer pipe; che rumo, ‘Ayeroquira pe rese che Ru upe’ ndahei pēu. ²⁷ Esepia, che Ru ae ité pe raisu. Pe raisu ité niha. Esepia, pe che raisu peye, che reroaya avei che Ru Tūpa sui che yuse peye. ²⁸ Asẽ che Ru sui co ivi pipe vitu; cūritei rumo aseyara co ivi, ayevira che Ru upe” ehi oreu.

²⁹ Evocoiyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombahu oreu. ³⁰ Supi eté ereicua opacatu mbahe, ereicua avei ore porandusa. Evocoiyase ndiya iri ore porandu água mbahe rese ndeu. Sese oroviroya Tūpa sui nde yusa —orohe chupe.

³¹ —¿Evocoiyase che reroaya ité peye? —ehi—. ³² Supi eté oyepota ari cute, co pipe ité peyemosai para che sui; che reyara che aemi peye. Ndahei rumo che ae aico. Esepia, che Ru secoi che rese. ³³ Amombehu co opacatu pēu che rese mbahe tupri pipe pe reco água. Peparaisu itera co ivi pipe; peyemongueréhi catura rumo. Esepia, che opa ité asecopi co ivi pipendar mbahe tēi —ehi.

17

Jesús oyeroqui güemimbohe rese

¹ Aipo ohe pare, Jesús omahe iva rese aipo ehi: “Che Ru, oyepota ari cute. Che mboetei eve, ipipe sui avei che nde Rahir toromboetei. ² Supi eté niha, nde erembou che mborerecua água opacatu ava ivi pipendar harive iyavei tecovesa apiréhi mundo água opacatu ava nde cheu erembou vahe upe. ³ Co niha tecovesa apiréhi, tandem cua nde Tūpa ñepei supi eté vahe nde recose yuvireco, tache cua avei nde che mbouse yuvireco.

⁴ “Che niha oromboetei co ivi pipe, iyavei ayapo nde che cuaisa. ⁵ Sese che Ru, embou irimi cūritei che reco porañete água, inungar acoi yipindar areco vahe nde rese ivi apoéhiseve.

⁶ “Co nde rembiporavo ava co ivi pipendar pāhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco. ⁷ Cūritei oicuapa opacatu mbahe nde suindar cheu erembou vahe yuvireco. ⁸ Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

⁹ “Che ayeroqui cheu nde remimbou rese ndeu. Esepia, ndeundar ité yuvirecoi; ndayeroquii rumo ambuae ava che reroyasaréhi rese. ¹⁰ Opacatu ava cheundar, ndeundar avei; ndeundar evocoiyase cheundar. Ahe sese che reco porañetes aoyecua.

¹¹ “Che ndapitai chira co ivi pipe; ahe rumo opitara cohaye yuvireco. Che evocoiyase asora nde piri. Che Ru, seco maranehi vahe, esáro nde píratasa pipe nde remimbou cheu oyese yuvirecoi tupri água inungar yande yaico. ¹² Aicose co ivi pipe, asáro tupri nde rer píratasa cheu erembou vahe pipe; chemahemoha yuvireco sese mbahe tēi sui. Ndipoi eté que ñepei ocañi tēi vahe; acoi yipive ocañi vaheño ité rumo ocañi tēi; nde ñehe rupi tupri ité égüe ehi.

¹³ “Cūritei asora nde recosave. Co iví pipe che reco vitese rumo, amombehu co mbahe chupe ‘tovireco che viharetesa yuvireco’ che yapave. ¹⁴ Che niha amombehu nde ñehe yuvireco chupe. Ava che reroyasarëhi rumo oyamotarëhiño yuvireco. Esepio niha, ndahe iri Caruguar povri pendar yuvirecoi inungar che ndahei ipovri pendar aico. ¹⁵ ‘Enose ava Caruguar povri pendar pâhu sui’ ndahei ndeu, che rumo aipota eresepira Caruguar sui. ¹⁶ Inungar che ndahei Caruguar povri pendar aico, ëgue ehi avei ahe yuvireco. ¹⁷ Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité. ¹⁸ Inungar nde che mbou eve ava co iví pipendar pâhuve, ëgue ahe avei che imondo ava pâhuve yuvireco. ¹⁹ Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

²⁰ “Ndayeroqui co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaherä rese. ²¹ Aporandu avei ndeu toyuvirecoi tupri ité yuvireco oyese inungar ñepei vahe, ëgue tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co iví pipendar toviroya nde che mbousa yuvireco. ²² Che reco porañetesa nde erembou vahe cheu, ahe tupri avei amondo yuvireco chupe ñepei vahe nungar yuvirecoi ägua, inungar yande ñepei vahe yaico. ²³ Che aico yuvireco sese, nde evocoiyase ereico che rese ahe yuvirecoi tupri ägua inungar ñepei vahe. Ipipe sui ava co iví pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

²⁴ “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepio vaherä teco porañetesa cheu erembou vahe yuvireco. Nde niha yipive ité che raisu eve iví apoëhiseve. ²⁵ Che Ru, seco catupri vahe, ava co iví pipendar tēi nande cuai yuvireco; che rumo orocua ité, co avei oicua nde che mbousa yuvireco. ²⁶ Orocua uca chupe, orocua ucaño vite itera rumo. Evocoiyase nde che raisusa tovireco avei yuvireco, che avei taico yuvireco sese” ehi Jesús oyeroqui güemimbohe recocuer rese.

18

Jesús oipisi yuvireco

¹ Aipo ohe pare, Jesús ore renose ore reraso iembí Cedrón rovai. Aheve oime mbahe miti rëta, ipipe Jesús ore reroique ore reraso. ² Iyavei Judas omondo vaherä yamotarëhimbar upe oicua avei aheve secosa. Esepio, setá rupi Jesús rese oroñemonuha aheve yepi. ³ Sese Judas oyepotaño ité aheve sundao rehii reseve iyavei sundao tûparo rârosar pahi rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuviraso. ⁴ Yipive ité rumo oicua oyeupe mbahe oime vaherä. Sese osẽ voi eté yuvireco chupe oporandu:

—Ava vo peseca? —ehi.

⁵ Ahe ava rehii omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipāhuve secoi imondo āgua yamotarēhimbar upe. ⁶ “Che niha ahe aico” ehise ava upe; guaquicuei coti pāve opa oviapi yuvireco. ⁷ Evocoiyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pēu —ehi—. Che che recase peye, pepocoi rene catu co ambuae rese, toyuvirasopaño —ehi.

⁹ Co rumo iñehe mboaviye āgua ēgüe ehi: “Acoi che Ru ombou vahe cheu, nocañii eté que ñepei che sui” ehi. ¹⁰ Evocoiyase Simón Pedro vireco vahe quise, vinose, oyasia Malco serer vahe nambi yasu cotindar, ahe pahi rerecuar ivate catu vahe rembiguai. ¹¹ Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosao itera chupe —ehi.

Jesús serasosa mborerecuar Anás rovai

¹² Evocoiyase sundao rerecuar, osundao eta reseve iyavei judío tūparo rārosar oipisi Jesús yuvireco, oipocua. ¹³ Yipindar viraso Anás rētave yuvireco. Esepiá, ahe Caifás rovayar. Ahe aravíter pipe aipo Caifás pahi eta rerecuar ivate catu vahe secoi. ¹⁴ Caifás ité aipo ehi omboetasa upe: “Yandeu aviye catu itera que ñepei mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahi eta rerecuar rēta pipendar opa ité che cua yuvireco. Sese aiqueño ité Jesús raquicuei mborerecuar rētave vícho. ¹⁶ Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoiyase asë, aporandu oquendipi rārosar uve Pedro reique āgua rese. ¹⁷ Evocoiyase oquendipi rārosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rārosar upe.

¹⁸ Sōhisá iteanga ahe pītu pipe. Evocoiyase mborerecuar rembiguai iyavei sundao eta oyatapi yuvireco oyepehe āgua. Pedro avei aheve ipāhuve oyepehe tata ipive ohā.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. ²⁰ Jesús rumo aipo ehi chupe:

—Che niha añahe opacatu rupi, opacatu ava eta rovaque avei. Esepiá, aporomboheño ité niha ava ñemonuhasa rupi, tūparo guasu pipe avei. Indó, che nañemi eté añahe vaherā. ²¹ ¿Mahera vo evocoiyase cheu tēi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

²² Aipo ihese, ñepei mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

²³ Evocoiyase omboyevi ahe mbia upe:

—Añehese mbahe tēi rese, emombehu che ñehe raisa; che rumo añahe tupri ité, ¿mahera vo evocoiyase che rovapete eve? —ehi.

²⁴ Evocoiyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepeheño vité ohã tata ipíve. Aheve aipo ehi yuvireco chupe:

—¿Ndahei vo nde ité evocoii ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¡Aviye acoi nde ité oroepia vahe mbahe miti rëta pipe supi! —ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehé.

Jesús serasosa Pilato rovai

²⁸ Evocoiyase viraso Jesús Caifás rëta sui Roma pendar mborerelu guasu recosave yuvireco. Cõhe potase ëgue ehi. Judío rumo ndoyuviroiquei eté mborerelu recosave oyemboangaipaéhi água. Esenia, ahe icuaita yuviroiques, ndiyai chietera Pascua resendar ovesa roho hu água yuvireco chupe viña. ²⁹ Sese Pilato osé ava upe aipo ehi:

—Mbahe vo sembiapo naporai vahe? —ehi.

³⁰ Ahe omboyevi yuvireco chupe:

—Seco catuprise, ndorogüerui chietera ndeu viña —ehi yuvireco chupe.

³¹ Evocoiyase aipo ehi ava upe:

—Peraso, pe ae peyapo mbahe pëundar ité porocuaita rupi sese —ehi.

Judío rerecuar evocoiyase omboyevi yuvireco:

—Ore judío oroico vahe upe rumo ndipotasai oroyuca vaherá que ava —ehi.

³² Ëgue ehi Jesús ñehe imano água resendar yaviye. ³³ Ahese Pilato oique iri oí pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

³⁵ —¡Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoiyase ereyapo? —ehi Pilato chupe.

³⁶ —Che mborerelu rumo ndahei co ivi pipendar. Co ivi pipendar se viña, che rupindareta ovavara che amotaréhimbar upe che repisave yuvireco viña. Che mborerelu rumo ndahei eté coha pendar —ehi.

³⁷ Ahese Pilato aipo ehi chupe:

—Evocoiyase nde mborerelu guasu ité ereico —ehi.

—Nde niha aipo, “Mborerelu guasu ereico” ere cheu. Aherá niha che aha co ivi pipe mbahe supi eté vahe mombehu água. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—Mbahe vo aipo supi eté vahe? —ehi chupe.

“¡Tayaticasa!” ehi ava eta Jesús uve yuvireco

Aipo ohe pare, Pilato osẽ iri judío eta upe oñeho aipo ehi:
—Che ndayosui eté co mbia rese mbahe sembiavi. ³⁹ Pe rumo peicua amose ñepei ava soquendapri Pascua pieta pipe yepi; ¿peipota amose vaherã judío rerecuar? —ehi.

⁴⁰ Aipo ihese, opacatu osapucai píratá yuvireco aipo ehi:

—¡Evocoi aní! ¡Barrabás catu emose! —ehiño yuvireco.

Barrabás rumo imonda rai vahe secoi.

19

¹ Evocoiyase Pilato oporocuai Jesús nupa água. ² Sundao eta omonde ñaca rese yu piaprí iyavei omboyemonde turucuar píraumbi vahe pipe yuvireco. ³ Ipare oyemboya sese aipo ehi:

—¡Imboeteipri judío Rerecuar tasecoi! —ehi angahu sovapete-pete yuvireco.

⁴ Pilato evocoiyase osẽ iri ava upe aipo ehi:

—Pesepia, anose pẽu pe icua água che ndayosui eté mbahe sembiavi —ehi.

⁵ Evocoiyase vínose yu piaprí oãca rese turucuar píraumbi vahe reseve senoha ava upe. Ahese Pilato aipo ehi:

—¡Ndo co aipo mbia cute! —ehi.

⁶ Osepiase pahi eta rerecuar, sundao rerecuar avei, omboipi osapucai:

—¡Tayaticasa! ¡Tayaticasa! —ehi pâve voi yuvireco chupe.

Pilato evocoiyase aipo ehi ava upe:

—Peraso, peyatîca pe ae. Esepio, che ndayosui eté mbahe sembiavi —ehi.

⁷ Judío rerecuar rumo omboyeví yuvireco:

—Ore rumo orovireco mborocuaita. Ipípe omanoño itera. Esepio, oyeapo têi Tûpa Rahir —ehi yuvireco.

⁸ Aipo ñehesa renduse, Pilato oyembosiñiyé catu. ⁹ Viroique iri oí pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyeví iri eté iñeho chupe. ¹⁰ Evocoiyase Pilato aipo ehi chupe:

—¡Mahera ndereñehi eté cheu! ¿Ndereicuai vo che mborerecuar aico nde atica uca água, mbahe têi sui nde renose água avei? —ehi Pilato chupe.

¹¹ —¡Aní! Ndererecoi chietera nde mborerecuasa che haríve Tûpa nom-bouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

¹² Ahe ramoseve, Pilato osáha iri têi Jesús renose água; judío rerecuar rumo osapucai voiño yuvireco chupe:

—¡Acoi eremosese co mbia, ndahei chietera nde mborerecuar ivate catu vahe mboripar ereico! ¡Opacatu oyemomborerecua têi vahe, ahe evocoiyase mborerecuar ivate catu vahe amotarëhimbar têi yuvirecoi! —ehiño yuvireco chupe.

¹³ Evocoiyase Pilato osenduse aipo ihesa, vínose uca Jesús ocarve, oguapi mborerecuar guasu renda haríve. Ahe mbahe rese porandusa rer hebreo ñehe pipe Gabata ‘ita apoprí’ oya. ¹⁴ Mbiter ari Pascua pieta água Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucai píratá aipo ehi yuvireco:

—¡Tomano! ¡Tomano ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoiyase oyatica ucara pe rerecuar? —ehi.

Pahi eta rerecuar rumo omboyevi yuvireco chupe:

—¡Ore ndorovireco iri ambuae mboreretur, Roma pendar mboreretur cuar ívate catu vahe güeraño ité orovireco! —ehi yuvireco.

¹⁶ Ipare Pilato omondo sundao upe yatica uca áqua. Ichui viraso yuvireco.

Jesús yaticasa curusu rese

¹⁷ Evocoiyase Jesús vinose curusu seraso “Ava Ācagüer” serer vahesave (ahe serer hebreo ñehe pipe Gólgota). ¹⁸ Aheve oyatica yuvireco. Seseve avei oyatica ñuvirío ava yuvireco, ñepei-peí yique ívii. ¹⁹ Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi. ²⁰ Setá iteanga ava oyeroqui co icuachiapri rese yuvireco. Esepiá, icuachiasa hebreo, latín iyavei griego ñehe pipe. Iyavei yaticasa namombríimi eté tecua sui. ²¹ Sese pahi eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

²² Pilato rumo omboyevi:

—Co aicuachía vahe, ñgue ehiño itera oī —ehi.

²³ Jesús atica pare evocoi irungatu sundao, omonuha iturucuar oyeupe imboyaho áqua yuvireco. Oipisi avei iturucuar ivri pendar nimbovívísai vahe, ñepei reseve pucuño tēi vahe. ²⁴ Sundao eta aipo ehi oyeupe yuvireco:

—Yamondoro eme; aviye catu yandeguayiño sese, ¿ava ité pīha oipisira? —ehi yuvireco.

Ñgue ehi icuachiapirer imboaviye yuvireco aipo ehi vahe: “Omboyaho-yaho ava che turucuar iyavei iguayi yuvireco sese” ehi vahe. Supi tupri ité ñgue ehi sundao yuvireco.

²⁵ Curusu ívipive yuvirecoi ichi, ichi cupihir, María Cleofas rembireco, María Magdalena avei. ²⁶ Osepiase osi iyavei che repiase yípive, che güembiaisu, aipo ehi osi upe:

—Che si, evocoi nde membirā ererecora —ehi chupe.

²⁷ Ipare voi aipo ehi cheu:

—Evocoi nde si —ehi.

Ichuive tupri amoingue ichi che rētave asāro vaherā.

Jesús mano agüer

²⁸ Ipare Jesús oicua ité Vu remimbotar yaviyepa iyavei icuachiapirer mboaviye áqua aipo ehi:

—Che husei —ehi.

²⁹ Aheve oime mbahe riru. Ipipe savapipo vinagre oī. Co vinagre pipe omoaqui mbahe savyu vahe yuvireco omondo ívira rese, osupi, imondo iyuruve yuvireco. ³⁰ Osupite pare aipo ehi:

—Opa yaviyé cute —ehi.

Ipare voi ñaca íviso omano.

Sundao oñaruca cutu lanza pipe Jesús

³¹ Ñepei arí Pascua pieta uve ipane vahe pipe aipo ñgue ehi. Sese judío ndoipotai ava retecuer pita curusu rese mbítuhusa arí pipe. Esepiá,

ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vaherā sundao curusu rese yaticapri rētima mope âgua ‘tomano’ oyapave curusu sui setecuer reroyipa âgua yuvireco. ³² Evocoiyase sundao yuvirasopa ñuvirío mbia Jesús rese yaticasa vahe yuvireco. Ahe sētima rane opa omope yuvireco. ³³ Oyemboyase rumo Jesús rese, “Omano ité” ehiño yuvireco chupe. Sese nomopei sētima yuvireco.

³⁴ Ñepei sundao rumo oicutu yiqueve lanza pipe. Ahe ramoseve voi osē suví, i reseve. ³⁵ Che asepia vahe ité; supi eté aipo ahe. Evocoiyase amombehu pēu pe seroya âgua. ³⁶ Esepia, co mbahe ēgue ehi icuachiapirer mboaviye âgua aipo ehi vahe: “Ndimopesai chietera que ñepei icangüer” ehi vahe aracahe. ³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehōgürer reraso âgua rese. José aipo Jesús rupindar. Ndoyecua ucai rumo omboetasa judío eta upe pahi rerecuar sui osiquiyepave. Pilato evocoiyase, “Aviye, eraso” ehi chupe. Evocoiyase José oso viraso sehōgürer. ³⁹ Nicodemo avei oipitívii, acoi oso vahe Jesús upe pítuse. Ahe güeru mbahe sīacua vahe mirra, áloe rese oyeseha vahe, treinta kilo, sehōgürer rese nara. ⁴⁰ Ēgue ehi José, Nicodemo reseve viraso sehōgürer yuvireco iyavei oimama tupri turucuar secose vahe imoíacuaprí pipe yuvireco. Ēgue ehi judío oyapo ava omano vahe tī âgua yuvireco yepi. ⁴¹ Namombrii Jesús aticasa sui oime mbia remití rēta. Aheve ité oime tuvípa ita hopri, ipiasu vahe iporupirëhi. ⁴² Ipipe omoingue Jesús rehōgürer yuvireco. Esepia, ahe tuvípa cōimi eté ichui iyavei vírovi ité judío pituhusa ari.

20

Jesús cuerayevisa

¹ Domingu pípe María Magdalena oso tuvípave pítu vitemiseve. Ahe osepia ita tuvípa rovapisa ndahe irise güendave ihäi. ² Evocoiyase ahe cuña oña oso Simón Pedro upe, cheu avei aipo ehi:

—¡Viraso tuvípa sui yande Yar yuvireco! ¡Ndoroicuai que vo catu omondo yuvireco! —ehi.

³ Evocoiyase Pedro rese oroña oroso tuvípave. ⁴ Che rumo aña catu Pedro sui. Che rane evocoiyase ayepota tuvípave. ⁵ Aiviro tēi, turucuar güeraño rumo asepia aheve. Ndaiquei rumo ipipe. ⁶ Ipare Pedro oyepota che raquicuei, oique voi tuvípa pipe. Ahe avei osepia turucuar imama agüer tēi. ⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co cotí ité ipoquesa tupri ou. ⁸ Evocoiyase che avei aique; asepia ēgue ehi vahe. Ahese aroya voi eté. ⁹ Ore rumo ndorosenducua vitei eté icuachiapri: “Ocuerayevira omano vahe pâhu sui” ehi vahe. ¹⁰ Ipare oroyevipa oroso ore rētave.

Jesús oyemboyecua María Magdalena upe

¹¹ María rumo, ore raquicuei ou vahe, opitaño ité tuvípa ipive, oyaseho. Oyasehoseve oiviro iri tuvípa pipe, ¹² ahese osepia ñuvirío Tūpa rembiguai iturucuar morochí vahe oguapi yuvinoi sehōgürer rupagüerve.

Ñepei oguapi oĩ ñaca rupagüer coti, ambuae ipi rupagüer coti. ¹³ Ahe Tūpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepio, che Yar rehōgür vīraso yuvireco iyavei ndaicuai que vo catu omundo yuvireco —ehi.

¹⁴ Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe. ¹⁵ Evocoiyase oporandu María upe:

—Cuña, ¿mahera vo ereyaseho? ¿Ava vo ereseca? —ehi chupe.

Ahe omoha ‘co mbahe miti rēta rārosar revo’ oya viña, aipo ehi chupe:

—Nde ererasose sehōgür, emombehuñomi tēi cheu que vo eremondo. Aheve taso seca —ehi chupe.

¹⁶ Evocoiyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

¹⁷ Evocoiyase María upe,

—Erepocoí rene che rese. Esepio, ndayeupi vītei che Ru recosave. Esoño, emombehu che reroyasar upe: “Jesús oyeupira Vu Tūpa recosave” erera chupe. Che Ru, pe Ru avei; che Tūpa, pe Tūpa avei —ehi.

¹⁸ Evocoiyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

Jesús oyemboyecua güemimbohe upe

¹⁹ Ahe ari pipeve, domingu pipe, pítuse, ore ore ñemonuhasave oroyeo-quenda tupri judío rerecuareta sui ore siquiyepave. Ahese Jesús oique ore pāhuve. Ore mboavirave.

—¡Peico tupri! —ehi oreu.

²⁰ Aipo ohe pare, omboyecua opo, oique avei oreu. Ahese orerorivete yande Yar repiase oroico. ²¹ Ipare aipo ehi iri:

—¡Peico tupri! Inungar che Ru che mbou, ēgüe ahe aveira co che pēu —ehi oreu.

²² Ichui ore peyu:

—Peipisi Espíritu Santo —ehi—. ²³ Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoiyase ndoipisii chira ñeroisa —ehi oreu.

Tomás osepia yande Yar icuerayevise

²⁴ Ñepei ore mboetasa rumo Tomás icōi vahe, ndipoi eté ore pāhuve Jesús oyemboyecuase oreu. ²⁵ Ipare ore aipo orohe chupe:

—Orosepio yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yíque cutu agüerve, ahese ramo aroyara —ehiño oreu.

²⁶ Ocho ari pare, ore oroñemonuha iri oĩ pipe oroico. Aheve ramo Tomás secoi ore pāhuve. Yepe oroyeoquenda tupri ité viña, Jesús rumo oiqueño ité ou ore pāhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepio che po, emoingue nde cuã quiravo cuarerve; embou ave nde po, emoingue avei che ique cutu agüerive. “Tachequerëhi eme seroya âgua” nderei chira cheu; ¡che reroya eve! —ehi.

²⁸ Evocoiyase Tomás aipo ehi:

—¡Che Yar Tüpa! —ehi chupe.

²⁹ Ahese aipo ehi Tomás upe:

—¿Cûritei che reroya che repiase eve cute? ¡Aviye catu ava che repiaëhi pipe che reroya vahe! —ehi chupe.

Co icuachiapri Jesús reroya âgua

³⁰ Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe. ³¹ Co rumo aicuachía ‘toviroya Jesús, Poropisírosar, Tüpa Rahir secosa; ipipe tovireco tecovesa yuvireco’ che yapave.

21

Jesús oyemboynecua siete güemimbohe upe

¹ Ore sore ivi Galilea ve, Jesús oyemboynecua iri oreu ipa Tiberia ve. ² Ahese oyeseve Simón Pedro yuvirecoi, Tomás ahe acoi icöi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe. ³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oroha carite pipe. Ahe pítu pipe rumo ndorombhai eté pira. ⁴ Cöhe potase rumo, Jesús oyemboynecua imbehi ivii. Ore rumo ndoroicuai eté Jesús secose. ⁵ Evocoiyase aipo ehi oreu:

—Mbía chihivahe, ¿ndapembohaimi eté pira? —ehi.

—Aní eté —orohe chupe.

⁶ Evocoiyase aipo ehi:

—Pemondo pira mbohasa íve pe asu coti. Ahese pembohara —ehi.

Ñgue orohe, ipare voi, “¡Too!” orohe, ndorovinose catui eté ipi sui pira mbohasa oroico. Esepio, savapió tupri ité pira ipipe. ⁷ Evocoiyase che, sembiaisu, aipo ahe Pedro upe:

—¡Yande Yar niha evoco! —ahe.

Pedro che ñehe rendu ramoseve voi, omonde oturucuar. Esepio, yipindar nani secoi; opo íve oso chupe. ⁸ Ore evocoiyase oroviroyepota ité carite ndatipiimisave, oriochoho pira rehii imbohasa pipe seraso, cien metro tēi oroico imbehi sui. ⁹ Orovinoñese ivi átasave, orosepio tâtapii harive pira, pan reseve.

¹⁰—Peru moviro evocoí pira penose ramo vahe —ehi oreu.

¹¹ Evocoiyase Simón Pedro oha carite pipe, oichoho ndatipiisave pira guasu rehii imbohasa pipe, ciento cincuenta y tres tupri; yepe setá viña, imbohasa rumo ndosoroi eté. ¹² Evocoiyase aipo ehi:

—Perio, tapecarumi rane —ehi oreu.

Ndipoi eté que ñepei ore pâhuve “¿ava vo nde ereico?” ehi vahe chupe. Esepio, oroicuaño ité yande Yar secose. ¹³ Chupe ore sore, oipisi pan, ombou oreu, ñgue ehi avei pira imbou oreu.

¹⁴ Co rese Jesús oyemboynecua mbosapi rupi oreu ocuerayevire.

Jesús osecoña Pedro

¹⁵ Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroya ramomi vahe rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoiyase esāro tupri che reroyasar yuvireco —ehi.

¹⁷ Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovhai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoiyase ndehañeco tupri catu che reroyasar rese —ehi—. ¹⁸ Supi eté aipo ahe ndeu: nde chihivahé catu vitese, ereyemonde vité nde ae, eruguata vité avei nde remimbotar rupi; nde cuacua catuse rumo, ereyeyivamoatara, ambuae evocoiyase nde mboyemondera, nde reraso aveira nde so potaēhisave —ehi.

¹⁹ Jesú rumo omboyecka aipo ohe piipe mara ehira Pedro omano Tūpa mboeteisave curi. Ipare,

—¡Erio che rupi! —ehi Pedro upe.

Jesús remimbohe saisupri

²⁰ Che Jesús rembiaisu ité aico, che ité acoi carusa ipa vaheve yípive aī acoi aporandu chupe: “Che Yar, ¿ava vo nde mondora nde amotarēhimbar upe?” ahe acoi chupe. Aguatase Pedro raquicuei, oyemboyere che repia. ²¹ Ahese oporandu chupe:

—Che Yar, evocoi no, ¿mbahe oimera chupe? —ehi cheu.

²² Evocoiyase omboyevi Pedro upe:

—Che aipotase secove vité água che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroyasar ipihañemoñeta tēi aipo che namanoi chivaherā ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite água che yevise nara, ¿mara vo nde ererecora viña?” ehi.

²⁴ Che ité amombehu co mbahe, che avei aicuachía iyavei yaicua supi tupri vahe ité che remimombehu.

²⁵ Oime avei ambuae mbahe setá Jesús rembiapo, que opacatú icuachi-asase viña, ndiyai chietera revo ivi viña. Aipo rupive.

APOSTOL REMBIAPO LOS HECHOS

Tūpa omboura Espíritu Santo viroyasar upe

¹ Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer. ² Ocuerayevire, ivave oso renondeve, Jesús omombehu oporocuaita Espíritu Santo píratasa pipe güembiporavo apóstol upe sembiaporã. ³ Oyemboyecua güembiporavo upe omanore. Setá rupi omboyecua tupri ocuerayevisa chupe. Semimbohe osepia yuvireco imanore cuarenta ari rupi. Ahese omombehu Tūpa mborerecuasa resendar güemimbohe upe.

⁴⁻⁵ Oicove vitese yuvireco sese, aipo ehi chupe:

—Pesëi rene Jerusalén sui. Tomboaviye rane che Ru Tūpa güemimombehu, ahe acoi amombehu pëu. Juan niha pe ãpiramo i pipe tēi; Tūpa rumo Espíritu Santo pipe pe ãpiramora. Movíromi tēi ari ipane vite imondo água pëu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cûrитеi Israel iguar upe píratasa iyeyecuai água? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua água pëu. Esepia, Tūpa año ité vireco omborecuasa ahe mbahe apo água. ⁸ Peipisira rumo Tūpa píratasa oiquesse Espíritu Santo pe piña pipe. Ahese pemombehu tupríra che recocuer Jerusalén pendar upe, Judea pendar, Samaria pendar iyavei opacatu co ívi pipendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tūpa viraso ivave. Ichui Jesús oique iva quiha pâhuve. Evocoiyase ndosepia iri eté yuvireco cute. ¹⁰ Omahe viteseve yuvinoha ivave ichosa rese, aviyeteramo tēi ñuvirío mbia, iturucuar morochí vahe, oyemboyecua apóstol ípive yuvinoha ¹¹ aipo ehi yuvireco chupe:

—Galilea iguar, ¿mahera vo pemahe vite iva rese pehã? Evocoi Jesús, inungar Tūpa viraso ivave pe sui, égue ehi aveira niha ogüeyi ou co ívi pipe coiye —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoiyase apóstol oyevi yuviraso Jerusalén ve ívitri Olivo sui, ahe ihamombrigüer ñepei kilómetro tēi. Supivemi imombehusa judío guata água mbituhusa ari pipe yepi. ¹³ Yuviroiquesse Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi. ¹⁴ Co opacatu ari yacatu rupi oñemonuha oyoya guasu oyeroqui água yuvireco yepi Jesús rivri, ichi, ambuae cuña reseve avei.

¹⁵ Evocoiyase ñepei ari pipe oñemonuha guasu ciento veinte ava yuvireco. Ipâhuve Pedro opüha aipo ehi ava upe: ¹⁶ “Che mu eta Jesucristo reroyasar, iya ité co imboavíyesa Tūpa Ñehengagüer Judas recocuer

resendar. Ahe imombehupri David upe Espíritu Santo pipe aracahe. Evocoi Judas vîraso vahe Jesús amotarêhimbar ipisi uca âgua. ¹⁷ Ahe acoi secoi yande pâhuve co mboravîquisa rese yande pîtvii âgua avei viña. ¹⁸ Evocoi güembiapo ai reprí pipe omboepi ivi. Ipare ñaca iviso oviapi oso ivive, oyetiapiipa. ¹⁹ Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñehe pipe ‘Ivi Tuví resendar’ oyapave. ²⁰ Esepio, icuachiapri Salmo pipe aipo ehi: ‘Taseyasa séta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyer iporaviqui râgüer pisí âgua’ ehi vahe.

²¹ “Evocoiyase cohove oime ava yande Yar Jesús secoi vitese yande pâhuve ²² ñapiramosa suive yuvirecoño vahe ité yande rupi iyavei ivave ichosa osepio vahe avei yuvireco. Ahe tiporavosa ñepei ipâhu pendar yande rupi icuerayevi agüer mombehu âgua” ehi omboetasa upe.

²³ Evocoiyase oiporavo ñuvirío mbia yuvireco: ahe José Barsabás, serosa Justo; ambuae rer Matías. ²⁴ Ipare oyeroqui yuvireco aipo ehi: ‘Nde, ore Yar, opacatu ava piha ereicua. Emboyecua cohove nde rembi-poravo oreu; ¿uma vo ereipota ²⁵ eremondo vaherâ icuaitarâ apóstol seco âgua Judas recuñara? Ahe oangaipa pipe oyemocañi uca têi vahe oico” ehi Tûpa upe yuvireco.

²⁶ Evocoiyase osâha iporavo yuvireco. Matías ité vînose iporavoprí sui yuvireco. Ichui tuprí ité oique once apóstol pâhuve.

2

Espíritu Santo güeyi agüer

¹ Oyeptase Pentecostés pieta, opacatu Jesús reroyasar oñemonuha oí guasu pipe yuvireco. ² Aheve oí pipe aviyeteramo têi ivitu ipîrata vahe nungar siapu guasu ou iva sui. Ahe siapugüer oyendupa tuprí oí pipe. ³ Ahese oyecua tata rendigüer nungar opacatu aheve yuvirecoi vahe haríve. ⁴ Ahese avei Tûpa omoingue evocoi ava piha pipe oEspíritu Santo. Ichui ahe Espíritu omoñehe uca ambuae fiehesa pipe yuvireco.

⁵ Ahe ari pipe setá iteanga judío yuvirecoi Jerusalén ve omboaviye vahe ocuaita Tûpa mboeteisa, ahe oñemonuha vahe opacatu ivi rupindar yuvireco. ⁶ Mbahe siapu guasu vahe renduse, oñemonuha ati têi yuvireco oyese. Ndoyemboaracuai têi yuvireco ambuae ava oñehe pipe ñehese. ⁷ “¡Too!” ehi têi oyepihamondiisa pipe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco? ⁸ —Mahera pîha co ñepei-peí oñehe yande ñehe pipe yuvireco? —ehi têi oyeupe yuvireco—. ⁹ Esepio, cohove yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar, ¹⁰ Frigia pendar, Panfilia pendar, Egipto pendar, Libia cotindar, ahe Cirene cõquivotindar. Iyavei Roma pendar, ¹¹ judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu ñehe yuvireco yande ñehe pipe Tûpa rembiapo icatuprí vahe! —ehi.

¹² Opacatu oyepihamondi, ndoicuai opîhañemoñeta âgua yuvireco.

—¿Mara ehi pîha co na oya yuvireco? —ehi-ehi têi yuvireco oyeupe.

¹³ Ambuae ava rumo seroñrosa pipe aipo ehiño yuvireco:

—¡Osavaipo mo evocoi yuvireco! —ehi.

Pedro oñeho ava upe

¹⁴ Evocoiyase Pedro opūha opacatu once vahe apóstol pāhuve, oñeho pīrata aipo ehi: “Che mu judío eta, opacatu Jerusalén pendar avei, peicua co mbahe amombehu vaherā pēu; peyapisaca tupri che ñehe rese: ¹⁵ ndosavaipoi moco co mbia yuvireco. ¿Ndapesepiai vo añihivei vīte cūritei? ¹⁶ Co niha Tūpa ñehe mombehusar Joel oicuachía vahe aracahe:

¹⁷ Tūpa aipo ehi:

Coiye, ari cañi renonde, amondora che Espíritu Santo opacatu ava upe. Ipíratasa pipe pe rahir, pe rayri oñehera yuvireco.

Mbia chīhivahe osepiara oquer pendar nungar mbahe yuvireco.

Oime aveira queraisa supi eté vahe cuacua vahe upe.

¹⁸ Supi eté ahe ari pipe amondora che Espíritu che rembiguai cuimbahe upe, che rembiguai cuña upe avei.

Ipare oñehera yuvireco che rese ipíratasa pipe.

¹⁹ Amboyecuara poromondiisa iva rese.

Êgüe ahe aveira poromondiisa mboyecua ivi pipe:
tuvi, tata iyavei tātachi.

²⁰ Yande Yar ari tuvichá vahe imboeteipri renonde ohara pītu, yasi oyeapora tuvi nungar.

²¹ Opacatu ava, che Yar che pītvii eve, ehi vahe, ahe oñepisirora yuvireco’ ehi Joel icuachía aracahe.

²² “Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tūpa pīratasa pipe pe pāhuve güeco maranehi mboyecua água. Ahe niha peicua opacatu.

²³ Ipare rumo evocoí Jesús imondosa pēu yuca água. Ahe rumo Tūpa remimbotar rupi. Esepi, yipíve ité Tūpa oicua pe peipisira yuca uca água curusu rese ava naporai vahe upe. ²⁴ Tūpa rumo ombogüerayevi manosa sui. Esepi, manosa ndoicatui sereco água. ²⁵ Supi eté mborerecuar guasu David oñeho Jesús recocuer rese aracahe aipo ehi:

‘Che aicua che Yar che rese secoi che acato coti mbahe tēi pipe che viapiëhi água yepi.

²⁶ Sese aviháño ité vichico, asapucai avei che rorivetesu pipe.

Iyavei che yeroya tuprisave asârora mbahe avíye vahe che recove iri água.

²⁷ Esepi, nde ndereseyai chira che hā omano vahe pāhuve, nderemonduy ucai chiaveira nde rembiguai seco maranehi vahe retecuer.

²⁸ Co tecovesa ereicua uca cheu.

Che mbovhara eve nde rese che recose’ ehi David aracahe.

²⁹ “Che mu eta, supi eté yande ramoi David omano, ñotisa ita hopri pipe aracahe. Ahe suvípa ouve vīte cohave yande pāhuve. ³⁰ David rumo Tūpa ñehe mombehusar, oicua Tūpa oyeupe aipo ehi vahe: ‘Supi eté aipo ahe ndeu: nde suindar oimera mborerecuar guasu nde recuñara’ ehi vahe. ³¹ Ahe ndoyavii osepi vahe ité Poropísírosar cuerayevisa. Evocoiyase aipo ehi oñeho sese: ‘Thā ndopítai chira omano vahe pāhuve iyavei setecuer ndituyui chira’ ehi aracahe. ³² Evocoí Jesús, Tūpa remimbotar yuca secoi. Ahe imombehusar opacatu ore oroico. ³³ Ipare Tūpa viraso oacato coti imboguapi. Ahe oipisi imombehupri Espíritu Santo Vu sui. Evocoiyase ahe opa omondo co ava yuvirecoi vahe upe. Ahe pesepia, pesendu avei cūritei peico. ³⁴ Esepi, evocoí oso vahe ivave ndahel David. Ahe ae rumo aipo ehi aracahe:

‘Yar aipo ehi che Yar upe:

Eguapi cohabe che acato coti che piri.

³⁵ Asecopipa uca ranera nde amotarëhimbar ndeu, ehi Yar che Yar upe' ehi David aracahe.

³⁶ "Pe tapecuasapa, ticusasapa avei opacatu Israel recua rupi, supi eté evoco Jesús curusu rese peyatica vahecuer, ahe Tūpa omoingo opacatu yande Yarā iyavei yande pisiro ãigua" ehi Pedro ava rehii upe.

³⁷ Alpo renduse, tasí iteanga ipiha pipe yuvireco. Evocoiyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoiyase? —ehi.

³⁸ Evocoiyase aipo ehi ahe ava upe:

—Pemboasi pe angaipa; peyevi Tūpa upe. Iyavei peñeapiramo opacatu Jesucristo rer pipe. Evocoiyase Tūpa iñerora pe angaipa rese. Iyavei omondora Espíritu Santo pēu. ³⁹ Esepia, co ñehesa imombehupri, ahe pēu nara, pe suindar upe nara iyavei opacatu amombri Tūpa sui yuvirecoi vahe upe nara avei, ahe acoi opacatu yande Yar Tūpa oyeupe nara gúeru pota vahe —ehi.

⁴⁰ Égüe ehi oñeha vite ava mboaracua aipo ehi:

—¡Peyepepi co ava secocuer co coti tēi vahe sui! —ehi chupe.

⁴¹ Acoi ava viroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús viroya vahe rese. ⁴² Opacatu viroya tupri ité apóstol porombohesa. Opacatu guasu avei oyeaisu tupri yuvireco, oyeroquí iyavei oñemonuha oyeupe pan mboyaho-yaho ãigua yuvireco yepi.

Yipindar vahe Jesús reroyasar recocuer

⁴³ Opacatu oyembosiñiye imboeteisa pipe yuvireco. Esepia, apóstol oyapo setá poromondiisa 'toicua Tūpa suindar yande porombohesa yuvireco' oyapave. ⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara. ⁴⁵ Omundo ambuae ava upe oívi iyavei ombahe eta yuvireco. Sepri omondo oyeupe mbahe panesa rupi-rupi. ⁴⁶ Ari yacatu rupi judío tūparove oñemonuha yuvireco. Iyavei oí yacatu rupi avei oñemonuha oyoya guasu pan mboyaho ãigua. Ipare oyoya guasu ocaru yuvireco oyembovhada pipe, opihañemoñeta tuprisa pipe avei. ⁴⁷ Osapucai yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoiyase ari rupi omboeta catu ava iñepisiro ãigua Jesucristo viroya vahe pâhuve.

3

Ndoguatai vahe cuerasa

¹ Nepei ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyeroquí yuvireco yepi. ² Ahe tūparo roquendipi rer Porañete. Aheve ari yacatu rupi viraso ñepei ava oyesu suive ndoguatai vahe 'tomondo guarePOCHI ava tūparove yuviroique vahe yuvireco chupe' oyapave. ³ Ahe ndoguatai vahe omahe Pedro, Juan rese tūparove seique potase, oporandu guarePOCHI rese chupe. ⁴ Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

⁵ Evocoiyase ahe mbia omahengatu sese 'omboura revo que mbahe cheu' oya viña. ⁶ Aipo ehi rumo ndoguatai vahe upe:

—Che ndarecoi guareepochi, oro avei. Co areco vahe rumo amondora ndeu: Jesucristo, Nazaret pendar, rer pipe epūha, eguata —ehi chupe.

⁷ Evocoiyase oipisi ipo yasu cotindar imopuha. Ahe ramosese opa tupri ipi, ipiñuha avei ovíracua. ⁸ Evocoiyase opūha, opo, oguata; oique oso tūparove supi. Opo-opo vorivetesave iyavei osapucai Tūpa upe. ⁹ Opacatu ava osepia yuvireco iguatase iyavei Tūpa upe isapuaise. ¹⁰ Omahecuse sese, “¡Too!” ehi tēi yuvireco. Iyavei ndoyembovihai aviyeteramo tēi icuerase yuvireco. Esepio, evocoii ava oicuapa tūparo roquendipi Porañete serer vahesave chinise mbahe rese iporanduse yuvireco yepi.

Pedro oñehe ava rehii upe tūparo Corero Salomón serer vahevriye

¹¹ Ndoguatai vahecuer ndoyepepi potai Pedro, Juan sui. Yuvínoña ati, oyepihamondii ava sepio tūparo Corero Salomón serer vaheve yuvirecoise. ¹² Pedro evocoiyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndoyavii co ore pīratasa pipe tēi iyavei Tūpa rese ore pihañemoñeta tuprisa pipe tēi orombogüera vahe co mbia pēu viña. ¹³ Tūpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoi eta avei no, ahe niha omondo güeco pīratasa tuvicha catu vahe Guahir Jesús upe. Pe rumo acoi pemondoño mborerecuar Pilato povrige. Acoi omose potase, pe evocoiyase ndapeipotaiño imose äqua chupe. ¹⁴ Ahe seco maranehi vahe, seco ivi vahe renose rāgüler pipe, peporandu: ‘Tosē oporapichi vahe’ peye. ¹⁵ Egüe peye acoi tecovesa ombou vahe yuca. Tūpa rumo ombogüerayevi omano vahe pāhu sui. Ahe niha ore oromombehu orico pēu. ¹⁶ Co Jesús rer rese yeroya pipe ité niha oipisi pīratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri” ehi ava upe.

¹⁷ “Che mu eta, che aicua acoi pe peipītivi vahe pe rerecuar Jesús yuca uca äqua pe icua tupriehi pipe cuese. ¹⁸ Egüe ehi Tūpa imboaviye aracahendar opacatu oñehe mombehusar upe güemimombehugüer: ‘Che Rembiporavo Poropisrosar oiporarara mbahe-mbahe tēi rasicuer omano’ ehi vahe. ¹⁹ Sese pemboasi pe angaipa; peyevi Tūpa upe. Ipipe sui tomocañi pe angaipa pe sui. Aviyeteramo co sui omboura yande Yar pe reco morohisa äqua, ²⁰ ombou aveira Jesús, ahe yipisuve iporavopri pe pisirosäqua. ²¹ Cūritei rumo Jesucristo ivave vite secoi acoi Tūpa opase voi omoingatu opacatu mbahe iyevi äqua. Aipo ehi acoi imoñehe uca aracahendar oñehe mombehusar ndaseco marai vahe. ²² Moisés yande ramoi yuvirecoi vahe upe aipo ehi imombehu aracahe: ‘Yande Yar Tūpa omopuhara ñepei oñehe mombehusar pe pāhuve che nungar. Ahe iñehe pesendura, pemboyeroya catu aveira. ²³ Opacatu ndoviroysi vahe iñehe Tūpa omocañira güembiporavo pāhu sui’ ehi.

²⁴ “Egüe ehi opacatu Tūpa ñehe mombehusar Samuel suive aracahe omombehu avei co ari cūritei yasepio vahe yuvireco. ²⁵ Pēu nara niha Tūpa ñehe mombehusar remimombehugüer aracahendar. Pēu nara avei acoi Tūpa omombehu vahe güemimbotar yande ramoi eta upe. Esepio, aipo ehi Abraham upe aracahe: ‘Opacatu ava co ivi pipendar ahe sovasapri yuvirecoira nde suindar sui’ ehi. ²⁶ Acoi Tūpa Guahir ombogüerayevise, pēu rane ombou pe rovasa äqua ‘toseyapa ñepei-peigüecocuerai yuvireco’ oya” ehi Pedro ava rehii upe.

4

Pedro, Juan serasosa mborerecuar rovai

¹⁻² Pedro, Juan reseve oñeho viteseve ava rehii upe, ahese oñemoirosa pipe pahi eta, tūparo rārosar sundao rerecuar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pāhu sui” ehi. ³ Ichui oipisi seraso soquenda yuvireco ‘ayihive voi yanosera mbahe rese porandu ãagua’ ohesa pipe. Esepia, caharuse tēi osoquenda yuvireco. ⁴ Setá rumo ava iñehesa osendu vahe víroya yuvireco. Ahe cuimbahe seroyasar retacuer güeraño seni cinco mil.

⁵ Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuaita rese oporombohe vahe, ⁶ pahi rerecuar ívate catu vahe Anás, Caifás, Juan, Alejandro, opacatu omu reseve. ⁷ Evocoiyase güeru ucase Pedro iyavei Juan opāhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.
⁸ Evocoiyase Pedro, Espíritu Santo pīratasa pipe, aipo ehi chupe:
 —Pe, mborerecuareta co tecua pīpendar, pe avei pahi rerecuar:
⁹ peporandu niha co ava imbaheasi vahe ndoguata catui vahe mbogüera agüer rese oreu —ehi chupe—. ¹⁰ Evocoiyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatrica uca vahecuer curusu rese. Tūpa rumo ombogüerayevi iri omano vahe pāhu sui. ¹¹ Co Jesús pe remieroíro, ahe rumo yande víracuasa. Pe evocoiyase inungar oi mopuhasar omomboño vahe ita aviyé catu vahe oi moviracuasa rāgüler yepi. ¹² Ndipoi que ambuae ava sui poropísiro, Jesús güeraño ité oicatu oporopísiro. Esepia, Tūpa nombouí ambuae ava tēi co ívi pipe yande písiro ãagua —ehi.

¹³ Mborerecuar osepiase iyembosiquíyeëhisa yuvireco, “¿Mara ehi pīha co mbia? ¡Ava tēi, ndoyembohei vahe niha!” ehi tēi yuvireco chupe. Ichui oicua Jesús remimbohegüer secose yuvireco. ¹⁴ Iyavei acoi ava semimbogüeragüer supive ité secoise, sese ndoicatui chupe oñeho mara ãagua yuvireco. ¹⁵ Ipare, “Pesē ocarve” ehi mborerecuareta yuvireco chupe. Ahe güeraño evocoiyase opita oi pipe oñemoñeta yuvireco sese ¹⁶ aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Égue ndehi” yahe chupe. ¹⁷ Yambosiquíye ava upe Jesús rer rese iñehes iríehi ãagua yuvireco. Ipipe sui ava tosendu iri eme Jesús resendar ñehesa yuvireco —ehi.

¹⁸ Aipo ohe pare, “Perio” ehi yuvireco chupe. “Pesendu, co pipe suive peñeho iri eme tupri iyavei pembohe iri eme avei ava Jesús rer pipe” ehi yuvireco chupe. ¹⁹ Omboyeviño rumo oñeho yuvireco chupe:

—¿Mara ehi pe pīhave? ¿Uma pīha aviyé catu Tūpa rovai? ¡Pe porocuaita tie orovíroya catura Tūpa ore cuaisa sui! ²⁰ Ndiyai rumo mbahe ore rembiepia, mbahe orosendu vahe avei mombehüehi ãagua oreu —ehi.

²¹ Aipo ihese, mborerecuar ombosiquíye catu tēi yuvireco. Ichui rumo omose tupriño. Esepia, ava omboetei guasu Tūpa yuvireco co imbaheasi vahe mbogüera repiase. Sese ndoicatui eté mbahe apo yuvireco chupe.

²² Evocoi ava oipisi vahe Tūpa poromondiisa ocuera água, ahe otíaro catu cuarenta aravíter vireco vahe sui.

Jesús reroyasar oporandu Tūpa upe siquyeēhisa rese yuvireco

²³ Yuvinoses Pedro, Juan avei, oyevi yuviraso omboetasa piri. Aheve oñemonuhase opa omombehu pahi rerecuar oyeupe ñehe mara-mara tēisa yuvireco. ²⁴ Aipo rendu pare, oyoya guasu oyeroqui yuvireco Tūpa upe aipo ehi: “Ore Yar, nde niha Tūpa opacatu iva, ivi, para guasu, opacatu ipor reseve aposar ereico. ²⁵ Nde Espíritu Santo pipe aipo eremombehu uca nde rembiguai mborerecuar David upe aracahe: ‘Mahera vo co ava ndahei vahe judío oyamotaréhi yuvireco?

¿Mahera vo ipihañemoñeta rai tēi yuvireco?

²⁶ Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tūpa iyavei sembiporavo amo-taréhi água’ ehi aracahe.

²⁷ “Égüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepi, oñemonuha yuvireco nde rembiguai aracaheve nde Rembiporavo Poropisiosar Jesús, seco maranehi vahe, amotaréhi água. ²⁸ Égüe ehi yapo opacatu nde pihañemoñeta aracahendar rupi tupri ité yuvireco. ²⁹ Iyavei cūritei, ore Yar, emahe ore amotaréhisar rese. Embou nde píratasa nde rembiguai oroico vahe upe siquyeēhisa pipe nde ñehengagüer mombehu vite água. ³⁰ Ipare, nde píratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesú rer maranehi pipe” ehi yuvireco oyeroqui.

³¹ Iyeroqui pare, Tūpa omboririi opacatu mbahe iñemonuhase yuvireco chupe. Ahese Espíritu Santo opa oique yuvireco sese. Sese osiquyeēhisa pipe omombehu tupri Tūpa Ñehengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe. ³³ Jesucristo apóstol omombehu vite ipíratasa pipe icuerayevi agüer yuvireco. Ipipe Tūpa osovasa catu vite opacatu yuvireco. ³⁴ Ndipoi eté ipāhu pendar mbahe ndovirecoi vahe. Esepi, opacatu ivi vireco vahe iyavei oí omundo, ³⁵ ahe sepri omundo apóstol upe yuvireco yepi. Ahe evocoiyase omboyaho-yaho opacatu upe mbahe ipane vahe rupi-rupi yuvireco. ³⁶ Égüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovihasar’ oya aipo ehi), ³⁷ ahe mbia omundo oivi, güeru sepri apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omundo ivi yuvireco. ² Ahe mbia rumo omboyaho sepri, ñepei iyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu. ³ Evocoiyase Pedro aipo ehi chupe:

—Ananías, ¡mahera ereroya Caruguar nde piha pipe Espíritu Santo mbopa água, eremboyahoño tēi nde ivi reprí guarepochi ndeyeupe nara!

⁴ ¿Ndahei vo nde mbahe ité ivi viña? Eremondo ité niha, evocoiyase nde

mbahe ité guarepochi. ¡Mahera ereyapo co nungar! Ndahei ava upe nde remira, Tūpa upe ité rumo nde remira —ehi chupe.

⁵ Osenduse Pedro ñehesa, oviapi sehögür ososovai. Ahese opacatu oyandu vahe osiquiye tēi yuvireco. ⁶ Ipare mbia chihivahe yugüeru, osupi sehögür, oipoque seraso yuvireco ñoti água.

⁷ Mbosapi hora pare, sembireco Safira serer vahe oique oi pipe. Ndoicua vitéi rumo omer mano. ⁸ Ahese Pedro oporandu chupe:

—Emombahu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoiyase aipo ehi ahe cuña upe:

—¡Mahera peyemboyoya pe pihañemoñeta rese pe secoáha água yande Yar Espíritu! Coi yugüeru nde mer tísarer. Nde avei nde reraso água yuvireco eiþeve —ehi chupe.

¹⁰ Ahe ramoseve avei oviapi sehögür Pedro rovai. Mbia chihivahe yuviroiques, oipoque voiño ité sehögür seraso imer ivii ñoti água yuvireco. ¹¹ Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

¹² Evocoiyase apóstol pipe Tūpa omboycua uca setá poromondiisa ava pâhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco. ¹³ Opacatu ambuae ndoyemboyai yuvireco sese osiquiye pave. Ava rehii rumo, omboetei eteanga apóstol yuvirecoi vahe yuvireco. ¹⁴ Oyemboeta catu yande Yar reroyasar setá cuimbahe, setá avei cuña. ¹⁵ Iyavei ava rehii vinose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihágür. Ahese revo ombogüerara” ehi yuvireco oyeupe. ¹⁶ Ava Jerusalén ivirindar avei güeru omonuha setá imbaheasi vahe, caruguar rese yuvirecoi vahe apóstol upe imhogüerapirā. Ahe evocoiyase opacatu ombogüera yuvireco.

Apóstol yamotarēhipri yuvirecoi

¹⁷ Ichui tēi pahi rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatéhisave. ¹⁸ Sese oipisi osoquendapa uca yuvireco. ¹⁹ Ipare rumo, pítu pipe, Tūpa rembiguai iva pendar ou omboi oquenda, vinose ichui, aipo ehi chupe: ²⁰ “Peso tūparo guasuve, pemombehu avei ava upe co ñehesa tecocuer piasu resendar” ehi chupe. ²¹ Co mbahe rendu pare, supi tupri ité oyapo yuvireco. Cōhe ramoseve yuviraso judío tūparo guasuve ava mbohe água.

Aheseve pahi rerecuar ivate catu vahe, supindar avei osenoi opacatu tecua pipendar mborerecuar ñemonuha água ivate catu vahesave; omondo yuvireco güembigui apóstol reru água soquendasa sui aheve nara viña. ²² Oyepotase rumo sembiguai yuvireco, oseca tēi soquendapri. Ichui oyevi tēi yuvireco imombehu ²³ aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipí rupi sārosar osāro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

²⁴ Osenduse, pahi rerecuar ivate catu vahe, tūparo rārosar rerecuar, pahi rerecuareta avei yuvireco, ipihañemoñeta tēi: “¿Que rupi vo opoira

co mbahe sui yuvireco?" ehi tēi yuvireco oyeupe. ²⁵ Aheseve ñepei mbia oyepota imombehu:

—Evocoi pesoquenda vahecuer, ahe mbia cūritei oporombohe tūparove yuvireco —ehi chupe.

²⁶ Evocoiyase tūparo rārosar rerecuar, sembiguai avei yuviraso seru áqua mbahe tupri pipe, "Aviyeteramo yande api-api tiētera ava yuvireco yaru raise" ehi yuvireco. ²⁷ Víroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

²⁸ —Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehii upe ore mborerecuar oroyuca uca evocoi mbia —ehi pahi rerecuar chupe.

²⁹ Pedro, omboetasa reseve, omboyevi pahi rerecuar ivate catu vahe upe yuvireco:

—Ore cuaita ité Tūpa mbooyeroya, ndahei chira rumo ava tēi rane oromboyeroyara —ehi yuvireco chupe —. ³⁰ Yepe peyatrica, peyuca uca Jesús curusu rese viña, yande Ru Tūpa rumo acoi yande ramoi eta víroya vahe, ahe ité ombogüerayevi. ³¹ Ipare osecomboivate ivate oacato coti imboguapi imoi. Ahe niha Mborerecuar guasu, Poropísírosar avei 'tomboasí oangaipa, toyevi cheu, toipisi angaipa resendar ñeroisa yuvireco' oya Tūpa Israel suindar upe. ³² Ore Tūpa rembiapo repiasarer imombehu áqua oroico, Espíritu Santo avei oñehe ore ñehe rupi ava upe, ahe acoi Tūpa ombou vahe viroyasar upe —ehi.

³³ Osenduse mborerecuar aipo ñehesa, oñemoiró iteanga yuvireco. Oyucapa pota opacatu apóstol yuvireco viña. ³⁴ Mborerecuar pâhu pendar rumo oime mbia fariseo, Gamaliel serer vahe, ahe Moisés porocuaita rese oporombohe vahe iyavei imboeteipri catu vahe. Ahe opúha oporocuai, "Toyuvinose raimi ocarve apóstol" ehi. ³⁵ Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo áqua renondeve co mbia upe yuvireco —ehi—. ³⁶ Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrocientos ava oyeupi aracaco. Ipare acoi oyuca yuvireco. Ahese supindar opa oñemosai tēi yuvireco. Ahe peve secocuer opa. ³⁷ Coiye catu, omombehuse mborerecuar Roma pendar ava retacuer cua áqua, ahese Judas, Galilea pendar, oyemomborerecu. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—. ³⁸ Sese cūritei peyapoi rene mbahe co ava upe. Yaseyaño. Esepia, evocoi mbahe sembiapo ndipocopii chira oyapose opíratasa pipe tēi yuvireco. ³⁹ Tūpa suindarse rumo ndapemombituhu catui chietera. Peicua catu, aní chira yayamotarëhi Tūpa ipipe —ehi omboetasa upe.

Aipo ihese, opacatu imboetasa víroya yuvireco. ⁴⁰ Ichui rumo güeru iri apóstol inupa uca áqua iñehe iriëhi áqua Jesucristo rese yuvireco. Inupa pare opa omose yuvireco. ⁴¹ Ipipe apóstol ovihareté iteanga yuvireco. Esepia, Tūpa ombou chupe iparaisu áqua yuvireco Jesús rer rese iyeroyasa sui tēi. ⁴² Ipare ndopoi eté ari yacatu Poropísírosar Jesús recocuer mombehusa sui yuvireco. Omombehuño ité tūparo pipe iyavei opacatu ava rëta rupi yuvireco.

6

Siete iporavosa iparaisu vahe p̄it̄ivi ãqua yuvireco

¹ Ahe araviter pipe aipo oyemboetase Jesús reroyasar yuvireco, griego pipe oñeho vahe oñeho rai oyeupe hebreo pipe oñeho vahe rese yuvireco: “Nihañeco tupri ore mu imer mano vahecuer rese ari yacatu mbahe poropitiviisa imondosase chupe” ehi oñeho yuvireco. ² Evocoiyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropitiviisa mundo ãqua rese tēi —ehi yuvireco—. ³ Sese ore rivreta, peiporavo siete mbia seco aviye vahe pe pāhu sui, yaracua vahe iyavei Espíritu Santo viroya vahe ité opihä pipe. Ahe mbia tihañeco co mboraviquisa rese yuvireco. ⁴ Ore evocoiyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵ Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espíritu Santo opihä pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoímbia Antioquía pendar, ahe viroya vahecuer judío aracuasa. ⁶ Ichui virasopa apóstol upe yuvireco. Ahe omondo opo iharive oyeroqui yuvireco sese.

⁷ Ahese Tūpa Ñehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya iñehengagüer yuvireco.

Esteban pisisa

⁸ Co mbia, Esteban, vireco ité Tūpa píratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pāhuve. ⁹ Evocoiyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oñehopepi-epi Esteban yuvireco. ¹⁰ Ndoicatui rumo iñeho recopi ãqua yuvireco. Esepia, ahe oñeho mbahecuasa Espíritu Santo omondo vahe pipe. ¹¹ Evocoiyase yamotaréhimbar omboepi ambuae ava upe semira tēi ãqua sese yuvireco. “Ore orosendu co mbia oñehese mbahe naporai vahe rese Moisés amotaréhisave, Tūpa amotaréhisave avei’ aipo peyera peñeho” ehi yuvireco chupe. ¹² Evocoiyase ahe ava oyamotaréhi uca opacatu ava mborerecuar reseve iyavei judío porocuaita rese oporombohe vahe upe avei yuvireco. Ichui oipisi yesapicha Esteban seraso mborerecuar uve porandusa ivate catu vahesave yuvireco. ¹³ Iyavei oseca mbia semira tēi vahe oñeho vaherā sese yuvireco. Ahe aipo ehi:

—Co mbia oñeho-ñeho tēi yande tūparo guasu imaranehi vahe amotaréhisave, Moisés porocuaita amotaréhisave avei. ¹⁴ Ore orosendu iñeho: “Jesús Nazaret pendar omocañira tūparo guasu iyavei Moisés yande mbohesa avei aipo osecuñarora” ehi —ehi yuvireco chupe.

¹⁵ Ahese opacatu mborerecuar oñemonuha vahe yuvínoi aheve omahe Esteban rese yuvireco. Omahese aipo yuvireco sese, ndoyavii sepiaca Tūpa rembiguai iva pendar rova.

7

Esteban oñeho oyeevisa pipe

¹ Evocoiyase pahi rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe. ² Ahese omboyeví chupe: “Che mu eta, peyapisaca che ñehe rese: Tūpa imboeteipri oyemboyecua yande ramoi Abraham upe aracahe. Mesopotamia ve seco vitese, icho renondeve Harán ve seco águia, ³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecuara ndeu’ ehi Tūpa chupe. ⁴ Evocoiyase osẽ Caldea ivi sui oso tecua Harán ve güeco águia. Omano pare tu Harán ve, Tūpa ombou cohabe yande recosave. ⁵ Yepe oyepota tēi cohabe aracahe, Tūpa rumo nomondoimi eté que chīhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tūpa chupe (ahe rumo ndatahi vitese ahese). ⁶ Tūpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguairã semimombaraísuguã tēi avei yuvirecoira cuatrociento aravíter rupi’ ehi. ⁷ Tūpa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri águia cohabe yuvireco’ ehi Tūpa chupe aracahe. ⁸ Tūpa oyocuai güemimbotar pipe Abraham guahir mbocircundida águia rese. Sese Abraham ombocircundida guahir Isaac iha pare ocho arí pipe. Isaac égüe ehi avei guahir Jacob upe. Jacob égüe ehi avei guahireta upe, ahe doce vahe Israel suindar” ehi.

⁹ “Ipare yuvirecoi vahe yande ramoi Jacob rahir omondo vivri guarepochi repirã yamotaréhisa pipe yuvireco. Ahe tivri rer José omondo vahe Egipto pendar upe yuvireco. Tūpa rumo secoño ité sese. ¹⁰ Ichui vinose opacatu iparaísusa sui. Omondo ombahecuasa chupe iyavei seco aviye tupri águia Egipto pendar mbororecuar guasu faraón upe. Evocoiyase faraón ipotasa pipe omoingue mbororecuar seco águia opacatu ava ivi Egipto pendar cuai águia iyavei güéta pipendar cuai águia avei.

¹¹ “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco. ¹² Oyanduse rumo Jacob Egipto ve oime vitese trigo, ahese omondo guahir aheva seca, ahe yande ramoi yuvirecoi vahe. Ahe yipindar ichosa Egipto ve yuvireco. ¹³ Ichui yuviraso yupagüe irise Egipto ve, ahese José oyecua uca viqurehir upe. Égüe ehi faraón upe oicua uca uma sui oyesu. ¹⁴ Evocoiyase José güeru uca oyesupa Jacob iyavei opacatu omu, ahe imu retacuer setenta y cinco tupri. ¹⁵ Égüe ehi Jacob yuviraso Egipto ve yuvirecoi águia opacatu guahir reseve. Aheva omano iyavei opacatu yande ramoi eta omano yuvireco aracahe. ¹⁶ Imano pare rumo, suminogüer viraso icangüer yuvireco tecua Siquem ve. Aheva oñoti yuvireco. Aheva acoi Abraham virocua tuvípa Hamor rahir sui aracahe” ehi mbororecuar upe.

¹⁷ “Ipare, virovise arí ipapaprí Tūpa Ñehengagüer Abraham upendar, ahese yande ramoi setá catu-catu iri oyesu Egipto ve yuvireco aracahe. ¹⁸ Ipare oporocuai ambuae mbororecuar guasu Egipto ve. Ahe ndoicuai vahe ité yande ramoi José. ¹⁹ Evocoi mbororecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pítani. Ahe oyocuai iyesupa aipo ehi: ‘Peseya pe rahir oha ramomi vahe, tomanoño’ ehi yande ramoi upe aracahe. ²⁰ Aheseve avei aipo Moisés oha. Ahe pítani aviye ité Tūpa uve. Ihare, iyesupa mbosapi yasimi rupive vireco oyese güétave yuvireco. ²¹ Oseyase rumo iyesupa ivi yuvireco, ahese faraón rayrí oseca ahe i rupi sui. Ichui vinose seraso

güētave, omboacua omembri nungar ité sereco. ²² Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoiyase Moisés ipírata ité oñehese iyavei oyapose mbahe.

²³ "Virecose rumo Moisés cuarenta araviter, ipihañemoñeta: 'Tasepia rane che mu israelita cohove yuvirecoi vahe' ehi. ²⁴ Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repicave. ²⁵ Ahe rumo, 'Oicua revo che mu Tūpa vinose uca água Egipto sui yuvireco cheu' ehi viña. Imu rumo nomohai eté Moisés vinose água yuvireco evocoi ava po sui. ²⁶ Ahere ayihive oso omu pāhuve. Aheve osepia ñuvirío mbahe ovavase oyeupe yuvireco. Ahe rumo oipota tēi iñero água oyeupe yuvireco viña, aipo ehi chupe: 'Che mu, oñemu mo peico, ¿mahera vo pevava peyese ae?' ehi tēi chupe. ²⁷ Oyemoviracua catu vahe rumo omombo oyesui. Ichui ahe aipo ehi chupe: '¿Ava vo nde moingue ore pāhuve ore rerecuarā ore recocuer moingatu água?' ehi chupe. ²⁸ 'Che yuca pota avei tie eve inungar ereyuca evocoi Egipto pendar irapipe!' ehi chupe. ²⁹ Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

³⁰ "Omboaviyese cuarenta araviter Madián ve, Tūpa rembiguai oyemboyecua ivitri Sinaí rerovicave ivi iporupiréhisave caha rese tata rendigüer pāhuve chupe. ³¹ Osepia mbahe sendi vahe oyepihamondii, oyemboya catu sese sepia tupri água viña. Ahese osendu Yar ñehe aipo ehi vahe: ³² 'Che nde ramoi Tūpa aico. Nde ramoi Abraham, Isaac iyavei Jacob che reroya vahecuer yuvireco' ehi. Evocoiyase Moisés oririi osiquiyesa pipe nomache pota iri sese. ³³ Evocoiyase Yar aipo ehi chupe: 'Esequii nde pitaqui. Esepia, ivi nimarai vahesave ereico' ehi chupe. ³⁴ 'Che asepia tupri ité Egipto ve nde mu che rembiporavo paraísuse; asendu avei ipoáse tēisa yuvireco yepi. Sese agüeyi ndeu nde oromondora aheve senosepa água' ehi Tūpa Moisés upe aracahe.

³⁵ "Yepe yande ramoi ndoviroya potaiño ité yuvireco, '¿Ava vo nde moingue ore rerecuarā ore recocuer moingatu água?' ehiño yuvireco chupe, Tūpa ité rumo oyocuai güembiguai imbogüeyi tata rendigüer pāhuve imoñehe Moisés upe iporocuai água, ava renosepa água avei ivi Egipto pendar mborerecuar povri sui. ³⁶ Ipare ahe ité vinose yande ramoi eta Egipto sui, oyapo avei mbahe poromondiisa aheve 'toicua Tūpa yuvireco' oya, para guasu Pira vaheve avei oyapo poromondiisa iyavei ivi iporupiréhisa rupi avei cuarenta araviter rupi. ³⁷ Ahe avei aipo ehi israelita upe: 'Tūpa vinosera pe pāhu sui ñepei oñeho mombehusar che nungar' ehi. ³⁸ Ahe avei acoi ivi iporupiréhisa rupi ava pāhu rupi secoi. Chupe avei oñeho Tūpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yandeu imbou água.

³⁹ "Yande ramoi eta rumo nomboyeroya potai eté Moisés yuvireco. Ipihañemoñetaño ité Egipto ve oyevi água rese yuvireco. ⁴⁰ Evocoiyase aipo ehi Aarón upe yuvireco: 'Eyapomi catu ava tūpa rahanga oreu ore reroguata água' ehi yuvireco chupe. '¿Que vo catu Moisés, ore renosesarer Egipto sui, secoi? Omano tie revo' ehi tēi israelita yuvireco aracahe. ⁴¹ Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimbá ahe mbahe rahanga upe viropovéhe vaherā yuvireco iyavei oyembovíha pieta apo yuvireco güembiaipo ucagüer rese tēi. ⁴² Sese Tūpa opoíño ahe ava sui, 'Toyerure

evocoiyase yasi, yasitata upe yuvireco' ehiñō chupe. Aipo ehi niha oñehe mombehusar icuachiapri pipe:

'Pe peico vahe israelita, ndahei cheu peyuca mbahe mimba seropovēhe água cuarenta aravíter pipe ivi iporupiréhisa rupi.

⁴³ Pe rumo che mboeteihisa pipe peraso tūpa rahanga Moloc rēta iyavei yasitata rahanga Refán pe ae tēi peyapo vahe pe tūpaguā.

Sese che opovinosa pe recua sui pe mundo Babilonia cupe coi coti' ehi Tūpa chupe aracahe.

⁴⁴ "Ivi iporupiréhisa rupi yande ramoi eta vireco Tūpa porocuaita rēta oyeupive yuvireco aracahe mbahe mimba pirer apopri. 'Na peyera yapo' ehi Moisés upe. Evocoiyase iñehe rupi tupri oyapo uca. ⁴⁵ Ahese coiye catu yande ramoi eta vireco co oí Tūpa rēta mbahe pirer apopri yuvireco iyavei Josué rupi yugüeru vahe güeruño ité avei yuvireco, omosepase Tūpa ambuae ava co yande recuavi sui. Ëgue ehiñō vite ité ahe sereco yuvireco mborerecuar guasu, David, secoise aracahe. ⁴⁶ Ahe David aviye ité Tūpa upe, oyapo pota setarā 'toime tūparoguā yande ramoi Jacob rembieroya upe' oya. ⁴⁷ Tahir Salomón rumo omopuha ité ahe tūparo. ⁴⁸ Tūpa rumo, seco ivate vahe, ndasecoi vahe tūparo ava tēi rembiapo pipe. Inungar acoi omombehu vahe Tūpa ñehe mombehusar aracahe aipo ehi:

⁴⁹ "Iva che renda iyavei ivi che pirunga.

¿Mbahe nungar oí vo peyapora cheu? ehi yande Yar.

¿Que vo evocoiyase che pituhu água?

⁵⁰ Che niha opacatu co mbahe aposar aico' ehi Tūpa icuachiapri pipe" ehi mborerecuar upe Esteban.

⁵¹ Ichui aipo ehi chupe: "Pe rumo ndapeyapisaca potai vahe ité peico. Oime tēi pe nambi, pe piha avei, ipipe rumo ndapeicuai eté Tūpa. Peico Espíritu Santo amotaréhimbar tēi inungar pe ramoi aracahe yuvirecoi. ⁵² ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cûritei ou ndaseco marai vahe cute. Pe avei evocoiyase ahe yuca uca água peporocuai. ⁵³ Pe pereco tēi Tūpa porocuaita acoi Tūpa rembiguai güeru vahe yuvireco; ahe rumo ndaperoyaiño ité peico" ehi Esteban opacatu mborerecuar upe.

Esteban mano agüer

⁵⁴ Osendupase mborerecuar iñehe, omboasí iteanga yuvireco; oñeaimboterepri ité yamotaréhisave yuvireco. ⁵⁵ Esteban rumo vireco ité Espíritu Santo oyese. Evocoiyase iva rese omahese, osepia Tūpa porañetesa. Osepia avei Jesús opúha ohā Tūpa acato coti. ⁵⁶ Evocoiyase aipo ehi:

—¡Peseña! Asepia inungar iva imboipri. Aheve asepia Ava Riquehir Vu acato coti ihái —ehi.

⁵⁷ Mborerecuareta rumo osapucai pírata, oyopiño oapisacuar yuvireco ichui. Aheve yuviróna guasu yuvireco chupe. ⁵⁸ Viraso güecua ivii yuvireco. Aheve oseyá oyeaosá Saulo píve 'tosáro' oya yuvireco chupe. Ipare oyapi-yapi ita pipe yuca yuvireco.

⁵⁹ Oapi-apiseve, Estebanoyerure Tūpa upe: "Che Yar Jesús, eipisi che hā" ehi. ⁶⁰ Ipare oñenopíha, oñehe pírata Tūpa upe: "¡Che Yar, ndeñero co ava che amotaréhisar angaipa upe!" ehi.

Aipo ohe pare, omano.

8

¹ Iyavei Saulo, “Peyuca ité” ehi catu-catu aheve ohā.

Saulo oseca Jesúseroyasar mocañipa água oico

Ahe ari pipeve omboipi Jesú amotaréhimbar seroyasar reca mara-mara tēi catu sereco água yuvireco Jerusalén ve. Evocoiyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco. ² Oime ava Tūpa mboeteisar yuvirecoi vahe, ahe víraso Esteban rehōgür ñoti yuvireco. Iti pare, oy-asehó iteanga yuvireco sese. ³ Ahe pipeve avei aipo Saulo omombaraisu ava Jesúseroyasar yuvirecoi vahe seroya ucaëhi água viña. Yuviroique-iqueño tēi aipo sēta rupi cuimbahe, cuña mbotiriri senose soquenda água yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa písirosa resendar que yuvirasosa rupi yuvireco. ⁵ Felipe oso Samaria rupi. Aheve omombehu ava upe: “Evocoí Jesú Tūpa Rembiporavo ava písiró água” ehi. ⁶ Ahese ava rehii oñemonuha Felipe ñehe rendu água yuvireco. Oyapisaca tupri iñehe rese yuvireco. Esepia, osepia mbahe sembiapo poromondiisa. ⁷ Iyavei setá ava caruguar rerecosar sui omose caruguar. Osëse ava sui, sâse yuvireco. Iyavei setá ava nomi vahe, ndoguatai vahe avei ombogüera. ⁸ Evocoiyase oviharete ahe tecua pipendar yuvireco.

⁹ Aheve rumo mbia, Simón serer vahe, yipive ipaye ai oico, omboisikiye-quiyé ava Samaria pendar. “Che seco ivate vahe aico” ehi angahu ava mbopa. ¹⁰ Evocoiyase opacatu ava, cuacua vahe iyavei chihivahe catu vahe oyapisaca tupri iñehe rese, aipo ehi yuvireco: “Co niha Tūpa píratasa tuvicha vahe” ehi oyeupe yuvireco.

¹¹ Ombooyeroya pucu ité yuvireco. Esepia, opayesa pipe ava omboisikiye etepri oico yepi. ¹² Oyepotase rumo Felipe Samaria ve omombehu ñehesa avije vahe Tūpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñearipamo ité yuvireco cuimbahe, cuña avei. ¹³ Ahe Simón avei viroya. Oñearipamo pare, oso Felipe rupi. Co mbahe poromondiisa iyavei Tūpa suindar ndayasepiai vahe rese oyepihamondi.

¹⁴ Jerusalén ve apóstol yuvirecoi vahe oyandu Samaria ve setá ava oipisise Tūpa Ñehengagür yuvireco. Evocoiyase omondo aheve omboetasa Pedro iyavei Juan yuvireco. ¹⁵ Oyepotase aheve yuvireco, oyerure opacatu ava Jesúseroyasar rese ‘Espíritu Santo toipisi yuvireco’ oya. ¹⁶ Esepia, Espíritu Santo ndogüeyi vitéi yuvireco sese; oñearipamoño tēi vité yande Yar Jesúseroyasar rese ‘Espíritu Santo ogüeyi yuvireco’ sese.

¹⁸ Ahe osepiase, Simón omondo pota guarePOCHI chupe, ¹⁹ aipo ehi:

—Cheu avei pemboumi tēi evocoí píratasa, amondose che po que ava harive, togüeyi avei Espíritu Santo sese yuvireco —ehi Simón.

²⁰ Ombooyeroya rumo Simón upe:

—¡Tocañipa nde guarePOCHI nde reseve! Esepia, ndepihañemoñeta co Tūpa ombou vahe oreu, ererocua vaherā nde guarePOCHI pipe viña

—ehi chupe. ²¹ Ndeu ndiyai co nungar mbahe apo ãgua. Esepiá, nde pihañemoñeta ndahei ihívi vahe Tüpa rovaque. ²² Sese epoi nde pihañemoñeta raisa sui, eyerure Tüpa upe. Aviyeteramo iñerora ndeu — ehi. ²³ Aicua nde piha naporai vite iyavei nde pihañemoñeta raisa pipe vite ereico —ehi chupe.

²⁴ Evocoiyase Simón omboyevi chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

²⁵ Yande Yar ñehesa mombehu pare ahe tecua pendar upe, apóstol omombehu-mbehu co ñehesa písirosa resendar Samaria pipendar tecua rupi yuvireco. Ëgüe ehi oyepota yuviroyevi Jerusalén ve yugüeru.

Felipe omombehu Jesucristo recocuer Etiopía pendar upe

²⁶ Ipare Tüpa rembiguai oyemboyecua Felipe upe aipo ehi chupe: “Epúha, eso irohí cotí nde yepota ãgua evocoí peri ogüeyi vahe oso Jerusalén sui, Gaza ve” ehi. Evocoí Gaza piar osasa ívi iporupiréhi rupi oso. ²⁷ Evocoiyase opúha oso peri rupi. Aheve osovañchi ñepei ava, ahe seco ívate vahe guarepochi apocatusar Etiopía pendar cuña mborerecuar upe nara yepi, ahe mbia oso vahe Jerusalén ve Tüpa mboetei ãgua. ²⁸ Oyevise ocáreto pipe, oyeroqui Tüpa ñehe mombehusar Isaías rembicuachiagüer rese ou.

²⁹ Evocoiyase Espíritu aipo ehi Felipe upe: “Eyemboya cäretomi rese” ehi. ³⁰ Evocoiyase virovise ahe ava, osendu iyeroqui Isaías rembicuachiagüer pipe oñi. Ahese oporandu chupe:

—¿Eresenducua aipo Tüpa Ñehengagüer nde yeroquisa eñi? —ehi chupe.

³¹ Etiopía pendar mbia omboyevi chupe:

—¿Mara ahéra vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapi coháve che piri” ehi Etiopía pendar chupe. ³² Ahe Isaías rembicuachía oyeroqui vahe pipe aipo ehi:

“Inungar ava víraso ovesa yuca ãgua, ëgüe ehi avei ahe mbia seraso yuca ãgua yuvireco.

Iyavei inungar ovesa nasasei eté guagüer rerocuase, ëgüe ehi avei ahe mbia noñehei eté.

³³ Osecomomini yuvireco, ndipoi ava sepisar.

Ndipoi ichuindar.

Esepiá, omocañí co ívi sui yuvireco” ehi Isaías rembicuachía pipe.

³⁴ Oyeroqui pare ahe Etiopía pendar oporandu chupe:

—Emombehumi cheu: ¿Ava rese píha aipo Isaías oñehe: oyese ae píha, ambuae ava rese tie? —ehi.

³⁵ Evocoiyase co ñehesa sui omombehu ñehesa aviyé vahe Jesús recocuer resendar Etiopía pendar upe. ³⁶ Ipare oguata catuse yuvireco, Etiopía pendar osepiá i. Aheve ahe aipo ehi chupe:

—Esepiá co i tui. ¿Ndiyai vo coháve che äpiramomi tēi eve viña? —ehi.

³⁷ Ahese omboyevi chupe:

—Ereroya itese opacatu nde piha pipe, iya ité ndeu —ehi.

—Aroya ité niha Jesucristo ahe Tüpa Rahir secoi —ehi.

³⁸ Evocoiyase omombita uca ocáreto, ichui ogüeyi íve yuvíraso. Aheve Etiopía pendar Felipe oñapiramo. ³⁹ Yuvínosesi i sui, yande Yar Espíritu víraso ahe Etiopía pendar sui. Ahese ndosepiá iri; ëgüe ehiño vorivete

oso peri rupi.⁴⁰ Felipe rumo oyemboynecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. Ëgüe ehi oyepota Cesarea ve oso.

9

Saulo ñecuñaro agüer

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe, ² oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipisipa seru cohabe nde rer pipe” ehi, “evocoiyase ere-mombehura cuachiar pipe Damasco pendar tûparo rerecuar upe” ehi pahi rerecuar ivate catu vahe upe. ³ Ëgüe ehi yuvinose Jerusalén sui, yuviraso Damasco ve ambuae ava reseve. Viroví potase rumo Damasco yuviraso, aviyeteramo tēi osesape guasu iva sui chupe. ⁴ Evocoiyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

⁵ Evocoiyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe. ⁶ “Epúha, eique Damasco ve. Aheve amombehu ucara mbahe nde rembiapoguã ndeu” ehi chupe.

⁷ Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepiai eté ivate oñehe vahe yuvireco. ⁸ Ipare Saulo opúha, omahe tēi; ndoicatui rumo mbahe repia. Ichui supindar oipisi iyiva rese seraso Damasco ve yuvireco. ⁹ Aheve mbosapi ari ndasesapiso, ndocarui, ndoihui avei oico.

¹⁰ Aheve mbia Jesucristo reroyasar Ananías serer vahe secoi. Ahe iquer nungarve oyemboynecua yande Yar aipo ehi chupe: “¡Ananías!” ehi. “Co aico, che Yar” ehi imboyevi chupe.

¹¹ Evocoiyase yande Yar aipo ehi chupe: “Epúha, eso calle Ihívi serer vahe rupi. Eporandu Judas rëtave Saulo, tecua Tarso pendar, rese. Ahe oyeroqui cûritei. ¹² Oquerive angahu osepio mbia Ananías serer vahe omondose opo iharive omboesapiso iri” ehi.

¹³ Evocoiyase omboyevi chupe: “¡Too! Che Yar, setá rumo evocoí mbia recocuer omombehu yuvireco cheu. Mbahe tēi oyapo vahe nde reroyasar reco maranehi upe Jerusalén ve. ¹⁴ Cûritei ou rutei ahe mbia pahi rerecuar porocuaita rupi opacatu nde rer rese oyerooya vahe roquendapa água” ehi.

¹⁵ Yande Yar rumo aipo ehi chupe: “Eso. Esepia, aiporavo evocoí mbia che recocuer rese oñehe vaherá ava ndahei vahe judío upe iyavei serocuer guasu yuvirecoi vahe upe, judío upe avei. ¹⁶ Che ae amboyecuara setá mbahe tēi chupe oiporara vaherá che remimbotar mboaviye água” ehi yande Yar chupe.

¹⁷ Evocoiyase oso secosave. Oiquesa ahe oi pipe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboynecua vahe ndeu peri rupi nde yuse, ahe che mbou ndeu nde mboesapiso iri água. Toique avei catu Espíritu Santo nde rese —ehi Saulo upe.

¹⁸ Ahese voi eté pira pirer nungar mbahe ovíapipa sesa sui. Ahese voi sesapiso iri. Ichui opúha. Ipare voi Ananías oñapiramo. ¹⁹ Ipare

Saulo ocaruse, ipírata catu iri. Moviro ari tēi opita iri Jesús reroyasar píri Damasco ve.

Saulo omombehu Jesús recocuer Damasco ve

²⁰ Ipare voi oso oñehe judío tūparo yacatu rupi Damasco ve aipo ehi: “Jesús Tūpa Rahir ité secoi” ehi ahe pendar ava upe. ²¹ Ava opacatu osendu vahe iñehe,

—¿Mara ehi píha co? —ehi tēi yuvireco—. ¿Ndahei vo acoi co mbia Jerusalén ve Jesús reroyasar mara-mara tēi vireco vahe? ¿Ndahei vo acoi co avei ou coháve ava Jesús reroyasar ha pendar pisi água serasopa água avei Jerusalén ve pahi rerecuar upe viña? —ehi yuvireco chupe.

²² Saulo rumo omombehu tupri catu Jesús recocuer. Osecopi opacatu omu Damasco pendar. Omboyecka catu chupe Jesús Tūpa Rembiporavo ava písiró água secosa. Sese ndoicatui judío iñehe mboyevi yuvireco.

Saulo oñemi omu sui oamotaréhise

²³ Setá ari pare judío ahe pendar omboguai yuca água Saulo yuvireco viña. ²⁴ Ahe rumo oyandu omboguaisa judío osārose tecua áchisa roquendipive ari, pítu momba yuvireco yuca água viña. ²⁵ Jesús reroyasar rumo pítu pipe tecua tapia áchisa oyere tupri vahe tecua rese, icupe rupi ombogüeyi íruova guasu pipe imoñemí imondo yuvireco.

Saulo Jerusalén ve secoi

²⁶ Coiye Saulo oyepota Jerusalén ve. Aheve oyemboya pota tēi Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tēira yandeu” ehiño oyeupe yuvireco. ²⁷ Ipare rumo Bernabé víraso Saulo apóstol yuvirecoi vahe upe. Aheve Bernabé omombehupa chupe aipo ehi: “Co mbia Saulo osepia yande Yar perí rupi iyavei yande Yar oñehe chupe. Ichui co oñehe osiquiyeéhisa pipe Damasco ve Jesús recocuer rese” ehi. ²⁸ Evocoiyase Saulo opita aheve ipiri. Arí yacatu rupi apóstol rupi oguata yepi, iyavei omombehu yande Yar recocuer osiquiyeéhisave. ²⁹ Oiñehepoepi avei secocuer rese judío griego pipe oñehe vahe yuvireco. Ichui rumo oyuca potaño yuvireco. ³⁰ Oicuase rumo Jesucristo reroyasar yuvireco, víraso voi eté Saulo Cesarea ve. Ichui omondo Tarso ve yuvireco.

³¹ Evocoiyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemovíracua tupri catu yuvireco yande Yar mboeteisa pipe, Espíritu Santo oipítiví iyemboeta catu água yuvireco.

Eneas mbogüera agüer

³² Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar. ³³ Aheve osepia mbia Eneas serer vahe, ahe ndoguatai vahe. Vupave tēi tui vahe ocho aravíter rupi. ³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoiyase oñarapuha voi. ³⁵ Osepia opacatu Lida pendar, Sarón pendar co ndoguatai vahecuer guatase, víroyapa voi eté yande Yar yuvireco.

Dorcás cuerayevi agüer

³⁶ Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviyé vahe oporopítiví yepi. ³⁷ Imbaheasí guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahesave seraso yuvireco. ³⁸ Jope namombriimi Lida sui. Evocoiyase oyanduse Jesús reroyasar Jope pendar Pedro Lida ve secoise, ahese omondo ñuvirío mbia seru poyava água Jope ve yuvireco.

³⁹ Evocoiyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere atí voi, oyaseho Pedro ivii yuvireco. Omboye-cua avei oturucuar ihari pendar reseve Dorcas rembiapogüer yuvireco chupe. ⁴⁰ Ipare Pedro omosepa rane opacatu ava ocarve. Ahese ahe ae oñenopiha, oyerure Túpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oí. ⁴¹ Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuer-ayeví” ehi chupe. ⁴² Serácula oyanduse opacatu Jope rupi yuvireco, setá ava yande Yar viroya yuvireco. ⁴³ Evocoiyase Pedro opita setá arí ahewe, mbia mbahe pirer mopitasar, Simón serer vahe, píri.

10

Pedro iyavei Cornelio

¹ Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar. ² Ahe mbia omboetei Túpa opacatu guahir, güembireco reseve yepi. Iyavei omondoño ité judío pítiví água guarePOCHI, oyeroqui avei Túpa upe yepi. ³ Ñepei arí, caharuse las tres rupi, osepia quer nungar pipe Túpa rembiguai güecosave aipo ehi chupe: “¡Cornelio!” ehi. ⁴ Omahengatuse sese, “¿Mbahe, che Yar?” ehi osiquiyepave. Túpa rembiguai rumo omboyeví chupe: “Túpa oipisi nde yeruresa; osepia avei nde poroparaisuerecosa” ehi chupe. ⁵ Emundo mbia Jope ve Simón reca. Ahe serer avei acci Pedro. ⁶ Ahe secoi ambuae Simón, mbahe pirer mopitasar píri. Ahe sëta para guasu popive chini” ehi chupe.

⁷ Osose Túpa rembiguai ichui, Cornelio oñehe ñuvirío güembigui upe iyavei ñepei sundao Túpa mboeteisar upe, sese acci oyerooya vahe yepi. ⁸ Opacatu Túpa rembiguai ñehe mombehu pare, omondo Jope ve.

⁹ Ahere ayihive virovise Jope yuviraso, Pedro oyeupi oi ipe vahe harive mbiter arí senise oyeroqui água. ¹⁰ Vieporéhise ocaru pota viña. Omoingatu viteseve rumo semihura yuvireco, aviyeteramo tēi osepia mbahe quer pendar nungar: ¹¹ ahese osepia iva oyemboise, ahe ichui turucuar tuvicha vahe pipe ogüeyí mbahe, ñapichimbri ipopí yacatu ou chupe. ¹² Ahe turucuar pipe, osepia opacatu mahembiar vai, mboi, virai vai tēi avei. ¹³ Ahese osendu ñehesa aipo ehi vahe: “Pedro, epüha, eyuca, ichui ehu” ehi chupe.

¹⁴ Pedro rumo omboyeví chupe: “Aní, che Yar, che rumo ndahui vahe ité co mbahe roho ava remimbotaréhí ndihuasi vahe yepi” ehi chupe.

¹⁵ Osendu iri ñehesa aipo ehi vahe chupe: “Túpa remimbocatupri upe, ‘Ava remimbotaréhí, ndihuasi vahe’ nderei chira” ehi.

¹⁶ Ëgüe ehi mbosapi oyupagüer rupi chupe. Ipare turucuar oyevi ivave oso. ¹⁷ Pedro ipihañemoñeta vitese mbahe osepia vahecuer rese oquer nungar pipe: “¿Mbahe rese pîha co oyembojecua cheu?” ehi vite oico. Aheseve Cornelio remimondo oporandu-randu pare yuvireco, oyepota Simón rëta roquendipive yuvireco. ¹⁸ Oñehe pucu oi pipendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

¹⁹ Ipihañemoñeta viteseve Pedro mbahe oyembojecua vahecuer rese, Espíritu Santo aipo ehi chupe: “Pedro, esendu rane, pe mbosapi mbia nde reca yuvireco. ²⁰ Eyemoingatu, egüeyi chupe, eso supi. ‘¿Asora pîha?’ erei rene. Esepia, che ambou evocoi mbia nde reca” ehi Espíritu Santo Pedro upe.

²¹ Evocoiyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoiyase omboyevi iñehe yuvireco chupe:

—Ore oroyu sundao rerecuar Cornelio ore cuaisa pipe, ahe mbia seco ivi vahe, Tûpa mboeteisar opacatu judío osaisu, oipota rai yuvireco. Tûpa rembiguai oyocuai nde rese ereso vaherâ sëtave, ahe osendu vaherâ nde ñiehesa —ehi yuvireco Pedro upe.

²³ Evocoiyase omoinguepa, omombitapa oyepiri ñepei pîtu. Ahere ayihive oso supi, moviro Jesúz reroyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuviraso sëtave. Cornelio rumo osârø opacatu omu eta rese yuvireco iyavei omboriparete güembisoho reseve avei. ²⁵ Oyepotase sëtave oso, Cornelio rane osê voi, osovaichi, oñenopîha sovai imboeteisa pipe. ²⁶ Pedro rumo aipo ehi chupe:

—Epüha, che niha nde nungar avei aico —ehi chupe.

²⁷ Evocoiyase ahe omoñeta seroique seraso oi pipe. Aheve ava oñemonuha vahe setá osepia yuvireco. ²⁸ Ahe ava upe aipo ehi:

—Pe peicua judío porocuaita aipo ehi vahe: “Peiquei rene ndahei vahe judío piri. Aní chiaveira pembori evocoi ava peico” ehi acoi —ehi Cornelio rëta pipendar upe —. Tûpa rumo omombehu cheu che quer nungar pipe: “‘Ava remimbotarëhi peico’ erei rene ambuae ava upe” ehi cheu. ²⁹ Pe pemondo ava che reca. Che evocoiyase nacheatëhii che yu âgua pëu. Sese che aicua pota, ¿mahera vo che reru uca peye? —ehi.

³⁰ Evocoiyase Cornelio aipo ehi chupe:

—Opa co irungatu ari, caharuse co hora rupi tupri avei, che cohavé che rëtave aicose, ndacarui eté che yerure âgua Tûpa upe. Aheseve oyembojecua mbia Tûpa rembiguai iturucuar rendí iteanga vahe cheu. ³¹ Ahe aipo ehi cheu: “Cornelio, Tûpa osendu nde yeruresa iyavei oicua avei nde poroparaísuerecosa. ³² Emondo nde rembiguai Jope ve Simón Pedro serer vahe reca. Ahe oicove ambuae Simón rëtave, ahe mbahe pirer mopitasar. Ahe sëta para guasu popive chini” ehi cheu. ³³ Sese amondo voi eté nde reca âgua. Aviye nde ereyu cohavé. Cûritei co opacatu yaico cohavé Tûpa rovaque. Orosendu pota opacatu nde ñehe yande Yar nde cuai vahe nde ñehe âgua oreu —ehi Cornelio chupe.

Pedro oñehe Cornelio rëtave

³⁴ Evocoiyase Pedro aipo ehi chupe:

—Aicua cute, supi eté Tûpa nomboyahoi yande raisu. ³⁵ Sese ambuae ivi pipendar omboetei vahe Tûpa, oyapo vahe avei mbahe tupri

yuvireco, ahe oipisira Tūpa. ³⁶ Aracahe Tūpa oñeho avei Israel suindar upe, omombehu ñehesa tupri yeamotarëhiëhisa resendar Jesucristo rembiaporâ sui, ahe opacatu ava co ivi pipendar yuvirecoi vahe Yar. ³⁷ Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare. ³⁸ Peicua revo Tūpa omondo Jesús Nazaret pendar upe opíratasa, oEspíritu Santo avei. Ipare Jesús oguata opacatu rupi mbahe tupri apo oico. Ombogüera avei opacatu ava iparaísu vahe caruguar povrîve yuvirecoi vahe. Esepio, Tūpa secoi sese. ³⁹ Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatîca uca curusu rese yuca yuvireco. ⁴⁰ Tūpa rumo ombogüerayevi imombosapisa ari pipe. Ipare omboyecua iri oreu. ⁴¹ Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oihu avei ocuerayevi pare. ⁴² Iyavei ahe ore cuai: “Pemombehu ava upe. Co che Jesucristo, Tūpa Rembiporavo, aico opacatu ava recocuer rese porandu áqua oicove vite vahe, omano vahe avei” ehi oreu. ⁴³ Ahe secocuer avei opacatu Tūpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tūpa ñeroisa serer pipe angaipa rese yuvireco” ehi —ehi Pedro Cornelio rëta pipe yuvínoi vahe upe.

Espíritu Santo oique ava ndahei vahe judío piha pipe

⁴⁴ Pedro oñeho viteseve, Espíritu Santo ogüeyi opacatu ava osendu vahe rese. ⁴⁵ “¡Too! Evocoiyase ndahei vahe judío upe avei Tūpa omondo Espíritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco. ⁴⁶ Esepio, osendu ahe oñehese ñehesa ndicuasai vahe pipe yuvireco Tūpa upe. ⁴⁷ Evocoiyase aipo ehi vupindar upe:

—¿Oime pîha ndoiptotai vahe co ava ñeapiramo áqua yande pâhu pendar? Esepio, co oipisi Espíritu Santo yuvireco inungar yande —ehi vupindar upe.

⁴⁸ Sese,

—Yañapiramopa Jesucristo rer pipe yuvireco —ehi.

Ipare Cornelio rëta pipe yuvínoi vahe aipo ehi: “Epita vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroyasar upe

¹ Evocoiyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tūpa Ñehengagüer yuvireco. ² Oyevise rumo Pedro Jerusalén ve oso, ahese setá judío Jesucristo reroyasar viroïro sovai eté yuvireco, ³ aipo ehi:

—¡Mahera eresoño tēi eté ndahei vahe judío piri! Iyavei nde erecaruño tēi eté ipâhuve yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopí yacatu ñapichisa vahe ogüeyi ou che rovai iva sui. ⁶ Asepia ipipe opacatu mahembiar ihupirëhi, mbahe mimba, mboi, vírai vai tēi avei —ehi—. ⁷ Iyavei ahese asendu ñehesa aipo ehi cheu: “Pedro, epûha, eyuca, ehu” ehi cheu. ⁸ Che rumo aipo

ahe chupe: “Aní, che Yar, che rumo ndahui vahe ité co mbahe roho ava remimbotaréhi yepi” ahe chupe. ⁹ Ichui asendu iri ñehesa: “Túpa remimbocatupri upe, ‘Ava remimbotaréhi’ erei rene” ehi cheu. ¹⁰ Ègue ehi mbosapi oyupagüer rupi cheu. Ipare opacatu oyevi iri ivave oso. ¹¹ Aheseve avei mbosapi mbia imboupri Cesarea sui oyepota yuvireco che recosave che reca. ¹² Espíritu Santo che cuai che so água che atéhíehisa pipe supi yuvireco. Co seis mbia Túpa reroyasar, yande mu, yuviraso avei che rupi. Ipare aheve oroyepotase oroso, oroque Cornelio rëtave. ¹³ Ahe omombehu oreu osepia vahecuer güétave Túpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru água. ¹⁴ Ahe omombehura ndeu nde ñepisiro água iyavei opacatu nde rëta pendar ñepisiro água avei” ehi Túpa rembiguai Cornelio upe —ehi—. ¹⁵ Añehe ramoseve chupe, Espíritu Santo ou sese yuvireco inungar yande rese ou aracaco. ¹⁶ Evocoiyase che chemahenduha voi eté yande Yar ñehengagüer rese aipo ehi vahecuer: “Supi eté i pipe Juan oporoápiramo, pe rumo Espíritu Santo pipe peñéapiramora” ehi vahe. ¹⁷ Túpa Espíritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Túpa ayamotaréhira —ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo,

—¡Too, evocoiyase Túpa ombou avei ndahei vahe judío upe secocuer recuñaro água, tecovesa apiréhi vahe rereco água! —ehi Túpa mboeteisa pipe yuvireco.

Ava Jesús reroyasar Antioquía ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotaréhimbar oyamotaréhi catu yuvireco. Evocoiyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco. ²⁰ Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa avíye vahe yande Yar Jesús recocuer resendar yuvireco. ²¹ Yande Yar píratasa vireco yuvireco. Evocoiyase setá ava viroya; oseyá ité yipindar güembieroja yuvireco yande Yar reroya água.

²² Serácula oyepotase Jesús reroyasar upe Jerusalén ve, ahese omondo Bernabé yuvireco Antioquía ve. ²³ Oyepotase aheve, osepia Túpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco. ²⁴ Bernabé avíye etepri vahe, viroya ité Espíritu Santo iyavei oyeroya ité yande Yar rese. Evocoiyase setá ava oyemboya yande Yar rese yuvireco.

²⁵ Ipare oso Tarso ve Saulo reca. ²⁶ Oyosuse, güeru Antioquía ve. Aheve oyemboya yuvireco ambuae viroya vahe rese imbohe água ñepei aravíter rupi. Setá ava oyembohe ipíri yuvireco. Ahese Jesús reroyasar Antioquía pendar upe yipindar, “Cristo reroyasar” ehi yuvireco.

²⁷ Aheseve Túpa ñehe mombehusar yugüeru Antioquía ve Jerusalén sui. ²⁸ Ñepei ipáhu pendar, Agabo serer vahe, opúha aipo ehi Espíritu Santo píratasa pipe chupe: “Oura tiavor guasu opacatu iví rupi” ehi, (ahe tiavor oyepota mborerecuar guasu Claudio recose). ²⁹ Evocoiyase Jesús reroyasar Antioquía pendar omondo pota voi guarepochei Jesús

reroyasar Judea pendar p̄itivii ãgua yuvireco ocatugüer rupi. ³⁰ Ëgüe ehi yande Yar reroyasar rârosar Judea pendar upe porerecosa mundo. Bernabé, Saulo ahe porerecosa viraso yuvireco.

12

Santiago mano agüer iyavei Pedro roquenda agüer

¹ Ahe araviter pipe avei mborerecuar guasu Herodes omboipi Jesús reroyasar mombaraisu. ² Ahese oyuca uca quise pucu pipe Santiago, ahe Juan riquehir. ³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. ⁴ Pedro roquenda pare omondo irungatu imar sui irungatu-ngatu sundao omondo sâro ãgua yuvireco. Mborerecuar ipihafemoñeta: “Opase co Pascua pieta, amboyecua ucara ava rovaque” ehi viña. ⁵ Evocoiyase Pedro opita voquendasave sârombri tupri chini. Jesús reroyasar rumo oyeroqui pírata Tûpa upe yuvireco sese.

Tûpa omose uca Pedro soquendasa sui

⁶ Ahe ari vinoce potase Herodes Pedro soquendasa sui, ahe p̄itu pipe Pedro oque ñuvirío sundao guârosar rese. Ñapichisa ñuvirío carena pipe ou, ñuvinohambe avei sârosar soquendasa roquendipive. ⁷ Aviyeteramo têi Tûpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epûha poyava!” ehi chupe. Ipûhase, opa voi oyera carena ipo sui. ⁸ Ahese Tûpa rembiguai aipo ehi chupe: “Eyemonde, emonde nde pitaqui” ehi. Evocoiyase Pedro omonde. Ipare aipo ehi iri: “Emonde avei nde yeaosa, eyu che raquicuei” ehi chupe.

⁹ Ëgüe ehi oso saquicuei. Ahe rumo ndoicuai Tûpa rembiguai oyeupe ëgüe ehise. Ndoyavii iquierve têi ëgüe ehi vahe chupe. ¹⁰ Ichui yuvinose, oñocua yipindar guârosar yuvireco. Ipare yuviraso catumi ambuae imoñuviriosa guârosar oñocua avei. Oyepota oquenda guasu guareepochi apoprive ocarve yuvinose ãgua yuvireco. Ahe oquenda oyemboi ahe ae ité chupe yuvireco. Ipare yuvinose yuviraso pucumi ocarusu rupi. Aviyeteramo têi Tûpa rembiguai ndoyecua iri chupe.

¹¹ Evocoiyase Pedro aipo ehi oyeupe: “¡Too! Supi eté Tûpa ombou cheu güembiguai che renose ãgua Herodes povri sui. Tûpa che p̄isiro judío rerecuar che yuca râgüer sui” ehi oyeupe.

¹² Oyese opihafemoñeta pare, oso, oyepota Juan Marcos si María rëtave oso. Aheve setá ava oñemonuha oyeroqui yuvireco sese. ¹³ Oñehese Pedro oquenda ocar cotindarve, cuñatai, Rode serer vahe, osé imboi ãgua chupe. ¹⁴ Osenduse rumo Pedro ñehe, oquenda omboi râgüer sui, oña oique oí pipe vorivetesave, omombehu: “Pe Pedro ihäi oquendipive” ehi oí pipendar upe. ¹⁵ Ahe rumo,

—¿Nanderoco vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tûpa rembiguai mo aipo sârosar —ehiño yuvireco chupe.

¹⁶ Aheseve Pedro oñeha vîteño ité oquendipive ohã. Ichui omboise oquenda yuvireco chupe cute, oyembosiquie iriño têi sepiase yuvireco. ¹⁷ Pedro rumo opo omopuha imonguiriri ãgua. Ichui opa omombehu

yande Yar op̄isiro agüer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe — ehi.

Ichui oseño, ambuae eve oso.

¹⁸ Cōhese sundao oyepihamondii eteanga yuvireco. “¿Que pīha Pedro?” ehi tēi oyeupe yuvireco. ¹⁹ Ipare Herodes omundo sundao Pedro reca. Ndoyosui eté rumo yuvireco. Evocoiyase Herodes porocuaita rupi oporandu tupri sārosar upe: “¿Que vo secoi?” ehi tēi chupe. Sese oyocuai ambuae sundao opacatu ahe sārosar yucapa ãgua. Ipare Herodes osē Judea sui oso Cesarea ve oyemboerecua.

Herodes mano agüer

²⁰ Yipindar rumo Herodes ndasori eté ava Tiro pendar upe, Sidón pendar upe avei. Evocoiyase ahe pendar oyoya ipihañemoñeta yuviraso vaherā mborerecuar rovai. Ahe evocoiyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca ãgua rese yuvireco. Esepia, Herodes porocuaita sui oipisi mbahe güemihura yuvireco. ²¹ Herodes evocoiyase omombehu ari oñehe vaherā chupe. Osupitise ahe ari, omonde sese iturucuar mborerecuar secosa resendar yívirindar yuvireco. Ipare güenda imboeteipri harive oguapi oñi. Aheve oñehe ava rehii upe. ²² Evocoiyase ava rehii osapucai pīrata yuvireco aipo ehi: “¡Co mbia oñehe vahe ndahei ava tēi, Tūpa ité!” ehi yuvireco Herodes upe imboeteisave. ²³ Ava aipo iheseve voi, ñepei Tūpa rembiguai oyapo mbaherasi guasu chupe. Ichui mbahe rasoi ocaru yavíter rupi yuvireco. Esepia, nomboetei eté Tūpa. Sese omano.

²⁴ Tūpa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuaita mboaviye pare, viroyevi Juan Marcos seraso yuvireco.

13

Tūpa oiporavo Bernabé, Saulo oyeupe mboravíqui apo ãgua

¹ Evocoiyase Jesús reroyasar Antioquia pendar pāhuve oime Tūpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avañ” ehi yuvireco), Lucio evocoí Cirene pendar, Manaén (ahe mbia oyoya ocuacua mborerecuar Herodes, Galilea pendar reseve) iyavei Saulo. ² Ñepei ari opacatu Jesús reroyasar oñemonuhase yande Yar mboetei ãgua, oyecuacu avei, ahese Espíritu Santo aipo ehi chupe: “Peiporavo Bernabé iyavei Saulo. Evocoí mbia aiporavo cheyeupe mboravíqui apo ãgua” ehi Espíritu Santo yuvireco chupe.

³ Evocoiyase oyeroquí pare, omundo opo yuvireco iporavopri ãca harive sovasa ãgua. Ipare omundo yuvireco ambuae tecua rupi Jesús recocuer mombehu ãgua.

Apóstol yuvirecoí Chipre rupi

⁴ Evocoiyase Bernabé, Saulo Espíritu Santo remimondo yuviraso Seleucia ve. Ichui yuviraso carite pipe caha pāhu Chipre ve. ⁵ Oyepota yemboyasa Salamina ve yuviraso. Aheve omombehu Tūpa Ñehengagüer judío tūparo rupi yuvireco. Juan avei oso supi ipítivii ãgua.

⁶ Opase ité oguata caha pāhu Chipre pipe yuvireco, oyepota ambuae tecua Pafos serer vahe save yuviraso. Aheve judío ipaye vahe Barjesús serer vahe osepio yuvireco. Ahe oporombohe tēi: “Che añehe Tūpa Ņehengagüer rese” ehi tupri tēi vahe. ⁷ Ahe ipaye vahe oicove Chipre pendar mbororecuar Sergio Paulo serer vahe piri, ahe mbororecuar yaracua vahe. Ahe güeru uca Bernabé, Saulo avei Tūpa Ņehengagüer rendu potasave oyeupe. ⁸ Iipaye vahe rer griego ñehe pipe Elimas. Ahe ndoviroya ucai güerecuar upe ñehesa supi eté vahe. ⁹ Evocoiyase Saulo, Pablo serer vahe, vireco ité vahe Espíritu Santo opicha pipe, omahe tupri sese. ¹⁰ Ipare aipo ehi chupe:

—¡Nde iporombopa serai vahe ereico! ¡Ndipiñai vahe, Caruguar rahir tēi ereico! Opacatu mbahe avíye vahe amotareñhisar tēi avei ereico no. ¡Mahera nderepoi potai yande Yar porombohesa supi eté vahe reroirosa sui. ¹¹ Eyapisaca, cüritei yande Yar nde mombaraisura. Nande mbose-sapisoí chira moviro ari rupi. Ichui ndereicatu iri chietera ari rendigüer repia água —ehi Pablo chupe.

Aipo ehi ramoseve voi, opacatu pítumimbi chupe. Oñehe tēi ava güeraso água upe. ¹² Ahe mbahe repiase, mbororecuar viroya yande Yar. Oyepihamondii porombohesa yande Yar resendar renduse.

Pablo, Bernabé reseve yuvirecoi Antioquía ve Pisidia ivi pipe

¹³ Evocoiyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso. ¹⁴ Perge sui yuviraso Antioquía ve, ahe namombrii Pisidia sui. Aheve, mbituhusa ari pipe, yuviroique judío tūparove oguapi yuvínoi. ¹⁵ Oyeroqui pare Tūpa porocuaita resendar cuachiar pipe, Tūpa ñehe mombehusar cuachiar pipe avei, tūparo pendar rerecuar omundo oñehe Pablo upe:

—Ore mu, perecose mbahe pemombehu vaherā co ava mongueréhi água, pemombehumi yande cüritei —ehi.

¹⁶ Evocoiyase Pablo opūha ohā. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tūpa mboeteisar, pesendu che ñehe —ehi—. ¹⁷ Israel iguar Tūpa oiporavo yande ramoi oyeupe nara, ahe Egipto ivi pipe omboeta secua ambuae vahe secosa pipe. Ipare opíratasa pipe vinosepa ahe ivi sui aracahe. ¹⁸ Ipare Tūpa oñemosao yande ramoi reco ai upe cuarenta araviter rupi, oguatase yuvireco ivi iporupiréhisa rupi. ¹⁹ Ipare omocañi ava eta Canaán pipendar siete tupri yuvirecoi vahe serecuar reseve-seve. Ipare omundo Canaán ivi yande ramoi upe nara. ²⁰ Ëgue ehi cuatrocientos cincuenta araviter rupi yapo yuvireco —ehi.

“Ipare Tūpa ombou ava recocuer moingatusar oporocuai vaherā. Ipa vahe ipāhu pendar serer Samuel aracahe. Ahe Tūpa ñehe mombehusar avei. ²¹ Ahese yande ramoi eta oporandu yuvireco Tūpa upe mbororecuar guasu rese. Evocoiyase Tūpa omundo Saúl chupe, ahe Cis rahir, ahe yande ramoi Benjamín suindar secoi. Oporocuai cuarenta araviter rupi oico. ²² Ipare Tūpa virocua imbororecuasa ichui; omundo David upe yande ramoi cuai água. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboavyera che porocuaua’ ehi Tūpa. ²³ Ahe David suindar sui, Tūpa ombou Jesús Israel iguar písiró água. Aracaheve Tūpa omombehu co yande ramoi upe. ²⁴ Yande Yar yu

renondeve, Juan omombehu opacatu Israel iguar upe: ‘Pemboasi pe angaipa, peyevi Tūpa upe pe ñeapiramo água’ ehi chupe.²⁵ Juan omboaviye senimise ocuaita, aipo ehi ava upe imombehu: ‘Pepihañemoñeta revo: co ité yande písirora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisã yora água ipí sui’ ehi Juan” ehi judío tūparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yandeu nara ombou Tūpa co ñehesa písirosa resendar.²⁷ Jerusalén pendar rerecuar avei ndoicuai evoco Jesús Tūpa remimbou secoise yuvireco. Iyavei ndosenducuai Tūpa ñehe mombehusar cuachiar pipe oyeroquise mbituhusa arí yacatu yuvireco. Ichui ahe ae oyuca uca yuvireco. Ëgüe ehi imboaviye Jesús rese Tūpa ñehe mombehusar rembicuachiagüer pipendar yuvireco.²⁸ Yepe ndoyosui mbahe sembiapo rai yuca uca água yuvireco viña, ahe rumo oporanduño Pilato upe yuca uca água rese yuvireco” ehi.²⁹ “Ichui omboaviyese opacatu icuachiapri pipendar yuvireco, oviroyi uca curusu sui ñotí água yuvireco.³⁰ Tūpa rumo ombogüerayevi iri.³¹ Setá arí rupi oyemboyecua oyeupi oguata vahe upe, evocoí ava yugüeru vahe supi Galilea sui, Jerusalén ve. Cûritei ahe ava ité omombehu Jesús recocuer ava upe yuvireco” ehi tūparo pendar upe.

³² “Sese che mu eta, cûritei oromombehu pëu evocoí ñehesa aviye vahe Tūpa omundo vahe yande ramoi upe aracahe.³³ Tūpa omboaviye ramo güemimombehugüer yande Israel suindar yaico vahe upe, ombogüerayevise Jesús. Evocoí güemimombehu oicuachía uca Salmo moñuviriosa pipe aipo ehi: ‘Co pipe nde che Rahîr ereico; che nde Ru aico’ ehi Tūpa chupe.³⁴ Tūpa omombehu avei güemimbogüerayevi sete tuyuñhi água icuachiapri pipe aracahe aipo ehi: ‘Che niha oroovasara acoi David upe che ñehe maraneñhi supi tupri vahe mboaviye água’ ehi.³⁵ Sese omombehu avei ambuae icuachiapri pipe: ‘Nde, Tūpa, ndereseyai chira nde rembiguai Ava seco maraneñhi vahe rete ituyupa água’ ehi.³⁶ Supi eté, David omboaviye ocuaita ava rese ohañecosa pipe yepi. Ipare omano. Evocoiyase oyapocatu tuvipave imu pâhuve yuvireco. Ahe setecuer rumo opaño ité ituyu” ehi.³⁷ “Acoi Tūpa ombogüerayevi vahe retecuer rumo ndituyui eté” ehi tūparo pendar upe imombehu.³⁸ “Sese, che mu eta, peyapisaca, tapeicua evocoí Jesús recocuer sui oime ñeroisa angaipa rese yandeu. Ahe co amombeumi pëu. Moisés porocuaita sui ndipoi ñeroisa angaipa rese yande reco mohivi água.³⁹ Jesús recocuer sui rumo oime ñeroisa ñepei-peí viroya vahe upe” ehi.⁴⁰ “Peicua catu co mbahe sui, toviapi eme pe harive acoi Tūpa ñehe mombehusar rembicuachiagüer pipe aipo ehi vahe:

⁴¹ ‘Esepia, pe seroírosar peico vahe. Peyepihamondii, ipare pecañi têira. Esepia, che ayapora mbahe pe recoveseve. Yepe ambuae omombehu tupri itera pëu che rembiaporâ viña, pe rumo ndap-eroyai chietera’ ehi Tūpa” ehi Pablo tūparo pendar upe.

⁴² Yuvinose potase tūparo sui, omombita Pablo yuvireco: “Tere-mombehu irimi eremombehu vahe ñehesa ambuae mbituhusa arí pipe oreu” ehi yuvireco chupe.⁴³ Yuvinose ava rehii tūparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tūpa pe rovasasa pipe” ehi ava upe yuvireco.

⁴⁴ Ambuae mbítuhusa ari pipe seni opacatu ava ahe pendar oñemonuha yuvireco Tūpa Ñehengagüer rendu água. ⁴⁵ Osepiase ava rehii, judío rerecuar ofíemoiró iteanga Pablo upe, supindar upe avei yuvireco. Viroíro Pablo ñehe ava upe yuvireco. ⁴⁶ Evocoiyase Pablo, Bernabé reseve oñeho yuvireco judío upe osiquiyeëhisave:

—Tūpa ore cuai pēu rane ore ñehe água. Pe rumo ndapeyapisaca potai iñehengagüer rese. Ipipe sui ndiyai peipisi tecovesa apirëhi vahe. Evocoiyase orosora, oroñeho ava ndahei vahe judío upe. ⁴⁷ Esepi, yande Yar ombou ore cuaitarā co ñehesa rese aracahendar aipo ehi vahe: ‘Che oroporavo tataendi nungar nde reco água ndahei vahe judío yuvirecoi vahe upe písirosa reroguata água opacatu ívi rupi’ ehi.

⁴⁸ Ava ndahei vahe judío osenduse co ñehesa, oviharete yuvireco, omboetei avei Tūpa Ñehengagüer. Opacatu ava iporavopri tecovesa apirëhi vahe pisí água, ahe viroya yuvireco. ⁴⁹ Evocoiyase Tūpa Ñehengagüer omombehu opacatu ahe ívi rupi yuvireco. ⁵⁰ Judío rumo omonguerëhi cuña imboyeroyapri Tūpa mboeteisar iyavei mbia seco ívate vahe Pablo, Bernabé mose uca água güecua sui yuvireco yamotarëhisave. ⁵¹ Aheste Pablo, Bernabé oipipete opitaqui ívi sui yuvireco ‘Tūpa toicua mbahe sembiapo ai rese yuvireco chupe’ oya. Ichui yuviraso Iconio ve. ⁵² Jesús reroyasar rumo oviharete yuvireco, vireco ité Espíritu Santo oyese yuvireco.

14

Pablo, Bernabé reseve omombehu Tūpa Ñehengagüer Iconio ve yuvireco

¹ Pablo, Bernabé oyepota Iconio ve yuviraso. Aheve yuviroique judío tūparo pipe, omombehu tupri yande Yar recocuer yuvireco. Sese setá ava viroya iñehesa yuvireco judío, ndahei vahe avei judío. ² Judío ndovíroyai vahe rumo oipihañemoñeta reroval yuvireco ava ndahei vahe judío Pablo, Bernabé iyavei ambuae Jesús reroyasar amotarëhi água. ³ Ahe rumo opita pucu yuvireco Iconio ve, omombehuño yande Yar recocuer osiquiyeëhisave yuvireco. Aheve Tūpa ombou opíratasa mbahe yavai vahe apo água chupe ‘ichui toicua yuvireco Pablo, Bernabé che poroaisusa mombehuse’ oyapave. ⁴ Ahe tecua pendar rumo ipihañemoñeta yoívi yuvireco: ñepei judío pihañemoñetasa rupindar; ambuae evocoiyase apóstol pihañemoñetasa rupindar yuvireco. ⁵ Oime judío iyavei ndahei vahe judío oyemboyoya mborerecuar rese mara-mara tēi sereco água yuvireco, “Ita pipe avei yayapi-yapi” ehi yuvireco chupe viña. ⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopí rupi avei. ⁷ Supi omombehu ñehesa avíye vahe Jesús resendar yuvireco.

Pablo yapi-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia oguapi oí ⁹ oyapisaca Pablo ñehe rese. Aheste Pablo omahengatuse sese, oicua ndoguatai vahe oyeroaya ité Tūpa rese ocuera água. ¹⁰ Evocoiyase aipo ehi pírata chupe:

—¡Epúha! —ehi.

Aheste opo, opúha, oguata voi. ¹¹ Osepiase ava rehii mbahe sembiapo yuvireco, osapucai pírata Licaonia ñehe pipe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihañemoñeta yuvireco Bernabé ahe tūpa Zeus iyavei Pablo ahe tūpa Hermes viña. Esepio, Pablo oñeho vahe. ¹³ Ahese co tūpa Zeus pahi güeru tīvi, mbahe potri avei. Ahe tecua tapia roquendave, ahe Zeus tūparo tecua pipe ava reiquesa rupi chini. Oyuca pota tīvi Pablo, Bernabé mboetei água yuvireco viña. ¹⁴ Oicuase rumo Bernabé, Pablo, ahese omondoro oturucuar yuvinoña ava pāhuve; oñeho pírata yuvireco:

¹⁵ —Mbía, ¿mahera égüe peye oreu? —ehi—. Ore rumo ava tēi pe nungar avei oroico. Oromombehu: “Pepoi co mbahe égüe ehi tēi vahe mboeteisa sui; pero ya Tūpa supi eté vahe” orohe pēu. Ahe oyapo vahe iwa, iwi, para guasu, opacatu ipor reseve. ¹⁶ Aracahe rumo Tūpa, “Égüe tehi oguata ndahei vahe judío opihañemoñetas rupi yuvireco” ehi viña. ¹⁷ Tūpa rumo ndasesarai ava upe mbahe tupri apo água sui. Ahe ombou amar pēu mbahe miti ha aviyé água yepi. Égüe ehi mbahe tembihu imbuo iyavei viharetesa pēu —ehi ava upe yuvireco.

¹⁸ Yepe aipo omombelu yuvireco chupe, ava rehii rumo seniño ité tīvi oyuca yuvireco chupe imboetei água viña.

¹⁹ Ahese oyepota moviro judío Antioquía sui, Iconio sui avei. Opihañemoñeta rerova ava rehii yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua iwi. Ipihañemoñeta: “Yayuca ité” ehi yuvireco chupe viña. ²⁰ Oyere tupri Pablo rese Jesús reroyasar yuvireco. Ahe rumo oñarapuha, oique iri oso tecua pipe. Ahere ayihive yuvinose oyevi yuviraso Bernabé reseve Derbe ve.

²¹ Omombelu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco. ²² Ahe supi omongueréhi catu opacatu Jesús reroyasar yuvireco, aipo ehi imombelu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviyé catu ité mbahe-mbahe tēi pipe yande recose Tūpa mborerecuasave yande reique água” ehi yuvireco Jesús reroyasar upe. ²³ Ipare oiporavo ava Jesús reroyasar rāro água ñepei-peí ñemonuhasa rupi. Oyeroqui iyavei oyecuacu. Ipare viropovéhe yande Yar upe iporavíqui água yuvireco.

Pablo, Bernabé oyevi yuvireco Antioquía ve Siria iwi rese

²⁴ Ipare yuviraso Pisidia rupi, oyepota Panfilia iwi rese. ²⁵ Omombelu Tūpa Ñehengagüer yuvireco Perge ve. Ipare yuviraso Atalia ve. ²⁶ Ahe ichui yuviraso carite pipe Antioquía ve, ahe tecua pipe yipindar imondopri Tūpa upe sovasapri yuvirecoi mboravíqui apo água. Aheve tupri avei imboaviye pare oyevi yuvireco. ²⁷ Oyepotase Antioquía ve yugüeru, omonuha opacatu Jesús reroyasar yuvireco. Aheve omombelu opacatu Tūpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya água yuvireco” ehi yuvireco omboetasa upe. ²⁸ Aheve Pablo, Bernabé opita pucu yuvireco ipiri.

15

Jesús reroyasar oñemonuha Jerusalén ve yuvireco

¹ Evocoiyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tūpa oyocuai Moisés yande ramoi cuai água: ‘Pembocircuncida opacatu pe mu cuimbahe cheu nara’ ehi Tūpa aracahe” ehi yuvireco. “Cūritei acoi ēgue ndapeyeise Jesús reroyasar upe, noñepisiroi chietera yuvireco” ehi Antioquía pendar upe yuvireco. ² Pablo, Bernabé reseve rumo oñiehe pírata yuvireco chupe. Nomoingatu catuisse rumo mbahe yuvireco, ahese Jesús reroyasar omundo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rārosar upe aipo mbahe moingatu água yuvireco.

³ Ēgue ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuviraso, oguatasa rupi omombehu mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya aracahendar aracuasa Tūpa rupi oguata água yuvireco” ehi. Ahese opacatu Jesús reroyasar oyembovharete yuvireco senduse.

⁴ Yuviroyepotase Jerusalén ve, apóstol, Jesús reroyasar rārosar iyavei ambuae Jesús reroyasareta oipisi tupri yuvireco. Aheve omombehu Tūpa mbahe oyapo vahe oyese yuvireco. ⁵ Osenduse rumo, moviro Jesús reroyasar fariseo opūha voi aipo ehi yuvireco chupe:

—Aní—ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuaita mboaviye água yuvireco —ehiño ité yuvireco.

⁶ Ahese apóstol, Jesús reroyasar rārosar avei oñemonuha oyemomborandu água aipo mbahe rese yuvireco. ⁷ Yemomborandu viteseve, Pedro opūha ipāhuve aipo ehi:

—Che mu, peicua niha aracaco Tūpa che poravo pe pāhu sui co ñehesa poropisirosa resendar mombehu água ava ndahei vahe judío upe ‘toviroya yuvireco’ oyapave. ⁸ Tūpa oicua ité opacatu ava pihañemoñetas. Chupe avei omundo Espíritu Santo inungar yandeu. Ipipe sui yaicua Tūpa oipisi avei ahe ava oyeupe nara —ehi—. ⁹ Evocoiyase, “Judío aviyé catu vahe ava ndahei vahe judío sui” ndehi Tūpa. Esepia, opacatu oyoya pāve Tūpa upe yaico. Sese omoatiro ipihañemoñeta rai sui oyese yeroyasa pipe. ¹⁰ ¡Pe tie pesecoāha pota Tūpal! ¡Mahera peyocuai uca pota co Jesús reroyasar mbahe yavai rai vahe apo águia! Aní rumo. Esepia, yande ramoi ndoicatui Tūpa porocuaita mboaviye água yuvireco, yande avei ēgue yahe —ehi—. ¹¹ Co rumo, yaroyase yande Yar Jesucristo, yande písirora oporoaisusa pipe, inungar co ava ndahei vahe judío yuvirecoi —ehi Pedro.

¹² Evocoiyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoiyase omombehu ndayasepiai vahe poromondiisa Tūpa oyapo uca ava ndahei vahe judío pāhuve yuvireco chupe. ¹³ Osendupase ñehe yuvireco, ahese Santiago aipo ehi:

—Che mu, Jesús reroyasar, peyapisacami che ñehe rese: ¹⁴ Simón omombehu yandeu Tūpa osaisu avei ava ndahei vahe judío. Sese oiporavo ahe ava oyeupe nara —ehi—. ¹⁵ Oyoya tupri Tūpa ñehe mombehusar rembicuachiagüer rese. Ñepei ipāhu pendar oicuachía aracahe aipo ehi:

¹⁶ 'Coiye catu ayevíra vitu. Ahese ayapo piasu irira che rëta David oyapo uca vahecuer, ahe oí imocañipirer. Ambopiasu irira oitipa vahecuer yuvireco.

¹⁷ Êgue ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reševe.

¹⁸ Evocoi yande Yar rembiaporã icuapri aracahe suive' ehi Tüpa ñehe mombehusar aracahe.

¹⁹ "Sese chepiñañemoñeta iya ndayayocuai chira Moisés porocuaita rupi oñecuñaro vaherá ndahei vahe judío Tüpa rupi oguata ãgua yuvireco" ehi. ²⁰ "Avíye rumo yaicuachiase chupe co mbahe resendar güeraño: Pehui rene mbahe mimba yucapri mbahe rahanga têi upe seropovëhepri iyavei ndapeaguasai chira, pehui rene mbahe mimba yucapri suvi renosepiréhi, mbahe ruvi avei" ehi. ²¹ "Esepia, opacatu tecua rupi yuvirecoi ava omombehu vahe Moisés porocuaita ñepei-peí mbituhusa ari pipe judío tûparo pipe aracahe suive. Aipo rupive" ehi Santiago.

Icuachiapri ndahei vahe judío upe nara

²² Ahese apóstol, Jesús reroyasar rârosar, ambuae Jesús reroyasar avei omundo pota opáhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyerozapri omboetasa pâhuve yuvireco. ²³ Ahe supi aipo ehi icuachía imondo yuvireco:

"Ore apóstol, Jesús reroyasar rârosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei. ²⁴ Oroyandu amove ava ore pâhu pendar pe mañeco têi aipo oporombohesa pipe yuvireco. Ahe ava ndahei ore ocuaita pipe yuviraso pêu pe piñañemoñeta rerova. ²⁵ Sese oyoya orepiñañemoñeta oroiporavo ñuvirío mbia ore rembiaisu ore rîvri Bernabé, Pablo rupi imondo eipeve pêu. ²⁶ Ahe acoi oyemondo vahe mbahe-mbahe têi povrîve yande Yar Jesucristo recocuer rese yuvireco. ²⁷ Oromondo Judas, Silas avei pêu: ahe teiteté omombehura opacatu cuachiar pipendar pêu yuvireco. ²⁸ Avíye Espíritu Santo upe, oreu avei co porocuaita güeraño oromondo vahe rese pêu. Ndape cuaisa pota iri rumo ambuae mborocuaita rese. ²⁹ Pehui rene mbahe mimba yucapri seropovëhepri mbahe rahanga têi upendar, ndapehui chiaveira mbahe ruvi, mbahe mimba yucapri suvi renosepiréhi vahe iyavei ndapeaguasai chira. Pepoise evocoi mbahe naporai vahe sui, oimera mbahe tupri pêu. Aipo rupive. Peico tupri" ehi.

³⁰ "Avíye" ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omundo cuachiar yuvireco chupe. ³¹ Ahe cuachiar rese oyeroquise, oyembovharete yuvireco.

³² Judas, Silas Tüpa suindar ñehesa mombehusar avei yuvirecoi. Sese ombovharete catu iyavei omongueréhi catu avei ahe ava yuvireco oñeho pipe. ³³ Opitase moviro ari aheve, Jesús reroyasar Antioquía pendar aipo ehi: "Avíye. Peyevi tupri pe mbousar upe" ehi yuvireco chupe. ³⁴ Silas rumo opita potaño ité aheve. ³⁵ Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vîte ãgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu ãgua

³⁶ Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pīha ahe yuvireco? —ehi.

³⁷ Ahese Bernabé víraso pota Juan Marcos oyeupi viña. ³⁸ Nomboyoyai rumo Pablo ipihañemoñeta rese. Esepia, cuese Juan Marcos oseyáño oyepotase yuvireco Panfilia ve. “Taipítiviño iporavíquisa rese” ndehi chupe. ³⁹ Nomoingatuse mbahe oyeupe yuvireco, oyepepiño yuvireco oyesui. Ahese Bernabé víraso Marcos oyeupi carite pípe Chipre ve. ⁴⁰ Pablo rumo oiporavo Silas oyeupi icho água. Yuvinose água Antioquia sui, Jesús reroyasar ahe pendar aipo ehi yuvireco chupe: “Tape rovasa Tūpa oporoaisusa pípe” ehi yuvireco imondo. ⁴¹ Ipare yuviraso Siria, Cilicia rupi Jesús reroyasar mongueréhi catu água yuvireco.

16

Timoteo oso Silas ndugüerā Pablo rupi

¹ Pablo ondugüer reseve yuviraso Derbe ve, Listra ve avei. Aheve osenia Jesúseroyasar, Timoteo serer vahe, judía, Jesús reroyasar membrí. Iyesupa rumo griego. ² “Evocoi Timoteo aviyeteprí” ehi Jesús reroyasar Listra pendar, Iconio pendar avei yuvireco chupe. ³ Pablo viroguata potaño ité Timoteo oyeupi. Sese seroguata renondeve, ombocircun-cida uca seroñroëhi água judío yuvirecoi vahe upé. Esepia, opacatu oicua Timoteo ru griego secose yuvireco. ⁴ Evocoyaise opacatu tecua iguatagüer rupi omombehu ahe mborocuaita apóstol, Jesús reroyasar rārosar Jerusalén pendar ombou vahe yuvireco chupe. ⁵ Sese Jesús reroyasar ahe tecua rupindar oyemoviracua catu yuvireco Jesús reroyasa pípe iyavei oyemboeta catu yuvireco ari rupi.

Tūpa omondo uca Pablo Macedonia ve iquer nungar pipe

⁶ Espíritu Santo ndoipotai Asia rupi yuviraso vaherā Tūpa Ñehengagüer mombehu água. Sese oyahuva yuviraso Frigia rupi, Galacia rupi avei. ⁷ Ëgüe ehi oyepota Misia popive yuvireco. Ichui yuviraso pota tēi Bitinia ve. Jesús Espíritu rumo ndoipotai icho água supi. ⁸ Ahese osasaviño yuviraso Misia sui carite guasu yemboyasa Troas ve oyepota água yuvireco. ⁹ Oyepotase aheve, ahe pítu pipe Pablo oquer nungar pipe osepia mbia, Macedonia pendar, “Ereyumira Macedonia ve ore píttivi água viña” ehi ohā chupe. ¹⁰ Ipare ore oroyemoingatu voi eté Macedonia ve ore so água. Esepia, ore oroicua ité Tūpa aheve ore mondora ñehesa písirosa resendar mombehu água.

Pablo, Silas Filipo ve yuvirecoi

¹¹ Orosó carite pipe Troas sui oromohiviño voi oroso evocoí ivi para guasu Samotracia ve. Ahere ayihive oroyepota Neápolis ve. ¹² Ichui oroso ivi rupi Filipes ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oy-ocuái avei opacatu tecua ivirindar ava yuvireco. Aheve moviro ari tēi oroico. ¹³ Mbituhusa ari pipe orosé evocoí tecua sui iai popive. “Aheve oñemonuhara judío oyeroqui água” orohe. Aheseve cuña oñemonuha yugüera. Aheve oroyepota chupe, oroguapi ipähuve. Ipare oromombelu co ñehesa písirosa resendar yuvireco chupe. ¹⁴ Ñepei imboetasa, Lidia serer vahe, Tiatira pendar, oyapisaca ore ñehe rese oí. Ahe Tūpa mboeteisar secoi, turucuar suendi vahe mbovendesar avei secoi. Yande

Yar omohivi ipihañemoñetasa iyapisaca ãgua Pablo remimombehu rese. ¹⁵ Sese ñapiramosa, opacatu sëta pendar reseve. Ipare ore mombita pota güëtave.

—Che reroyase peye yande Yar reroyasar che recose, pepitara che rëtave —ehi oreu.

Êgüe ehi ore monguerëhi. Sese oropita sëtave ipiri.

¹⁶ Ipare ambuae ari oroso irise oroyeriqui ãgua, cuñatai ore rovañchi, ahe cuñatai caruguar píratasa pipe mbahe mombehusar. Oicatu ava upe mbahe oime vaherã mombehu. Omombehuse mbahe, setá oipisi sepri guareepochi güerecuar yuvirecoi vahe upe nara yepi. ¹⁷ Ahe cuñatai ou ore raquicuei,

—¡Co ava Tüpa ivate catu vahe upendar oporaviqui yuvireco omombehu: “Na ehira Tüpa yande písiro” ehi yuvireco! —ehi pucu pucu ore mombehu ava upe.

¹⁸ Setá ari êgüe ehi oico oreu. Omañeco tēise rumo Pablo, oyemboyere chupe cute, aipo ehi icaruguar upe:

—Che orocuai Jesucristo rer pipec: esë co cuñatai sui —ehi.

Aheseve voi caruguar osë ichui.

¹⁹ Evocoiyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco. ²⁰ Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tēi yuvirecoi. Ayeve omboaïvu guasu tēi yuvireco yande recua pipec. ²¹ Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña ãgua —ehi yuvireco mborerecuar upe.

²² Evocoiyase ava eta oyamotarëhi Pablo iyavei Silas yuvireco iyavei mborerecuar, “Pesequii iturucuar ichui. Ipare peinupara ivira pipe” ehi. ²³ Inupá iteanga pare, osoquenda yuvireco. Oyocuai pírata soquendapri rärosar yuvireco, “Esäro tupri” ehi yuvireco chupe. ²⁴ Aipo oyeupe he ramoseve, soquendapri rärosar omoingue Pablo, Silas oí ava nose catui vahesa pipe. Aheve omopaha cepo pipec.

²⁵ Ahe pítu mbiter rupi rumo Pablo, Silas oyeroqui, osapucai Tüpa mboeteisave yuvireco. Ambuae ava soquendapri evocoiyase osenduño tēi yuvireco isapucai. ²⁶ Ahese aviyeteramo tēi ivi oririí eteanga. Opa omomara ava roquendas moviracuasa, opacatu oquenda oyemboi iyavei opacatu carena oyera soquendapri sui. ²⁷ Ahese soquendapri rärosar omahe yesapiha. Osepiase oquenda imboipri, ahese vinose oquise pucu sîru sui oyeyuca ãgua viña. Esepiá niha, “Opacatu ité revo soquendapri yuviraso” ehi viña. ²⁸ Pablo rumo,

—¡Ereyapoi rene mbahe tēi ndeyeupe! ¡Esepiá, opacatu oroicoveño cohabe! —ehi pucu soquendapri rärosar upe.

²⁹ Evocoiyase soquendapri rärosar, “Emboumi tataendi” ehi ondugüer upe. Ichui oña oique, oririí, osiquiyepave oñenopihá Pablo, Silas rovai oso. ³⁰ Vinose pare soquendasu sui oporandu chupe:

—Mbía, ¿mara ahera vo che ñepisiro ãgua vichico? —ehi chupe.

³¹ —Eroya yande Yar Jesucristo. Ichui ahe nde písirora, nde rëta pendar avei —ehi yuvireco chupe.

³² Ahese omombehu yuvireco Tüpa Ñehengagüer soquendapri rärosar upe, opacatu sëta pendar upe avei. ³³ Ahe pítu pipeve avei soquendapri

rārosar víraso oyeupi, yapichasa oyoseipa chupe. Ahese Pablo, Silas oñapiramo guārosarer, sēta pendar avei yuvireco. ³⁴ Víraso pare sārosar güētave, ombocaru. Ahe sēta pendar avei oviharete ité yuvireco Tūpa reroyasa rese.

³⁵ Cōhese mborerecuareta omundo sundao ava rese icuapri soquendasave yuvireco. Oyepotase yuvireco, aipo ehi: “Emosepa evocoí mbia judío” ehi. ³⁶ Ahese soquendapri rārosar omombehu co ñehesa Pablo upe:

—Mborerecuar ombou yuvireco ñehesa cheu pe mose ãgua. Peso tupriño peico —ehi chupe.

³⁷ Omboyeví rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tēi yuvireco. Ipare aipo ava rembiepiaeħive tēi ore mosepa uca pota viña. ¡Aní eté rumo! Ahe teieté ru toyugüeru ore mose ãgua —ehi soquendapri rārosar upe.

³⁸ Ipare sundao ava rese icuapri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco.

³⁹ Ahese ahe teieté yuviraso Pablo, Silas oyeupe ñero ãgua rese yuvireco: “Peso tupriño ore recua sui” ehi yuvireco chupe. ⁴⁰ Pablo, Silas yuvinosese voquendasa sui, yuviraso iri Lidia rētave. Oñemonuha irise ambuae Jesús reroyasar pāhuve, omonguerēhi catu yuvireco. Ipare yuviraso ichui.

17

Ava yaivu guasu tēi Tesalónica ve yuvireco

¹ Oguatase Pablo iyavei Silas, oñocua Anfípolis iyavei Apolonia rupi yuviraso. Ëgue ehi oyepota tecua Tesalónica ve yuvireco. Aheve oime judío tūparo. ² Secocuer rupi eté mbītuhusa ari pipe Pablo oique judío tūparove, oñemoñeta ava eta upe mbosapi mbītuhusa ari rupi Tūpa Ñehengagüer rese. ³ Omboyecka tupri imombehu Tūpa Rembiporavo ava písiro ãgua iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acol amombehu vahe pēu, ahe ité niha Tūpa Rembiporavo ava písiro ãgua —ehi.

⁴ Amove ipāhu pendar seroyasa pipe oyemboya sese yuvireco. Setá avei ava griego yuvirecoi vahe, Tūpa mboeteisar judío aracuasa reroyasar avei. Ipāhuve setá avei cuña oyemboetei vahe oyemboya sese yuvireco. ⁵ Judío rumo ndoviroyai vahe oñemoirombave secatēhi ava rese yuvireco. Sese omonuha ava yuvireco tēi vahe, ndipihai vahe yuvireco. Imonuha pare, ahe omboaivu guasu uca tēi ahe ava upe opacatu güecua pipe yuvireco. Yuviraso Jasón rētave Pablo, Silas reca, vīnose pota ava rehii pāhuve yuvireco viña. ⁶ Ndoyosuise rumo aheve yuvireco, vírasoño Jasón, ambuae Jesús reroyasar avei güecua rerecuar rovai yuvireco. Viroâse guasu sereco yuvireco,

—¡Evocoí mbia Pablo iyavei Silas virova vahe ava recocuer opacatu tecua rupi yuvireco, cūritei oyepotapa yuvireco cohabe! ⁷ Co Jasón omombītuhu güētave. ¡Opacatu co yuvirecoi vahe ndoviroyai Cesar porocuaita yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyepihamondii guasu ava eta, mbororecuar avei tecua pípendar yuvireco. ⁹ Mbororecuar rumo oipispase guare-pochi Jasón sui, ambuae Jesús reroyasar sui avei, ahese opa omose.

Pablo, Silas omombehu Tūpa Ñehengagüer Berea ve yuvireco

¹⁰ Ahe pítu pípeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tūparo pipe. ¹¹ Berea pendar ava aviyé catu ava Tesalónica pendar sui. Ëgüe ehi ipisi ohāpisiēhisa pipe ñehesa yuvireco iyavei ari yacatu rupi oseca Tūpa Ñehengagüer pipe ‘¿supi eté píha Pablo ñehesa?’ oyapave yuvireco. ¹² Evocoiyase setá avei Pablo ñehe reroyasar iyavei setá griego viroya yuvireco, ndahei cuimbahe güeraño, cuña oyemboetei vahe avei. ¹³ Judío Tesalónica pendar rumo oyandu yuvireco Pablo porombohesa Tūpa Ñehengagüer rese Berea ve. Sese yuviraso aheve imboaívu guasu tēi uca áqua ava upe yuvireco. ¹⁴ Evocoiyase Jesús reroyasar Berea pendar Pablo viroguata poyava voi tecua sui para guasu cotí yuvireco. Silas iyavei Timoteo rumo opita viteño aheve yuvireco. ¹⁵ Evocoiyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñehe Silas upe iyavei Timoteo upe avei yuvireco yuviraso voi áqua Pablo piri ahe tecuave yuvireco.

Pablo Atenas ve secoi

¹⁶ Pablo osāro viteseve Silas iyavei Timoteo Atenas ve oico, ndoyemboviñai osepiase opacatu rupi tūpa rahanga-anga tēi. ¹⁷ Sese judío tūparo pipe omombehu Jesús recocuer judío eta upe iyavei ambuae Tūpa mboeteisar upe avei. Iyavei ari yacatu omoñeta ava osephia vahe ocarusu rupi ava ñemonuhasave ahe tecua pipe. ¹⁸ Evocoiyase amove mbia oyembohe vahe epicúreo aracuasa rese iyavei mbia oyembohe vahe estoico aracuasa rese oñemonuheta Pablo rese yuvireco. Amove aipo ehi Pablo upe yuvireco seroñrosave:

—¿Mbahe rese angahu píha co mbia iñehe papa rai ava upe oico? —ehi.
Ambuae aipo ehi yuvireco:

—Ndoyavíi co mbia oñehe vahe ambuae ava Tūpa rese tēi —ehi yuvireco.

Esephia, omombehu Jesús recocuer iyavei cuerayevisa resendar. ¹⁹ Evocoiyase ahe oyembohe vahe viroyeupi Pablo Areópago serer vahe-save seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña? ²⁰ Supi eté niha eremombehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

²¹ Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemonuñetaño, omombehuñño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemonuñetaso yuvireco.

22-23 Evocoiyase Pablo opúha ahe ava pâhuve aipo ehi:

“Pesendu rane Atenas iguar. Aguatase ocar rupi asephia pe tūpa eta pemboetei vahe. Ahese asephia ñepei tūpa upe seropovéñepri renda. Sese asephia icuachiapri aipo ehi oí: ‘Tūpa ndicuasai vahe upendar’ ehi. Evocoi Tūpa ndapeicua vitei vahe, ahe secocuer niha amombehu pêu” ehi.

24 "Evocoi Tūpa oyapo vahe co ivi, opacatu mbahe ipor avei. Ahe niha ivi, iwa Yar secoi. Sese ndasecoi tūparo ava tēi rembiapo pipe. 25 Ndahei ava rembiapo pipe sui tēi oicove. Esepio, ndipoi mbahe ipane vahe chupe. Ahe ité niha opacatu upe ombou tecovesa, pītuhesa iyavei opacatu mbahe oime vahe ivi, ivave" ehi.

26 "Tūpa oyapo opacatu-catu tēi ava ñepei ava sui ava yesu ãgua opacatu ivi rupi. Omundo ivi ava yemboerecua ãgua ñepei-peí upe. Ari avei omondo co ivi pipe iyemboerecua ãgua yuvireco chupe. 27 Ëgue ehi ava upe 'tache reca yuvireco' oya, 'ipipe sui aviyeteramo che reroyara yuvireco' oyapave. Ëgue ehi rumo Tūpa yande resevemi eté. 28 Esepio niha, Tūpa sui yaicove, ipíratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: 'Yaico ité Tūpa suindar' ehi yuvireco. 29 Sese yande Tūpa suindar yaicose, 'Co mbahe rahanga oro apopri iyavei guarepochi, ita apopri, ahe revo Tūpa' ndayahei chira. Esepio, mbahe rahanga ava rembiapo tēi, ndahei Tūpa" ehi. 30 "Pe ramoi ndoicua tupriise yuvireco aracahe, Tūpa oñemosao mbahe sembiapo rese chupe. Cûritei rumo oyocuai opacatu ava co ivi pipendar 'tomboasi oangaipa, toyevi yuvireco cheu' oya. 31 Esepio, ahe oiporavo ari opacatu ava recocuer rese porandu uca ãgua güecocuer ivi tuprisa pipe ñepei güembiporavo upe. Ahe ombogüerayevi güembiporavo omano vahe pāhu sui 'toicua opacatu ava güecocuer rese iporandu ãgua' oya" ehi Atenas pendar upe.

32 Osenduse yuvireco cuerayevisa resendar, ahese oime ava oyoyai catu yuvireco seroñosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

33 Sese Pablo osē ipāhu sui oso. 34 Moviro rumo mbia oyemboya sese, viroya ité vahe iñehesa yuvireco. Ahe ipāhuve secoi mbia Dionisio serer vahe, ahe Areópago pāhu pendar iyavei cuña Dámaris serer vahe. Ambuae oime vîte yuvireco seroyasar.

18

Pablo Corinto ve secoi

1 Coiye catu Pablo osē Atenas sui, oso Corinto ve. 2 Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvinose ñepei tecua Italia rupindar Roma sui oyocuaise mborerecuar guasu Claudio: "Toyuvinose ité opacatu judío Roma sui" ehise. Pablo oso, 3 opita Aquila piri oporaviqui ãgua. Esepio, Pablo, Aquila avei ahe mbahe pirer mbovivisar pâve yuvirecoi. 4 Mbituhusa ari yacatu rupi Pablo omombehu Jesucristo recocuer ava upe judío tūparo pipe 'toviroya Jesús judío iyavei ndahei vahe judío yuvireco' oyapave.

5 Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu ãgua rese güeraño judío eta upe aipo ehi: "Jesús niha Tūpa Rembiporavo ava pisiro ãgua secoi" ehi. 6 Iñeha-ñeha tēi rumo seroñosave yuvireco chupe. Sese Pablo oipipete oturucuar sovaque 'oimera mbahe tēi pēu' oya, iyavei aipo ehi chupe yuvireco:

—Pe ae niha peseca Tūpa ñemoñrosa peyeupe pe recocuerai sui. Ndahei rumo che resera mbahe. Esepio, che amboaviye tupri che cuaita pēu. Che

rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoiyase Pablo osē judío tūparo sui, oique mbia Ticio Justo serer vahe rētave, ahe Tūpa mboeteisar avei secoi. Ahe sēta judío tūparo iqueve. ⁸ Crispó, ahe judío tūparo rerecuar viroya avei yande Yar, opacatu sēta pendar avei viroya yuvireco. Setá ambuae Corinto pendar avei viroya osenduse iñehesa yuvireco. Seroya pare, ofleapiramopa uca yuvireco. ⁹ Ñepei pitu pipe yande Yar oñeho Pablo upe iquer nungarve: “Eresiquiyei rene, ereñeho ava upe, che mombehuño eve, erepoi rene che mombehusa sui. ¹⁰ Esepi, che nde reseve aico. Sese ndiyai ava upe nde momara uca água. Supi eté che areco setá che rahirā co tecua pipe” ehi yande Yar chupe. ¹¹ Evocoiyase opita ñepei aravíter yemombitesa rupi Corinto ve oico. Aheve ombohe Tūpa Ñehengagüer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotaréhísave. Ichui viraso ahe mborerecuar upe porandusa ivate catusave yuvireco, ¹³ aipo ehi yuvireco chupe:

—Co mbia oipihañemoñeta rerova tēi ava oTūpa mboetei água. Ndahei rumo Roma pendar porocuaita rupi ẽgue ehi yuvireco —ehi yuvireco seroñrosave chupe.

¹⁴ Oñeho pota tēi viña, Galión rane rumo oñeho judío upe:

—Peyapisaca mbia judío. Pemombehusche cheu ava rembiapo naporai vahe, ahese ayemongueréhira che yapisaca água pe remimombehu rese viña. ¹⁵ Pe rumo peporandu cheu mbahe pe yembohesa resendar, pe Tūpa rer resendar iyavei pe Tūpa porocuaita resendar rese tēi. Pemoin-gatu pe ae pe recocuer; ndaiptai aipo nungar mbahe moingatu água —ehi Galión ahe ava upe.

¹⁶ Ipare opa omboyepepi porandusa sui. ¹⁷ Ahese opacatu griego oipisi judío tūparo rerecuar Sóstenes yuvireco. Ipare yuvirocua-rocu Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yevi irisa Antioquía ve

¹⁸ Pablo secoi pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeanpipa tupri oñeho mboaviye água. Ipare yuviraso carite pipe Siria ve. ¹⁹ Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oique judío tūparo pipe Jesús resendar ñehesa mombehu água chupe yuvireco. ²⁰ Ahe pendar omombita pota vite tēi yuvireco viña, Pablo rumo ndopita potai aheve. ²¹ Evocoiyase, “Aviye, taso rane” ehiño chupe yuvireco. “Tūpa oipotase cheu, ayeví irira vitu pe piri” ehi.

Ipare oso Efeso sui carite pipe. ²² Oyepotase Cesarea ve, oso Jerusalén ve “avirave” apo água Jesús reroyasar upe. Ipare oso Antioquía ve. ²³ Opita pucu pare aheve, osē, oguata iri Galacia rupi, Frigia rupi opacatu Jesús reroyasar mongueréhi catu água.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandría iguar. Oñeho tupri ai vahe, oicua tupri avei Tūpa Ñehengagüer.

²⁵ Ahe oyembohe vahe avei yande Yar recocuer rese. Omombehu oqueréhisa pipe secocuer ava upe, oporombohe tupri ai avei sese. Ahe

rumo oicua Juan oãpiramo agüer güeraño tẽi. ²⁶ Ahe osiquiyeëhisave judío tûparo pipe omombehu Tûpa Ñehengagüer. Osenduse Aquila, Priscila iñehesa, omombita yuvireco oyepiri. Ahese omombehu tupri catu Tûpa recocuer chupe yuvireco. ²⁷ Oso potase Apolos Acaya coti, ahese Jesús reroyasar Efeso pendar omonguerëhi catu. Oyapo cuachiar Acaya pendar upe imondo yuvireco sese hañeco tupri äqua. Ipare oyepota oso Acaya ve. Aheve oime ava Tûpa guaisusa pipe sui viroya vahe Jesús yuvireco. Ahe ava Apolos oipitiví seroya tupri catu äqua yuvireco. ²⁸ Omboycuea opacatu rovaque judío pihañemoñetasa co coti tẽi vahe. Ahese opa osecopi oñeho pipe ahe ava. Esepia, Tûpa Ñehengagüer pipe omboycuea ité: “Jesús Tûpa Rembiporavo ava písiro äqua secoi” ehi eté judío eta upe.

19

Pablo omombehu Jesús recocuer Efeso ve

¹ Evocoiyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar. ² Evocoiyase oporandu ahe ava upe:

—¿Peipisi vo Espíritu Santo pe piha pipe peroyase Jesús? —ehi chupe.

—Ore ndorosendui eté aipo Espíritu Santo resendar ñehesa —ehiño yuvireco chupe.

³ Ichui oporandu iri chupe:

—Evocoiyase, ¿mbahe nungar vo äpiramosa peipisi? —ehi.

—Juan poroäpiramosa oroipisi —ehi ahe ava yuvireco chupe.

⁴ Evocoiyase aipo ehi ahe ava upe:

—Juan niha oñapiramo acoi omboasi vahe oangaipa oyevise Tûpa upe. Ipare rumo omombehu ava upe: “Peroya ahe eté vahe ou vaherã che raquicuei” ehi. Ahe ou vaherã, “Jesús upe” aipo ehi —ehi Pablo chupe.

⁵ Osenduse Pablo ñehe, opacatu oñearipamo uca Jesucristo rer pipe yuvireco. ⁶ Omondose Pablo opo iharive yuvireco, ahese ogüeyí Espíritu Santo, oique ipiha pipe yuvireco. Ipare aviyeteramo tẽi oñeho ambuae ñehesa pipe iyavei omombehu Tûpa suindar ñehesa yuvireco. ⁷ Ëgüe ehi Tûpa ahe doce mbia yuvirecoi vahe upe.

⁸ Mbosapi yasi rupi Pablo oique omombehu Tûpa Ñehengagüer judío upe osiquiyeëhisave itûparo pipe ipihañemoñeta rerova äqua Tûpa mborerecuasa resendar reroya äqua rese. ⁹ Amove rumo judío ipihavíracua ité seroyaëhi äqua yuvireco. Ipipe iñehe-ñehe tẽifio co tecocuer ipiasu vahe mombehusa rese yuvireco ava rehii rovaque. Evocoiyase Pablo oyepipi ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñeho yepi. ¹⁰ Ëgüe ehi ñuvirío aravíter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. ¹¹ Tûpa omundo güeco píratasa Pablo upe poromondiisa apo äqua. ¹² Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera äqua. Caruguar avei opa yuvinose yuvireco ichui.

¹³ Amove oime judío oguata vahe ocar rupi caruguar mose äqua ava sui. Sese nara oiporu pota yande Yar Jesús rer yuvireco.

¹⁴ Evocoiyase aipo ehi caruguar upe: “Pablo Jesús recocuer omombehu vahe rer pipe, ‘Peyepepi co mbia sui’ ahe pẽu” ehi. Ëgüe ehi pota avei siete Esceva rahir mbahe apo yuvireco viña. Ahe iyesupa

judío pahi rerecuar secoi. ¹⁵ Caruguuar rumo omboyeví chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño caruguuar chupe.

¹⁶ Aheseve ahe cuimbahe caruguuar vireco vahe opo ipāhuve oso. Opacatu opíratasa pipe opa ité osecopi siete mbia yuvirecoi vahe. Omomara-mara tēi oguayiéhisa pipe imonanipa tupri imondo. ¹⁷ Co mbahe sembiapo réracua opa oyepota opacatu Efeso pendar upe, judío upe, ava ndahei vahe judío upe avei. Evocoiyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

¹⁸ Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco ¹⁹ iyavei setá ipaye vahe Jesucristo viroyase, omonuhapa ocuachiar ombopayesa resendar sapi água opacatu ava rovaque yuvireco. Sapi pare, opa ahe cuachiar reprí vinose yuvireco. Ahe sepri cincuenta mil tupri ari mboraviqui reprí. ²⁰ Ëgüe ehi Tūpa opíratasa pipe ombouvicha oñehengagüer iyavei iñehe píratasa oyecua catu ava rese.

²¹ Ipare Pablo ipihañemoñeta Jerusalén ve oso água ivi Macedonia, Acaya rupi. “Coiye catu aheve che reco viteseve, ichuive che asora Roma ve” ehi. ²² Evocoiyase omondo ñuvirío opítiyiñar Timoteo, Erasto Macedonia ve güenorera. Ahe rumo opita vitemi Asia rupi oico.

Ava Efeso pendar yaívu guasu yuvireco

²³ Ahe ari pipe Efeso pendar yaívu guasu yuvireco co tecocuer ipiasu vahe rese. ²⁴ Aheve mbia Demetrio serer vahe secoi. Ahe oyapo Artemisa rēta rahanga guarePOCHI apopri guarePOCHI pisi água. Ambuae ava mbahe rahanga aposar oipisi tupri avei oporaviqui reprí ipiri yuvireco. ²⁵ Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaivu guasu uca água. “Pe mbia, peicua yayapose mbahe Artemisa nungar, yaipisi tupri yande poraviqui reprí” ehi omboetasa upe. ²⁶ “Peicua avei Pablo opa ovirova ava eta piña Artemisa mboeteisa sui ‘ndahei Tūpa ité’ ohesa pipe yande rembiapo uve. Ndahei rumo cohapeño ëgüe ehi, opacatu Asia rupi ëgüe ehi avei imombehu. ²⁷ Aviyeteramo mbahe tēi oimera yandeu yande poraviquisa mocañi tēi água, tūparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroírora yande rembiapo catuprisa yuvireco” ehi.

²⁸ Osenduse aipo ihe ava yuvireco, oñemoirosa pipe virosapucái aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaívu guasu tēi. Osapucái vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave. ³⁰ Pablo oique pota tēi ava rehii pāhuve, ambuae Jesús reroyasar rumo nomoingue uca potai yuvireco. ³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasave” ehi avei yuvireco chupe. ³² Ñemonuhasave amove ava osapucái pírata ñepei mbahe rese, amove osapucái ambuae mbahe rese. Esepiá, yaívu tēi yuvireco. “¿Mahera vo evocoiyase yañemonuha?”

ehi tēi setá ipāhu pendar yuvireco. ³³ Amove rumo ava rehii pāhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu água ava rehii rovaque yuvireco. Alejandro evo-coiyase omopuha tēi opo ava monguiriri água viña. Osepí pota omu judío ava rehii rovaque viña. ³⁴ Ava rehii rumo oicuase Alejandro judío secose yuvireco. Opacatu guasu osapucai pírata yuvireco. “¡Imboeteprí catu Artemisa yande recua pendar taseco!” ehi pucu-pucu yuvireco. Êgüe ehi ahe osapucai ñuvirío hora rupi rteue yuvireco.

³⁵ Evocoiyase tecua pípendar mbahe cuachiasar oicatuse ava monguiriri água, aipo ehi chupe: “Peyapisaca mbia pe Efeso pendar, ndipoi ava ndoicuái vahe yande Artemisa tūparo rese yande hañecosa iyavei sahanga íva sui oviapi vahe rese avei hañecosa. ³⁶ Ndipoi niha ava, ‘Aní’ ehi vaherā che remimombehu rese. Sese peyemonguiririño, peyapoi rene mbahe pe yapisacaéhisave. ³⁷ Peruño tēi eté co ñuvirío mbia coháve, ndoyapoi rumo mbahe tēi Artemisa upe yuvireco. Nimondai mbahe rese itúparove, ndoviroíroi avei serer yuvireco. ³⁸ Sese Demetrio iyavei oporavíqui vahe supi ahe oñemoirose que ava upe, toyuviraso rane ava recocuer moingatusar upe yuvireco; aheve tomoingatu güecocuer yuvireco. ³⁹ Pemoingatu potase que ambuae mbahe, peso ranera yemomborandusave imoingatu água. ⁴⁰ Mborerecuar revo oyandura yande rembiapo co pipe, ‘¿Mahera peaivu guasu tēi? ¿Che amotaréhimbave tie ëgüe peye?’ ehi tiétera yandeu. Oporanduse yandeu, ndayaicatui chitiétera imboyevi água iñehe chupe. Esepiá niha, co yañemonuha yande remimbotar tēi coháve” ehi chupe. ⁴¹ Aipo ihe pare, omomba aheve oñemonuhasa yuvireco.

20

Pablo guata agüer Macedonia, Grecia rupi

¹ Ava aívu guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve. ² Oguatase Macedonia rupi, omongueréhi-réhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso. ³ Aheve opita mbosapí yasi. Oso potase Siria ve carite pipe, judío ipihañemoñeta mara sereco água rese yuvireco. Oyanduse, carite pipe oso rágürer sui, oyevi iri oso Macedonia ve íví rupi. ⁴ Yuviraso moviro mbia supi, ipāhuve ñepei Berea pendar, Pirro rahir Sópater; ñuvirío Tesalónica pendar, Aristarco, Segundo; ñepei Derbe pendar, Gayo; ñuvirío Asia pendar, Tíquico, Trófimo. Timoteo oso avei supi. ⁵ Evocoí mbia yuviraso Pablo renondeve sáro água Troas ve. ⁶ Pieta pan ndayapepoi vahe hu pare, orosé tecua Filipo sui carite pipe, cinco arí rupi oroyepota Troas ve. Ahe tecuave oropita siete arí rupi.

Pablo Troas ve secoi

⁷ Domingu pipe, ore oroñemonuha pan hu água. Ahese Pablo oporombohe oico pítu mbiter rupi. Esepiá, ahe osé pota ahore ayihive voi ichui. ⁸ Ahe oí ivate vahesave ñemonuhasa pipe setá tataendi. ⁹ Mbía chíhivahe, Eutico serer vahe, metanave oguapi oí. Pablo rumo oñehe pucú iteanga. Evocoiyase omboopesí ahe chíhivahe. Ipare oqué; aviyeteramo tēi oviapi oí ivate vahe mbosapisa sui. Ahese ava ogüeyi sehögür rupi íví sui

yuvireco.¹⁰ Evocoiyase Pablo ogüeyí ou chupe, oñeno oso sese icuhaguã. Ipare aipo ehi Jesús reroyasar upe:

—Pesiuiyei rene; nomanoi moco —ehi.

¹¹ Ipare oyeupi iri oso ombohi pan igua. Ichui oñehe pucu vite. Omomba cõhe senise; ipare oso cute. ¹² Evocoiyase co mbia chihivahe viroyevise secosave, opacatu oyemboviha guasu catu yuvireco. Esepiá, nomanoi eté.

Pablo yuviraso Troas sui Mileto ve

¹³ Pablo oso pota ivi rupi, ore ranengatu rumo oroso carite pipe Aso ve. Aheve oroyepota Pablo reraso água semibotar rupi. ¹⁴ Oroyoepiase aheve, oha carite pipe ore piri. Ichui oroso cute Mitilene ve. ¹⁵ Ahere ayihive carite pipe oroñocua Quío oroso. Ambuae ari rese oroyepota Samos ve. Ichui oroso no oroyepota Mileto ve. ¹⁶ Pablo ipoyava. Esepiá, oipota Jerusalén ve Pentecostés pieta pipe tupri güeco água. Sese Efeso oroñacuasaño oroso.

Pablo ñehesa Jesús reroyasar rârosareta Efeso pendar upe

¹⁷ Mileto ve ore recose, Pablo omondo oñehe Efeso ve ‘toyugüeru Jesús reroyasar rârosar cheu’ oya. ¹⁸ Oyepotase yuvireco chupe, aipo ehi: “Peicua niha che recocuer aviye ité yipisuive ari che reique ramosa resendar co Asia ve. ¹⁹ Ari yacatu rupi aporavíqui yande Yar upe pe pâhuve vichico che reco asiéhisave che yasehosa pipe. Yepe judío che mboguai etepri che recoâhasave pe recuave yuvireco viña,²⁰ che rumo ndaicatui ñehesa aviye vahe mombehuéhi pêu mbahe aviye água yepi. Che opombohe ava rehii rovaque, opombohe avei ñepei-peí pe rëta rupi yepi” ehi. ²¹ “Amombehu ñehesa judío upe, ava ndahei vahe judío upe avei aipo ahe: ‘Pemboasi pe angaipa; peyevi Tûpa upe, peroya avei yande Yar Jesús’ ahe” ehi. ²² “Cûritei asora Jerusalén ve vichico. Aheve che so água Espíritu che cuai che piha pipe. ‘¿Mara ehira pîha yuvireco peve cheu?’ aipo ahe. ²³ Co güeraño che aicua: opacatu tecua che cosa rupi Espíritu Santo aipo ehi cheu che roquenda água iyavei che mombaraísu água yuvireco yepi” ehi. ²⁴ “Ndacherecatéhii rumo cheyese che mano água. Che rumo amboaviye potaño ité che poravíqua Tûpa upe, ahe yande Yar Jesucristo che cuai vahe co ñehesa icatupri vahe mombehu água. Co Tûpa oporoaisusa pipe ombou ñepei vahe Guahir ava písiro água” ehi.

²⁵ “Opa niha Tûpa mborerecuasa amombehu pêu. Che rumo aicua ndache repia iri chira peye. ²⁶ Sese tapeicua cûritei: ndayavii eté che cuaita mboaviye água co tecocuer aviye vahe mombehu pipe pêu. ²⁷ Esepiá, ndaicuacui eté Tûpa Ñehengagüer mombehu; che rumo amombehuño ité opacatu Tûpa recocuer pêu. ²⁸ Sese peñearo tupri, pesâro avei opacatu Jesús reroyasar Espíritu Santo porocuaita rupi. Inungar ovesa rârosar, égue peye tuprira sâro. Ahe Tûpa remimboepi yuvirecoi. Esepiá, Jesús oipiyyere vuvi opacatu ava angaipa repirâ. ²⁹ Aicua che opoeyare, oyugüerura ambuae ava mahembiar oñaro ai vahe nungar pe pâhuve opacatu Jesús reroyasar moçañipa pota água. ³⁰ Oime aveira que ava pe pâhu pendar pe mbopa pota aveira yuvireco pe reraso água oyeupi. ³¹ Sese pemahemoha tupri peyese. Pemahenduha acoi opomboaracua tuprise mbosapi aravíter rupi, pîtu, ari yacatu rupi avei che yasehosa pipe pe rereco” ehi.

32 “Sese, che rívireta, opoeyara Tūpa povrīve iyavei iñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pēu opacatu ambuae güembiporavo reseve. 33 Ndahei pe guarepochi, que oro iyavei pe turucuar pota raisa pipe aso pe pāhuve. 34 Peicua niha acoi che po pipe ité aporavíqui che recove água, che rupindar recove água avei. 35 Ëgüe ahe amboyecua che recocuer pēu. Supi avei ëgüe peyera; yaporavíqui tupri iparaísu vahe rese hañeco água. Pepiñañemoñeta acoi yande Yar Jesús remimombehu rese: ‘Sorivete catu ava iporereco vahe, mbahe oipisi vahe sui’ ehi aracahe” ehi Efeso pendar Jesús reroyasar rārosar upe.

36 Oñehe pare, oñenopiha oyerure água opacatu omborípar reseve. 37-38 Ndoymembóvihai eté, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tēi avei yuvireco saisupave. Ipare yuvirasoño ité yuvireco supi carite yemboyasave.

21

Pablo so agüer Jerusalén ve

1 Evocoiyase oroseyase ore rívireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. 2 Aheve orosepia carite oso vaherā Fenicia ve, ahe ipipe oroha, oroso. 3 Orosasase para guasu oroso, orosepia caha pāhu guasu Chipre serer vahe. Ahe oroñocua yande mbahe rese pocoñhisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya água. 4 Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: “Espíritu Santo oñehe oreu. Evocoiyase eresoi rene Jerusalén ve” ehi yuvireco chupe viña, 5 siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahír reseve-seve ore rupi. Aheve oroñenopihapa ore yerure água. 6 “Aviye, toroso rane” ore he pare chupe yuvireco, oroha carite pipe. Ahe evocoiyase oyevi yuviraso güetave.

7 Tiro sui oroso Tolemaida ve. Oroyepotase, oroso Jesús reroyasar repia água. Aheve oropita ñepei ari. 8 Ahere ayihive oroso Cesarea ve. Aheve oroque, oropita Felipe rēta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pāhuve. 9 Evocoí Felipe víreco irungatu guayri ndomendai vahe. Tayri Tūpa ñehe mombehusr pāve yuvirecoi. 10 Oropítase setá arimi ipiri, ahese oyepota Judea sui mbia Agabo serer vahe oreu. Ahe avei Tūpa ñehe mombehusr secoi. 11 Ouse ore pāhuve, virocua Pablo rumbícuasa ichui. Ipípe ofiapichi opi, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbícuasa yar ãpichi yuvireco iyavei omondora ava ndahei vahe judío upe —ehi Agabo imombehu oreu.

12 Orosenduse aipo ihe, ore, evocoí Cesarea pendar avei, oromombehu Pablo upe: “Eresoi rene Jerusalén ve” orohe tēi chupe. 13 Omboyevírumo oreu:

—¡Mahera peyaseho che rese, ndache mbovihai peye! Che rumo ayemoingatu voi che ãpichi uca água, che mano água rese avei Jerusalén ve yande Yar Jesús recocuer rese —ehi oreu.

¹⁴ Ndoroicatuise ipihañemoñetasa rerova ãgua, oropoiño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoingatu ore so ãgua Jerusalén ve. ¹⁶ Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rētave. Ahe oremoingue oyepíri. Ahe yipive ité viroya yande Yar oico.

Pablo ombori Santiago

¹⁷ Oroyepotase Jerusalén ve, ahe pendar Jesús reroyasar nihapisii ore pisí yuvireco. ¹⁸ Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rārosar Jerusalén pendar. ¹⁹ Pablo, “Avirave” ehi opacatu oñemonuha vahe upe. Ipare omombehu tupri yipisuive oyeupe Tūpa mbahe oyapo uca vahe ava ndahei vahe judío pâhu rupi. ²⁰ Osenduse, omboetei guasu Tūpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iqueréhi vahe Moisés porocuaita aracahendar mboaviye ãgua yuvireco —ehi—. ²¹ Osendu tēi nde rembiapo yuvireco. Omombehu tēi avei aipo nde he yande mu ambuae tecua rupindar yuvirecoi vahe upe: “Peseya Moisés porocuaita. Pembocircuncida iri rene pe rahir. Peico iri rene yande recocuer aracahendar pipe’ aipo ehi tēi oico” ehi nde mombehu yuvireco —ehi Pablo upe yuvireco—. ²² ¿Mara yahera vo? Esepiá, oyandura nde yepotasa cohaye yuvireco. ²³ Aviye catu ereyapora ore porocuaita oromombelu vahe ndeu. Oime irungatu mbia ore pâhuve. Ahe mbia omboaviyera güemimombehu Tūpa upe yuvireco. ²⁴ Eraso co mbia ndeyeupi, eñemoatiro supi eso, emboepi avei mbahe Tūpa upe icuavéhepri. Ahese ahe mbia oicatura oñeaapi yuvireco. Eremboaviyese evocoi mborocuaita, opacatu judío nde reroyara, oicuara ava semira tēise mbahe nde rembiapo rese yuvireco. Oicua aveira, nde ereroya vité Moisés suindar mborocuaita —ehi yuvireco chupe—. ²⁵ Ndoroyocuai rumo ava Jesús reroyasar ndahei vahe judío evocoi nungar mbahe rese. Esepiá, opa icuachiasa chupe: “Pehui rene mbahe mimba yucapri mbahe rahanga tēi upendar seropovéhepri, pehui rene mbahe ruvi, pehui rene mbahe mimba yucapri suví renosepiréhi vahe iyavei peaguasai rene” orohe chupe —ehi yuvireco.

Judío oipisi Pablo tūparo guasu pipe yuvireco

²⁶ Evocoyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tūparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatirosa. Ahese oromondo pota ndeu porerecosa Tūpa porocuaita rupi icuavéhepirā” ehi yuvireco pahi upe.

²⁷ Opa potase evocoi siete ari, judío Asia pendar osepiá Pablo tūparo pipe yuvireco. Ahese omoñemoiro uca opacatu ava rehii tūparo pendar. Ipare ipisise, ²⁸ sâse yuvireco: “¡Ore mu, ore pâlivii peye co mbia oroipisi vahe rese! Esepiá, oguata opacatu rupi. Oñeha tēi yande rese, Moisés porocuaita rese, yande tūparo rese avei iyavei viroique ava ndahei vahe

judío yande tūparo pipe. Sese omonguiha tēi yande tūparo maranehi” ehi yuvireco chupe.

²⁹ Co rese aipo ehi. Esepiá, cuese osepiá Pablo viroguatase Trófimo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tūparo pipe’ oya yuvireco viña.

³⁰ Opacatu Jerusalén pendar ndasorii yuvireco. Cūriteimi ava yuvínoña guasu tūparove. Oipisi Pablo ombotiriri senose tūparo pipe sui yuvireco. Ahese omboya voi guaquicuei tūparo roquenda yuvireco. ³¹ Oyuca potase yuvireco, ahese yaīvu rēracua oyepota sundao rerecuar guasu upe. ³² Cūriteimi serecuar víraso sundao, yuvínoña yaīvu vahe upe yuvíraso. Osepiase ava sundao rerecuar guasu, isundao avei yuvireco, ndoyuvirocua iri Pablo rese yuvireco. ³³ Ahese ahe sundao rerecuar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirío carena pipe” ehi. Evocoiyase oporandu ava upe: “¿Ava vo co mbia? ¿Mbahe vo oyapo pēu?” ehi judío eta upe. ³⁴ Ahese amove ava ñepei mbahe rese oñehe, ambuae, ambuae mbahe rese tēi yuvireco. Evocoiyase sundao rerecuar ndoicatui supi eté vahe mbahe rendu água yaīvu guasu vahe pāhuve. Sese, “Peraso cuartel” ehi. ³⁵ Viroyepotase yeupisave, ichui osupi sundao oachihive seraso yuvireco ava rehii ñemoiró iteangasa sui. ³⁶ Ava rehii rumo yuvírasoño ité saquicuei, “¡Tomano!” ehi pucu-pucu yuvireco chupe.

Pablo oyoepi ava rehii rovaque

³⁷ Omoingue potase Pablo cuartel pipe yuvireco, aipo ehi sundao rerecuar guasu upe:

—¿Iyacatu vo yañemoñeta raimi? —ehi.

Evocoiyase, omboyeví mborerecuar chupe:

—¿Ereicua vo griego ñehe? —ehi—. ³⁸ ¿Ndahei vo nde Egipto pendar, lavasa oyapo vahecuer ereico? Nde revo acoi ereraso oporoyuca vahe pāve cuatro mil tupri ivi iporupirēhisa rupi —ehi sundao rerecuar chupe.

³⁹ Evocoiyase,

—Che judío, tecua Tarso pendar aico. Ahe tecua Cilicia pipendar imboeteipri vahe secoi. Eyapomi mbahe icatupri vahe cheu, tañehemi rane catu ava upe —ehi.

⁴⁰ Evocoiyase mborerecuar, “Aviye” ehi chupe. Ipare opūha yeupisa harive, omopuha opo ava eta monguiriri água. Ahese oyapisaca tupri ava rehii yuvireco. Ahe ava upe oñehe hebreo ñehe pipe aipo ehi:

22

¹ “Che mu eta, peyapisaca, che añehemira che yoepi água pēu cūritei” ehi.

² Oñehe hebreo ñehe pipe. Sese osenduse, oyapisaca tupri catu yuvireco.

³ “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyeroquisave. Aheve ayembohe tupri yande ramoi porocuaita rese. Ahe che mbohesa pipe avei ayembohe Tūpa mboetei água rese vichico inungar pe peico cūritei.

⁴ Che yipindar aseca-seca catu ava co Tecocuer Piásu rupi oguata vahe yamotarēhísave. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco. ⁵ Pahi rerecuar ivate catu vahe iyavei opacatu tecua pendar rerecuar oicua che

reco yuvireco. Ichui niha aipisi cuachiar aru vaherā yande mu tūparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroysar pisi âgua. Ichui tarupa cohabe imombaraisu âgua’ ahe viña.

Pablo omombehu oñecuñaro agüer

⁶ “Evocoiyase aso Damasco ve. Ahe ipiar rupi arovise vicho mbiter ari rupi, aviyeteramo tēi osesape guasu iva sui oreu. ⁷ Ahese aviapi ivive. Asendu avei ñehesa: ‘Saulo, Saulo, ¿mahera vo che amotarēhi etepri eve?’ ehi vahe cheu. ⁸ Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarēhi etepri che rereco eve’ ehi cheu. ⁹ Che rupindar osephia sendiguer, osiquiye avei yuvireco ichui. Ndosendui rumo ñehesa cheundar yuvireco. ¹⁰ Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epūha, eso Damasco ve. Aheve ava opara omombehu mbahe nde rembiaporā’ ehi cheu. ¹¹ Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

¹² “Aheve mbia, Ananías serer vahe, ou cheu. Ahe Tūpa mboyeroyasar ité, viroya tupri vahe avei iporocuaita; sese opacatu judío secua pendar: ‘Co mbia aviye vahe ité’ ehi yuvireco chupe. ¹³ Oyepotase, aipo ehi: ‘Che rivri, Saulo, esareco iri’ ehi. Aheseve iporēhi iri mbahe cheu. ¹⁴ Ipare aipo ehi: ‘Yande ramoi rembieroya, yande Ru Tūpa, nde poravo güemimbotar cua âgua. Oipota avei eresepia vaherā ichuindar ava seco ivi vahe, eresendu aveira iñeha’ ehi. ¹⁵ ‘Nde evocoiyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu. ¹⁶ ‘Evocoiyase, cûritei ndiya iri eresâro’ ehi. Epūha, toroâpiramo. Eporandu yande Yar upe nde reco moatiro âgua nde angaipa sui’ ehi Ananías cheu.

“Tūpa che mundo ava ndahei vahe judío upe” ehi Pablo

¹⁷ “Coije catu, ayevi irise Jerusalén ve, ayerure tūparo guasu pipe. Ahese che quer nungarve asepia mbahe. ¹⁸ Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu. ¹⁹ Che aipo ahe chupe: ‘Che Yar, opacatu che cua nde reroysar roquenda-quendase, ainupa-nupa ucase avei aguatase judío tūparo yacatu rupi’ ahe. ²⁰ Aipo ahe avei chupe: ‘Oyucase Esteban yuvireco, ahe nde recocuer mombehusar, che ahese asepia. Chepihañemoñeta rupi aviyeño oyucase yuvireco. Sese asâro yucasar yeaosa vihâ’ ahe chupe. ²¹ Che Yar rumo omboyevi cheu: ‘Eso, oromondora coi rupi ava ndahei vahe judío pâhuve’ ehi che Yar cheu” ehi Pablo ava rehii upe.

Pablo sundao rerecuar guasu povrive secoi

²² Aipo rupi osendu iñeha yuvireco. Ahese rumo osapucai pîrata yuvireco chupe: “¡Tomano co mbia! ¡Toicove vite iri eme co ivi pipe!” ehi yuvireco chupe. ²³ Osapuca-pucai, osequiipa oyeosa oñemoñombave yuvireco iyavei omombo-mombo ivi cuhi ivate coti yuvireco yamotarêhimbave. ²⁴ Ahese sundao rerecuar guasu omoingue uca cuartelove, aipo ehi osundao upe: “Peinupa, ahese revo omombehura mbahe sui vo sâse ati yamotarêhimbave ava yuvireco chupe” ehi osundao upe. ²⁵ Oñapichise rumo inupa âgua yuvireco, Pablo omombehu ñepei sundao rerecuar upe:

—Yepe che judío, che rumo romano avei aico. ¿Iyacatu pīha peinupara romano chupe mbahe rese poranduēhiseve? —ehi mborerecuar upe.

²⁶ Osenduse iñehe, oso voi omombehu güerecuar upe.

—Eicua catu, aipo mbia romano secoi —ehi.

²⁷ Evocoiyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niña aico —ehi.

²⁸ Ahese sundao rerecuar guasu aipo ehi chupe:

—Che rumo setá guarepochi amondo romano che reco água —ehi.

—Che rumo che ha ramo suive, romano aico —ehiño sundao rerecuar upe.

²⁹ Ahese oinupa pota vahe osíquiyepave oyepepi yuvireco ichui; sundao rerecuar guasu avei oicuase Pablo romano secosa rese, osíquiye ñapichi ucase.

Pablo oyoepi judío porandusa ivate catu vahesave

³⁰ Ahere ayihive sundao rerecuar guasu oicua tupri pota: ¿Mbahe sui pīha judío oyamotarēhi Pablo yuvireco? Evocoiyase oyora. Ahese oyocuai porandusa pendar ivate catu vahe ahe opacatu judío pahi rerecuar, opacatu ambuae judío rerecuar iñemonuha água yuvireco. Ahese oviraso uca Pablo yuvireco chupe.

23

¹ Aheve Pablo omahengatu ava oñemonuha vahe rese ohā aipo ehi chupe:

—Che mu, che rembiapo mbahe tupri Tūpa rovaque areco yepi che piñañemoñeta tuprisa pipe —ehi.

² Ahese Ananías, ahe pahi rerecuar ivate catu vahe, yípi pendar uve, “Peiyurupete” ehi. ³ Ahese Pablo omboyevi chupe:

—¡Tūpa nde nupara, nde aviye tupri tēi angahu vahe ereico! Nde mbahe rese porandu água cheu porocuaita rupi erei. Evocoiyase, ¿mahera ereporocuai che yurupete água mborocuaita mbooyeroyaēhisa pipe? —ehi chupe.

⁴ Yivirindar aipo ehi yuvireco chupe:

—¡Ereñehe rai rutei seroñrosa pipe co Tūpa rembiporavo, co yande pahi rerecuar ivate catu vahe upe! —ehi yuvireco.

⁵ Ahese omboyevi chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

⁶ Ahese oicuase oñemonuha vahe pāhuve amove oime saduceo, amove fariseo. Ahese oñehe pírata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi vaherā curi. Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo oñeñehopoepi-epi yuvireco. Sese oyemboyaho yuvireco. ⁸ Esepia, saduceo ndoviroyai vahe cuerayevisa iyavei “ndipoi Tūpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco. ⁹ Sese sāse guasu yuvireco. Ahese oime amove opūha vahe Moisés porocuaita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tūpa rembiguai revo oyemboyecka mbahe mombehu água chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pāhu sui, pemoingue iri cuartel pipe” ehi.

¹¹ Ahe pītu pipe, yande Yar oyemboyecka chupe aipo ehi: “Eymonguerēhi catu, Pablo, inungar che mombehu nde siquiyēhisa pipe cohabe Jerusalén ve, ēgue ere aveira che mombehu Roma ve” ehi.

Omboguai Pablo yuca água yuvireco

¹² Ahere ayihive setá judío oñemonuha, omboguai Pablo yuca água yuvireco: “Tūpa rovaque ndayayucaise Pablo, ndayacarui chira, ndayaíhui chiaveira; yayucase voi, yacarura, yaihura” ehi yuvireco.

¹³ Ahe ava aipo ehi vahe retacuer setá catu cuarenta sui. ¹⁴ Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tūpa rovaque Pablo; ndorocarui chira ndoroyucaise —ehi yuvireco chupe—. ¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

¹⁶ Pablo rihi rumo oyanduse sēracua, oso cuartelove chupe imombehu.

¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chīhivahe sundao rerecuar guasu upe. Omombehu pota mbahe chupe —ehi.

¹⁸ Evocoiyase mborerecuar vīraso ahe chīhivahe güerecuar upe aipo ehi:

—Pablo soquendaprí oñehe cheu aipo ehi: “Eraso co mbia chīhivahe sundao rerecuar guasu upe” ehi. Co chīhivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, vīroyepepi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoiyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri água ñemonuhasa ivate catu vahesave ayihive yuvireco. “Oroporandu pota iri Pablo upe sembiapo rese” aipo ehi tēira yuvireco ndeu —ehi—. ²¹ Ndereroyai chira ahe iporandusa yuvireco. Esepiá, cuarenta sui setá catu ava oquētiro vaherā yuvireco sese. Omboguai eté yuca água yuvireco. Ndolarui, ndoihui chira aipo ndoyucaise yuvireco. Cūritei oyemoingatu, osāro viteño nde porocuaita yuvireco —ehi mbia chīhivahe chupe.

²² Ipare sundao rerecuar guasu omboyevi imondo, aipo ehi chupe: “Eremombehui rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirío opovri pendar sundao rerecuar upe aipo ehi youcua: “Pemoingatu doscientos sundao Cesarea ve yuviraso vaherā opí rese, ambuae setenta sundao cavayu haríve iyavei doscientos tupri toguata lanza resendar yuvireco. Ipare pesopara pītuse las nueve pipe” ehi. ²⁴ “Pemoingatu uca avei cavayu Pablo yeupi água. Ēgue

peye pesārō tuprira seraso yande rerecuar Félix upe” ehi. ²⁵ Evocoiyase sundao rerecuar guasu oicuachía Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu. ²⁷ Iyavei co amombehu pota ndeu: judío oipisi co mbia yuvireco yuca ãgua viña. Che rumo aicua romano seco rese, aheste araso sundao sepi ãgua judío eta sui ²⁸ ‘¿mbahe rese pīha ndoyambotai yuvireco?’ viya. Sese araso judío porandusa ivate catu vahe pendar upe iñemonuhasave yuvireco. ²⁹ Ahese aicua yamotarēhisa judío porocuaita sui tēi iyavei ndoyapoi mbahe tēi oreu. Sese ndiyai yuca ãgua oreu, soquenda ãgua avei. ³⁰ Ayanduse rumo judío oquētiro sese yuvireco, amondo voi evocoí mbia ndeu. Ipare amombehu yamotarēhisar upe: ‘Peoporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoiyase ahe pītu pipe sundao viroguata Pablo ocuaita rupi yuvireco, viraso Antípatris ve yuvireco. ³² Ahere ayihive sundao yuviraso vahe opí rese oyevi yugüeru cuartelove. Sundao cavayu ari pendar güeraño rumo yuvirasoño vite. ³³ Viroyepotase Cesarea ve, omundo cuachiar mborerecuar guasu upe yuvireco. Aheseye avei Pablo omondo yuvireco chupe. ³⁴ Oyeroquí pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

³⁵ —Oyepotase nde amotarēhisar yuvireco, asendura nde yoepisa —ehi Félix chupe.

Evocoiyase oyocuai opītiyiisar Pablo rāro ãgua güëtave Herodes rembi-apogüer pipe.

24

Pablo oyoepi mborerecuar Félix rovai

¹ Cinco ari pare, Ananías, ahe pahi rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar pītiyiisar oñeha vaherā Pablo amotarēhi uca ãgua, ahe serer Tértulo. Ahe yugüeru Pablo recocuer mombehu ãgua mborerecuar Félix upe. ² Evocoiyase Félix güeru uca Pablo. Ahese Tértulo omboipi sese oñeha aipo ehi Félix upe:

—Nde imboyeroyapri ereico. Aviye ndeu nde porocuai tuprisa rese. Esepiá, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe. ³ Opacatu rupi nde ereyapo tupri vahe orocipisi. Sese, “Aviye ndeu” orohe ndeu, imboyeroyapri Félix. ⁴ Ndomombita pucu potai rumo che ñehe pipe. Sese eyapisaca raimi tēi catu che ñehe rese —ehi—. ⁵ Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca ãgua, ahe Jesús, Nazaret pendar, reroyasar rerecuar —ehi—. ⁶ Viroique avei ava ndahei vahe judío ore tūparo pipe. Ëgüe ehi ore tūparo momara. Sese co orocipisi —ehi—. ⁷ Evocoí sundao rerecuar guasu Lisias rumo oyepota ore pāhuve. Ahe opīratasa pipe vinose ore po sui, ⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo ëgüe orohe chupe —ehi Tértulo.

⁹ Aipo ehi tupri avei ambuae judío yugüeru vahe yuvireco supi. ¹⁰ Ipare Félix oyaiti Pablo upe ‘toñeha’ oyapave. Ahese oñeha:

—Aicua nde ereporocuai setá aravíter ore recua rupi. Sese ayoepira nde rovaque che rorívetesa pipe —ehi Félix upe—.¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Túpa mboetei água.¹² Co judío oicua yuvíreco nañehengatai ava upe tūparo guasu pipe, namboaívu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—.¹³ Co mbia ndoicatui eté mbahe che rembiaivi mombehú seroya tupri água yuvíreco ndeu. ¹⁴ Co rumo amombehú vahe ndeu: che amboetei Túpa, ore ramoi rembieroya Tecocuer Píasu pihañemoñetasa rupi. Co judío upe rumo: “Co porombohesa co cotí tēi vahe” ehi. Che rumo aroya ité opacatu icuachiapí porocuaita pipendar iyavei Túpa ñehe mombehúsar rembicuachiagüer avei —ehi—.¹⁵ Inungar co mbia, ñgue ahe tupri avei aicua Túpa ombogüerayevira ava omano vahecuer seco aviye vahe, ndaseco pōrai vahe avei coiye.¹⁶ Sese ayemoviracua tupri che pihañemoñetasa rereco tupri catu água yepi Túpa rovaque, ava rovaque avei.

¹⁷ “Setá aravíter pare ayeví che recua Jerusalén ve ava iparaisu vahe upe porerecosa mundo água. Ahese avei mbahe mimbá ayuca uca Túpa upe seropovéhe água.¹⁸⁻¹⁹ Evocoiyase moviro judío Asia pendar che repia yuvíreco Jerusalén ve tūparo pipe judío porocuaita rupi che ñemoatiro pare. Ndipoi ahese ava rehii che rupi, namboaívu guasu ucai avei ava. Ahe che repia vahe rumo iya yugüeru ndeu che mombehú, que virecose che amotaréhisa yuvíreco viña.²⁰ Anise, aviyeteramo co oyepota vahe coháve yugüeru, omombehura ndeu que mbahe che rembiaivi yuvíreco pahi rerecular guasu ñemonuhasave che reiquesendar” ehi.²¹ “Co rese revo oñemoiro yuvíreco cheu aipo ahe píratase ipáhuve: ‘Che aroya ava ocuerayevira coiye. Sese che reraso pe rovai co pipe che recoáha água yuvíreco’ ahese” ehi Félix upe.

²² Félix oicua tupri co Tecocuer Píasu. Sese osendu pare aipo ñehesa, ndoyapo pota vitéi mbahe, aipo ehiño ava upe:

—Oyepotase Lisias, ahe sundao rerecular guasu, ahese voi aicua tupri catura aipo mbahe sembiapo —ehi Félix ava upe.

²³ Evocoiyase oyocuai sundao rerecular Pablo rāro água: “Eremon-domira rumo que mbahe semimbotar apo água chupe iyavei imborípar yugüeruse, tihañecoño yuvíreco sese. Ñgue ere sāro” ehi Félix sārosar upe.

²⁴ Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehé Jesucristo reroyasa resendar yuvíreco.²⁵ Pablo rumo omombehuse chupe teco ívisa resendar, teco ñearosa resendar avei iyavei aipo ehise: “Túpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri água, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepochi cheu osé água’ oya viña. Sese osáro pucu tēi. Iyavei setá oyupagüer güeru uca oyeupe oñemoñeta água sese.²⁷ Ñuvirío aravíter pare rumo, Porcio Festo oique Félix recuñara. Ahese Félix judío mbovíha água, oseyá Pablo soquendasave.

25

Festo rovai Pablo imondosa

¹ Mbosapi ari oyepotare Festo osē Cesarea sui, oso Jerusalén ve. ²Aheve oyepotase, pahi rerecuareta, judío rerecuareta avei omombehu Pablo recocuer yuvireco chupe. ³Ipare oporandu chupe: “Emboumi uca Pablo cohabe oreu” ehi yuvireco ‘yayuca perí rupive’ oyapave yuvireco viña. ⁴Festo rumo aipo ehi chupe: “Aní. Esepiá, Pablo Cesarea ve soquendasa oico iyavei che ayevi piaivira vicho aheve” ehi.

—Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara água — ehi Festo chupe.

⁶ Evocoiyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive oguapi güendave ava reco moingatu água oí. Ahese oyocuai Pablo reru água. ⁷Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehu-mbehu tēi Festo upe Pablo rembiapo yuvireco, ndoicatui eté rumo seroya uca água yuvireco. ⁸Esepiá, Pablo aipo ehi oyoepisave:

—Ndayemboangaipai judío porocuaita rese, judío tūparo rese, yande rerecuar guasu Roma pendar Cesar rese avei —ehi.

⁹Festo rumo omboviha pota judío, sese oporandu Pablo upe:

—¿Ndequeréhi vo Jerusalén ve ereso vaherā? Aheve co mbahe nde rembiapo rese aporandura ndeu —ehi chupe.

¹⁰Ahe rumo omboyevi chupe:

—Cûritei aico cohabe romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ericua ndipoi eté mbahe tēi ayapo judío amotaréhisave —ehi—. ¹¹Ayapose que mbahe naporai vahe, aviyeño che yuca uca água eve; ndayapoise rumo co judío omombehu vahe yuvireco ndeu, ndiyai che mundo água evocoi ava povrīve eve. Che rumo aso pota mborerecuar Cesar ivate catu vahe upe cheu mbahe rese porandu água —ehi.

¹²Ahese Festo oñemoñeta opitiviisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoiyase —ehi chupe.

Pablo mborerecuar Agripa rovai

¹³Evocoiyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo água Festo upe yuvireco.

¹⁴Opítase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepei mbia soquendapri oseya vahe Félix cheu —ehi—.

¹⁵Asose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—. ¹⁶Ahese aipo ahe yuvireco chupe: “Ndiyai eté romano mborerecuar omondo vaherā que ava uve sese oñemoñeta vahe rese mbahe moingatuéhi renondeve. Toyoepi rane omombehusar rovai, tomombehu tupri rane opacatu güecocuer” ahe judío upe —ehi—. ¹⁷Sese yugüeruse cohabe yuvireco, aporandu voi pota secocuer rese chupe. Evocoiyase ñepei ari pare aguapi che rendave porandusave. Ahese ayocuai che pítiviisar evocoi mbia reru água —ehi—. ¹⁸Evocoiyase opúha sese oñemoñeta vahe sembiapao ai mombehu água. Asendu renondeve

che pihañemoñeta: "Oyapo revo mbahe naporai vahe" ahe viña. Ndipoi eté rumo mbahe sembiapo —ehi—.¹⁹ Mbahe sembieroya tēi omombehu yuvireco. "Evocoi Jesús omano" ehi ava yuvireco. Pablo rumo aipo ehi imombehu: "Jesús oicoveño ité" ehi.²⁰ "¿Mara ahera pīha co sembiapo moingatu?" ahe tēi. Sese aporandu chupe: "¿Ndequeréhí vo Jerusalén ve mbahe nde rembiapo rese porandu água ndeu?" ahe chupe —ehi—.²¹ Pablo rumo oporandu cheu Cesar upe oso água. Oipota mborerescuar ivate catu vahe oyeupe mbahe güembiapo rese porandu água. Sese asoquenda ucaño vite sereco imondo água Cesar upe —ehi Agripa upe.

²² Evocoiyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³ Ahere ayihive, Agripa oyepota, Berenice rese yugüeru chupe inungar opivondi vahe, ñgue ehi yuviroique mborerescuar ñemoñetasave sundao rerecuar iyavei opacatu tecua pípendar ava seco ivate catu vahe reseve. Ahese Festo oyocuai opítiviisar Pablo reru água yuvireco,²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohabe Cesarea ve. Osapucai pírata tēi yuvireco '¡tomano ité evocoi!' oya yuvireco cheu —ehi—.²⁵ Ndayosui rumo mbahe sembiapo yuca uca água iyavei oporandu oso água mborerescuar ivate catu vahe Cesar upe. Sese che ayemoingatu ité imondo água chupe.²⁶ Ndarecoi rumo mbahe naporai vahe aicuachía vaherā imondo água chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirā sesendar Cesar upe nara —ehi—.²⁷ Chepihañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

¹ Evocoiyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe água aipo ehi:² "Ore rerecuar Agripa, ayoepira che rorivetesave judío che rese ñemoñeta-ñeta tēisa sui mbahe che rembiapoëhí rese nde rovai.³ Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbegüesa pipe che ñehe rese" ehi.

Pablo omombehura güecocuer oñecuñaro viteëhisendar

⁴ "Opacatu judío che cuá vahe yuvireco, oicua tupri che recocuer che chihivahé suive che recuave iyavei Jerusalén ve aicose yuvireco.

⁵ Omombehu potase che recocuer yuvireco viña, aipo ehira: 'Pablo viroya tupri ité fariseo porombohesa. Ahe icuaprí catu yande recua rupí' ehira yuvireco viña.⁶ Sese cüritei che reru nde rovai yuvireco che recocuer rese nde porandu água. Esepia, aroya Tūpa remimombehugüer ore ramoi uve omombehu vahe aracahe" ehi.⁷ "Doce ore ramoi suindar opacatu judío yuvirecoi, osáro vite evocoi Tūpa remimombehugüer aviye vahe yuvireco. Sese yuviroique tūparove ari, pítu pipe avei Tūpa mboetei

água yuvireco. Ore rerecuar Agripa, eyapisaca tupri che ñehe rese. Evoco Túpa remimombehuguer reroyasa sui judío eta semira-mira tēi che amotarēhisave che rese yuvireco” ehi. ⁸ “Iyavei opacatu pe, ¿mahera pe avei ndaperoyai Túpa porombogüerayevisa?” ehi.

Pablo omombehu yipindar Jesús reroyasar amotarēhi agüer

⁹ “Yipindar che avei che pihañemoñeta rai aracaco mbahe tēi apo áqua rese ava Jesús, Nazaret pendar, rer amotarēhisave. ¹⁰ Ëgüe ahe Jerusalén ve. Ombose pahi rerecuar oporocuaita cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voiño ité che” ehi. ¹¹ “Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pipe tēi. Ëgüe ahe aguata opacatu tūparo rupi, ambuae tecua rupi avei yamotarēhisa pipe” ehi.

Pablo omombehu güeco recuñaro agüer

¹² “Evocoiyase aso avei Damasco ve Jesús reroyasar mombaraisu áqua, pahi rerecuar ombose oporocuaita apo áqua cheu” ehi. ¹³ “Mbiter ari rupi rumo, aguatase Damasco piar rupi, asepia mbahe sendí vahe íva sui. Ari sui osesape catu cheu, che rupindar upe avei. ¹⁴ Oroviapipase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evoco mbahe tēi, nde ae ereyemombaraisu’ ehi cheu. ¹⁵ Evocoiyase amboyevi: ‘¿Ava vo nde ereico, mbia?’ ahe chupe. Omboyevi cheu: ‘Che Jesús aico, che niha co che amotarēhi eve. ¹⁶ Epūha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaherā chupe curi, viya ndeu’ ehi. ¹⁷ ‘Oropísirora judío sui iyavei oromondora ava ndahei vahe judío upe. Ereguatase ipāhuve, oropísiro aveira’ ehi cheu. ¹⁸ ‘Oromondora, tache cua yuvireco, che yapave iyavei toguata iri eme pítumimbi vahe nungar rupi; toguata catu tesapesa rupi yuvireco. Ipipe sui toyuvireco iri eme caruguar povrīve yuvireco; toguata catu Túpa rupi; ëgüe tehi che reroya yuvireco. Ahese oipisira ñeroisa oangaipa rese yuvireco iyavei oipisira Túpa porerecosa oime vaherā opacatu che rembipeha rupive’ ehi Jesús cheu” ehi Agripa upe.

Pablo viroya mbahe güembiepia

¹⁹ “Evocoiyase, che rerecuar Agripa, che quer nungarve asepia vahe íva pendar, aroya ité. ²⁰ Aipo ahe ava upe: ‘Pemboasi pe angaipa; peyevi Túpa upe. Peicove tupri, ipipe sui toicua ava yuvireco pe ñecuñarosa’ ahe. Aipo ahe Damasco pendar upe rane añahe, ipare Jerusalén pendar upe iyavei Judea rupindar upe, coye catumi ava ndahei vahe judío upe. ²¹ Sese tēi judío che pisi tūparo pipe che yuca pota yuvireco” ehi. ²² “Túpa che pítiviisa pipe rumo aicoveño ité supi, amombehu-mbehu vite Túpa recocuer opacatu ava seco ívi coti catu vahe upe, seco ívate catu vahe upe avei. Namombehui eté que mbahe co coti tēi Túpa ñehe mombehusar iyavei Moisés, ‘Oimera mbahe avíye vahe’ ihe agüer sui. ²³ Aracahe omombehu yuvireco: ‘Túpa Rembiporavo Poropísiosar omano ranera’ ehi. Ahe rumo yipindar ocuerayevi vaherā omano vahe pāhu sui. Omombehu aveira tesapesa ñepisirosa resendar ore mu judío

yuvirecoi vahe upe iyavei ava ndahei vahe judío upe avei” ehi Agripa upe.

Pablo osecuñaro pota tēi Agripa recocuer

²⁴ Aipo ehise Pablo oñeho oyoepisave, Festo oñehengataño chupe aipo ehi:

—¡Nande mboaracuai moco nde mbahecua vaisa! —ehiño chupe.

²⁵ Ahe rumo omboyevi chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuañisave —ehi Festo upe. ²⁶ Co mborerecuar revo oicua tupri avei che remimombehu. Sese ndasiquiyei opacatu co mbahe mombehu água chupe. Esepiá, opacatu co mbahe yaposa vahe ndahei ñomipri tēi. ²⁷ Ore rerecuar Agripa, ¿ereroya vo evocoí Tūpa ñehe mombehusar rembicuachía? Che aicua ereroya ité —ehi Agripa upe.

²⁸ Ahese Agripa omboyevi chupe:

—Moviro tēi ñehesa ipane cheu Jesús reroya água —ehi chupe.

²⁹ Ahe omboyevi Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ñgue ehi tarahu Tūpa pēu viña che nungar pe reco água. Ndahei chira rumo soquendapirā peico —ehi.

³⁰ Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opúha yuvireco. ³¹ Oyepepi pare, oñemoñeta co cotí aipo ehi yuvireco:

—Evocoí mbia ndoyapoi eté mbahe. Sese ndiyai yucapirā; ndiyai avei soquendapirā viña —ehi yuvireco oyepe.

³² Ahese Agripa aipo ehi:

—Ahe ndoporanduise Cesar upe oso água rese, yamoseño itera niha viña —ehi Festo upe.

27

Pablo imondosa Roma ve

¹ Evocoiyase mborerecuar opihañemoñeta omboyoya yuvireco ore mundo água carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehii rerecuar secoi, ahe yuvirecoi vahe rer Mborerecuar upendar.

² Oroha carite pipe, ahe Adramitio sui yuviraso pota vahe Asia ve. Mbía Tesalónica pendar, Aristarco serer vahe, oha avei ore rupi, ahe secua Macedonia ivi rupi. ³ Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri água yuvireco” ehi chupe.

⁴ Sidón sui orosirise, oroso Chipre ivi rupi ivitu sui ore ñemoha água. Orosó pota tēi ari sosa cotí rupi, ndoroicatui rumo. Esepiá, oipeyu pírata ivitu icotí sui. ⁵ Evocoiyase oroguata para guasu pipe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vaherā Italia ve. Evocoiyase ahe ipipe opa voi ore mboha. ⁷ Ichui oroguata mbegüe setá ari. Oroporavíqu íteanga oreypota água Gnido rovai. Ivitu oipeyu pírata vite. Sese oroyahuva Creta cotí, oroñocua tecua Salmón rovai rupi. Ñgue oruhe oroso Creta cupe rupi. ⁸ Supi yavai rai

ore guata âgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

⁹Ore yepota âgua aheve, setá ari oromocañi. Ahese ivitú naporai catu oreu cute. Esepia, viroví ari naporai catu vahe. Sese Pablo aipo ehi carite pipendar upe:

¹⁰—Mbía, naporai iri chira revo yande guata vîte âgua. Yaguata vitese, yamocañira carite, ivosiita reseve, yande avei eté aviyeteramo yacanî têira—ehi.

¹¹Sundao rerecuar rumo nomboyeroyai iñehe, ahe omboyeroya catu carite reroguatasar, carite yar avei. ¹²Ahe yemboyasa naporai ivitú ai râro âgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasârō ivitú ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

Ivitú ai para guasu pipe

¹³Oipeyu mbegümise ivitú irohi cotí sui, ipihañemoñeta yuvireco, “Yaicatuño ité yande yepota âgua” ehi yuvireco viña. Ahese orosirise ore yemboyasa sui, oroso Creta ivii rupi. ¹⁴Coiyemi têi rumo oyepota ivitú ai oreu Creta cotí sui. Ahe ivitú ai ou norte ique cotí sui. ¹⁵Oyepotase oreu, ndoroicatu iri eté sovañchi. Evocoiyase, “Tayande rerasoño” orohe chupe. ¹⁶Oroñocua caha pâhumi serer Cauda. Ahe oroñocuasave oroviroha sâi ore caritemi ore carite guasu pipe. ¹⁷Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiétera ivi cuhi Sirte serer vahe harive’ oya. Sese opa viroyí imombitasa yuvireco. Ahese ivitú ore reroguataño. ¹⁸Ivitú rumo ombohitú iteanga para guasu. Sese ahere ayihive oporavíqui vahe omboípi carite vosiita mombo yuvireco. ¹⁹Imombosapisa ari pipe, omombo vîte mbahe carite resendar yuvireco. ²⁰Setá ari ndoyecuai ari, yasitata avei oreu. Ivitú ai ndopaiño ité avei. Opa ité ore pihañemoñeta moçanî, “Yacañi têi etera para guasu pipe” orohe viña.

²¹Setá ari ore caruëhi pare, Pablo opûha aipo ehi carite pipendar upe:

—Mbía, ehi acoi che reroya voira peye viña, nayasëise Creta sui, ahese ndipoi chira co mbahe yandeu cûritei viña —ehi—. ²²Cûritei, peyemonguerëhi catuño. Esepia, ndipoi chira yande pâhu pendar omano vahe, carite güeraño rumo ocañi têira. ²³Ayihi pisa oyemoporëhi cheu Tûpa rembiguai semimbou, chupendar che aico, chupe avei aporavíqui. ²⁴Ahe aipo ehi cheu: “Pablo, eresiquiyei rene. Ereyepotaño itera Cesar upe. Tûpa oipisiro aveira opacatu nde rupindar carite pipendar” ehi cheu. ²⁵Mbía, ayeroya Tûpa rese. Esepia, ahe omboaviye itera oñehesa cheu. Sese peyemonguerëhiño —ehi—. ²⁶Yande mohañira rumo imbehí cotí caha pâhumi rese yande mundo —ehi.

²⁷Ñuvirío semana ivitú ore reroguata pare ahe pîtu mbiter pipe para guasu Adriático rupi oroicose, carite pipe oporavíqui vahe ipihañemoñeta yuvireco ‘yarovi revo ivi yaico’ oya. ²⁸Sese osâha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osâha iri, tipigüer veintisiete metros têi. Ahese oicua, “Yaroví ivi” ehi yuvireco. ²⁹Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiye pave omombo irungatu carite mombitasa tuvicha vahe ipive yuvireco. “¡Omocohe voi tarahu Tûpa yandeu viña!” orohe

tēi.³⁰ Oñemi potase oporavíqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco.³¹ Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

³² Ahese sundao eta oyasia caritemi sā oiti ive imondo yuvireco.

³³ Cōhe ramose Pablo aipo ehi opacatu upe:

—Cūritei ñuvirío semana pemomba pecaruëhi peico ‘¿mara yahera pīha co yaico?’ pe hesa pipe.³⁴ Evocoiyase pehuñomi mbahe cute pe ñepisiro água. Acoi ocañise carite, yande rumo nayacañii chira iyavei que ñepei pe ha nocañii chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tūpa upe ihu água. Ahe imbohi pare, ohu.³⁶ Evocoiyase opacatu ava oyemonguerëhi yuvireco ocaru água.³⁷ Ore retacuer doscientos setenta y seis tupri.³⁸ Ore caru pare, oporavíqui vahe opa omombo trigo carite vosiita para guasu pipe iposiñi água yuvireco.

Carite ocañi

³⁹ Cōhese, osepiase ivi, “¿Que pīha yaico?” ehi tēi yuvireco. Oyosuse rumo yācua vahe, ipipe oime ivi cuhi ipiru vahe. Aheve yuviroique pota tēi yuvireco viña.⁴⁰ Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoiyase oroique oroso yācua vahe pipe.⁴¹ Oroguatase rumo, oroyapi ivi cuhi. Aheve carite opāha ité sese. Ndoicatui eté seroyevi yuvireco iyavei carite rupita i ohitu vahe opa tupri oyoca.

⁴² Ahese sundao eta, “Aviyeteramo soquendapri ohita tiétera, oñemi yuvireco. Sese yayucapa” ehi yuvireco chupe viña.⁴³ Sundao rerecuar rumo ndoiptai Pablo mano água, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi.⁴⁴ “Ambuae evocoiyase ivirape, carite yecacuer rese toyasecoño yuvinose água ivi rese” ehi. Égüe orohe orosépa ivi rese oroso.

28

Caha pāhu Malta ve Pablo secoi

¹ Ore ñepisiropare, ahese ramo oroicua caha pāhu rer Malta revo rahe.² Ahe pendar ava nihapisii ore repiase yuvireco. Oquí iteanga, sōhisa avei. Ahese oyatapi guasu yuvireco, “Perio, tapeyepuhemi” ehi yuvireco oreu.³ Evocoiyase Pablo omonuha yepeha seru, omondo potase rumo tatave, ahese osē aviyeteramo tēi sacucuer sui mboi ahe eté vahe chupe, oipomama ichuhu.⁴ Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tūpa rumo oichuhu uca mboi upe ‘tomano’ oya” ehi yuvireco viña.

⁵ Ahe rumo omomboño mboi tatave imondo oyesui. Ipare nomomaraiño ité.⁶ Ahe pendar opacatu osāro tēi yuvireco, “Irurura chupe, ahese oviapira, omanora revo” ehi yuvireco chupe viña. Osāro pucu tēi yuvireco, Pablo rumo nimaraiño ité. Ahese, “Ndahei vo co mbia tūpa ité co secoi” ehi tēi yuvireco chupe.

⁷ Evocoiyase mbia Publio serer vahe, ahe opacatu caha pāhu Malta pendar ava rerecuar secoi. Iivi namombriimi ichui. Ahe nihapisií ore repia güetave iyavei ihañeco tupri ai ore rese mbosapi ari rupi. ⁸ Aheve ore recoseve Publio yesupa sohí iteanga ou, sepochiuvi avei. Evocoiyase Pablo oique chupe. Ahese oyeroqui Tūpa upe sese, omondo opo iharive. Ëgüe ehi imbogüera. ⁹ Oyanduse ahe icuera yuvireco, ahese ambuae imbaheasí vahe evocoi caha pāhu pendar yugüeru chupe, ahe ombogüerapa avei. ¹⁰ Ahe pendar oyemboava etepri yuvireco oreu. Ipare ore ha äqua ambuae carite pipe, opacatu mbahe ore guatasa rupi ipaneëhi äqua ogüeru yuvireco oreu.

Pablo oyepota Roma ve

¹¹ Co carite mbosapi yasi osäro vahe ari mbahe tēi vahe pituhu äqua. Ipipe oroso. Ahe carite yugüeru Alejandría sui. Ahe ichí rese ñuvirío itüpa rahanga yuvireco: ñepei rer Cástor, ambuae evocoiyase Pólux. ¹² Ahese oroso oroyepota yemboyasa Siracusa ve. Aheve oropita mbosapi ari. ¹³ Ichui orosé oroso oroyepota Regio ve. Ahere ayihive ivitu oipeyu irohi cotí sui. Sese oroyepota Puteoli ve ambuae ari pipeve. ¹⁴ Aheve orosepia ambuae Jesús reroyasar. Ore mombita güetave yuvireco ñepei semana. Ipare oroso Roma ve ivi rupi. ¹⁵ Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda äqua yuvireco. Sepiase, Pablo, "Aviye ndeu" ehi Tūpa upe. ¹⁶ Oroyepotase Roma ve, sundao rerecuar co cotí omondo Pablo ñepei sundao upe säro uca äqua.

Pablo omombehu Roma ve Tūpa Ñehengagüer

¹⁷ Mbosapi ari pare Pablo omonuha opacatu judío rerecuar Roma pendar. Ahese oñehe chupe:

—Che mu eta, ndayapoi mbahe tēi judío Jerusalén pendar upe, naroïroi avei yande ramoi recocuer viña. Che roquendasa rumo iyavei imondopri aico Romano sundao rerecuar povrive. ¹⁸ Ahe mborerecuar oporandu che recocuer rese yuvireco. Óicuase che recocuer, opoi pota tēi che sui yuvireco viña. Esephia, ndoyosui eté mbahe che rembiapo che yuca äqua yuvireco. ¹⁹ Evocoi judío rumo ndoipotaiño ité chupe. Ahese ayu pota cohabe Cesar upe che yoepi äqua. Nayamotarëhi uca potai rumo che mu Jerusalén pendar Cesar upe —ehi—. ²⁰ Che yoepi äqua oposoho uca. Opomoñeta pota yande remiaro rese. Co Tūpa Rembiporavo ava písiro äqua resendar reroyasa rese carena pipe ñapichimbrí aico —ehi.

²¹ Ahese ahe ava omboyevi yuvireco chupe:

—Ndoroipisii eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—. ²² Opacatu rupi ava viroïro pe rembieroya piasu yuvireco. Sese orosendu pota nde pihañemoñetas —ehi yuvireco chupe.

²³ Oporavó ari iñehe äqua yuvireco. Osupitise ari chupe, setá catu ava oñemonuha yuvireco secosave. Ahese omombehu Tūpa mborerecuasa resendar iyavei Jesús recocuer Moisés porocuaita icuachiapri pipe sui iyavei Tūpa ñehe mombehusar rembicuachía pipe avei 'toviroya yuvireco' oyapave. Ëgüe ehi imombehu ari momba. ²⁴ Amove osendu vahe viroya yuvireco, ambuae rumo ndoviroyai eté yuvireco.

²⁵ Opíhañemoñetasa nomboyoyaise yuvireco, yuvínosepa pota. Ahese aipo ehi ahe ava upe:

—Supi eté Isaías omombehu Espíritu remimombehu pe recocuer resendar pe ramoi upe aracahe aipo ehi:

²⁶ “Eso nde mu pâhuve.

Emombehu aipo ere:

‘Yepe pesendu tēira mbahe viña,
ndapesenducuai chira rumo.

Iyavei pesepia tēira mbahe viña,
ndapemahecuai chira rumo sese’ ere chupe.

²⁷ Esepio, co ava ipiharâtá iteanga seroyaëhisave.

Ndoyemboapisaiño yuvireco.

Iyavei osapívii tupriño mbahe sui, ndosepia potai mbahe aviyé vahe yuvireco.

Ndosenducua catui eté avei ñehesa supi eté vahe.

Evocoiyase ndoyevi potai cheu güecocuer moingatu yuvireco” ehi Espíritu Santo

remimombehu chupe aracahe —ehi—. ²⁸ Sese tapeicua co pipe suive Tūpa omboynecua ucara oporopísirosa ava ndahei vahe judío upe. Ahe niha oyapisacara imombehusa rese yuvireco —ehi chupe.

²⁹ Aipo ihe pare, judío yuvínose iñhe rese oyecopi-copi yuviraso.

³⁰ Ipare Pablo opta ambuae ava rêtave ñuvirío araviter rupi omboepi oque água oico. Aheve nihapisii opacatu ava rese oyepiri oyepotase yepi. ³¹ Omombehu Tūpa mborerecuasa resendar iyavei oporombohe opacatu yande Yar Jesucristo recocuer resendar osiquiyeëhisa pipe. Ndipoi eté que ava omombituhu vahe Pablo ñehese.

PABLO REMBICUACHIA ROMA PNDAR UPE ROMANOS

Pablo mahenduhasa Roma pendar Jesúis reroyasar upe

¹ Che Pablo, Jesucristo rembiguai, aicuachía co che ñehe pēu. Tūpa che poravo apóstol che reco água ñehesa poropísirosa resendar mombehu água.

² Tūpa niha yipisuive omombehu uca co ñehesa ava oñehe mombehusrar upe icuachiapri maranehi pipe aracahe. ³ Ahe ñehesa Tūpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui; ⁴ ocuerayevise oespíritu maranehi pipe, aheste opíratasa pipe omboyecua tupri ité Tūpa Rahir güecosa. Ahe niha yande Yar Jesucristo.

⁵ Ahe ichui Tūpa ombou cheu oporopítiviisa apóstol che reco água, che cuai avei ava ndahei vahe judío upe Guahir recocuer mombehu água opacatu íví rupi sese yeroya uca água ‘ípipe sui toviroya che Rahir yuvireco’ oya. ⁶⁻⁷ Pe Roma pendar peico vahe, pe avei senoipri ipáhuve peico Jesucristo rese peico vaherā. Pe niha Tūpa rembiaisu peico. Oipota avei pe reco catupri água oyeupe nara. Peipisi catu porovasasa, teco tuprisa yande Ru Tūpa suindar, yande Yar Jesucristo suindar avei.

Pablo oso pota Jesúis reroyasar repia Roma ve

⁸ Che yipindar yande Yar Jesucristo rer pipe, “Aviye ndeu” ahe Tūpa upe pe rese. Esepia, opacatu íví rupi icuapri sese pe yeroyasa. ⁹ Iyavei Tūpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico. ¹⁰ Aporanduño ité semimbotar rupi pe piri che so água rese chupe yepi. ¹¹ Esepia, che aso pota ité Espíritu suindar mbahecua mundo pēu pe pítivii água ‘toyemovíracua tupri catu Cristo rese yuvireco’ che yapave. ¹² Che aipota ité yande ñepei-peyi yañepitivii catu água Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tēisa pe piri yepi. Cūritei rumo ndaicatuiño vite ité. Che rumo aipota, “Toime que che poraviquisa sui Cristo rese oyemovíracua catu vahe yuvireco ipáhuve” ahe pēu, inungar opacatu ambuae íví rupi ëgüe ahe ava ndahei vahe judío upe vichico. ¹⁴ Che cuaita ité niha opacatu ava upe che ñehe água, tecua pipendar yuvirecoi vahe upe iyavei ndayaracua vitei vahe upe, imbahecua vahe upe, nimbahecuaí vahe upe avei no. ¹⁵ Sese pe Roma ve peico vahe upe avei ayemongueréhi voi eté co ñehesa písirosa resendar mombehu água.

Ñehesa písirosa resendar píratasa

¹⁶ Che nachí eté co ñehesa písirosa resendar aviye vahe sui. Esepia, ahe Tūpa píratasa opacatu víroyasar písiro água, judío rane yipindar, ipare opacatu ambuae ava-ava tēi avei. ¹⁷ Supi eté co ñehesa omboyecua Tūpa ava reco mbocatuprisa. Oyese yande yeroyasa pipeño ité ëgüe ehi yandeu. Esepia, icuachiapri aracahendar aipo ehi: “Acoi ava seco catupri vahe Tūpa rese oyeroyasa pipe sui oicoveño itera apíréhi” ehi.

Opacatu ava rembiavi resendar

¹⁸ Supi eté niha yande Aposar oñemoirosa ipírata vahe ombou itera iva sui opacatu ava viroyasarëhi upe, ndaseco pôrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco. ¹⁹ Ahe oicua tupri tēi mbahe Tüpa suindar yuvireco. Esepio, Tüpa ité niha omboynecua chupe. ²⁰ Ëgüe ehi eté Tüpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tüpa ité secoi iyavei ipíratasa apirëhi vahe. Sese ava angaipa viyar ndiyai, “Eñemosasoñ tēi rane oreu” ehi vaherä yuvireco chupe. ²¹ Esepio, yepe ahe oicua tēi Tüpa yuvireco viña, nomboetei rumo Tüpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ëgüe ehi tēi vahe rese. Ipípe sui mbahe ndosenducua catu iri eté yuvireco. ²² Yepe, “Ore mbahecua vai” ehi tēi viña, ndoicuai eté rumo mbahe ipipe yuvireco. ²³ Esepio, ahe Tüpa nomanoi vahe seco porañete vahe mboetei rägür sui, omboetei ava ocañi tēi vaherä rahanga yuvireco iyavei vîrai, opacatu mbahe mimba, mboi tēi avei omboetei yuvireco.

²⁴ Sese Tüpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiñisa pipe yuvireco. ²⁵ Esepio, mbahe supi vahe reroya rägür sui temira tēi viroya catu yuvireco. Iyavei Tüpa ité mboyeroya rägür sui omboetei catu mbahe sembiapocuer tēi yuvireco. Yaposar ité ru timboeteisa catu yepi.

²⁶ Sese Tüpa opoi eté ichui, “Toyapoño poromochisa mbahe tēi güemimbotarai pipe yuvireco” ehi chupe. Evocoiyase cuña avei cuimbahe rese güeco rägür sui yuvirecoi oyese ae. ²⁷ Cuimbahe avei cuña rese güeco rägür sui yuvirecoiño avei oyese ae iyavei oipota raiño ité evoco güeco raisa yuvireco. Evoco nungar aposa sui oyemomara ahe ae yuvireco.

²⁸ Iyavei, “Tüpa supi eté vahe” ndehise seroyañhisá pipe yuvireco, Tüpa evocoiyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe. ²⁹ Ahe evocoiyase yuvirecoi opacatu mbahe-mbahe tēi pipe; oyemboaguasa-guasa tēi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tēi ava upe. Ahe oñemoiro ambuae ava mbahe pota raisave tēi, oporapichi, ivava serai, iporombopa serai, ipihañemoñeta ava reco momara ãgua tēi iyavei imahachiroi ai ipípe yuvireco. ³⁰ Iyavei ambuae ava cupe cotive mara ehi-ehi tēi vahe, ahe Tüpa amotarëhisar yuvirecoi, viroïro avei ava, oyemboivate ai, oyeecomboivate ai tēi avei oñehi pipe yepi, oseca-seca tēi mbahe naporai vahe güembaporä, nomboyeroyai avei oyesupa yuvireco, ³¹ ndoyapisaca potai eté Tüpa suindar ñehesa rese, nomboaviyei avei oñehi, ndosaisui avei que ava, niñeroi avei ava upe, ndoiparaísuecreoi eté ava yuvireco. ³² Oicua tēi Tüpa “oimera evoco nungar aposar upe cañisa” ehi vahe, oyapo vîteño rumo mbahe tēi yuvireco iyavei ambuae ava oyapose mbahe tēi, ovihareteño sepiase yuvireco.

2

Tüpa omondo ava upe sembiapogüer rupi tupri ité

¹ Oimese que pe pâhu pendar ‘co oyapo mbahe tēi; tocañi’ ohesave ambuae upe, ahese ahe ae oyemocañi tēi uca. Esepio, ahe inungar tupri avei. ² Yaicua rumo Tüpa omocañise evoco nungar mbahe tēi aposar

recocuer, ahe evocoiyase oyapo mbahe supi tupri vahe. ³ Pe opase ava recocuer pesenoi, pe avei rumo ēgue peye tupri peico. Pe avei eté evocoiyase ndapeñemi chietera Tūpa ñemoirosa sui. ⁴ ¿Peroiro tie Tūpa oyapo vitese mbahe aviye vahe oñemosase, seco mbegüe tupri ai vitese avei pēu? ‘Tosecuñaro güecocuer yuvireco’ oyapave rumo ēgue ehi pēu. ⁵ Pe rumo pepiharata viteño ité Tūpa upe pe yevi potaëhi ãgua. Sese pereco catu viteño ité Tūpa ñemoirosa peyese, acoi ari oyepotase Tūpa güeco tuprisa pipe yande renoipara yande mocañi ãgua, anise yande písirø ãgua curi. ⁶ Ahese opara omboepi ñepei-peí yande rembiapogüer rupi yandeu. ⁷ Omboura tecovesa apirëhi vahe yandeu yasecase teco ori, Tūpa suindar poromboeteisa iyavei mbahe apirëhi vahe yande mbahe tupri aposa pipe. ⁸ Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rágüer sui viroya vahe mbahe tēi. ⁹ Judío opacatu mbahe-mbahe tēi aposar ranengatu oiporarara mbahe rasicuer yuvireco, iparera ndahei vahe avei judío. ¹⁰ Tūpa rumo opacatu seco catupri vahe upe omondora imboetei ãgua ‘toipisi teco ori iyavei toyuvirecoi mbahe tupri pipe’ oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepi, Tūpa ndayande mboyoaviratii yande rereco. ¹² Ēgue ehi eté, opacatu oyemboangaipa vahe Moisés porocuaita porëhi oyemocañi tēira yuvireco. Acoi oyemboangaipa vahe Moisés porocuaita rereco pipe yuvireco, ahe porocuaita pipe avei opara ocañi tēi porandusave yuvireco coiye. ¹³ Esepi, osenduño tēi vahe porocuaita ndahei seco catupri vahe yuvireco. Viroya vahe ité rumo porocuaita, ahe seco catupri vahe yuvirecoi. ¹⁴ Supi eté acoi ndahei vahe judío yuvirecoi vahe yepe ndovirecoi co porocuaita yuvireco viña, ahe rumo co porocuaita rupi tupri oyapose mbahe, ahe evocoiyase inungar porocuaita vireco vahe yuvireco. ¹⁵ Esepi, güembiaipo catupri pipe omboynecua porocuaita virecose opilha pipe. Opíhañemoñeta pipe avei oyandu porocuaita mboaviyesa. Ahe ipipe avei oyandu mbahe güembiaivi, ichui avei oyemonguerëhi mbahe aviye vahe apose. ¹⁶ Ahe ari cañi pipe Tūpa oyocuai ucara opacatu ava rembiapo cuaëhisa reprí pisi ãgua Jesucristo upe, co ñehesa písirø resendar amombehu vahecuer rupi tupri ēgue ehira curi.

Ñehesa judío resendar; Moisés porocuaita resendar avei

¹⁷ Pe rumo, “Judío aico” peye vahe, peyeroya opacatu Moisés porocuaita mboaviyesa pipe pe reco catupri ãgua Tūpa rovaque viña. Iyavei ipipe peyecomboivate ai Tūpa rese peicose. ¹⁸ Peicua semimbotar. Ahe porocuaita pe mbohe avei mbahe aviye catu vahe poravo ãgua. ¹⁹ Pe, “Aicatu ité ndasesapisoí vahe nungar ava ndayaracuai vahe mboaracua iyavei ava angaipa viyar pítumimbi vahe nungarsave tēi resape ãgua” peye tēi. ²⁰ “Aicatu avei ava mbahe ndosenducuai vahe mboaracua iyavei ava chihivahemi nungar mbohe ãgua. Esepi, areco co mborocuaita vireco vahe opacatu mbahecusa iyavei mbahe supi tupri vahe ité” peye tēi avei. ²¹ Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaëhi ãgua, ¿mahera ru pe ae avei permonda no? ²² Pe, “Ndiyai pe aguasa” peye; pe teietet avei rumo ēgue peye. Ndapesepia potai eté mbahe rahanga; pe avei rumo opa peñomi mbahe sepí vahe itúparo pipe sui. ²³ Peyeecomboivate ai co mborocuaita rerecosa rese; ndapemboetei

rumo Tūpa ipipe ahe mborocuaita mboaviyeēhi pīpe. ²⁴ Supi eté icuachi-apri aracahendar pipe aipo ehi: “Pe sui tēi ava ndoicuai vahe Tūpa iñehe-ñehe tēi serer maranehī rese yuvireco” ehi.

²⁵ Supi eté co tecocuer cuacula circuncisión resendar ahe aviyere angara pēu, pero ya tupri itese Moisés porocuaita viña. Ndaperoya tupriise rumo, pe evocoiyase inungar ndapeyembocircuncidai vahe peico. ²⁶ Acoi ava ndoyembocircuncidai vahe, ahe rumo viroyase porocuaita, ahe seroyapri inungar imbocircuncidapri yuvireco. ²⁷ Acoi ndoyembocircuncidai vahe, oyapose rumo mborocuaita yuvireco, ahe evocoiyase omombehura pe cañi ãgua yuvireco. Esepiá, yepe pereco Tūpa porocuaita viña, pe rumo ndapemboaviyei eté. ²⁸ Judío supi eté vahe yaicose, ndahei yande yesupa judío recocuer rupi güeraño ñgue yahera. Iyavei circuncisión supi eté vahe ndahei yande retecuer rese güeraño tēi avei no. ²⁹ Judío ete ité rumo ophá pīpe ité viroya Tūpa. Iyavei circuncisión supi eté vahe, Espíritu rembiapo yande piha pīpe, ndahei porocuaita icuachiapri rembiapo tēi. Evocoiyase judío supi eté vahe oipisira omboeteisa Tūpa suindar ité, ndahei ava tēi suindar.

3

¹ Evocoiyase, ¿mbahe vo co aviyé judío yande reco ãgua? ¿Yande yembocircuncidasa pīha aviyera? ² Supi eté. Esepiá, yipindar Tūpa omondo oñehe judío eta upe imboaviye ãgua. ³ Amove yepe ipāhu pendar nomboaviyeise ocuaita viña, ¿Tūpa avei tie ñgue ehira? ⁴ ¡Aní eté! Tūpa rumo supi tupri vahe ité secoi, yepe que ava opacatu semirañete ai tēi yuvireco. Esepiá, icuachiapri aracahendar pipe aipo ehi:

“Supi tupri vahe Tūpa’ ehira nde ñehe rese yuvireco.

Sese ereiquese ava porandusave, eresē tupriñora eso ichui” ehi.

⁵ Yande reco rai pipe tēi yamboyecuase Tūpa reco tuprisa, ¿mara yahera vo evocoiyase? ¿“Tūpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tēi viña.) ⁶ ¡Aní eté! Esepiá, Tūpa ndaheise supi tupri vahe viña, ndiyai chietera yande recocuer rese porandupa tupri ãgua chupe viña.

⁷ Aviyeteramo oimera ava aipo ehi vahe: “Yande remira pipe sui tēi ava omboetei catuse Tūpa supi eté vahe, ¿mahera pīha evocoiyase angaipa viyar nungar yande rerecora viña?” ehi. ⁸ “Yayapora ayase mbahe naporai vahe mbahe tupri reime ãgua” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoiyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepiá, opa amboyecua Tūpa rovaque opacatu angaipa viyar yaico que judío, que ndahei vahe judío avei. ¹⁰ Supi eté icuachiapri aracahendar pipe aipo ehi:

“¡Ndipoi eté ava seco catupri vahe, que ñepei angara viña!

¹¹ Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

¹² Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepei angara viña!

¹³ Iñehesa mbahe tēi eté, inungar tuvípa ndasovapisai vahe.

Oñehesa pipe oporombopa yuvireco.

Ahe ñehesa evocoiyase inungar mboi naporai vahe oporomocañi tēi vahe.

¹⁴ Ipípe oñehé rai opihavíracuá íteangasa pipe yuvireco.

¹⁵ Ndayipitii oporapichi água yuvireco.

¹⁶ Setá ava omomara, omombaraisu avei oguatasa rupi yuvireco.

¹⁷ Iyavei ndoicuai eté güeco tupri água yuvireco.

¹⁸ Ndipihañemoñetai eté Tūpa sui osiquiye água yuvireco” ehi.

¹⁹ Yande niha opa yaicua opacatu co mbahe omombehu vahe mborocuaita aracahendar pipe, omombehu co porocuaita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tūpa ñemoirosa pisi água yuvireco’ ohesave aipo ehi. ²⁰ Esepiá, ndipoi chietera que ñepei seco aviyé vahe Tūpa rovaque co porocuaita mboaviye pipe. Ahe mborocuaita rumo oicua uca yande angaipa viyar yande reco.

Cristo rese yande yeroya pipe Tūpa yande písirora

²¹⁻²² Cúritei rumo Tūpa oicua uca yandeu ndahe iri mborocuaita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyaoavii eté. Yipive ité ahe imombehupri secoi porocuaita aracahendar pipe, ñiehe mombehusareta rembicuachiagüer pipe avei. ²³ Supi eté yande opacatu yayapo angaipa, ndayasupitii eté Tūpa reco porañetesa. ²⁴ Ahe rumo oporoaisusa pipe, “Ereyaví mbahe che ñemoirosa pisi água” ndehi iri yandeu. Esepiá, ahe yande písiro uca Guahir Jesucristo upe. Yande rumo ndayamboepii eté yande raisusa chupe. ²⁵⁻²⁶ Tūpa rumo ombou Guahir Cristo oipiyere vaherā vuví yande angaipa rese ñero água. Sese yande yeroya pipe oime ñeroisa yandeu. Ipípe omboyecua güeco ivi tuprisa. Yipisuive rumo güeco asiéhisa pipe oñemosaoñ aracahendar ava angaipa upe; cùritei rumo omboyecua ité güeco ivisa yandeu, seco iviño ité seco catupri vahe yande rerecose Tahir rese yande yeroya pipe.

²⁷ ¡Evocoiyase ndiyai eté yande yeecomboivate ai água sovaque! Esepiá, ndahei porocuaita mboaviye rese égue ehi, ahe rumo Cristo rese yande yeroya pipe égue ehi yandeu. ²⁸ Sese yaicua Tūpa, “Ereyaví mbahe che ñemoirosa pisi água” ndehi iri Cristo rese yande yeroyase yandeu, ndahei mborocuaita mboaviesa sui tēi.

²⁹ ¡Tūpa niha opacatu ité ava Tūpa, ndahei ore judío oroico vahe Tūpa güeraño! ³⁰ ¡Supi eté ñepeiño ité secoi: sese yayeroyase Cristo rese, oyoya guasuño ité, “Ereyaví mbahe che ñemoirosa pisi água” ndehi chira yandeu, yepera imbocircuncidapri viña, anise que ndahei vahe imbocircuncidapri viña no! ³¹ Ndahei rumo, “Égue ehi tēi vahe” yahe evocoí mborocuaita upe Jesucristo reroyasa pipe. Ipípe rumo yamboyecua evocoí mborocuaita égue ndehi tēi vahe.

4

Abraham recocuer sui yembohesa

¹ Iyavei, ¿mara ehi píha yande ramoi Abraham recocuer aracahe?

² Acoi mbahe güembiaipo pipe sui tēi oipisise güeco tupri água Tūpa sui, oyemboivate aira oico ipípe viña. Ndiyai eté rumo égue ehi Tūpa rovaque.

³ Esephia, icuachiapri aracahendar pipe aipo ehi: “Abraham oyeroya ité Tūpa rese. Sese Tūpa, ‘Co seco catupri vahe’ ehi chupe” ehi. ⁴ Co rumo yande yayapose mboravíqui, ahe yaipisi vahe ndahei porerecosa tēi, ahe rumo mboravíqui reprí ité yaipisi. ⁵ Yande rumo, yayeroyase Tūpa rese, Tūpa evocoiyase yande pisira, ‘co seco catupri vahe’ ohesave. Esephia, ahe ēgue ehi vahe ité oyese oyeroya vahe upe, yepe ndoyapoi chira mbahe avíye vahe chupe viña. ⁶ David mborerecuar aracahendar avei ofíehe ava rorivetes rese Tūpa seco catupri vahe nungar pisisa rese. Ahe rumo ndahei mbahe sembiapoguer rese tēi oipisi. ⁷ Ahe aipo ehi aracahe: “¡Sorivete acoi ava Tūpa iñeroise yangaipa rese, iyavei ndoyemomahen-duha irise yangaipa rese chupe!”

⁸ ¡Sorivete avei ava, ‘Nde angaipa viyar ereico’ ndehi irise Tūpa chupe!” ehi.

⁹ Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secoi” ehi Abraham upe oyese iyeroyasa rese. ¹⁰ ¿Marase pīha oipisi oyeupe nara sereco? ¿Oyembocircunda renondeve pīha, anise ipare tie? Yipive ité. ¹¹ “Toicua ava co seco catupri vahe che rese iyeroyase yuvíreco” ehi Tūpa chupe. Sese imbocircundapri secoi. Ēgue ehi Abraham opacatu ava oyeroya vahe Tūpa rese, ndoyembocircundai vahe yesupa nungar secoi. Ēgue ehi Tūpa, “Co seco catupri vahe yuvírecoi” ehi avei ahe ava upe. ¹² Supi eté yande ramoi Abraham opacatu ava oyembocircunda vahe, Tūpa rese oyeroya vahe yesupa avei secoi. Abraham rumo oyeroya vahe Tūpa rese ndoyembocircunda viteiseve.

Tūpa remimombehu imboaviyesara sese yeroysa pipe

¹³ Esephia, aracahe Tūpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuaita mboyeroya pipe ēgue ehi chupe, oyese yeroysa pipe sui eté rumo ahe oipisi ‘co seco catupri vahe’ ohesave. ¹⁴ Supi etese co mborocuaita mboyeroyasar güeraño oipisise co mbahe oime vaherā chupe viña, evocoiyase yande yeroysa Tūpa rese ēgue ehi tēi etera, Tūpa remimombehuguer evocoiyase ēgue ehi tēi vahe aveira viña no. ¹⁵ Esephi, co mborocuaita mboaviyéehisa pipe ñemoirosa oime ava upe. Ndipoise rumo mborocuaita, ndipoi chietera ahe porocuaita mboyeroyaehisa.

¹⁶ Sese mbahe Tūpa remimombehuguer porerecosa yaipisira sese yande yeroysa pipe, ahe semimombehuguer supi tupri vahe opacatu yande Abraham suindar upe nara. Esephia, ndahei mborocuaita mboyeroyasar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoiyase ahe opacatu yande ramoi secoi. ¹⁷ Icuachiapri aracahendar pipe aipo ehi: “Orombou ava eta ivi rupindar ramoirā” ehi. Co Tūpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya água viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté secoi Tūpa ñehe: “Setá oimera ava nde suindar” ehi vahe rupi tupri ité. ¹⁹ Abraham evocoiyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi água yuvíreco viña. ²⁰ Ndopoi eté Tūpa oyeupe ñehesa reroyasa sui. Ahe

rumo oyeroya catu ité sese iyavei omboetei eté. ²¹ “Supi eté Tūpa vireco opíratasa opacatu oñehengagüer mboaviye ãgua” ehiño ité opiha pipe. ²² Sese Tūpa, “Co seco catupri vahe secoi” ehi iyeroyasa rese chupe.

²³ Co ñehesa ndahei Abraham upe güeraño. ²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús. ²⁵ Esepia, ahe imondopri secoi yande angaipa repirā. Ipare Tūpa ombogüerayevi yande pisi ãgua seco catupri vahe nungar oyeupe.

5

Tūpa, “Peyaví mbahe” ndehi iri

¹ Sese yaico mbahe tupri pipe Tūpa, “Peyaví mbahe” ndehi irise yandeu yande Yar Jesucristo rembiapo sui sese yande yayeroyase pipe. ² Esepia, Jesucristo sui niha yareco co Tūpa suindar porovasasa yayeroyase sese. Ipípe avei yayemoviracuaño ité yaico, yayemboviha avei. Esepia, yaicua Tūpa píri yande reco ãgua imborerecuasave. ³ Ndahei rumo sese güeraño yayemboviha, yande yemombaraísusa rese avei niha yayemboviha yaico. Esepia, yaicua ahe yande mbohe yande ñemosá ãgua, ⁴ iyavei yañemosafloose, yasē tuprira yande recoâhasa sui, ahese yaicua yaipisi vaherā mbahe aviyé vahe Tūpa suindar yepi. ⁵ Iyavei ahe yande remiaro nayamoha tēi chira sereco. Esepia, Tūpa ombou ité oporoaisusa yandeu oEspíritu Santo yandeu ombou vahe pipe.

⁶ Yande ae ndayaicatui yande ñepisiro ãgua yande recocuerai sui, Cristo rumo osupitise arí chupe, omano opacatu yande angaipa rese. ⁷ Aviyeteramo oimera que ñepei ava omano vaherā ambuae ava aviyé vahe upe nara; yepe que ava recocuer supi eté aviyé aira viña, seni rumo ndipoi eté que ava, “Che tamano sepirā” ehi vaherā chupe. ⁸ Yepe yande angaipa viyar yaico yipindar, Tūpa rumo omboyecua yande raisusa; ombou Cristo imano ãgua yande angaipa repirā. ⁹ Ipípe sui cûritei, “Peyaví mbahe” ndehi iri chira. Sese nomboui chietera oñemoirosa yandeu. ¹⁰ Esepia, yamotarëhimbar yaico vitese, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoiyase oicatu ité yande pisiyo. ¹¹ Ndahei co reseño ëgüe yahera, yaviha catu aveira Tūpa rese, yande Yar Jesucristo rese avei. Ichui niha ndipo iri mbahe Tūpa rovaque yande rese.

Adán iyavei Cristo resendar ñehesa

¹² Supi eté Adán sui oime angaipa íví pipe, ichui avei oime manosa opacatu ava upe. Esepia, opacatu ité oyapo angaipa yuvireco. ¹³ Ndipo viteise Moisés porocuaita, oime voi eté angaipa co íví pipe. Yepe tie ndicuasa vitei angaipa porocuaita ndipoise viña, ¹⁴ Adán reco sui tupri ité rumo ava omanoño ité oangaipa pipe yuvireco. Ëgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuaita mboaviyeëhisa resendar rese viña. Ahe Adán rese omboyecua mbia ou vaherā.

¹⁵ Tūpa porerecosa ombou vahe rumo yandeu ndahoyoyai eté Adán angaipa rese. Esepia, Adán rembiaví sui setá ava omano; Jesucristo rembiapo sui rumo Tūpa ombou oporerecosa poropísírosa yandeu. Ahe rumo aviyé catu vahe ava eta upe nara. ¹⁶ Ahe ñepei ava angaipa rumo ndoyoyai eté Tūpa poropísírosa ombou vahe rese yandeu. Esepia, ñepei

ava angaipa sui ou Tūpa ñemoirosa; oporerecosa rumo Tūpa ombouño ité ava eta mbahe oyaví atí vahe upe nara yangaipa mocañi âgua. ¹⁷ Supi eté ñepei ava angaipa sui oimeño ité manosa opacatu yandeu. Yande rumo yaipisi mbahe ipírata catu vahe ichui, ahe Tūpa porovasasa tuvichá vahe ité iyavei iporerecosa, “Peyavi mbahe” iheëhisa resendar. Sese yareco ité tecovesa apirëhi vahe yandeyeupe nara ñepei ava sui, ahe Jesucristo.

¹⁸ Evocoiyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiëhi âgua ‘tovireco tecovesa apirëhi yuvireco’ oya. ¹⁹ Esepiá, ñepei ava Tūpa reroayaëhisa sui setá oime ava angaipa viyar; ëgue ehi aveira ñepei ava mboyeroyasa sui setá aveira ava vireco güeco catuprisa Tūpa rese yuvireco.

²⁰ Supi eté porocuaita ouse aracahe, ahese angaipa yaposa catu ité. Yepe ëgue ehi viña, Tūpa porovasasa rumo ivate catu ité ichui. ²¹ Evocoiyase inungar angaipa ipírata yandeu yande mano âgua viña, ëgue ehi avei rumo Tūpa oporovasasa ipírata vahe pipe yande pisi seco catupri vahe nungar yande rereco ‘toipisi tecovesa apirëhi vahe che Rahir Jesucristo rembiapo sui’ oya.

6

Angaipa upe omano vahe nungar yaico; Cristo rese yaicose rumo oicove vahe ité yaico

¹ Evocoiyase, ¿iya iri píha yayapo vite angaipa yaico Tūpa yandeu oporovasasa mboyecua catu âgua? ² ¡Aní chietera! Esepiá, yande niha senosepri angaipa sui. Evocoiyase ndiya iri eté yayapo viteño angaipa yaico. ³ ¿Ndapeicuá vo pe yañeapiramose Jesucristo rer pipe, ndoyavii yamanó vahe ité sese? ⁴ Yande ñeapiramose, aviye acoi ñotimbrí yaico Cristo rupive yande mbogüerayeví iri âgua iyavei yande recocuer mopiasu âgua avei, inungar acoi Cristo ocuerayeví Vu reco píratasa pipe.

⁵ Yande omano vahe nungar yaicose supive, ëgue yahe aveira yande yacuerayeví supi. ⁶ Yaicua avei niha yipindar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tēi nungar yande recoëhi âgua. ⁷ Esepiá, acoi omano vahe ndoyapo iri angaipa yuvireco. ⁸ Yande avei niha omano vahe nungar Cristo rese yaico. Evocoiyase yayeroya avei yaicove vaherá sese. ⁹ Yande niha yaicua, Cristo ñepei reseve ocuerayeví, nomano iri chietera. Esepiá, manosa ndoicatu iri eté chupe. ¹⁰ Supi eté omanose Cristo, omano ñepei reseve opacatu angaipa mocañi âgua; cûritei rumo oicove Tūpa upe nara. ¹¹ Ëgue peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

¹² Sese aní peico vite angaipa píratasavríve pe cuai âgua pe remimbotarai mboyeroyasa pipe. ¹³ Aní peyemondo angaipa upe mbahe tēi apo âgua. Peyemondo catu Tūpa upe. Esepiá, pe inungar ava ocuerayeví iri vahe peico. Sese peyemondo tupri ité Tūpa upe mbahe tupri apo âgua. ¹⁴ Evocoiyase, pe angaipa ndape cuai iri chira pe rereco. Esepiá, ndapeicoi Moisés porocuaita pipe; pe rumo Tūpa porovasasa pipe peico.

Yembohesa mbiguai tēi recocuer sui

¹⁵ Ndayaico iri mborocuaita pipe tēi, yaico rumo Tūpa porovasasa pipe. Evocoiyase, ¿“Tayapo vīte angaipa” yahera pīha? ¡Aní chietera! ¹⁶ Pe niha peicua que ava pemboyeroyase, ipovri pendar evocoiyase peico. Pemboyeroyase Caruguar angaipa apo āgua, ahe evocoiyase pe reco mocañi tēira. Tūpa pemboyeroyase rumo, ahe evocoiyase pe reco mohivira. ¹⁷ Aviye Tūpa upe. Esepia, pe yipindar mbiguai tēi nungar peico angaipa pipe viñā, cūritei rumo pemboyeroya pe pihave ité porombohesa peipisi vahe. ¹⁸ Ñepei reseve pe angaipa sui Tūpa pe renosese, pe evocoiyase mbiguai nungar mbahe supi tupri vahe apo āgua peico. ¹⁹ (Che amboyoya tecocuer mbahe co ivi pipendar rese imombehu pēu. Esepia, yavai vite ité pēu co ñehesa renducua tupri āgua.) Yipindar pe retecuer pereco mbahe tēi pipe mbahe naporai vahe apo āgua. Ēgue peye rumo pe cūritei pe reco mohivi āgua peico mbahe tupri pipe ñepei reseve Tūpa upe pe reco āgua.

²⁰ Pe peico vitese mbiguai tēi nungar pe angaipa pipe, ahese ndapeyapo vītei mbahe supi tupri vahe; ²¹ cūritei rumo pechī tēi ichui, ahe niha ndape pītvī eté pe recocuer rese, iyavei pe reraso pota manosa apirēhi vahesave yepi. ²² Cūritei rumo angaipa sui senosepri peico Tūpa povrīve pe reco āgua. Ichui mbahe tupri oime pēu. Ahe niha ombou oyeupe nara ité pe reco tupri āgua. Ipipe sui peicora apirēhi vaherā. ²³ Angaipa niha ombou manosa tēi yande, Tūpa rumo oporerecosa ombou tecovesa apirēhi vahe yande yande Yar Jesucristo rese yande recose.

7

Mendasa sui yembohesa

¹ Che rivireta, pe niha peicua tupri mborocuaita, peicua avei ahe porocuaita povrīveño ité opacatu yaico yaicove vītese co ivi pipe. ² Esepia, inungar cuña omenda vahe, imer oicove vitese, iporocuaitavrīve vīteño ité secoi yepi. Omanose rumo imer ichui, ahe cuña ndahe iri omer porocuaitavrīve secoi. ³ Acoi cuña omer recove viteseve, vīrecose ambuae cuimbahe, oyemboaguasa tēi evocoiyase; acoi omanose rumo imer ichui, ndaseco iri ipovrīve. Ahe iyacatu ité omenda yupagüe iri; ahese ndahei yaguasa tēi cute.

⁴ Che rivireta, pe niha ēgue peye avei Cristo rese peico vahe; Cristo manosa sui ndahe iri Moisés porocuaitavrīve peico Cristo rese peico āgua. Ahe niha acoi ocuerayevi vahe. Sese yande recocuer ēgue ndehi tēi vahe Tūpa upe. ⁵ Esepia, yande yaicove vītese yande reco ai pipe, ahe porocuaita renduse, yaipota catu mbahe tēi pipe yande reco āgua. Ipare rumo ahe manosave tēi yande reraso ucara viñā. ⁶ Cūritei rumo yande omano vahe nungar yaico acoi porocuaita pipe yaico vahecuer sui. Ēgue yahe, yasē ichui Tūpa upe mbahe apo āgua Espíritu sui yande reco piásu pipe. Ndahe iri mborocuaita icuachiapri yipindar vahe pipe yaico.

Angaipa oime vahe yande rese

⁷ ¿“Tūpa porocuaita angaipa” yahera pīha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuaita ndipoise viñā. Supi eté che ndaicuaise, “Ndapeipota rai chira ambuae ava mbahe” ehi vahe mborocuaita pipe, ahese ndaicuai chiaveira che mbahe pota raisa viñā. ⁸ Aicuase mborocuaita, ahese angaipa ipírata catu

cheu. Ahe mborocuaita apo potaēhisa pipe che querēhi catu opacatu che remimbotarai tēi apo āgua. Esepio, mborocuaita porēhi angaipa aviye ndipoi vahe viña.⁹ Yipindar Tūpa porocuaita ndaicua viteise, ndoyavii aviye vahe ité che reco areco viña. Porocuaita aicuase rumo, aipota rai angaipa apo āgua.¹⁰ Che evocoiyase acañi tēi vaherā aico ipipe viña. Ahe porocuaita che recove apirēhi āgua mbou rāgürer sui, che mondo ucaño itera manosa apirēhi vahe pipe tēi viña.¹¹ Esepio, angaipa ahe porocuaita pipe che mbopa ité. Ahe ipipe avei che mocañi tēira viña.

¹² Evocoiyase co porocuaita ndaseco marai vahe ité, supi tupri vahe ité, aviye vahe avei. ¹³ ¿Co porocuaita aviye vahe pīha che rereco che mano āgua tēi? ¡Aní eté! Angaipa tēi rumo ēgue ehi che rereco. Evocoiyase co porocuaita cuasa sui oipota catu uca mbahe tēi apo āgua cheu. Ipipe aicua angaipa oime vahe che rese. Ēgue ehi avei ahe porocuaita omboye-cua tupri ité angaipa mbahe tēi vahe yandeu.

¹⁴ Yaicua niha porocuaita Tūpa suindar, che tēi rumo imondopri aico angaipa mboyeroya āgua. ¹⁵ Che rumo ahese ndaicuai mbahe oime vahe cheu. Esepio, che remimbotar ayapo pota vahe ndayapoi; mbahe che remimbotarēhi rumo ayapo. ¹⁶ Che rumo ayapose mbahe ndayapo potai vahe, ahese aicua co porocuaita aviye vahe. ¹⁷ Evocoiyase ndahei cheyesui eté ēgue ahe, angaipa tēi rumo ēgue ehi che mbohe uca. ¹⁸⁻¹⁹ Esepio, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicatui eté rumo yapo. Iyavei yepe ndayapo potai mbahe tēi viña, che rumo ayapoño ité. ²⁰ Sese ayapo viteño itese mbahe ndayapo potai vahe, ndahei rumo che ité ayapo, che pīha pipe angaipa oime vahe, ahe tēi rumo oyapo uca cheu.

²¹ Sese che aicua oime che cuaisar che rese. Esepio, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi. ²² Che pīha pipe rumo Tūpa porocuaita aipotá iteanga tēi;²³ che rumo aicua che pīha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbiguai nungar tēi che rereco.

²⁴ “¡Che paraisu ité!, ndaicatu iri eté, ¿uma pīha co mbahe tēi sui che renosera viña?” ahe cheyeupe vichico. ²⁵ Tūpaño ité oicatu Guahir Jesucristo rese. “Aviye” yande Ru Tūpa upe. Ēgue ehi ahese mbahe cheu; Tūpa porocuaita amboaviye pota viña, che remimbotarai tēi rumo che rereco uca angaipa povrive.

8

Yaico vaherā Tūpa Espíritu rese

¹ Cūritei rumo ndipo iri Tūpa ñemoirosa yandeu Jesucristo rese yaicose. ² Esepio niha, Jesucristo rese yaicose, yande cuaisar Espíritu tecovesa mondosar yande renose angaipa povrī sui, manosa sui avei. ³ Esepio, yande remimbotarai rese ndayaicatui Moisés porocuaita mboyeroya āgua, ahe avei evocoiyase ndoicatui eté yande reco moingatu. Tūpa rumo oicatuño ité. Esepio, Guahir ombou yande nungar tupri ité ‘toyemondo ava angaipa repirā’ oya. Ēgue ehi imocañi opacatu yande angaipa yande sui, yande remimbotarai avei. ⁴ Ahe ēgue ehi yande yamboaviye vaherā mborocuaita. Esepio, ndayaico iri yande remimbotar tēi pipe. Yaico rumo Espíritu aviye vahe rese.

⁵ Esepio, acoi yuvirecoi vahe rumo güemimbotar tēi pipe, güecocuerai reseño tēi ipihañemoñeta yuvireco; Espíritu rese yuvirecoi vahe rumo semimbotar rese ipihañemoñeta catu yuvireco. ⁶ Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espíritu suindar mbahe rese, virecora tecovesa apirēhi vahe mbahe tupri pipe yuvireco. ⁷ Esepio, acoi güecocuerai reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatui Tūpa porocuaita mboyeroya âgua yuvireco. ⁸ Ëgüe ehi eté, acoi yuvirecoi vahe güemimbotarai pipe, ndoicatui eté Tūpa remimbotar apo âgua yuvireco.

⁹ Pe rumo ndapeico iri pe remimbotarai pipe. Peico rumo Tūpa Espíritu rese, ahe perecose peyese. Acoi ndovirecoi vahe rumo Espíritu Cristo suindar, ndahei eté chupendar. ¹⁰ Cristo secoise rumo pe rese, yepe pe rete ocañi tēi vaherā angaipa sui viña, pe espíritu rumo oicoveño ité. Esepio, Tūpa, “Peyaví mbahe” ndehi iri pēu. ¹¹ Acoi Tūpa Espíritu secoise pe rese, Tūpa evocoiyase omondora tecovesa piasu pe retecuer upe oEspíritu pe rese secoi vahe pīratasa pipe. Esepio niha, ipipe ité ombogüerayevi Guahir Jesucristo.

¹² Ëgüe ehi che rīvireta, yareco yande cuaita, ndahei rumo yande remimbotarai pipe yande reco âgua. ¹³ Esepio, pe peicoño itese pe remimbotarai pipe, ahese pecañi tēira; pemombopase rumo Espíritu pipe peyesui, ahese peicovera apirēhi vaherā.

¹⁴ Esepio, opacatu Tūpa Espíritu ombohe vahe, Tūpa rahir ité yuvirecoi. ¹⁵ Supi eté pe Espíritu peipisi vahe ndapembosiquíye uca iri pe rereco, ahe rumo pemoingo Tūpa rahir ité pe reco âgua. Ahe avei, “¡Che Ru!” pe mbohe uca chupe. ¹⁶ Co Espíritu avei oicua uca yande espíritu upe Tūpa rahir yande recose. ¹⁷ Evocoiyase yaipisi aveira mbahe yande Ru Tūpa ombou vaherā yandeu; ahe oyoya Cristo reseve yaipisira, Cristo paraísu agüer pipe ité yaicose yareco vaherā teco porañetesu ipiri curi.

Teco porañetesu ou vaherā curi

¹⁸ Cūritei rumo yande paraísusa ndoyoyai eté teco porañetesu yande rese ou vaherā rese. ¹⁹ Opacatu Tūpa rembiapocuer osāro vite ité opacatu oquerēhisa pipe, osepia pota ité teco porañete vahe tahir yuvirecoi vahe rese. ²⁰ Esepio, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ëgüe ehi, Tūpa ité, “Ëgüe tehi” ehi chupe, ombouse angaipa reprí ava upe. Mbahe sembiapocuer rumo osāroño ité ²¹ güeco opa tēi vaherā sui ñepisiro âgua teco porañete vahe Tūpa rahir vireco vahe rupiti âgua curi. ²² Yande niha yaicua aracahe suive opacatu mbahe Tūpa rembiapo oiporara mbaherasicuer yuvireco cuña imembirasi vahe nungar. ²³ Ndahei rumo ahe güeraño ëgüe ehi yuvireco, yande avei ëgüe yahe. Yande yareco ité Espíritu, ahe yipindar vahe yaipisi vaherā ichui curi. Yayemombaraisu, yasāro vite yande querēhisa pipe Tūpa guahir ité yande rereco âgua, yande retecuer recuñaro âgua avei. ²⁴ Esepio, yande niha yañepisiro ité yande remiaro reroya pipe; sese acoi yasepia vahe mbahe yande remiaro, nayasāro iri. Ndipoi ava osāro vite tēi vahe mbahe güembiepia. ²⁵ Acoi mbahe yande remiaro ndayasepia viteise rumo, yasāro vite yande ñemosasa pipe sereco.

²⁶ Ëgüe ehi avei Espíritu yande pítivii ndayaicatu irise. Esepio, ndayaicuai eté mara yahera yayeroqui, co Espíritu Santo rumo oporandu ité Tüpa upe yande rese oyemopoasesa pipe. ²⁷ Iyavei Tüpa, ahe oicua vahe opacatu yande pihañemoñetas, oicuaño ité Espíritu mbahe omombehu pota vahe oyeupe. Esepio, Espíritu oporandu chupe semimbotar rupi yande seroyasar yaico vahe rese.

Yasecopipa itera mbahe tēi

²⁸ Tüpa niha yande poravo güemimbotar rupi. Yepe yaicua mbahe tēi oime yandeu viña, Tüpa rumo opacatu mbahe oyapo yandeu mbahe tupri reime água yande raisusave. ²⁹ Esepio, yipive Tüpa yande cua, yande poravo Guahir Jesucristo nungar ité yande reco água ‘ahe che Rahir tenonde catu vahe tasecoi opacatu ambuae che rahir sui’ oya. ³⁰ Iyavei Tüpa yipisuive ahe yuvirecoi vahe oiporavo. Chupe oñehe oyeupe nara seco água. Ipare, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara yahe irira vo chupe? ¡Tüpa niha yande repasar secoi, sese ndoicatu iri eté yande amotarëhimbar yuvireco! ³² Tüpa niha ombou ité Guahir imano água opacatu yande rese. Sese yaicua ombou aveira opacatu mbahe yandeu yande pítivii água Tahir rese yande recose. ³³⁻³⁴ Sese ndiyai eté ava upe, “Pecañi tēira, peyaví pe recocuer” ihe água yande iporavopri yaico vahe upe yuvireco. Esepio, Tüpa opa omocañi yande angaipa yande sui Cristo omanose sepíra, iyavei ocuerayevise. Cûritei Cristo Vu acato coti, “Co cheundar ité yuvirecoi” ehi yande rese oyerure yepi. ³⁵ ¿Mbahe pîha yande mboyepepira Cristo yande raisusa sui viña? ¿Que yande paraísusa, mbahe yavai vahe yandeu, yande momara-mara têisa, que tieporëhi, anise que yande turucuarâ ndipoise, que mbahe têise yandeu, yande yuca potase tie yuvireco? ³⁶ Inungar icuachiapri aracahendar pipe aipo ehi:

“Oyemoingatu voi ari rupi yande yuca água yuvireco ndeundar yaicose, ovesa yucapirâ nungar tēi yande rereco yuvireco” ehi aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui. ³⁸ Sese che aroya ité Tüpa yande raisu vîteño itera yepi yepe que yamanora, anise que mbahe oime vahe yandeu yande recove vitese. Ndayande mboyepepii chiaveira ichui que Tüpa rembiguai, que seco ivate vahe, seco pîrata vahe ndayasepiai vahe, que cûritei mbahe oime vahe yandeu, anise que mbahe oime vaherâ curi. ³⁹ ¡Ndayande mboyepepii chiaveira que iva pendar mbahe, anise que mbahe ivi pipendar, que ambuae mbahe Tüpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

9

Tüpa oiporavo Israel oyeupe nara arácahe

¹ Che Cristo reroyasar che reco pipe supi eté añahe, ndopombopai. Tüpa Espíritu oicua ité che pihañemoñetas supi vahe. ² Ndavihai eté che piha pipe; oime mbahe tasí vahe cheu yepi. ³ Che aipota tēi opacatu che mu judío ñepisiro água yuvireco viña. “Tacañi tēi Cristo porëhi icañi tēiëhi água yuvireco” ahera viña. ⁴ Ahe niha Israel suindar yuvirecoi, aracahe Tüpa oiporavo vahe guahirguâ. Ahe ipâhuve avei secoi güendigüer porañetesa pipe, iyavei omondo ité oñehe güemimbotar, oporocuaita avei

chupe nara viña ‘tache mboetei oyeruresa pipe che rētave yuvireco’ oya, iyavei, “Amboaviye itera che ñehe pe rese” ehi yuvireco chupe. ⁵ Ahe avei niha yande ramoi yipindar vahe suindar yuvirecoi, Tūpa Rembiporavo Poropísiosar avei ahe ichuindar oyesu vahe. Ahe Poropísiosar niha Tūpa ité, ivate catu vahe secoi opacatu sui. Sese, ¡timboeteisa catu yepi! Ëgüe tehi apirëhi!

⁶ “Tūpa nomboaviyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe. ⁷ Iyavei ndahei opacatu Abraham suindar tahir supi tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe. ⁸ Co rumo osenducua uca yandeu ndahei Abraham suindar yuvinose vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi. ⁹ Esepia, Tūpa Abraham upe aipo ehi aracahe: “Co ari rupi avei ayevira curi, ahese oimera Sara membrí ndeu” ehi.

¹⁰ Ndahei rumo co reseño, tahir Isaac rese avei. Esepia, ocuacuase sembireco Rebeca imembí cõi, ahe icõi vahe yesupa rumo ñepeiño ité. ¹¹⁻¹³ Ahe ndoyuviroha viteise, ndoyapo viteise mbahe que aviyé vahe, que naporai vahe yuvireco, Tūpa aipo ehi ichi Rebeca upe: “Yipindar oha vahe nde membrí ahe ombooyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarëhi” ehi. Sese yaicua iya ité Tūpa upe ava poravo güemimbotar rupi, ndahei seco aviyé vahe rese.

¹⁴ ¿Sese píha Tūpa upe, “Ndaseco tuprii vahe” yahera? ¡Aní eté! ¹⁵ Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi. ¹⁶ Supi eté ndahei yande remimbotar rupi tẽi, ndahei avei yande píratasa rupi Tūpa oyapo mbahe; ahe rumo oporoparaisuerecosa pipe mbahe oyapo yandeu. ¹⁷ Supi eté Tūpa aipo ehi mborerecuar guasu Egípto pendar upe aracahe: “Che oromoingue uca mborerecuar nde reco água che píratasa mboyecua água nde sui, che rer mboetei água avei opacatu ava upe co ivi pipe” ehi. ¹⁸ Ëgüe ehi oporoparaisuereco güemimbotar rupi. Güemimbotar rupi avei omboavai viroya água ava upe.

¹⁹ Aviyeteramo oimera que amove pe pãhu pendar aipo ehi vahe, “Ndiyai evocoiyase Tūpa upe, ‘Pe peyaví mbahe’ he água yandeu. Esepia, ndipoi eté niha ava, ‘¡Aní!’ ehi vaherá Tūpa remimbotar upe” ehira.

²⁰ “Ndiyai eté rumo Tūpa poepí água ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tẽi eve?” ihe água oaposar upe. ²¹ Ñaihu rese oporavíqui vahe rumo güemimbotar rupi oyapora mbahe yuvireco sese. Oicatu ichui aviyé catu vahe apo, oicatu avei ambuae iporupirã tẽi apo água.

²² Tūpa rumo oñemosa pare iya ité oñemoirora, opíratasa mboyecua água ocañi tẽi vaherá upe. ²³ Ëgüe ehi avei yapo güemimbotar rupi güeco porañetesa ivate vahe mboyecua água yandeu. Esepia, yande paraisuereco iyavei yipisuve tecu ori porañetesa omoingatu yandeu aheve yande reique água. ²⁴ Yande avei yande renoi oyeupe, que judío, anise que ndahei vahe judío yande recose. ²⁵ Esepia, Oseas rembicuachiagüer pipe aipo ehi:

“Acoi ava ndahei vahe cheundar, chupe,

‘Cheundar ité’ ahera, iyavei acoi ava ndahei vahe saisupri yuvirecoi, chupe, ‘Che rembiaisu ité’ ahera” ehi.

²⁶ “Pe ndahei vahe cheundar peico’ ehi vahesave, ahe chupe, ‘Tüpa oicove vahe rahir ité’ hesara” ehi.

²⁷ Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tēi rumo oñepisirora yuvireco. ²⁸ Esepio, yande Yar omboaviye voira oñehe ava viroyasarēhi moacañi água co ivi pipe” ehi. ²⁹ Oyoya avei ambuae Isaías remimombehuguer yipindar vahe rese:

“Yande Yar seco pírata catu vahe noipisiroise que moviro yande ramoi yandeu, yacafíipa tēira viña inungar tecua guasu Sodoma, Gomorra reseve yuvireco” ehi.

Judío yuvirecoi vahe iyavei ñehesa písirosa resendar

³⁰ ¿Mara yahera vo evocoiyase? Yaicua ava ndahei vahe judío, yepe ndahei osecá vahe güeco catupri água yuvireco viña, Cristo rese oyeroyasa pipe rumo vireco ité güeco catuprisa Tüpa rovaque. ³¹ Judío yuvirecoi vahe rumo oipota tēi güeco tupri água ité Tüpa porocuaita mboyeroya pipe viña, ndoicatui eté rumo supiti yuvireco. ³² Esepio niha, ndahei oyeroyasa pipe ité oseca oñepisiro água, ahe rumo co mborocuaita mboyeroyasa sui tēi Tüpa rese yuvirecoi pota viña. Ahe evocoiyase ndoyavii oyepiapi vahe “ita yepiapisa” rese yuvireco. ³³ Aipo ehi tupri icuachiapri aracahendar pipe:

“Che amondo Sión ve ñepei ita yepiapisa, ahe oporoeiti vahe.

Acoi sese oyeroyá vahe rumo, nomochi ucai chietera oyesui” ehi Jesús recocuer upe.

10

¹ Che rivireta, che aipota che piha pipe ité iyavei ayerure Tüpa upe che mu judío recocuer rese ‘toñepisiro yuvireco’ che yapave. ² Supi eté iqueréhí ité Tüpa upe mboravíquí apo água yuvireco viña. Oqueréhisa sui rumo oyavi senducuaéhisa pipe yuvireco. ³ Esepio, ndoicua potai mara ehi Tüpa ava pisi oyeupe. Sese oyesui tēi oseca güecocuer tuprisa pipe ‘tomoingatu Tüpa opíha yande pisi água’ ohesave yuvireco viña. Ipipe sui nomboyeroyai eté Tüpa remimbotar güeco mbocatupri água ité yuvireco. ⁴ Esepio, Cristo recocuer pipe imboaviyesa tupri Moisés porocuaita, “Peyaví mbahe che ñemairosoa pisi água” ehiéhí água Tüpa oyece oyeroya vahe upe.

⁵ Co yande reco catupri água porocuaita pipe sui, Moisés aipo ehi icuachía: “Acoi ava omboaviye tupri vahe opacatu co mborocuaita, ipipe sui yuvirecovera” ehi. ⁶ Tüpa, “Peyaví mbahe che ñemairosoa pisi água” heéhí água rumo yande yeroyasa pipe, “Ava vo oyeupira ivave Tüpa Rembiporavo reroyí água” ndapeyei chira. ⁷ Iyavei, “Ava vo ogüeyira omano vahe pâhuve Tüpa Rembiporavo mboyeupi uca água” ndapeyei chiaveira. ⁸ ¿Mara peyera evocoiyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera. ⁹ “Jesús, che Yar” peyese, pe piha pipe peyerojase avei Tu imbogüerayevisa rese, ahese ipisiropri peicora. ¹⁰ Esepio, yande piha pipe yayeroya Jesús rese. Ahese Tüpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipisiropri yaicora.

¹¹ Esepiá, icuachiapri aracahendar pipe Tüpa aipo ehi: “Acoi sese oyeroyá vahe rumo, nomochi ucai chietera oyesui” ehi. ¹² Sese oyoya tupri judío ndahei vahe judío recocuer rese. Esepiá, ñepeñio ité niha Yar opacatu ava upe nomopanei vahe oporovasasa tuvichá vahe oyeupe oporandusar upe. ¹³ Esepiá, icuachiapri aracahendar pipe aipo ehi: “Acoi opacatu osenoi vahe yande Yar rer, ipísipropi yuvirecoira” ehi. ¹⁴ Ava rumo ndoporandui chira písirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehusar yuvireco chupe. ¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: “¡Avíye ai eté acoi ava güeru vahe ñehesa avíye vahe písirosa resendar!” ehi.

¹⁶ Ndahei rumo opacatu che mu judío viroya co ñehesa písirosa resendar yuvireco. Isaías niha aipo ehi avei aracahe: “Che Yar, ¿uma píha viroya ore ñehe yuvireco?” ehi. ¹⁷ Sese yayeroya Jesucristo rese co ñehesa písirosa rendusa pipe.

¹⁸ ¿Osedu píha judío co ñehesa yuvireco? ¡Osedu ité! Esepiá, aipo ehi avei acoi icuachiapri aracahendar pipe:

“Sendusa niha opacatú íví rupi íñehe” ehi.

¹⁹ Iyavei, ¿osenducua píha yuvireco? ¡Osenducuaño ité! Esepiá, yipindar Moisés omombehu icuachiapri pipe aipo ehi:

“Perecatéhira che porovasasa rese oipísise ava ndahei vahe judío iyavei peñemoirora ayapose mbahe avíye vahe acoi ava, ndayaracuau vahe upe” ehi.

²⁰ Ipare omombehu tupri ité Isaías osiquíyeëhisave Tüpa ñehe aipo ehi vahe:

“Acoi ava ndache recai vahe, ahe che pisi ité yuvireco.

Iyavei ayemboynecua acoi ava che rese ndoporandui vahe upe” ehi.

²¹ Judío recocuer rese avei rumo aipo ehi: “Arí rupi añahe tēi ava che reroyasaréhí ndiporeroyai vahe upe vichico” ehi aracahe.

11

Moviro tēi ava Israel pendar Tüpa oiporavo oyeupe nara

¹ Evocoiyase, ¿omombo píha Tüpa ava Israel güembiporavo eta oyesui? ¡Aní eté! Esepiá, che avei niha ichuindar aico. Abraham niha che ramoi eté, Benjamín suindar avei aico. ² Yipisuve ité niha Tüpa, “Co ava cheundar ité” ehi ore ramoi israelita upe. Sese cūritei ndore momboi eté oyesui. Peicua niha acoi Elías resendar icuachiapri aracahendar oyeroquí tēise omu israelita rese aipo ehise Tüpa upe: ³ “Che Yar, nde ñehe mombehusareta opa oyuca yuvireco. Ñdeu porerecosa reropovëhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi. ⁴ Tüpa rumo omboyevi chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi. ⁵ Ëgüe ehi avei cūritei opita viteño moviro judío, ahe niha Tüpa oiporavo oporoaisusa pipe. ⁶ Ipípe ité niha ëgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iiri chira poroaisusa pipe viña.

⁷ Evocoiyase judío eta ndosecái eté mbahe oipotá catu vahe Tüpa suindar yuvireco. Sembiporavo ete ité rumo oipisi yuvireco. Ambuae

upe rumo Tūpaomboavai catu víroya água. ⁸ Icuachiapri pipe aipo ehi aracahe: “Tūpa nomboyecua uca iri mbahe secocuer pipe. Cûritei ëgue ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguã; ipipe ndosenducua ucai mbahe chupe” ehi. ⁹ Iyavei David aipo ehi aracahe:

“Ipietasá ivonde nungar iyavei pira mbohasa nungar tasecoi chupe. Ipipe sui toyuviroha mbahe tēi pipe yuvireco, toyemombaraisu uca avei ipipe yuvireco.

¹⁰ Toicua eme mbahe inungar ndasesapisoí vahe yuvireco.

Icuhapapri nungar ayase toyuvirecoi apiréhi vaherā” ehi.

Ndahei vahe judío ñepisiro agüer

¹¹ Evocoiyase areco iri che porandusa pēu: ¿Apiréhi vaherā ité pīha judío eta ndoyeroyai Jesucristo rese oñepisiro água yuvireco? ¡Aní eté! Ahe rumo ëgue ehi ava ndahei vahe judío písirosa pisi água yuvireco. Ipipe sui oyemongueréhi catura judío ipisi água yuvireco curi. ¹² Evocoiyase judío eta rembiaví sui tuvichá Tūpa poroparaisuerecosa oime opacatu ava ndahei vahe judío up. Coiye rumo tuvicha catu itera Tūpa poroparaisuerecosa opacatu ava upe oyevise yuvireco chupe.

¹³ Che rumo areco che ñehesa pēu pe ndahei vahe judío. Tūpa niha che cuai oñeho mombehu água ndahei vahe judío up. Sese, “Aviye ai eté che poravíquisa” ahe che mu judío rovaque yepi. ¹⁴ Sendusa sui aviyeteramo oimera ipâhuve oyemongueréhi vahe písirosa Tūpa suindar pisi água oyeupe nara yuvireco. ¹⁵ Esepia, judío mombosa pipe sui Tūpa omoime ñerosa opacatu ava co íví pipendar up. ¿Mara ehira pīha evocoiyase Tūpa ipísise? Ahese oipisira tecovesa apiréhi vahe yuvireco, evocoiyase ndoyuvireco iri chira omano vahe nungar Tūpa up. ¹⁶ Esepia, yipindar panguã sui yapopri seropovéhese Tūpa up, opacatu panví evocoiyase sovasapri avei ichui. Iyavei inungar ívira rapo seropovéhese Tūpa up viña, sáca avei evocoiyase opacatu ëgue ehi aveira viña.

¹⁷ Amove che mu judío inungar Olivo räca yasiapri. Pe evocoiyase ndahei vahe judío ívira caha pipendar räca nungar peico vahe, peso yasiapri rendagüerve, ipipe sui peipisi víracuasa pe recove água. ¹⁸ Aní chira rumo, “Yande aviye catu vahe yaico ívira räca nungar yipindar yuvirecoi vahe sui” peye pe yeecomboivate aisa pipe. Esepia, ndahei pe sui judío oipisi oyemoviracua água yuvireco, pe rumo yipindar ichui eté peipisi pe yemoviracua água.

¹⁹ Iyavei, “Co judío rumo imombosa ité ívira räca asiapri nungar yande sendagüerve yapita vaherā” peye revo. ²⁰ Supi eté, co rumo Tūpa reroyaéhi pipe ahe imombosa ichui yuvireco, pe rumo seroya pipe suíño ité pepita sendagüerve. Sese peicua catu, aní chira peyemboivate ai ipipe. ²¹ Esepia, Tūpa oiporavo co judío oyeupe nara ité viña, ndoviroyaise rumo, ndoipisi eté. Pēu avei ëgue ehira ndapemboyeroyaise. ²² Peyapisaca tupri, Tūpa niha aviye vahe ité. Seco pírata vahe avei rumo ava víroyaéhisar up. Pēu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar tēi peicora. ²³ Opoipase rumo judío eta Cristo reroyaéhisa sui, Tūpa evocoiyase víroyevi írira oyeupe nara. Esepia, chupe iya ité ipisi iri água. ²⁴ Pe ndahei vahe judío ívira caha pipendar räca yasiapri nungar peico, Tūpa rumo pe mundo ívira aviye vahe nungar rese. ¡Evocoiyase judío ete

íté inungar ahe ivira aviye vahe rāca yasiapri, ahe ivate catu oipisi irira oyeupe nara!

Ipa vahe judío ñepisiro agüer

25 Che rivireta, che aipota, “Toicua Tūpa remimbotar icuapirēhi oyemboivate aiēhi água yuvireco” ahe pēu. Esepio, amove Tūpa judío upe omboavai viroya água. Ahe rumo, “Tache reroyapa rane íté ndahei vahe judío che rese yuvirecoi pota vahe” ehi vite pēu,²⁶ ahese ramo opacatu ava judío yuvirecoi vahe Tūpa oipisirora. Esepio, icuachiapri aracahendar pipe aipo ehi:

“Oura ava Písicosar judío recua Sión pāhu sui, ahe oipehara mbahe naporai vahe opacatu judío sui.

27 Evoco niha che remimbotar chupe nara, amocañise yangaipagüer yuvireco ichui” ehi.

28 Ëgüe ehi cûritei judío eta ndosendu potai ñehesa písrosa resendar yuvireco. Sese Tūpa amotarēhisar yuvirecoi. Pēu mbahe tupri água rumo ëgüe ehi. Tūpa rumo osaisu vite. Esepio, yipive íté oiporavo tamoi eta oyeupe. ²⁹ Supi eté, Tūpa ndoviroyevi iri eté mbahe güemimondo iyavei ndovirova-rova tēi vahe opihañemoñetasa güembiporavo sui.³⁰ Yipindar niha pe ndapemboyeroyai eté Tūpa. Cûritei rumo judío eta ndoviroyaise yuvireco, pe paraisuereco Tūpa. ³¹ Ëgüe ehi avei judío eta cûritei ndoviroyai yuvireco. Tūpa pe paraisuereco uca água rumo ëgüe ehi yuvireco. Coiye inungar pe, judío avei osupitira Tūpa poroparaisuerecosa yuvireco.³² Esepio, Tūpa íté, “Opacatú oyaví mbahe che reroyaëhisa pipe” ehi ‘oicuase mbahe güembiavi, tiquerēhi opacatú che poroparaisuerecosa pisi água yuvireco’ oya.

33 ¿Mara ehi rutei Tūpa aracuasa, imbahecusa avei? Ndipoi chitera que ava yaracuasa mombehu tupri água. Ndayacatui avei secocuer cuapa tupri água. ³⁴ Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no. ³⁵ Ndipoi que ava mbahe omondo vahe yande Yar upe ‘tomboyevi cheu’ ohesave. ³⁶ Esepio, Tūpa suiño íté niha opacatu mbahe oime, oyeupe nara avei mbahe oyapo opíratasa pipe. ¡Sese imboeteipri íté Tūpa tasecoi yepi! Ëgüe tehi apirēhi.

12

Yande recocuer imondopri Tūpa upe nara

1 Sese che rivireta, che Tūpa poroparaisuerecosa pipe aipota pe yemondo íté pe recoveseve chupe nara, inungar mbahe Tūpa upe seropovëhepri íté, ahe aviye itera chupe. Ahe niha pe cuaita pe piha pipe sui eté peyapo vaherā chupe. ² Peico iri eme co ivi pipendar pihañemoñetasa tēi rupi. Iyacatu rumo pesecuñaro pe pihañemoñetasa. Ipipe sui opacatu pe recocuer oñecuñarora. Ëgüe peyese, peicuara Tūpa remimbotar ahe mbahe aviye vahe, semimbotar supi tupri vahe íté.

3 Tūpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai água rese. Iyacatu rumo peicuara tupri pe pihañemoñetasa peyesendar Tūpa pēu mbahe imbougüer rupi sese pe yeroyasa pipe. ⁴ Inungar yande rete ñepeño íté, sesendar rumo setá, iyavei ndahoyoyai mbahe sembiapo. ⁵ Ëgüe yahe avei yande,

yepe que yande retara viña, Cristo rese yayemboyase rumo, ñepei vahe nungar yaico. Evocoiyase yande ñepei-peí opacatu upendar yaico.

⁶ Tūpa niha omboyeavirati mbahecusa imbou oporoaisusa pipe ñepei-peí upe. Evocoiyase Tūpa ombouse oñehe mombehu ãgua yandeu, yamombehura ñepei-peí iñehe sese yande yeroyagüer rupi. ⁷ Que ombouse mbahecua ambuae ava pítivii ãgua yandeu, yaipítivii tupri aveira. Ombouse yande porombohe ãgua, yaporombohe tupriño itera. ⁸ Iyavei ombouse yandeu ambuae ava mongueréhi ãgua, yaporomongueréhiño itera. Ombouse yande poropítivii ãgua ava mbahe ndovirecoi vahe upe, yamondoño itera mbahe chupe yande recatéhiéhisave. Acoi oporocuái vahe, toyapoño oqueréhisa pipe; iparaísu vahe pítiviisar, toipítiviiño avei vorívetesa pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe avíye vahe pipe. ¹⁰ Peyeaisu catu ñepei-peí oyeivri nungar tupri pe recosa pipe. Pe ae peyemboetei rágüer sui pemboetei catura ambuae ava Jesús reroyasar.

¹¹ Peyemongueréhi, aní ndapequeréhii chira iyavei peyapo yande Yar upe mbahe opacatu pe recoete pipe.

¹² Peicoño pe viharetatesave mbahe íva péndar rārosa pipe; peñemosáño mbahe rasicuer peiporarase iyavei aní chira peseya pe yeruresa yepi.

¹³ Peipítivii ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotaréhimbar rese; peporandu Tūpa porovasasa rese ahe ava upe nara; aní pe avei peñehé mara chupe.

¹⁵ Peyemboviha acoi ava oyemboviha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepei-peí oyese pe yeaisusa pipe. Aní chira peyeecomboivate ai. Iyacatu rumo peyemoingatu ava seco mbegüemi vahe mborí ãgua. Aní peñemoha imbahecua vai vahe nungar.

¹⁷ Aní pēu mbahe tēi aposar upe pemboyevira mbahe tēi avei. Peyapo catu mbahe tupri opacatu ava rembiepiave. ¹⁸ Peicatu vahe rupi peseca pe reco tupri ãgua opacatu ava upe. ¹⁹ Che rivireta, aní pe ae pemboyeví mbahe tēi pipe pe rereco momarasar upe. Peseyaño Tūpa upe. Ahe oicuara chupe. Esepia, icuachiapri pipe aipo ehi: "Che ité aicuara ava mbahe tēi aposar upe. Che amboepira" ehi yande Yar. ²⁰ Iyavei aipo ehi: "Acoi nde amotaréhimbar ndasiepoise, emondo mbahe itohu, iyavei acoi ihuseise, eremondora itohu. Esepia, égüe peyese pe amotaréhimbar upe, ochíra pe sui" ehi. ²¹ Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tupri aposa pipe.

13

¹ Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité. ² Sese acoi mborerecuar upe que mara ehi vahe, Tūpa porocuaita reroyaéhisar yuvirecoi. Égüe ehi vahe inupambri yuvirecoira. ³ Esepia, mborerecuar yuvirecoi vahe ndahei ava seco tupri vahe mbosiquie ãgua yuvirecoi, ahe rumo yuvirecoi ava mbahe tēi aposar mbosiquie ãgua. Ndayasiquie potaise mborerecuar sui,

iya yaicora mbahe tupri pipe. Mborerecuar evocoiyase, “Aviye” ehira yande reco catuprisa rese yandeu. ⁴ Esepia, ahe Tūpa rembiguai mbahe tupri apo âgua yandeu. Acoi mbahe tēi yayapose rumo, yasiquiyera ichui. Esepia, ahese mborerecuar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa âgua yuvireco. ⁵ Sese iya yamboyeroya ité mborerecuar; ndahei rumo ahe yande nupaëhi âgua reseñio, yande pihañemoñetas momaraëhi âgua rese avei. ⁶ Sese avei yamondora guarepochi mborerecuar upe yuvireco yan-deu oporanduse. Esepia, ahe mborerecuar Tūpa rembiguai yuvirecoi. Evocoiyase aheñio ité iporavíquisa yuvireco.

⁷ Yamondo ñepei-peí ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroyapri.

⁸ Aní yandereve. Ahe yande cuaita. Yande cuaita avei yande yeaisu âgua, supi eté acoi ava osaisu vahe ambuae ava, omboaviye ité Tūpa porocuaita. ⁹ Aipo ehi acoi Tūpa porocuaita: “Ndapeyemboaguasai chira, ndapeporoyucai chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuaita sendusa tupri ité co ambuae ñehesa rese: “Pesaisu ava pe yeaisu nungar” ehi. ¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboavíyesa tupri ité porocuaita.

¹¹ Iyavei peicua tupri co mbahe oime vahe yandeu. Cûritei ari osupiti ité yandeu yande yemopoase âgua. Esepia, yande Yar yevi âgua cõimi catu yandeu iñehengagüer yipindar seroyasa sui. ¹² Supi eté osupiti senimi ari yandeu; sese iyacatu yapoi pítumimbi vahe nungar mbahe-mbahe tēi aposa sui mbahe icatupri vahe pipe yande reco âgua. Evocoiyase tayaico sundao oyoepisa omonde vahe nungar. ¹³ Yande catu yaguata yande reco ïvi tuprisa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaícoi chiaveira yande pihañemoñeta ndahoyoyai vahe pipe, ambuae ava mbahe pota raisa pipe avei no. ¹⁴ Iya rumo yarecora yande Yar Jesucristo recocuer yande yese, aní yande pihañemoñeta mbahe-mbahe tēi apo âgua yande remimbotarai pipe.

14

Aní peroíro ambuae Jesús reroyasar

¹ Acoi ava ndoyeroya tupri vîtei vahe yande Yar rese que oiqueso pe piri, peipisi tuprira; aní peiñehoepira ipihañemoñetas ndahoyoyaise pe pihañemoñeta rese. ² Esepia, amove evocoí nungar ava ihupri pâve tēi yuvirohu, oime rumo amove ava ipihañemoñeta opacatu mbahe hu âgua rese. ³ Acoi ava opacatu mbahe ohu vahe, toviroíro eme amove ndohui vahe mbahe iyavei acoi amove ndohui vahe mbahe, toviroíro eme acoi ohu vahe opacatu mbahe. Esepia, evocoí nungar ava Tūpa oipisi ité.

⁴ Supi eté pe ndiyai eté peroíro vaherã ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe tēi pipe, serecuar ité oicuara chupe. Esepia, yande Yar opíratasa pipe osecomoingatuño itera.

⁵ Oime avei amove ava ñepei ari omboetei catu yuvireco ambuae ari sui, iyavei ambuae oime aipo ehi: "Oyoya guasuño ité niha ari" ehi vahe. Ñepei-peí opíhañemoñeta rupi, "Co supi tupri vahe" ehira opíha pipe yuvireco. ⁶ Acoi que ñepei ari ava omboetei vahe, yande Yar mboeteisa pipe rumo ēgüe ehi. Iyavei ohu vahe opacatu mbahe, Yar mboeteisave avei ēgüe ehi. Esepiá, ahe güembiapo rese, "Aviye ndeu" ehi Tūpa upé; iyavei acoi amove ndohui vahe mbahe, Yar mboeteisave ēgüe ehi, iyavei, "Aviye ndeu" ehi avei Tūpa upé.

⁷ Esepiá, yande ñepei-peí ndayaicoi yandeyeupe nara tēi, ndayamanoi avei yandeyeupe nara. ⁸ Esepiá, yaicove vitese, yaico yande Yar upé nara; yamanose, yamano yande Yar upé nara avei. ēgüe yahe yande yaicove vitese, anise yamanose, opacatu chupe nara ité yaico. ⁹ Sese niha Cristo omano, ipare ocuerayevi opacatu ava Yar güeco água que omano vahe, anise que oicove vite vahe upé avei.

¹⁰ ¿Mahera evocoiyase peroíro pe mboetasá Cristo reroyasar iyavei mahera ndapesepia potai? Esepiá, supi eté niha yande opacatú yasora Tūpa rovai. Ahe evocoiyase opara oporandu yande recocuer rese yandeu.

¹¹ Esepiá, icuachiapri aracahendar pipe omombhu:

"Supi eté che reco pipe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco,
ehi" ehi.

¹² Evocoiyase yande ñepei-peí yamombehura yande recocuer Tūpa upé.

Aní pe rívireta mbahe tēi pipe pereco uca

¹³ Sese yande ndiyai yañeroiro. Iyacatu rumo ñepei reseve pereco tupri ambuae pe rívrí, angaipa pipe sereco ucañhi água, iyeroyasa momarañhi água avei. ¹⁴ Che yande Yar reroyasar che reco pipe aicua ndipoi eté que tembihu yande reco momara vahe. Amove rumo ava, "Mbahe tēi co tembihu, ndiyai yahu" ehise, ahe chupe evocoiyase mbahe tēi, ndiyai eté ihu água. ¹⁵ Iyavei yande que mbahe yahuse, ipipe yamomara tēise yande rívrí pihañemoñetasa Tūpa rese, ndahei evocoiyase yande poroaisusa pipe ité ēgüe yahe. ¹⁶ Aní ahe yamocañi tēi uca Cristo sui evocoí nungar mbahe yahu vahesa pipe! Esepiá, secocuer rese Cristo omano. ¹⁷ Yepe que mbahe aviyera yandeu viña, ndayayapoi chira rumo evocoí nungar yande rembiapo rese ava ñehe-ñehe tēiñhi água. ¹⁸ Esepiá, ndahei ivate catu vahe Tūpa upé yande carusa, yande igua avei ipovrīve yande recose. ēgüe ehi rumo co ivate catu vahe chupe yande recocuer mohivisa, yande reco tuprisa ambuae Tūpa reroyasar pâhuve iyavei yande rorivetesá yareco vahe Espíritu Santo sui. ¹⁹ ēgüe yahese Cristo mboeteisave, aviye aira Tūpa upé iyavei opacatu ava rembiepiave avei no.

²⁰ Sese opacatu yande recoeté pipe yasecara yaico tupri vaherá yandeyeupe. Ipípe sui yande yaicatura yañepitiví yande yemoviracua tupri água yande Yar rese. ²¹ Aní pemocañi uca tēi ava recocuer Tūpa remipísiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pihañemoñetasa momara água. ²² Aviye catu ndayahuisse mbahe roho, que ndayaíhuise uva ricuer iyavei que ambuae mbahe ndayayapoise, ambuae ava Cristo reroyasar angaipa pipe seiti uca iriñhi água. ²³ Yande pihañemoñetasa yareco vahe rumo yarecoño itera yandeyeupe ité Tūpa rovaque. ²⁴ Aviye ai catuño ité ava acoi, "Aviye yayapose evocoí nungar

mbahe” he pare, “¿Mara ehi pīha?” ndehi irise opīhañemoñetasa pipe! ²³ Acoi que ava, “¿Mara ehi pīha?” ehise tembihu upe. Ipare rumo ohuse, ahe evocoiyase oyemboangaipa ipipe. Esepiā, ndohui Tūpa rese oyeroysa pipe. Iyavei ava, “¿Mara ehi pīha?” ehi vītese que mbahe upe, ipare oyapose ité, ahe angaipa.

15

Yambovīhara ava yande cotindar; ndahei chira yande ae tēi yayembovīhara

¹ Yande yayemovīracua catu vahe Cristo rese yande yeroysa pipe, iyacatu yande teieté yañemosañora ava Tūpa rese ndipīhañemoñeta tuprī vītei vahe rese. Ndahei chira rumo yande ae tēi yayembovīha. ² Iyacatu rumo opacatu yande yambovīhara ava yande cotindar, yayapo aveira mbahe aviye vahe seco aviye ãgua yuvireco chupe ‘toyeroysa catu opīhañemoñeta pipe Tūpa rese yuvireco’ yande yapave. ³ Esepiā, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tuprī ité acoi omombehu vahe: “Nde rese ñehe-ñehe tēi opa aipisi” ehi. ⁴ Supi eté co opacatu omombehu vahe aracahe opa icuachiasi yande mbohe ãgua, yande yasāro vaherā Tūpa reco po-rañetes yande ñemosasa pipe iyavei yande pihamonguerēhisa pipe avei ahe yareco vahe ichuindar. ⁵ Tūpa, acoi ombou vahe yande ñemosasa, yande pihamonguerēhisa avei yandeu, tape pītvii oyoya guasu pe reco tuprī ãgua ñepei-peí peyece Jesucristo recocuer rupi. ⁶ Ipipe sui pe opacatu oyoya guasu ñepei pe pihanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

Ñehesa pīsirosa resendar imombehusa ava eta ndahei vahe judío upe

⁷ Peyepisi tuprī ñepei-peí, inungar Cristo pe pīsi tuprī oyeupe nara Vu mboetei ãgua. ⁸ Che rumo aipo ahe pēu: Jesucristo ou judío pītvii Tūpa remimombehugüer mboaviye ãgua judío ramoi aracahendar upe. Ëgüe ehi Tūpa oñehe mboavíyesa mboyecua ⁹‘tomboetei ava ndahei vahe judío yuvirecoi vahe che Ru Tūpa iporoparaísuerecosa rese yuvireco’ oyapave. Ahe ëgüe ehi icuachiapri rupi tuprī ité aipo ehi vahe:

“Sese che oromboeteira opacatu ava ndahei vahe judío pāhu rupi, iyavei asapucaira ndeu nde rer mboeteisa pipe” ehi.

¹⁰ Iyavei acoi ambuae icuachiapri pipe omombehu avei no:

“¡Peyembovīha catu pe opacatu ndahei vahe judío peico vahe judío Tūpa rembiporavo reseve!” ehi.

¹¹ Ambuae pipe avei aipo ehi no:

“Pe opacatu ivi pipendar ava, ¡pemboetei yande Yar!” ehi.

¹² Isaías avei aipo ehi icuachía:

“Oimera niha ava Isaí suindar, opacatu ava rerecuarā secoira.

Ava ndahei vahe judío seseño ité oyeroysa yuvireco” ehi.

¹³ Tūpa acoi ombou vahe mbahe oyesuindar rāro ãgua, tayande mboviharete catu iyavei mbahe tuprī tayareco sese yeroyasa pipe. Ipipe sui tombou yasāro vaherā ahe mbahe aviye vahe Espíritu Santo pīratasa pipe.

¹⁴ Che rivireta, ayeroysa ité pe reco avíyesa rese, opacatu mbahe peicuapa tuprī, peicatu avei pe ñepei-peí peyeupe pe yemboaracua ãgua.

¹⁵ Co tecocuer rese rumo aicuachía opacatu che siquieñhisa pipe pēu

pe resaraiéhi água ichui. Esepio, ayapo Tūpa che cuaita ombou vahe che raisusa pipe cheu ¹⁶ Jesucristo rese che poravíqui água ava ndahei vahe judío recocuer aviye água. Evocoiyase judío pahi nungar che cuaisa pipe amombehu co ñehesa Tūpa ombou vahe písirosa resendar yuvireco chupe imoporéhi água Tūpa rovai inungar mbahe seropovéhepri aviye vahe Tūpa upe Espíritu Santo pipe yepi.

¹⁷ Supi eté che Jesucristo reroyasar che recosa pipe aviharete Tūpa che cuaita rese. ¹⁸ Esepio, cheu ndiyai añahe vaherā que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añahe vaherā. Esepio, amongueréhi Tūpa reroya água yuvireco che ñehe rese, che rembiapo sui avei. ¹⁹ Ëgüe ahe poromondiisa mbahe yavai vahe apo Tūpa píratasa pipe. Ahe ayapo Espíritu Tūpa suindar píratasa pipe. Ipípe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no. ²⁰ Chequeréhi avei co ñehesa písirosa resendar mombehu água ava Cristo recocuer ndosendui vahe upe yepi. Ndahei rumo ambuae ava imboaracua pare tēi, ²¹ che rumo ayapo inungar icuachiapri pipe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipihañemoñeta Roma ve oso água

²² Co rese tēi che ndaicatui aso pe piri, yepe setá rupi aso pota tēi viña. ²³ Cûrtei rumo opa amboaviye che poravíqui co ivi rupi, iyavei opa tēi setá araviter pe piri che sosa rágüer. ²⁴ España ve che soseve, apita pucumira vicho pe piri yande yemboviha água. Iyavei pe sui che sé potase, che pítivimira peye aheve che so água. ²⁵ Cûrtei rumo che asora Jerusalén ve. Arasora porerecosa ahe pendar yande mboetasa Jesús reroyasar pítivi água. ²⁶ Esepio, ivi Macedonia pendar iyavei Acaya pendar Jesús reroyasar, ahe omonuha guarePOCHI yuvireco Jerusalén ve yande rivri iparaisu vahe pítivi água yuvireco. ²⁷ Ahe ëgüe ehi güemimbotar rupi yuvireco iyavei iya ité imboyevi água yuvireco chupe ahe mbahe tupri oyeupe apo agüer rese. Esepio, yipindar Jesús reroyasar judío yuvirecoi vahe oicua uca co tecocuer Tūpa suindar ahe ava ndahei vahe judío yuvirecoi vahe upe. Sese iya ité imboyevi água co ivi pipendar porerecosa chupe. ²⁸ Opase che co porerecosa amondo yuvireco chupe, España ve che sose, ahese apitara vicho pe piri. ²⁹ Che amoha voi eté asose eipee, tuvichá omboura Cristo oporovasasa yandeu.

³⁰ Che rivreta, yande Yar Jesucristo rer pipe iyavei yeaisusa Espíritu ombou vahe pipe avei aporandu pêu opacatu che rese peyeroqui pírata vaherā Tūpa upe che pítivi água co mboravíqui rese. ³¹ Peporandu Tūpa upe, tache repi ava Jesús reroyasaréhi sui ivi Judea ve, iyavei Jerusalén pendar yande rivreta co porerecosa pisi tupri água avei. ³² Ahese Tūpa oipotase, che aviharetera ayepotase pe repia, iyavei toime pituhusa yandeu che pe piri che sose. ³³ Ëgüe tehi Tūpa güeco tuprisa pipe tasecoi opacatu pe rese.

16

Pablo mahenduhasa ñepei-peí ava upe

¹ Co yande reindri Febe serer vahe, ahe oipítivií tecua Cencrea pendar Cristo reroyasar oico. ² Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipítiviíño que mbahe chupe ipane vahe rese. Esepio, ahe setá ité oporopítivií iyavei che avei eté che pítivii no.

³ Pemombehu che mahenduha Prisca upe, Aquila upe avei, ahe niha che pítivii mboraviquí Jesucristo recocuer resendar rese yuvireco. ⁴ Ahe avei niha mbahe tēi pipe omondo güecocuer che repicave yuvireco, sese, "Aviye" ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe. ⁵ Pemombehu avei che mahenduha sétave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar. ⁶ Pemombehu avei che mahenduha María upe. Ahe niha oporaviquí iteanga vahe pe recocuer rese. ⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyero ya yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe. ⁹ Pemombehu avei che mahenduha Urbano upe. Ahe niha yande nduguer oporaviquí vahe Cristo recocuer rese, che mborípar Estaquis upe avei. ¹⁰ Pemombehu avei che mahenduha Apeles upe. Ahe niha güecoāhasa sui osē tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo rēta pipendar yuvirecoi vahe upe avei. ¹¹ Pemombehu avei che mahenduha che mu Herodión upe, ava Narciso rēta pipendar yande Yar reroyasar upe avei. ¹² Pemombehu avei che mahenduha Trifena upe iyavei Trifosa upe. Ahe niha oporaviquí vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviquí ité yande Yar upe nara. ¹³ Pemombehu avei che mahenduha Rufo upe, ahe niha icuaprí ité Jesús reroyasar seco rese. Iyavei ichi, ahe che si nungar ité secoi. ¹⁴ Pemombehu avei che mahenduha Asínrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. ¹⁵ Pemombehu avei che mahenduha Filólogo upe iyavei Julia upe, Nero upe iyavei seindri upe, Olimpas upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohabe omondo avei omahenduhasa yuvireco pēu.

¹⁷ Che rivireta, peicua catu pe pāhu pendar omboyaho pota serai vahe sui. Oime ava ēgue ehi vahe, oiti uca vahe ava mbahe tēi pipe. Esepio, ahe ndahei eté co ñhesa pe yembohesa rupi yuvirecoi. Sese evoco nungar ava sui peyepepiño itera. ¹⁸ Esepio, ahe ava ndahei yande Yar Jesucristo upe nara oyapo mbahe yuvireco. Ēgue ehi rumo ahe oyeupe nara tēi oipota rai mbahe yuvireco. Iyavei ombopa ava ndayaracua tuprii vahe; oñeho tupri ai angahu oporomohapisi aisa pipe tēi yuvireco. ¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaherā pe mbahecusa mbahe aviye vahe apo água, ndahei mbahe tēi apo água. ²⁰ Evocoiyase Tūpa güeco

tuprisa pipe pihaivi Caruguar osecopipa tupri itera. Pe avei evocoiyase pesecorero yira. Yande Yar Jesucristo tape rovasa.

²¹ Omondo avei omahenduhasa Timoteo pēu. Ahe che pītvii che poravíquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pēu, che avei che mahenduhasa amondo yande Yar reroyasa pipe pēu.

²³ Omondo avei omahenduhasa Gayo pēu. Ahe sētave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pēu, ahe tecua mbahe guarepochi apocatusar. Yande rivri Cuarto avei omondo omahenduhasa pēu.

²⁴ Aviye, yande Yar Jesucristo tape rovasa opacatu.

Pablo omboetei Tūpa

²⁵ ¡Yamboetei Tūpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tūpa omboye cu ramo vahe cheu co ivi apoëhi suive mbahe ndicuasai vahe rese. ²⁶ Cūritei rumo oyecua uca oñehe mombehusar rembicuachía pipe Tūpa apirëhi vahe porocuaita rupi cute. Ahe ñehesa ndicuasai vahe omboye cu uca opacatú ava upe ‘toviroya sese oyeroyasa pipe yuvireco’ oya.

²⁷ ¡Tūpa güeraño imbahecúá vahe yepi, ëgue tehi ahe yande Yar Jesucristo rer pipe imboeteipri tasecoi!

YIPINDAR PABLO REMBICUACHIA CORINTO PENDAR UPE CORINTIOS

Pablo mahenduhasa Jesús reroyasar Corinto pendar upe

¹ Che Pablo, yande rívrí Sóstenes reseve, oromondo co ore mahenduhasa opacatu pēu. Tūpa niha, güemimbotar rupi, che poravo apóstol che reco ãgua. ² Aicuachía co che ñehe pēu, pe Jesús reroyasar peñemonuha vahe Tūpa upe tecua Corinto ve. Peicua niha pe ipehaprí peico Tūpa upe nara ité Jesucristo rese peicose. Peicua avei niha Tūpa pe poravose oyeupe nara pe reco catupri ãgua, inungar opacatu ambuae seroyasar co íví pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. ³ Yande Ru Tūpa, yande Yar Jesucristo tape rovasa pe reco tupri ãgua.

Jesucristo suindar porovasasa seroyasar upe

⁴ Che, “Avíye ndeu” aheño ité Tūpa upe pe recocuer rese yepi. Esepiá, Tūpa pe rovasa ité Jesucristo rese peicose. ⁵ Egüe ehi secocuer pipe sui Tūpa ombou opacatu pe reco tupri catu ãgua, pemombehu tupri vaherá imbahecuasa, opacatu mbahe supi eté vahe cua tupri ãgua avei. ⁶ Esepiá niha, ore co ñehesa Jesucristo resendar pēu imombehusa pipe sui pe recuñaro uca ité. ⁷ Sese ndipoi eté que porovasasa Tūpa Espíritu suindar ipane vahe pēu yande Yar Jesucristo yevi ãgua pesárose. ⁸ Tūpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe tēi secocuer rese yuvireco’ ohesave. ⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco ãgua.

Jesús reroyasar pihañemoñetasa ndahoyoyai vahe resendar

¹⁰⁻¹¹ Che rívrete, che amombehu potami mbahe pēu yande Yar Jesucristo rer pipe. Esepiá, Cloé mu pe mombehu yuvireco cheu: “Oñemoiroiro yuvireco oyeupe ae” ehi. Sese aipo ahe pēu: pembboyoya catu pe pihañemoñetasa, ndapeyemboyahoí chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar. ¹² Supi eté amove aipo, “Ore Pablo rupindar oroico” peye tēi; ambuae evocoiyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye tēi aipo peico. ¹³ ¡Cristo rumo vireco porombohesa ndoyaho-yaho tēi vahe! ¿Che tie amano curusu rese pe angaipa repirã? anise, ¿che rer pipe tie peñearipamo uca peico? ¹⁴ ¡Avíye Tūpa upe che ndopoápiramo! Crispo iyavei Gayo, ahe güeraño rumo añapiramo yuvireco cuese. ¹⁵ Sese ndipoi chira “serer pipe ñapiramosa” ehi vahe yuvireco cheu. ¹⁶ Estéfanas rēta pendar avei añapiramo yuvireco, ipare ndipo iri revo ambuae ava añapiramo vahecuer. ¹⁷ Cristo niha nomombehui che poroápiramo ãgua. Egüe ehi rumo che cuaita ñehesa ñepisirosa resendar mombehu ãgua tēi. Iyavei ndahei ñehesa yavai catu vahe aiporu. Esepiá, nañomi potai eté que chihí co ñehesa píratagüer Jesucristo curusu rese imano agüer resendar ava sui.

Cristo Tūpa píratasa, imbahecuasa avei

¹⁸ Esepio, acoi ava ocañi tēi vaherā upe co ñehesa curusu rese Cristo manosa resendar aviyé ëgüe ehi tēi vahe viña. Yande ip̄isiropri yaico vaherā upe rumo co ñehesa vireco ité Tūpa p̄iratasa, ¹⁹ inungar Isaías rembiciachiagüer pipe aipo ehi:

“Amocañira co ivi pipendar ava tēi mbahecuada iyavei arocuara ava yaracua vai tēi vahe sui yaracuasa” ehi.

²⁰ ¿Mara ehi evocoiyase co ivi pipendar ava imbahecua vai vahe, ava ava tēi aracuasa cuapar avei, iyavei iñehe cua tupri ai vahe co ivi pipendar mbahe rese yuvireco? ¡Tūpa niha osecuñaro evocoi nungar mbahecuada ëgüe ehi tēi vahe pipe! ²¹ Ëgüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar ëgüe ehi tēi vahe” ehi tēi ava yuvireco chupe viña, Tūpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

²² Che mu judío osepia pota tēi mbahe poromondiisa ip̄iratá vahe iva pendar yuvireco. Griego evocoiyase osendu pota tēi ñehesa aracuasa resendar yuvireco no. ²³ Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviyé acoi ëgüe ehi tēi vahe yuvireco chupe. ²⁴ Yande rumo, Tūpa rembiporavo yaico vahe, que judío, anise que griego avei, yandeu co ñehesa Tūpa Rembiporavo Cristo resendar Tūpa p̄iratasa ité, imbahecuada avei. ²⁵ Esepio niha, ava upe, Tūpa suindar mbahe aviyé acoi ëgüe ehi tēi vahe viña. Co Tūpa suindar rumo mbahecuada aviyé catu vahe ité ava tēi mbahecuada sui iyavei acoi mbahe Tūpa suindar aviyé nipuratai vahe ava upe viña, ahe rumo ip̄irata catu ité opacatu ava tēi p̄iratasa sui. ²⁶ Che rivreta, peyemomahenduha catu co rese: Tūpa pe poravo, yepe pe pāhu pendar ndasetaimi imbahecua vai vahe ava rovaque yuvireco viña. Ndasetaimi avei pereco pe mu seco ivate vahe viña no. ²⁷ Evocoi ava, “Ndoicuai vahe mbahe yuvireco” ehi yuvireco pēu viña. Tūpa rumo pe poravo evocoi ava imbahecua vai vahe mochi água. Iyavei oiporavo ava pe pāhu pendar ndoicatu tupri ai vahe yuvireco ava ip̄irata vahe Tūpa cuaparéhi mochi água. ²⁸ Oiporavo avei co ivi pipe ava remieroíro seco mbegüemi vahe, ava seco ivi coti catu vahe pe pāhu pendar co ava seco ivaté vahe reroyi água ²⁹ ‘toyemboivate ai eme que ava che rovaque yuvireco’ oya. ³⁰ Tūpa ité rumo yande mboyemboya Guahir Jesucristo rese, ahe avei ombou Guahir yande mboaracua água, yande reco mohivi água avei ‘toyuvirecoi cheu nara’ ohesave iyavei ‘ip̄isiropri toyuvirecoi’ oya yandeu. ³¹ Sese inungar aipo ehi ñehesa icuachiapri aracahendar pipe: “Acoi ava oyeecomboivate ai pota vahe, toyeecomboivate catu yande Yar rembiapo rese” ehi.

2

Pablo omombehu curusu rese Cristo mano agüer

¹ Iyavei, che rivreta, che asose cuese, añehese pēu Tūpa suindar ñehesa supi eté vahe yipindar ndicuasai vahe pipe, nañehei co ivi pipendar tēi ava mbahecuada pipe, ñehesa ivate ai vahe pipe avei. ² Esepio, acoi aicose pe pāhuve cuese, ndachepiñemoñetai eté que ambuae mbahe rese; Jesucristo recocuer rese, yatica agüer rese catu ité che pihañemoñeta vichico. ³ Iyavei ndachepíratai, aririí avei che siquiyepave pēu che sose.

⁴ Iyavei acoi añehese ñehesa písrosa resendar rese pēu, ndaiporui eté rumo ñehesa ivate ai vahe pe pihañemoñetasera rerova água. Che rumo Tūpa Espíritu píratasa pipe añahe pēu ⁵ ‘toyeroya catu Tūpa píratasa rese yuvireco’ che yapave pe yeroyaëhi água ava tēi mbahecuada rese.

Tūpa oEspíritu pipe oicua uca mbahe yandeu

⁶ Ore rumo oromombehuño ité aracuasa pēu, pe peyemoviracua vahe Jesúis rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepio, ahe imborerecuasa ocañi tēi vaherā. ⁷ Oroñehe catu aracuasa Tūpa suindar ndicuasai vahe rese, ahe yipive vireco vahe ivi apoëhi viteseve, ahe co omboycuea ramo vahe yandeu yaico vaherā teco ori apirëhi vahesave. ⁸ Co ivi pipendar ava mborerecuareta rumo ndosenducuai eté co ñehesa. Osenducuase rumo mborerecuar Jerusalén pendar yuvireco viña, ndoyatica ucái chira yande Yar seco ivate, po-rañete vahe curusu rese yuvireco viña. ⁹ Icuachiapri aracahendar pipe aipo ehi:

“Tūpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihañemoñetaimi eté sese yuvireco no” ehi aracahe.

¹⁰ Tūpa rumo oicua uca Espíritu pipe yandeu cute. Esepio, Espíritu oicua tupri catu ité opacatú secocuer oico.

¹¹ Ëgüe ehi eté, inungar opacatu ava pâhuve ndipoi eté que ñepei ava pihañemoñetaso oicua vahe, iespíritu güeraño ité oicua mbahe oime vahe ipiha pipe. Ëgüe ehi avei Tūpa Espíritu güeraño ité oicua Tūpa pihañemoñetaso. ¹² Yande evocoiyase ndahei co ivi pipendar tēi espíritu yaipisi, ëgüe ehi rumo Espíritu Tūpa suindar yaipisi yaicua vaherā iporerecoa oporoaisusa pipe ombou vahe yandeu. ¹³ Ahe niha oromombehu Tūpa Espíritu ore mbohe vahe, ndahei ñehesa ava tēi aracuasa sui. Ëgüe orohe co supi eté vahe ñehesa Espíritu suindar oromombehu Espíritu rese yuvirecoi vahe upe yepi.

¹⁴ Acoi ava ndovirecoi vahe rumo Tūpa Espíritu opicha pipe, ndoipisi eté mbahe Tūpa Espíritu suindar yuvireco. Esepio, chupe evoco mbahe aviye ëgüe ehi tēi vahe, iyavei ndosenducua catui eté yuvireco. Esepio, evoco nungar mbahe senducuasa Espíritu pipeño ité. ¹⁵ Acoi ava vireco vahe rumo Tūpa Espíritu opicha pipe oicatu opacatu mbahe cua água. Ndipoi chira rumo ambuae ava ndovirecoi vahe Espíritu opicha pipe ahe ava recocuer cua tupri água. ¹⁶ Esepio, icuachiapri aracahendar pipe aipo ehi: “¿Ava vo oicua tēira yande Yar pihañemoñetaso viña? ¿Ava vo ombohe tēira viña?” ehi. Yande rumo yareco yande Yar Cristo pihañemoñetaso.

3

Pablo iyavei Apolos Tūpa upe oporavíqui vahe yuvirecoi

¹ Che rívireta, ndapeguata tupri Espíritu reroyasa pipe; pe rumo peguataño vite ava tēi pihañemoñetaso rupi peico. Sese namombehu catui ñehesa yavai vahe Espíritu suindar pēu. Esepio, pe pítanimi nungar vite tēi pe pihañemoñetaso Cristo rese. ² Sese che opombohe mbahe ndayavaimi vahe rese. Esepio, pítanimi ndoicatu vitei ocaru. Sese ocambu viteño tēi. Cûritei rumo ëgüe peye vite ité. Esepio, pe ndapesenducua catu vitei eté Tūpa Ñehengagüer yavai vahe. ³ Peguata viteño co ivi pipendar

pihañemoñetasa tēi rupi. Esephia, peyemoecatēhi-tēhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoiyase peyapo ava ndoicuai vahe Tūpa rembiapo nungar.⁴ Esephia, aipo peyeño tēi, "Ore Pablo rupindar oroico"; ambuae evocoiyase, "Ore Apolos rupindar oroico" peye-peye tēi pe yembohesa rese pe yeecopisa pipe. Aipo ehi vahe pe pāhuve inungar ava Tūpa ndoicuai vahe pihañemoñetas.

⁵ Pesendu che ñehe: ¡Che Pablo iyavei Apolos Tūpa rembiguai tēi oroico! Esephia, yande Yar niha ombou ñepei-peí mboravíqui yandeu chupe yayapo vaherā. Tūpa upe ore poravíquisa pipe sui niha peroya yande Yar peico: ⁶ che rane inungar añotí vahe mbahe rāhii pe piha pipe; Apolos evocoiyase inungar imboihusar; Tūpa rumo inungar omboori vahe pēu. ⁷ Evocoiyase ndiyai peyeroya mbahe tīsar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco. ⁸ Ore rumo oyoya tupri oroyapo mbahe pēu nara. Sese ñepei-peí Tūpa omboura porerecosa pe rese ore poravíquigüer rupi oreu. ⁹ Ore oroporavíqui vahe Tūpa upe. Pe evocoiyase ivi nungar peico Tūpa poravíqui água iyavei pe inungar Tūpa omopuha ramomi vahe oi peico. ¹⁰⁻¹² Che inungar oi apo cuapar oyapo rane vahe oi vīracua água, ēgüe ahe imombehu Cristo resendar ñehesa pēu seroya tupri água. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoiyase inungar oi aposar omopuha vahe ivíracuasa harive, ēgüe ehi ahe pe mongueréhi catu pe mbohe co ñehesa rese. Evocoiyase inungar oi aposar amove oiporu mbahe ipocopi vahe oi apo água yuvireco oro, guareepochi, anise ita avíye vahe. Amove rumo oiporu avei ndipocopii vahe mbahe que ivírapo tēi, capihi, anise tacuar tēi oiguā yuvireco. Égüe ehi aveira pe mbohesar yuvireco. Ahe ñepei-peí rumo iya oicua tuprira pe mbohe água yuvireco. ¹³ Ahe iporavíqui agüer rumo ari cañise icuasa tuprira ñepei-peí yuvireco. Esephia, ahe ari pipe yande Yar oura tata reseve ñepei-peí pe mbohesar poravíqui agüer cua água. ¹⁴ Acoi ava oporombohe tupri vahe inungar ava oyapo oi ndocai vahe, ahe oipisira oporavíqui repri; ¹⁵ ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe güeraño evocoiyase oñepisiro sáira tata guasu sui.

¹⁶ ¿Ndapeicuai vo pe yande Jesús reroyasar Tūpa rēta nungar yaico? IEspíritu niha secoi eté yande piha pipe. ¹⁷ Oimese que ava yande pāhuve omomara vahe Tūpa rēta, Tūpa evocoiyase omboura oñemoirosa ahe ava upe. Esephia, Tūpa rēta nimarai vahe ité; yande teieté niha Tūpa rēta yaico.

¹⁸ Peyembopa eme catu pe ae. Oimese que pe pāhu pendar oyeupe aipo "che yaracua tupri vahe aico" ehi vahe co ivi pipendar pihañemoñetasa rupi tēi, toyecomombegüemi rane oaracua água. ¹⁹ Esephia, ava tēi aracuasa Tūpa upe ēgüe ehi tēi vahe. Inungar icuachiapri aracahendar pipe aipo ehi: "Ava oaracua raisa pipe oyeiti uca mbahe tēi pipe Tūpa upe yuvireco" ehi. ²⁰ Iyavei aipo ehi no: "Yar rumo oicua ava tēi yaracua rai vahe pihañemoñetasa, ahe ēgüe ehi tēi vahe" ehi. ²¹ Sese ndapeyeecomboivate ai chira que ava tēi porombohesa rupi peico. Esephia, opacatu mbahe pēundar ité: ²² Égüe ehi eté che Pablo, iyavei Apolos, Pedro avei, opacatu ivi pipendar mbahe Tūpa omoime vahe yandeu, tecovesa, manosa avei, yasephia vahe, iyavei mbahe oime vaherā, ahe niha opacatu pēu nara, ²³ pe niha Cristo upendar, Cristo evocoiyase Tūpa upendar secoi.

4

Apóstol yuvirecoi vahe poraviqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tūpa suindar ñehesa oyecua ramo vahe rese iporombohe água” peyera oreu viña. ² Acoi vireco vahe ocuaitarā, iya ité omboyecua ocuaita mboaviye tuprisa. ³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu água yuvireco. Che avei ndaicuai eté che recocuer cuapa tupri. ⁴ Yepe ndaicuai que mbahe che rembiaví che cuaita sui viña, ndiyai chira rumo, “Che amboaviye tupri che cuaita” ahe vaherā pēu. Yande Yar rumo oicua. ⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesāro ranera rumo yande Yar yevi água. Ahe niha omboyecuara opacatu mbahe ndoyecuai vahe, iyavei omboyecuapara ñepei-peí yande pihañemoñetas. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepei-peí yandeu.

⁶ Che rivreta, che añahe cheyese ae, Apolos rese avei pēu mbahe tupri água rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi água’ ore yapave pēu. Pe evocoiyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu. ⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¡Sese ndiyai peyeecomboivate etepri co mbahe pereco vahe rese! ¡Aviye opacatu mbahe peyesui tēi pe reco vahe viña!

⁸ Ndoyavii pereco ité vahe opacatu mbahe pe remimbotar viña, ndoyavii avei nipanei vahe ité Tūpa suindar mbahe pēu. Peyeupe revo ndoyavii mborerecuar guasu peico ore sui viña. ¡Égüe peye itera tarahu viña! Ahese, ore avei mborerecuar oroicora pe pâhuve viña. ⁹ Ore rumo apóstol oroico vahe ndoyavii cheu Tūpa ore renoi ipa tēi vahe ore mano tēi água. Sese seroírombri oroico inungar ava imboguaipri yucapirā. Égüe orohe oroico opacatu ava rovaque, Tūpa rembiguai eta íva pendar rovaque avei. ¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavii ndaseco píratai vahe oroico ava rembiepiave; aheseve avei rumo peyeeconomomirata tēi peico. Ore seroírombri tēi oroico, pe evocoiyase ava pe mboetei guasu pe rereco yuvireco. ¹¹ Cûritei ore oroicove vite ité ore rieporéhi pipe, ore husei tēi iyavei ndore turucuai eté. Ava rumo evocoiyase mara-mara tēi ore rereco yuvireco. Iyavei ndorovirecoi ore rëta ité. ¹² Ore oroporavíquño ité, oroyembogüerai tēi ipipe. Ava rumo iñahe mara-mara tēi eté yuvireco oreu; ore evocoiyase oromboyeviño iñahe mbahe tupri pipe chupe. Ore reca-reca catuño ité ore momara água yuvireco; ore rumo oronñemosaflo ité yuvireco chupe. ¹³ Iñahe-iñahe tēi ore rese yuvireco; ore rumo saisusa pipe oromboyevi iñahe yuvireco chupe. Ore rereco ití nungar tēi iyavei ore rereco inungar ava égüe ehi tēi vahe yuvireco. Cûritei égüe ehi viteño ité yuvireco oreu.

¹⁴ Ndahei pe mochi água aipo ahe icuachía pēu, égüe ehi rumo pe mboaracua água tēi. Inungar che rahir ité, che rembiaisu opovireco.

¹⁵ Esepio, yepe pereco ati pe pítiyiisar Cristo rese pe reco água viña, ndaperecoi rumo setá pe yesupa. Esepio, che amombehuse niha ñehesa pisirosa resendar pēu, ahese ramo peroya Jesucristo. Seroyasa pipe evocoiyase che inungar pe yesupa ité aico pēu. ¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pēu, che rahir nungar omboavíye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi. ¹⁸ Amove oime pe pâhuve oyeecomboivate ai vahe. “Ndou iri chietera revo cohaye yande repia” ehi yuvireco cheu viña; ¹⁹ aso pihaiviño itera rumo pe repia yande Yar oipotase cheu. Ahese aicua tuprira oyemboivate ai vahe reco píratasa yuvireco. Ndahei chira iñehe güeraño tēi aicuara. ²⁰ Esepio, Tūpa omborerecuasave, ndahei oñeho pipe tēi oporocuai, opíratasa pipe rumo ñgue ehi. ²¹ ¿Mbahe pīha peipota peico? ¿Peipota pīha che aso vaherā pēu che ñehe pírata pe mboaracua água mbahe pe rembiaví rese? Anise, pemoingatu rane pe recocuer, ahese asora mbahe tupri pipe pe píri.

5

Pablo oñeho ñepei Jesús reroyasar pāhu pendar oyemboaguasa vahe rese

¹ Ambuae mbahe, oroyandu ñepei mbahe tēi pe pāhu pendar rembiapo oroico: oime aipo osi recoyar rese secoi vahe. Ahe angaipa guasu oyapo oico. Tūpa reroyasarëhi ité ndoyapoi evocoii nungar mbahe tēi yuvireco.

² ¡Pe rumo peyeecomboivate ai peico! ¡Iyacatu rumo ndapeyembovah chira evocoii nungar mbahe tēi repiase viña! Evocoii nungar ava iyacatu ité pemboyepepíra pe pāhu sui. ³ Yepe niha che teiteté ndaicoi pe pâhuve viña, pe rese che mahenduhasa pipe rumo aicove ité pe pâhuve iyavei aicua voi eté aipo oyapo vahe mbahe tēi recocuer inungar-ra aico vahe ité pe pâhuve viña. ⁴ Acoi peñemonuhase, che avei niha aicora pe pâhuve che mahenduhasa pipe, yande Yar Jesucristo píratasa avei secoira pe rese. ⁵ Evocoiyase ahe ava timondosa Caruguar povrîve secocuerai mocañi água. Ipipe sui iespíritu oñepisirora yande Yar Jesucristo yevise curi.

⁶ Ndapeyeecomboivate ai chira peico co mbahe tēi oimese pe pâhuve. Esepio, peicua niha co ñehesa aipo ehi vahe: “Yepe chíhimi imondosa pan mboapeposa panguä rese viña, ahe rumo oiquepa tupri panguä rese” ehi. ⁷ Evocoii ava rembiapo ai inungar pan mboapeposa pe pâhuve. Sese pemombopa pe pâhu sui peicoëhi água angaipa pipe peico vaherā inungar panguä ipiasu vahe ndovirecoi vahe omboapeposa oyese. Ñgue peye ité niha. Esepio, yande Yar Jesucristo iparaisu omano yande repirã. Ñgue ehi ahe inungar ovesa yucapri angaipa mocañi água judío pieta Pascua pipe yepi. ⁸ Sese inungar judío omboetei vahe Pascua pieta yuvireco yepi omombopao pan mboapeposa cuacua vahe oyesui pan ipiasu, ndayapepoi vahe rereco água, ñgue yahe aveira yaico yande reco piásu supi eté vahe pipe; yamombopara yande recocuerai yandeyesui, ahe ava reco momara-mara tēisa, mbahe naporai vahe avei.

⁹⁻¹⁰ Ambuae aicuachía vahe pipe aipo ahe pēu: “Ndapembori chira ava oyemboaguasa-guasa tēi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upé tēi oyerure vahe” ahe. Co che ñehesa rumo ndahei Tūpa ndoicua vitéi vahe upendar. Esepio niha, pe yepepi água ñepei reseve evocoii nungar ava sui, pesé itera

co ivi pipe sui viña. ¹¹ Che niha aipo ahe icuachía pēu: ndapemborii chira que ava acoi “che Jesucristo reroyasar aico” ehi angahu tēi vahe, que oyemboaguasase, anise oipota raise que ambuae ava mbahe, oyeroqui tēi vahe que mbahe rahanga upe, iyavei imahechiroi ai vahe, caguar tēi vahe, anise imonda rai vahe. Evoco nungar ava piri ñepei yepe ndapecarui chietera. ¹²⁻¹³ Cheu ndiyai eté ava ndoyuvirecoi vahe Tūpa rese recocuer rese porandu água. Tūpa ahe ava yuvirecoi vahe recocuer opara oicua coiye. Pe rumo pe cuaita ité Tūpa rese yuvirecoi vahe upe pe porandu água secocuer rese. ¡Sese pemboyepepiño ité osi recoyar rese secoi vahe pe pāhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae mbahe no: Oime pe pāhu pendar “co mbia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tūpa reroyasaréhi upe tēi evoco mbia rembiapo ai rese porandu água! Iyacatu rumo Tūpa reroyasarea upe perasora secocuer moingatu água yuvireco viña. ² Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoiyase, ¿ndapeicatui pīha co tecocuer mbahemi tēi moingatu peico? ³ ¿Ndapeicuai vo yande avei yaporandura Tūpa rembiguai recocuer rese curi? Eoccoiyase, ¡peporandu catu itera co ivi pipendar tecocuer rese peyeupe yepi! ⁴ Perecose evoco nungar mbahe tēi peyeupe, ¡mahera peiporu ava ēgüe ehi tēi vahe tūparo pendar upe mbahe moingatu água! ⁵ Che aipo ahe ité pēu pe chī água: ¿Ndipoimi eté vo pe pāhuve que ñepei yaracua vahe oicatu vahe que mbahe tēi peyeupendar moingatu água? ⁶ Amove pevava peyeupe! ¡Ndahei co güeraño, oime avei pe pāhu pendar Tūpa reroyasar vīraso ambuae omboetasa mborerecuar Tūpa reroyasaréhi upe tēi mbahe moingatu água!

⁷ Supi eté evocooya pe reco pipe peyaví guasu ité. Iya peñemosañaora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñomiño yuvireco” peyera chupe pe raso rāgüler sui Tūpa reroyasaréhi mborerecuar upe viña. ⁸ Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

⁹⁻¹⁰ ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pipe curi! Peyembopa ucai rene chupe. Esepia, acoi ava oyemboaguasa-guasa tēi vahe, mbahe rahanga upe tēi oyeroqui vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava vīrocua yesapihaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi. ¹¹ Oime avei niha acoi pe pāhu pendar yipindar ēgüe ehi vahe yuvireco viña, cūritei rumo opa pe angaipa imocañisa pe sui iyavei pe iperahapri peico Tūpa upe nara ité. Ahe, “Peyaví mbahe” ndehi iri pēu yande Yar Jesucristo rer pipe iyavei yande Ru Tūpa Espíritu píratasa pipe avei no.

Yande rete iperahapri Tūpa upe nara yaguasaéhi água

¹² Iyavei ambuae mbahe: Supi eté niha “aviye que mbahe che remimbatar ayapo vaherā” ehi vahe. Amove rumo co mbahe ndahei aviye vahe

yandeu iyavei yandeu ndiyai evoco nungar mbahe povrîve nara tēi yande reco âgua. ¹³ Supi eté niha aipo ehi vahe: "Yande rembihu yande aviter upe nara, yande aviter evocoiyase yande rembihu upe nara" ehi. Coiye rumo Tūpa opara omocañi evoco nungar mbahe. Yande retecuer rumo ndicuaitai yaguasa tēi vaherā, ahe rumo yande Yar upe nara. Yande Yar evocoiyase yande retecuer upe nara secoi. ¹⁴ Inungar Tūpa ombogüerayevi yande Yar; ñgue ehi aveira yande mbogüerayevi opíratasa pipe coiye.

¹⁵ Peicua niha yande rete Jesucristo upendar ité. Ndiyai eté evocoiyase Jesucristo upendar yande rete mundo âgua cuña güetecuer omondo-mondo tēi vahe upe. ¹⁶ Peicua niha pe aipo nungar cuña ndipihai vahe rese peicose, pe retecuer evocoiyase ñepei vahe nungar ité pereco. Esepia, icuachiapri aracahendar pipe aipo ehi yandeu: "Yepe ñuvirío ava yuvirecoi vahe viña, ñepei vahe nungar ité rumo secocuer yuvireco" ehi. ¹⁷ Acoi ava secoi vahe rumo yande Yar rese, ahe secocuer evocoiyase ñepeifio ité.

¹⁸ Peyepipi voiño catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoiyase omomara catu güembiaipo pipe sui tēi. ¹⁹ ¿Ndapeicuau vo pe retecuer Espíritu Santo upendar ité secoi, iyavei ahe Espíritu Tūpa remimbou pe rese ité secoi? Sese pe retecuer ndahei pêundar ité. ²⁰ Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviye vahe pe retecuer pipe Tūpa mboetei âgua.

7

Poromboaracuasa mendasa resendar

¹ Cûritei amboyevira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña. ² Pe aguasa-guasa tēiâhi âgua rumo peyacatu perecora pe rembireco, cuña avei evocoiyase tovireco oyacatu omer yuvireco. ³ Cuimbahe tomboaviye omendasa güembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase. ⁴ Esepia, cuña omenda vahe güetecuer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara vireco, ahe rumo güembireco upe nara ité vireco. ⁵ Ndiyai peatéhi oyeupe. Oyoya rumo, "Yayapo eme mbahe" peyese peyeupe pe yeroqui âgua Tūpa upe, ahe aviyeño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Caruguar pe âtoi tiétera.

⁶ Ndahei che opocuai 'tomenda yuvireco' viya pēu. ⁷ Che rumo aipota che nungar pe mendaéhi âgua viña. Tūpa rumo ombou yande yacatu yande recorã.

⁸ Iyavei ndomenda vîtei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar. ⁹ Ndapeicatuise rumo pe ñemosa âgua, pemendaño. Esepia, aviyete catu itera pemenda poropota rai râgürer sui.

¹⁰ Che rumo amombehu omenda vahe upe 'topoi eme cuña omer sui' viya. Ndahei cheyesui tēi aipo ahe. Ahe rumo yande Yar porocuaita ité.

11 Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

12 Ambuae ava opacatu uperumo cheyesui eté aipo ahe. Esephia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoiyase ahe topoi eme ité güembireco sui. 13 Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoiyase ahe cuña topoi eme ité ichui. 14 Esephia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tūpa rovaque. Ëgüe ehi aveira cuimbahe Jesús reroyasar virecose güembireco Jesús reroyasarëhi. Ëgüe ndehise rumo, tahir avei ndoyavii chira ndahei vahe Jesús reroyasar rahir yuvireco viña. Ahe tahir rumo Tūpa upendar yuvirecoira. 15-16 Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esephia, Tūpa oipota mbahe tupri pipe yande reco ägua.

17 Co rumo mbahe: peicoveño yipindar pēu Tūpa ombou vahe rese seroyaëhi vitesendar pipe. Ahe aporocuai opacatu Cristo upendar ñemonuhasa rupi yepi. 18 Acoi Tūpa osenoise ava judío oyeupe nara, ahe judiono ité secoira. Acoi osenoise rumo, ndahei vahe judío, ahe ndoyembocircundia ucai chira judío güeco ägua. 19 Esephia, ndahei chira que judío, anise que ndahei vahe judío yaicose aviye catura yaico. Co rumo Tūpa oipota catu, "Tomboaviye opacatu che porocuaita amondo vahe chupe yuvireco" ehi yandeu. 20 Sese peicoveño peyacatu pe recocuer pēu Tūpa ombou vahe rese pe renoiëhi viteseve. 21 Pe mbiguai tēi peico vahe pe renoise Tūpa, pepihañemoñeta etepri eme evocooya pe recosa sui pesē vaherä rese. Peicatuse rumo, peyepepiño itera ichui. 22 Esephia, yepe pe mbiguai tēi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tēi peico vahe, yepe ëgüe peye viña, peroyase rumo Cristo, ahese sembiguai peico. 23 Tūpa upe rumo perepi iteanga, sese ndiyai eté ambuae ava povriva tēi peico. 24 Sese, che rivireta, peicoveño itera pe recocuer pipe inungar yipindar Tūpa pe renoise.

25 Cuñatai ndomenda vitei vahe resendar rese rumo ndarecoi Yar suindar che ñehe ägua. Che rumo amondora che pihañemoñetasa yuvireco chupe. Esephia, yande Yar che paraísuerecosa pipe imboyeroyapri aico.

26 Cheu aviyé catuño ité ndomendai vahe ëgüe ehiño tēise yuvireco viña. Esephia niha, tecocuer yavaí eteanga cüritei. 27 Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe. 28 Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavai catura co iví pipe yuvireco chupe. Sese che ndaiptai evoco nungar mbahe pipe yuvireco vaherä.

29 Che rivireta, aipo mbahe amombehu pota pēu: ndipucuvei co ari naporai vahe yepota ägua yandeu. Sese co pipe suivetupri omenda vahe toyuvirecoi ndomendai vahe nungar yande Yar rese opihañemoñetasa

pipe. ³⁰ Acoi ndovihai vahe, toyuvirecoi eme oviharehisa pipe iyavei acoi oviharete vahe, ahe toyuvirecoi eme avei oviharetesa pipe, iyavei virocua vahe mbahe omahera, toyuvirecoi inungar mbahe ndovirocuai vahe omahera viña yande Yar rese opihañemoñetas pipe. ³¹ Acoi ava ipihañemoñeta catu vahe co ivi pipendar mbahe poru ãagua, tipihañemoñeta eme evoco nungar mbahe tēi rese yuvireco. Esepia, co ivi pipendar mbahe yaselia vahe, ocañi tēira.

³² Che ndaipotai co ivi pipendar recocuer rese tēi pe pihañemoñeta etepri peico. Acoi mbia ndomendai vahe rumo, ipihañemoñeta catuño ité yande Yar rese imboviha ãagua; ³³ omenda vahe rumo ipihañemoñeta avei co ivi pipendar recocuer rese tēi, güembireco mboviha ãagua rese avei. ³⁴ Evocoiyase ndahei ñepei opihañemoñetas vireco. Ëgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespíritu rereco tupri ãagua Tūpa upe. Cuña omenda vahe rumo ipihañemoñeta co ivi pipendar recocuer rese tēi omer mboviha ãagua oico.

³⁵ Che aipo ahe pēu ‘mbahe tupri pipe toyuvirecoi’ viya, ndahei mbahe yavai vahe pipe pe reco ãagua. Che aipota ité pe reco catuprisa pipe yande Yar upeño ité mbahe peyapo vaherā pe recoeté pipe peico.

³⁶ Acoi ava ipihañemoñeta vahe güembirecoví rese omenda ãagua, “Aviyeteramo ayavira mbahe ichui iyavei niha osupiti ité imenda ãagua, sese aviyé catu yamenda” ehise, toyapoño güemimbotar. Tomendaño ité güembirecoví rese. Esepia, mendasa niha ndahei angaipa. ³⁷ Acoi mbia rumo ndovirecoise que ocuaita omenda ãagua iyavei oicatu ité güemimbotar apo, ipihañemoñetas ñepei reseve güembirecoví rese omendaëhi ãagua, ahe aviyéño ité. ³⁸ Evocoiyase acoi omenda vahe aviyéño; acoi ndomendai vahe rumo, aviyé catuño ité.

³⁹ Iyavei acoi cuña omenda vahe, ahe ndiyai eté iyepepi ãagua omer sui imanoëhi viteseve. Omanose rumo ichui, ahese ramo ahe cuña upe aviyéño imenda iri ãagua güemimbotar rupi. Yande Yar reroyasar rese avei rumo omendara. ⁴⁰ Ndomenda irise rumo, aviyé catuño itera. Ahe che pihañemoñetas, iyavei revo ahe che pihañemoñetas Tūpa Espíritu suindar.

8

Pablo oñeho tembihu mbahe rahanga upe tēi seropovëhepri rese

¹ Cüritei ambuae mbahe amombehura pēu mbahe rahanga upe mbahe mimba yucapri seropovëhepri rese. Supi eté aipo ehi vahe: “Yande opacatu yareco yande mbahecusa” ehi. ¡Yande rumo, “Aicua tupri opacatu mbahe” yande hesa pipe yayeecomboivate ai tēi! Yayaisuse rumo, ahese yañepitivii catu Cristo reroya tupri ãagua. ² Supi eté yande, “Che aicua ité co mbahe” yahe tēise que mbahe upe, ipane vité ité rumo icua tupri ãagua yandeu. ³ Yande rumo yasaisuse Tūpa, ahese Tūpa, “Co ava cheundar ité secoi” ehira yandeu.

⁴ Evocoiyase co mbahe rahanga upe tēi seropovëhepri mbahe mimba yucapri hu ãagua rese añahe. Yande niha yaicua co mbahe rahanga ëgüe ehi tēi vahe co ivi pipe, iyavei oime ñepei güeraño ité Tūpa. ⁵ Esepia, yepe ava upe setá tūpa ivave, ivive avei viña (setá iteanga niha oime tūpa angahu tēi, yar angahu tēi avei). ⁶ Yande rumo yaicua ñepeiño ité Tūpa oime, ahe niha yande Ru opacatu mbahe aposar. ¡Evocoiyase yande chupe

nara ité yaico! Oime avei yande Yar ñepei vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovéhepri, ipihañemoñeta, “Co mbahe roho tūpa rahanga upe seropovéhepri” ehi viteño yuvireco oyeupe. Ipípe sui omomara uca Tūpa rese opihañemoñetasa yuvireco. ⁸ Supi eté tembihu ndayande pítivii Tūpa rese yaico vaherã. Ndahei mbahe roho husa pípe sui tēi aviyé catura yaico iyavei ndayahuise, ndahei chira mbahe tēi catu yaico. ⁹ Pēu niha aviyéño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangai pa ucara. ¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemongueréhi aveira ihu uca áqua chupe. ¹¹ Evocoiyase co pe mbahecusa pípe pemocañi uca yande rivri Tūpa rese noviracua tupri vitei vahe peico. ¡Cristo rumo omano ipísiro água! ¹² Esepia, pemomarase Tūpa rese ipihañemoñetasa, ahese pe ae peyemboangaipa uca Cristo amotaréhisa pípe peico. ¹³ Sese yande mbahe roho husa pípe sui yamboangaipa ucase yande rivri viña, ndayahu iri chietera evocoí mbahe roho yande rivri mboangaipa ucaéhi água.

9

Apóstol Pablo ndoporandu potai oyeupe nara apóstol upendar mbahe rese áva upé

¹ Supi eté che aicatu avei apóstol upendar mbahe pisi áqua viña. Esepia, che apóstol aico. Supi eté che asepia yande Yar Jesús iyavei che poravíquisa pípe sui niha peroya yande Yar peico. ² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voiño itera cheu. Esepia, che remimombehu pípe sui niha yande Yar peroya peico. Ipípe sui avei icuasa tupri apóstol che recosa pēu.

³ Ahe ñehesa amboyevi tupri ava che recoáha potasar upe yuvireco yepi. ⁴ Iya ité che remihura pisi, che iguarã avei pe sui viña. ⁵ Iyavei inungar ambuae apóstol viraso ité güembireco oyeupi yuvireco yepi, Jesús rivireta avei égüe ehi yuvireco, égüe ehi avei Pedro, égüe ahe aveira niha che viña. ⁶ ¿Ore güeraño tie Bernabé rese oroporavíquira ambuae mbahe rese ore recove áqua? ⁷ Esepia, sundao nomboepi sundao güeco áqua, ahe rumo oporavíquisa reprí oipisiño. Iyavei ava uva tísar, ahe avei yaviyese, ohu güemtitiguer. Iyavei ovesa rârosar, ahe avei omohe ovesa cambi igua. ⁸ Che ndahei cheyesui tēi aipo ahe pēu. Esepia niha, Moisés porocuaita pípe avei aipo ehi yandeu: ⁹ “Pemondo eme tivi yuru rese mbahe icaruéhisa mbahe râhii oicambese yuvireco pēu” ehi. Supi eté co Tūpa aipo ehi vahe ndahei tivi upeño. ¹⁰ Yande reco tupri áqua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe râhii, oyoya osâro mbahe oipisi vaherã oporavíquisa sui oyeupe nara yuvireco yepi. ¹¹ Evocoiyase ore avei oroñotí Tūpa Ñehengaguer pe piña pipe ore pe mbohese. Sese aviyéño aveira oroipisisé mbahe pe sui ore yeyeupe nara viña. ¹² Esepia, ambuae oicatu mbahe pisi áqua oyeupe nara yuvireco pe sui. Evocoiyase ore avei niha oroicatu mbahe pisi áqua pe sui ore poravíquisa pipe viña.

Ore rumo ēgue ndorohei eté. Esepiá, ore oroñemosaño ité ‘tiñehé mara eme co ñehesa Cristo resendar rese yuvireco’ ore yapave. ¹³ Pe niha peicua ité acoi oporavíqui vahe judío tūparove, ichui ocaru yuvireco. Esepiá, yuvirohu mbahe roho Tūpa upe seropovēhepri tūparo rocarve yuvireco yepi. ¹⁴ Ēgue ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu. ¹⁵ Che rumo ndaporandui eté mbahe pe rembiereco rese vichico pēu yepi. Ndahei ‘tombou mbahe yuvireco cheu’ che yapave aipo aicuachía imondo pēu. Che rumo evocoí nungar mbahe rese ayembovihaño ité. ¡Yepe che yucaprí tēira tieporéhi viña, ndaporandui chietera rumo mbahe rese pēu! Esepiá, namocañi potai eté co che yembovihasa cheyesui.

¹⁶ Che rumo amombehuse co ñehesa písirosa resendar ava upe, ndiyai ayeecomboivate ai ipipe. Esepiá niha, che cuaita ité yapo água iyavei, ¡cheperaisu itera ndamombehuisse ava upe co ñehesa viña! ¹⁷ Tūpa ndache cuaise oñehé mombehu água viña, che rumo che queréhisa pipe amombehuse, ahese aipisira Tūpa suindar porerecosa. Ēgue ndahei rumo. Esepiá, Tūpa che cuaisa pipe niha amombehu. ¹⁸ Ndaporanduisse mbahe rese pēu amombehuse co ñehesa písirosa resendar, ipipe ayemboviha ahe che vihasa porerecosa nungar cheu. Yepe aicatu mbahe rese che porandu água viña, che rumo ēgue ndahei eté.

¹⁹ Yepe che ndahei ava povrīve tēi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iqueréhi vahe Cristo reroya água’ che yapave. ²⁰ Esepiá, aicose judío pāhuve, secocuer rupi aicoveño Yar upe imongueréhi catu água yuvireco. Ēgue ahe ité, aicose ava Moisés porocuaita povrīve yuvirecoi vahe pāhuve, che avei eté mborocuaitavrīve nungar aico. Ndahei rumo Moisés porocuaita povrīve ité aico imboaviye água. ²¹ Iyavei ava ndoyuvirecoi vahe Moisés porocuaita povrīve, ipāhuve aicose, inungar ahe yuvirecoi, ēgue ahe tuprí avei imongueréhi água yande Yar upe vichico. Ndahei rumo Tūpa porocuaita mboyeroyaéhisa pipe aico. Esepiá, Cristo porocuaitavrīve che recocuer. ²² Iyavei no, aicose ava yande Yar ndoviroya tuprí vītei vahe pāhuve, secocuer nungar tuprí avei aico Yar upe imongueréhi catu água. Ēgue ahe opacatu ava upe ‘toñepisiro catu ahe avei yuvireco’ viya. ²³ Che ayapo co opacatu mbahe ‘tasetá catu co ñehesa písirosa reroyasar yuvireco’ che hesa pipe, ‘taipisi avei co porovasasa oime vahe co ñehesa reroyasa pipe’ che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoiyase inungar co ivava catu vahe, ēgue peye avei pe recocuer pipe Tūpa porerecosa pisi água peico. ²⁵ Iyavei opacatu oyemoingatu vahe oguayi água oñearo tuprí opacatu mbahe tēi sui oyemomaraéhi água yuvireco. Ahe ēgue ehi porerecosa ndipocopii vahe pisi água tēi yuvireco. Yande rumo yayemomborarara porerecosa apiréhi vahe pisi água yaico. ²⁶ Evocoiyase che avei, ndahei ava oyahuva-huva tēi vahe nungar aico Tūpa remimbotar apo água iyavei che ndaicoi ava iguayi tēi vahe nungar. ²⁷ Che rumo mbiguai nungar che retecuer areco, amboyeroya uca pihañemoñeta tuprisa upe. Esepiá, ndaipotai ambuae ava mbohe pare imombopri tēi nungar guayisa sui che yereco água.

10

Ndiyai aracahendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe pitu Tūpa imboguata agüer rese. Iyavei para guasu Pīra vahe avei osasa opacatu yuvireco aracahe. ² Ëgüe ehi eté opacatu oguatase mbahe pītvirí rupi iyavei para guasu osasase yuvireco, ndoyavii ñapiramombri yuvirecoi Moisés recocuer rupi oguata ãgua aracahe. ³ Iyavei oyoya guasu yuvirohu tembihu Tūpa ombou vahe chupe nara yuvireco, ⁴ opacatu guasu avei oihu ita sui Tūpa ombou vahe ihiguarã yuvireco. Ahe ita rumo inungar Cristo secoi opacatu iguatasa rupi yuvireco. ⁵ Yepe ëgüe ehi Tūpa opacatu yande ramoi judío upe viña, setá iteanga rumo ava ipâhu pendar ndahei aviye vahe ipiha rupi yuvireco. Ipipe sui opa omano ivi iporupirëhisa rupi aracahe.

⁶ Co opacatu mbahe sembiapogüer yuvireco ahe yande mbohe ãgua ‘toipota rai eme mbahe-mbahe tēi inungar ahe ava yuvirecoi’ oyapave yandeu. ⁷ Sese yande ndayamboetei chira mbahe rahanga tēi, inungar ahe ipâhu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroihu avei yuvinoi. Ichui yuviroopüha, oyembovihäño pieta apo yuvireco” ehi. ⁸ Ndayayemboaguasa-guasa tēi chiaveira inungar ahe amove ëgüe ehi yuvireco. Ipipe sui tēi ñepei ari pipe ahe opa omano veintitrés mil tupri yuvireco aracahe. ⁹ Ndayasecoâha-âha tēi chiaveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco. ¹⁰ Iyavei ndayande ñehe mara-mara tēi chira yande Aposar rese, inungar ahe ëgüe ehi yuvireco. Ipipe sui Tūpa ombou güembiguai ava yucasar iva sui ahe ava yucapa ãgua aracahe.

¹¹ Co opacatu yande ramoi upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he ãgua yandeu. ¹² Sese yande “che aico tupri ité Tūpa rese” yahe vahe, yaicua catura rumo. Aviyeteramo yaviapira mbahe tēi pipe. ¹³ Pe recoâhasa rumo oyoya tupri ité ambuae ava recoâhasa rese. Pe rumo peyeroyaño itera Tūpa rese, ahe niha oicua pe yemoviracuasa, noñocuai chira tecôâhasa imbu pêu. Acoi mbahe tēi oimese pe recoâhase, Tūpa ombou voiñora píratasa evocoi mbahe tēi sui pe sê ãgua, chupe pe ñemosâ ãgua.

¹⁴ Sese che rivireta, che rembiaisu, peyepepi mbahe rahanga mboeteisa sui. ¹⁵ Ava niha peico pesenducua vaherã mbahe, evocoiyase peporandu co che remimombehugüer rese peyeupe icua tupri ãgua. ¹⁶ Yaïhuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suvi pipe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara. ¹⁷ Yepe yande reta yaico viña, opacatu rumo yahu ñepei pan sui. Sese yande ñepei vahe ité yaico.

¹⁸ Peyapisaca acoi ava aracahendar Israel recocuer rese. Esepia, acoi yuvirohu vahe Tūpa upendar mbahe seropovëhepri, ahe evocoiyase chupendar ité yuvirecoi. ¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavëhepri mbahe rahanga upe, aviye catu ité” ndahei avei. ²⁰ Co rumo, acoi ava ndoicuai vahe Tūpa oicuavëhe

mbahe caruguar upe tēi yuvireco yepi. Ndahei rumo Tūpa upe nara ité ēgüe ehi yuvireco. Che evocoiyase ndaipotai eté caruguar upe nara tēi ēgüe peye vaherā peico.²¹ Peihuse rumo yande Yar upendar igua, ndiyai peihu avei caruguar upendar igua; iyavei pehuse yande Yar upendar mbahe, ndiyai avei pehu caruguar upendar mbahe.

²² ¿Yasecara pīha yande ae yande Yar ñemoiro ãgua yandeyeupe? ¡Yande rumo ndahei chira ipirata catu vahe yaico ichui!

Yande renosesa mbiguai tēi nungar yande recosa sui mbahe tupri apo ãgua

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. Ēgüe ehi eté niha, ndahei rumo opacatu aviye, ndahei avei co opacatu mbahe yande pītvii catu Cristo rese yande reco ãgua. ²⁴ Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

²⁵ Pehuñio mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pihañemoñetasa momaraëhi ãgua. ²⁶ Esepia, ivi opacatu ipor reseve, ahe yande Yar upendar.

²⁷ Acoi Tūpa reroyasarëhi pe soho ucase oyepíri pe mbocaru ãgua, peso potase ipiri, pehuñora mbahe imbourpi pēu. Ndapeporandui chira rumo sese chupe Tūpa rese pe pihañemoñetasa momaraëhi ãgua. ²⁸ Acoi ava, “Co mbahe roho icuavëhepri mbahe rahanga upe” ehise pēu, ndapehui chira ahe mbahe roho. Ēgüe peyera pēu imombehusar rereco meguaëhi ãgua, ava pihañemoñetasa momaraëhi ãgua avei. ²⁹ Supi eté che añehe co ambuae ava pihañemoñetasa rese, ndahei pe pihañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava piha rupi?” ehi vahe. ³⁰ Iyavei aipo ehira no: “‘Aviye ndeu’ ahese Tūpa upe mbahe ahu vahe rese, ¿mahera pīha che reroírora yuvireco ahuse viña?’ ehira. ³¹ Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tūpa mboeteisa pipe. ³² Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei. ³³ Che opacatu che rembiapo pipe aipota ité mbahe tupri apo ãgua opacatu ava upe nara. Ndahei cheyeuñeño mbahe tupri aseca, ambuae ava upe avei mbahe tupri aipota iñepisiro ãgua yuvireco.

11

¹ Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvireco yepi

² Che rívireta, che, “Aviye ité yuvirecoi” ahe pēu yepi che rese pemahenduha vitese iyavei peguataño vitese che opombohe vahe agüer rupi.

³ Che rumo aicua uca tupri pota pēu, Cristo niha secoi ñepei-peí cuimbahe cuaisar, cuimbahe evocoiyase güembireco cuaisar secoi. Ēgüe ehi avei Tūpa Guahir Cristo upe. ⁴ Acoi cuimbahe Cristo upe ñemonuhasave oãca ndiru ndosequiise oyerure ãgua, anise Tūpa Ñehengagüer mombehu ãgua, ahe ēgüe ehi gürecuar Cristo mboeteiöhisa pipe. ⁵ Iyavei acoi cuña ndoyopíise oãca oyeroqui ãgua, anise Tūpa Ñehengagüer mombehu ãgua,

ahe ëgue ehi omer mbooyeroyaëhisa pipe. Ahe cuña evocoiyase ndoyavii oñeanipa tupri vahe. ⁶ Acoi cuña ndoyopi potaise oâca, tayapecâraisa tupri. Ochise rumo oapecârai âgua, evocoiyase toyopíño oâca sereco. ⁷ Cuimbahe rumo ndoyopii chira oâca sereco. Esepia, ahe Tüpa rahanga ité secoi iyavei iporañetesu omboynecua ité oyese. Cuña rumo omboynecua omer recocuer oyese yuvireco. ⁸ Esepia, Tüpa oyapose cuimbahe, ndahei cuña sui vînose, cuimbahe sui niha cuña oyapo. ⁹ Iyavei ndahei cuña upe nara Tüpa oyapo cuimbahe, ahe rumo oyapo cuña cuimbahe upe nara. ¹⁰ Co rese cuña virecora oâcapisa omer mbooyeroyasa mboynecua âgua omahese Tüpa rembiguai eta yuvireco sese. ¹¹ Yande, yande Yar reroyasar yaico vahe co tecocuer rese, yañepitivii oyoya yaico. Evocoiyase cuimbahe ndoicatui cuña porëhi; cuña avei ndoicatui cuimbahe porëhi yuvireco. ¹² Esepia, yepe supi eté cuimbahe sui yapoprí cuña. Ipare rumo cuña sui oha cuimbahe; opacatu rumo oyoya Tüpa suindar yuvirecoi.

¹³ Evocoiyase peyapisaca tupri co rese: ¡Iya pîha cuña noñeacapii vahe oyerure Tüpa upe? ¹⁴ Yande ité yaicua yemochisa cuimbahe oyemboha vucuse. ¹⁵ Cuña rumo oviharete oha vucu porañetesu rese. Esepia, chupe imondopri ité ñiacapii âgua. ¹⁶ Acoi ava iñehe-ñehe têi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar ëgue ehi avei yuvireco.

Yande Yar rese yemomahenduha raisa

¹⁷ Co ambuae mbahe rese rumo ndaicatui eté, “Aviye tupri yuvirecoi” che he âgua pêu. Esepia, aipo pe ñemonuhasave, mbahe têi eté aipo peyapo. ¹⁸ Esepia, yipindar che ayandu peñemonuhapase aipo oyese yande Yar mboetei âgua pe pihañemoñetasa ndahoyoyai pipe peico. Amove ayanduse pe rerâcua, aroya ité. ¹⁹ ¡Iya ité revo pihañemoñetasa ndahoyoyai vahe reime âgua pe pâhuve Jesús reroyasar supi tupri vahe cua tupri âgua! ²⁰ Peñemonuhase pe pihañemoñetasa ndahoyoyai vahe pipe pe caru âgua, ndahei yande Yar rese pe yemomahenduhasave ëgue peye. ²¹ Espia, aipo pecaruse, pe rane aipo pepoyava pecaru. Ambuae aipo evocoiyase ndasiepoi têi yuvireco; ambuae rumo pe pâhu pendar aipo oyembosavaipoño yuvireco. ²² Pereco niha pe rëta aheve pe caru âgua iyavei pe ihu âgua. Pe rumo pe reco pipe opa peroñro ambuae Jesús reroyasareta peico. Ipipe avei pemochi ava ndovirecoi vahe mbahe. ¡Che evocoiyase, “Aviye yuvireco” ndahei chietera co mbahe pe rembiapo ai rese pêu!

Yande Yar rese yemomahenduhasa supi ité vahe resendar

²³ Co ñehesa aipisi vahe yande Yar suindar amombehu vahe pêu: ahe pîtu pipe acoi Jesús mboguaisar opisi âgua renonde, ahe oipisi pan. ²⁴ “Aviye ndeu” ohe pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco âgua. Ëgue peyera che rese pe mahenduhasa pipe peico” ehi. ²⁵ Ëgue ehi avei ocarure yuvireco, ahe oipisi igua ríru aipo ehi: “Co uva ricuer omboynecua pêu Tüpa oyapora mbahe ipiasu vahe pe recorâ. Che ruvi pipe rumo yaposara. Evocoiyase co ari pipe suive peihuse co, peyemomahenduhara che rese yepi” ehi. ²⁶ Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Ëgue peyera iyevi râro peico.

Mara yahera yande Yar rese yayemomahenduhase

²⁷ Evocoiyase acoi ava ocaruño tēi vahe, yuviroihuño tēi vahe avei Yar mboeteiēhisave, ahe evocoiyase nomboetei yuvireco yande Yar rembiapocuer omondose güetecuer, iyavei oipiyerese vuvi. ²⁸ Sese tipihañemoñeta rane oyacatu güecocuer rese ava co pan hu ãgua renonde, oihu ãgua renonde avei co uva ricuer yuvireco. ²⁹ Esepio, acoi pe yemomahenduhäehisave co setecuer rese pehuse iyavei peihuse, ahese mbahe naporai vahe peseca peyeupe nara peico. ³⁰ Ichui niha setá pombaheasi, oime setá nimirata iri vahe avei pe pâhuve, oime avei omano vahe pe pâhu pendar. ³¹ Yande pihañemoñeta tuprise rumo yande reco ãgua rese, yande Yar evocoiyase nomoimei chira mbahe tēi yandeu evocoiya yande recosa pipe. ³² Yande Yar rumo oicua yande rembiapo ai. Sese omoime mbahe tēi yandeu. Yande reco mohivi tupri ãgua rumo ëgue ehi yandeu, ndahei yande cañi ãgua opacatu ava viroyasaréhi reseve.

³³ Sese, che rivireta, acoi peñemonuhase pe yemomahenduhá ãgua yande Yar rese, peñearo ranera oyoya guasu pe caru ãgua. ³⁴ Acoi ava ndasiepoise yuvireco, tocaru rane güetave. Ahese yuvirasose ñemonuhasave, ndipoi chira mbahe chupe. Iyavei che asose eipeve pe repia, opara ambuae mbahe amoingatu vicho pẽu.

12

Mbahecusa Tūpa Espíritu suindar

¹ Che rivireta, che aicua uca pota pẽu co mbahecusa resendar ñepei-peí pẽu Espíritu omondo vahe.

² Pe niha cûritei peicua tupri ité yipindar Tūpa rese peicoëhi vitese, peyembopa uca mbahe rahanga ëgue ehi tēi, noñehei vahe upe peico.

³ Sese, che aipota peicua acoi ava iñehe mara Jesús upe ndahei Tūpa Espíritu píratasa pipe ëgue ehi. Iyavei ava ndoicatui chira, “¡Jesús che Yar secoi!” ohe ãgua opicha pipe Espíritu Santo ndovirecoise.

⁴ Oime setá ambuae-ae tēi mbahecusa Espíritu suindar yande Jesús reroyasar yaico vahe upe nara, ahe Espíritu rumo ñepeiño ité imondosar secoi. ⁵ Setá mbahe avei oime mbahe yayapo vaherã yande Yar upe.

Ahe yande Yar rumo ñepeiño ité secoi. ⁶ Iyavei setá oime ambuae mbahe Tūpa oyapo vahe yande rese opíratasa pipe, Tūpa rumo ñepeiño ité secoi. Ahe oyapo opacatu co mbahe ñepei-peí yande rese. ⁷ Ahe omboyecua yande Espíritu rerecosa ñepei-peí yandeu opacatu yande reco tupri ãgua. ⁸ Espíritu píratasa pipe Tūpa omondo ñepei viroyasar upe iñehe ãgua aracuasa rese iyavei ambuae upe omondo iporombohe tupri catu ãgua ombahecusa pipe. ⁹ Ambuae upe evocoiyase omondo oyese yeroya tupri catu ãgua oEspíritu pipe sui avei. Iyavei ambuae upe omondo opíratasa imbaheasi vahe mbogüera ãgua. ¹⁰ Ambuae oipisi píratasa mbahe poromondiisa oyapo vaherã yuvireco. Ahe ichui avei vireco ambuae ava omombehu vaherã ñehesa Tūpa suindar yuvireco. Ambuae upe Tūpa omondo mbahecusa espíritu naporai vahe iyavei Espíritu supi tupri vahe cua tupri ãgua. Ambuae evocoiyase ichui avei oicatu ñehesa ndicuasai vahe Tūpa suindar pipe ofiehe ãgua. Ahe ichui avei ambuae oicatu ahe ñehesa ndicuasai vahe mombehu tupri ãgua ava upe. ¹¹ Ëgue ehi Espíritu ñepeiño ité güemimbotar rupi omondo ñepei-peí yande Jesús reroyasar yaico vahe upe co mbahecusa.

Opacatu Cristo rese yaico vahe ñepeiño ité yande recocuer

¹² Inungar yande retecuer resendar setá mbahe oime viña, ahe rumo ñepeiño ité; ñgue ehi avei Cristo. ¹³ Ñgue yahe avei opacatu, yepe yande pâhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepei vahe nungar yande reco água Espíritu avei opa yaipisi.

¹⁴ Supi eté yande rete resendar ndahei ñepei mbahe, setá rumo mbahe. ¹⁵ Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tēi ndaseco iri chira yande rete rese. ¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tēi ndaseco iri chira yande rete rese! ¹⁷ Esepia, opacatu tupri yande rete sesa pâve tēise, ndayasendui chietera evocoiyase mbahe viña. Anise, yande rete yapisacuar pâve tēise, ndayasëtui chietera evocoiyase mbahe viña. ¹⁸ Túpa rumo ñepei-pei yande rese mbahe omondo senara rupi tupri güemimbotar rupi. ¹⁹ Yande opacatu ñepei ava rete resendar nungar pâve tēise, ndahei evocoiyase opacatu tupri ava rete nungar yaico. ²⁰ Supi eté yepe setá mbahe yande rete rese, ñepeiño ité rumo yande rete.

²¹ Iyavei que yande resa ndiyai aipo ehira yande po upe: “¡Nde ñgue ere tēi vahe eico!”; anise que yande áca avei, “¡Nde ñgue ere tēi vahe eico!” ndehi chira yande pi upe. ²² Esepia, yande rete resendar mbahe aviye nimiratai vahe yandeu, ahe sese rumo yayeroya catu. ²³ Iyavei yande rete rese mbahe ndayasaisu tupri vahe, ahe rumo yamboyemonde tupri ai sereco. Iyavei no yande rete resendar mbahe ndayamboycuai vahe ava rembiepiave, ahe yayopi tupri sereco. ²⁴ Oime rumo ambuae yande rete resendar ndayayopii vaherā. Ñgue ehi Túpa yande rete resendar mbahe imoingatu tupri. Evocoiyase yande rete resendar mbahe ndayasaisu tuprii vahe imboeteipri catu secoi. ²⁵ Tipo eme pihañemoñetasa ndoyoyai vahe pe pâhuve. Oyoya pehañeco tupri ñepei-pei peyese peico. ²⁶ Evocoiyase que ñepei yande pâhu pendar upe mbahe tasise, opacatu ambuae upe avei tasi; anise que ñepei imboyeroyapri secoise, ambuae avei opacatu oyembovih yuvireco sese.

²⁷ Supi eté pe inungar Cristo rete peico. Ñgue peye ité ñepei-pei chupendar ité peico. ²⁸ Ñgue ehi Túpa iporavo viroyasar pâhuve, “Toime rane yipindar apóstol; ipare toime ava che ñehengagüer mombehü água, ichui ambuae upe iporombohe água, ipare ambuae mbahe ndayasepiaeai vahe apo água, iyavei ambuae ava imbaheasi vahe mbogüera água, ambuae ava pítiviisar tasecoi, ambuae ava recocuer reroguata tupri água tasecoi, ambuae ava evocoiyase toñehe ñehesa ndicuasai vahe pipe” ehi. ²⁹ Ndahei rumo opacatu ava apóstol yuvirecoi, iyavei ndahei opacatu Túpa ñehe mombehusar yuvirecoi, ndahei opacatu oporombohe yuvireco, ndaopacatui avei oyapo mbahe ndayasepiaeai vahe yuvireco, ³⁰ ndahei opacatu vireco píratasa oporombogüera água yuvireco, iyavei ndahei opacatu ndicuasai vahe ñehesa Espíritu suindar pipe oñehe yuvireco, ndaopacatui avei oicua evocoi ñehesa renducua uca água ambuae ava upe yuvireco. ³¹ Peseca ru Espíritu suindar mbahecuada aviye catu vahe peyeupe nara.

Yembohesa yande poroaisu ãgua resendar
Che rumo amombehura tecocuer aviye catu vahe pēu.

13

¹ Yeve yande yañeheño tēise ambuae ava ñehe ndayaicuai vahe pipe, iyavei Tūpa rembiguai ñehe pipe avei viña, ndayasaísuisse rumo ava ipipe, yande evocoiyase ëgue yahe tupri tēi inungar mbahe guarePOCHI apopri siapu iteanga vahe, iyavei inungar acoi platillo siapú rai tēi vahe, ëgue yahe tēi yaico. ² Iyavei yepe yamombehuño tēise Tūpa suindar ñehesa ou vahe yandeu viña, iyavei yepe yaicuase mbahe opacatu icuapiréhi Tūpa suindar yaico, yarecose avei yande aracuasa opacatu yandeyese, iyavei yepe yande Tūpa rese yeroya pipe yarosirira ivitri guasu senda sui viña, ndayasaísuisse rumo ava ipipe, yande evocoiyase ëgue yahe tupri tēira yaico. ³ Iyavei yande mbahe opacatu yareco vahe yamboyaho-yaho tupri tēise ava iparaisu vahe upe viña, iyavei yayoapi ucapa tupri tēise viña, ndayasaísuisse rumo ava ipipe yaico, ndayande pítivii eté evocoiya yande reco agüer.

⁴ Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotaréhi ambuae ava mbahe potasave; “Che aviye catu vahe aico” ndehi avei, ndoyecomboívate ai eté, ⁵ ahe ndovírecoi eté oporomboeteiéhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe. ⁶ Ndahei mbahe tēi rese oyembovíha; ahe rumo oyembovíha mbahe supi tupri vahe rese. ⁷ Oporoaisusa virecose oñemosaño opacatu uve, oyeroya víte sese, osáro víte mbahe tupri ichui, iyavei seco mbegüe víteño chupe.

⁸ Poroaisusa niha ndopai vahe ité. Oyepotara ari ipapaprí coiye, ahese ndayamombehu iri chira Tūpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecuasa. ⁹ Esepia niha, yaicua raimi tēi mbahe iyavei chihí raimi tēi yamombehu Tūpa Ñehengagüer. ¹⁰ Acoi ouse rumo oicuapa tupri vahe mbahe, ahese ndahe iri chira yaicua raimi tēi vahe yaiporura.

¹¹ Esepia niha, chihivahé víte yande recose, yañehe, yan-depihañemoñeta, yasenducua mbahe chihivahé nungar; yacuacuase ité rumo cute, yaseyapa chihivahé yande reco agüer. ¹² Cúritei yande ndayasenducua tuprii Tūpa resendar mbahe, inungar acoi yepiasa pipe yasepia hâvomi tēi que mbahe; oyeovai eté yaicose rumo, yasenducua tupri catu itera mbahe evocoiyase. Cúritei rumo yaicua raimi tēi mbahe Tūpa suindar yaico; coiye rumo yaicua tupri catu itera, inungar ahe oicua tupri ité yande recocuer.

¹³ Co oime mbosapi mbahe ndopai vaherá, ahe: Tūpa rese yande yeroysa, mbahe yande remiaro ivave oime vahe iyavei yande yeaisusa; co imombosapisa rumo aviye catú vahe ité ambuae sui yandeu, ahe yeaisusa.

14

Yaseca catura Tūpa suindar ñehesa mombehu ãgua

¹ Peseca catu pe yeaisu tupri ãgua peico; aheseve avei peipotara mbahecuasa Tūpa Espíritu remimbou. Ichuindar ñehesa mombehu ãgua rese catu ité rumo peicora. ² Esepia, acoi ava oñehe vahe ñehesa ndayaicuai vahe pipe, Tūpa upe ité evocoiyase oñehe; ndahei ava upe tēi oñehe.

Esephia, ndipoi eté ava iñehe renducuapar. Ahe rumo oñehe mbahe ndicuasai vahe rese oespíritu pipe. ³ Acoi ava omombehu vahe rumo Tūpa suindar ñehesa yasenducua vahe pipe, ahe oipítivii ambuae ava Tūpa rese iyeroya ãgua, oporomonguerëhi catu, oporomboviha catu avei. ⁴ Acoi ava oñehe vahe rumo ñehesa ndayaicuai vahe pipe, ahe ae tēi vireco catu Tūpa rese opihañemoñetasa. Acoi ava omombehu vahe rumo Tūpa suindar ñehesa icuaprí ité, ahe ombopihañemoñetá catu Tūpa rese Cristo reroyasar yuvirecoi vahe.

⁵ Yepe aipotara opacatu pe ñehe ãgua ñehesa ndayaicuai vahe pipe pēu viña, aviyé catu rumo pemombehura Tūpa suindar ñehesa icuaprí vahe peico. Esephia, ahe aviyé catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tuprī ãgua, ahese aviyéño oñehe Jesúz reroyasar rovaque. Ipipe sui ipihañemoñeta catura Tūpa rese yuvireco. ⁶ Sese, che rívireta, asose pe repia, añehese co ñehesa ndayaicuai vahe pipe pēu, ndapesenducuai chira che ñehe viña. Amombehuse rumo Tūpa oicua uca vahe cheu que mbahecuada supi tuprī vahe resendar, anise que ñehesa Tūpa suindar, anise que ambuae porombohesa, ahese pesenducuara viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbi, arpa avei. Esephia, ndoyoya tupriise iñehegüer yuvireco, ndayasenducuai eté evocoiyase mbahe-mbahe sapucaisa osâha yuvireco. ⁸ Anise co inungar mimbi nomoñehe tupriise vavasave nara yuvireco viña, ndipoi chietera que ava oyemoin-gatu voi vaherä ovava ãgua viña. ⁹ Ëgüe peye avei niha peico peñehese ava upe ñehesa ndayasenducuai vahe pipe, ahe evocoiyase osenduño tēi, ndosenducuai eté rumo pe ñehe yuvireco. ¹⁰ Evocoiyase peñehéño tēi eté! ¹¹ Supi eté, setá iteanga co ivi pipe oime ambuae-ae tēi ava ñehesa. Oime avei rumo ava osenducua vahe aipo nungar ñehesa. ¹² Pe niha peipota ité pereco vaherä mbahecuada Tūpa Espíritu suindar yepi. Sese peporandu catu mbahecuada Espíritu suindar rese opacatu Jesúz reroyasar pítivii ãgua Tūpa rese yuvirecoi tuprī catu vaherä.

¹³ Sese acoi ava oñehe vahe ñehesa ndayaicuai vahe pipe, toporandu rane Tūpa upe ambuae ava upe senducua uca tuprī ãgua rese. ¹⁴ Esephia, acoi yayeroquiño tēise Tūpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui. ¹⁵ ¿Mara yahera vo evocoiyase? Yayeroquira yande espíritu pipe, yande aracuasa pipe avei. Yasapucaira yande espíritu pipe, yande aracuasa pipe avei no. ¹⁶ Esephia, acoi Tūpa upe, "Aviye ndeu" yahese yande espíritu pipe güeraño, evocoiyase ava ndosenducuai vahe, oyemboyase yande rese iyavei osenduse yande yeroquisa, "Aviye ité" ndehi chietera yuvireco. Esephia niha, ahe ndosenducuai eté yande yeroqui yuvireco. ¹⁷ "Aviye ndeu" yande hesa, aviyeteramo aviyera Tūpa upe viña, ambuae ava rumo osenduse, noipitivii chietera Tūpa rese imbopihañemoñeta catu ãgua senducuaëhi pipe. ¹⁸ "Aviye ndeu" ahe Tūpa upe. Esephia, añehese catu ñehesa ndayaicuai vahe pipe opacatu pe sui. ¹⁹ Jesúz reroyasar ñemonuhasave rumo aipota catu amombehu vaherä movíromi tēi ñehesa

yasenducua vahe ava mbohe ãgua setá ñehesa ndicuasai vahe pipe che ñehe rãguer sui.

²⁰ Che rivireta, pepihañemoñeta eme chihivahemi pihañemoñeta nungar pipe. Iyacatu rumo peicora cuacula vahe pihañemoñeta nungar pipe. Peyemochihivahe catuñora rumo peico mbahe naporai vahe apoëhi ãgua. ²¹ Porocuaita resendar icuachiapri aracahendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara iñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe. ²² Evocoiyase co ñehesa ndayaicuai vahe pipe oñehese ava Tüpa píratasa pipe, ahe Jesús reroyasarëhi yuvirecoi vahe upe nara: “¡Peicua catu, co supi tupri vahe!” he ãgua. Ndahei rumo ava Jesús reroyasar yuvirecoi vahe upendar. Ñehesa Tüpa suindar senducuapri yamombehuse rumo, ahe, “Co supi tupri vahe” he ãgua Jesús reroyasar yuvirecoi vahe upe; ndahei ava seroyasarëhi yuvirecoi vahe upendar. ²³ Evocoiyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tëi, ipare yuviroiquese pe pähuve Jesús reroyasarëhi ndosenducuai vahe Tüpa suindar mbahe yuvireco, “¡Opacatu co ndayaracuai vahe tëi yuvireco!” ehira yuvireco pëu. ²⁴ Opacatu rumo peñehese Tüpa suindar ñehesa yasenducua vahe pipe, yuviroiquese evocoii nungar ava yuviraso pe pähuve, ahe ae evocoiyase, “Supi eté ayavi che recocuer Tüpa rovaque” ehira pe ñehe renduse yuvireco. ²⁵ Ëgüe ehira opihañemoñeta rai ndoyecuai vahe imborporëhipa uca oyeupe pe ñehe rendu ramose yuvireco. Ipipe sui omboeteira Tüpa yuvireco. Ahese, “Supi eté catu Tüpa ité pereco peyese” ehira yuvireco pëu.

Yayapora mbahe opacatu yanda cuaita rupi ñemonuhasave

²⁶ Sese che rivireta, peñemonuhase, oime pe pähu pendar osapucai pota vahe sapucaisa Tüpa upendar, ambuae evocoiyase oipota ité ava mbohe yuvireco, anise ambuae omombehu pota ava upe mbahe oyeupe omboycua uca vahe Tüpa, ambuae oipota ité oñeho ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu ãgua yuvireco. ²⁷ Acoi ava oñehese ñehesa ndayaicuai vahe pipe, toñehe ñuvirío güeraño yuvireco, anise que mbosapi ñepei-peí rupi; ñepei evocoiyase osenducua ucara iñehe ava upe oico. ²⁸ Acoi ndipoise ité rumo ambuae ava ahe ñehesa ndayaicuai vahe renducua uca ãgua, ndiyai ahe oñehera yuvireco pe ñemonuhasave; oyeupeñomi evocoiyase ahe oñehera ipipe yuvireco Tüpa upe. ²⁹ Ëgüe peye tupri aveira pemombehuse Tüpa suindar ñehesa ambuae ava upe, peñehera ñuviriomi, anise mbosapi. Ambuae evocoiyase pe pähu pendar oyapisaca tuprira sese yuvireco ‘¿supi eté píha?’ oħesave. ³⁰ Que ñepei oñeho vitese Tüpa oicua ucase mbahe ambuae ava upe, topituhuño yipindar oñeho vahe, ambuae evocoiyase toñehe pëu. ³¹ Evocoiyase ëgüe peyera peñeho ñepei-peí opacatu ambuae osendu vahe mbohe ãgua iyavei imonguerëhi catu ãgua. ³² Acoi omombehu vahe ñehesa Tüpa suindar, ahe oicatu oñeho mombituhu ãgua. ³³⁻³⁴ Esepio, Tüpa secoi mbahe aviyé vahe aposar, ndahei ndoyembohe catui vahe.

Ndiyai cuña upe iñehe ãgua pe ñemonuhasave. Esepio, ëgüe ehi avei opacatu ambuae Jesús reroyasar ñemonuhasa rupi yuvireco. Evocoiyase

ndiyai eté aheve iñehe água yuvireco chupe. Iyacatu rumo ahe imboyeroyapri yuvirecoira omer upe Tūpa porocuaita rupi.³⁵ Oicua potase que mbahe, iya omer upe oporandura güetave yuvireco. Esepiá, cuña upe ndiyai eté iporandu água mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tūpa Ñehengagüer ava upe peico, ndahei avei pëuñomi ou Tūpa suindar ñehesa. ³⁷ Acoi que pe pâhuve oimese “che Tūpa Ñehengagüer mombehusar aico” ehiño tēi vahe, anise que “aicua Espíritu suindar mbahe” ehi vahe, iya rumo oicua tupri co aicuachía vahe imondo pëu, ahe yande Yar porocuaita resendar. ³⁸ Ahe ndoyapisaca potaise rumo che ñehe rese, ñehe rese evocoiyase ndapeyapisacai chira.

³⁹ Sese, che rivireta, peyemongueréhi catu Tūpa suindar ñehesa icuaprí vahe mombehu água peico. Ndiyai rumo ndapeipotai ambuae ava upe ñehesa ndayaicuai vahe pipe iñehe água. ⁴⁰ Peyapora rumo opacatu mbahe ñepei-peí pe cuaita rupi mbahe tupri pipe.

15

Cristo cuerayeví agüer

¹ Che rivireta, che aipota peyemomahenduha acoi ñehesa písirosa resendar pëu mombehu vahecuer rese. Co ñehesa niha peipisi. Ipipe sui avei niha peyemoviracua peyese. ² Seroya pipe niha peñepisíro peico peyemoviracuase sese. Ëgüe ndapeyeise rumo, peroya tupri tēi.

³ Acoi ñehesa aipisi vahe, opa uca aicua pëu. Esepiá, ahe aviyé catu vahe: Cristo omano yande angaipa repírā Tūpa Ñehengagüer icuachiapri rupi eté ⁴ iyavei oñoti sehögüer yuvireco. Ipare rumo, imombosapisa arí pipe, ocuerayeví iri icuachiapri rupi eté avei. ⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe. ⁶ Ichui oyemboyecua quiniento sui setá catu vahe viroyasar upe. Evocoiyase oyoya guasu osepiá yuvireco. Setá vite rumo sepiasarer yuvirecove vite cûritei; amove rumo ambuae opa omano yuvireco. ⁷ Coiye oyemoporéhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviyé evocoiyase che ipá oha vahe aico seroya água. ⁹ Esepiá, che seco ívi cotí catu vahe opacatu ambuae apóstol sui aico. Iyavei ndacheäroi eté apóstol che reco água viña. Esepiá, che yipindar seroyasar aseca-seca catu vahe mara-mara tēi sereco água. ¹⁰ Che rumo apóstol ité aico. Esepiá, Tūpa oyapo mbahe aviyé vahe ité cheu; che rovasa oico. Evocoiyase che recocuer osecuñaro ité sereco. Ichui che aporavíqui catu ité opacatu ambuae apóstol sui. Ndahei rumo cheyesui tēi ëgüe ahe vichico, Tūpa rumo oporovasasa pipe secoi che rupi. ¹¹ Ndapepiñañemoñetai chira rumo acoi oporavíqui catu vahe rese tēi. Co ñehesa Cristo recocuer resendar ore oromombehu vahe rese rumo pepiñañemoñeta catura. Esepiá niha, ahe peroya vahe ité peico.

Ava omano vahe cuerayevisa

¹² Oromombehu ité niha Cristo cuerayeví agüer resendar pëu. Oime rumo amove pe pâhu pendar, “¿Mahera aipo ocuerayevira omano vahe yuvireco viña?” ehiño yuvireco. ¹³ Ndocuerayeviise ité rumo ava omano vahe viña, Cristo avei evocoiyase ndocuerayeviise chietera viña; ¹⁴ iyavei Cristo ndocuerayeviise viña, ore secocuer oromombehu vahe evocoiyase ëgüe ehi tēi etera viña. Iyavei pe yeroyasa Cristo rese

ẽgue ehi tẽi aveira viña. ¹⁵ Acoi ẽgue ehise ité rumo viña, ore avei evocoiyase orofeheño tẽi etera Tūpa resendar ñehesa rese oroico viña. Esepia, “Tūpa Cristo ombogüerayevi” orohe ité imombehu ava upe oroico. Ndocuerayeviise ité rumo omano vahe yuvireco viña, ahese Tūpa nombogüerayevii chiaveira Cristo viña. ¹⁶ Ëgue ehi eté, acoi omano vahe ndocuerayeviise yuvireco viña, Cristo avei evocoiyase ndocuerayevi chietera viña; ¹⁷ Tūpa rese pe yeroyasa evocoiyase ẽgue ehi tẽi vahe itera viña; angaipa pipe viteño tẽi evocoiyase pe recocuer viña. ¹⁸ Iyavei acoi ẽgue ehise ité viña, evocoiyase omano vahe Cristo reroyasar, ahe avei ocañi tẽira viña. ¹⁹ Ndipoise yasāro vaherã Cristo suindar mbahe yamanose, yande evocoiyase imbopaprí tẽi catu itera yaico opacatu ambuae ava sui yuvireco viña.

²⁰ Cristo rumo supi eté ocuerayevi omano vahe pãhu sui; ahe rane yipindar ocuerayevi vahe. ²¹ Esepia, ñepei ava rembiapo sui oime manosa yandeu. Evocoiyase ñepei ava rembiapo sui avei yacuerayevira. ²² Esepia, inungar acoi Adán rembiapo ai sui ava opacatu omano yuvireco, ẽgue ehi aveira Cristo rembiapo sui opacatu ava sese yuvirecoi vahe virecora tecovesa yuvireco. ²³ Ñepei-pei yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acoi ahe oyevise curi. ²⁴ Ahese oura ari ipa vahe cute. Yipindar rumo Cristo omocañipara opacatu seco pírata ẽgue ehi tẽi vahe. Ipare omondora opovrí pendar Vu Tūpa upe. ²⁵ Ahe rane ité rumo opacatu oporocuaira oico acoi Tu opase voi eté omondo opacatu yamotarëhimbar ipovriva. ²⁶ Ahese ipa manosa opa itera. ²⁷ Esepia, Tūpa osecopi opacatu mbahe imondo ipovriva, “Opacatu ité mbahe secopiprí” ehise. Ndahei rumo Tu Tūpa avei secoi ipovriva. Esepia, Tu ité opacatu mbahe osecopi imondo ipovriva. ²⁸ Evocoiyase, opase mbahe imondosa ipovriva, ahe ae evocoiyase oyemondora Vu Tūpa povriva. Tu evocoiyase secoira ivate catu vahe opacatu mbahe sui.

²⁹ Ndipoise omano vahe cuerayevi áqua yuvireco viña, ¿mbahe rese píha evocoiyase omanose ava, amove chupe nara tẽi ambuae oñepiramo uca yuvireco? Esepia, omano vahe ndocuerayeviise yuvireco viña, ¿mahera ru evocoiyase ahe ava oñepiramo uca chupe yuvireco? ³⁰ Iyavei ore no, ¿mahera ru evocoiyase oroyemondora mbahe tẽi upe ari rupi viña? ³¹ Supi eté, che rivireta, ari yacatu aviye che amano vaherã opacatu co mbahe tẽi sui. Ahe pipeve avei rumo che areco ité che viharetesa pe rese yande Yar Jesucristo rese che recose. ³² Oime mbia Efeso pendar mbahe tẽi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayeviise rumo yuvireco viña, evocoiyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoí nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoiyase virovara pe reco tuprisa” ehi vahe. ³⁴ Pepihañemoñeta tuprí iri, peyemboangaipa uca iri eme. Esepia, amove pe pãhu pendar oime ndoicuai vahe ité Tūpa yuvireco. Che aipo ahe ité pěu ‘toyuvinochi che ñehe osenduse yuvireco’ viya.

Yande retecuer cuerayevisa resendar

35 Aviyeteramo pe pāhu pendar oimera oporandu vahe: “¿Mara ehira pīha omano vahe ocuerayevi irise yuvireco coiye? ¿Mara ehi angahura pīha setecuer ahese yuvireco?” ehira yuvireco oyeupe.³⁶ ;Pe aipo peyepye tēi peico! Esepia, mbahe rāhii yañotise, ituyu rane ité sori ãgua.³⁷ Yañotise mbahe, sāhii rane ité yañoti; ndahei ihi opacatu reseve yañoti.³⁸ Ipare rumo Tūpa omondo ahe mbahe rāhii upe ihiguā güemimbotar rupi, iyavei ambuae mbahe rāhii yacatu omondo ihiguā.³⁹ Ndahoyoyai rumo que ñepei mbahe miti hi ambuae mbahe miti hi rese. Ëgue yahe avei yande yaico vahe ambuae ité yande rete mbahe mimba sui; vīrai rete ambuae ité iyavei pira rete ambuae tēi no.⁴⁰ Ëgue ehi avei niha, oime iva pendar rete, ivive ava yuvirecoi vahe rete avei no. Iva pendar rete catuprigüer rumo ndahoyoyai eté ivi pipendar rete rese.⁴¹ Arí rendigüer avei ndahoyoyai yasi rendigüer rese, yasitata rendigüer rese avei. Ñepei yasitata ambuae yasitata rese ndahoyoyai avei sendigüer yuvireco.

⁴² Ëgue ehi aveira niha omano vahe cuerayevisa; yañotise sehögüer, ahe ituyu vaherā. Ocuerayevise rumo ndituyu iri chietera; apirēhi vaherā ité secoira.⁴³ Tehögüer ñotimbri nimomburusai vahe; coiye ocuerayevise rumo, imboeteipri ité secoi. Acoi ava rehögüer oñoti vahe yuvireco, nimirata iri eté oico, coiye ocuerayevise rumo, ipirata itera.⁴⁴ Supi eté, acoi ava rehögüer ñotisa vahe, ahe co ivi pipendar tēi setecuer. Ocuerayevise rumo, setecuer ivi pendar secoira. Esepia, oime ité ivi pendar setecuer, oime avei iva pendar setecuer.

⁴⁵ Supi eté aipo ehi icuachiapri aracahendar pipe: “Yipindar ava Adán serer vahe. Ahe sete upe ombou Tūpa secove ãgua co ivi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa iva pendar ava upe imbou ãgua.⁴⁶ Yipindar oime co ivi pipendar tecovesa. Ipare rumo oime co tecovesa iva pendar yandeu.⁴⁷ Ëgue ehi yipindar ava ivi sui yapopri, ivi rese nara ité icuaita oico; coiye catu ava ou vahe evocoiyase iva pendar.⁴⁸ Inungar yipindar ava ivi suindar, ëgue ehi avei opacatu ava ivi suindar tecovesa rereco yuvireco. Iyavei inungar Jesús iva suindar, ëgue ehi aveira opacatu iva suindar tecovesa vireco vahe yuvireco.

⁴⁹ Iyavei inungar cûritei Adán nungar tupri yaico; ëgue yahe aveira yande Jesucristo iva pendar nungar tupri yaico curi.

⁵⁰ Che rívireta, co mbahe amombehu potami pēu: acoi ava upe güetecuer reseve, ndiyai eté seique ãgua ivave Tūpa mborerecuasave. Esepia, co yande rete ocañi tēi vaherā, ndoipisii chira tecocuer apirēhi vahe.⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara.⁵² Mimbi moñehese voi yande resapihara inungar yande resapiqui vahe, ëgue ehira secuñarosapa yande rete. Aheseve avei omano vahe ocuerayevipara apirēhi vaherā ité yuvireco; yande evocoiyase nayamano vitei vahe, opaño tēira yande rete secuñarosa.⁵³ Esepia, co yande rete ocañi tēi vaherā, ahe yande rete niha opara oñecuñaro apirēhi vaherā yuvireco.⁵⁴ Ëgue ehise yandeu, ahese ramo osupitira Tūpa ñehe icuachiapri pipe imombehupri yandeu curi: “Manosa opara imocañisa” ehi vahe.⁵⁵ Iyavei aipo ehi: “Ndayasiqiye iri chira yande mano ãgua. Esepia, manosa ndovireco iri chira oyerojasa oyese inungar acoi cau popiar opa vahe serocuasa ichui” ehi.⁵⁶ Angaipa niha inungar mbahe

popiar omoime vahe manosa yandeu. Moisés porocuaita aracahendar evocoiyase ombou píratasa angaipa upe angaipa aposar mocañi uca água. ⁵⁷ Che rumo, “¡Aviye ndeul!” ahe Túpa upe. Esepio, ahe ombou angaipa recopi água yandeu yande Yar Jesucristo rembiapo sui.

⁵⁸ Sese, che rívireta, peico tupriño ité Cristo rese iyavei peyemoviracua opacatu mbahe tēi upe; peporavíqui catuño yande Yar upendar mbahe rese peico. Esepio, peicua niha yande Yar rese peicose, pe poravíquisa ndahei ñgue ehi tēi vahe.

16

Porerecosa Jesús reroyasar pítivií água resendar

¹ Iyavei co guarepochi monuha água iparaísu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ívi Galacia rupindar upe. ² Domingu yacatu iya pe avei peipeha voimi guarepochi peico pe poravíqui reprí sui yapocatu água. Eipeve che yepotase, ndapeyemañeco iri chira guarepochi monuha água rese peico. ³ Evocoiyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso água yuvireco ahe pendar yuvirecoi vahe upe. ⁴ Aviyeteramo, iyase cheu, che avei asora aheve. Evocoiyase ahe yuvirasora che rupi.

Pablo ipihañemoñeta oguata água rese

⁵ Che sose, asora ívi Macedonia rupi, ipare asora pe repia Corinto ve. ⁶ Aviyeteramo apita pucumira pe piri, anise aviyeteramo pe pírive ité mbahe porañehi che mombitañora. Ipare pe che pítiviínomira peye eipeve sui ambuae tecuave che so água rese. ⁷ Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri. ⁸ Che rumo cûritei apitañu vitera cohabe Efeso ve, asepio ranera Pentecostés pieta. ⁹ Esepio, oime ité yande Yar upe che poravíquisa aviye vahe ité cohabe, yepe setá iteanga ava che amotaréhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pâhuve. Esepio, ahe avei oporavíqui yande Yar upe nara oico che nungar. ¹¹ Tipo eme ñepei yepe sepia potañhisar yuvireco, iya rumo peipítivií catura che piri iyepota tupri água rese. Esepio, che iyavei ambuae Jesús reroyasar rese orosáro ité iyepota água oroico.

¹² Yande rívri Apolos upe, “Eso ambuae Jesús reroyasar piri Corinto ve” ahe tēi. Cûritei rumo niqueréhii oso pe repia; iyase chupe, ahese osora pe piri.

Pablo mahenduhasa ipa vahe

¹³ Pemahemoha peyese; peyemoviracua avei Jesús rese pe yeroyasa pipe. Peñemosayo catu pe cuaita upe. Peicoveño itera Túpa píratasa pipe. ¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rívireta, pe peicua Estéfanas opacatu güëta pendar reseve, ahe ranei yipindar ívi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri água yuvireco no. ¹⁶ Evocoiyase che aipota peyemboyeroyara evocoi nungar ava rese iyavei opacatu ambuae yande Yar upe oporavíqui vahe rese avei.

17 Pe pāhu pendar Estéfanas, Fortunato iyavei Acaico cohavé oyepotase che mboviha yuvireco. Esepio, ahe oyapo ité pe ndapeicatu tuprii vahe apo yuvireco. 18 Ahe che mongueréhi catu yuvireco, ēgüe ehi avei revo pēu no. Pemboeteira evocoi nungar ava peico.

19 Jesús reroyasar Asia pendar opacatu ombou omahenduhasa yuvireco pēu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sétave yuvireco, ahe avei ombou omahenduhasa yande Yar rer pipe yuvireco pēu. 20 Opacatu Jesús reroyasar coha pendar avei omondo omahenduhasa yuvireco pēu. Peyeovaupite catu pe reco maranehisa pipe ahe mahenduhasa mombehu peyeupe pe viharettesave.

21 Che Pablo, che po pipe ité aicuachía co che mahenduhasa imondo pēu.

22 Acoi ava ndosaisui vahe yande Yar Jesucristo, ahe tocañi mbahe tēi pipe. ¡Toyevi pihaivi voi yande Yar ou!

23 Yande Yar Jesucristo tape rovasa ité yepi. 24 Pēu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pēu.

IMOÑUVIRIOSA PABLO REMBICUACHIA CORINTO PENDAR UPE CORINTIOS

Pablo mahenduhasa Jesús reroyasar Corinto pendar upe

¹ Avirave, opacatu Jesús reroyasareta Corinto pendar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pēu. Co yande rīvri Timoteo avei omondo omahenduhasa pēu. ² Tapeipisi catu yande Ru Tūpa, yande Yar Jesucristo porovasasa avei pe reco tupri ãgua.

Pablo paraísu agüer resendar

³ Yamboeteño itera yande Ru Tūpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mboviha ãgua yepi. ⁴ Ahe niha yande mbovihaño opacatu yande paraisu pipe, yande avei evocoiyase yaicatura ava iparaísu vahe mboviha ãgua yuvireco. Ëgüe ehi eté Tūpa imbou vihasa yandeu, ahe avei yande yamondora yuvireco chupe. ⁵ Esephia, inungar Cristo imombaraisupri secoi, ëgüe yahe aveira imombaraisupri yaico yaicose sese. Cristo sui avei rumo oime itera vihasa yandeu. ⁶ Ore paraísu pe mboviha ãgua ‘toñepisiro yuvireco’ ore yapave. Iyavei Tūpa ore mboviha pe mboviha ãgua avei. Supi evocoiyase pe peñemosafiora mbegüe rupi ore paraísu agüer nungar tupri pe recose. ⁷ Ore oroyeroya ité Tūpa pe pítivií ãgua rese. Esephia, oroicua ore paraísu agüer nungar tupri peico, ëgüe peye avei peipisi ore vihasa Tūpa suindar.

⁸ Che rívireta, opomomahenduha pota mara oroico ivi Asia rupi. Ore recoâhasa yavai vahe ité oime aheve oreu. Ndoroicatu iri eté oroñemosa ore pírataëhise chupe, seni orepiñemonañeta: “Yamananoño itera co mbahe-mbahe tēi pipe” orohe viña. ⁹ Supi eté oromoha ore cañi tēi ãgua viña, ëgüe ehi rumo oreu oroyeroya catu ãgua Tūpa rese, ndahei oreyese tēi. Esephia, ahe oporombogüerayevi vahe secoi. ¹⁰ Ahe niha ore repi ore mano rágüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui, ¹¹ pe ore pítiviise peye pe yeroqui pipe. Ahese setá, “Aviye ndeu” ehira yuvireco Tūpa oporopítiviisa ombou vahe rese oreu setá yeroquisa sui.

Mbahe sui Pablo ndosoi Corinto ve

¹² Oime mbahe ore mboviharete vahe: ore piha pipe ité oroicua oroico tupri Tūpa suindar ore reco catuprisa pipe, ore pihañemonañeta tuprisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha ëgüe orohe, ndahei ava co ivi pipendar mbahecuasa pipe tēi. ¹³⁻¹⁴ Esephia, che ñehe aicuachía vahe imondo pēu, aicuachiá ñepei reseve pe yeroqui tupri ãgua, pe senducua tupri ãgua avei no. Iyavei ore cua revo chíhi peye cute. Acoi yande Yar Jesús yevise curi, ahese peyembovihara ore rese, inungar ore oroyembovihara pe rese.

¹⁵⁻¹⁶ Sese yipindar supi eté che pihañemonañeta aso vaherā ñuvirío yupagüer pe repia, pe mboviha catu ãgua viña. Ëgüe ahe ité, che pihañemonañeta pe píri rane che so ãgua che guatasa rupi Macedonia ve.

Ichui ayevi pota iri pe píri viña, ipare pe che pítivíimira peye ivi Judea rupi che so água rese viña.¹⁷ Ndacheipihañemoñeta voiño tēi che so água, ndahei iporombopa serai vahe aico “che co mbahe ayapora” ehi tēi vahe, ipare rumo nomboaviyei eté.¹⁸ Tūpa rumo oicua ore ndahei, “Aviye” ore he voisa pēu, ahe pipeve avei, “Aní” ore hesa.¹⁹ Esepia, Tūpa Rahir Jesucristo avei ñepei reseva vahe ité yayeroyá vahe sese. Ahe secocuer niha oromombelu oroico pēu, che, Silvano, Timoteo avei.²⁰ Esepia, opacatu Tūpa remimombehugüer imboavíyesa sese. Sese niha serer pipe, “Egüe tehi” yahe Tūpa upe imboeteisave.²¹ Tūpa niha opacatu yande momirata seseño ité yande reco água, yande poravo avei.²² Güerer omundo yande rese ‘cheu nara’ oyapave. Ómbou avei oEspíritu yande piha pipe ‘ípipe toicua che remimombehugüer rupi tupri ité mbahe amondora chupe yuvireco curí’ oyapave.

²³ Tūpa niha oicua acoi ndayeviise Corinto ve pe píri, êgüe ahe pēu mbahe aviye água rese.²⁴ Ndahei opocuai pota mbahe pe rembieroyarã rese. Esepia, pe Tūpa rese pe yeroyasa pipe peyemoviracuaño ité Cristo rese. Ore rumo oroipota pe pítivíisa pe yemboviha água.

2

1-2 Co rese ndaso catu iri pe píri. Esepia, che aso irise pe píri ndopomboviha catui chira viña, ¿ava vo evocoiyase che mbovihara viña? Pe ité niha che mbovihasar peico.³ Sese che aicuachía ñehesa ipírata vahe pēu cuese. Esepia, ndaipotai eiipeve che sose, che mbovihaëhi água peye. Pe rumo iya ité che mboviha catura peye viña. Che ayeroya ité opacatu pe rese aviharetese, pe avei evocoiyase opacatu pevharetera che rese.⁴ Supi eté che aicuachiase che ñehe pēu, che ae ayepihamboasi ité, ayaseho avei. Esepia, aicuachía vahe pēu ndahei pe mbovihaëhi água, che rumo aicuachía ‘toicua che guaisu eteprisa yuvireco’ che yapave pēu.

Oime ñerosa ava upe mbahe sembiavi rese

5 Acoi yande rívrí omoime uca vahe viharëhisa co mbahe tēi apo pipe, ndahei che güeraño ndache mbovihai, pe avei rumo seni opacatu êgüe peye. Che, “Seni” aipo ahe ité pēu. Esepia, ndaipotai che ñehe rasi água.⁶ Co mbia upe setá mbahe peiporara uca ité, evocoi rupive iya êgüe peye chupe.⁷ Co suive ité rumo peñerora chupe, peipítivii aveira. Esepia, aviyeteramo oviharëhisa pipe oyemocañi tēira.⁸ Sese cûritei opomonguerëhi ité pe mboyecua iri água pe poroaisusa chupe.⁹ Cuese ambuae che ñehe aicuachía co che pe mbohesa resendar pēu pe recoáha água, “¿Oyapo itera píha che remimombehu yuvireco?” ahe pēu.¹⁰ Cûritei cheñero avei que ava upe peñero vahecuer upe. Esepia, oimese que mbahe rese che ñero água, Cristo rovaque êgüe ahe pe raisusave¹¹ Caruguar yande mbopaëhi água. Esepia, yande yaicua tupri ité iporombopasa.

Tecua Troas ve Pablo nombohe catui opihañemoñetas

12 Ayepotase tecua Troas ve Cristo recocuer mombehu água, oime ité yande Yar upe nara aheve che poravíqui água viña.¹³ Nambohe catui rumo che pihañemoñetas. Esepia, ndasepiai eté yande rívrí Tito. Sese, che, “Aviye” ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe tēi recopi

¹⁴ Aviye yande Ru Tūpa upe. Esepia, yande Cristo rese yaico vahe yande renose oamotarēhimbar povri sui opacatu ava rembiepiave iyavei yande recocuer sui opacatu ava uca güecocuer inungar mbahe sīacua vahe yasētu vahe opacatu rupi. ¹⁵ Esepia, inungar itaisi sīacua vahe opacatu rupi, ēgue yahe avei yande Tūpa upe Cristo yande reropovēhese yaico ava ip̄isiropirā upe, ava ocañi tēi vaherā upe avei. ¹⁶ Ahe ava ocañi tēi vaherā upe evocoī ñehesa yaru vahe inungar cañi tēisa resendar; ava ip̄isiropirā yuvirecoi vahe upe rumo evocoī ñehesa ombou tecovesa. Yande ae tēi rumo ndayaicatu evocoī nungar mbahe apo. ¹⁷ Ore rumo ndahei setá ambuae ava nungar tēi oroico. Esepia, oromombuhuse Tūpa Ñehengagüer, ndahei mbahe pisi ãgua tēi rese ēgue orohe, ore rumo ore pihañemoñeta tuprisa pipe oromombuhu co ñehesa Tūpa rovaque Cristo rese ore recosa pipe. Esepia niha, ore semimondo oroico.

3

Ñehesa Tūpa remimbotar ipiasu vahe resendar

¹ Ore aipo orohese, aviyeteramo pēu ndoyavii oroyeecomboivate ai pota iri viña, ēgue ndorohei rumo iyavei ndorosecai icuachía ãgua ava ñehesa aviye vahe ore recocuer resendar oromondo vaherā pēu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi. ² Esepia, pe ité inungar ore rembicuachía ore recocuer resendar ore oroipta vahe, ēgue peye peico ore piha pipe. Esepia, opacatu ava pe reco tupri repiase, oicua ore poraviqui tuprisa pe pâhuve yuvireco. ³ Pe niha pemboyecka pe reco tupri pipe ore rembiapo Cristo porocuaita pipe pe pâhuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pipe ité icuachiapri itape rese, Espíritu Tūpa oicove vahe suindar pipe rumo yapoprí ava piha pipe.

⁴ Oroyeroya ité co rese Tūpa rese ore yeroyasa pipe. Cristo niha ēgue ehi oreu. ⁵ Ndahei oreyesui tēi orocatu co mbahe apo. Tūpa rumo ombou oreu opacatu co mbahe apo ãgua. ⁶ Ahe niha ombou opíratasa oreu güemimbotar ipiasu vahe rese poraviqui ãgua, ndahei Moisés rembicuachiagüer rupi oroporaviqui. Esepia, ahe imboaviyēhisa pipe yamanu tēira viña. Ahe rumo Espíritu Tūpa suindar pipe oroporaviqui. Esepia, ahe ombou tecovesa yandeu.

⁷ Co Moisés recosendar porocuaita icuachiasa ité itape rese, iyavei Tūpa reco porañetes pipe ou. Israelita evocoiyase Moisés rova rese nomache catui eté yuvireco. Esepia, sendí iteanga, yepe sendigüer ogüe mbegüeño oso viña. Ahe Moisés recosendar porocuaita ava upe manosa tēi güeru vahe iporañete ai eté yipindar oico viña. ⁸ ¡Cûritei rumo iporañeté catu ité ñehesa Tūpa remimbotar ipiasu vahe resendar Espíritu Santo ombou vahe yandeu! ⁹ Supi eté yepe iporañete ai eté Moisés porocuaita acoi güeru vahe manosa yandeu viña, jco ñehesa ipiasu vahe rumo yande reco moingatu vahe iporañete catu ité ichui! ¹⁰ Esepia, co yipindar porañete vahe ndahoyoyai ñehesa cûriteindar porañete catu vahe rese. ¹¹ Acoi mborocuaita yipindar ndipocopiimi vahe virecose Tūpa reco porañetes, co ñehesa piasu ipocopi vahe rumo iporañete catu itera ichui.

12 Ore oroyeroya ité co ñehesa ipocopi vahe rese. Sese oroñehe ava upe ore siquieëhisa pipe ité. 13 Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiaëhi água ndogüe viteise sendigüer ichui aracahe. 14 Ëgüe ehi ahe ndosenducua ucai eté ndoyavii sovapisa vite vahe cûritei, ëgüe ehi vite oyeroquise Moisés porocuaita icuachiapri yipindar vahe pipe yuvireco. Ñomipri vahe nungar tēi chupe ahe senducuaëhi pipe. Esepia, Cristo güeraño ité oicatu sovapisa nungar rerocua ichui senducua uca água chupe. 15 Ëgüe ehi vite cûritei, senducuaëhi pipe Moisés porocuaita pipe oyeroqui viteño tēi eté yuvireco inungar sovapisa vite vahe. 16 Supi eté que ava oyevise yande Yar upe, ahese ramo serocuasa sovapisa nungar ichui senducua tupri água. 17 Esepia niha, yande Yar Espíritu secoi. Ahe Espíritu ava rese secoise, ndahe iri mbiguai nungar yuvirecoi. 18 Sese opacatu yande ndahei Moisés oyeovapi vahe nungar yaico Túpa porañetesa sendiyai vahe repiaëhi água. Yande rumo inungar yepiasa yambojecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, ëgüe yahese, yareco catu-catu iri seco porañetesa yandeyese. Yande Yar rumo acoi Espíritu secoi vahe ëgüe ehi yandeu.

4

¹ Sese, “Ndorequerëhi iri” ndorohei eté. Esepia, Túpa ore poravo ore paraïsuerecosa pipe ore poravíquí água co ñehesa rese. ² Ore rumo oroseyapa opacatu mbahe tēi ore chī aisa, ndoromboyecuai vahe avei ore piha pipe sui; ndoroporombopa-mbopa tēi iyavei Túpa Ñehengagüer ndorosecuñaro-ñlaro tēi. Ore rumo oroñehe tupri mbahe supi tupri vahe rese güeraño. Ëgüe orohe opacatu ava upe Túpa rovai ‘Supi eté, tehi yuvireco opíha pipe’ ore yapave. ³ Yavaise co ñehesa písirosa resendar ore remimombehu renducua água, ahe ëgüe ehi ava ocañi tēi vaherá upe. Ahe aviyé oyeovapi vite vahe. ⁴ Esepia, supi eté caruguar rericuar inungar nomboesapisoí vahe ahe ava yuvireco, sese ndosenducua ucai chupe ‘tovíroya eme ñehesa Poropísiosar Cristo resendar porañete vahe’ oyapave. Ahe niha Túpa recocuer mboyecuasar secoi. ⁵ Esepia, oromombehuse ñehesa pëu, ndahei oreyses tēi. Ore rumo, “Jesucristo yande Yar secoi” oroico. Ore evocoiyase mbiguai nungar tēi oroico pëu Jesús raisupave. ⁶ Esepia, Túpa aipo ehi aracahe: “Toime tesapessa pítumimbi vahe resape água” ehi. Ahe avei osesape uca yande piha pipe ‘ipipe toicua che porañetesa che Rahir Cristo recocuer rese oime vahe yuvireco’ oya.

Yaicora Cristo rese yande yeroyasa pipe ité

⁷ Co tesapessa nungar porañete vahe Túpa suindar rumo yareco yande retecuer pipe, inungar-ra que mbahe sepirusu vahe yapocatupri iví mbahemoinda ndipocopii vahe pipe tēi viña. Ipipe toicua opacatu ava yuvireco co píratasa Túpa suindar, ndahei oreyesuindar tēi. ⁸ Yepe mbahe-mbahe tēi oime opacatu rupi oreu viña, oimeño ité rumo ore sē água ichui. Yepe orepihañemoñeta-ñeta tēi mbahe rese, yande Yar rese ore pihañemoñetasu rumo ndoromocañii eté oreyesu. ⁹ Yepe ore reca-reca catu tēi ore amotarëhímbar yuvireco viña, Túpa rumo ndore reyai eté; iyavei yepe ore reiti ore recopi água yuvireco viña, aní eté

rumo. ¹⁰ Opacatu ore guatasa rupi rumo orovirecoño ité Jesús mara-mara tēi sereco agüer ore mano água oreyese, “Toycua avei secocuer ore rese” ore hesave. ¹¹ Esepia, ore recove viteseve imboguaipri oroico ore mano água Jesús rese. Ëgüe orohe secocuer mboyecua água ore retecuer ndipocopii vahe rese. ¹² Evocoiyase co ñehesa mombehu pipe ore manosa ore ropeña, ipipe sui rumo pesopeña tecovesa apirëhi vahe peico seroyasa pipe.

¹³ Icuachiapri aracahendar pipe niha aipo ehi: “Ayeroya ité Túpa rese, ipipe sui añahe” ehi; ëgüe orohe avei ore, sese oroyeroya ité, ichui oroñehe. ¹⁴ Esepia, yaicua niha acoi Túpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecora. ¹⁵ Co opacatu mbahe tēi oime vahe oreu, pēu mbahe aviye água rese niha ‘tovireco catu Túpa porovasasa yuvireco; ipipe sui, Aviye ndeu, tehi setá catu ava imboeteisave yuvireco chupe’ ore yapave.

¹⁶ Sese orequerëhiño ité mbahe apo oroico pēu. Yepe ore rete ocañi pota tēi viña, ore recocuer rumo Túpa ombopiasu-asuño ité ari yacatu rupi. ¹⁷ Esepia, co mbahe oroiporara vahe co ivi pipe, ahe ëgüe ehi raimi tēi vahe, ipare rumo opañora; ahe ichui rumo oimera mbahe tupri ívate catu vahe oreu ívave apirëhi orovireco vaherä. ¹⁸ Sese ore ndorepihañemoñeta atii chira co ivi pipendar mbahe rese; ore rumo orepihañemoñeta mbahe íva pendar ndayasepiai vahe rese. Esepia, co mbahe yasepia vahe, ahe ëgüe ehi raimi tēi vahe; co mbahe rumo ndayasepiai vahe, apirëhi vaherä ité.

5

¹ Yaicua niha yande retecuer ndipocopii vahe, inungar oí ndipocopii vahe avei. Sese imocañisase, aviyeno. Esepia, Túpa opa omoingatu ambuae yande rete ndopai vahe ívave yandeu. Ndahei ahe ava rembiapo tēi. ² Supi eté yaicove vitese co yande rete ndipocopii vahe rese, yande poâsesa pipe yaipota ité yande rete íva pendar. ³ Aheve yande rete ipiasu vahe yarecose, ahese ndahei chira yande hā nani tupri vahe nungar yuvirecoira. ⁴ Ëgüe ehi eté yande retecuer pipe vité yaicose, yande poâse yande viharëhisa pipe. Esepia, ndayaipotai yande hā nani tupri vahe nungar seco água, yande rumo yaipota yande retecuer ipiasu vahe, ndopai vahe. Evocoiyase, “Tocañipa co mbahe ocañi tēi vaherä yande resendar tecovesa piasu, ndopai vahe rereco água” yahe. ⁵ Túpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

⁶ Sese niha yayeroyaño ité yepi; iyavei yaicuaño yande yaicove vitese yande rete rese, ndayaico vitéi eté ívave yande Yar piri. ⁷ Esepia, cûritei yande Yar rese yeroysa pipe ité yaguata, ndahei mbahe yande rembiepia pipe. ⁸ Yande rumo yayeroyaño ité sese, iyavei yaipota ité yande retecuer reya água yande Yar piri yande so água ívave. ⁹ Sese yaseca yande Yar mboviha água yepi, que yaicove vitese yande rete rese, anise que yasëse ichui. ¹⁰ Esepia, yande opacatu yañecuavëhera Cristo rovai iporandusave yaipisi vaherä ñepei-peí mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitese.

Ñehesa yande reco moingatusa resendar

11 Ore niha oroicua yande Yar sui ore siquiyé ãgua imboyeroy-asave. Sese orosáha ava pihañemoñeta rerova Tüpa rese ipihañemoñeta ãgua yuvireco. Tüpa niña ore cua tupri, tapeicua avei ru ore recocuer. 12 Ndoroñehi pëu ore yemboivate ai ãgua tëi. Ore rumo oroñehi pëu ‘toviharete catu ore rese yuvireco’ ore yapave. Ipipe sui peicatura ava güembiepia rese tëi oyemboivate ai vahe upe iñehi mboyevi ãgua. Esepia, ahe ndahei ava piha pipendar rese oyemboviha yuvireco. 13 Ndayaracuai vahe nungar ore rerecose amove pe pâhu pendar yuvireco. Tüpa upe rumo ëgue orohe oroico. Yaracua vahe nungar rumo, ore rerecose peye, pëu mbahe aviyé ãgua rese ëgue orohe. 14 Cristo poroaisusa, ahe ité ore reroguata catu. Esepia, supi eté ahe omano opacatu ava repirâ, ipipe sui yaicua opacatu ava ocañi tëi vaherâ yuvireco viña. 15 Cristo niha omano opacatu yande repirâ. Yande yaicove vîte vahe evocoiyase ndahe iri yandeyeupe nara tëi yaico; yande rumo yaico chupe nara ité. Esepia, ahe omano, ocuerayevi yande rese. 16 Sese, iya ité oreu ore pihañemoñetaëhi iri ãgua que ava rese, ava tëi pihañemoñetasä rupi. Yepe yipindar inungar ava ivi pipendar tëi ëgue orohe ore Cristo rese ore pihañemoñeta oroico viña, cûritei rumo ëgue ndorohe iri orepihañemoñeta sese. 17 Evocoiyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipindar vale sese. Opacatu ité oyembopiasu iri.

18 Co mbahe opacatu Tüpa oyapo yandeu, ahe niha Cristo rembiapo sui yande recocuer moingatu oyeupe nara. Ipare oreu avei ombou co ñehesa mombehu ãgua ambuae ava upe secocuer moingatu ãgua avei. 19 Aipo oyapave aipo ehi: Tüpa ombou Guahir Cristo co ivi pipe ava recocuer moingatu ãgua ‘toyevi cheu’ oya; ipipe sui avei ahe ava angaipagüer omocañi yuvireco ichui. Ore evocoiyase ore cuai ahe ñehesa ava recocuer moingatusa resendar mombehu ãgua ava upe. 20 Ore evocoiyase Cristo porocuaita rupi oroñehi vahe oroico, inungar Tüpa ité oñehera pëu viña. Sese, “Peyevi Tüpa upe, ahe pe recocuer moingatura oyeupe nara” orohe Cristo rer pipe pëu. 21 Yepe Cristo ndoyapoi eté angaipa, Tüpa rumo vireco uca angaipa viyar nungar yande repirâ yande reco ivi ãgua Cristo rupi yande guatase.

6

1 Ore pe mboetasa co Tüpa upendar mboravíqui resendar ore recosa pipe: “Peicua catu, pemocañi tëi rene Tüpa porovasasa peipisi vahe” orohe pëu. 2 Esepia, Tüpa aipo ehi icuachiapri aracahendar pipe:

“Acoi ari aviyé vahe pipe niha che asendu pe yeruresa; iyavei ahe ari poropísirosa pipe opopítivii” ehi.

¡Ahe ari oyepota cute! iyavei oime ité cûritei ñepisirosa.

3 Ore niha ndoromboyecuai ore reco ai ava pâhuve. Esepia, ndoroipotai que ava Tüpa upe ore poraviquisa rese iñehi rai ãgua yuvireco. 4 Ore rumo oromboyecua ité Tüpa rembiguau ore recosa. Esepia, ore reco mbegüesa pipe oroñemosayo mbahe-mbahe tëi upe yepe ipane mbahe oreu viña, iyavei mbahe yavaise; 5 ëgue orohe avei ore nupa-nupase, ore roquendase avei iyavei omonguerëhise ava rehii ore amotarëhi ãgua yuvireco. Oroyapo avei mboravíqui ipirata vahe; amove ndoroquei eté, setá rupi ndoreriepoi tëi avei. 6 Oromboyecua avei

ore reco maranehisá, ore mbahecusa supi eté vahe, ore reco mbegüe tuprisa, yeaisusa orovireco avei no. Ëgüe orohe ité niha Espíritu Santo píratasa pipe, ore poroaisusa supi eté vahe pipe avei. ⁷Ore remimombehu supi eté vahe pipe iyavei Tüpa píratasa pipe avei oroico. Ore niha ore reco tupri pipe orosecopi mbahe-mbahe tēi. Ipípe avei oroyoepi. ⁸Amove ava ore mboetei ai, amove rumo oñemoiro yuvireco oreu; amove avei oñehe tupri ai ore rese yuvireco, ipare rumo iñehe-ñehe tēi ore rese yuvireco yepi no. Iyavei amove oporombopa tēi vahe nungar ore rereco yuvireco, yepe oromombehu tēi mbahe supi eté vahe viña. ⁹Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco, oroicoveño ité rumo; iyavei amove ore mombaraisusa catu tēi, ndore yucai eté rumo ipipe yuvireco. ¹⁰Amove ndoyavii ndorovihai vahe yuvireco chupe, ore rumo orovihaño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe avíye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe avíye vahe Tüpa suindar oime oreu.

¹¹Che rivireta Corinto pendar, ore ñehesa pipe opacatu mbahe oromboyecua pēu iyavei pe raisu água orovireco ore piha pipe tuvichá pe rese. ¹²Ndorehápisi pe rese pe raisu água; pe rumo ëgüe ndapeyei ore rese. ¹³Che niha opovireco che rahir nungar; pemboyevi avei catu ore pe raisusa oreu.

Tüpa oicove vahe rēta nungar ité yaico

¹⁴Ndapeyovaichoí chira ava Tüpa ndovíroyai vahe rese. Esepiá, ndoyoyai eté pe pihañemoñetasa. Ëgüe ehi eté tecó ñvisa ndoyoyai tecó rai rese inungar tesapesa ndoyoyai pitumimbi vahe rese. ¹⁵Ndahoyoyai eté niha Cristo pihañemoñetasa Caruguar pihañemoñetasa rese yuvireco. ¿Oyoya tie Tüpa reroyasar Tüpa reroyasaréhi rese yuvireco? ¡Aní eté! ¹⁶¿Oyoya tie mbahe rahanga tēi Tüpa rēta rese? Yande niha Tüpa oicove vahe rēta nungar ité yaico. Ahe ité niha aipo ehi icuachiapri pipe aracahe: “Che aicovera seseve iyavei aguatara ipáhu rupi yuvireco; che avei aicora iTüpa ité; ahe evocoiyase cheundar yuvirecoira” ehi.

¹⁷Iyavei aipo ehi:

“Sese peyepepi evocoí nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸Che aicora pe yesupa; pe evocoiyase peicora che rahir, che rayri avei’ aipo ehi yande Yar güeco píratasa pipe” ehi.

7

¹Che rivireta, che rembiaisu, co Tüpa remimombehu imboaviyepirá yandeu. Sese yande yamoingatu tuprira yande recocuer chupe yarecoéhi água yande retecuer iyavei yande espíritu mbahe tēi pipe. Iyavei Tüpa mboeteisa pipe yasecara yande reco catupri água chupe nara güeraño ité.

Corinto pendar ava recocuer recuñarosa resendar

²¡Che pisí peye pe piha pipe! Ndoroyapoi niha mbahe tēi que ava upe, ndoromomarai eté que ava recocuer, ndoroporombopai avei. ³Ndahei pe recocuer rese che ñehe raisave aipo ahe pēu. Supi eté yipindar, “Che pihave ité opoaisu, pēu nara avei aicove, amano aveira pēu” ahe acoi pēu

cuese. ⁴ Ayeroya ité pe rese, pe rese avei aviharete. Che paraisu pāhuve ayemonguerēhi iyavei ayemboviñahareteño.

⁵ Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepihamondiisa. ⁶ Tūpa rumo, ava ndoyemonguerēhii vahe, omonguerēhi iri yepi. Ahe ore monguerēhi catu iri Tito yepotase. ⁷ Ndahei rumo Tito yepotaseño oroviharete, ahe avei oyemboviñha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharēhi agüer cheu, pemahenduhaño ité aipo che rese pe che raisusave yepi. Aipo nungar renduse ayemboviñah catu.

⁸ Yeve che ñehe aicuachía vahecuer imondo pēu ndape mboviñhai viña, cheu rumo aviyeño cūritei. Yipindar rumo ayepihamboasi aicuase che ñehe tasí iteanga vahe pēu; chīhi rupi tēi rumo ndapeviñhai peyeroqui pare sese. ⁹ Cūritei che avihareté. Ndahei rumo pe viharēhisa rese ēgue ahe. Esepia, co pe viharēhisa sui pemboasi pe angaipa Tūpa upe pe yevi água, evoco nungar Tūpa oipota. Evocoyase ore ñehe ndoyapoi mbahe naporai vahe pēu. ¹⁰ Esepia, co nungar viharēhisa Tūpa oipota vahe yande angaipa mboasi uca, chupe yande yevi água. Ipipe sui niha yañepisiro yande pihañemoñeta rerovaëhisa pipe. Co ivi pipendar tēi viharēhisa rumo manosa tēi vireco yandeu. ¹¹ Pe rumo peñemosayo pe viharēhisa upe; ahe aviye Tūpa upe. ¡Pesepia ru co mbahe aviye vahe pe recocuer pipe oime vahe evoco Tūpa remimbou pe viharēhisa sui cute! Supi eté rumo, peyapisaca iyavei pe querēhisa pipe peyoepi, pemboasi pe piha pipe ité co mbahe tēi oimese pe pāhuve, iyavei peyembosiñiye peico. Ichui che repia pota ité peye, iyavei pequerēhi ité mbahe moin-gatu água. Sese pemboyepepi ité evoco mbahe tēi aposar peyesui. Che aicua cute pēu ndahei pe piha rupi co nungar mbahe tēi oimese. ¹² Cuese aicuachiase evoco che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tūpa rovaque. ¹³ Co rese ore oroyemboviñaharete.

Iyavei oroviña catu Tito yemboviñahasa repiase. Esepia, pe avei niha opacatu pemboviñha catu ité pe recocuer pipe. ¹⁴ “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipipe nachi eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe. ¹⁵ Iyavei cūritei ahe pe raisu catu ité pe rese omahenduhase opacatu pe poreroyasa rese. Iyavei peipisi tupri ité imboeteisave sereco. ¹⁶ ¡Ayroya ité pe rese, sese aviña ité!

8

Ava querēhisa porerecosa mundo áqua Jerusalén pendar upe

¹ Che rívireta, cūritei che amombehu potami pēu mara ehi mbahe tupri apo Tūpa ava viroyasar upe ivi Macedonia rupi. ² Yepe ahe ava recocuer yavai eté yuvireco chupe secoñahasa pipe viña, ovihareteño rumo ipipe yuvireco; yepe iparaísu vahe pāve tēi, iporerecoño ité rumo yuvireco. ³ Supi eté oquerēhisa pipe omondo ité ocatugüer rupi; amove oseca iri mbahe güemimbotar rupi yuvireco. ⁴ Ahe, “Ore avei catu toroipitivii ambuae Tūpa reroyasar” ehi yuvireco. ⁵ Ahe rumo oñocua iri ore

pihañemoñetasa yuvireco. Yande Yar upe rane oyemondo. Ipare Tūpa remimbotar rupi ëgue ehi avei oreu yuvireco. ⁶ Evocoiyase ore aipo orohe Tito upe pēu: “Tomboyeapi iri co porerecosa monuha âgua ava upe” orohe. Esepio, yipindar ahe osose pe pâhuve, ahe pe pîtvii imboipi âgua. ⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombahu tupri ai Tūpa ñehesa, pereco ité Tūpa suindar mbahecusa, pequerêhi ité Tūpa upe mbahe apo âgua iyavei ore raisu ité peye. Evocoiyase ëgue peye aveira co nungar poroaisusa apo.

⁸ Ndahei pe cuaisa pipe aipo ahe pēu, che rumo ‘toicua ambuae ava rembiapo oquerêhisa pipe oyapo vahe yuvireco’ che yapave. Sese niha peicuara, supi eté vahe pîha pe poroaisusa. ⁹ Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pipe sui niha pe iva pendar mbahe pereco.

¹⁰ Pēu mbahe aviye âgua che añehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querêhisa pipe peyapo. ¹¹ Cûritei pemboaviye catu pe porerecosa pe querêhisa yipindar pe reco vahe pipe; pemondoñora mbahe peicatugüer rupi. ¹² Esepio, acoi que ava omundo pota vahe mbahe, Tûpa oipisi ahe iporerecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

¹³ “Toyemombaraisu ava pîtviiisa pipe yuvireco” ndahei rumo pēu. ¹⁴ Cûritei mbahe pe rembiereco eta pipe peipîtvii catu ambuae ava ipane vahe mbahe yuvireco chupe. Virecomise mbahe, ahe avei pe pîtviiira yuvireco pēu mbahe ipanese. Evocoiyase pe recocuer oyoya tupri itera. ¹⁵ Inungar Tûpa ñehes mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi tîi mbahe omonuha vahe, nipanei mbahe chupe” ehi.

Pablo omundo Tito indugüer reseve Corinto ve

¹⁶ Aviye Tûpa upe ombopihañemoñeta Tito pe rese inungar che pihañemoñetasa pe rese yepi. ¹⁷ Ahe viroya ité che ñehes. Güemimbotar rupi eté rumo iquerêhi oso âgua pe repia.

¹⁸ Supi oromondo yande rivri, ahe opacatu ambuae Jesús reroyasar oicua iporaviqui tupri aise ñehesa pîsirosa rese yuvireco. ¹⁹ Sese opacatu oiporavo yuvireco ore rupi iguata âgua ore pîtvii vaherâ avei co porerecosa reraso âgua. Ore ëgue orohe oroico yande Yar mboetei âgua rese ‘toicua ore querêhisa pipe ité oroporopîtvii yuvireco’ ore yapave. ²⁰ Ore ndoroipotai que ava oñehes tîira ore rese yuvireco co porerecosa monuhasa pipe sui. ²¹ Esepio, ore oroyapo pota mbahe aviye vahe, ndahei Tûpa rovaque güeraño, opacatu ava rembiepiave avei.

²² Supi avei oromondo ambuae yande rivri. Ahe omboyecua ité oreu oquerêhisa opacatu mbahe güembiapo pipe. Ahe cûritei iquerêhi catu ité. Esepio, oyeroya ité pe rese. ²³ Acoi oporanduse que ava Tito rese yuvireco pēu, “Ahe oyoya Pablo rese oporaviqui vahe pe pîtvii âgua” peyeñora. Acoi oporanduse avei ambuae yande rivri rese yuvireco pēu, “Ahe ambuae Jesús reroyasarea remimbou Cristo mboeteisar yuvirecoi” peyeño aveira chupe. ²⁴ Sese, pe recocuer cua âgua, pemboyecua catu pe poroaisusa supi eté vahe chupe yuvireco.

Evocoiyase toviroya ité che ayeroyase iyavei ayembovhase pe recocuer rese yuvireco.

9

Porerecosa imonuhaprí Jesús reroyasar upe

¹ Porerecosa imonuhaprí Jesús reroyasar upe nara rese rumo nañehe iri pēu. ² Esepia, che aicua pequerēhi ité ipítivii água. Evocoiyase che viharetesa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pítivii água cuese ambuae araviter suive yuvireco” ahe yuvireco chupe. Evocoiyase pequerēhise ité ipítivii água, ahese setaño ité oyemonguerēhi yuvireco. ³ Che rumo amondo co yande rivri yuvireco pēu cūritei ‘égüe tehi tēi eme che ñehesa aviye vahe sesendar yuvireco’ viya pēu. Pe yemoingatu tupri água ité aipo ahe pēu; ⁴ aní acoi arasose Macedonia pendar cheyeupi, sembiepiave ndapeyemoingatu vitéi chira peico. Égüe peyese ore mochi guasu uca tiéterea peye. Esepia, che ayeroya ité pe rese. Pe avei evocoiyase pechíra. ⁵ Sese che pihañemoñeta yipindar añahe co mbosapi yande rivri upe yuvireco, ahe ranei ore renonde yuviraso água pe piri pe pítivii água co porerecosa aviye vahe monuha água rese, acoi cuese pe remimombehuguer rupi. Evocoiyase ahe pe porerecosa pe remimonuha opara pemoingatu tupri ité pe avaguer mboyecua água, ndahei chira rumo pe recatéhisa pipe.

⁶ Peyemomahenduha co rese: acoi noñotí atíimi vahe mbahe, chupe moviromi tēi avei iha; acoi oñotí atí vahe rumo mbahe, ahe setá catu avei iha chupe. ⁷ Nepei-peí iya opichañemoñetasá rupi omondora oporerecosa Túpa upe yuvireco, ndahei chira opicha víracuasa pipe tēi iyavei ndahei chiaveira ambuae ava ocuai píratasa pipe tēi. Esepia, Túpa osaisu ava oviharetesa pipe omundo vahe oporerecosa chupe. ⁸ Túpa niha oicatu opacatu mbahe aviye vahe mondo água pēu ari yacatu rupi pereco vaherá opacatu mbahe ipane vahe pēu iyavei sumbirer pipe opacatu ambuae mbahe aviye vahe rese pe poropítivii água. ⁹ Inungar icuachiapri pipe aipo ehi:

“Ahe iporereco ai iparaísu vahe rese yepi. Ahe mbahe aviye vahe sembiapo nocañii chietera” ehi.

¹⁰ Túpa niha ombou mbahe rāhíi ava remitíra, mbahe semihura avei. Sese ombou catura mbahe pēu iyavei ombouvicha catura pe rembiapo aviye vahe ava pítivii água. ¹¹ Túpa ombou catura opacatu mbahe pe rembierecorá ava upe imondo catu água pe avasa pipe. Ore orovirasose porerecosa pe remimbou yande rivireta upe, ahe evocoiyase, “Aviye ndeú” ehira Túpa upe yuvireco. ¹² Esepia, co pemondo vahe yande rivireta pítivii água, ndahei peipítivii mbahe ipane vahe rese güeraño, ichui avei niha, “Aviye Túpa upe” ehira yuvireco. ¹³ Ahe evocoiyase omboeteira Túpa yuvireco. Esepia, co pe poropítiviisa pipe pemboyecua itera pe Cristo ñehe reroysa peico. Ahe avei omboeteira Túpa yuvireco. Esepia, pe pemondoño itera mbahe pe porerecosa chupe iyavei opacatu ambuae ava upe. ¹⁴ Evocoiyase ahe oyeroquira pe rese iyavei pe raisu etepirira yuvireco. Esepia, Túpa pe pítivii eté oporovasasa pipe. ¹⁵ ¡Aviye Túpa upe! ¡Esepia, ahe ombou mbahe tuvichá vahe aviye catu vahe yandeú, ndayaicatui vahe mombehu tupri água!

10

Pablo cuaita apóstol seco āgua

¹ Che Pablo añahe Cristo poroaisusa, seco asiēhisa pipe avei pēu. Amove ava pe pāhu pendar, “Seco mbegüemi tēi yande pāhuve oicose, amombri güecose rumo oñeha pīratá iteanga” aipo ehi tēi yuvireco cheu viña. ² Che rumo asose pe repia, ndaipotai che pīratasa mboyecua āgua pe pāhu pendar upe. Amove rumo ava pe pāhu pendar ipīhañemoñeta: “Oyapo mbahe co ivi pipendar pihañemoñeta rupi tēi” ehi yuvireco cheu. Sese che ayemoingatuño ité evoco nungar ava upe añahe pīrata vaherā. ³ Supi eté, yepe co ivi pipe oroicove viña, ore rumo ndoroyapoi mbahe ava co ivi pipendar rembiapo nungar. ⁴ Esepia, ore yoepisa ndahei ava co ivi pipendar yoepisa nungar; orovireco rumo Tūpa pīratasa mbahe tēi seco pīrata vahe recopi āgua ava aracuasa tēi recopi āgua avei. ⁵ Ahe ipipe ore opa orosecopi yepoepi-episa iyavei opacatu semira-mira tēi vahe güeco ivate aisa pipe ndoicua uca potai vahe Tūpa recocuer ava upe. Iyavei opacatu ava pihañemoñeta raisa orosecopi Cristo reroya tupri āgua yuvireco. ⁶ Iyavei ore oroyemoingatu ité opacatu ndiporeroyai vahe recocuer reroyi āgua. Pe rane rumo peroya tuprira.

⁷ Pe rumo pemaheño tēi ahe ava recocuer rese. Acoi ava pe pāhu pendar oicua vahe Cristo rese güecosa, toicua tupri avei ore Cristo rese ore recosa yuvireco. ⁸ Yepe ayeecomboivate che mborerecuasa rese pēu viña, ipipe rumo nachi eté. Esepia, yande Yar ombou mborerecuasa cheu pe recocuer moviracua tupri āgua, ndahei rumo pe recocuer momara āgua. ⁹ Aní chira, “Pablo yande mbosiquiye pota güembicuachía pipe” peye cheu. ¹⁰ Esepia, amove ava pe pāhu pendar, “Oñeha oicuachía vahe ombou yandeu, ahe ipīratá, yavai avei yandeu; ahe ité rumo aní angai vahe secoi yande pāhuve iyavei iñeha ëgue ehi tēi vahe” ehi yuvireco cheu. ¹¹ Toicua catu ru yuvireco: eipeve oroso irise, inungar amombehu che rembicuachía pipe amombri che recose, ëgue ahe tupri aveira yapo pe pāhuve.

¹² Ndotromboyoyai eté ore recocuer ava oyese tēi oñeha vahe recocuer rese. Esepia, omboyoyase oyese, ndoyapisacai eté yuvireco. ¹³ Ore rumo ore remimombehu pipe ndoroyapirasai chietera ore cuaita ore yeeecomboivatesa pipe. Tūpa rumo güemimbotar rupi ombou ore poraviqui āgua oreu, eipeve pe rese ore poraviqui āgua avei. ¹⁴ Ore rumo ndoroyapirasai ore cuaita mombehusa icuachía pēu. Esepia, supi eté ore ranei eté oroico pe pāhuve, ore ranei avei oroviraso Cristo resendar ñehesa imombehu pēu. ¹⁵ Ndotroyapirasai avei ore ñeha pipe ambuae ava poraviquisa sui tēi. Ore rumo, orosāro ore oroporaviqui catu vaherā pe pāhuve Tūpa rese pe yeroysa rupi. Ndotroyapirasai avei rumo ore cuaita. ¹⁶ Iyavei orosāro ñehesa písrosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tēi oroyecomboivate oroico.

¹⁷ Acoi ava oyeeecomboivate pota vahe, toyeeecomboivate catu yande Yar rese. ¹⁸ Esepia, acoi ava “che aico tupri” ehi vahe ndahei ahe osē tupri güecoāhasa sui yande Yar rovaque; “Aviye ité co mbia” ehise rumo yande Yar chupe, ahe osē tupri güecoāhasa sui.

11

Pablo iyavei apóstol angahu tēi yuvirecoi vahe

¹ ¡Peñemosa iriñomi tēira cheu co che ñehe ndayaracuai vahe nungar pipe che ñehesel! ² Esepio, che cherecatēhi ité pe rese, ahe tecatēhisa ou cheu Tūpa sui. Che aipota Cristo upe opomondo vaherā pe reco maranehisa pipe, inungar cuñatai ndaseco marai vahe imondopri cuimbahe upe imenda ãgua. ³ Che rumo asiquiye co mbahe sui, inungar mboi ombopa Eva oporombopasa pipe, aviyeteramo Caruguar pe mbopa aveira pe piñañemoñetasa rerova ãgua Cristo mboeteisa supi eté vahe sui. ⁴ Esepio, peñemosaño ava oñehe vahe pēu ambuae Jesús rese ndoyoyai vahe ore remimombehu rese. Ichui peipisi pe querēhisa pipe ambuae espíritu peipisi vahecuer sui. Iyavei ambuae ñehesa písrosa resendar peipisi avei ndoyoyai vahe ore pēu oromombehu vahe rese. ⁵ Che rumo namohai eté ivi coti catu tēi aicora evoco supi peguata vahe apóstol yemboivate ai tēi vahe sui. ⁶ Yepe ndayembohei che ñehe tupri ãgua ité, che rumo areco che mbahecuasa, ahe oromboyecuaño ité opacatu ore rembiapo pipe pe rembiepiave.

⁷ Ndamombehui eté niha ñehesa písrosa resendar pe cheu imboepi ãgua; pe recocuer mboivate catu ãgua rumo Tūpa rovaque ëgue ahe che reco yemominisa pipe. ¿Mbahe tēi pīha ayapo ëgue ahese pēu? ⁸ Aipisi ambuae ava Jesús reroyasar sui guarePOCHI, pe recocuer rese che poraviqui ãgua. ⁹ Iyavei acoi aicose pe pāhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. Ëgue ahe che pepoisupave pe mañecoëhi vichico. Ndopomañecoi chietera niha mbahe ipanese cheu. ¹⁰ Supi eté aicua supi tupri vahe mbahe Cristo suindar. Evocoiyase supi eté avei che aicua ndipoi chietera que ava ivi Acaya rupi virocua vaherā co che viharetesa che sui yuvireco. ¹¹ ¿Mbahe rese pīha aipo ahe pēu? ¿Pe raisuñhisave pīha? ¡Tūpa rumo oicua che pe raisusa!

¹² Ayapoño itera rumo co mboraviqui cheu imboepiëhisa pipe vichico co ambuae pe pāhu pendar ava pe mbopaëhi ãgua yuvireco. Esepio, che nungar yuvirecoi pota tēi viña. ¹³ Ahe rumo ndahei apóstol supi tupri vahe yuvirecoi, ahe oporombopa tēi, “Ore apóstol oroico” ehi tupri tēi yuvireco. ¹⁴ Yaicua niha Caruguar rerecuar oporombopa. Esepio, oyeapo inungar Tūpa rembiguai amove. ¹⁵ Sese yaicua avei Caruguar povri pendar oporombopasa pipe oyeapo inungar Tūpa ñehe mombehusar yuvireco. ¡Ahe chupe rumo oimera Tūpa ñemoirosa mbahe sembiapocuer rupi curi!

Pablo oiporara mbahe-mbahe tēi apóstol güecosa pipe

¹⁶ Aipo ahe iri pēu: tipo eme ava “ndayaracuai” ehi vahe cheu. Acoi, “Ëgue ehi oico” peyese cheu, tañeheño ayase ndayaracuai vahe nungar, che avei evocoiyase tayeecomboivateño vichico. ¹⁷ Ndahei rumo yande Yar che cuaisa pipe aipo ahe, che aracuaëhisa nungar pipe rumo aipo ahe che yemboivate aisa pipe. ¹⁸ Esepio niha, setá iteanga ava ahe ae tēi oyemboivate ai güecocuer aviye angahu vahe tēi pipe. Sese che avei ayemboivatera. ¹⁹ Esepio, yepe pe imbahecuas vai vahe nungar peico, pembboyoyá catu pe querēhisa pipe ava ndayaracuai vahe. ²⁰ Pe niha pembboyoyaño acoi que mbiguai tēi nungar pe rereco vahe, que mbahe pe rembiereco sui tēi oicove vahe, que pe mbopa tēisar, pe reroñrosar, que

pe rova pete-petesar avei. ²¹ Che ch̄isa pipe aipo ahe co imombehu, jore reco mbegüe etepri evoco nungar apo âgua pêu!

Acoi oñehese ambuae ava oyeupendar mbahe rese oyemboivate aisa pipe, che avei evocoiyase ñgue ahera. Aipo ahese rumo aviyé ndayaracuai vahe nungar aico. ²² Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico. ²³ “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviyé che ndayaracuai vahe aico. Aporavíqui catu rumo ichui yuvireco, setá catu soquendapri tēi aico yuvireco ichui, inupambri catu aico ichui yuvireco, setá rupi avei seniseni che yuca uca che mombaraisusa pipe yuvireco. ²⁴ Cinco yupagüer judío che nupá iteanga treinta y nueve tupri tucumbo pipe yuvireco. ²⁵ Mbosapi yupagüer che nupasa ívira pipe, ñepei rupi evocoiyase che api-apisa ita pipe. Mbosapi yupagüer avei oñeapivii iar ipive che guatasa rupi cheu, ñepei pítu, ñepei ari avei avevui tēi para guasu aviter rupi vichico. ²⁶ Setá aguata opacatu rupi, iyavei iai rupi mbahe-mbahe tēi oime cheu, aico avei imonda rai vahe pâhuve; che mu judío mbahe tēi vahe pâhuve avei aico iyavei ndahei vahe che mu pâhuve no. Aico avei tecua guasu pipe mbahe tēisave, amombri vahesa rupi iyavei para guasu pipe, iyavei mbahe-mbahe tēisave Jesús reroyasar angahu tēi pâhuve aico. ²⁷ Aporavíqui ité iyavei ayapo mbahe cheu yavai vahe; iyavei setá yupagüer ndaquei eté; aiporara avei tieporéhi iyavei husei; setá rupi ndacarui; sôhisagüer avei aiporara, ndacheturucuai avei vichico.

²⁸ Ndahei co opacatu mbahe güeraño aiporara, ari yacatu rupi che mahenduhaño ité avei opacatu tecua rupindar Jesús reroyasar rese.

²⁹ Oimese que oiporara vahe mbaherasicuer, che avei ayandu co mbaherasisa. Acoi que oimese oyaví uca vahe mbahe, che moñemoiro uca.

³⁰ Iyase che yeecomboivate ai âgua cheu, co mbahe omboyecua vahe che pírataéhisa rese ayeecomboivate aiño itera. ³¹ Yande Yar Jesucristo Ru Túpa, ahe imboeteipri apiréhi secoi vahe, ahe oicua aipo che hesa supi tupri vahe. ³² Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipive che rese osareco vaherã che roquenda âgua yuvireco viña; ³³ oime rumo ava iruova guasu pipe che mogüeyi vahe tecua áchisa metana rupi yuvireco. Ñgue ahe añemi ichui yuvireco.

12

Túpa omboyecua Pablo upe mbahe queraisa nungar pipe

¹ Ndipoi eté que ava mbahe oipisi vahe ahe ae tēi oyemboeteisa pipe. Che rumo amombehuño itera mbahe asepia vahe che quer nungar pipe iyavei yande Yar remimboyecua che aipisi vahe ichui. ² Che aicua mbia Cristo reroyasar, omomba cûritei catorce araviter ahe imbosapisa ivave seraso agüier. Ndicasai güetecuer rese tie revo oso, anise ihã güeraño tie revo. Túpa rumo oicua. ³⁻⁴ Che rumo, “Ñgue ehi tie revo oico” ahe aipo mbia upe, Túpa güeraño oicua. Serasopri ivave teco orisave. Aheve osendu ñehesa ndicasai vahe. Ahe niha que ava tēi upe ndipotasi imombehu âgua yuvireco. ⁵ Evoco nungar mbia rese ayeecomboivatera; cheyese ité rumo ndayecomboivate ai chira. Che recocuer nípiratai vahe reseño ñgue ahera vichico. ⁶ Yepe che añahe tupri aira cheyese

viña, che revo ndahei chira ndayaracuai vahe nungar aico. Esepio, mbahe supi eté vahe amombehura viña. Ahe rumo ndayapoi. Esepio, ‘tipihañemoñeta catu che rembiapo rese, che remimombehugüer rese avei yuvireco che querve nungar mbahe mombehu rägüer sui’ viya. ⁷Sese che yemboivate aiëhi ãgua che quer nungar mbahe che pihamondii vahe rembiepiagüer rese Tüpa ombou teco asisa cheu. Ahe aviye yu che cutu guasu vahe, ndoyavii avei Caruguar mara-mara tēi che rereco vahe. ⁸Mbosapi yupagüer yande Yar upe aporandu ité teco asisa che sui serocua ãgua rese viña. ⁹Ahe rumo aipo ehi cheu: “Che porovasasa ndeu ambou vahe iyara nde ñemosa ãgua. Esepio, che píratasa oyecua catu ité ava nípiratai vahe recocuer rese” ehi. Evocoiyase che ayembovíha catuño itera che reco nípiratai vahe rese. Ëgüe ehira Jesucristo píratasa oyecua che rese. ¹⁰Sese Cristo rese che recosa pipe aviyeño ité ndache pírataise, que ambuae ava oñeha raise che rese, que mbahe ipanese cheu, ambuae che reca-reca tēise che reco momara ãgua yuvireco iyavei que mbahe yavai vahe aiporarase Cristo sui. Esepio, ayanduse che pírataëhisa, ahese che pírata catu.

Pablo ipihañemoñeta ité Jesús reroyasareta Corinto pendar rese

¹¹Che ndayaracuai vahe nungar aico pēu, pe rese tēi rumo ëgüe ahe. Iya rumo peñeha tupriña che rese viña. Esepio, yepe ndahei seco ivate vahe aico viña, co apóstol angahu tēi rumo pe supi peguata vahe ndahei ivate catu vahe che sui yuvireco. ¹²Che ñemosa tupri pipe mboraviqui ayapo pe pâhuve. Ayapo mbahe poromondiisa mbahe pesepia yesapiha rai vahe imboyecua ãgua che supi eté vahe apóstol che recosa. ¹³Co mbahe reseño pe ivi coti catu peico ambuae Jesús reroyasareta sui, che ndopomañecoise mbahe cheu pembou vaherā rese. ¿Ayavi tie che cuaita, ëgüe ahese pēu? ¡Peñero sese cheu!

¹⁴Cûritei che ayemoingatu imombosapisa rupi che so ãgua pe piri. Iyavei ndopomañecoi chira mbahe rese. Esepio, ndasecai mbahe pe rembiereco; pe recocuer ité rumo aipota. Esepio, iyesupa omonuha guarepochi guahir upe, ndahei tahir tēi ëgüe ehi oyesupa upe yepi. ¹⁵Evocoiyase che querëhisa pipe amondora opacatu che mbahe areco vahe pe pîtvii ãgua iyavei opacatu che recocuer rese ayemondo pēu pe reco tupri ãgua. Che rumo opoaisu ité, pe tie revo ndache raisu tupri eté peye.

¹⁶Cheu mbahe ipanese, ndaporandui eté mbahe pereco vahe rese pēu. Amove rumo ava, “Yande mbopa ãgua tēi ëgüe ehi Pablo yandeu” ehi tēi yuvireco. ¹⁷¿Opombopa uca tie ava pēu che remimondo pipe? ¹⁸Che Tito upe, “Eresora ipiri yuvireco” ahe. Supi avei ambuae yande rîvri Tüpa reroyasar amondo. ¿Pembopa tie Tito? Oyoya tupri mbahe oroyapo Tüpa upe ñepei ore pihañemoñetas pipe.

¹⁹Che rîvreta, che rembiaisu, pe revo pepihañemoñeta ore oroicuachía co pēu, ore yoepi ãgua tēi. Ëgüe ndorohei eté rumo. Ore rumo Cristo rese ore reco pipe oroñeha Tüpa rovaque. Opacatu ité niha mbahe oroyapo pe recocuer moviracua catu ãgua. ²⁰Che asiquiye asose eiurve pe repia, aviyeteramo ndahei chira che piha rupi pe recocuer. Iyavei pe aviyeteramo ëgüe peye aveira che repiase. Che asiquiye ité, oime revo pe pâhuve yepoepi-episa, pe pihañemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe pâhuve ava

oyeueño tēi mbahe oipota vahe, imahechiroi ai vahe iyavei oñehe-ñehe tēi vahe ambuae ava rese, seco ivate ai vahe iyavei ndiporoviroyai vahe.
²¹ Asiquiye avei aso irise pe repia, omboura Tūpa pe sui che chī água, che mboyaseho uca tiétera peye setá pe cuesepeyemboangaipa vahe rese iyavei ndapemboasii etese mbahe tēi, yemboaguasa-guasa tēisa iyavei que mbahe pe remimbotarai peyapo vahecuer.

13

Poromboaracuasa iyavei mahenduhasa

¹ Co niha imombosapisa yupagüer asora pe repia. Pemombehu potase que ava rembiapo ai cheu, toime que ñuvirío, anise mbosapi oicua vahe sembiapo ai. ² Co yipindar oyemboangaipa vahe upe opa aipo ahe: “Peicua catu” ahe che imoñuvirío yupagüesa pipe aicose pe piri. Cūritei amombrí aico pe sui, amombehu irira rumo co pēu. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe pāhuve, ndopoparaisuereco iri chira. ³ Esepio, pe peipota ité che recoāha água ‘¿Cristo ité pīha omoñehe uca?’ pe yapave cheu. Cristo ndaseco mbegüemi pēu mbahe apo oico. Ahe rumo omboycua opíratasa pēu. ⁴ Supi eté niha ahe yaticasa, inungar ava nimiratai vahe. Cūritei rumo ahe oicove Tūpa píratasa pipe. Ëgüe orohe avei ore seco pírataehisa sereco. Oroicose rumo sese oroico Tūpa píratasa pipe pe rese hañeco água.

⁵ Pemahecua tupri catu pe recocuer rese: ¿peico ité pīha pe Cristo rese yeroysa pipe? ¿Ndapeicuai vo Jesucristo secoise pe rese, pesēse pe recoāhasa sui? ⁶ Pe revo peicuara ore ndorocañi tēi vahe oroico ore recoāhasa pipe. ⁷ Iyavei oroyerure pe rese Tūpa upe ‘toyapo eme mbahe tēi yuvireco’ ore hesave. Ndahei rumo ore ivate catu vahe mbahe tēi rasa pare mboycuasave ëgüe orohe; co catu ‘toyapo mbahe aviyé vahe yuvireco’ ore yapave, yepe pēu ndoyavii orocañi tēi vahe oroico viña. ⁸ Esepio, ndiyai mbahe supi tupri vahe amotaréhi água oreu; ëgüe ehi rumo sese catu ité oroñehe. ⁹ Sese orovihafio ité norepírataise, ore rumo oroipota ité pe momirata; iyavei ore oroyerure catuño itera pe recocuer catupri catu água rese. ¹⁰ Aicuachía co che ñehe imondo pēu pe piri che so água renonde. Acoi asose, namboycua píratai chira che mborerecuasa eipecve. Ahe niha yande Yar ombou vahe cheu pe reco momirata catu água, ndahei pe reco momara água.

¹¹ Imomba água, che rivireta, aipota pevharetera peico. Peseca avei pe reco tupri catu água peyeupe, peyemongueréhi catu, oyoya guasu peico tupri avei peyese mbahe tupri pipe. Evocoiyase Tūpa oporoaisusa pipe, güeco tuprisa pipe avei secoira pe rese. ¹² Pemombehu che mahenduhasa ñepei-peyeyepe pe yeovaupitesa pipe. ¹³ Opacatu ambuae yande rivri, Tūpa reroyasar avei omondo omahenduhasa yuvireco pēu.

¹⁴ Peipisi yande Yar Jesucristo porovasasa, Tūpa poroaisusa iyavei Espíritu Santo tasecoi opacatu pe rese. Aipo rupive che ñehe pēu.

PABLO REMBICUACHIA GALACIA PENDAR UPE GALATAS

Pablo mahenduhasa Jesús reroyasar Galacia pendar upe

¹ Che, Pablo, imondopri aico apóstol che reco água. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir. ² Che, Pablo, iyavei opacatu Jesús reroyasar yuvirecoi vahe coháve oroicuachía co ore ñehe pēu, pe opacatu Jesús reroyasar Galacia pipe peico vahe. ³ Tapeipisi yande Ru Tūpa, yande Yar Jesucristo porovasasa pe reco tupri água. ⁴ Ahe acoi oyemondo vahe omano água yande angaipá reprirā. Ëgüe ehi cûrtei yande renose co ivi pipe mbahe-mbahe tēi sui yande Ru Tūpa remimbotar rupi. ⁵ j̄lboeteipri apirēhi Tu tasecoi!

Ndipoi ambuae ñehesa poropísirosa resendar

⁶ Che pihamondii etepri peye. Esephia, peyepepi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro água peico viña. ⁷ Supi eté ndipoi ambuae ñehesa písirosa resendar. Ëgüe ehi rumo, oime ava pe mañeco tēi vahe pe mbopa água ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco. ⁸ Oimese rumo que ambuae ava oñehe vahe poropísirosa angahu tēi rese ndoyoyai vahe che ñehesa rese pesendu vahe yipisuive, evoco nungar ava upe “Toime Tūpa ñemoírosa” ahe yepe chera viña, anise que Tūpa rembiguai iva pendar avei no. ⁹ Amboyupagüe iri, “Evoco nungar ava upe toime ité Tūpa ñemoírosa” ahe.

¹⁰ Aipo che he pipe, ndasecaí ava tēi, “Co mbia aviyé vahe” he água cheu, Tūpa rumo aseca cheu aipo he água. Esephia, java remimbotar rupi tēi mbahe ayapo vîtese, evocoiyase ndahei chietera Cristo rembiguai aico viña!

Mara ehi Pablo apóstol güeco água

¹¹ Che rivireta, tapeicua co ñehesa poropísirosa resendar amombehu vahe ava upe ndahei ava tēi pihañemoñetasa. ¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yipindar che recocuer resendar, che mu judío yembohesa rupi aguata vîtese aracaco. Che píratasa pipe tēi aseca opacatu Tūpa rembiporavo Jesús reroyasar momara água. ¹⁴ Ëgüe ahe che ayemboivate ai catu che mboetasa eta sui judío yembohesa pipe. Ayapó catu opacatu che recocuer pipe yipindar che ramoi eta yembohe agüer rupi eté vichico. ¹⁵ Tūpa rumo yipive che ha viteñiseve che poravo oyeupe nara. Iyavei oporoaisusa pipe che renoi güemimbotar rupi. ¹⁶ Ëgüe ehi ahe oicua uca Guahir cheu, che imombehu água co ñehesa Tahir recocuer resendar ava ndahei vahe judío upe. Ndasoi rumo ava tēi upe icua água; ¹⁷ ndasoi avei Jerusalén ve yipive apóstol yuvirecoi vahe repia água. Che rumo aso voi eté ivi Arabia ve. Coiyé ayevi tecua Damasco ve vitu.

¹⁸ Ichui mbosapi aravíter che seroya pare, aso tecua guasu Jerusalén ve cute. Ahese ramo Pedro ambori quince ari rupi güerañomi tēi.

¹⁹ Ndasepiae eté rumo ambuae apóstol. Yande Yar rivri Santiago güeraño asepia. ²⁰ Tüpa oicua co mbahe aicuachía vahe pēu, supi tupri vahe ité.

²¹ Ipare aso ivi Siria ve, Cilicia ve avei no. ²² Yande Yar reroyasar rumo oñemonuha vahe ivi Judea ve ndache cuai eté yuvireco. ²³ Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo água, cüritei omombehu Jesucristo reroya áqua oico” ehi, “Ahe acoi yipindar yande mocaní pota rai vahe oico” ehi yuvireco cheu. ²⁴ Ahese, “Imboeteipri Tüpa tasecoi” ehi yuvireco che recocuer rese.

2

Ambuae apóstol, “Aviye ité Pablo porombohesa” ehi yuvireco

¹⁻² Coiye catorce aravíter pare, Tüpa omboyecka cheu Jerusalén ve che yevi áqua. Evocoiyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaiptai che rembiapo opitara ëgue ehi tēi vaherā. Evocoiyase amombehu co ñehesa poropísirosa resendar chupe yuvireco acoi amombehu vahe ava eta ndahei vahe judío pâhuve. ³⁻⁴ Oime rumo amove yande rivri angahu tēi, ahe yuvíroique mbegüe vahe ore pâhuve ‘yasecoepia rane, ¿supi eté ndoviroyai Moisés porocuaita Jesucristo reroyasa pipe yuvireco?’ oyapave. Oipota ahe ore reroyevi iri Moisés porocuaitavíve tēi yuvireco viña. Ahese che ndugüer Tito upe, “¡Eyembocircundida Moisés porocuaita rupi!” ehi yuvireco. Esepia, ahe ndahei vahe judío secoi. ⁵ Ore rumo ndoroipotai eté semimbotar apo áqua yuvireco chupe. Esepia, ‘tovireco viteño oyese co ñehesa písirosa resendar supi tupri vahe yuvireco’ ore yapave pēu.

⁶ Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuaita virecora ivate yuvireco viña. Che rumo nañecuñaroí chietera che recocuer sui. Esepia niha, Tüpa ndahei ava rete tēi osepia.) ⁷ Ahe rumo oicua yuvireco Tüpa che cuai oñehengagüer poropísirosa resendar mombehu áqua ndahei vahe judío yuvirecoi vahe upe, inungar omondo Pedro oñehengagüer poropísirosa resendar mombehu áqua judío upe. ⁸ Esepia, inungar Tüpa omondo Pedro upe apóstol seco áqua ava judío upe nara, ëgue ehi avei imbou apóstol che reco áqua ava ndahei vahe judío upe nara.

⁹ Sese Santiago, Pedro iyavei Juan, ahe chupe, “Oyemoviracula vahe Jesús reroyasar pâhuve” ehi yuvireco, ahe oicua yuvireco Tüpa ombou vahe oporovasasa cheu. Ahese imboetaso ore recosa pipe che po pisi yuvireco, Bernabé upe avei ëgue ehi yuvireco. Iyavei ipiha rupi eté ore oroporavíqui vaherā ava ndahei vahe judío pâhuve oroico, inungar ahe oroporavíqui judío pâhuve yuvireco. ¹⁰ Co reseño oporandu yuvireco oreu: “Peyemomahenduhami ava iparaísu vahe pítivií áqua rese” ehi. Yipive ité rumo che ëgue ahe pota vichico yepi.

Pablo oñeho pírata Pedro upe sembiavi rese Antioquía ve

¹¹ Iyavei osose Pedro tecua Antioquía ve. Aheve oyaví güecocuer. Evocoiyase añeho pírata sovai eté chupe mbahe sembiavi rese. ¹² Esepia, yipindar ahe ocaru ndahei vahe judío píri viña. Ipare rumo, oyepotase ambuae judío Jesús reroyasar Santiago mboetaso yuvireco, ahese Pedro

osiriño ichui osiquiyepave. Iyavei ndocaru iri ipiri. Esepio, ahe Jesús reroyasar judío yugüeru vahe “judío recocuer rupi yaguatara yande ñepisiro águia” ehi vahe ité yuvireco viña.¹³ Evocoiyase ambuae Jesús reroyasar judío avei osiripaño tēi supive yuvireco. Bernabé avei eté supive ëgüe ehiño tēi.¹⁴ Che asepiase rumo, ndahoyoyai secocuer yuvireco co ñehesa poropisirosa resendar supi tupri vahe rese. Ichui Pedro upe añahe opacatu Jesús reroyasar rovaque: “Nde niha judío, ereico rumo inungar ndahei vahe judío. Cûritei rumo erembohe tēi nde rembiapo pipe evocoi ava ndahei vahe judío Jesús reroyasar judío rereco uca águia” ahe chupe.

Judío, ndahei vahe judío oyoya oñepisiro yuvireco Cristo rese oyeroyasa pipe

¹⁵ Yande niha judío yande hasa suive yaico, ndahei ava ndahei vahe judío nungar yangaipa vahe yaico.¹⁶ Cûritei rumo yaicua, ndipoi eté que ava seco catupri vahe Tûpa rovaque Moisés porocuaita mboaviyesa pipe. Jesucristo rese yeroyasa pipeño ité rumo yande reco catupri. Sese yande yayeroya ité Jesucristo rese, “Co seco catupri vahe” Tûpa he águia yandeu. Ëgüe ehi eté seroya pipe, ndahei acoi porocuaita tēi reroyasa pipe. Esepio, ndipoi chietera que ñepei ava seco catupri vahe Tûpa rovaque evocoi porocuaita tēi aposa pipe.

¹⁷ Yasecase yande reco catupri águia Cristo rese yande yeroyasa pipe, ipipe yaicuase angaipa viyar yande reco, ¿Cristo pîha evocoiyase yande mboangaipa? ¡Aní eté!¹⁸ Che amoçafise mbahe, ipare rumo amopuha irise, che evocoiyase ayemboangaipa ipipe.¹⁹ Esepio, ndaicatuise Moisés porocuaita reroya tupri che ñepisiro águia, ahese ocañi tēi vahe aico ipipe. Ichui rumo Jesucristo reroyasa pipe asupití Tûpa upe nara che recove águia. Esepio, che aviye yaticapri aico Cristo rese.²⁰ Sese ndahe iri che ité aicove; Tûpa Rahir Cristo rumo che rese secoi. Sese ité ayeroya che retecuer pipe che recove águia. Ahe niha oyemondo omano águia che raisupave.²¹ Naroiroi eté co Tûpa porovasasa. Esepio, ava seco catupira Tûpa rovaque porocuaita tēi reroya pipe viña, evocoiyase Cristo mano agüer ëgüe ehi tēi etera viña.

3

Porocuaita iyavei yeroysa

¹ ¡Ndapembahecuai eté pe Galacia pendar! Pe ndoyavii ipaye vahe remimbopa peico. Oromombehu tupri niha pe rovai eté acoi Jesucristo curusu rese yatica agüer pêu.² ¡Pemboyecua co che porandusa cheu! ¿Moisés porocuaita mbooyeroya pipe pîha peipisi Espíritu Tûpa suindar, co ñehesa pesendu vahecuer reroya pipe tie?³ ¡Ndapembahecuai eté! Yipindar Espíritu pipe pemboipi Cristo rupi pe guata águia. ¿Ëgüe peye aveira pîha pe pîratasa pipe tēi pe guata tupri águia Cristo rupi cûritei?⁴ ¿Ndape pîtiviimi eté vo acoi opacatu pe paraísusa Cristo recocuer rese? ¡Pe pîtiviimira tarahu viña!⁵ Tûpa niha omondo oEspíritu pe rese iyavei oyapo poromondiisa pe pâhuve. ¿Mahera pîha oyapo? Esepio, co ñehesa pesendu vahe peroya ité, sese ëgüe ehi pêu ndahei Moisés porocuaita tēi reroya pipe.

⁶ Esepio, aracahe Abraham oyeroysa ité Tûpa rese, ipipe sui Tûpa oipisi seco catupri vahe nungar oyeupe nara.⁷ Sese iya ité peicuara opacatu

acoi oyeroya vahe Tūpa rese yuvireco, ahe Abraham suindar supi tupri vahe. ⁸ Iyavei Tūpa Ñehengagüer icuachiapri pipe omombehu ité senon-deve Tūpa oipisi aveira opacatu oyese oyeroya vahe ndahei vahe judío co ivi pipendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pipendar sovasaprira yuvireco nde sui” ehi. ⁹ Evocoiyase Tūpa osovasara cûriteindar oyese yeroyasareta inungar Abraham aracahe.

¹⁰ Acoi seco catupri pota vahe Moisés porocuaita pipe tēi yuvirecoi vahe, ahe Tūpa ñemoirosavrive tēi yuvirecoira. Esepia, icuachiapri aracahendar pipe aipo ehi: “Opacatu ava nomboaviyei vahe ité opacatu Tūpa porocuaita icuachiapri pipe yepi, ahe ññemoirosavrive tēi yuvirecoira” ehi. ¹¹ Sese, co omboynecua tupri yandeu ndahei Moisés porocuaita reroyasa pipe tēi Tūpa, “Co seco catupri vahe” ehi ava upe. Esepia, icuachiapri aracahendar pipe aipo ehi: “Acoi ava seco catupri vahe oicovera Tūpa rese oyeroyasa pipe sui” ehi. ¹² Moisés porocuaita ndahoyoyai Cristo rese yeroyasa rese. Esepia, ahe porocuaita aipo ehi: “Acoi ava oico pota vahe co porocuaita pipe, tomboaviye tupri ité opacatu porocuaita güecove äguá” ehi.

¹³ Moisés porocuaita mboavkiyeëhisa pipe yacañi tēira viña. Cristo rumo yande renose yande cañi tēi rägüler sui. Ahe ae opa oipisi ñemoirosa yande repirä. Esepia, icuachiapri aracahendar pipe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi. ¹⁴ Ëgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipíe sui yande opacatu yaipisi Espíritu imombe-hupri yayeroyase Cristo rese cûritei.

Porocuaita iyavei Tūpa güemimombehugüer omboavkiye vaherä

¹⁵ Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepei reseve oicuachiase güemimbotar omombehu vahe, ahese ndipoi que ambuae ava omboyeho vaherä iyavei ndipoi que ambuae ava omboyeapi iri vaherä. ¹⁶ Ëgüe ehi avei Tūpa remimombehugüer Abraham upe aracahe. Esepia, oñehe ñepei reseve chupe iyavei ichuindar upe avei. Tūpa Ñehengagüer icuachiapri pipe: “Nde suindareta upe” ndehi, inungar-ra que ava rehii upe viña. Ëgüe ehi rumo, “Nde suindar upe ité” ehi ‘ñepei ava’ ohesa pipe, ahe Tūpa Rembiporavo Jesucristo. ¹⁷ Co mbahe amombehu pota pêu: evoco porocuaita Tūpa ombou vahecuer cuatrocientos treinta aravíter pare, ndoicatui chietera Tūpa ñepei reseve Abraham upe omombehu vahecuer iyavei oñehe omboavkiye vaherä mboyeño ägua. ¹⁸ Supi eté acoi Tūpa suindar ou vaherä porerecosa Moisés porocuaita mboavkiye pipe suise viña, ahese ndahei chiaveira Tūpa remimombehugüer sui. Ahe rumo ñepei reseve Tūpa remimombehugüer rupi Abraham upendar porerecosa.

¹⁹ ¿Mahera pîha evocoiyase avkiye Moisés porocuaita? Esepia, ava poreroyaëhisa cua ägua Tūpa ombou oporocuaita Moisés upe aracahe. Co porocuaitavrive rumo ava yuvirecoi acoi oyepotase voi Abraham suindar Jesús Tūpa remimombehugüer rupi. Yipindar rumo Tūpa oyocuai güembigui iva pendar oporocuaita mombehu ägua Moisés upe aracahe

‘tomombehu evocoiyase Moisés che porocuaita opacatu ava upe’ oya-pave.²⁰ Ñepei ava rese oñemoñetase, ndipotasai ambuae imoingatu água. Tūpa niha ñepei vahe secoi.

Mbahe sui Tūpa ombou oporocuaita

21 “Moisés porocuaita co coti tēi Tūpa remimombehugüer imboaviyepirā sui” aipo ndahei eté pēu. Esepia, acoi Tūpa omondose que porocuaita ombou vaherā tecovesa apirēhi ava upe imboaviyesa pipe, evocoiyase porocuaita reroya pipe yande reco catuprira Tūpa rovaque viña.²² Icuachiapri aracahendar pipe rumo omombehu ité co: opacatu ava inungar mbiguai tēi oangaipa pipe yuvirecoi. Evocoí ëgüe ehi, Jesucristo rese yande yeroyasa pipe yasē vaherā ichui mbahe imombehupri pisi água.

23 Yipindar rumo mbiguai nungar yaico Tūpa nomboyecua vitéise Guahir rese yande yeroya água.²⁴ Inungar chihivahemi tēi, ëgüe yahe porocuaitavrīve yaico yipindar. Ahe porocuaita rumo yande mbohe Cristo yu água ‘toyeroya Cristo rese güeco catuprī água curi’ oya yandeu.²⁵ Cūritei rumo oime Jesucristo rese yeroya água cute. Evocoiyase ndahe iri ahe porocuaitavrīve yaico.²⁶ Pe niha opacatu Tūpa rahir peico Jesucristo rese yeroya pipe.²⁷ Opacatu pe ñapiramombri peico vahe Jesucristo rupi pe guata água, secocuer avei pereco.²⁸ Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepei vahe nungar ité yaico Cristo rese.²⁹ Jesucristo rese peicose, pe evocoiyase Abraham suindar nungar tuprī ité peico. Evocoiyase pe avei peipisira Tūpa remimombehu porerecosa yandeundar.

4

¹ Amboyoapi vitera co che ñehesa pēu: inungar que ava omanose, oseya ombahe eta guahir upe chihivahemise. Yepe ahe tahir opacatu mbahe yar secoira viña, ahe rumo inungar tuprī mbiguai tēi secoi vahe yepi.

² Esepia, ahe guārosar povrīve secoi imbooyeroya água. Ocuacuase voi eté, opoira tu remimombehugüer rupi ichui.³ Ëgüe ehi avei yandeu. Yande chihivahemise, evocoiyase mbiguai nungar yipindar vahe co ivi pipendar porocuaitavrīve yaico.⁴ Oyepotase rumo ari imombehupri, Tūpa ombou Guahir, ahe oha cuña sui; evocoiyase ahe Moisés porocuaitavrīve secoi.

⁵ Ëgüe ehi ou opacatu yande renose água evocoí mborocuaitavrī sui Tūpa rahir ité yande reco água.⁶ Evocoiyase Tūpa nomboyecua Guahir yande recose ombose Guahir Espíritu yande piha pipe, “¡Che Ru!” yande he água chupe.⁷ Sese yande Tūpa rahir ité yaico, ndahe iri cūritei mbiguai tēi nungar. Tūpa rahir yande reco pipe ahe ombou aveira oporerecosa yande mahera.

Pablo ipihañemoñetaño ité Jesús reroyasar rese oico

⁸ Yipindar tūpa angahu rembiguai tēi peico Tūpa ité cuaëhi pipe.⁹ Cūritei rumo peicua Tūpa, ëgüe ehi rumo Tūpa ité oicua pe recocuer. Sese niha aipo ahe cheyeupe: “¿Mara ehi pīha oyevi iri mborocuaita tēi pipe mbiguai tēi güeco iri água yuvireco?” ahe pēu.¹⁰ Esepia, pemboetei vite ari, yasi, araviter pieta eta tēi peico.¹¹ ¡Che ayembosiquiye pe rese, “Che porombohesa revo ëgüe ehi tēi vahe ipāhuve yuvireco chupe” ahe pēu!

¹²Iyavei che rivireta, aipota che recocuer moña peye. Esepio, cuese che asẽ Moisés porocuaita povr̄i sui inungar pe yipindar ēgüe ahe vichico pe pāhuve. Ahese ndapeyapoi eté mbahe cheu. ¹³Peicua niha che yipindar chembahreasise vichico, ahese amombehu co ñehesa p̄sirosa resendar p̄eu. ¹⁴Yepe co che mbaherasisa yavai etepri p̄eu viña, pe rumo ndache reroñroi eté peye iyavei ndache momboi peye. Ēgüe ehi rumo aviye acoi Tūpa rembiguai eté che rereco peye viña iyavei aviye Jesucristo itera aico p̄eu viña no. ¹⁵¡Mahera ru cūritei ndapeyemboviharete vitei che rese peico eipeve! Esepio, supi eté, cuese acoi que pe resa teieté revo pemboura cheu viña. ¹⁶¡Evocoiyase cūritei che amotarëhi tie peye acoi p̄eu mbahe supi tupri vahe mombehusa sui tēi!

¹⁷Evocoi ava iquerëhi ité pe rese, ndahei rumo mbahe aviye vahe apo âgua yuvireco. Ahe rumo oipota pe mboyepépi âgua tēi ore sui yuvireco pe querëhi âgua supi. ¹⁸Aviye ité niha yande querëhise mbahe apo ambuae ava upe, mbahe aviye vahe apo âgua rumo. Ndahei chira pe pāhuve che recoseño pereco pe querëhisa. Iyacatu rumo pequerëhiño itera yepi. ¹⁹Che rahireta, che ayembopiharasí ité vichico pe rese. Inungar cuña imembirasi vahe; ēgüe aheño itera ayemombaraisu vichico ‘toico rane ité Cristo sese yuvireco’ che yapave p̄eu. ²⁰Cūritei rāgür opoepiara viña añehe tupri catu âgua pe rese. Esepio, “¿Mara ahera revo sereco yuvireco?” ahe p̄eu.

Agar, Sara recocuer resendar yembohesa

²¹Pe peroya pota vahe Moisés porocuaita pe reco catupri âgua, pemombehumi cheu: ¿Ndapesenducuai tie co mborocuaita aipo ehi vahe? ²²Esepio, aipo ehi: Abraham aipo vireco ñuvirío guahir, ñepei tahir aipo sembiguai Agar membrai, ambuae tahir evocoiyase sembireco Sara membrai. ²³Evocoi sembiguai membrai oha que ava tēi yesu nungar; sembireco membrai rumo oha Tūpa remimombehuguer rupi eté. ²⁴⁻²⁵Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tūpa remibotar rese. Yipindar sembiguai Agar omboynecua evocoi porocuaita imondopri Arabia pipendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepio, ahe Moisés porocuaitavrive yuvirecoi. Ēgüe ehi avei opacatu Moisés porocuaita pipendar, yuviroha mbiguai nungar güeco âgua, opacatu ichuindar ēgüe ehi vite yuvireco. ²⁶Yande rumo inungar-ra que Jerusalén iva pendar suindar yaico viña ēgüe yahe yaico mbiguaiëhi. ²⁷Esepio, icuachiapri aracahendar pipe aipo ehi:

“Eyembovhareté, cuña nimembii vahe;
esapuai nde rorivetesha pipe, nde ndereiporarai vahe nde membrai rasicuer.”

Esepio, acoi cuña seyapri imembí ati catura cuña omer vireco vahe sui” ehi.

²⁸Che rivireta, inungar Sara membrai Isaac, ēgüe yahe avei tahir ité yaico Tūpa remimombehuguer rupi. ²⁹Co rumo aracahe sembiguai membrai oha vahe ava tēi yesu nungar, ahe ndoyambotai sembireco membrai acoi Espíritu p̄iratasa pipe sui oha vahe; cūritei ēgüe ehi tupri avei. ³⁰¿Mara ehi icuachiapri aracahendar pipe? “Pemboyepépi pe rēta sui cuña mbiguai tēi imembri reseve. Esepio, cuña mbiguai tēi membrai ndiyai oyoya cuña ndahei vahe mbiguai membrai rese vu mbahe pisi âgua yuvireco” ehi. ³¹Sese, che rivireta, yande ndahei sembiguai tēi membrai

nungar yaico, yande rumo sembireco membrí nungar yaico. Esepio, ahe ndahei mbiguai.

5

Peyemoviracuaño ité Moisés porocuaita pipe pe recoēhi ãgua

¹ Jesucristo niha ombou yandeu mbiguai tēi nungar sui yande sē ãgua. Sese peyemoviracua mbiguai tēi pe reco iriēhi ãgua.

² Pesendu che ñehe. Che, Pablo, aipo ahe pēu: acoi peyembocircuncida ucase, ahese ëgue ehi tēi vahe Cristo pereco. ³ Che amombehu pota irimi pēu, que ava oyembocircundida uca vahe, vireco niha ocuaita opacatu Moisés porocuaita mboyeroya ãgua. ⁴ Pe pereco catupri pota tēi vahe Tūpa rovaque evoco porocuaita tēi reroya pipe, peyepepi ité Cristo sui. Evocoiyase Tūpa porovasasa avei pemocañi tēi peyesui. ⁵ Yande rumo yande querēhisa pipe yayeroya yande reco catupri ãgua rese. Ëgue yahe Espíritu yande pítiviisa pipe iyavei Jesús rese yeroyasa pipe avei. ⁶ Esepio, acoi yaicose Jesucristo rese, yepe yayembocircundidase, anise ndayayembocircundidase, ahe ndayande pítivii eté yande reco catupri ãgua Tūpa rovaque. Co güeraño rumo yande pítivii Jesús rese yande yeroyasa. Ahe niha yande mboyeaisu uca.

⁷ Peico tupri niha yipindar viña. ¡Ava ru ndoviroya uca iri mbahe supi tupri vahe pēu! ⁸ Ndahei eté rumo pe poravosar Tūpa ëgue ehi pēu. ⁹ ¿Ndapeicuai vo acoi aipo ehi vahe: “Chihimi pan mboapeposa oso panguā rese opacatu rupi oicahopa tupri yepi” ehi? ¹⁰ Che rumo ayeroya yande Yar rese pe pihañemoñeta ãgua che pihañemoñetas rupi. Tūpa rumo omboura ofñemoñosa que ava pe mbopihañemoñeta yoavirati uca vahe upue.

¹¹ Che rumo, che rivireta, “Iya yayembocircundida yande reco catupri ãgua” ahe vitese Jesús reroyasar upe viña, ahese revo ndipoi chira che amotarēhisar judío pâhuve, ahese avei ndipoi chira ñehesa curusu rese Jesús manosa resendar amotarēhimbar ipâhuve viña. ¹² Evoco ava pe mbopihañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepei reseve yuvireco!

¹³ Esepio, pe ore rivireta, Tūpa niha pe renoi mbiguai tēi nungar pe recosa sui pe renose ãgua. Ndahei chira rumo pe remimbotarai tēi apo ãgua, iyacatu rumo peñepitiviira pe yeaisusa pipe. ¹⁴ Esepio, opacatu evoco mborocuaita imboaviyesa yamboaviyeso co ñehesa aipo ehi vahe: “Esaísu ambuae ava nde yeaisu nungar” ehi vahe. ¹⁵ Peyeño tetei rene catu; peicua catu, aviyeteramo ëgue peyese, pe recocuer pemomarapa tiéteria.

Yaguatará Espíritu remimbotar rupi, ndahei yande remimbotar tēi rupi

¹⁶ Pesendu che ñehe: Espíritu píratasa pipe catu peico yepi. Iyavei peyapoi rene mbahe pe remimbotarai. ¹⁷ Esepio, co pe remimbotarai ndahoyoyai eté Tūpa Espíritu remimbotar rese. Ndoyembohe catui eté. Sese ndapeyapo ucai mbahe pe remimbotar aviye vahe peyeupe. ¹⁸ Acoi Espíritu ité pe reroguatase, ahese ndahe iri chiaveira Moisés porocuaitavríve peico.

¹⁹ Yande remimbotarai suindar yande rembiapo ai icuasa tupri ité. Ahe: yemboaguasa tēisa, teco quihasa, mbahe tēi aposa; ²⁰ mbahe rahanga upe yerure tēisa, yembopayesa, ñeroñosa, ñehopoepi-episa iyavei

ambuae ava mbahe pota raisa; ñemoiro seraiza, yemboyaho-yahosa, pihañemoñeta yoyaëhisa,²¹ iyavei ambuae ava mbahe pota raisa rese ñemoirosa, savaiposa, yembopieta tēsa iyavei ambuae mbahe co nungar tupri aposa. ¡Peicua catu! Esepia, evoco nungar mbahe aposar ndoyuviroiquei chietera Tūpa mborerecuasave yuvireco curi.

²² Yayapose rumo Espíritu remimbotar, yande evocoiyase yayeaisura, yande rorivetera, yaicora mbahe tupri pipe, yande reco mbegüera, yaporaoisura yande reco aviyesa pipe, yamboyecuara yande cuaita mboaviyesa,²³ yayemominiñora iyavei yande recorā rese yañearo tuprira. Evoco nungar yayapose, ndipoi eté que mborocuaita pipe yande yeamotarëhi äqua. ²⁴ Jesucristo rese ité yuvirecoi vahe rumo, opa ité omombo güecocuerai co ivi pipendar tēi oyesui yuvireco, güemimbotarai, opihañemoñeta raisa avei no. ²⁵ Yande yaicose Espíritu píratasa rese, ahese Espíritu rupi eté yaguatara.

²⁶ Ndayayemboivate ai chira. Esepia, ipipe sui yayeamotarëhi, yaipota rai avei yande mboetasa recocuer nungar yande reco äqua.

6

Peñepitivii ñepei-peí

¹ Che rivireta, acoi que Jesús reroyasar pe pāhu pendar oyavise güecocuer, pe peico vahe Espíritu rese, peipitivii secocuer moingatu äqua pe recocuer mbegüemisa pipe. Peicua catura rumo, aviyeteramo oyoya voi peyemboangaipa uca tiëtera. ² Peñepitivii-tivii catu que mbahe yavai rai vahe rese. Ëgue peyese, Jesucristo porocuaita pemboaviyera.

³ Amove ava, "Che ivate catu vahe aico" ehi tēi. Ëgue ehi rumo ahe ae oyembopa aipo ohesa pipe oico. ⁴ Sese niha ñepei-peí eté yaicua tuprira yande recocuer. Aviyese, evocoiyase sese yaviharetera. Ndahei acoi ambuae ava recocuer rese tēi yamboyoyara yande recocuer. ⁵ Esepia, ñepei-peí eté yande yacatu yareco yande cuaita imboaviye äqua.

⁶ Acoi oyembohe vahe Tūpa ñehe písrosa resendar rese, tomondo ombohesar upe mbahe güembiereco ipítivii äqua.

⁷ Peyembopa eme catu pe ae. Ndipoi chietera que ava viroïro vahe Tūpa ñemoirosa písöhisa pipe. Ëgue ehi eté: yañotise mbahe, ichui avei mbahe yaipisira. ⁸ Acoi ava rumo oyapo vahe mbahe güemimbotarai pipe, ahe oipisira cañisa apirëhi vahe. Acoi oyapo vahe mbahe Espíritu remimbotar rupi, ahe oipisira tecovesa apirëhi vahe yuvireco. ⁹ Evocoiyase tayandecuerai eme mbahe tupri apoa pipe. Esepia, acoi ndayandecuaise, yaipisira mbahe tupri apo reprí. ¹⁰ Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

Pablo, "Peicua catu pe mbocircuncida pota vahe sui" ehi iyavei ñehesa ipa vahe

¹¹ ¡Pesepia co ñehesa ipa vahe che pove ité aicuachía tuvicha vahe pëu! ¹² Acoi judío Jesús reroyasar pe mbocircuncida uca potaño tēi vahe 'Co mbia aviye ité, tehi ndahei vahe Jesús reroyasar judío yuvireco yandeu' ohesa pipe tēi Ëgue ehi yuvireco viña. Esepia, ndoipotai evoco judío oamotarëhi co ñehesa Cristo atica agüer mombehu pipe yuvireco. ¹³ Acoi oyembocircuncida uca tēi vahe avei rumo nomboaviyei eté opacatu mborocuaita yuvireco. Oipota rumo pe mbocircuncida ucara

oyemboivate ai ãgua pe cuaise evoco nungar apo yuvireco.¹⁴ Che rumo ndayemboivate potai eté. Curusu rese yande Yar Jesucristo mano agüer rese güeraño ité ayemboviha. Imano agüer sui co ivi pipendar mbahe pota raisa opa ité che sui. Che evocoiyase inungar omano vahe aico chupe.¹⁵ Yepe que yayembocircuncidase revo, anise que ndayayembocircuncidaise viña, ndayande pítivii eté Cristo rese yaico tupri ãgua. Co rumo aviye vahe ité yandeu: Túpa yande recocuer mbopiasuse.¹⁶ Opacatu yuvirecoi vahe co ñehesa che remimombehugüer rupi iyavei opacatu Túpa upendar supi eté vahe toipisi Túpa suindar teco tuprisa iyavei iporoparaísuerecosa yuvireco.

¹⁷ Aviye, co pipe suive ndaipota iri que ava che mañeco tẽi vaherã. Esepia, che areco che retecuer rese che apicha-picha agüer. Ahe omboye-cua Jesús rembiguai che recosa.

¹⁸ Che rivireta, yande Yar Jesucristo tape rovasa opacatu. Aipo rupive.

PABLO REMBICUACHIA EFESO PENDAR UPE EFESIOS

Pablo mahenduhasa Jesús reroyasar Efeso pendar upe

¹ Che, Pablo, Jesucristo apóstol aico Tūpa remimbotar rupi. Che aicuachía co che ñehe pēu pe Efeso pendar, Tūpa upendar Jesucristo reroyasar peico vahe. ² Yande Ru Tūpa iyavei yande Yar Jesucristo tombou oporovasasa pe reco tupri ãgua pēu.

Cristo suindar porovasasa

³ Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe. ⁴ Sese niha Tūpa yande poravo yipivé ité ivi apoëhi viteseve ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe. ⁵ Ipipe avei yipisuive yande pisí guahirguâ Jesucristo yande písirosa pipe güemimbotar rupi. ⁶ Sese yande yasapucai chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui. ⁷ Tūpa yande raisu eteprisa pipe yande písiro Guahir ruvi piyeresa pipe yande angaipa rese ñero ãgua. ⁸ Yande raisu pipe avei ombou opacatu yande aracua ãgua iyavei yande yapisaca ãgua avei yandeu, ⁹ iyavei oicua uca güemimbotar yipisuive ndicuasai vahe yandeu co güembiaporâ mboaviye ãgua. ¹⁰ Oyepotase ahe ari imboaviye ãgua, Tūpa opacatu mbahe iva pendar, co ivi pipendar avei opara omoingue ñepei reseve Guahir Cristo povrige.

¹¹ Cristo rese yaicose, Tūpa yande poravo yipisuive ichuindar mbahe yandeundar pisí ãgua. Opacatu rumo mbahe Tūpa remimbotar rupi. Ahe niha oicua ité güemimbotar apo ãgua ¹² ‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu. ¹³ Pe avei niha, pesenduse co ñehesa supi eté vahe pisirosa resendar, Cristo peroya pe piha pipe sese peico vaherâ. Tūpa ombou güemimombehugüer Espíritu Santo pe piha pipe ‘cheundar ité yuvirecoi’ oya. ¹⁴ Ipisisa pipe niha yaicua yande yaipisi vaherâ yandeundar mbahe imoingatupri, acoi Tūpa opase oipísiro ava oyeupendar ‘ipipe sui tomboetei che reco ivatesa ava yuvireco’ oya.

Pablo oporandu Tūpa upe mbahecuada Jesús reroyasareta upe mondo ãgua

¹⁵ Ayandu peyeroya tupri yande Yar Jesús rese iyavei pesaisu ité ava opacatu Tūpa upendar. ¹⁶ Sese ndapoi eté Tūpa upe, “Aviye ndeu” che hesa sui chemahenduhase pe rese che yeruresa pipe. ¹⁷ Che aporandu yande Yar Jesucristo Ru Tūpa seco porañete vahe upe, pe recocuer resape ãgua rese. Ipipe peicua tupri catura semimboyecua iyavei peicua tupri catura yande Yar. ¹⁸ Ëgüe ahe ité aporandu Tūpa upe pe piha resape ãgua rese. Ipipe peicua catura co pesâro vahe ivave pe reique ãgua; chupe nara ité Tūpa pe peha. Iyavei peicuara co mbahe imondopirâ iva pendar iporañete vahe Tūpa upendar yuvirecoi vahe upe. ¹⁹⁻²⁰ Ipipe sui peicua tupri aveira Tūpa píratasa ndopai vahe yande seroyasar yaico vahe rese. Co píratasa ivaté vahe ité. Ahe píratasa Tūpa omboyecua, ombogüerayevise Guahir Cristo omano vahe pâhu sui, iyavei omboguapise oacato coti

ivave. ²¹ Osecomboivate catu opacatu iva pendar, ivi pendar seco ivate vahe mborerecua-recuar tēi pīratasa sui iyavei opacatu cūriteindar sui, que oime vaherā sui avei. ²² Opacatu mbahe omondo Guahir Cristo povrīve, Tahir upe avei ombou mborerecuar ivate catu vahe seco āgua opacatu viroyasar upe. ²³ Opacatu yande seroyasar yaico vahe recocuer rese Cristo secoi. Evocoiyase yande setecuer nungar yaico. Ahe opacatu rupi secoi.

2

Tūpa oporovasasa pipe yande pīsiro

¹ Pe rumo, yipindar angaipa pipe peicose, inungar omano vahe peico Tūpa upe. ² Co ivi pipendar pihañemoñeta rupi tēi peico iyavei ivate rupindar caruguar rerecuar porocuaita tēi avei peroya, ahe Jesús reroy-asarēhi ombohe vahe. ³ Yipindar opacatu yande avei yaguata yande remibotar rupi tēi yande recocuerai pipe. Yande pihañemoñeta raisa rupi tēi avei yayapo mbahe. Sese Tūpa ñemoírosa yaipisira opacatu ambuae ava rupive viña. ⁴ Tūpa rumo yande paraisuereco ité, yande raisu etepri avei. ⁵ Yepe angaipa pipe yaico omano vahe nungar viña, ahe rumo ombou Guahir yande recove āgua. Ahe oporovasasa pipe yande pīsiro. ⁶ Yande mbogüerayevi iri avei niha sese. Ipare seseve yande moingue oyepiri ivave ⁷ ‘tamboyecua opacatu iva pendar upe che porovasasa iyavei che poroaisusa tuvicha vahe che Rahir rembiapo pipe sui curi’ oya. ⁸ Esepia, oporovasasa pipe pe pīsiro Jesús rese peyeroyase. Ndahei rumo pe recocuer sui tēi peñepisiro, ahe rumo ombou porerecosa pēu. ⁹ Ndahei avei ava rembiapo sui tēi ou vahe. Evocoiyase ndiyai chira yayemboivate ai ipipe. ¹⁰ Tūpa niha yande recocuer mohivi Jesucristo rese yande reco āgua mbahe icatupri vahe apo āgua. Ahe mbahe icatupri vahe yipisuive Tūpa omoime yande rembiaporā.

Cristo omboou yande reco tupri āgua

¹¹ Evocoiyase peyemomahenduha yipindar pe recocuer rese. Ndahei rumo judío suindar peico: “Co ndoicuai vahe Tūpa, ndoyembocircuncidai vahe tēi yuvirecoi” ehi judío yuvireco pēu, (ahe judío oyembocircuncida vahe güete rese oyeupe, “Yande Tūpa rembiporavo imbocircundapri yaico” ehi yuvireco). ¹² Peyemomahenduha yipindar Cristo ndaperecoi vahe rese. Ahese ndapeicoi Tūpa rembiporavo Israel recua pendar iyavei ndapecuai Tūpa remibotar semimombehu avei ombou vahe judío upe ipītivii āgua; ndaperecoi Tūpa iyavei ndaperecoi sārosa pe ñepisiro āgua co ivi pipe viña. ¹³ Esepia, ahese amombri Tūpa sui peico. Cūritei rumo Jesucristo rese peico. Esepia, ahe vuvi pipe pe reru Vu Tūpa upe. ¹⁴ Ahe avei niha teco tuprisa yandeu. Esepia, ahe yande mboyeseha judío, ndahei vahe judío ñepei vahe nungar yande yeamotarēhiēhi iri āgua oyeupe. Yande ñemoírosa niha opa omocañi yande sui güetecuer mondosa pipe. ¹⁵ Cristo omomba opacatu Moisés porocuaita. Ahe oipota ñepei ava nungar teco piasu pipe yande reco āgua, judío iyavei ndahei vahe judío. Égue ehi imocañipa yande yeamotarēhisa yande sui yande reco tupri āgua. ¹⁶ Evocoiyase ahe ae omanose curusu rese, ombou yandeu yandeyeupe ñero āgua judío, ndahei vahe judío ñepei ava nungar Tūpa rupi yande reco āgua.

¹⁷ Ahe ou omombehu co tecocuer piasu pēu pe amombri Tūpa sui peico vahe, omombehu avei ore namombri vahe judío oroico vahe ‘tiñero yuvireco oyeupe’ oya. ¹⁸ Esepio, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vaherā Tūpa rese Espíritu ñepei vahe pipe. ¹⁹ Sese pe ambuae ivi pendar peico vahe, ndahei iri amombri Tūpa sui peico cute. Cūritei rumo Tūpa upendar ité peico opacatu ambuae seroyasar reseve. Yande evocoiyase ñepei reseve oñemu guasu vahe nungar yaico. ²⁰ Pe inungar tūparo maranehi imopuhambri ihivipirā hari pendar peico; apóstol iyavei Tūpa ñehe mombehusar evocoiyase inungar ihivipi yuvirecoi tūparo moviracua água. Jesucristo rumo inungar ita yipindar vahe imohivisa yandeu. ²¹ Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguā, ēgue yahe ipehapri yaico yande Yar upe nara sese ité yande reco água. ²² Sese niha, Cristo rese peicose, pe ambuae viroyasar rese avei sētarā nungar peico. Ipípe Tūpa, oEspíritu pipe, secoira.

3

Pablo cuaita ñehesa pisirosa resendar mombehu água ava ndahei vahe judío upe

¹ Sese, che Pablo, soquendapri aico cohaye Jesucristo recocuer mombehusa sui tēi. Ndahei vahe judío peico vahe pe recocuer aviyé água rese ēgue ahe. ² Peicua tupri revo co che poravíquisa Tūpa ombou vahe cheu oporovasasa mombehu água pēu nara. ³ Co ñehesa yipindar ndicuasai vahe güemimbotar resendar Tūpa omboyecua uca vahe cheu, ahe niha aicuachía chīhi pēu. ⁴ Co rese peyeroquise peicua tupri catura co che aracuasa Cristo recocuer resendar oyecua ramo vahe. ⁵ Co ñehesa icatupri vahe ndoicuai eté ava yuvireco aracahe. Cūritei rumo Tūpa oEspíritu pipe omboyecua güembipeha yuvirecoi vahe upe. Ahe sembipeha apóstol, iñeha mombehusar avei yuvirecoi. ⁶ Evocoi oyecua ramo vahe, ahe co: pe ndahei vahe judío upe avei Tūpa omboura judío upendar nungar tupri porovasasa co ñehesa poropisirosa resendar reroyasa pipe. Pe avei oñemu nungar tupri peico, oyoya ore judío oroico vahe rese. Pēu nara avei Tūpa remimombehugüer aracahendar peyerojase Jesucristo rese.

⁷ Yepe ndiyai cheu viña, Tūpa rumo che moingo opíratasa pipe ñehesa pisirosa resendar mombehu água. ⁸ Che recocuer niha ivi coti catu opacatu ambuae Tūpa reroyasar sui viña, ahe rumo ombou oporovasasa co mboravíquisa ñehesa aviyé vahe Cristo recocuer resendar mombehu água ava ndahei vahe judío upe nara cheu. ⁹ Iyavei ombou che cuaitarā amombehu tupri vaherā opacatu ava upe opacatu mbahe Aposar pihañemoñeta yipindar ndicuasai vahe. ¹⁰ Ēgue ehi cūritei oyesuindar aracuasa cua uca água viroyasareta recocuer rese opacatu mborerecuar guasu, seco pírata vahe ivi pendar upe. ¹¹ Ēgue ehi, Tūpa opihañemoñeta ndopai vahe mboaviye Guahir, yande Yar Jesucristo rese. ¹² Sese yande yeroyasa suiño ité yaicatu yande yemboya água Tūpa rese yande siquyeëhisa pipe. ¹³ Sese aní chira, ndapequerëhi iri Cristo rupi pe guata água, pe recocuer rese che yemombaraisusa sui. Iyacatu rumo che paraísusa pereco pe yembovíha água.

Cristo poroaisusa

¹⁴ Sese añenopiha yande Ru Tūpa rovaque. ¹⁵ Ichui serer pāve vireco yuvireco, opacatu seroyasareta īva pendar, īvi pendar avei ñepei oñemu yuvirecoi vahe nungar. ¹⁶ Che aporandu chupe ‘tombou güeco porañetesa sui opíratasa yuvireco chupe oEspíritu pipe imoviracua ãgua’ viya pēu. ¹⁷ Ëgüe ahe ayeroqui pe rese pe piha pipe Cristo rereco ãgua sese pe yeroyasa pipe. Iyavei pe poroaisusa pipe pe yemoviracua catu ãgua peyese ¹⁸ ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu ãgua yuvireco’ viya pēu. ¹⁹ Che ayeroqui ahe poroaisusa peicua tupri catu ãgua rese (yepe ndayaicatui icuapa tupri ãgua yaico viña). Ipipe sui Tūpa tasecoi pe rese.

²⁰ Cûritei yamboetei yande Ru Tūpa. Esepia niha, ahe opíratasa pipe omniboucha catu itera mbahe yande porandusa sui, yande pihañemoñetasu sui avei yandeu. Esepia, opíratasa pipe oporavíqui yande rese. ²¹ ¡Sese ëgüe tehi imboeteipri Tūpa tasecoi seroyasareta recocuer sui, Jesucristo sui avei apirëhi vaherä!

4

Ava Espíritu rese oyoya guasu yuvirecoi vahe

¹ Sese Cristo recocuer mombehusa sui che roquendasa pipe, “Peico tuprira pe cuaita rupi Tūpa pe renoisa pipe” ahe pēu. ² Peyemominira peico pe reco aviyesa pipe, pe reco mbegüesa pipe aveira iyavei peñemosayo pe yeaisusa pipe peyeupe. ³ Peyapo opacatu pe recocuer pipe peico tupri vite ãgua peyepâhuve Espíritu Santo pe pítiviisa pipe, pe reco tuprisa pipe avei. ⁴ Yaico ñepei nungar Cristo rese iyavei yareco ñepei Espíritu. Ëgüe ehi avei Tūpa yande poravo ñepei guârosa rereco ãgua. ⁵ Oime ñepei yande Yar, ñepei yande yeroyasa, oime avei ñepei poroâpiramosa. ⁶ Oime ñepei Tūpa, ahe opacatu yande Ru, opacatu yande cuaisar, ahe oporavíqui opacatu yande rese, secoi avei yande rese no.

⁷ Iyavei Cristo niha yande yacatu ñepei-peí mbahecuada ombou. ⁸ Sese aipo ehi icuachiapri aracahendar pipe:

“Oso īvave, viraso secopipireta oyeupi; omondo avei porerecosa ava upe” ehi.

⁹ ¿Mara oya aipo ehi: “Oso īvave”? Yipindar ogüeyi co īvi pipe. ¹⁰ Acoi ogüeyi vahe co īvi pipe oso īvate catusave ‘taico opacatu rupi’ oya. ¹¹ Ahe niha ombou amove apóstol seco ãgua, ambuae upe ombou Vu ñehe mombehu ãgua, ambuae upe ombou ñehesa písrosa mombehu ãgua, ombou avei ambuae upe viroyasar râro ãgua iyavei iporombohe ãgua. ¹² Ëgüe ehi ava viroyasar mbohe oyeupe mboravíqui apo ambuae viroyasar moviracua tupri catu ãgua. ¹³ Opacatu yaico tupri rane itera oyese Jesús rese yeroyasa pipe iyavei yaicua tuprira Tūpa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico. ¹⁴ Evocoiyase ndahe iri chira chihivahe tēi nungar ova-ova tēi vahe yaico inungar-ra que īvitu yande reraso vahe oyeupi. Ndayayembopa uca iri chira ava co coti tēi oporombohe vahe upe, que yande rerova pota vahe upe mbahe tēi pipe. ¹⁵ Yande rumo evocoiyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rerecuar secoi. ¹⁶ Esepia, ahe yande mboya tupri oyese,

yande moenda tupri avei yande rereco, ñgue ehi ahe yande mboyemboya oyese ñepei vahe nungar. Ñepei-peí yaporavíqui tuprise, ahese opacatu yayeroya catu itera, yayemovíracua catu aveira yande yeaisusa pipe.

Cristo yande recocuer mbopiasu

¹⁷ Che aipo ahe Túpa rer pipe pëu che pe cuaisa pipe: peico iri eme ava Túpa cuaparéhi nungar. Ahe yuvirecoi vahe ité opíhañemoñeta raisa pipe, ¹⁸ ndoicatui mbahe renducua tupri água iyavei ndovírecoi tecovesa Túpa suindar oyese yuvireco. Esepiá, ndoicuai Túpa ñehe opíhañemoñetaéhisa pipe yuvireco. ¹⁹ Ndoyuvinochi iri mbahe tēi apo água iyavei oyemondo ité mbahe tēi pipe. Ndosiñiyei eté opacatu güemimbotarai apo água yuvireco. ²⁰ Pe rumo ndapeyembohei eté evocoí nungar mbahe rese Cristo rese peicose, ²¹ supi eté pesenduse porombohesa supi tupri vahe Jesucristo resendar iyavei peyembohese secocuer rese. ²² Ahe yande mbohe yande recocuerai yipíndar vahe reya água. Esepiá, ahe naporai vahe yande mbopa tēi yande pihañemoñeta rai apo água. ²³ Pesecuñaro catu pe yapisacasa. ²⁴ Peicoño ité avei pe recocuer piasu pipe. Sese niha Túpa yande apo yande reco ívi tupri água yande reco maranehi vaherá supi tupri vahe pipe, inungar ahe.

²⁵ Sese ndaperemira iri chira, iya rumo peñehé ñepei-peí mbahe supi tupri vahe rese peyeupe. Esepiá niha, yande opacatu ñepei ava rete resendar nungar yaico.

²⁶ Peyemboangaipai rene peñemoirose, iyavei ndiyai peñemoiro ari momba peico. ²⁷ Peipota ucai rene Caruguar upe peyeupe mbahe apo água.

²⁸ Acoi imonda rai vahe, timonda iri eme; toporavíquiño ava iparaísu vahe pítiví água.

²⁹ Ndapeñehé rai chira, iyacatu rumo peñehé tuprira ñehesa aviye vahe pipe ambuae pe ñehe rendusar mongueréhi catu água yuvireco yande Yar rese. ³⁰ Peyapoi rene mbahe Espíritu Santo mbovíhaéhi água. Ahe niha Túpa ombou yandeu ‘toicua ava co cheundar oipisira ari ipa vahe pipe poropísiosa ñepei reseve vahe yuvireco’ oya.

³¹ Peyepepi co nungar mbahe sui: piha víracuasa, mbahe mboasi píratasa, ñemoirosa, pe râse aisa, opacatu pe ñehe rai, opacatu ambuae mbahe-mbahe tēi sui avei. ³² Iya rumo peico tupri ambuae upe pe yeaisusa pipe. Peñeroño itera peyeupe yepi inungar Túpa iñero Guahir Cristo rese pëu.

5

Mara ehira ava Túpa rahir yuvireco

¹ Pe niha Túpa rahir sembiaisu peico. Sese peyemongueréhi catu secocuer moña água. ² Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovéhepri Túpa uve. Ahe aviye ité inungar mbahe siacua vahe chupe.

³ Pe niha Túpa upendar ité peico. Sese ndapeyemboaguasai chietera iyavei ndapeicoí chira ambuae mbahe naporai vahe pipe, que yemombotasa opacatu mbahe rese. ⁴ Ndapeñehé rai chira que poromochisa rese, que ñgue ehi tēi vahe rese, anise que co coti-coti tēi vahe rese. Esepiá, evocoí nungar ndahei mbahe aviye vahe. “Aviye ndeu” peye catuñora rumo Túpa upe peico. ⁵ Peicua niha acoi oyemboaguasa vahe, oyapo

vahe mbahe naporai vahe, que yemombotasa (esepia, ahe inungar mbahe rahanga mboeteisa), evoco nungar ndoyuvirecoi chira Tūpa povrīve iyavei Tahir Cristo povrīve. ⁶ Ndapeyembopa ucai chira evoco nungar ñehesa tecocuer ēgüe ehi tēi vahe upe. Esepio, evoco nungar mbahe apo pipe sui ou Tūpa ñemoirosa ava seroyasarēhi upe. ⁷ Sese ndapeyemboyai chira evoco nungar ava rese.

⁸ Peicua niha yipindar peico pítmimbisa nungar mbahe-mbahe tēi pipe. Cûritei rumo peico tesapesa nungar pipe yande Yar rese. Sese peico tupriño ité Tūpa suindar poroesapesa pipe. ⁹ Esepio, poroesapesa pipe yande recose, yayapo opacatu mbahe tupri ava upe yande reco ïvi tuprisave, mbahe supi tupri vahe pipe. ¹⁰ Sese peyembohe catu mbahe Tūpa piha rupindar apo áqua rese. ¹¹ Peyepepi ité opacatu pítmimbisa nungar ava rembiapo ai, ēgüe ehi tēi vahe sui. Iya peicua uca voira co nungar mbahe. ¹² Esepio, ahe sembiapo yemochísa ñomipri tēi vireco yuvireco. ¹³ Acoi yamboyecua ucase rumo evoco nungar mbahe tesapesa nungar pipe, ahese oyecua tupri secocuer naporai vahe. ¹⁴ Esepio, co tesapesa omboyecua tupri opacatu mbahe recocuer yandeu. Sese aipo ehi:

“Peyemopoäse pe oque vahe nungar, peyepepi omano vahe nungar pâhu sui.

Ahese niha Cristo pe recocuer resapera” ehi.

¹⁵ Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe. ¹⁶ Peiporu catu ñepei-peí ari yande Yar upe nara pe recoveseve. Esepio, cûritei tecocuer co ïvi pipe mbahe tēi. ¹⁷ Sese peico eme ndoyemboaracuai vahe; iya rumo peyembohe catu yande Yar remimbotar apo áqua. ¹⁸ Ndahei chira caguar tēi peico, evoco mbahe ndoporopoisui mbahe tēi apo uca áqua. Peico catura rumo Espíritu Santo pe mbohesa pipe. ¹⁹ Peñeha catu Salmo pipe, opacatu Tūpa upendar sapucaisa pipe avei peyeupe; pesapucui, pemboetei avei opacatu pe piha pipe yande Yar. ²⁰ “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

Omenda vahe cuitarā mbiguai reseve

²¹ Peyemoyeroya catu ambuae rese Cristo mboeteisa pipe peico.

²² Cuña tomboyeroya omer, inungar yande Yar omboyeroya yuvireco.

²³ Esepio, imer güembireco cuai áqua secoi, ēgüe ehi avei niha Cristo viroyasar cuai áqua oico. Viroyasar Piñerosar avei secoi, inungar güetecuer ité sereco. ²⁴ Evocoiyase inungar seroyasar omboyeroya Cristo yuvireco, cuña avei niha ēgüe ehira opacatu omer mboyeroya yuvireco.

²⁵ Iyavei cuimbahe osaisura güembireco, inungar Cristo osaisu opacatu viroyasar, omundo güecocuer chupe nara. ²⁶ Ēgüe ehi yande recocuer moatiro yande angaipa sui i pipe Tūpa Ñehengagüer reroyasave. ²⁷ Iyavei oyeupe yande rerecora yande reco catuprisa pipe iyavei yande reco quihaëhisa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe. ²⁸ Ēgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae. ²⁹ Supi eté, ndipoi eté que ava ndosaisu vahe güetecuer. Ahe rumo ocaruño ité oyemoviracua áqua, oñearo tupri avei. Ēgüe ehi avei Cristo opacatu viroyasar upe. ³⁰ Esepio, chupendar ité

yaico setecuer nungar. ³¹ “Sese ava oseyara vu, osi güembireco rese güeco âgua; ñuvirío yuvirecoira ñepei ava nungar.” ³² Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa. ³³ Ëgüe ehi eté ñepei-peí pesaisu pe rembireco pe yeaisu nungar. Iyavei cuña tomboetei tupri omer yuvireco.

6

¹ Chihivahe, pemboyeroya pe yesupa, pe si avei yande Yar raisu pipe. Esepia, ahe niha pe cuaita. ² Co porocuaita yipindar omombehu vahe porovasasa pisi âgua imboaviyesa pipe aipo ehi: “Pemboeteira pe ru, pe si avei. ³ Ëgüe peyese, pe rorivetera iyavei pe reco pâhumbucu catura co ivi pipe” ehi.

⁴ Iyavei pe iyesupa, pemoñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe sâisusa pipe.

⁵ Pe avei no mbiguai, pemboyeroya catura pe rerecuar co ivi pipe imboeteisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vaherâ viña. ⁶⁻⁷ Peporaviqui tupri catu chupe nara, ndahei chira rumo pe repiaseño imboviha âgua têi; peporaviquira rumo pe querêhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri âgua. ⁸ Esepia, peicua Tûpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

⁹ Iyavei pe serecuar, peico tupri aveira pe rembiguai upe pe recoasiêhisa pipe. Peicua niha pe opacatu Tûpa pe rerecuar ivave chini vahe povrîve peicose. Ahe niha ndayande raisu yoaviratii yande rereco.

Ava Cristo rese yuvirecoi vahe yoepisa resendar

¹⁰ Sese peyemoviracua catu yande Yar rese, ipirataso rese avei.

¹¹ Peñearo tupri catu Tûpa píratasa pipe pe yemoviracua âgua Caruguar pe mbopa têiêhi âgua. ¹² Esepia, yande ndahei ava ité amotarêhisave yayepihamoviracua. Yande rumo yayepihamoviracua espíritu naporai vahe ndoyecuai vahe upe iyavei co ivi pipendar Caruguar ipirata vahe pítumimbisa pendar reroyaêhi âgua. ¹³ Sese peipisi catu opacatu mbahe Tûpa ombou vahe pêu pe yoepi âgua. Evocoiyase yepo oime têira mbahe têi pêu viña, peyemoviracuaño itera rumo chupe.

¹⁴ Ëgüe peye aveira peyemoviracua catu ñehesa supi tupri vahe pipe. Iyavei peyoepira pe reco ivi tuprisa pipe. ¹⁵ Peyemoingatu voi Tûpa Ñehengagüer ñeroisa resendar mombehu âgua yepi. ¹⁶ Iyavei pereco catu Tûpa rese pe yeroyasa peyese. Ahe inungar sundao yoepisa. Ipipe peyoepira caruguar uhu tata resendar nungar pe âtoisa sui.

¹⁷ Poropisirosa inungar sundao ãca ndiru, ipipe tapeyoepi; peiporu avei Tûpa Ñehengagüer, ahe niha inungar quise pucu Espíritu vireco vahe. ¹⁸ Peyeroqui catu Espíritu píratasa pipe ari yacatu rupi Tûpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tûpa reroyasar rese yepi. ¹⁹ Peyeroqui avei che rese. Evocoiyase Tûpa tombou che ñehe âgua cheu che siquiyehisa pipe ñehesa ñepisirosa icuapi ramo vahe cua uca âgua ava eta upe. ²⁰ Tûpa niha che cuai co ñehesa mombehu âgua. Ichui têi cûritei soquendapri aico. Peyeroqui catu che rese che siquiyehisa pipe co ñehesa mombehu âgua.

Ñehesa ipa vahe

²¹ Yande rívrí Tíquico, yande rembiaisu, che pítiyiisar omboaviye vahe ocuaita yande Yar upe mboravíquisa rese, ahe omombehura opacatu che recocuer, mbahe che rembiapo avei pěu. ²² Sese amondo eipeve pěu ore recocuer mombehu água ‘ipípe toyemongueréhi catu yuvireco’ viya.

²³ Yande Ru Túpa iyavei yande Yar Jesucristo tomondo opacatu viroyasar upe teco catupri água, iporoaisu água, oyese yeroya água avei. ²⁴ Túpa tosovasa opacatu yande Yar Jesucristo raisupar saísusa ñepei reseve vahe pipe. Aipo rupive.

PABLO REMBICUACHIA FILIPO PNDAR UPE FILIPENSES

Pablo mahenduhasa Jesús reroyasar Filipo pendar upe

¹ Che, Pablo, iyavei Timoteo oroico Jesucristo rembiguai. Aicuachía co che ñehe pēu, pe Tūpa upendar Jesucristo rese peico vahe tecua Filipo ve, Jesús reroyasar rārosar uve, seroyasar rese ihañeco vahe upe avei.
² Yande Ru Tūpa, yande Yar Jesucristo tape rovasa pe reco tupri água.

Pablo yeruresa Jesús reroyasar rese

³ Pe rese che mahenduhasa pipe, “Aviye ndeu” ahe Tūpa upe yepi.
⁴ Iyavei che ayerurese, ari rupi ayeroqui opacatu pe rese Tūpa upe che viharetesa pipe yepi. ⁵ Esepia, oyoya yañepitivii Jesucristo resendar ñehesa icatupri vahe rese, acoi pe seroya ramo suive. ⁶ Che aicua co Tūpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevise yande Yar Jesucristo.

⁷ Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tūpa porovasasa yepe co che roquendasave aí, anise que co coti rupi aico mborerecuar rovai co ñehesa písirrosa resendar repi água iyavei amboyecua vaherā ahe ñehesa supi tupri vahe yuvireco chupe. ⁸ Tūpa oicua ité che opoaisu etepri opacatu. Esepia, Jesucristo niha pe raisu uca cheu. ⁹ Che aporandu vite Tūpa upe che yeruresa pipe: “Toicua tupri oaracuasa pipe oyeaisu catu-catu iri água yuvireco” ahe pēu. ¹⁰ Ipípe sui peicuara mbahe aviye catu vahe poravo água yepi; ñgue peye aveira pe recocuer moatiro água peico. Evocoiyase ndipoi chira angaipa pe rese acoi Jesucristo ouse curi.
¹¹ Perekora pe recocuer aviye vahe ité Jesucristo ombou vahe pēu Tūpa mboetei água.

Cristo Pablo recovesa ité secoi

¹² Che rivreta, aipota peicuara co mbahe tēi co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco. ¹³ Evocoiyase opacatu mborerecuar guasu poravíquisa pendar iyavei opacatu ambuae ava oicuapa che roquendasave Jesucristo rupi che guata sui tēi yuvireco. ¹⁴ Iyavei setá etepri yande rivri che repiase soquendapri che recose yuvireco, oyemongueréhi catu Tūpa Ñehengagüer mombehu água osiquiyeéhisa pipe. Yande Yar rese evocoiyase oyeroyá catu yuvireco.

¹⁵ Supi eté oime ava oñeho angahu tēi vahe Jesucristo rese che reroírosa pipe tēi. Oime rumo amove ava oñeho tupri Jesucristo rese opihañemoñeta tuprisa pipe. ¹⁶ Evocoí ava oñeho tupri oporoaisusa pipe, ahe oicua cohabe che roquendasave yuvireco, “Co ñehesa Tūpa ñehe písirrosa resendar, ahe supi eté vahe, ndahei temira tēi” ahese. ¹⁷ Evocoí ambuae ava Cristo rese oñeho angahu tēi vahe oyeupe nara tēi oipota mbahe. Ahe che reco momara pota catu co che roquendasave che rēi viteseve.
¹⁸ Mara etemo che areco aipo mbahe-mbahe tēi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mbovíha.

Che mboviha catu aveira.¹⁹ Esepi, che aicua co opacatu mbahe-mbahe tēi sui añepisirora pe yeruresa pipe iyavei che pītīviira Jesucristo Espíritu.²⁰ Che aipota ité, asāro avei opacatu che recocuer sui che chīehi ãgua añahe vaherā opacatu che siquiyehisa pipe. Evocoiyase yepe amanora, anise aicovera, tomboetei catu ava Cristo che recocuer repiase yuvireco.²¹ Esepi, Cristo che recovesa ité secoi; amanose rumo, aviyeño itera cheu.²² Aicove vitese co ivi pipe, aicatura aporaviqui tupri yande Yar recocuer rese. Evocoiyase ndaicuai uma revo aviyyera cheu.²³ Ndaicatui co ñuvirío che pihañemoñetasa rereco: amove amano pota che so ãgua ivave Cristo piri. Ahe aviye catura cheu viña.²⁴ Pēu nara rumo aviye catu aicove vitese co ivi pipe.²⁵ Sese che aicua aicove vité vaherā pe pītivii vité ãgua, pe guata tupri vité catu ãgua iyavei pe viharete catu ãgua pe Jesús reroyasa pipe.²⁶ Evocoiyase che rereco vitera peye pe piri. Ahese pe viharetesa pipe, “Imboeteipri Jesucristo tasecoi” aipo peyera che repiase.

²⁷ Co catu toyoya tupri pe recocuer co ñehesa aviye vahe Jesucristo resendar rese. Evocoiyase asose pe repia, anise amombrí aicose pe sui, asendu pota pe resendar ñehesa aviye vahe, pe yemoviracusa resendar, pe pihañemoñetasa yoyasa resendar iyavei pe poraviqui píratasa resendar pe poreroyasave co ñehesa poropísirosa resendar rese.²⁸ Iyavei ndapeyembosiquiei chira pe amotaréhimbar sui. Evocoiyase ahe oicuara yuvireco chupe ité Tūpa omondora imocañi ãgua; pe rumo Tūpa pe písirora curi.²⁹ Supi eté ndahei Jesucristo recocuer reroya ãgua güeraño Tūpa oipota pēu, sese pe yemombaraisu ãgua avei oipota.³⁰ Esepi, pe, che avei oyoya tupri yaporaviqui pírata yande amotaréhimbar pähuve yaico. Iyavei acoi pesepia yipindar che aporaviqui pírata che amotaréhimbar pähuve vichico, iyavei cûritei peyandu mara ahe aporaviqui pírata vité ipähuve yuvireco.

2

Cristo yemominisa, seco ivatesa resendar avei

¹ Iyavei Cristo pe mongueréhi, pe mboviha oporoaisusa pipe oico, Espíritu avei secoi pe rese. Peyeaisu tupri iyavei pe yeaisusa pipe peñepitivii.² Sese che mboviha catu peye: perecora pihañemoñetasa ñepei reseve, oyoya guasu avei peyeaisura, oyoya aveira pe pihañemoñetasa, ñepei reseve mbahe pe remimbotar rese avei.³ Ndapeyapoi chira mbahe peyeupe güeraño tēi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae aviye catu perecora peyesui.⁴ Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri ãgua.

⁵ Inungar Cristo pihañemoñeta, ëgue peye tupri aveira.
⁶ Yepe ahe Tūpa recocuer vireco, “Taseya eme Tūpa recocuer areco vahe ivive che so ãgua” ndehi.

⁷ Opa ité rumo oseya, oyemboava inungar mbiguai tēi ou.

⁸ Ëgue ehi oyemomini.

Vu porocuaita reroyasa pipe ou iyavei omano poromochisa pipe curusu rese.

⁹ Sese Tūpa omboivate catu, omondo avei sererguā ivate catu vahe opacatu ambuae rer sui.

- ¹⁰ Evocoiyase ahe terer ivate catu vahe renduse ‘toñenopiha opacatu iva pendar, ivi pipendar, opacatu omano vahecuer avei yuvireco’ oya.
¹¹ Ichui toicua opacatu, “Jesucristo ité yande Yar” tehi yande Ru Tūpa mboetei água yuvireco.

Jesús reroysar tesapesa nungar yuvirecoi co ivi pipe

¹² Evocoiyase che rembiaisu, yepe che amombrí aico pe sui viña, iya rumo pe che reroya vite ité peye inungar aicose pe pāhuve cuese. Che aipota peicora písirosa pipeño ité Tūpa mboeteisave ichui pe siquyesa pipe. ¹³ Esepio, Tūpa ombou pe querēhisa semimbotar apo água. Güemimbotar rupi avei ombou píratasa imboaviye água pēu.

¹⁴ Peyapo opacatu mbahe pe ñehe-ñehe tēiēhisa pipe, pe yepoepi-epiēhisa pipe avei. ¹⁵ Sese tipo eme mbahe pe rembiaví que pe reco raisa pe rese. Evocoiyase peicora Tūpa rahir ndayangaipai vahe ava mbahe-mbahe tēi oyapo vahe pāhuve. Ahe ipāhuve pe recocuer osesapera, inungar tataendi osesape pítumimbisave. ¹⁶ Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepio, pe rese che poraviquisa ñgue ndehi tēi vaherā. ¹⁷⁻¹⁸ Jesucristo recocuer rese pe yeroyasa, ahe inungar mbahe seropovēhepri Tūpa upe. Aviyeteramo ichui tēi che yucara yuvireco. Ahe omboaviye tupri itera pe porerecosa Tūpa upe. Yepe che yucara yuvireco viña, che rumo ayemboviñañora opacatu pe rese. Pe avei, peviñañora che rese.

Pablo oicuachía Timoteo, Epafroditó recocuer resendar

¹⁹ Che ayeroya yande Yar Jesús rese amondo pihaivi vaherā Timoteo pe repia. Ahe omboyevise ñehesa pe recocuer resendar, ahese che aviharetera. ²⁰ Iyavei ndipoi eté ambuae ava Timoteo nungar che pihañemoñetasa rupi tupri imahenduha vahe pe rese pe reco tupri água. ²¹ Esepio, opacatu oseca güemimbotar tēi apo água, ndosecai eté Jesucristo remimbotar yuvireco. ²² Pe niha peicua Timoteo reco tuprisa opacatu upe. Iyavei che pítivii Tūpa Ñehengagüer mombehu água, inungar chihivahe oipítivii oyesupa, ñgue ehi che pítivii oico. ²³ Sese che aipota imondo água pe repia acoi aicuase mara ehira che rereco yuvireco. ²⁴ Che rumo ayeroya yande Yar rese aso pihaivi vaherā che teieté pe repia.

²⁵ Iyavei revo aviye catu co yande rivri Epafroditó amboyevira pe piri ahe pembou vahe che pítivii água mbahe cheu ipane vahe rese. Ahe che ndugüer oporaviqui pírata vahe Tūpa upe. ²⁶ Esepio, ahe pe repia pota ité opacatu. Iyavei ahe ehiñ oico pēu peicuase imbaheasi. ²⁷ Supi eté imbaheasi oico, seni eté omano viña. Ipare rumo Tūpa oiparaísueroco, ndahei ahe güeraño oipítivii, che avei che paraísueroco co viharēhisa yeapi-apiñoñehi água cheu. ²⁸ Sese che amondo pota poyava ité pe piri sese pe yemboviha iri água, che mboviha iri água avei. ²⁹ Peipisi tupri pēu iyepotase pe viharetesa pipe. Esepio, ahe yande rivri yande Yar rese secoi vahe ité. Pesaisu itera evocoí nungar ava yepi. ³⁰ Yande Yar rese oporaviquise che piri seni omano. Ahe niha oyemondo ité mbahe-mbahe tēi porara água che pítivii pipe. Esepio, pe ité ndapeicatui che pítivii peye.

¹ Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri águia pēu. Iyavei aviyé catu ité pēu nara. ² Peñearo acoi ava cave nungar tēi sui, oyapo vahe mbahe tēi iyavei güetecuer omomara tēi vahe. ³ Yande rumo imbocircuncidapri nungar supi eté vahe Tūpa mboyeroyasar yaico. Esepia, yayerure Espíritu pipe Tūpa upe; yayemboviha avei Jesucristo reroyasar yande recosa rese. Ndahei yande retecuer rese tēi yayeroya, ⁴ yepe che supi eté ayeroya catura ambuae ava sui evocoí nungar mbahe rese viña. ⁵ Esepia, che imbocircuncidapri aico ocho arí pipe che hare, israelita, Benjamín suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoiyase ayembohe tuprī fariseo aracuasa judío porocuaita resendar rese vichico. ⁶ Ipipe sui tēi eté aseca-seca catu ayapo vaherā mbahe opacatu ava Jesucristo reroyasar upe vichico. Co porocuaita reroyasa rese rumo ndipoi eté ava “mara” ehi vahe yuvireco cheu. ⁷ Opacatu co mbahe aviyé ité cheu aracaco viña. Cūritei rumo Jesucristo rese aicose, ñgue ehi tēi vahe nungar areco. ⁸ Iyavei opacatu que ambuae mbahe aviyera cheu viña, areco rumo inungar ití che Yar Jesucristo recocuer cuasa pipe. Opacatu ahe mbahe aseyá Cristo rese che reco água. Supi eté Cristo rereco água areco opacatu ambuae mbahe ití nungar tēi ⁹ ‘taico sese’ che yapave. Ndahei porocuaita mboaviyesa rese tēi aseca che reco catuprī água, che rumo aseca Jesucristo rese che yeroyasa pipe sui ñgue ahe vaherā. Ñgue ehi eté Tūpa che pisi seco catuprī vahe nungar Cristo rese che yeroyasa pipe. ¹⁰ Che aipota ité Cristo cua tuprī catu água. Iyavei areco pota píratasa icuerayeví agüer resendar cheyese. Iyavei aipisi pota iparaísu agüer. Iyavei inungar ahe omano, ñgue ahe pota avei. ¹¹ Ñgue tahe avei che cuerayeví água omano vahe pāhu sui, ahe co che asāro vichico.

Pablo osupití pota ité güeco maranehí água

¹² “Asupití ité opacatu co mbahe” ndahei eté. Iyavei, “Ndaseco marai vahe ité aico” ndahe vitéi chietera. Che rumo aseca vité ahe tecocuer che recorā. Esepia, Jesucristo che pisi ité oyeupe nara. ¹³ Che rivireta, “Che ae tēi co tecocuer ihívi vahe opa ité ayapo vichico” ndahei chira pēu. Co rumo mbahe che ayapo, ayemboesarai opacatu che reco agüer sui. Iyavei opacatu che recovesa rese aguata tenondeño ité. ¹⁴ Esepia, Tūpa che renoi ivave che so água aipisi vaherā iporerecosa iva pendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande pihañemoñetara opacatu yande yaracua tuprī vahe. Que revo yande pihañemoñetase que ambuae mbahe rese tēi, ahe Tūpa oicua ucara yandeu. ¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rivireta, peico che nungar iyavei pemahecua tuprī ava ore recocuer moñasar rese. ¹⁸ Iyavei amombehu setá yupagüer pēu, cūritei amboyeví iri che yasehosa pipe imombehu pēu. Setá ité oime ava co ñehesa Cristo mano agüer curusu resendar amotaréhíbar. ¹⁹ Ahe rumo imocañípirá yuvirecoira curi. Oyemongueréhí opacatu mbahe tēi apo água rese yuvireco yepi. Ahe niha otúpa nungar ité vireco. Iyavei güeco ivate aisa pipe oyapo mbahe tēi yande mochi ai vahe yuvireco. Co ivi pipendar mbahe-mbahe tēi reseño ité ipihañemoñeta yuvireco. ²⁰ Yande rumo ivave nara ité yaico. Iyavei yasāro ité yaico iva sui ou vaherā yande

Písiosar, ahe yande Yar Jesucristo. ²¹ Ahe opíratasa pipe virecora opacatu mbahe oopovrve. Ahe opíratasa pipe avei osecuñiaropara yande retecuer égue ehi tēi vahe, ahese inungar ahe setecuer sendi yai, nimarai vahe, égue yahe aveira yande yaico.

4

Yayemboviha yande Yar rese yepi

¹ Sese che rívireta, che rembiaisu, peyemovíracuara yande Yar rese yepi. Che niha opoepia pota ité. Pe inungar porerecosa imbouprí peico cheu. Esepia, che vihasa ité peico.

² Ambuae mbahe, Evodia iyavei Síntique toyuvírecoi oyecupihir nungar ité yande Yar reroyasa pipe yuvíreco. ³ Nde niha che pítivii tuprí vahecuer che poravíquisa rese eve. Eipítivii evoco cuña. Esepia, ahe niha oyembopihavíracua ité che pítiviise Túpa Ñehengagüer písiosra resendar mombehu água yuvíreco cuese. Oyoya Clemente rese iyavei ambuae oporavíqui vahe rese che rupi yuvíreco. Ahe serer opa icuachiapri yuvíreco Túpa cuachiar tecovesa apírehí vahe resendar pipe.

⁴ Peyemboviharete ari yacatu rupi yande Yar rese yepi, “¡Peyembovihaño ité!” ahe aipo pēu. ⁵ Pemboyecua catu opacatu ava upe pe reco mbegüesa. Esepia, cōimi yande Yar yevi iri água yandeu.

⁶ “¿Mara ahera píha vichico?” ndapeyei chira que mbahe rese. Iyacatu rumo peyerurera opacatu evoco nungar mbahe rese Túpa uve, peporandura evoco mbahe rese iyavei, “Aviye ndeu” peyera chupe. ⁷ Evocoiyase Túpa omondora güeco tuprisa pēu, pe Jesucristo rese peico vahe. Co teco tuprisa niha aviye catu ité opacatu ava pihañemoñetasa sui. Ipípe sui Túpa osârora pe piha, pe pihañemoñetasa avei pēu.

Yandepihañemoñetara opacatu mbahe aviye vahe rese

⁸ Co ipa, che rívireta: yande pihañemoñetara opacatu mbahe supi tuprí vahe rese, poromboetei água rese, mbahe ihívi vahe rese, mbahe maranehi rese, mbahe yande mbovíha vahe rese, opacatu mbahe aviye vahe icuapri vahe rese. Iyavei yande pihañemoñetara que ambuae mbahe aviye vahe rese, imboeteiprí vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoiyase Túpa güeco tuprisa rese secoira pe rese.

Filipo pendar porerecosa Pablo upe

¹⁰ Aviharete yande Yar rese. Esepia, pemahenduha irimi che rese pe porerecosa mbou água cheu. “Sesarai yuvíreco che sui” ndahei chira pēu. Pe rumo yipindar ndapeicatui eté che pítivii água peye. ¹¹ “Ipáne mbahe cheu” ndahei chira pēu. Esepia, ayembohe che viharete água mbahe che rembiereco rese. ¹² Aicua mara yahe yande paraíusa pipe yaico, aicua avei mara yahe mbahe rereco ati água. Ayembohe avei che viha água opacatu mbahe oimese cheu, que chehítarose, ndache riepoise, que oimese sumbire vahe mbahe cheu, que mbahe ipanese cheu. ¹³ Aicatu opacatu mbahe uve che yemovíracua água. Esepia, Cristo ombou che pírata água. ¹⁴ Pe rumo peyapo mbahe aviye vahe cheu che pítivii eteprisave peye mbahe-mbahe tēi oimese cheu.

¹⁵ Iyavei pe Filipo pendar peicua avei acoi yipindar peipisise p̄isirosa resendar Tūpa Ñehengagüer acoi che sose Macedonia sui, ndipoi eté Jesús reroyasar ambuae tecua pendar iporereco vahe yuvireco che rese. Pe güeraño pembou pe porerecosa, “Aviye” pe hesa pipe che p̄itivii água. ¹⁶ Iyavei aicose Tesalónica ve, pembou pe porerecosa cheu ñuvirío yupagüer che p̄itivii água. ¹⁷ Ndacheipihañemoñetai mbahe arocuaño tēi vaherā pe sui. Che rumo aipota Tūpa omboyevirá pēu co pe porerecosa pembou vahe cheu. ¹⁸ Che opa aipisi pe porerecosa Epaafroditu upe pembou vahe. Evocoiyase oimeño ité iyavei sumbire vite cheu. Ahe pembou vahe cheu aviye ité, inungar itaisi s̄acua vahe, iyavei inungar mbahe seropovēhepri aviye vahe Tūpa upe. ¹⁹ Evocoiyase yande Ru Tūpa, ombahe eta porañete vahe sui omondora opacatu mbahe ipane vahe pēu Jesucristo rese oime vahe. ²⁰ ¡Egüe tehi timboeteisa yande Ru Tūpa! ¡Ahe apirēhi vahe secoi yepi!

Ñehesa ipa vahe

²¹ Aviye, pemombehu che mahenduhasa opacatu Tūpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pēu. ²² Iyavei opacatu ambuae yuvirecoi vahe cohaye Jesús reroyasar iyavei acoi mbororecuar guasu r̄etave yuvirecoi vahe, ahe ité avei omondo omahenduhasa yuvireco pēu.

²³ Yande Yar Jesucristo tape rovasa opacatu. Aipo rupive.

PABLO REMBICUACHIA COLOSA PENDAR UPE COLOSENSES

Pablo mahenduhasa Jesús reroyasar Colosa pendar upe

¹ Che, Pablo, Jesucristo apóstol aico Tūpa remimbotar rupi yande rivri Timoteo reseve. ² Co aicuachía pēu, pe Cristo rese peico tupri vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tupri água pēu.

Pablo yeruresa Jesús reroyasar rese

³ Ari yacatu ore yeroqui pipe, "Aviye ndeu" orohe yande Yar Jesucristo Ru Tūpa upe pe rese. ⁴⁻⁵ Esepio, oroyandu acoi oyepota ramose Tūpa ñehe supi eté vahe, aviyen vahe písirosa resendar pēu, peyapisaca tupri sese. Ipipe sui peyeroya ivave pe reique água Tūpa porerecosa pisi água. Ahe ichui peyeroya tupri Jesucristo rese iyavei pesaisu opacatu ambuae Tūpa rembiporavo yepi. ⁶ Co ñehesa imombehusa avei opacatu ivi rupi, setá ava oipisi tupri avei yuvireco. Inungar acoi pesenduse yipindar Tūpa porovasasa resendar ñehesa, ipipe sui peicua tupri catu ahe porovasasa supi eté vahe. ⁷ Co ñehesa yande rembiaisu yande mboetasa Epafras pe mbohe. Ahe mbia yande Yar Jesucristo rese oporavíqui vahe ore rupi, ocuaita viroya tupri vahe pe pāhuve. ⁸ Ahe omombehu oreu Espíritu pipe pe ore raisusa resendar.

⁹ Sese avei ore aipo nungar rendu ramoseve ndoroyeriquipai pe rese. Oroyeroqui, oroporandu pe rese 'toicua tupri opacatu Tūpa remimbotar ombahecuasa Espíritu suindar pipe, senducua tuprisa pipe avei yuvireco' ore yapave pēu. ¹⁰ Ipipe sui tapeguata tupri yande Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipipe sui avei tapeicua tupri catu Tūpa recocuer peico. ¹¹ Iyavei tombou catu pe momirata água güecocuer píratasa pipe sui. Evocoiyase oimese que mbahe tēi pēu, peñemosafloa pe reco mbegüesa pipe. ¹² "Aviye ndeu" peyera pe viharetesa pipe yande Ru Tūpa uve. Esepio, ahe omoingatu pe recocuer peipisi água iporerecosa oime vaherā opacatu sembiporavo upe acoi yuvirecoi vahe Tūpa poroesapesa pipe. ¹³ Ahe niha yande písir Caruguar povri sui. Ëgüe ehi yande reraso Guahir güembaisu povriva. ¹⁴ Ahe Tahir yande písirio iyavei yande angaipa rese iñero yandeu.

Jesús omano curusu rese Tūpa upe opacatu mbahe moingatu água

¹⁵ Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yipisuive ivate catu vahe opacatu mbahe yapopri sui. ¹⁶ Esepio, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ëgüe ehi ipipe sui opacatu mbahe yapopri, chupe nara avei. ¹⁷ Ahe oicove yipisuive aracahe opacatu mbahe reimeëhi viteseve. Ahe avei omoime vite opacatu mbahe yandeu. ¹⁸ Iyavei ahe niha yande rerecuar tenonde secoi yandeu opacatu seroyasar yaico vahe. Esepio, ahe rane yipindar vahe iyavei ahe rane avei ocuerayevi. Evocoiyase ahe ivate catu vahe opacatu sui. ¹⁹ Esepio, Tu

oipota opacatu güecocuer reseve secoi äqua sese yepi.²⁰ Iyavei ‘che Rahir recocuer pipe sui taroyevi iri opacatu mbahe cheyeupe ivi pipendar, iwa pendar avei’ oya. Ëgüe ehi Jesús oipiyyere vuví curusu rese Tüpa upe opacatu mbahe moingatu äqua.

²¹ Yipindar pe pihañemoñeta raiosa pipe sui tēi amombrí Tüpa sui peico yamotaréhisa pipe mbahe pe rembiapo ai rese. ²² Cûrитеi rumo Tüpa iñero pëu pe reroyevi oyeupe Cristo mano pipe. Ahe niha ëgüe ehi Vu rovai ipehapri pe rereco oyeupe nara, pe reco maranehi äqua mbahe aviñhisa pipe ava rovaque. ²³ Ëgüe peye äqua rumo peyemoviracuaño itera Cristo rese pe yeroyasa pipe yepi. Ndapeyepepii chiaveira mbahe oime vaherä rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuapri, aico co ñehesa mombehu äqua.

Pablo icuaita Jesús reroyasar rese hañeco äqua

²⁴ Cûrитеi aviha pe rese che yemomborarasa pipe. Ëgüe ahe iporara che rete rese cohabe vichico. Ëgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico. ²⁵ Jesús reroyasar pítivii äqua niha Tüpa che cuai. Sese amombehu opacatu iñehengagüer pëu pe reco tupri äqua rese. ²⁶ Ahe ñehesa aracahe suive ndicuasai vahe ité. Cûrитеi rumo Tüpa omboynecua viroyasar upe. ²⁷ Chupe ité omboynecua pota co ñehesa porañete vahe omboynecua ramo vahe ava ndahei vahe judío upe. Co ndicuasai vahe, ahe Cristo pe rese secoi vahe. Co yande remiaro yareco vaherä teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe avei ava yaracua tupri äqua ore aracuasa pipe ‘toyuvirecoi tupri ité Cristo rese Tüpa rovai’ ore hesa pipe. ²⁹ Co rese niha che aporaviqui etepri opacatu Cristo píratasa pipe.

2

¹ Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparéhi recocuer rese avei ² ‘toyemongueréhi catu, toyemboyoya guasu oyeaisusa pipe yuvireco’ viya. Iyavei ‘senducua tuprisa pipe toyuvirecoi mbahe tupri pipe’ viya opacatu pëu. Esepia, ichui avei peicua tuprira co mbahe imboynecuapi ramo, ahe niha Cristo. ³ Ahe vireco opacatu mbahe yande mboaracua äqua, mbahe renducua tupri äqua avei. ⁴ Aipo mbahe amombehu pëu ava oñeha tupri aisa pipe tēi pe mbopaéhi äqua. ⁵ Iyavei yepe amombrí aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ivisa pipe, ndapeyepepii secoi coti rupi Jesucristo reroyasa sui. Sese che mbovharetéñ ité peye.

Jesús suindar tecocuer piásu

⁶ Evocoiyase inungar acoi peipisi Jesucristo pe Yarã, ëgüe peye aveira peico sese ari yacatu rupi ⁷ pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, “Aviye ndeu” peye itera Tüpa upe ari yacatu yepi.

⁸ Peicua catu, peyembopa ucai rene aracahendar tēi ava aracuasa pipe. Esepia, ahe ëgüe ehi tēi vahe, ava suindar tēi yembohesa, ivi pipendar ava seco ivate catu vahe pihañemoñetasa tēi. Ndahei Cristo suindar porombohesa.

⁹ Esephia, Cristo vireco opacatu Vu Tūpa reco oyese. ¹⁰ Evocoiyase pe pereco Tūpa reco Cristo rese peicose. Ahe opacatu mborerescuar ivi pipendar iyavei iva pendar rerecuar secoi. ¹¹ Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esephia, ahe virocua pe recocuerai pe sui. ¹² Pe āpiramosa pīpe ndoyavii pe recocuerai īnotimbri Cristo reseve. Ēgūe ehi avei ndoyavii pe recocuer ocuerayevi vahe seseve avei, peyeroyase Tūpa pīratasa rese. Ahe niha ombogüerayevi vahe Guahir omano vahe pāhu sui. ¹³ Pe niha acoi cuese omano vahe nungar peico Tūpa upe pe angaipa pīpe, pe ndahei vahe judío peico vahe. Ahe rumo pe recocuer mbogüerayevi Guahir reseve iyavei īñero pe angaipa rese pēu. ¹⁴ Ahe yande cañi rāgüler rumo opa omboepi. Esephia, yande iporocuaita pīpe yaico imboavīye āgua viña, evocoiyase imocañipri tēi yaico ipovrīve viña; ombou rumo Guahir curusu rese yatica āgua yande cañi rāgüler sui yande renose āgua. ¹⁵ Ēgūe ehi ahe omano pīpe curusu rese caruguar, ipovrī pendar mborerescuareta reseve secopi. Ēgūe ehi seco reroyi, inungar vavasa pendar ipisipri serasosa opacatu ava rembiepiave.

Peseca iva pendar mbahe pe recocuer upe nara

¹⁶ Evocoiyase toñehe-ñehe tēi eme que ava pe rembihu rese yuvireco, pe īqua rese avei; anise que ndapemboeteise judío pieta, que arī, yasi osē ramomi vahe, anise que judío arī mbituhusa avei no. ¹⁷ Esephia, opacatu co mbahe, ahe yipindar vahe, “Ēgūe ehira Cristo ou” hesa tēi yandeu. Co rumo Cristo ité cute. ¹⁸ Peyapisacai rene acoi ava “ndapeipissi chira porerecosa iva pendar ndaperoyaise ore ñehe” ehi tēi vahe rese pēu. Acoi ava “Tūpa rembiguai pemboeteira” ehi tēi vahe yuvireco. Ahe avei, “Che seco mbegüe vahe aico” ehi angahu tēi. Iyavei, “Che asepia che quer nungar pīpe iva pendar mbahe” ehi tēi. Esephia, ahe oyemboivate ai oaracua rai tēisa pīpe yuvireco. ¹⁹ Evoco rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoiyase ahe omboyemboya tupri oyese, ñepei vahe nungar vireco oyeupe Vu Tūpa remimbotar rupi.

²⁰ Pe omano vahe nungar peico Cristo rese. Evocoiyase ndahe iri co ivi pipendar pīhañemoñetasavrīve peico. ¿Mahera evocoiyase peroya vite co ivi pipendar porocuaita ēgūe ehi tēi vahe, ²¹ inungar “pepocoí rene co mbahe rese, pehui rene evocoí nungar mbahe” ehi tēi vahe? ²² Opacatu co nungar porocuaita ocañi tēi vaherā. Esephia, ahe ava remimbotar tēi yembohesa, iporocuaita tēi avei. ²³ Co mbahe avīye angahu aracuasa supi eté vahe. Esephia, seroyasar ahe ehiño oyeruresa uve, oyecomomini tēi iyavei omombaraísu güetecuer yuvireco viña. Ahe aracuasa rumo ēgūe ehi tēi vahe. Esephia, ndayande pītīvii eté yande yepepi āgua yande remimbotarai sui.

3

¹ Cūritei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oī güeco mborerescuasa pīpe Vu acato coti. ² Pepihañemoñeta mbahe iva pendar rese, ndahei chira ivi pipendar mbahe rese tēi. ³ Esephia, cūritei omano vahe nungar peico pe recocuerai upe. Iyavei Cristo reseve peico Tūpa

piri, inungar-ra ivave viña. ⁴ Cristo niha yande recovesa ité secoi. Sese ahe oyevi irise curi, ēgüe peye aveira perecora ipiri seco ori porañetesa.

Yande recocuer yipindar iyavei yande recocuer piasu

⁵ Evocoiyase pepoi opacatu co mbahe naporai vahe co iví pipendar tēi pe rese oime vahe sui: ndapeyemboaguasai chira, ndapeyapoi chira mbahe tēi pe recocuer pipe, ndapeipota rai chira pihañemoñeta raisa, ndapeipota rai chiaveira ambuae ava mbahe (esepia, ahe niha oyoya mbahe rahanga tēi mboeteisa rese). ⁶ Acoi oyapo vahe co nungar mbahe, ahe Tūpa ñemoirosa oipisira seroyaëhisa pipe yuvireco. ⁷ Ëgüe peye avei yipindar pe recocuerai pipe peico. ⁸ Cûritei rumo peseya opacatu co mbahe-mbahe tēi: pe ñemoirosa, pe poroyucuai aisa, pe reco raisa, pe ñehe mara-mara tēisa iyavei pe ñehesa ndayamombehui vahe. ⁹ Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui. ¹⁰ Iyavei peipisi tecocuer piasu, aviye vahe. Ipipe peyembohe ari yacatu yande Aposar Tūpa recocuer rese peico, icua tupri catu água. ¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidaprii aico” ehi vahe avei. Iyavei que “ahe ambuae tecua pendar secoi”, “ahe chorí”, “ahe ava rembiguai tēi secoi” ehi vahe. Aníse que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

¹² Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoiyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora. ¹³ Ëgüe peyera peñemosa oyeupe, peñero aveira opacatu oyeupe acoi pe pâhu pendar oñemoirose pēu. Inungar Cristo ñerosa ombou yandeu, pe avei ëgüe peyera ambuae ava upe. ¹⁴ Iyavei peyeaisu catura. Esepia, ahe yande mboyemboa tupri oyese yepi. ¹⁵ Acoi teco tuprisa Cristo ombou vahe pēu, tape mbohe pe pihañemoñeta tupri água. Esepia, co rese Tūpa pe renoi ñepei ava nungar pe reco água. Iyavei, “Aviye ndeu” peyera chupe.

¹⁶ Topita tupri Cristo ñehengaguer pe piha pipe. Pe aracuasa tuprisave peyembohe tupri, peyemonguerëhi catu sapucaisa Tūpa resendar rese. Pesapucaí opacatu sapucaisa Tūpa upendar pe piha pipe, “Aviye ndeu” pe hesave yepi. ¹⁷ Iyavei opacatu que mbahe peyapo vahe, que peñehe vahe avei peyapo yande Yar Jesúz rer pipe. Jesúz rer pipe avei, “Aviye ndeu” peyera Tūpa upe yepi.

Jesús reroyasar cuaita resendar

¹⁸ Iyavei pe no cuña omenda vahe: pembooyeroyara pe mer. Ahe niha pe cuaita pe yande Yar rese peico vahe. ¹⁹ Pe avei no imer: pesaisu pe rembireco. Perecoi rene pihavíracuasa pipe.

²⁰ Pe avei no chihivahé: peroya aveira pe yesupa. Esepia, ahe yande Yar oipota. ²¹ Pe avei no tu: pemoñemoiro ucai rene pe rahir peyeupe. Esepia, aviyeteramo niquerëhi iri chira ocuaise pēu.

²² Pe avei no mbiguai: peroya tupri avei pe rerecuar co iví pipe yepi. Aní chira ahe pe repiaseño pemboviñara. Iyacatu rumo pembooyeroyara pe pihañemoñeta tuprisa pipe, Tūpa sui pe siquiesa pipe avei. ²³ Opacatu mbahe peyapo vahe, peyapo pe querëhisave yande Yar mboviña água. Ndahei chira ava mboviña água tēi. ²⁴ Esepia, peicua tupri co: yande Yar omboura oporerecosa yandeundar. Esepia niha, Cristo upe nara

íté mbahe peyapo. Ahe niha pe Yar supi tupri vahe. ²⁵ Acoi ava oyapo vahe mbahe naporai vahe, oipisi aveira güembia po ai repri. Tūpa niha nomboyoaviratii yande raisu.

4

¹ Pe avei serecuar: peyapo mbahe ihīvi vahe pe pihañemoñeta tuprisa pipe pe rembiguai upe. Peyemahenduha co rese: pe avei pereco pe rerecuar ivave.

² Iyavei no opacatu peyeroqui catu ari rupi pe mahemohasa pipe. "Aviye ndeu" peye Tūpa upe. ³ Peyeroqui avei ore rese. Tore pītivii Tūpa oñehengagüer mombehu vīte äqua. Toroñehe vite avei co ñehesa Cristo resendar Tūpa omboyecua ramo vahe rese yandeu. Sese tēi niha co che roquendas. ⁴ Evocoiyase peyeroqui che rese, tamombehu tupri catu co ñehesa opacatu upe senducua tupri catu äqua. Ëgüe tahe che cuaita mboaviye.

⁵ Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseve. ⁶ Pe reco aviye tuprisa pipe peñehera yepi. Iyavei peicua tuprira ñehesa mboevi äqua ñepei-pei ava uve.

Ñehesa ipa vahe

⁷ Co yande rīvri, yande rembiaisu, Tíquico, che pītivii tuprisar, ahe oporavíqui tupri yande Yar recocuer rese che rupi. Ahe omombehura che recocuer resendar pēu. ⁸ Sese co amondo pēu ore recocuer cua tupri äqua, pe mongueréhi catu äqua avei. ⁹ Co Onésimo avei osora supi. Ahe avei yande rembiaisu, yande rīvri seco tupri vahe pe recua pendar. Ahe ñuvirío mbia omombehura pēu opacatu mbahe oime vahe cohaye.

¹⁰ Aristarco, che ndugüer che roquendasave, omundo omahenduhasa pēu iyavei Marcos, Bernabé rihir. Pe revo peicuaño Marcos so äqua eipeve; osose pe piri, peipisi tupriñora. ¹¹ Iyavei omahenduhasa omundo Jesús, ahe serer acoi Justo, pēu. Co güerañomi Jesús reroyasar pāhuve judío oporavíqui vahe che rupi yuvireco Tūpa mborerecuasave nara. Ahe niha che mboviha yuvireco yepi. ¹² Epafras avei omundo omahenduhasa pēu. Ahe pe recua pendar ité, Jesucristo rembiguai. Ahe oyeroqui vahe pe rese yepi 'toyemoviracua tupri iyavei toyuvirecoi Tūpa remimbotar rupi yuvireco' oyapave. ¹³ Che aicua ité secocuer. Ahe oyemboaqui oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei. ¹⁴ Iyavei yande rembiaisu Lucas, oporoposano vahe, Demas reseve omundo omahenduhasa yuvireco pēu.

¹⁵ Pemboaviravemi eipeve yande rīvri Laodicea pendar oreu, cuña Ninfa serer vahe avei iyavei opacatu oñemonuha vahe Tūpa reroyasar yuvireco. ¹⁶ Peyeroquire, pemondo co cuachiar Laodicea pendar Jesús reroyasar upe iyeroqui äqua. Iyavei Laodicea pendar cuachiar rese peyeroqui avei. ¹⁷ Iyavei emombehu Arquipo upe aipo ere: "Emboaviye tupri Tūpa nde cuaisa" ere.

¹⁸ Che Pablo aico. Che ité aicuachía co che mahenduhasa pēu. Tapemahenduha vīte che roquendasave che rese. Aviye pēu. Yande Aposar tape pītivii. Aipo rupive.

PABLO REMBICUACHIA YIPINDAR VAHE TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano reseve iyavei Timoteo, aicuachía co che ñehe pēu, ore rivireta, peñemonuha vahe Tūpa upe tecua Tesalónica ve, yande Ru Tūpa, yande Yar Jesucristo rese peico vahe. Tape rovasa pe reco tupri âgua yande Ru Tūpa, yande Yar Jesucristo avei.

Tesalónica pendar yeroyasa resendar ñehesa

² Ore, “Aviye ndeu” orohe ari rupi Tūpa upe opacatu pe rese yepi. Iyavei oremahenduha pe rese ore yeruresa pipe. ³ Pe niha yande Yar rese pe yeroya tuprisa pipe peporavíquño yepi, iyavei pe poroaisusa pipe peyapo mbahe Tūpa upe, iyavei peñemosáño mbahe tēi upe Jesucristo rârosa pereco vahe rese. Sese oremahenduha pe rese ari yacatu rupi yande Ru Tūpa rovai. ⁴ Ore rivireta, Tūpa niha pe raisu, oroicua avei ahe ité pe poravo. ⁵ Esepiá, acoi oromombehuse ñehesa písirosa resendar, ndahei ñehesa oreyesuindar tēi oromombehu pēu; Espíritu Santo reco píratasa pipe rumo oróñehe. Iyavei oroicua ité co ñehesa supi eté vahe. Peicua avei niha acoi pe pâhuve oroicose, oroico tupriño ité, orosecaño avei pe reco tupri âgua.

⁶ Ipare pemboyeapi ore recocuer peico iyavei yande Yar recocuer avei no. Iyavei yepe peparaísu mbahe-mbahe tēi pâhuve peico viña, peipísíño ité rumo co ñehesa pe vîhasa pipe Espíritu Santo ombou vahe pēu. ⁷ Evocoya pe reco pipe pemboyeecua catu pe reco catuprisa Tūpa reroyasar Macedonia pendar upe, Acaya pendar upe avei. ⁸ Esepiá, pe Tūpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tūpa reroysa pereco vahe peyese. Sese ore ndoromombehu iri chira pe recocuer. ⁹ Esepiá, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tūpa oicove vahe rupi pe guatasa yuvireco, pe chupe nara mbahe apo âgua avei no. ¹⁰ Omombehu avei pesâro vahe Tūpa Rahir Jesús iyevi âgua íva sui yuvireco oreu, acoi Tūpa ombogüerayevi vahe omano vahe pâhu sui. Ahe niha yande písirora Tūpa ñemoirosa ipírata vahe ou vaherâ sui.

2

Tesalónica pendar yeroyasa mboyecuasa

¹ Ore rivireta, pe niha peicua ore so agüer pe piri ndahei ëgue ehi tēi vahe. ² Peicua tupri avei niha acoi cuese yipindar mara-mara tēi ava ore rereco yuvireco tecua Filipo ve. Tūpa rumo ore pítivi oñehengagüer písirosa resendar mombehu âgua opacatu ore siquyeëhisa pipe ore amo-tarëhímbar pâhuve. ³ Esepiá, ndoroyaví eté ore ñehe iyavei ndoroñehi ore pihañemoñeta raisa tēi pipe pēu, ndahei avei ore porombopa âgua oróñehe. ⁴ Tūpa rumo ore recoâha, ichui ore cuai oñehengagüer písirosa resendar mombehu âgua; ëgue ehi ore ñehe, ndahei ava tēi imbovíha âgua. Tūpa yande pihañemoñetasa oicua vahe rumo orombovíha. ⁵ Peicua niha

ore ndoroñehei ñehesa icatupri catu vahe tēi rese pe mbopa água, iyavei ndahei guarePOCHI potasave tēi oroñehe tupri. Tūpa niha oicua.⁶ Ore ndorosecái eté ava ore mboetei catu água pe, que ambuae ava eta avei no.⁷ Ehi oroyandu ucara ore mbororecuasa Jesucristo ore cuaisa pēu viña; oroyemominiño rumo oroico pe pāhuve inungar acoi cuña osāro tupri vahe omembrí imboacua.⁸ Ëgüe orohe avei ore pe raisu. Sese ndahei Tūpa Ñehengagüer año oromondo pota pēu, ore recocuer avei no. Esepia, opoaisú ité.⁹ Ore rivireta, peyemomahenduha acoi ore paraisu agüer rese, ore poravíqui agüer rese avei ari, pītu reseve. Ndahei que ñepei mañeco tēi água mbahe rese oromombehu Tūpa Ñehengagüer oroico pēu.

¹⁰ Pe niha ore repia peye Tūpa avei oicua, ore reco tuprisa, ore rembi-apo supi eté vahe, ihívi vahe pe Jesús reroyasar pāhuve.¹¹⁻¹² Peicua niha, inungar mbía guahir upe, ëgüe orohe pe monguerëhi, pe mbovihasa avei ñepei-pei opacatu. Iyavei oromondo pe cuaitarā pe reco tupri água Tūpa remimbotar rupi. Ahe niha oñeho pēu peico vaherā sese imbororecuasa porañetesave.

¹³ Co rese, “Aviye ndeu” orohe Tūpa upe ari yacatu rupi. Esepia, Tūpa Ñehengagüer, oromombehu vahe pēu, peipisi ité, “Co Tūpa ñehe, ndahei ava tēi ñehe” aipo peye ité pe chupe. Supi eté Tūpa ñehe. Ahe niha osecuñaro ité pe recocuer peroyare.¹⁴ Ore rivireta, acoi cuese peiporara mbahe-mbahe tēi pe mu eta pāhuve peicose; ëgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarëhisave yuvireco.¹⁵ Ahe niha oyuca yande Yar Jesús yuvireco. Ahe avei oyucapa Tūpa ñehe mombehusar yuvireco aracahe. Ore avei opa ore mombo yuvireco. Ndoviroai Tūpa yuvireco iyavei opacatu ava amotarëhimbar tēi yuvirecoi.¹⁶ Esepia, acoi oroñehe potase ava ndahei vahe judío upe iñepisiro água rese, ahe rumo ndoipotai yuvireco oreu. Ipípe sui oyemboangaipa catu yuvireco. Cûrитеi rumo Tūpa ñemoirosa ipírata vahe ou iharíve yuvireco cute.

Pablo oso pota iri Tesalónica pendar repia

¹⁷ Ore rivireta, yepe ndayayoepia iri yayepipi raimise yandeyesui, ore piha pipe rumo, “Ahé” oroheño ité pēu. Iyavei orequerëhiño ité yepi oroso iri vaherā pe repia.¹⁸ Orosáha tēi ore so água pe repia yepi; che Pablo teiteté setá yupagüer tēi aso pota. Caruguar rumo ndoipotai.¹⁹ ¿Ava sui píha orosáro mbahe aviye vahe? ¿Uma ore vîhasa? ¿Uma ore mboviharete catura? ¡Peño itera acoi yande Yar Jesucristo yevise curi!²⁰ Pe ité niha ore mbovihara peye, iyavei orovîha catura pe rese no.

3

¹⁻² Evocoiyase che nañemosa irise pe repiaeñhi rese, chepihañemoñeta yande rivri Timoteo mundo água pe repia; “Che güeraño tapita Atenas ve” ahe. Esepia niha, ahe oporavíqui vahe Tūpa upe ore rupi, omombehu vahe co ñehesa písirosa resendar Cristo suindar ou vahe. Ahe amondo pēu pe movíracua catu água, pe monguerëhi catu água avei peyeroya catu vaherā Cristo rese.³ Evocoiyase tipo eme oyembosiquiye vahe co mbahe tēi pe mombaraisuse. Peicua niha yaiporara rane itera co nungar mbahe.⁴ Iyavei niha acoi oroico vîtese pe piri, “Yande paraisu rane itera mbahe yavai vahe” orohe voi eté acoi pēu. Ahe niha cûrитеi peicua.⁵ Evocoiyase che nañemosa irise, amondo Timoteo ‘¿yuvirecoño

ité pīha Tūpa rese?" che yapave. Che asiquiye, "Aviyeteramo Caruguar omondora mbahe tēi pipe yuvireco" ahe 'ore poravīqui agüer evocoiyase ocañi tēira' che hesave.

⁶ Cūritei rumo Timoteo oyevi Tesalónica sui, güeru ñehesa aviye vahe pe resendar oreu pe Tūpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tēi peye no; inungar ore pe repiasa pota tēi avei. ⁷ Sese, ore rivireta, ore paraísusa pāhuve ore mboviharete peye, co oroicuase pe reco tupri Tūpa reroyasa pipe. ⁸ Cūritei ore mopoase catu iri oroyanduse pe yemoviracua tuprisa yande Yar rese. ⁹ "¿Mara yahera pīha, 'Aviye ndeu' yande he tupri catu água Tūpa upe?" orohe pe reco tuprisa rese, iyavei ore yemboviha catusa rese avei no ¹⁰ pītu, ari rupi oroporandu Tūpa upe ore so água pe repia eipeve iyavei Tūpa reroyasa ipane vīte vahe mboaviye tupri água pēu.

¹¹ Iyavei ore oroipota ore pītivīira yande Ru Tūpa, yande Yar Jesucristo avei ore so água pe pīri. ¹² Evocoiyase yande Yar tape moviracua catu, tombou catu avei pe yeaisu água, iyavei opacatu raisu catu água, inungar ore orovireco pe raisusa. ¹³ Ipipe sui tape moviracua pe reco maranehi pipe pe mbahe aviēhisave yande Ru Tūpa rovai acoi oyevise yande Yar Jesús opacatu ovoya reseve. Ëgüe tehi pēu.

4

Teco tupri Tūpa oipota

¹ Ore rivireta, cūritei oroñeha pota pēu pe cuitarā rese yande Yar Jesús rer pipe: inungar cūritei pe recocuer pereco, ëgüe peyeño ité catu peico ore pe mbohe agüer rupi Tūpa mboetei água.

² Pe niha, peicua acoi ore pe mbohe agüer yande Yar Jesús rer pipe.

³ Esepia, Tūpa oipota pe reco maranehi água oyeupe. "Tipo eme que ñepei oyemboaguasa tēi vahe" ehi. ⁴ Iyavei peico tupri pe rembireco rese pe reco ívisa pipe Tūpa remimbotar rupi, iyavei pemboetei tuprira sereco yepi. ⁵ Peicoi rene ava Tūpa ndociuai vahe reco pipe pe remimbotar tēi apo água. ⁶ Tipo eme avei oyapo vahe co nungar angaipa yande rivri reco momara água tēi. Esepia, Tūpa omundora oñemoirosa ipírata vahe evoco nungar ava upe. Evoco niha yipisuve oromombelu vahe pēu. ⁷ Esepia, Tūpa niha yande poravo yande reco maranehi água, ndahei angaipa pipe yande reco água tēi. ⁸ Sese acoi ndosendu potai vahe co yembohesa, ndahei eté ava tēi viroíro, ahe rumo Tūpa ité viroíro yuvireco acoi ombou vahe oEspíritu Santo pēu.

⁹ Iyavei co peyepāhuve pe yeaisusa rese, ndaiciuchía iri chira pēu. Esepia, Tūpa ité niha pe mbohe pe yeaisu água opacatu. ¹⁰ Ëgüe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha vīte catu pe poroaisusa. ¹¹ "Peico tupriño avei pe reco mbegüesa pipe; mbahe pe rembiapo reseño tupri pehafeco; peporavīqui pe po pipe ité" aipo orohe acoi pēu cuese. ¹² Evocoiyase pe mboyeroyara ava ndahei vahe Jesús reroyasar yuvireco; iyavei ëgüe peyera mbahe pēu ipaneëhi água avei no.

Oyevira yande Yar co ivi pipe

¹³ Ore rivireta, ore oroipota peicua aveira manosa recocuer; sese ndapeicoi chira pe viharëhisa pipe inungar co ava ndoyeroyai vahe

Tūpa rese. ¹⁴ Esephia, yande yaroya: Jesús omano, ichui ocuerayevi. Evocoiyase yande avei yaroya Tūpa Guahir Jesucristo rese ombogüerayevira opacatu acoi seroyasa pipe omano vahe yuvireco.

¹⁵ Sese co oromombehu pēu, ahe niha yande Yar porombohesa: yande yaicove vīte vahe co iví pipe, acoi oyevise yande Yar, ndahei chira yande rane omano vahecuer sui yayemboya yande Yar rese. ¹⁶ Esephia, yande Yar ité ogüeyi irira iva sui ou mbororecuar ivate vahe ñehesa pipe; ahese oyeendura Arcangel ñehe iyavei Tūpa remimbí moñehe píratasa. Ahese seroyasar omano vahecuer rane opúhara yuvireco. ¹⁷ Ipare voi yande yaicove vīte vahe, serasopri yaicora opacatu iva quiha rese co yande Yar rovañchi ãqua iñitú rupi. Ëgue yahera yande Yar píri yaico vaherā apiréhi. ¹⁸ Sese peyemongueréhi catu co ñehesa pesendu vahe rese.

5

¹ Iyavei no, acoi ari yande Yar yusa resendar ore ndoroicuachiai chira pēu. ² Esephia, pe peicua tupri co yande Yar ari oyepotara imohaëhisa pipe, inungar acoi imonda rai vahe oyepota pítu pipe. ³ Acoi ava aipo ehise yuvireco: “Opacatu avíye ité yaico, ndípo iri mbahe-mbahe tēi yandeu” ehise, ahese inungar acoi cuña imembirasí aviyeteramo tēi, ëgue ehi aveira, aviyeteramo tēi icañi oura iharive, ahese ndoicatui chira ichui oñemi yuvireco. ⁴ Pe rumo, ore rivireta, ndahei pítumimbisa pendar nungar peico. Evocoiyase oyepotase yande Yar ari, ndahei chira imonda rai vahe nungar pe resapiha tēi ou. ⁵ Esephia, pe opacatu peico vahe Tūpa poroesapesa pipe, ndahe iri yande pítumimbi pipendar yaico. ⁶ Evocoiyase ndayaicoi chira co ambuae yuviroque tēi vahe nungar pihañemoñetasa pipe; iyacatu rumo yande yayemopoase yande pihañemoñeta tuprisa pipe. ⁷ Acoi yuviroque vahe, yuviroque pítu pipe; iyavei acoi osavaipo vahe, osavaipo avei pítu pipe yuvireco. ⁸ Yande rumo yaico vahe Tūpa poroesapesa pipe. Evocoiyase yareco tuprira yande pihañemoñetasa yande reco tupri ãqua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oáca ndiru guarePOCHI apopri yuvireco oáca repí ãqua, yande avei tayareco yande remiaro yande ñepisiro ãqua. ⁹ Esephia niha, Tūpa yande poravo ndahei yaico vaherā iñemoirosa pipe nara; ahe rumo yande poravo yasupiti vaherā ñepisirosa yande Yar Jesucristo rembiapo sui. ¹⁰ Esephia, ahe omano yande recocuer rese oyese yande rereco ãqua opacatu yande recove vitese, yamanose avei. ¹¹ Sese peyemongueréhi catu, iyavei peyemoviracua catu vīte peyeupe inungar co peyapo peico.

Pablo omboaracua Jesús reroyasar oico

¹² Iyavei no, ore rivireta, pemboyeroya acoi oporavíqui vahe yuvireco pe pâhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco. ¹³ Pemboyeroya iyavei pesaisu tuprira iporavíquisa rese. Peico tupri avei peyepâhuve.

¹⁴ Iyavei ore rivireta, pe cuaisa: pemboaracua acoi ndoporavíqui potai vahe imbohe catu ãqua. Iyavei pemongueréhi acoi niqueréhi íri vahe. Peipítiñii avei acoi ndoyemoviracuaí vahe Tūpa rese güeco ãqua. Iyavei peñemosasoñ opacatu ava uve yepi.

¹⁵ Peicua catu pe rereco megua potasar sui. Ndapemboyevii chira mbahe-mbahe tēi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

¹⁶ Peyemboviñaora ari yacatu peico. ¹⁷ Iyavei peyeroquira ari yacatu rupi no. ¹⁸ “Aviye ndeu” peyera Tūpa upe opacatu mbahe rese. Esepiā, ahe niha Tūpa oipota yandeu Cristo rese yaico vahe.

¹⁹ Iyavei ndapemombituhui chira mbahe Espíritu Santo oyapo pota vahe pe rese. ²⁰ Ndapeyamotarēhii chira Tūpa ñehe imombehupri. ²¹ Pesāhapa rane opacatu mbahe. Ichui peipisira mbahe aviye vahe peyeupe. ²² Peyepepi opacatu mbahe naporai vahe sui.

²³ Tūpa acoi ombou vahe teco tuprisa yandeu tape pehapa tupri oyeupe nara. Iyavei tosāro tupri opacatu pe espíritu, pe hā, pe rete avei pe reco maranehi ãgua co yande Yar Jesucristo yevi irise. ²⁴ Ahe acoi pe poravo vahe oyeupe nara seco tupri vahe. Ahe omboaviyera opacatu co mbahe.

Pablo imahenduha Jesús reroyasar rese

²⁵ Ore rivreta, peyeroqui ore rese.

²⁶ Pemboavirave opacatu yande rivri eipe pendar pe yeovaupitesa pipe.

²⁷ Che opocuai yande Yar rer pipe: peyeroqui co cuachiar opacatu yande rivreta upe.

²⁸ Yande Yar Jesucristo tape rovasa tuprīño pe rereco. Aipo rupive.

PABLO REMBICUACHIA IMOÑUVIRIOSA TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano, Timoteo reseve, aicuachía co ore ñehe pēu, ore rivireta, peñemonuha vahe Tūpa uve tecua Tesalónica ve, yande Ru Tūpa, yande Yar Jesucristo rese peico vahe. ² Tombou pēu oporovasasa pe reco tupri água yande Ru Tūpa, yande Yar Jesucristo avei.

Tūpa omombaraisura viroyasaréhi Jesucristo yevise curi

³ Ore rivireta, “Aviye ndeu” orohe itera Tūpa upe pe recocuer rese yepi. Esepia, Tūpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe. ⁴ Evocoiyase, ore oronéhe pe rese ore vihasa pipe Tūpa reroyasar ñemonuhasa rupi. Esepia, acoi ava mbahe-mbahe tēise pēu, peñemosáño chupe pe Cristo rese pe yeroyasa pipe. ⁵ Co niha omboycua Tūpa reco ívisa ava upe. Esepia, ipipe pe rereco omborerecuasave pe reique água. Sese niha, peparaisu vite tēi peico.

⁶ Tūpa omombaraisura acoi pe mombaraisusarer. Iya ité ëgue ehi vaherā chupe. ⁷ Pe rumo imombaraisupri peico vahe, Tūpa omondora pe pituhu água, ore pituhu água avei, acoi yande Yar Jesús oyevise tata rendigüer pāhuve íva sui opacatu güembiguai seco pírata catu vahe reseve. ⁸ Ahe oura opacatu Vu Tūpa reroyasaréhi mombaraisu água iyavei oyesuindar ñehesa poropísirosa resendar rendu tēisar mombaraisu avei. ⁹ Evocoiparaisura yuvireco, imocañipri yuvirecoira apiréhi. Iyavei imboyepepisara amombrí yande Yar reco píratasa porañetesu sui. ¹⁰ Acoi ouse ahe ari pipe, yande Yar imboeteiprira opacatu seroyasar pāhuve; ipāhuve pe peicora. Esepia, peroya ité oromombelu vahe pēu.

¹¹ Co rese oroyeriquí pe rese yepi: oroporandu yande Ru Tūpa upe tape rereco tupri güemienoi pe recosa pipe. Iyavei oroyeriquí chupe, tomboavíye güeco píratasa pipe opacatu ñepei-peí mbahe avíye vahe peyapo pota vahe iyavei opacatu mbahe pe rembiapo avíye vahe sese pe yeroyasa pipe. ¹² Evocoiyase yande Yar Jesucristo rer imboeteiprira pe recocuer pipe sui; iyavei pe imboeteiprira peico yande Yar rese peico vahe yande Ru Tūpa, yande Yar Jesucristo pe raisusave.

2

Yande Yar Jesús yevisa resendar mombehu tuprisa

¹ Iyavei, ore rivireta, ore oromombelu potami pēu opacatu acoi yande Yar Jesucristo yevisa resendar yande monuha vaherā oyese. ² Peicua catu, tapepihañemoñeta rerova eme iyavei peyembosíquíyei rene que ava “che añahe Espíritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pēu. ³ Peicua catu peyembopa ucai rene ñepei yepe ava upe. Esepia, yipindar ari Jesucristo yu água renonde, yuguerura mbahe-mbahe tēi aposar. Ahe Tūpa amotaréhisar yuvirecoi vahe. Ahese oyemboyecuara ava yangaipa guasu vahe. Ahe ocañi tēi

vaherā. ⁴ Oyemboivate aira opacatu Tūpa rer rerecosar amotarēhisave iyavei ndoipotai chira ambuae mboetei. Oique aveira, oguapi Tūpa rēta pīpe inungar-ra Tūpa ité viña. “Supi eté che Tūpa aico” ehi tupri tēira oī.

⁵ ¿Ndapemahenduhai vo acoi che ñehengagüer rese pe pāhuve aico vītese cuese? ⁶ Co imombitasar peicua cūritei. Ihari oyepotase voi, oyemboyecuara. ⁷ Co porocuaita amotarēhisar ndoyemboyecua vītei vahe rembiapo oime cūritei. Co güeraño ipane imombitasar renose ãgua ipāhu sui,⁸ ahese voi oyemboyecuara acoi ava yangaipa guasu vahe. Yande Yar Jesúz rumo oyucara oñehe pīpe, omocañi itera güendigüer pīratasa pīpe oyevise curi. ⁹ Yucasa renonde rumo, acoi ava yangaipa guasu vahe oura Caruguar pīratasa pipe; güerura güeco pīratasa tuvicha vahe; omboyecua angahura poromondiisa. ¹⁰ Oyapo angahura opacatu mbahe tēi oporombopa ãgua oico ava ocañi tēi vaherā upe. Esepia, evocoai ava ndosendu potai porombohesa supi eté vahe oñepisiro ãgua yuvireco. ¹¹ Sese Tūpa oseyara co porombopasa reroya ãgua yuvireco ¹² ‘ipīpe tocañi tēi co ava, opacatu mbahe supi eté vahe reroyaëhisar, acoi oyemboviha catu vahe mbahe-mbahe tēi rese yuvireco’ oya.

Iporavopri ipisiropirā

¹³ Ore rumo, “Aviye ndeu” orohera Tūpa upe pe recocuer rese yepi, ore rīvireta, yande Yar rembiaisu peico vahe. Esepia, Tūpa niha pe poravo yipisive pe pīsiro ãgua pe reco maranehi ãgua rese Espíritu pipe iyavei porombohesa supi eté vahe reroya ãgua. ¹⁴ Sese niha, Tūpa oñehe yandeu yande piha pipe co ñehesa pīsirosa resendar pipe, ore oromombehu vahe pēu ‘tovireco che Rahir Jesucristo reco porañetesea’ oya.

¹⁵ Sese ore rīvireta, peyemoviracua iyavei peresarai eme acoi oromombehu vahecuer iyavei oroicuachía vahe acoi pēu. ¹⁶ Yande Yar Jesucristo teiteté, yande Ru Tūpa avei, yande raisusa yande rovasasa pipe ombou vahe vihasa apirēhi vahe yandeu iyavei yande reco tupri rāro ãgua,¹⁷ ahe tape monguerēhi, tape moviracua avei opacatu ñehesa aviye vahe rese, opacatu mbahe pe rembiapo aviye vaherā rese avei.

3

Pablo oporandu Jesucristo reroyasar yeroquisa rese oyeupenara

¹ Ore rīvireta, co mbahe ipa vahe amombehu pota pēu: peyeroqui ore rese. Evocoiyase toyepota pihaivi yande Yar ñehengagüer opacatu rupi; tipisisa tupri imboeteisa pīpe inungar oyepota pe pāhuve. ² Peyerure avei ore repi ãgua rese ava ndaseco pōrai vahe, ipihañemoñeta rai vahe sui. Esepia niha, ndaopacatui Tūpa rese ipihañemoñeta yuvireco. ³ Yande Yar rumo seco ïví vahe. Ahe pe recocuer moviracuara iyavei pe rārora mbahe tēi sui. ⁴ Ore oroyeroya yande Yar rovai peyapo vahe rese iyavei peyapo viteño vaherā rese acoi ore pe cuai agüer. ⁵ Yande Yar tape pītvii pe poroaisu ãgua inungar Tūpa oporoaisu iyavei Cristo ñemosasa rereco ãgua.

Yande cuaita yande poraviqui ãgua

⁶ Ore rīvireta, opocuai yande Yar Jesucristo rer pīpe: acoi ndoporaviqui potai vahe yande rīvri pe pāhuve, peyepepiño ichui, acoi ndoviroya potai vahe avei ore porombohesa oromombehu vahe pēu. ⁷ Pe peicua mara peyera ore recocuer moña ãgua peico. Ore oroicose pe pāhuve, ndoroico tēi,⁸ ndorohu tēi avei ambuae tembihu imboepipirēhi. Ore rumo que

ñepei mañeco tēiēhi ãgua rese oroporavíquí orecuerai rane ité ari, pítu reseve. ⁹ Iya ité niha mbahe rese ore porandu ãgua pēu ore pítivií ãgua rese viña; ore rumo oroporavíquí pe ore recocuer rupi pe guata ãgua rese. ¹⁰ Acoi oroico vitese pe pâhuve, oromondo pe cuaitarã: acoi ndoporavíquí potai vahe, ahe tocaru eme. ¹¹ Oroyandu amove aipo pe pâhu pendar yuvirecoiño tēi ndoporavíquii vahe. Evocoí omañeco tēi ambuae ava recocuer. ¹² Ore oromondo acoi ava upe mborocuaita yande Yar Jesucristo rer pipe: toporavíquí güeco quiririsa pipe; ipipe sui yuvirecovera.

¹³ Ore rívireta, pecuerai eme mbahe aviye vahe apo. ¹⁴ Oimese ndoviroyai vahe ore remimombehu co cuachiar pipe, peicua tuprì evo-coi nungar. Peyemboya eme sese. Evocoiyase tochí ahe. ¹⁵ Pereco eme catu yamotaréhisa chupe; iyacatu rumo pemboaracua catuñora inungar yande rívri.

Ñehesa ipa vahe

¹⁶ Aviye, yande Yar ae tombou güeco tuprisa pe reco tuprì ãgua pēu ari yacatu rupi opacatu pe reco pipe. Tasecoí pe rese ari yacatu.

¹⁷ Che, Pablo, aicuachía co mahenduhasa che po pipe ité pēu. Che rembicuachía icuaprì opacatu che cuachiar pipe. ¹⁸ Yande Yar Jesucristo tape rovasa opacatu yepi. Aipo rupive.

PABLO REMBICUACHIA YIPINDAR VAHE TIMOTEO UPE TIMOTEO

Pablo mahenduhasa Timoteo upe

1-2 Che, Pablo, aicuachía che ñehe ndeu, Timoteo. Nde niha che rahir Tüpa reroyasa pipe ereico. Che niha Jesucristo apóstol aico, yande Písicosar Tüpa porocuaita rupi iyavei yande Yar Jesucristo porocuaita rupi. Ahe niha yande remiaro. Tombou yande Ru Tüpa, yande Yar Jesucristo oporovasasa, oporoparaísuerecosa ndeu nde reco tupri ãgua.

Pablo, “Eicua catu porombohesa co coti tēi vahe sui” ehi Timoteo upe

³ Iyavei acoi aipo ahe ndeu cuese che so ãgua Macedonia ve: nde epita co tecua Efeso ve. Evocoiyase eremboaracuara co ava co coti tēi oporomboaracua vahe, toporomboaracua eme pihañemoñetasa co coti coti tēi vahe rese yuvireco. ⁴ Toyapisaca eme avei tecocuer ipapapri tēi vahe rese, tecocuer aracahendar ëgue ehi tēi vahe rese avei. Ahe ichui osẽ yeacasa naporai vahe yepi; ndayande pítivii rumo Tüpa remimbotar reroya tupri ãgua rese.

⁵ Sese co amondo porocuaita ndeu yande yeáisu ãgua yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe. ⁶ Esepia, amove ava oime ichui oyearacua mocañi oñehé-ñehe tēisa pipe yuvireco. ⁷ Oporombohe pota tēi Tüpa porocuaita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

⁸ Yaicua niha co porocuaita aviyé ai eté yaiporusa Tüpa remimbotar rupi eté. ⁹ Yaicua avei acoi porocuaita ndahei ava aviyé vahe upe nara. Ahe rumo ndiporoyerai vahe mboaracua ãgua, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nomboetei vahe Tüpa iyavei chupendar pihañemoñetasa; acoi vu, osí oyuca vahe; opacatu ava oporapichi vahe upendar. ¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi vïrocua tēi vahe mbiguái ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuaita; imondosa avei opacatu porombohesa nimarai vahe amotarëhisar upe nara. ¹¹ Co porombohesa nimarai vahe oyoya tupri ñehesa porañete vahe poropísrosa resendar rese. Tüpa sovasapri secoi, ahe che cuai vahe sese.

Pablo oporaisuerecosa rese, “Aviye ndeu” ehi Tüpa upe

¹² “Aviye ndeu” ahe yande Yar Jesucristo upe. Ahe niha ombou píratasa co che ñehe ãgua. Esepia, ahe oyeroya che rese. Sese che mundo oñehengagüer mombehu ãgua. ¹³ Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguã yamotarëhimbave che yemboivate aisa pipe, Tüpa rumo, che paraísuerecoño. Esepia, che ahese, ndahe vîtei Cristo reroyasar aico; ndaicua vîtei mbahe ayapo vahe. ¹⁴ Ëgue ehi yande Yar ombou catu oporovasasa che rese iyavei ombou

che oyese yeroya ãgua iyavei che poroaisu ãgua Jesucristo rese che recosa pipe.

¹⁵ Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pipe ava yangaipa vahe písiro ãgua. Che rumo acoi ivate catu vahe yipindar aico ipâhuve. ¹⁶ Sese Túpa che paraisuereco che rese rane Jesucristo reco mbegüe tuprisa mboyecua ãgua. Égüe ehi che recocuer upe ambuae ava seroya ãgua. Ipípe sui osupitira tecovesa apiréhi vahe yuvireco. ¹⁷ ¡Sese yamondo imboeteisa apiréhi yande Rerecuar ndopai vahe upe! ¡Ahe nomanoi vahe, ndayasepiai vahe, ahe ñepei vahe Túpa!

¹⁸⁻¹⁹ Che rahir Timoteo, co amondo nde cuaitarã ndeu nde reco moviracua ãgua mbahe tẽi recopi ãgua Cristo rese nde yeroyasa pipe nde pihañemoñeta catuprisa pipe avei. Supi tupri cuese Túpa reroyasar oñeho yuvireco nde rese serer pipe. Amove ava opihañemoñeta tupri reroyaëhisave, omocañi uca Túpa rese oyeroyasa ²⁰inungar vahe Hime-neo rese, Alejandro yuvirecoi. Ahe che amondo Caruguar povriva ‘evocoiyase toicua tiñehe-ñehe tẽi eme Túpa upe yamotarëhisave yuvireco’ che yapave.

2

Ñehesa yeruresa resendar

¹ Iyavei no, co che opomongueréhi pe yerure ãgua, peporandu, pe-mondo avei “aviye” pe hesa Túpa upe opacatu ava recocuer rese. ²Iyavei peyerure opacatú mborerecuar rese. Evocoiyase tayareco yande reco tupri Túpa mboetei tuprisa pipe, yande poromboeteisa pipe avei. ³ Co aviye ité; ahe niha yande Písiosar Túpa remimbotar. ⁴Supi eté ahe oipota opacatu ava ñepisiro iyavei co porombohesa supi eté vahe cua tupri ãgua. ⁵Esepia, ñepeiño ité Túpa, iyavei ñepeiño ité ava oicatu vahe yande reraso Túpa upe: ahe Jesucristo. ⁶Esepia, Jesucristo omano opacatu ava yangaipa vahe repirã ipísiro ãgua. Ahe imombehusa chupendar ari iporavopri rupi. ⁷Sese che supi eté apóstol, icuaipri aico Túpa Ñehengagüer mombehu ãgua, ava ndahei vahe judío mbohe ãgua, co yeroyasa rese iyavei supi eté vahe rese. Supi eté ndopombopai.

⁸ Evocoiyase che aipota opacatu rupi ava toyerure yuvireco. Tomopuhua opo yuvireco opihañemoñeta catuprisa pipe, ombahe mboasiéhisa pipe, oyeacaëhisa pipe avei. ⁹Iyavei cuña toyemonde tupriño turucuarño tẽi pipe yuvireco. Aní chira rumo oáca moporafleteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomonde eme yuvireco. ¹⁰Iyacatu rumo yuvirecoi tuprira güembiapo aviye vahe pipe, inungar cuña oyemondo tupri vahe Túpa upe yuvireco yepi. ¹¹Iyavei cuña tosendu porombohesa oquiririsa pipe imboyeroyasave. ¹²Ndaipotai cuña oporombohe ava rehii pâhuve iyavei toyocuai eme cuimbahe. Iyacatu rumo iquiririñora yuvireco. ¹³Esepia, Túpa oyapo yipindar Adán; ipare Eva oyapo. ¹⁴Adán ndahei imbopapri; cuña rumo oyembopa uca. Ichui oviapi angaipa pipe. ¹⁵Oñepisirora rumo ocuaita mboaviesa pipe oyese yeroyasa rereco pipe, iporoaisusa pipe, güeco maranehisa pipe avei.

3*Tūpa reroyasar rārosar cuaita*

¹ Iyavei co supi eté: acoi amove oico pota vahe Tūpa reroyasar rāro âgua, ahe oipota mboraviquí aviye catu vahe. ² Sese acoi vireco vahe ocuaita Tūpa reroyasar rāro âgua, ahe secoi tuprīra mbahe aviye vahe pipe yepi. Ipipe ava noñehei chira yamotarēhisave. Iyavei omendara ñepei cuña reseño ité. Toñearo tuprī avei yuvireco, toyapo mbahe supi eté vahe, tiporomboetei tuprī avei. Iyavei omoinguera oyepiri ava oyepota vahe güëtave. Oicua aveira ava mbohe tuprī âgua. ³ Iyavei ndahei chira caguar tēi. Ndosecai chiaveira ovava âgua. Iyacatu rumo seco mbegüera opacatu ava upe. Ndoipota rai chiaveira guareepochi. ⁴ Iyavei oicua tuprīra güëta pipendar rāro âgua. Ombohe aveira guahir iporeroya âgua, iporomboetei âgua avei. ⁵ Esepia, acoi ndoicuai vahe güëta pipendar rāro, ¿mara ehira evocoiyase Tūpa reroyasar rāro? ⁶ Tūpa reroyasar rārosar rumo ndahei chira oipisi ramo vahe Tūpa opīha pipe. Esepia, aviyeteramo oyemboivate ai tiétera. Ipipe sui imocañiprī avei secoira Caruguar nungar. ⁷ Iyavei oyecua uca tuprī ranera Tūpa reroyasaréhi pâhuve. Ahese ndipoi chira imboeteiñhisa iyavei ndovíapi chira Caruguar povrive.

Tūpa reroyasar rese ihañeco vahe cuaita

⁸ Iyavei Tūpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tēi; ndahei chiaveira guareepochi pota raisar tēi. ⁹ Iyacatu rumo, porombohesa supi eté vahe rese oyemboya catura opīhañemoñeta catuprīsa pipe yuvireco. ¹⁰ Iyavei secoähasa ranera. Acoi osē tuprise, ahese toyuvirecoi Tūpa reroyasar rese ihañeco vaherā. ¹¹ Iyavei sembireco yuvirecoi aveira oporomboeteisa pipe, nimahechiroi chira, osārō tuprīra güecocuer yuvireco, iyavei imboyeroyapri aveira opacatu mbahe rese yuvireco. ¹² Iyavei Tūpa reroyasar rese hañecosar ñepeñio itera sembireco, oicua aveira guahir rāro tuprī âgua, güëta pipendar rāro âgua avei. ¹³ Esepia, Tūpa reroyasar rese hañecosar oyapo tuprise oporavíquisa yuvireco, ipipe sui imboyeroyasara. Osíquiyéehisave avei secoira Jesucristo reroyasa pipe.

Tūpa reco oyecua ramo vahe reroya tuprīsa

¹⁴ Che aso pihaivi pota nde repia. Aicuachía rumo co che ñehe ndeu ¹⁵ acoi che aracahese, ereicuañora rumo pe reco tuprī âgua ava Tūpa rese yuvirecoi vahe pâhuve; ahe acoi Tūpa oicove vahe upendar yuvirecoi, oyemovíracua tuprī vahe yuvireco co porombohesa supi eté vahe mboyecua âgua. ¹⁶ Supi eté tuvichá etepri Tūpa reco oyecua ramo vahe reroya tuprīsa:

Cristo oyemoporéhi yande reco nungar pipe yandeu.

Ipare Espíritu pipe imboyecuasa secocuer supi tuprī vahe.

Iyavei Tūpa rembiguai rembiepiave secoi.

Ichui imombehusa opacatu íví rupi; opacatu rupi avei seroyasa.

Iyavei ipisiprī secoi ívave nara.

4*Oimera ava oyepipi vahe Tūpa rese oyeroyasa sui yuvireco coiyé*

¹ Iyavei Espíritu aipo ehi tuprī yandeu: coiyé, ari cañi renonde, amove ava oyepipira Tūpa rese oyeroyasa sui yuvireco. Omboyeroyara

espíritu oporombopa tēi vahe, porombohesa Caruguar suindar avei.
² Oyapisacara ava aipo ehi tēi vahe rese, semirañete ai vahe ñehe rese avei yuvireco. Ëgüe ehira opihañemoñetas moçañi tēi yuvireco. ³ Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tūpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tūpa upe yuvireco.
⁴ Esepia, opacatu mbahe Tūpa rembiapo, aviye ité. Ahe ndiyai chira yaroïro yaipisise, “Aviye ndeu” yande hesa pipe chupe. ⁵ Esepia, Tūpa ñehe pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

⁷ Ndereyapisacai chira rumo acoi mbahe aracahendar co ïví pendar yapisaca tēisa rese. Eyembohe catu yande Yar uveño ité nde reco água.
⁸ Esepia, yepe aviyeño chíhi yande retecuer yamoviracua viña, yande Yar upe yande reco água aviye catu opacatu yande reco uve nara. Esepia, ahe yande pítiviira yande recove água cûritei iyavei curi yande recove água.
⁹ Co supi eté vahe, evocoiyase yande yaroyara opacatu yepi. ¹⁰ Sese niha yaporavíqui etepri. Esepia, yande yayeroya ité Tūpa ndopai vahe rese, ahe opacatu ava Písrosar, iyavei viroyasar Písrosar catu ité secoi.

¹¹ Co porombohesa eremombehura ava pâhuve, erembohe aveira sese.
¹² Tipo eme ava nde reroïro vahe chíhivahé catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprisa pipe. Esaisu tupri nde yeroyasave nde recocuer maranehi pipe.
¹³ Che yepota renondeve, eyeroqui catu Tūpa Ñehengagüer rese opacatu ava rovaque. Emonguerêhi catu yande rivireta iyavei erembohe tuprira.
¹⁴ Nderepoi chira Tūpa ndeu mbahecusa ombou vahe sui. Esepia, ava Jesús reroyasar rârosar upe Tūpa omombehuse nde cuaitarã, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco. ¹⁶ Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ëgüe erese, ipísropri ereicora; nde ñehe rese oyapisaca vahe avei ipísropri yuvirecoira.

5

Mara ehira Jesús reroyasar oyepâhuve yuvireco

¹ Eremboaracua pírata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia chíhivahé upe ereñehé tuprira secocuerã rese inungar nde rivri upe.
² Cuña otiaro vahe upe avei ereñehé tuprira inungar nde si ité sereco; iyavei cuñatai eremboaracua tuprira inungar nde reindrí ité ererecora opacatu nde reco catuprisa pipe.

³ Acoi imer mano vahecuer ité ereipítiviira que mbahe ipane vahe rese.
⁴ Que oimese imembri, anise que semiariro, toyembohe rane ocuaita mboaviye água yuvireco chupe. Ëgüe tehi guaisu mboyevi chupe, ahe

niha Tūpa remimbotar.⁵ Iyavei acoi cuña imer mano vahecuer, acoi supi eté ahe ae secoi vahe, ahe oyerooya ité Tūpa rese, iyavei oyeroquiño ité ari, pítu yacatu yepi.⁶ Osecase rumo mbahe güemimbotar yuvireco, ahese omano vahe tēi secocuer yuvirecoi.⁷ Eyocuai tupri ava co ñehesa rese; ichui ndahei chira ava ñehepora tēi yuvirecoi.⁸ Acoi ava rumo nosaroi vahe omu; acoi güëta pipendar nosaroi vahe avei, ahe ndoguata iri Tūpa rese oyeroysa rupi iyavei mbahe tēi catu Jesús reroyasaréhi sui.

⁹ Icuachiasara rumo ambuae cuña imer mano vahecuer pâhuve ivate catu sesenta sui iharaviter vahe, iyavei ñepeño ité omer vireco vahecuer.¹⁰ Icuaprira secocuer icatuprisa rese, omboacua tuprise chihivahe oyesuindar, omoinguese ava güëta pipe, ihañecose ava Tūpa reroyasar rese ipi sei äqua, oipitiviise ava iparaisu vahe, oyapo tuprise opacatu mbahe aviye vahe.

¹¹ Ereicuachía eme iharaviter ndosupitií vahe sesenta cuachiar pipe. Esepia, amove güemimbotar pipe tēi oyepepi Cristo sui, omenda yupagüe pota iri vahe.¹² Ipípe oimera Tūpa poronupasa chupe. Esepia, yipindar oyemondo Tūpa upeño ité oyecuachiase. Ipare rumo nomboaviyei eté oñehé.¹³ Iyavei oi yacatu rupi tēi oguatase oico, ahese virecora oatéhisa, iyavei imahechiroi tēira, oñangareco tēira opacatu rese, omombehumbelu tēi aveira mbahe naporai vahe.¹⁴ Sese co aipota acoi imer mano vahecuer cuñatai vite vahe: tomenda iri, timembí iri avei yuvireco, iyavei tosáro tupri güëta pipendar. Sese yamotaréhimbar secocuer ndahei chira oñehepora tēi vireco yuvireco.¹⁵ Esepia, oime ité amove oyepepi vahe güemimbotar pipe Caruguar rupi güeco äqua.

¹⁶ Acoi oimese que cuña Tūpa reroyasar vireco vahe que cuña imer mano vahecuer oyepiri, ahe toipitivi yuvireco. Ahe sese evocoiyase tūparo pendar nihañecoi chira. Ahese oicatura supi eté imu ndipoi vahe rese hañeco äqua yuvireco.

¹⁷ Iyavei acoi Tūpa reroyasar rârosar osâro tupri vahe, ahe toipisi catu ava poropitiviisa imboyeroyasave. Acoi oyemondo vahe Tūpa Ñehengagüer mombehu äqua, ava mbohe äqua avei, ahe co poropitiviisa oipisi catura.¹⁸ Esepia, aracahendar icuachiapri pipe aipo ehi: "Ereiyuru ãpichi rene tivi oporavíqui vahe trigo cambesar" ehi. Iyavei aipo ehi: "Mbía oporavíqui vahe iyacatu oipisira oporavíqui reprí" ehi.

¹⁹ Iyavei nde, ndereroyai chira mbahe omombehu vahe Tūpa reroyasar osâro vahe yamotaréhisave yuvireco. Oimese que ñuvirío sepiasar, que mbosapi, ahese ramo ereroyara.

²⁰ Acoi oimese rumo angaipa aposar ipâhuve, ahese eremboaracuara opacatu ava rovaque. Evocoiyase ambuae osiquiyera angaipa apoëhi äqua yuvireco.

²¹ Iyavei che orocuai Tūpa rovaque, Jesucristo rovaque iyavei opacatu Tūpa rembiguai iva pendar rovaque avei: ereyapo tuprira co mborocuaita, nderemomahuatií chira ava imboaracua nde remimbotar rupi tēi.²² Ndahei chira pihaivi eresenoi mbía mborocuaita rese ihañeco vaherã. Aviyeteramo nde rese pâve mbahe oimera. Ñearo tupri nde reco maranehisa pipe.

²³ Nde rie mbaherasisa upe ndereihui chira i güeraño tēi, chihimi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu äqua renonde. Oime rumo acoi oñomi vahe oangaipa yuvireco. Ipare tēi icuasa.

²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6

¹ Iyavei co ava mbiguai Jesús reroyasar, aheoyeroya tuprira güerecuar yuvireco ava oñehe-ñehe tēiēhi âgua Tūpa rer rese, yande porombohesa rese avei no. ² Acoi co mbiguai virecose güerecuar Tūpa viroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporavíquisa, ahe Jesús reroyasar saisupri yuvirecoi yepi.

Tūpa rese yande pihañemoñetasə sepirusu vahe nungar

Eporombohe, emombehu co mbahe: ³ oimese oporombohe vahe oyeyuindar pihañemoñetasə co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tuprisa rese, ⁴ ēgue ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoāha âgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroyaēhisa ⁵ iyavei iporoacasa ndopai vahe ava yaracua rai vahe pâhuve. Ndoicuau rumo mbahe supi tupri vahe yuvireco. Ipihañemoñeta Tūpa rese omahenduhasa pipe mbahe rereco ati âgua yuvireco viña. ⁶ Yayembovihañose mbahe yande rembiereco rese, ahese Tūpa rese yande pihañemoñetasə inungar mbahe sepirusu vahe yandeu. ⁷ Esepia, ndayarui eté niha mbahe yahase co ivi pipe iyavei ndayarasoí chiaveira mbahe yamanose yande yeupi. ⁸ Iyacatu rumo yarecose yande remihura, yande yemonde âgua avei, sese yayembovihañora yaico. ⁹ Amove rumo ava, “Mbahe rerecosar ité taico” ehi tiête viña, ndoyemoviracuai rumo tecōahasa upe. Ipare oviapi mbahe tēi pipe, setá mbahe pota raisave, ipipe oyecomomara. Ipare oyemocañi tēi. ¹⁰ Esepia, guarepochi pota raisa sui osē opacatu mbahe naporai vahe. Amove ava ipota raisa pipe oyepepi Tūpa reroyasa sui iyavei omombaraisu güecocuer ipipe ahe ae yuvireco.

Tūpa rese yande reco vîracuasa

¹¹ Nde rumo, Tūpa rese ereico vahe, eyepepi opacatu co nungar mbahe naporai vahe sui. Eico nde reco ïvisa pipe, ndemahenduhaflo ité Tūpa rese. Eroya, esaisu, eñemosa avei eico nde reco mbegüesave. ¹² Eyemoviracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco âgua ava eta rovai. ¹³ Cûritei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuau ¹⁴ ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tuprisa sui acoi ouse yande Yar Jesucristo. ¹⁵ Acoi oyepotase ari imombehupri curi, ahese Tūpa omboyevira Guahir. Ahe niha ñepei vaheño ité imboeteipri, seco pírata catu vahe. Aheño ité niha mbororecuar ívate catu vahe rerecuar. ¹⁶ Aheño ité tecó apirēhi vahe, tesapessa secoi; ndipoi oyemboya vahe sese, ndipoi eté que ava osepia vahe. ¡Ēgue tehi, imboeteipri tasecoi opacatu opíratasa apirēhi vahe rese!

¹⁷ Acoi imbahe eta vahe co iwi pipe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe ēgüe ehi tēi vahe. Iyacatu rumo Tūpa rese oyerojara yuvireco. Ahe niha opacatu mbahe icatupri vahe ombou yandeu nara yande rembiporuguā. ¹⁸ Eyocuai avei evocoí ava: toyuvirecoí mbahe yar nungar mbahe aviye vahe aposa pipe. Iyavei toyemoingatuño acoi mbahe vireco vahe mboyaho água ambuae ava upe yuvireco. ¹⁹ Evocoiyase virecora mbahe aviye vahe, apirēhi vahe oyeupe nara yuvireco curi tecovesa supi eté vahe rereco água.

Timoteo cuaitarā ipa vahe

²⁰ Timoteo, esāro tupri co porombohesa supi tupri vahe Tūpa ombou vahe ndeu. Ereyapisacai rene ava tēi pihañemoñetasa ēgüe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe. ²¹ Ipipe sui niha amove ava oyaví Tūpa reroyasa yuvireco.

Aviye, yande Aposar tandem rovasa. Aipo rupive.

PABLO REMBICUACHIA IMOÑUVIRIOSA TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tūpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cūritei oime yandeu Jesucristo rese yande recose. Yande Ru Tūpa iyavei yande Yar Jesucristo tombou oporovasasa, oporoparaisuerecosa nde reco tupri āgua ndeu.

Pablo oyocuai Timoteo Cristo recocuer mombehu āgua

³ Che yeroqui pāhuve, chemahenduha nde rese pītu, ari yacatu rupi. “Aviye ndeu” ahe Tūpa upe nde recocuer rese. Che aporaviqui tupri ité Tūpa rese che pihañlemoñeta tuprisa pipe yepi inungar che ramoi eta oyapo yuvireco aracahe. ⁴ Ndacheresarai eté acoi nde yaseho agüer sui. Iyavei oroepia pota tēi che yembovharete āgua. ⁵ Supi eté chemahenduhaño ité nde Tūpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipindar ēgüe ehi yuvireco. Evocoiyase ayeroyaño ité nde rese, nde avei ēgüe erese.

⁶ Sese che oromonguerēhi embouvicha catu co Tūpa ombou vahe ndeu acoi amondose che po nde harive; ahe ereco catu ndeyeupe. ⁷ Esepia, Tūpa nomboui siquyesa yandeu. Ahe rumo ombou yande reco moviracuasa, poroaisusa, iyavei yande mbopihañlemoñeta tupri āgua. ⁸ Evocoiyase eresiquiye eme catu yande Yar recocuer mombehu. Nderechī chiaveira che roquendasua sui tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosaña co mbahe-mbahe tēi Tūpa pīratasa pipe. Ahe oura ndeu ñehesa pīsirosa resendar mombehusa sui. ⁹ Tūpa niha yande pīsiro iyavei yande renoi yande reco tupri āgua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tūpa ité yande raisu yipisuive ivi apo vīteēhiseve. ¹⁰ Cūritei rumo ahe omboyecua oporoaisusa yande Pīsirosar Jesucristo ouse, acoi ou vahe co ivi pipe manosa pīratasa recopi āgua. Iyavei ñehesa pīsirosa pipe avei oicua uca tecovesa ndopai vahe.

¹¹ Tūpa niha che cuai co ñehesa mombehu āgua. Che cuai avei apóstol che reco āgua iyavei che porombohe āgua. ¹² Sese niha che opacatu aiporara co mbahe-mbahe tēi vichico. Nachi eté rumo yande Yar rese che yeroyasa pipe. Esepia, aicua ahe vireco pīratasa acoi ñehesa ombou vahe cheu imocañiēhi āgua acoi Jesús yevi āgua rupi eté.

¹³ Erecoveño ité porombohesa aviye vahe che suindar, iyavei eicoño ité Tūpa rese nde yeroyasa pipe iyavei poroaisusa yareco vahe pipe Cristo rese yaicose. ¹⁴ Esārō avei co ñehesa avīye vahe Tūpa ombou vahe ndeu Espíritu Santo reco pīratasa pipe yareco vahe yandeyese.

¹⁵ Ereicua niha co ava opacatu Asia pipendar oyepepiño che sui yuvireco. Ipāhuve yuvirecoi mbia ñuvirío, ahe serer: Figelo, Hermógenes.

¹⁶ Yande Yar tomondo paraisuerecosa Onesíforo mu upe. Esepia,

Onesíforo setá yupagüer che mboviha. Iyavei nochí eté ava rovaque che roquendasa sui.¹⁷ Ouse rumo Roma ve, ndopituhui eté che reca.¹⁸ Yande Yar tomondo oporoparaisuerecosa chupe ahe ari pipe curi. Iyavei nde ereicua tupri ité ahe mbia yande pítivii vahe Efeso ve.

2

Jesucristo sundao oyemoviracua vahe

¹ Iyavei nde no, che rahir, eyemoviracua mbahecusa Jesucristo ombou vahe pipe ndeu. ² Acoi che porombohesa eresendu vahe ava rehi rovaque amondo vahe ndeu, embohe tupri mbia oyeroya vahe, oicatu vahe avei ambuae mbohe água.

³ Nde eyemoviracuaño teco asi upe Jesucristo uve nara inungar sundao oyemoviracua vahe ité. ⁴ Ñepei yepe sundao ndosirii eté ocuaita sui. Esepia, ahe oyemoingatu voi eté ocuai água güerecuar upe. ⁵ Iyavei iguayi rai vahe, ndoipisii chira porerecosa oguayi tupriëhi pipe. ⁶ Iyavei yande inungar que ava oñotí vahe mbahe, ahe rane omonuha güemiti yaviyese oyeupe yepi. ⁷ Eyapisaca tupri co che ñehe rese. Yande Yar niha osenducua uca tuprira opacatu co mbahe ndeu.

⁸ Iyavei no ndemahenduha Jesucristo rese. Ahe niha ocuerayevi vahe. Iyavei aracahendar mborerecuar David suindar secoi. Co niha ñehesa ñepisirosa resendar amombehu vahe vichico. ⁹ Co ñehesa mombehusa sui tēi che mombaraisu yuvireco. Che roquendasave aviyé oporapichi vahe che rereco yuvireco. Túpa Ñehengüer mombita rumo ndoicatu eté yuvireco. ¹⁰ Sese che añemosáño opacatu mbahe-mbahe tēi upe opacatu Túpa rembiporavo recocuer aviyé água rese ‘tovireco catu pisirosa porañete, apirëhi vahe Jesucristo rese yuvireco’ che yapave.

¹¹ Co niha supi tupri vahe:

Yamanose Cristo rese, ahese yaicove aveira sese.

¹² Yañemosase mbahe tēi upe, ahese yande yaicora mborerecuar imborerecuasave ipiri.

“Ndaicuaj Jesucristo” yahese, ahese ahe avei,

“Ndopocuaj vahe” ehiñora yandeu.

¹³ Yepe co cotí tēi yarovara yande recocuer seroyaëhisave, ahe rumo ndovirovai chietera güeco ñvisa.

Esepia, ndoicatui, “Ndahei che ahe aico” ehi vaherã.

Ava osé tupri vahe güecoñhasa Túpa upe nara

¹⁴ Emomahenduha yuvireco co ñehesa rese, iyavei eyocuaj Túpa rovaque: topoi ñehopoepi-episa sui yuvireco, co ñehopoepi-episa ñgue ehi tēi vahe. Esepia, omomara ambuae ava osenduse iñhehe rai yuvireco.

¹⁵ Eyapo tupri mbahe opacatu nde catugüer rupi nde recocuer mboyecua água Túpa rovai inungar oporavíqui tupri vahe, nochí vahe. Ñgue ere, eporombohe tupri ñehesa supi eté vahe rese. ¹⁶ Eyepepi ñehe tēisa, ñgue ehi tēi vahe sui. Esepia, co nungar ñehesa tēi ombouvicha catu mbahe naporai vahe. ¹⁷ Iyavei iporombohesa rai oyembouvicha inungar caracha vai ndocuera catui vahe, oyembouvicha-vichaño yepi. Ñgue ehi Himeneo, Fileto ¹⁸ oyaví porombohesa supi eté vahe sui yuvireco.

“Opa cuerayevisa. Ndipo iri chira” ehi tēi yuvireco. Ipípe Jesús reroyasar oipihañemoñeta rerova yuvireco. ¹⁹ Túpa rumo omundo mbahe moviracua tupri água, sese icuachiasa aipo ehi vahe: “Yande Yar oicua

it  oyeupendar ava" ehi, iyavei, "Opacatu yande Yar rer vireco vahe, toyepepi mbahe naporai vahe sui yuvireco yepi" ehi.

²⁰ Oi guasu pipe, ndahei guarepochi, oro apopri g era o oime, oime avei  irape,  aihu apopri avei no.  epei iporupir  ari imboeteisa pipe nara, ambuae rumo ari rupi iporupir . ²¹ Acoi ava o emoatiro vahe co tecocuerai sui T pa upe nara, ahe ipehasa inungar vaso oro apopri poromboeteisa pipe iporupir ; ahe ava oyemoingatu voi et  oico mbahe icatupri vahe apo  gua T pa upe.

²² Eyepepi mbia ch hivahe piha mo eta rai t isa sui. Emohivi tupri o it  nde recocuer sereco. Eyeroya o it  T pa rese. Esaisu catu avei ava, eico avei nde reco tupri pipe, inungar Jesucristo reroyasar oyapo opiha mo eta tuprisa pipe yuvireco. ²³ Eremboyeroyai rene  hesa porandu-randu t isa,  gue ehi t i vahe. Ereicua niha ichui t i oime yeamotar hisa yepi. ²⁴ Iyavei yande Yar rese oporavi i vahe, ndiyai oyecop  o he pipe yuvireco. Iyacatu rumo, aviyera secocuer opacatu upe, oporombohe tuprira, o emosan ora ombahe mboasi hisa pipe oico. ²⁵ Iyavei omboaracuara g eco asi hisa pipe acoi ava ndiporeroyai vahe. Esepia, aviyeteramo T pa osecu arora ipiha mo eta raisa oyeupe yevi iri  gua: ipipe sui porombohesa supi et  vahe oicuara yuvireco. ²⁶ Ipip  sui avei toyemopoase, toyuv nose Caruguar pov i sui semimbotar apo iri hi  gua.

3

Mara ehira ava ar  ipa vahe pipe curi

¹ Iyavei tereicua ar  ipa vahe yepotasa, ahese oimera tecocuer yavai catu vahe. ² Ahese ava ahe ae t i oyeaisura yuvireco, guarepochi t i oipota raira, oyemboivate aira, oyemboetei ai t i aveira. O he raira T pa rese yamotar hisave. Nomboyeroyai chira oyesupa yuvireco. Set  aveira, "Aviye ndeu" ndehi vahe ava upe. Iyavei nomboetei chira T pa rese piha mo etasa yuvireco. ³ Ndosasui chira oyesuindar yuvireco. Ni eroi chiaveira oyeupe yuvireco. Iyavei imahechiroi aira. No emosai chira mbahe t i apo  gua yuvireco. G eco asi pipe avei yuvirecoira. Iyavei opacatu mbahe aviye vahe oyamotar hira yuvireco. ⁴ Iyavei omondere ava yamotar himbar upe, ndiporomboetei chira g emimbotar apo yuvireco. Iyavei oyemboivate aira yuvireco, osecara g emimbotar t i oyembovi   gua yuvireco. Ipip  rumo T pa ndosasui chira yuvireco. ⁵ Ahe inungar-ra T pa rese it  yuvirecoi vahe vi a. T pa p ratasa rumo nomboyeucuai chietera g embiapo pipe yuvireco oyese.

Sese nde, eyepepi  evoco nungar ava sui. ⁶ Esepia, evoco nungar ava p ahuve oime yuviroque o t i vahe o i rupi cu a ndoicatui vahe angaipa rerecosar mbopa  gua. Esepia, ahe cu a opiha mo eta raisa pipe yuvirecoi vahe. ⁷ Yepe oyapisaca tupri t ira  hesa rese yuvireco vi a, ndosupiti et  rumo co porombohesa supi et  vahe renducua  gua yuvireco. ⁸ Inungar co ava ipaye vahe Janes, Jambres serer vahe oyemboyere Mois  amotar hi yuvireco,  gue ehi avei evoco ava porombohesa supi et  vahe amotar hisar yuvireco. Ahe oyemomara vahe opiha mo eta rai pipe yuvireco. Ndoviroyai et  Jesus porombohesa yuvireco. ⁹ Ndoporombopa iri chira rumo yuvireco. Esepia, opacatu ava oicuara yuvireco imbahecua hi rese, inungar co  uvir o mbia Mois  amotar himbar yuvirecoi aracahe.

Timoteo cuaitarã ipa vahe

¹⁰ Nde rumo che reco rupi tupri ité ereico. Esepio, ereroya tupriño ité che porombohesa, che pihañemofietasa, che Cristo rese yeroyasa, che reco mbegüesa, che poroaisusa iyavei che ñemosasa ¹¹ opacatu mbahe tẽi porarasa rese. Nde niha ereicua opacatu mbahe tẽi oime vahe cheu co tecua guasu, Antioquía ve, Iconio ve, Listra ve avei no, iyavei che paraíusa mara-mara tẽi che rerecose yuvireco. Yande Yar rumo che písiru opacatu evoco mbahe-mbahe tẽi sui. ¹² Supi eté opacatu acoi Jesucristo rese güecocuer vireco pota vahe oiporarara mbahe-mbahe tẽi yuvireco. ¹³ Ava secocuer naporai vahe rumo, iporombopa serai vahe avei ombouvicha catura güecocuerai; oporombopa-mbopa tẽira yuvireco. Iporombopasa pipe rumo ambuae omboyevira chupe.

¹⁴ Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepio niha, nde mbohesar ereicua. ¹⁵ Iyavei eyemomahenduha co rese: nde chihivahé suive ité niha ereicua Túpa ñehe icuachiapri eico. Ahe niha nde mombahecua vahe nde písiru água Jesucristo reroysa pipe. ¹⁶ Opacatu co ñehesa icuachiapri ou vahe Túpa sui, avíye ai eté porombohe água, iyavei poromboyapisaca água, poromboaracua tupri água iyavei ava upe ñehe tupri água secocuer mohivi água yepi. ¹⁷ Ichui, ava Túpa rese yuvirecoi vahe oyemoingatu voira opacatu tecocuer tupri apo água yuvireco.

4

¹ Iyavei no, co rese che orocuai pota Túpa rovaque, Jesucristo rovaque avei acoi ou vaherã omborerecuasa reseve oicove vahe, omano vahe recocuer rese porandu água. ² Emombehu Túpa Ñehengagüer ari rupi. Erova ité ava reco. Eporomboaracua, epromongueréhi tupri avei opacatu nde reco asiéhisa pipe. ³ Esepio, coiye ava ndosendu pota iri chira porombohesa avíye vahe yuvireco. Ahese güemimbotar tẽi osecara ombohe água, güemimbotar tẽi avei omombehu ucara oyeupe yuvireco. ⁴ Iyavei oyepepíra co mbahe supi eté vahe sui. Viroyara rumo opacatu ava remimombehu tẽi yuvireco. ⁵ Nde rumo, ererecoveñora nde aracua tuprisa. Eñemosaño mbahe naporai vahe upe. Ndehañeco catu ñehesa písirosa resendar mombehu água. Emboaviye tupri avei opacatu nde poravíquisa.

⁶ Viroyi ari che retecuer mondo água manosave inungar mbahe seropovéhepri yande Yar upe. ⁷ Ayapopa che recoeté pipe che poravíquisa aviye vahe che amotaréhimbar pâhuve. Amboaviye che cuaita. Ndayepepii eté che yeroyasa sui. ⁸ Cûritei che rârò ivave co porerecosa che poravíqui aviye vahe resendar. Yande Yar mborerecuar seco ñvi vahe niha omboura cheu ahe ari pipe. Ndahei chira cheu güeraño. Ombou aveira opacatu Cristo raisusa pipe iyevisa osâro vahe upe yuvireco.

Pablo, “Eyu rane che repia” ehi Timoteo upe

⁹ Ndepoyava catu eyu che repia. ¹⁰ Esepio, Demas che reya co mbahe ñvi pipendar tẽi potasave, ichui tẽi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve. ¹¹ Lucas güeraño oicove che piri. Eseca Marcos, tou nde rupi che pítivii água mboravíqui rese. ¹² Tíquico amondo tecua Efeso ve. ¹³ Acoi ereyuse, eru avirave che

yemboyohasa aseyá vahe Troas ve Carpo rētave. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴ Alejandro, guarepochi mombesar, oyapo mbahe tēi cheu. Yande Yar rumo oicuara sembiapogüer rese chupe. ¹⁵ Iyavei nde eicua catu ichui. Esepia, ahe yande amotarēhi mbahe yande remimombehu rese oico.

¹⁶ Yipindar añehese che yoepi água mborerecuareta rovai, ndipoi eté que che pītiviisar; opacatuño ité che reya yuvireco. Tūpa tiñero sese yuvireco chupe. ¹⁷ Yande Yar Jesucristo rumo che pītivii. Che momirata co ñehesa pīsirosa resendar mombehu tupri água opacatu ava ndahei vahe judío upe. Ëgüe ehi avei che renose mbahe tēi sui. ¹⁸ Ahe che pehara opacatu mbahe-mbahe tēi sui iyavei che pīsirora oyepiri ivave che so água. ¡Ëgüe tehi timboeteisa catu yande Yar apirēhi vahe yepi!

Mahenduhasa opacatu upe

¹⁹ Emombehu che mahenduha Prisca upe, Aquila upe iyavei opacatu Onesíforo rēta pendar upe avei. ²⁰ Erasto opita Corinto ve, Trófimo rumo imbaheasi, evocoiyase aseyá Mileto ve. ²¹ Ndepoyava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

²² Yande Yar Jesucristo toico nde rese. Iyavei Tūpa tape rovasa opacatu pe rereco. Aviye. Aipo rupive.

PABLO REMBICUACHIA TITO UPE TITO

Pablo mahenduhasa Tito upe

¹ Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mundo ãgua sembiporavo eta upe iyavei Tūpa rese pihañemoñetasa supi tupri vahe cua uca tupri ãgua. ² Esepia, tecovesa apiréhi vahe rārosa pipe sui viroyara, oicua aveira yuvireco. Tūpa ndoporombopai vahe niha omombehu co tecovesa mundo ãgua iñi apo vitéhiseve oico. ³ Ichui cüritei ari oyepota yandeu iñehengagüer cua ãgua. Sese Tūpa, yande Písicosar, che cuai oñehengagüer mombehu. ⁴ Tito, co che ñehe aicuachía ndeu; nde niha che rahir ité ereico Jesucristo rese yande recosa pipe. Esepia, oyoya yaroya vahe yaico. Yande Ru Tūpa, yande Písicosar Jesucristo tombou oporovasasa nde reco tupri ãgua ndeu.

Tito poravíquisa caha pāhu Creta ve

⁵ Che oroeaya vitu co caha pāhu Creta ve mbahe opita vité vahe moin-gatu tupri ãgua. Iyavei, “Eiporavo ava, Jesucristo viroya vahe rāro ãgua ñepei-peí tecua rupindar” ahe acoi ndeu cuese. ⁶ Evocoí Jesucristo viroya vahe rārosar toyuvirecoi güeco tupri ãgua. Tipo eme “co oyapo mbahe” ehi-ehi tēi vahe yuvireco oyeupe. Ñepeiño güembireco virecora yuvireco; tahir evocoiyase Jesucristo reroyasar pâvera. Iyavei ndoyuvirecoi chira ndoyemboaracuai vahe nungar oporeroyaëhisa pipe ambuae ava ñeheëhi ãgua sese yuvireco. ⁷ Acoí Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco iñi tupri yuvireco. Iyavei toico eme oporeroyaëhisa pipe, toñemoiro eme avei, ndahei chiaveira caguar tēi; ndivava serai chiaveira, tiguarepochi pota rai eme yuvireco. ⁸ Iyacatu rumo omoinguera ava oyepota vahe güetave oyepiri. Iyavei aviye aira yepi. Osáro tuprira güecocuer. Iyavei taseco iñi güeco catupri pipe Tūpa upe. Tosáro tupri avei opihañemoñetasa yuvireco. ⁹ Iya oyemboya catu oyembohesa supi tupri vahe rese yuvireco. Ipípe sui tomonguerëhi catu ambuae yuvireco co ñehesa maranehi pipe iyavei ambuae seroñrosar pihañemoñeta mohivi ãgua.

¹⁰ Esepia, oime setá nimbahe reroyai vahe; judío “peyembocircuncida pe ñepisiro ãgua” ehi vahe pâhuve oime catu evocoí nungar. Ahe omondo-mondo tēi vahe oñehe, ombopa tēi vahe avei ava yuvireco. ¹¹ Ëgue ehi vahe iyacatu pemonguiriri. Esepia, ahe niha setá ava oñemu vahe omboyerpepi uca porombohesa supi tupri vahe sui yuvireco. Oporombohe mbahe co coti tēi vahe rese guarepochi rereco ãgua tēi yuvireco.

¹² Ñepei mbia, otúpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mimba nungar tēi, icaru ai, yangaipa vai yuvireco yepi” ehi oñehe. ¹³ Supi eté aipo ehi; sese emboaracua pírata ité. Evocoiyase toviroya tupri Tūpa yuvireco. ¹⁴ Iyavei toviroya eme co judío oyesui tēi mbahe omombehu vahe iyavei ava porocuaita tēi yuvireco. Esepia, ahe oyemboyere mbahe supi vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndiporeroi vahe, ipihañemoñeta rai tēi vahe upe rumo, ndipoi eté mbahe nimarai vahe. Esepio, ipihañemoñeta, yaracuasa avei naporai eté. ¹⁶ Iyavei, “Che aicua Tūpa” ehi tupri tēi angahu yuvireco. Mbahe sembiapo rese rumo icuasa seroyaëhisa yuvireco. Ahe niha ava ndosepia potai vahe, ndiporeroi vahe yuvireco, ndoicatui mbahe aviye vahe apo yuvireco yepi.

2

Porombohesa nimarai vahe

¹ Nde ñehe toyoya tupri co porombohesa nimarai vahe rese yepi. ² Evocoiyase mbia otíaro catu vahe Tūpa reroyasar toñearo tupri, imboyeroyapri toyuvirecoi, tosáro tupri güecocuer, tovireco tupri avei Tūpa reroyasa, oporoaisusa. Iyavei güeco mbegüesa pipe toñemosa mbahe-mbahe tēi upe. ³ Ëgüe tehi avei cuña otíaro vahe Tūpa reroyasar yuvireco: güeco tupri tovireco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboycuara güecocuer aviye vahe, ⁴ ombohera cuñatai imer raisu ãgua, imembrí raisu ãgua avei. ⁵ Tombohe avei seco tupri ãgua, iñearo tupri ãgua angaipa sui iyavei sēta pipendar rese hañeco tupri ãgua yuvireco. Tomboaracua avei seco aviye ãgua, imer mboyeroya ãgua avei. Evocoiyase noñehe-ñehe tēi chira ava Tūpa Ñehengagüer rese yuvireco.

⁶ Ëgüe ere avei emonguerëhi mbia chihivahe secocuer rese iñearo tupri ãgua. ⁷ Iyavei emboyecua nde recocuer aviye vahe opacatu mbahe rese yuvireco chupe; nde imbohe tuprisa pipe emboyecua nde reco maranehisa, nde poromboeteisa avei. ⁸ Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoiyase yande amotarëhimbar yuvinochira ndoicatuise, “Mbahe” ohe ãgua yuvireco yandeu.

⁹ Emboaracua avei mbiguai yuvirecoi vahe: toviroya opacatu mbahe rese güerecuar, tomboyeroya imboeteisave, toïñehopoepi eme avei yuvireco. ¹⁰ Iyavei toñomi eme mbahe. Iyacatu rumo seroyaapri tupri yuvirecoira. Evocoiyase opacatu osepiase seco tuprisa, omboeteira yande Pisirosar Tūpa recocuer resendar yembohesa yuvireco.

¹¹ Tūpa niha omboycuua oporoaisusa yandeu. Ahe güeru pisirosa opacatu ava upe. ¹² Co poroaisusa Tūpa suindar yande mbohe mbahe-mbahe tēi iyavei yande remimbotar tēi reya ãgua. Iyavei yande mbohe co ivi pipe yande ñearo tupri ãgua, yande reco ivi ãgua iyavei Tūpa mboetei ãgua. ¹³ Iyavei yasáro yande viharetesa pipe Tūpa omboaviye vaherä güemimombehu, ahe Jesucristo yande Tūpa seco ivaté vahe, yande Pisirosar yevi irisa oporañetes pipe. ¹⁴ Ahe oyemondo oyeyuca uca yande rese yande pisirosar yande opacatu mbahe-mbahe tēi sui yande reco moatiro tupri ãgua. Evocoiyase yande yaico chupe nara güeraño ité yande querëhisave opacatu mbahe aviye vahe apo ãgua.

¹⁵ Evocoi rese erembohera, eremonguerëhira, eremboaracua aveira opacatu nde porocuaita pipe. Sese tipo eme que nde reroñrosar.

3

Jesús reroyasar cuaita

¹ Co rese emomahenduha: toyapo ava mborerecuar guasu porocuaita yuvireco iyavei opacatu ambuae mborerecua-recuarmi porocuaita avei. Iyavei toyemoingatu tupri opacatu mbahe aviye vahe apo âgua yuvireco. ² Toñehe-ñeha tēi eme ambuae ava rese yuvireco. Iyavei tiñemoiro serai eme, toporoaisu, tomboynecua avei güeco mbegüesa opacatu ava upe yuvireco.

³ Esepia, yipindar yande avei ndayande mbahecua yaico iyavei ndayaroyai Tūpa. Ocañi tēi vahe yaico, iyavei yande mbiguai tēi yaico opacatu mbahe yande remibotar apo pipe; iyavei yaseca-seca mbahe tēi vahe yande yemboviha âgua. Iyavei yaicoño mbahe tēi pipe, yaipotaño tēi ambuae ava mbahe, yamotaréhimbri yaico iyavei yandeyeupe ae-ae yayeamotaréhi. ⁴ Ipare rumo Tūpa, yande Písrosar, omboynecua güeco tuprisa, oporoaisusa opacatu ava upe. ⁵ Yande písiro, ndahei rumo yande rembiapo aviyesa sui, ahe rumo vireco oporoparaisuerecosa yandeu nara. Ichui omoatiro yande recocuer yande reco mopiasu. Iyavei Espíritu Santo pipe yande recocuer recuñaro tecove piasu rereco âgua. ⁶ Iyavei yande Písrosar Jesucristo rembiapo sui Tūpa ombou catu oEspíritu Santo yandeu, ⁷ ipipe yande reco ai sui yande renose yande reco ïví tupri âgua oporoaisusa pipe ‘toipisi co tecovesa apiréhi güemiaro yuvireco’ oya.

⁸ Aipo ñehesa supi eté vahe. Che aipota sese ereporombohera. Ipípe Tūpa reroyasar toyapo mbahe aviye vahe yuvireco. Evocoí ñehesa aviye ité opacatu oiporu valherâ yuvireco. ⁹ Ereyepepíra rumo opacatu co nungar mbahe sui: yipindar ñehesa yepoepí tēisa sui, ipare aracahendar ava recocuer rese ñehesa sui. Ereyepepí aveira ipromoñemoiro serai vahe sui, Moisés porocuaita resendar sui tēi ñehopoepí-episa sui avei. Esepia, evocoí nungar mbahe ëgüe ehi tēi vahe.

¹⁰ Acoi ava omoimese yemboyahosa Tūpa reroyasar pâhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui. ¹¹ Tereicua evocoí nungar ava oyaví vahe güecocuer yepi, ahe ae oyemocañi vahe oangaipa pipe oico.

Tito upendar ñehesa

¹² Acoi amondose Artemas, anise Tíquico ndeu, eyu pihaivi che repia tecua Nicópolis ve. Esepia, aheve apita pota sôhisva vahe pituhu râro. ¹³ Eipítivii opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoiyase toyuviraso tupri oguatasa rupi; tipane eme que mbahe chupe yuvireco. ¹⁴ Iyavei ambuae Jesús reroyasar eipe pendar toyembohe avei yuvireco mbahe tupri apo âgua iyavei ava mbahe chupe ipane vahe pítivii âgua. Evocoiyase secocuer aviye itera yuvirecoi.

Mahenduhasa iyavei porovasasa ipa vahe

¹⁵ Opacatu yuvirecoi vahe cohabe che píri omondo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tūpa tape rovasa eipeve opacatu. Aipo rupive.

PABLO REMBICUACHIA FILEMÓN UPE FILEMON

Pablo mahenduhasa Filemón upe

¹ Che, Pablo, che roquendasas Jesucristo recocuer sui tēi. Aicuachía co che ñehe yande rivri Timoteo reseve ndeu, Filemón. Nde niha ore rembiaisu iyavei ore ndugüer ité Tūpa upe mboravíqui apo água ereico.

² Iyavei amondo co cuachiar yande reindrí Apia upe, Arquipo upe avei. Ahe avei yande ndugüer mboravíqui apo água Tūpa upe nara yuvirecoi, iyavei opacatu Jesús reroyasar nde rētave oñemonuha vahe upe nara.

³ Yande Ru Tūpa, yande Yar Jesucristo tombou oporovasasa, güeco tuprisa avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tūpa upe che yeruresa pipe nde rese yepi. ⁵ Esepiá, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. ⁶ Aporandu Tūpa upe nde rese nde ereyeyoyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya. ⁷ Cherorivete, ayemongueréhi catu opacatu nde poroaisusa rese. Che rivri, nde niha eremongueréhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai água viña. ⁹⁻¹⁰ Che rumo aporandu ndeu nde poroaisusa rese mbahe aviye vahe apo água co nde rembiguagüer Onésimo upe nara. Che niha Pablo, acuacuami vichico. Cûritei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohaye che roquendasave.

¹¹ Aracaco co nde rembiguai secoise nde piri, égüe ehi tēi vahe secocuer ndeu viña. Cûritei rumo égüe ndehi iri chira oico ndeu, iyavei cheu no. ¹² Amboyeví co imondo ndeu eipeve. Eipisi inungar-ra che itera viña. ¹³ Che aipota opita vaherā nde nungar tupri che pítivi água viña, co soquendapri vite che recose Jesucristo ñehengagüer sui. ¹⁴ Che rumo ndaipotai mbahe apo nde pihañemoñetasa cuáehi viteseve. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe. ¹⁵ Aviyeteramo Onésimo oyapepí pucu raimi nde sui oyeví iri vaherā nde piri nara. ¹⁶ Ndahe iri chira mbiguai tēi. Ahe rumo aviye catu itera mbiguai güeco agüer sui. Esepiá, yande rivri niha yande rembiaisu secoi cûritei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprira saisusa pipe yande rivri nungar tupri ité yande Yar upe nara.

¹⁷ Inungar nde rivri che rereco eve. Égüe ere tupri aveira co mbia pisi.

¹⁸ Acoi oyapose mbahe ndeu, anise virocuase que mbahe nde sui, cheu emombehu. Che evocoiyase amboepira ndeu. ¹⁹ Che Pablo, aicuachía che po pipe ité seroya tupri água, ahe co amboepira ndeu; che nde mbohesa pipe sui ereroya yande Yar. Ipípe inungar ireve vahe égüe ere cheu. Che rumo, “Ndereve cheu” ndahei eté ndeu. ²⁰ Supi eté, che rivri,

eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mbovihā catumi eve.

²¹ Che aicuachía ndeu. Esepiá, aicua nde ereyapo tuprira aipo che porandusa, iyavei ereyapo catu itera co sui. ²² Iyavei amoha Tūpa che renose vaherā che roquendasa sui pe yeruresa pipe che so ãgua eipeve pe repia. Sese emoingatumí avei che pituhu ãgua.

Mahenduhasa, porovasasa ipa vahe

²³ Che ndugüer, Epafras, omondo omahenduhasa ndeu. Ahe avei soquendapri coháve yande Yar Jesucristo recocuer rese. ²⁴ Iyavei Marcos, Aristarco, Demas, Lucas che ndugüer oporavíqui vahe Tūpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

ICUACHIAPRI HEBREO YUVIRECOI VAHE UPE HEBREOS

Guahir Jesucristo pipe Tūpa oyemboycua yandeu

¹ Aracahe suive setá yupagüer Tūpa omombehu uca yande ramoi eta upe oñehe mombehusar upe. Iyavei ambuae mbahe rupi oseca imombehu tupri ãgua yuvireco chupe. ² Cûritei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité. ³ Ahe niha Vu Tūpa recocuer porañetesa secoi. Êgue ehi eté, ahe Vu recocuer tupri ité. Ahe opacatu mbahe omoviracua oñehe píratasa pipe. Yande angaipagüer sui yande moatiro pare oso, oguapi Vu acato coti oñi ivave cute.

Tūpa Rahir seco ivate catu Vu rembiguai iva pendar sui

⁴ Tūpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborerecuasa ivate catu vahe ichui. ⁵ Esepia, Tūpa aipo ndehi eté güembiguai upe:

“Nde che Rahir ereico; co pipe amondo nde recove ãgua” ndehi eté.

Iyavei:

“Che Tu aicora, ahe evocoiyase che rahir secoira” ndehi avei chupe.

⁶ Ichui rumo ombose Guahir ñepei vahe co ïvi pipe aipo ehi:

“Tomboetei opacatu che rembiguai yuvireco”

ehi. ⁷ Evocoiyase güembiguai rese oñehe Tūpa aipo ehi icuachiapri aracahendar pipe:

“Ayapo che rembiguai ivitu nungar, tata nungar avei cheu oporavíqui vaherã” ehi.

⁸ Tahir rese ñehesa rumo aipo ehi icuachiapri aracahendar pipe:

“Che Yar Tūpa, nde mborerecuasa rumo apirëhi vaherã ité.

Ereporocuai nde reco ïvi tuprisa pipe yepi.

⁹ Mbahe ihïvi vahe raisusar ereico.

Iyavei mbahe naporai vahe raisuëhisar.

Sese nde Yar Tūpa ité, nde poravo, omondo avei torivetesu ndeu ivate catu vahe opacatu nde mboetasu sui” ehi.

¹⁰ Iyavei aipo ehi iri:

“Nde, ore Yar, yipisuve eremoviracua vahe ïvi.

Nde ité avei ereyapo iva.

¹¹ Opacatu co nde rembiapo opa vaherã tẽi,

inungar turucuar cuacua oyearo vahe opa.

Nde rumo apirëhi vaherã ité ereico.

¹² Ipare ereyapara inungar turucuar yapaprí iyavei eresecuñarora inungar oturucuar osecuñaro vahe.

¡Nde rumo ndereñecuñaroi chietera!

Iyavei nde recocuer ndopai vaherã ité” ehi.

¹³ Ndahei que ñepei iva pendar güembiguai upe Tūpa aipo ehi:

“Eguapi che acato coti, ahese che amondora nde amotarëhimbar nde povriva” ehi.

¹⁴ Esepia, opacatu Tūpa rembiguai espíritu yuvirecoi chupe oporavíqui ãgua, icuaipri avei ava ipísiropirã pítivi ãgua.

2

Yandemahemoha tuprira yande p̄isirosa rese

¹ Sese iyacatu co ñehesa yasendu vahe rese yayapisaca tupri catu co tecocuer piasu sui yande yepepiëhi ãgua. ² Esepio, co Tüpa rembiguai remimombehuguer seroyapri ité secoi, iyavei oyemboangaipa vahe, ndovíroyai vahe avei imombaraisupri ité sembiapo rupi yuvirecoi arac-ahe. ³ ¿Mara yahera pña evocoiyase yande yañemi Tüpa ñemoirosa sui viña acoi ndayandemahemoha tupriise co yande p̄isirosa aviye vahe rese? Esepio, yande Yar ahe rane ité omombehu co ñehesa ñepisirosa resendar. Ipare sendusar, “Supi eté co ñehesa” ehi yuvireco. Ichui ahe avei omombehu yuvireco yandeu. ⁴ Iyavei Tüpa oyapo setá mbahe yavai rai vahe poromondiisa ndayasepiai vahe. Iyavei oEspíritu Santo pipe, omboyoavirati mbahecusa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

Jesucristo ava nungar tupri secoi

⁵ Ndahei güembiguai povrïve omondo Tüpa ivi oime vaherä, acoi oromombehu vahe pëu. ⁶ Oime rumo icuachiapri aracahendar pipe omombehu tupri vahe:

“Che Yar, ¿uma vo evocoiyase ava?

¿Mahera ndemahenduha ava tēi rese, iyavei eresäro no?

⁷ Ndaseta ariimi erereco ivi coti catu nde rembiguai sui.

Ipare voi rumo eremondo nde porañetesava imboeteisave chupe.

⁸ Iyavei opacatu erereco uca mbahe nde rembiapo ipovrïve” ehi imombehu.

Égüe ehise Tüpa, ndoseyai eté que ñepi yepe mbahe ipo pendarëhi. Cûritei rumo ndaopacatu tupri vîtei mbahe ipovrïve. ⁹ Yaicua niha Jesùs, ahe Tüpa güembiguai sui ndaseta araviter ivi coti catu vireco. Oporoaisusa pipe oipota imano ãgua opacatu ava repirä. Cûritei rumo iyemombaraïsu pare, omondo oporañetesava imboeteisave chupe.

¹⁰ Iyavei opacatu mbahe oime Tüpa upe, ichuindar avei ‘toyuviroique opacatu che rahir che reco porañetesave’ oyapave. Sese omombaraisu uca Guahir Jesucristo ‘tomboaviye tupri rane che remimbotar Poropisirosar güeco ãgua’ oya. ¹¹ Esepio, opacatu vireco ñepi Vu yuvireco co seco catupri vahe, seco mbocatuprisar avei. Sese Tahir nochí eté, “Che rivireta peico” ohe ãgua viroyasar upe. ¹² Ahe aipo ehi icuachiapri aracahendar pipe:

“Añehera nde rese che rivireta upe.

Asapucai aveira sapucaisa ndeu opacatu ava ndeu oñemonuha vahe pâhuve” ehi.

¹³ Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tüpa rahir cheu ombou vahe rese” ehi icuachiapri pipe aracahe.

¹⁴ Inungar ava vireco vahe guahir, oyoya soho, suvi; égüe ehi avei Jesùs vireco voho, vuví yande nungar; omano pipe sui omocañi vaherä iporoyuca ai vahe píratasa; ahe Caruguar. ¹⁵ Opacatu ava manosa sui osiquiyesa pipe mbiguai tēi nungar yuvirecoi vahe güecove viteseve, evocoi nungar sui senose ãgua, égüe ehi Jesùs. ¹⁶ Esepio, ahe ndoui Tüpa

rembiguai pītvii ãgua, ahe rumo ou Abraham suindareta pītvii ãgua. ¹⁷ Sese niha tivreta nungar tupri ité oyapo Tūpa, “Toime che rovaque pahi rerecuar ivate catu vahe seco tupri vahe; taseco mbegüe avei, tomondo güetecuer ava angaipa repirā ñeroisa reime ãgua” ehi. ¹⁸ Esepio, ahe avei oiporara Caruguár poroãtoisa. Sese cûritei ahe oicatu ité ava Caruguár remiatoi pītvii ãgua.

3

Jesús ivate catu vahe Moisés sui

¹ Evocoiyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secoi yandeu apóstol iyavei pahi ivate catu vahe yande yeroyasa. ² Ahe ité niha omboaviye tupri Vu remimbotar, osenoise imbou co tecocuer apo ãgua inungar Moisés omboaviye tupri ocuaita Tūpa mbahe rāro aracahe. ³ Jesús rumo imboeteipri catu Moisés sui. Inungar acoi oi aposar imboeteipri catu oi sui secoi. ⁴ Esepio, ñepei-peí oi vireco oaposar viña. Tūpa rumo opacatu mbahe aposar secoi. ⁵ Supi eté Moisés Tūpa rembiguai güeco pipe omboaviye opacatu oporavíquisa itúparo rese. Esepio, omombahu Tūpa omboyecua pota vahe ava upe yepi. ⁶ Cristo rumo tahir güeco pipe omboaviye ocuaita Vu túparo rese. Ahe túparo yande yaico yayeroyaño itese Cristo rese iyavei yasároño itese yande yembovihasa pipe co mbahe aviye vahe oime vaherā yandeu curi.

Mbituhusa Tūpa upendar yuvirecoi vahe upe

⁷ Sese inungar aipo ehi Espíritu Santo icuachiapri aracahendar pipe: “Co pipeve voi, pesenduse Tūpa ñehe,
⁸ peyepihamoatai rene catu chupe, ndapeicoi chira ava ndiava reroyai vahe nungar acoi iví iporupiréhisa rupi Tūpa recoãhasar yuvirecoi vahe aracahe.
⁹ Aheve avei acoi che recoãha tēi pe ramoi mbahe güembiapo pipe, yepe cuarenta aravíter rupi osepio tēi mbahe che rembiapo yuvireco viña.
¹⁰ Sese añemoiro ahe ava upe, aipo ahe:

‘Ipihañemoñeta rai co coti tēi vahe rese yepi iyavei ndoicua potai eté che recocuer yuvireco’ ahe chupe.
¹¹ Sese che añemoiro ahe ava upe, ‘Ñepei reseve ndapepituhui chietera che pituhusa pipe’ ahe yuvireco chupe” ehi aracahe.

¹² Che rivireta, peñearo catu; tipo eme que ñepei ipihañemoñeta naporai vahe Tūpa reroyaéhisa pipe oyepepi vaherā ichui. ¹³ Iya rumo peyemongueréhí catu ñepei-peí arí yacatu rupi cûritei pe recove pipe angaipa upe pe yembopa uca iriêhí ãgua, pe mbahe reroya iriêhí ãgua rese avei.
¹⁴ Esepio, yayemoviracua tuprise Cristo rese yande yeroyasa yipisuive yareco vahe pipe yande mano ãgua rupi eté, ahese yaico itera sese.

¹⁵ Supi niha acoi aipo ehi ñehe:
“Co pipe voi pesenduse Tūpa ñehe,
peyepihamoatai rene catu chupe; ndapeicoi chira ava ndiava reroyai vahe nungar” ehi vahe.

¹⁶ ¿Ava pīha acoi ava iñehe mara vahe yuvireco Tūpa ñehe rendu pare chupe? Moisés remienose Egípto iví sui ñgue ehi yuvireco. ¹⁷ ¿Ava upe pīha acoi Tūpa oñemoiro cuarenta aravíter rupi? Acoi oyemboangaipa vahe omanopa vahe yuvireco iví iporupiréhisa rupi. ¹⁸ ¿Uma upe pīha acoi

ñepei reseve, “Ndapeiquei chietera che pituhusa pipe pe pituhu água” ehi Tūpa? Acoi víroyaéhisar upe aipo ehi. ¹⁹ Sese yaicua seroyaéhi pipe ndoicatui yuviroique ipipe.

4

¹ Oime vite Tūpa remimombehu yande yaique vaherā ipiri yande pituhu água. Sese iya ité yañearo tupri. Aní chira que ñepei pe pāhu pendar ndoiquei chira. ² Esepia, yandeu avei imombehusa ñehesa poropísirosa resendar inungar yande ramoi upe ivi iporupiréhi rupi yuvireco arac-ahe. Co ñehesa rumo ndoipítiví eté ahe ava yuvireco. Esepia, ahe osendu yuvireco seroyaéhisave tēi. ³ Yande rumo yaroya vahe, yaiquera yande pituhu água, ahe chupe Tūpa aipo ehi:

“Sese añemoiro ahe ava upe; ñepei reseve,

‘Ndoyuviroiquei chietera che pituhusa pipe opituhu água yuvireco’ ahe” ehi.

Tūpa rumo yipive ité opaomboaviye oporavíquisa iva, ivi. ⁴ Esepia, co imbosietesa ari resendar ñehesa oime icuachiapri aracahendar pipe:

“Tūpa opituhu opacatu oporavíquisa sui imbosietesa ari pipe” ehi.

⁵ Iyavei aipo ehi iri icuachiapri pipe:

“Ndoyuviroiquei chietera che pituhusa pipe opituhu água yuvireco” ehi.

⁶ Ipane vite rumo amove ava yuviroique vaherā ahe pituhusave. Acoi yipindar osendu tēi vahe rumo ñehesa poropísirosa resendar, ndoyuviroiquei eté seroyaéhisa pipe yuvireco. ⁷ Sese Tūpa omombehu tupri iri ambuae ari, chupe ité, “Co pipe” ehi. Ahe acoi coiyé mbor-erecuar guasu David upe omombehu ucase aracahe yandeu icuachiapri pipe, aipo ehi vahe:

“Co pipe voi, pesenduse Tūpa ñehe,

peyepihamoatai rene catu chupe” ehi vahe.

⁸ Ehi revo Josué omondose co pituhusa israelita upe aracahe viña, Tūpa evocoiyase noñehe iri chira co ambuae ari rese viña. ⁹ Evocoiyase oimeño itera mbituhusa iporavopri ava Tūpa upendar upe nara: ¹⁰ Acoi oique vahe evocoiyase pituhusa pipe, opituhu oporavíquisa sui inungar Tūpa opituhu ombahe mboaviye pare aracahe. ¹¹ Sese yayemoviracua catura yande reique água evocoi mbituhusa pipe. Aní chira ava aracahendar seroyaéhisar recocuer rupi tupri avei yaicora.

¹² Esepia, Tūpa Ñehengagüer oicove vahe, ipírata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande aviterve; ñegüe ehi avei ñehengagüer oñatoí eté yande hā, yande espíritu avei. Iyavei omboyecua tupri ité yande piñáñemoñeta. ¹³ Ndipoi eté niha mbahe Tūpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

Jesús niha pahi ívate catu vahe secoi

¹⁴ Jesús, Tūpa Rahir, pahi ívate catu vahe secoi yandeu oique vahe ívave Tūpa piri. Sese yayemoviracuaño itera sese yande yeroyasa pipe. ¹⁵ Esepia, yande pahi ívate catu vahe oicuaño ité yande recocuer pírataéhisa. Ahe avei niha yande nungar aracaco víroparaisu opacatu mbahe-mbahe tēi güecoähasa. Ahe rumo ndoyemboangaipai eté ipipe. ¹⁶ Sese yayemboya catura yande yeroyasa pipe yande Ru Tūpa rese.

Esepio, ahe yande raisu ité. Ipipe sui tayande paraisuereco güeco aviyesa pipe yande pítivii âgua mbahe tēi oimese yandeu.

5

¹ Opacatu pahi ivate catu vahe iporavopri secoi ava pâhu sui ava recocuer reropovëhe âgua Tüpa upe iyavei porerecosa mundo âgua chupe, mbahe mimba yucapri reropovëhe âgua avei ava angaipa repirâ. ² Ahe pahi niha oiporara avei teco asisa ambuae ava nungar. Sese güeco asiëhisa pipe oipitivii ava ndayaracuai vahe, oyavi vahe avei. ³ Ahe rumo güeco pírataëhisa pipe viropovëhe mbahe mimba yucapri Tüpa upe oangaipa repirâ, opacatu ambuae ava angaipa repirâ avei. ⁴ Ndiyai chira que ava oyesui tēi pahi oyeapo. Tüpa ité rumo osenoira imboetei uca âgua inungar acoi Aarón upe aracahe. ⁵ Ëgüe ehi avei Cristo, ahe noñeenoi pahi ivate catu vahe güeco âgua oyesui tēi. Tüpa ité osenoi imboetei uca âgua acoi aipo ehise:

“Nde che rahir ereico, co pipe amondo nde recove âgua” ehi.

⁶ Aipo ehi avei ambuae icuachiapri pipe:

“Nde ereico pahi ivate catu vahe apirëhi vaherâ, inungar tupri mbia Melquisedec serer vahe” ehi.

⁷ Co ivi pipe Cristo oicove vitese, oyeroqui pírata oyasehosa pipe Vu Tüpa upe yepi. Esepio, ahe oicatu ipísiro âgua manosa sui. Ëgüe ehi iporeroya tuprisa pipe, Tu osendu iyeroqui yepi. ⁸ Yepe Tahir ité viña, güeco paraisu pipe rumo oyembohe imboyeroya âgua; ⁹ evocoiya güeco pipe omboaviye güeco catuprisa. Ipipe sui güeru poropísirosa ndopai vahe opacatu viroyasar upe nara. ¹⁰ Esepio, Tüpa niha osenoi pahi ivate catu vahe seco âgua inungar Melquisedec aracahe.

Peicua catu, “Ndaroyai eté co tecocuer piasu” pe hesa sui

¹¹ Orovireco vite mo setá mbahe ore ñehe âgua pêu co mbahe tecocuer resendar rese. Yavai etepri rumo imombehu tupri âgua. Esepio, pe ndapesenducua tupri vitei eté. ¹² Aracacove peporombohera viña; peipota vite rumo pêu mbahe ndayavaimi vahe imombehu iri âgua yembohesa Tüpa suindar. Ndapeyemoviracuai rumo; peihu iri pota cambi mbahe sâta vahe hu râgürer sui. ¹³ Esepio, acoi ëgüe ehi vahe pítani osi rese ocambu vite vahe nungar tēi pe recocuer. Ipipe sui ndapeyembohei eté Tüpa Ñehengagüer rese mbahe tupri pe reco âgua. ¹⁴ Co tembihu sâta vahe rumo ahe ava ocuacua vahe upe nara. Esepio, ahe oyembohe tupri catu iñehengagüer rese güeco tupri âgua yepi. Ipipe sui oicua ité mbahe aviye vahe poravo mbahe naporai vahe sui.

6

¹ Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tüpa suindar co mbahe rese yembohe iri râgürer sui. Ahe yipindar vahe co: yande ñecuñarosa, yande reco ai sui yande poisa, manosa apirëhi vahesave yande rerasoëhi âgua, iyavei Tüpa rese yande yeroyasa, ² yembohesa poroäpiramosa resendar, po mondosa Tüpa reroyasar harive, omano vahe cuerayevisa iyavei ava recocuer rese porandusa resendar avei. ³ Tüpa oipotase yayembohera ambuae mbahe yavai catu vahe rese.

⁴ Acoi ava yipindar osenducua vahe Tūpa remimbotar, osāha vahe avei Tūpa suindar porerecosa iyavei oyandu ité Espíritu Santo güecocuer pipe, ⁵ osāha vahe avei Tūpa Ñehengagüer aviyé vahe iyavei osāha chihí ipíratasa curi oime vaherā viña, ⁶ oyepepise rumo ichui, ndayaicatu iri seco reroyevi iri água Tūpa upe. Esepiá, yaticapri nungar iri eté vireco Tūpa Rahir iyavei ambuae ava omoñehe-ñehé tēi iri sese. ⁷ Esepiá, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoiyase evocoí nungar ava oipisira porovasasa Tūpa suindar. ⁸ Ahe ivi rese yu pâve tēi oyesuse, ahe naporai eté. Evocoí nungar ava Tūpa poromocañisavríe tēi, sapipirá tēi avei yuvirecoira curi.

Yande remiaro aviyé vahe yande moviracua tupri vahe

⁹ Che mborípar saisupri, yepe aipo orohe pēu viña, oromoha ité rumo mbahe aviyé catu vahe pēu co ñepisirosa pare. ¹⁰ Esepiá niha, Tūpa seco aviyé vahe, ahe ndasesarai chietera pe rembiapo aviyé vahe sui pe poroaisusa pemboyecua vahe peipítiviise seroyasar. Ahe niha co peyapoño vite peico. ¹¹ Ore rumo oroipotaño ité ñepei-peí pe pemboyecuaño itera arí cañí rupi eté co pereco vahe pe queréhisa pe remiaro aviyé vahe rupití água. ¹² Ndoroipotai pe atéhisa perecora co tecocuer upe. Oroipota rumo pe saquicue moñara acoi ava yande Yar rese oyeroya pipe iyavei güeco ñemosasa pipe oipisi vahe porerecosa imombehupri Tūpa sui.

¹³ Peyemomahenduha acoi Tūpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepiá, ndipoí eté ambuae ivate catu vahe ichui ëgüe ehi vaherā. Sese ahe güerer ité osenoi ¹⁴ aipo ehi chupe: “Supi eté oroovasa itera, iyavei setara ava nde suindar” ehi. ¹⁵ Evocoiyase Abraham osáro güeco mbegüesa pipe, ëgüe ehi ipisi oyeupendar Tūpa remimombehu. ¹⁶ Ava omoingatu potase oñehe, ivate catu vahe rer pipe omoingatu yuvireco yepi. Ëgüe ehise yuvireco, ndiya iri eté ipare oñehe vitera sese. ¹⁷ Tūpa güerer pipe ité omoingatu oñehe omombehuse güemimbotar aracahe ‘toicua tupri che remimombehu pisí água che ñehe ñepei reseve vahe yuvireco, iyavei amboaviyé itera che remimombehu chupe’ oyapave aipo ehi aracahe. ¹⁸ Ëgüe ehi oime ñuvirío mbahe imboyepoepipiréhi: Tūpa niha ndoporombopai vahe ité, ipipe avei yande mongueréhi catu yande yaseca vahe iporopítiviisa iyavei yayeroya vahe ñearosa yandeu ombou vahe rese. ¹⁹ Co mbahe yasáro vahe omoviracua tupri yande hā, inungar mbahe carite guasu mombitasa omoviracua tupri carite ivitu sui. Ëgüe ehi yande remiaro oique turucuar guasu tūparo asiasa cupeve oí imaranehí catu vahesave ivave. ²⁰ Aheve Jesús oique yande raperá mboí água. Ëgüe ehi ahe apiréhi vahe ité pahi ivate catu vahe güeco água, inungar tupri Melquisedec aracahe.

7

Jesús pahi Melquisedec nungar tupri ité

¹ Co Melquisedec aipo mborerecuar guasu Salem pendar, iyavei pahi Tūpa ivate catu vahe upendar secoí aracahe. Abraham oyevise peri rupi ovavasa sui ou mborerecuar guasu eta momba pare, ahese aipo osé voi eté oso Abraham rovaíchi Tūpa porovasasa mondo água chupe. ² Iyavei

aipo Abraham omondo oporerecosa vavasa sui mbahe güeru vahe diez vahe sui ñepei-peí chupe. ‘Mborerecuar guasu seco ívi vahe’ oyapave Melquisedec ehi. Iyavei ahe mborerecuar Salem pendar, ahe tecua Salem ‘mbahe tupri’ oya; sese mborerecuar guasu mbahe tupri vahe secoi. ³Ahe iyesupa rumo ndicuasai eté iyavei ichi, tamoi, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tüpa Rahir recocuer; ahe pahi apírëhi vahe ité.

⁴Peyapisaca tupri co mbia recocuer rese: ivate ité secoi aracahe. Yande ramoi Abraham teiteté avei omondo diez sui ñepei-peí mbahe porerecosa mborerecuar guasu eta sui güembierocua chupe. ⁵Moisés porocuaita pipe rumo opacatu Leví suindar pahi eta yuvirecoi vahe vireco ité ocuaita opacatu ava sui diez sui ñepei-peí iporavíquimi rerocua áqua yuvireco. Abraham suindar ité niha ëgüe ehi yuvireco. ⁶Yepe Melquisedec ndahei Leví suindar viña, ahe rumo oipisi ité Abraham sui evoco porerecosa; Abraham, ahe acoi oipisi vaherä mbahe Tüpa remimombehu. Ëgüe ehi Melquisedec Abraham rovasa. ⁷Supi eté sovasapri sui oporovasa vahe ivate catu secoi yepi. ⁸Evoco levita suindar oipisi ava poravíqui reprí diez sui ñepei-peí. Ahe ava rumo omano vaherä tēi yuvirecoi. Icuachi-apri aracahendar pipe rumo Melquisedec serer vahe oicoveño vahe ité. ⁹Ndoyavii evocoiyase opacatu pahi eta Levi suindar omondo vahe porerecosa Abraham rupive chupe yuvireco viña. ¹⁰Esepia, Abraham oyeseve vité Levi oyeshindar vireco, evocoiyase ihaëhi viteseve oyeopia Melquisedec rese yuvireco aracahe.

¹¹Ava israelita yuvirecoi vahe oipisi mborocuaita pahi levita sui yuvireco; ahe Aarón suindar yuvirecoi. Supi etese rumo ava virecose Tüpa suindar güeco catuprisa evoco mborocuaita reroya pipe viña, evocoiyase ndoyemboycuau chietera ambuae pahi viña. Ndahei chira rumo ahe Aarón nungar, ahe Melquisedec nungar itera. ¹²Esepia, Tüpa osecuñaro evoco pahi cuaita, osecuñaro aveira supive mborocuaita; ¹³iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramoi suindar. Ahe ichui acoi ndipoi eté osë vahe ambuae pahi. ¹⁴Esepia, icuapri ité yande Yar Judá suindar secoise. Iyavei Moisés noñehei ahe ichuindar turi vahe rese oñehese pahi cuaita rese.

¹⁵Iyavei co oyecua tupri catu itera, oyecuase pahi ipiasu vahe Melquisedec nungar. ¹⁶Ahe rumo ndahei porocuaita “uma sui osëra pahiguä” ehi vahe sui oique pahi güeco áqua; güecocuer pírata ndopai vahe reseve oique. ¹⁷Esepia, Tüpa ité aipo ehi oñehese sese:

“Nde pahi apírëhi vaherä ité ereico inungar Melquisedec” ehi.

¹⁸Sese mborocuaita aracahendar opa ité. Esepia, ahe nimiratai, ndayande pítivii eté. ¹⁹Esepia, Moisés porocuaita ndosecocuer mbo-catupri eté ava. Yande rumo yasäro mbahe aviye catu vahe yande recocuer uve nara. Supi niha yayemboya Tüpa rese.

²⁰Tüpa rumo oñeho omoingatu ñepei reseve güerer pipe. Ambuae pahi rumo ndahei ñepei reseve senoipri yuvirecoi Tüpa rer pipe. ²¹Yande Yar rumo Tüpa osenoi ñepei reseve güerer pipe pahi seco áqua icuachiapri pipe aipo ehise chupe:

“Yar Tüpa osenoi ñepei reseve, sese nosecuñaro chietera:

‘Nde pahi apírëhi vaherä ité ereico’ ehi”

ehi icuachiapri pipe. ²² Sese Jesús rese yaicua Tūpa omboaviyera güemimbotar ipiasu vahe yandeu aviyé catu vahe yipindar vahe sui. ²³ Yipindar setá pahi yuvirecoi. Opa-opaño rumo omano. ²⁴ Jesús rumo nomanoi vahe ité, sese nomondoi chietera pahi güecosa ambuae upe. ²⁵ Sese ahe oicatu ité ñepei reseve viroyasar Tūpa rese oyemboya vahe písiro água apiréhi. Esepio, ahe oicove vaherá ité apiréhi oyeroquí vaherá Vu Tūpa upe sese.

²⁶ Supi eté Jesús pahi ivate catu vahe secoi. Evoco nungar niha ipane ité yandeu yipindar. Ahe ndaseco marai vahe, ndoyapoi vahe mbahe tēi güeco maranehispa pipe, ndahoyoyai avei ava angaipa viyar rese, iyavei ahe ivate catu vahe iva pendar sui. ²⁷ Ndahei eté ambuae pahi eta nungar secoi, ndoyuca ranei ari yacatu rupi mbahe mimba Tūpa upe seropovéhe água yipindar oangaipa rese, ipare opacatu ambuae angaipa rese. Ñepei reseve ité rumo güete viropovéhe opacatu ava angaipa repirā. ²⁸ Moisés porocuaita rupi iporavopri pahi ivate catu vaherá ava ndahei seco tupri vahe; Tūpa rumo Moisés porocuaita pare osenoi ñepei reseve Guahir seco catupri vahe ‘tasecoi pahi ivate catu vahe apiréhi vaherá ité’ oya.

8

Jesús Tūpa remimbotar ipiasu vahe omoime yandeu

¹ Co rupi eté oroyepota ore remimombehu mbahe aviyé catu vahe upe. Yareco ité evocoi nungar pahi ivate catu vahe. Ahe oguapi Vu acato coti omborerecuasa pipe ivave oí. ² Aheve pahi secoi oporaviquí Vu rēta supi eté vahe pipe. Ahe ivave ité yande Aposar rembiapo, ndahei ava tēi rembiapo.

³ Opacatu pahi ivate catu yuvirecoi vahe senoisa mbahe oporerecosa iyavei mbahe mimba yucapri viropovéhe vaherá Tūpa upe yuvireco. Sese Jesucristo avei vireco mbahe viropovéhe vaherá Vu Tūpa upe. ⁴ Ahe secoise co ivi pipe viña, ndahei chietera pahi secoi viña. Esepio, cohabe oime viite ité pahi mbahe viropovéhe vahe Moisés porocuaita rupi yuvireco. ⁵ Co ivi pipendar pahi rumo ihañeco iva pendar rahanga rese tēi yuvireco. Yaicua niha ahe sahanga tēi. Esepio, Moisés oyapo potase tūparo, Tūpa aipo ehi chupe: “Emahecua tupri acoi ivitrive amboyecua vahe rese nde. Ahe inungar tupri eyapo” ehi chupe. ⁶ Yande pahi ivate catu vahe rumo, Jesús, vireco ocuaita aviyé catu vahe ambuae pahi sui. Esepio, Tūpa remimbotar ipiasu vahe Jesús güeru vahe yandeu aviyé catu vahe ité yipindar vahe sui iyavei sesendar Tūpa remimombehu aviyé catu vahe avei.

⁷ Esepio, yipindar Tūpa remimbotar oicatuse yande recocuer recuñaro água viña, ndipoi chira ambuae semimbotar ipiasu vahe yandeu viña.

⁸ Tūpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe:

“Yande Yar aipo ehi:

‘Oimera ari ayapo iri água che remimbotar ipiasu vahe ahe Israel pendar upe, Judá pendar upe avei.

⁹ Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui, nomboaviyei eté rumo che porocuaita yuvireco. Sese apoi ichui’ ehi yande Yar Tūpa.

10 'Co ari pare rumo na ahera che remimbotar apo Israel pendareta upe' ehi yande Yar Tūpa,

'Amondora che porocuaita iyapisacasa pipe, aciuachía aveira ipihañemoñetasa pipe.

Evocoiyase che iTūpa aicora; ahe evocoiyase cheundar yuvirecoira.

11 Nombohe iri chira ondugüer, omu avei che cua uca ãgua yuvireco.

Esepio niha, opacatu chihivahe catu vahe sui,

ava ocuacua catu vahe avei che cuara yuvireco.

12 Iyavei cheñero aveira mbahe tēi sembiapoguer rese yuvireco chupe; ndayemomahenduha iri chiaveira yangaipaguer rese' ehi yande Yar"

ehi icuachiapri pipe aracahe. 13 Oñehese Tūpa güemimbotar piasu rese, omombehu yipindar vahe cañi ãgua; chihimi tēi ipane icañipa ãgua.

9

Tūparo ivi pipendar iyavei tūparo ivi pendar

¹ Evocoiyase yipindar Tūpa remimbotar vireco ava cuaitarã iñemonuha ãgua Tūpa mboeteisa pipe iyavei vireco tūparo co ivi pipendar. ² Ahe tūparo pipe na ehi mbahe imoingatusa: yipindar oí Nimarai Vahe serer. Ipipe oime vera renda iyavei mesa pan sovasapri Tūpa upendar reseve. ³ Imoñuviriosa turucuar tūparo asiasa cupeve oime ambuae oí, ahe serer Nimarai Catu Vahe. ⁴ Aheve oime itaisi rapisa renda oro apopri, aheve avei oime Tūpa porocuaita ríru oro pipe yaopri. Ahe ipipe oime cambuchi oro apopri ahe tembihu maná ríru, ipipe avei oime Aarón pococa ahe sorí vahe, iyavei mborocuaita cuachiapri ita ipe vahe rese oime ipipe. ⁵ Ahe mborocuaita ríru haríve oime Tūpa rembiguai rahanga oyovai yuvinohai, "Tūpa oime ité cohaye" he ãgua. Ahe ipepo oyopi tupri Tūpa porocuaita ríru rovapisa yuvireco. Co rupive revo amombehura co mbahe pẽu.

⁶ Evocoí nungar mbahe moingatupri pare, pahi eta yuviroiqueño yipindar oí asiapri pipe ari rupi ocuaita apo ãgua. ⁷ Imoñuviriosa oí pipe rumo pahi ivate catu vaheño oique ñepei reseve ñepei-peí aravíter pipe, iyavei güeique yacatu viroique mbahe mimba ruví viropovéhe vaherã Tūpa upe oangaipa rese, ava icuaéhi pipe angaipa oyapo vahe reprirã avei. ⁸ Co rese Espíritu Santo oicua uca yandeu avaño tēi ndiya vitei eté oique ipa vahe oí imaranehi catu vahe pipe Tūpa rovai oime vitese yipindar oí yasiapri. ⁹ Co opacatu mbahe yande mbohe mbahe cûriteindar rese. Esepio, co porerecosa iyavei mbahe seropovéhepri aheve Tūpa upe, nomoatiroi eté imboeteisar piñañemoñetasa. ¹⁰ Ahe rumo carusa, ihusa, ñemoatirosa nungar mbahe resendar tēi; yande retecuer resendar tēi porocuaita. Ahe rumo ëgue ehiñomi tēi yuvireco Tūpa remimbotar ipiasu vahe yu ãgua renonde.

¹¹ Poropísicos rumo ou cute. Iyavei ahe ité cûritei yande pahi ivate catu vahe secoi mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tēi, ahe rumo aviye catu ité iyavei ndahei eté co ivi pipe yapopri. ¹² Cristo rumo oique ité imaranehi catu vahesave ivate. Ndahei rumo ovesa iyavei guaca rahir ruví reropovéhe ãgua, ahe rumo viropovéhe vuví ité opacatu rese; ëgue ehi ahe ñepei reseve oique apiréhi vahe ñepisirosa reime ãgua yandeu. ¹³ Supi eté guaca cuimbahe ruví iyavei ovesa ruví, guaca cuña tanimbu acoi imondopri

vahe ava seco mara vahe rese, ahe avei vireco raimi tēi pīratasa ava rete moatiro ãgua. ¹⁴ Cristo ruvi rumo vireco catu ité pīratasa. Esepio, Cristo, Espíritu apirēhi vahe pipe, oyemondo ahe ae Tūpa upe inungar mbahe seropovēhepri nimarai vahe, iyavei suv i yande pihañemoñetasa moatiro opacatu yande rembiapo ai manosave yande rereco vahe sui Tūpa oicove vahe upe mbahe apo uca ãgua yandeu.

¹⁵ Sese Jesucristo secoi Vu remimbotar ipiasu vahe moingatusar ava reru ãgua Tūpa upe omano pipe. Ip̄ipe sui oime fieroisa oyemboangaipa vahe yipindar mborocuaitavrive yuvirecoi vahe upe ‘toipisi che rembiporavo yuvireco oyeupendar mbahe apirēhi vahe che remimombe-hugüer rupi’ oya. ¹⁶ Que ava oicua ucase güemimbotar ombahe mundo ãgua omano renondeve, icuasa tupri ranera rumo imanosa semimbotar apo ãgua renonde. ¹⁷ Esepio, ndiya vītei eté omano vaherā recove viteseve mbahe imondosa iyarā upe. Imanore voi rumo aviyē imondosa. ¹⁸ Sese yipindar vahe Tūpa remimbotar yaposa mbahe mimba ruvi piyere pipe. ¹⁹ Esepio, Moisés omombehupase mborocuaita opacatu ava upe, oipisi ovesa ragüer pīra vahe iyavei ivira hisopo serer vahe rāca, ahe omoaquí guaca rahir ruvi iyavei ovesa rahir ruvi, i rese oyeseha vahe pipe. Ip̄ipe opa osipii cuachiar mborocuaita resendar, opacatu ava avei. ²⁰ Evocoiyase aipo ehi icuachiapri pipe: “Co mbahe ruvi oicua tupri uca co porocuaita Tūpa ombou vahe omboyeroya ãgua pēu” ehi. ²¹ Mbahe mimba ruvi pipe avei opa Moisés osipii tūparo iyavei opacatu mbahe ipipendar iporupri. ²² Porocuaita rupi eté tuvi pipe seni opacatu mbahe oñemoatiropa Tūpa rovaque; ndipoi eté ñeroisa angaipa upe mbahe ruvi piyerepri poréhise.

Tūpa upe güete reropovēhe pipe Cristo omocañi angaipa

²³ Iyacatu ité imoatirosa evoco nungar mbahe mbahe mimba seropovēhepri ruvi pipe. Esepio, co mbahe iva pendar nungar tēi sahangaposa; iva pendar ité rumo ipotasa seropovēhepirā mbahe aviyē catu vahe evoco sui. ²⁴ Esepio, Cristo ndoquei tūparo oi imaranehi catu vahe ava rembiapo pipe tēi. Esepio, ahe iva pendar rahanga tēi. Ëgüe ehi rumo ahe oique ité ivave. Aheve cūritei secoi Tūpa rovai yande pītvii ãgua oyeroqui pipe. ²⁵ Judío pahi ivate catu vahe niha ñepei reseve oique aravíter yacatu oi imaranehi catu vahe pipe mbahe ruvi tēi reropovēhe ãgua; ndahei rumo vuv i té viropovēhe. Cristo rumo ndoyeeropovēhe pih Tūpa upe. ²⁶ Ëgüe ehise rumo, yipisuive omano pihira viña. Cūritei rumo oyemboyecua co ipa ari rupi ñepei reseve, apirēhi vaherā viropovēhe ãgua güete Tūpa upe ‘tocañipa angaipa’ oya. ²⁷ Supi eté opa rane itera ava omano yuvireco, ipare voi ñepei reseve oimera porandusa. ²⁸ Indó, Cristo oyeeropovēhe ñepei reseve opacatu angaipa mocañi ãgua. Ipare rumo oyevi irise ou, ndahei iri chira angaipa recocuer rese. Ahe rumo oyevira ou guārosar pīsiro ãgua.

10

¹ Esepio, Moisés porocuaita mbahe aviyē vahe ou vaherā rahanga tēi, ndahei ahe eté vahe ité. Sese ahe porocuaita ndoicatui eté ava Tūpa rese oyemboya vahe reco mohivi tupri ãgua mbahe seropovēhepri aravíter ya-catundar pipe tēi. ² Porocuaita oicatuse pe angaipa sui pe moatiro tupri ãgua, ndapeyandu iri chira pe angaipa viña iyavei pahi ndoviropovēhe

iri chiaveira mbahe ruví Tūpa upe yuvireco viña no. ³ Co seropovēhepri rumo yande momahenduha uca ãgua tēi yande angaipagüer rese aravíter yacatu. ⁴ Esepia, mbahe mimba ruví tēi nomocañii eté yande angaipa yande sui.

⁵ Sese Cristo co iví pipe ouse, aipo ehi Tūpa upe:
 “Ndereipota iri niha mbahe mimba tēi porerecosa seropovēhepirā ndeyeupe, nde rumo ereyapo che retecuer evocoí nungarā.”
⁶ Ndahei niha nde piha rupi mbahe rapiprī mbahe mimba yucapri ndeu seropovēheprí ñepei reseve angaipa moçañi ãgua.

⁷ Evocoiyase che aipo ahe:
 “Che ayu nde remimbotar apo ãgua, che Ru Tūpa, che resendar icuachi-apri remimombehu rupi tuprī mboaviye ãgua’ ahe” ehi.

⁸ Yipindar aipo ehi, Tūpa ndoipotai eté, iyavei ndahei ipiha rupi mbahe mimba reropovēhepri, porerecosa mbahe sapiprī avei angaipa mboyeho ãgua, yepe ahe mborocuaita rupi seropovēhesa viña. ⁹ Ipare aipo ehi: “Che ayu nde remimbotar apo ãgua” ehi. Ahe ipipe omombopa yipindar vahe mbahe seropovēhepri co ambuae mbahe ipiasu vahe apo ãgua. ¹⁰ Tūpa evocoiyase yande peha angaipa sui oyeupe nara. Esepia, Jesucristo oyapo ité semimbotar mbahe ñepei reseve apirēhi vaherā güete mondo pipe.

¹¹ Opacatu judío pahi eta ari yacatu oyapo ocuaita iyavei mbahe mimba avei-vei viropovēhe Tūpa upe yuvireco. Yepe ahe viropovēhe tēi yuvireco viña, nomocañi catui eté rumo angaipa. ¹² Jesucristo rumo oyeeropovēhe ñepei reseve angaipa repirā apirēhi vaherā. Ipare oso ivave, oguapi oí Vu acato coti. ¹³ Aheve osáro oí Vu Tūpa opase voi omondo yamotaréhíbar ipovrive. ¹⁴ Esepia, ñepei reseve oyeeropovēhe pipe osecomohívi tuprī Vu Tūpa rembipeha apirēhi vaherā. ¹⁵ Iyavei Espíritu Santo aipo ehi tuprī avei icuachiapri aracahendar pipe yandeu:

¹⁶ “Co ari pare rumo na ahera che remimbotar apo chupe’ ehi yande Yar Tūpa, ‘Coíye amondora che porocuaita ipihañemoñetas pipe, amondo aveira iyapisacasa pipe’ ehi.

¹⁷ Ndayemomahenduha iri chietera yangaipagüer rese iyavei mbahe tēi sembiapogüer rese yuvireco” ehi aracahe.

¹⁸ Ëgue ehi angaipa rese oimese ñeroisa, ahese ndiya iri seropovēhesa mbahe angaipa repirā.

Yayemboya catura Tūpa rese

¹⁹ Sese che rivireta, iya ité cûrитеi yande reique ãgua Tūpa rovai yande siquieëhisa pipe Jesucristo ruví pipe sui. ²⁰ Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tûparo pipe asiasa turucuar yande reique ãgua Tūpa rovai. Ahe turucuar inungar Jesús rete. ²¹ Iyavei ahe yande pahi ivate catu vahe ité secoi Vu Tūpa rëta rârosar; ²² sese yayemboya catura Tūpa rese yande pihañemoñeta tuprisa pipe iyavei yande yeroysa ipa voi vahe pipe. Supi eté ahe opa yande reco mbocatuprī yande pihañemoñeta raisa sui iyavei omoatiro yande rete i maranehi pipe. ²³ Yayemoviracua catura mbahe avije vahe yande remiaro pipe yamombehu vahe ava upe yande pihañemoñeta rerovaëhisa pipe. Esepia, Tūpa omboaviye itera mbahe güemimombehugüer yandeu. ²⁴ Iyavei yasecañora ñepei-peí yañepítivii

vaherā yande yeaisu catu ãgua iyavei mbahe tupri apo ãgua yandeyeupe. ²⁵ Ndayamopanei chira yande ñemonuhasa Tüpa upe. Ndayaicoi chira omopane vahe nungar, iya rumo yayemongueréhi catura ñepei-peí yandeyeupe. Esepia, viroví ari yande Yar yeví iri ãgua.

²⁶ Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovëhepirã evocoí yande angaipa repirã yande; ²⁷ Tüpa ñemoirosa ipírata vahe güeraño oimera yande iyavei tata guasu apírëhi vahe opara omocañi Tüpa amotarëhimbar yuvirecoi vahe. ²⁸ Ava Moisés porocuaita ndoviroyai vahe que ñuvirío, anise mbosapi rembipepiave, ahe secocuer mombehuse, ahe yucapri ité saisuëhisa pipe yuvirecoi. ²⁹ Peyapisaca tupri co rese: ipírata catu oimera Tüpa ñemoirosa tahir reroïrosar upe curi iyavei acoi ava vireco vahe suví inungar mbahe ëgue ehi tẽi vahe iyavei viroiro tẽi vahe guaisusar Espíritu, chupe avei oimera Tüpa ñemoirosa ipírata catu vahe. Esepia, co tuví rese niha seroyapri ité Tüpa remimbotar. Ipipe avei niha ahe ava Tüpa rembipeha yuvirecoi. ³⁰ Yaicua niha yande Yar aipo ehise: “Che ité asepíra, sembiapo ai amboyevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapögür rese ava oyeupendar upe” ehi. ³¹ ¡Mbahe tẽi eté yaiquese Tüpa oicove vahe ñemoirosa pipe!

³² Peyemomahenduha acoi aracaco co tesapesa nungar supi eté vahe pisi ramose, peyemoviracuaño ité pe recoâhaha upe pe yemombaraísusa pipe. ³³ Esepia, acoi amove pe pâhu pendar rese iñehe-ñehe tẽi yuvireco, mara-mara tẽi avei pe rereco opacatu ava rovaque. Ambuae pe pâhu pendar evocoiyase peipítivii pe yemombaraísusa rese. ³⁴ Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosáño avei pe viharetesa pipe peico. Esepia, peicua ivave perecora mbahe aviye catu vahe iyavei apírëhi vahe. ³⁵ Sese pemocañi tẽi eme Tüpa rese pe yeroyasa. Esepia, evocooya pe recosa pipe omoime ucara mbahe tupri pêu curi. ³⁶ Pe rumo peyemoviracuaño itera mbahe-mbahe tẽi upe Tüpa remimbotar apo ãgua semimombehugür oime vaherā pisi ãgua curi. ³⁷ Supi eté icuachiapri pipe Tüpa aipo ehi: “Pihaiivi eté oura acoi ou vahevi.

Ndiaracahei chietera.

³⁸ Acoi cheundar seco catupri vahe rumo che rese oyeroyasa pipe oicovera.

Acoi oyepepise rumo che sui, che evocoiyase ndavihai chira sese” ehi aracahe.

³⁹ Yande ndahei oyepepi vahe nungar yaico. Evocoí nungar niha ocañi tẽi vaherā yuvireco. Yande rumo yayeroya sese; ipipe yañepisiro.

11

Tüpa rese yeroyasa

¹ Supi eté yarecose yande yeroyasa Tüpa rese, ahese yaicua ahe ombou itera mbahe yasäro vahe yande, iyavei yaicua ité oime mbahe ndayasepiai vahe. ² Supi eté amove yande ramoi aracahendar upe, “Aviye ité” ehi Tüpa oyese yeroyasa pipe sui.

³ Tüpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cûriteindar mbahe yasepia vahe mbahe ndayasepiai vahe apopri.

⁴ Sese oyeroya pipe Abel viropovēhe oporerecosa aviye catu vahe Caín porerecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerecosa. Yepe Abel omano viña, oimeño vite rumo Tūpa rese yeroya agüer resendar ñehesa.

⁵ Enoc avei Tūpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoëhi viteseve, “Enoc recocuer aviye ai rane ité chupe” ehi icuachiapri aracahendar. ⁶ Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

⁷ Noé avei oyeroya Tūpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoiyase seroyasave oyapo arca oyesuindar písirō ãgua. Iyavei sese oyeroya pipe omombehu ava co ivi pipendar cañi ãgua. Ahe rumo Tūpa rese oyeroya pipe oñepisiro.

⁸ Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vaherā vahesave, ahe amondora ndeu” ehise, ombooyeroyaño ité. Yepe ahe ivi ndoicuai viña, osëño ité rumo oivi sui oso. ⁹ Ipare Tūpa rese oyeroya pipe avei secoiño ité ahe ivi pipe. Ndoyavii ambuae ivi pendar secoi vahe; oí mbahe pirer apopri pipe tēi aheve secoi. Ëgüe ehi tupri avei tahir Isaac iyavei sumino Jacob. Ahe avei oipisi vaherā Tūpa remimombehu ivi yuvireco. ¹⁰ Esepia, aipo Abraham osâroño ité tecua ivave ovíracua vahe. Tūpa niha ahe tecua râhasar, yaposar avei.

¹¹ Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi píratasa Tūpa sui guahi ãgua. Esepia, viroyaño ité Tūpa oñeho omboaviye ãgua chupe. ¹² Evocoiyase yepe Abraham ocuacuami viña, vireco rumo guahir. Ahe ichuindar sehii eteanga coiye inungar yasitata iyavei inungar ivi cuhi para guasu popi rupindar ndayaipapa catui vahe ité.

¹³ Ahe ava rumo opacatu omanopa tēi; ndoipisi eté mbahe semi-mombehugüer oyeupendar. Ahe mbahe amombri rupi osepiañomi tēi yuvireco oyeroyasa pipe, soriveteño avei sese. Ëgüe ehi oicuaño ité ndahei co ivi pipendar güecosa; ahe rumo yuvirecoveño raimi tēi co ivi pipe. ¹⁴ Aipo ehi vahe oicua uca tupri yandeu oseca vite oyeupendar ivi yuvireco. ¹⁵ Ipihañemofletase rumo ivi güeco agüer rese yuvireco viña, oyevi iriño itera aheve avei yuvireco viña. ¹⁶ Ahe rumo oipota ambuae ivi aviye catu vahe yuvireco, ahe iva pendar. Sese Tūpa nochí eté, “Che Ru Tūpa” oyeupe hese. Esepia, vireco ité tecua imoingatupri chupe.

¹⁷ Tūpa rese yeroyasa pipe avei Abraham oyemoingatu voi guahir ñepei vahe Isaac reropovēhe ãgua Tūpa upe güecoãhasa pipe. Yepe Tūpa aipo ehi chupe aracahe viña: ¹⁸ “Nde rahir Isaac sui setá oimera nde suindar” ehi. ¹⁹ Esepia, oicua ité Tūpa vireco píratasa ava omano vahe mbogüerayevi iri ãgua. Evocoiyase imano râgüler sui eté oipisi iri guahir aracahe. Ahe evocoiyase omboycua mbahe yandeu.

²⁰ Tūpa rese oyeroya pipe avei Isaac osovasa Jacob, Esaú avei mbahe oime vaherā pisi ãgua.

²¹ Iyavei Tūpa rese oyeroya pipe avei Jacob omano pota ãgua, osovasa ñepei-peí José rahir. Ahese opococa rese tēi eté oyemovíracua oyeroqui ãgua Tūpa upe imboeteisa pipe.

22 Tūpa rese oyeroya pipe avei José, omano água renonde, aipo ehi: "Yande mu israelita opara yuvinose ivi Egípto sui curi" ehi. Ipare oyocuai omu oitacuer rerova água aracahe.

23 Tūpa rese oyeroya pipe avei, ohase Moisés, iyesupa oñomi mbosapi yasi rupi yuvireco. Esepia, ahe pítani icatupri ai, iyavei ndoyembosiquiei eté mborerecuar guasu porocuaita yuca água sui.

24 Tūpa rese oyeroyasa pipe avei, ocuacuase Moisés, ndoipotai eté, "Egípto pendar mborerecuar guasu rayri membrí" oyeupe he água.

25 Ahe rumo oipota catu mara-mara tēi güereco água Tūpa reroyasar reseve chīhi rupive mbahe tēi rese yemboviha rágüer sui. 26 Aviye catu ité chupe Tūpa rembiporavo upe nara mbahe tēi porara água Egípto pendar mbahe eta sepírusu vahe rereco rágüer sui. Esepia, ahe oicuaño ité oyeupe nara porerecosa Tūpa ombou vaherā.

27 Tūpa rese oyeroya pipe avei osē ivi Egípto sui osiquiyeëhisa pipe mborerecuar guasu roriëhise. Oyemoviracuaño ité oyese mbahe apo água; aviye osepia vahe ité Tūpa acoi ndoyecuai vahe. 28 Tūpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mimba ruví Tūpa rembiguai oporoyuca vahe ava israelita rahir ipi yucaëhi água.

29 Tūpa rese oyeroya pipe avei ava israelita osasa para guasu Píra Vahe ivi ipiru vahe harí rupi yuviraso. Ipare yamotarëhimbár Egípto pendar, "Égüe yahe avei" ehi yuvireco viña, i rumo opañó oyopi.

30 Tūpa rese oyeroya pipe avei israelita oyerese siete arí rupi tecua Jericó rese, opa ñachisa onduru. 31 Tūpa rese oyeroya pipe avei Rahab, oyemondo-mondo tēi vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güëtave israelita Jericó ivi repiasar.

32 ¡Setá vite ambuae ava recocuer oime amombehu vaherā pẽu! Ipane ité rumo arí imombehupa água: Gedeón, Barac, Sansón, Jefté, David, Samuel iyavei opacatu Tūpa ñehe mombehusar recocuer. 33 Evoco avei Tūpa rese oyeroya pipe osecopi ité ambuae ivi pendar, oporocuai tupri güeco ñvisa pipe, oipisiño ité Tūpa suindar mbahe semimombehugüer yuvireco, oiyurumboyaño avei yaguar, 34 ombogüe avei tata ipírata vahe, oyeepi avei quise pucu pipe oyuca rágüer sui; ava nimiratai vahecuer rumo oyemomirata yuvireco, oyemoviracua ité vavasave oyese; opañó ité oamotarëhisar sundao osecopi yuvireco. 35 Oime amove cuña ipâhuve vireco iri vahecuer omu manosa sui imbogüerayevipri.

Ambuae rumo omanopañó ité teco rasisa pipe, "Yasé catu co nungar mbahe sui" ndehi eté yuvireco cuerayevisa aviye catu vahe pipe güeco água. 36 Ambuae iparaisu catu ava upe oñeeroirosa pipe, onupasa pipe, oapichi-pichisa pipe, voquendas pipe avei yuvireco. 37 Ambuae ita pipe oapi-apisave omano, amove imombitesa ivira asiaasa pipe, anise ambuae yucasa quise pucu pipe, amove ipâhu pendar oguata tēi, ovesa, cavara pirer añomi tēi iyemondesa, iparaisu mbahe porëhi yuvireco nombohe catui ava ipíhañemoñetas pipe sereco iyavei mara-mara tēi vireco yuvireco no. 38 Evoco seco catupri vahe yuvireco ndiyai co ivi pipendar Tūpa cuaparëhi upe vireco vaherā oyepâhuve, ahe oguata tēi ivi iporupirëhisa rupi, ivitrí rupi, mbahecuar rupi avei yuvireco.

39 Yepe ahe opacatu aviye ité Tūpa upe oyeroyasa rese yuvireco viña, ndoipisi eté rumo oyeupe Tūpa remimombehugüer yuvireco.

⁴⁰ Esepio, Tūpa omoime mbahe aviye catu vahe yandeu ‘oyoya tupri toipisi güecocuer ihīvi tupri âgua che remimombehugüer rupi yuvireco’ ohesa pipe chupe, yandeu opacatu avei.

12

Yamahecua tuprira yande yeroysa pipe Jesús rese

¹ Sese yande, yaicuase setá ité evocoí ava oime omboycua vahe Tūpa rese oyeroysa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe. ² Yamahe tupri itera Jesús rese. Ahe ichui niha yareco yande yeroysa Tūpa rese. Ahe avei oyese yande mboporeroya tupri catu. Oiporara curusu rese omano ochiēhisa pipe. Esepio, ahe oicua ité oparaísu pare virecora oviharetesa, oguapise omborerecuasave Vu acato cotí oĩ.

³ Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara tēi güerecose. Sese pecuerai eme Cristo rese peico âgua iyavei, “Ndorequeréhí iri” ndapeyei chira. ⁴ Esepio, pe ndapemano vîtei eté angaipa upe pe yembopihavíracuasa pipe. ⁵ Peresarai eté Tūpa pe mboaracuasa sui tahir ité pe recosa pipe; icuachiapri aracahendar pipe aipo ehi:

“Che rahir, eyemoingatu voiño Yar nde mombaraíusa upe nde reco mohivi tupri âgua, iyavei, ‘Ndachequeréhí iri’ nderei chiaveira chupe ndeu oñeho píratase.

⁶ Esepio, Tūpa osecomohivi tupri ava güembaisu iyavei omombaraisu rane guahir sereco âgua” ehi.

⁷ Peñemosáño catu pe mombaraíusa upe pe reco mohivi âgua. Esepio, Tūpa ëgüe ehise pêu guahir ité pe rereco. ¿Oime pîha que ñepei ava guahir upe noñeho píratai vahe secocuer mohivi âgua? ⁸ Tūpa ndape recocuer mohivise inungar oyapo ambuae guahireta upe yepi, pe evocoiyase inungar-ra chihivahe ndiyesupai vahe, ëgüe peye tēi peico chupe. ⁹ Iyavei, chihivahe tēi vîte yaicose, yande yesupa co iví pipendar yande nupa yande recocuer mohivi âgua, ahese yamboetei. Sese yamboetei catura yande Ru Tūpa iva pendar tecovesa rereco âgua. ¹⁰ Yande yesupa co iví pipendar opihañemoñetagüer rupi tēi yande nupa yaicove raimi tēise co iví pipe; Tūpa rumo yande mombaraísu yandeu mbahe tupri âgua rese yande reco maranehi âgua inungar ahe ndaseco marai vahe. ¹¹ Supi eté yipindar, poronupasa yaipisi ramose, tasi yandeu. Coiye rumo yande imboyeroyasa pipe yayapo catura mbahe ihīvi vahe. Ahe evocoiyase yande recocuer rereco mbahe tupri pipe.

Peicua catu Tūpa ñehe rendu potaëhí sui

¹² Sese pemopoase iri pe reco píratasa iyavei peyemongueréhí iri pe guata âgua yande Yar rupi. ¹³ Ipare peseca peri ihīvi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

¹⁴ Peico catu opacatu ava upe mbahe tupri pipe, peico avei pe reco maranehi pipe. Esepio, ava ndovirecoi vahe güeco maranehi, ndosepiai chietera yande Yar. ¹⁵ Peñearo tupri catu, tipo eme ava ndoipisii vahe Tūpa porovasasa pe pâhuve, iyavei tipo eme mbahe tēi que ava piha

pipe; aviyeteramo opacatu rese ova tiētera. ¹⁶ Tipo eme catu pe pāhu pendar oyemboaguasa tēi vahe. Tipo eme avei ava Tūpa upendar mbahe viroiro vahe pe pāhuve inungar Esaú aracahe. Ahe omondo Tūpa porovasasa oyeupendar tahir ipi güecosa resendar mimoi repirā tēi vīvrí upe. ¹⁷ Iyavei peicua, ipare acoi Esaú oipisi pota Tūpa porovasasa vu sui viña. Ahe rumo ndiya iri eté sovasapirā secoi. Yepe oyasehó iteanga viña, ndiya iri eté rumo mbahe sembierecoví rāgürer mboyeví água chupe.

¹⁸ Peyemboyase Tūpa rese, ndahei inungar pe ramoi israelita aracahendar. Esepia, ahe ivitri Sinaí sese yapoco vahe rese tēi oyemboya vahe yuvireco; ahe ivitri rese sendí ité inungar tata rendiguer; oime pītu, pītumimbi vahe, ivitu ai avei sese. ¹⁹ Iyavei ndapesendui mimbi imoñehepri, Tūpa ñehe avei. Aracahendar rumo osendu ité yuvireco. Ñehe renduse rumo, osiquiyepave ndoipota iri ahe oyeupe ñehe yuvireco. ²⁰ Esepia, ahe oyembosiquiye ité evoco porocuaita aipo ehi vahe sui: “Acoi opíro vahe ivitri rese, yepe que mbahe mimba tēi viña, ahe peyapi-yapi yuca ita pipe, anise lanza pipe avei” ehi. ²¹ Ahe mbahe oyecua vahe aipo oporombosiquiye vahe ité. Evocoiyase Moisés teitet aipo ehi: “Che siquiyepave aríri eté” ehi.

²² Pe rumo peyemboya iva pendar ivitri Sión ve, Tūpa oicove vahe recuave. Ahe tecua Jerusalén iva pendar. Aheve Tūpa rembiguai setá iteanga vahe oñemonuha imboetei água yuvireco yepi. ²³ Iyavei peyemboya opacatu ava Tūpa rahir ipi Cristo reroyasar rese, ahe serer icuachiapri ivave. Peyemboya avei Tūpa rese, ahe niha yande recocuer rese oporandu vahe secoi; iyavei peyemboya ava seco aviye vahe espíritu yuvirecoi vahe rese. Ahe niha Tūpa osecomohívi tupri sereco. ²⁴ Peyemboya avei Jesús rese, ahe omoime yandeu Tūpa remimbotar ipiasu vahe, ahe suví yande moatiro vahe. Ahe aviye catu yandeu Abel ruví sui.

²⁵ Sese peicua catu, “Ndorovíroyai” peye vaherā acoi pēu oñehe vahe upe. Esepia, Moisés reroyaëhisa pipe pe ramoi noñemi eté Tūpa ñemoírosa sui yuvireco, oyeupe, “¡Peicua catu!” ehise co ivi pipe aracahe. Ëgüe ehise chupe yuvireco aracahe, ëgüe ehi catu iri tiētera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu. ²⁶ Tūpa oñehe pipe omboríri eté ivi aracahe; cûritei rumo yandeu aipo ehi: “Che amboríri irira ivi, ndahei chira rumo ivi güeraño, iva avei amboríriira” ehi. ²⁷ ‘Amboríri irira’ aipo oyapave aipo ehi: “Opara mbahe omii vahe omocañi güembiaipo Tūpa ‘topita apirëhi mbahe nomii vahe’ oyapave” ehi. ²⁸ Tūpa mborerecuasa ombou vahe yandeu ahe nomii chietera. “Aviye ndeiu” yahera evocoiyase sese chupe; ipipe sui yayerure catu yande piha pipe chupe imboeteisave semiimbotar rupi. ²⁹ Esepia niha, ahe inungar tata ñepei reseve mbahe omocañipa vahe.

13

Mara yahera Tūpa mbovihá

¹ Ndapepoi chietera pe yeaisusa sui ñepei-peí oyeivri nungar pe recosa pipe. ² Iyavei peresarai eme pe avasa sui ava oyepotase pe piri. Esepia, co nungar apo pipe amove ava omoingue Tūpa rembiguai güëtave icuaëhi pipe.

³ Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tēi serecopri rese. Esepia, aviyeteramo ēgue ehi aveira pēu.

⁴ Pe opacatu pemboetei avei mendas, iyavei peico pe reco maranehispa pipe mendas rese. Esepia, Tūpa oicuara oyemboaguasa tēi vahe upe.

⁵ Ndahei guarepochi tēi peipota raira. Iya rumo peyembovihaño mbahe pereco vahe rese. Esepia, Tūpa aipo ehi: “Ndoroeyai chietera, ndapoi chietera nde sui” ehi aracahe. ⁶ Evocoiyase aipo yahera Yar rese yande yeroysa pipe:

“Che Yar che pītivii, ndasiquiyei chietera ava tēi sui oyapo potase mbahe cheu” yahera.

⁷ Peyemomahenduha pe reroguatasar rese, pēu Tūpa Ņehengagüer mombehusar rese avei. Pepihañemoñeta tupri secocuer rese, seco apri rese avei; iTūpa reroysa agüer rupi tupri avei peico.

⁸ Jesucristo recocuer noñecuñaroí vahe ité, yipisuve secoi apirēhi vahe.

⁹ Peyembopa ucai rene yembohesa co coti tēi vahe upe. Aviye catu yayemomirata Tūpa poroaisusa rese que mborocuaita tembihu resendar sui. Esepia, co nungar mbahe ndovireco ucai mbahe aviye vahe ohusar upe.

¹⁰ Yande rumo yareco ambuae ité Tūpa upe seropovēhepri. Ahe niha ndiyai eté pahi tūparo yipindar yuvirecoi vahe pendar yuvirohu. ¹¹ Supi eté judío pahi ivate catu vahe viroique mbahe ruvi tēi Tūpa rēta oi imaranehi catu vahe pipe seropovēhe ava angaipa rerocua ãguia; ahe mbahe mimba rete rumo osapi tecua ivii yuvireco yepi. ¹² Ēgue ehi avei niha Jesús iparaisu, omano tecua ivii ava reco mbocatupri ãguia vuvi pipe. ¹³ Ēgue yahe aveira yasora Jesús upe yande paraisu ãguia supi ava yande reroirosa pipe yaico. ¹⁴ Supi eté, co ivi pipe ndayarecoi eté tecua apirēhi vahe. Yande rumo yaseca evocoi tecua oime vaherā yandeu curi. ¹⁵ Sese Jesús rembiapo rese iyacatu yamboeteira apirēhi vaherā yande Yar Tūpa. Co imboeteisa inungar mbahe seropovēhepri arí rupi chupe. jĒgue yahera imboetei yande ñehe pipe! ¹⁶ Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovēhepri Tūpa upe. Ahe niha Tūpa oipota.

¹⁷ Pemboyeroya pe cuaisar, peyapo semimbotar. Esepia, ahe ndopituhui eté pe recocuer rāro yuvireco. Esepia, oicua Tūpa oicuara mbahe semiapao rese chupe curi. Sese pemboyeroya catu ‘tayavai eme iporavíquisa chupe; tasorivete oporavíquisa rese yuvireco’ pe yapave. Pemboavaise rumo, nosei chietera mbahe aviye vahe ichui pe recocuer upe nara.

¹⁸ Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave. ¹⁹ Che yevi pihaiivi ãguia rese ité aporandu pe yeruresa rese pēu Tūpa remimbotar rupi.

Mahenduhasa ipa vahe

²⁰ Tūpa mbahe tupri rerecosar, ahe niha ombogüerayevi vahe yande Yar Jesucristo yande rārosar ivate catu vahe, suví pipe omboyecua güemimbotar piasu ndopai vahe imbou yandeu, ²¹ tombou pe reco

mohivisa iyavei pe reco aviyesa opacatu pe semimbotar apo ãgua; iyavei ahe toyapo mbahe opacatu güemimbotar yande rese Jesucristo rembiapo sui. ¡Egue tehi imboeteipri apirëhi tasecoi Cristo yepi!

²² Che rïvireta, peñemosão co che opomboaracua vahe rese, moviro tëi niha co ñehesa aicuachía pëu. ²³ Aipota pe peicua yande rïvrí Timoteo imosesa soquendasa sui. Oyepota pihaivise, arasora cheyeupi che sose pe repia.

²⁴ Pemombehu che mahenduha opacatu ava pe cuaisar upe, opacatu ambuae Tüpa upendar ava upe avei. Iví Italia rupindar avei ombou omahenduhasa yuvireco pëu.

²⁵ Aipo rupive, yande Ru Tüpa tape rovasa opacatu.

SANTIAGO REMBICUACHIA SANTIAGO

Mahenduhasa

¹ Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbahecuada ou vahe Tūpa sui

² Che rivireta, pevhareteñora peico acoi oimese tecoāhasa pēu yepi. ³ Esephia, peicua niha pe poreroyasa rese oimese mbahe tecoāhasa, ahe ipipe peyembohe pe ñemosa água rese peico. ⁴ Peicoño ité pe reco ñemosasa pipe pe reco mohiví tupri catu água. Evocoiyase nipane iri chira mbahe Tūpa suindar pēu.

⁵ Iyavei acoi ipanese que ava pe pāhu pendar upe yaracua água, toporandu Tūpa upe. Evocoiyase ahe omboura chupe. Esephia, ahe opacatu upe mbahe ombou güecatéhiñehisa pipe iyavei ombahe mboasiñehisa pipe avei. ⁶ Iyacatu rumo evocoi ava oporandura Tūpa upe sese oyeroyá pipe, ndahei chira opihañemoñeta rerova-rova tēisa pipe inungar acoi ivitu i ombohitu-hitu tēi vahe. ⁷ Acoi égue ehi-ehi tēi vahe ava ndoipisi chira mbahe yande Yar sui yuvireco. ⁸ Esephia, ñepei arí ipihañemoñeta ñepei mbahe rese, ambuae arí ambuae rese. Ndyoyemoviracuai güeco tupri água rese yuvireco.

⁹ Iyavei que Jesús reroyasar seco mbegüe vahe toyemboviñareteño yepi Tūpa omboeco ivate água rese. ¹⁰ Iyavei mbahe yar secoi vahe pe pāhuve, toyemboviñaviteño Tūpa viroyise seco ivatesa sui. Esephia, mbahe yar yuvirecoi vahe inungar caha potri égue ehi raimi tēi vahe yuvireco. ¹¹ Evocoiyase acoi arí osëse, sacú íteangase, ahese caha opa ipiru; ipotri avei opa ovíapi ichui iyavei iporañetesa opa ichui. Égue ehi aveira ava mbahe yar; omanora oporavíquisa sui.

Tecoāhasa, poroātoisa resendar

¹² Acoi ava oyemoviracua vahe poroātoisa upe oyemboviñahara oico. Esephia, osasa tuprise evocoi poroātoisa, oipisira porerecosa, ahe tecovesa apiréhi vahe Tūpa ombou vahe guaisupar upe. ¹³ Acoi ava oyanduse poroātoisa oyeupe mbahe tēi apo água, “Tūpa revo égue ehi cheu” ndehi chira. Esephia niha, Tūpa átoisar ndipoi eté mbahe tēi oyapo uca va-herá chupe. Iyavei ahe noñatoi avei mbahe tēi apo água ava. ¹⁴ Co rumo ava opihañemoñeta rai upe oñeatoi uca mbahe tēi apo água yepi. ¹⁵ Güemimbotarai pipe evocoiyase oyapo angaipa. Ipare angaipa apo pipe sui ou manosa chupe.

¹⁶ Che rivireta, che rembiaisu, peyembopai rene. ¹⁷ Esephia, opacatu mbahe aviye vahe ahe Tūpa ombou vahe yandeu. Ahe niha opacatu ivi rese mbahe aposar. Ndahei rumo güembiapo nungar secoi. Esephia, sembiapo oñecuñaro vahe. ¹⁸ Ahe rumo ombou ité tecovesa yandeu co ñehesa supi eté vahe pipe ‘toyuvirecoi inungar yipindar mbahe miti ha seropovéhepri cheu opacatu che rembiapo sui’ ohesave yandeu.

Tūpa rese yande pihañemoñetasa supi tupri vahe

¹⁹ Iyavei che rivireta, che rembiaisu, peyemomahenduha co che ñehe rese: peyapisaca tupri voira ambuae ava ñehe rese, mbegüe rupi rumo peñehera chupe iyavei ndapembahemboasi voi tēi chiaveira. ²⁰ Esepio, yambahemboasi voi tēise, ndayayapoi Tūpa remimbotar. ²¹ Evocoiyase peseya teco raisa, opacatu ambuae oime vahe mbahe naporai vahe pe pāhuve. Co catu pe yemominisave peroya catu vīte Tūpa ñehe omoingue vahe pe piña pipe. Ahe niha vireco píratasa pe písiro ãgua.

²² Pe rumo pemboaviyera co pe mbohe vahe ñehesa; ndahei acoi pesenduño tēira. Esepio, pesenduño tēise, pe ae peyembopara. ²³ Supi eté acoi ava osenduño tēise Tūpa Ñehengagüer, ipare rumo ndoviroyai, ahe inungar acoi ava osepiaño tēi vahe vova yepiasa pipe. ²⁴ Ipare rumo oyepepise ichui, cûriteimi sesaraiño ichui. ²⁵ Acoi ndasesarai vahe ité rumo güemiendu sui iyavei oyapisaca tupri vahe co mborocuaita maranehi mbahe-mbahe tēi sui yande rerocua vahe rese iyavei oye-moviracuaño ité vahe oyapo vaherā iporocuaita, ahe oviharetera opacatu güembiaipo tupri rese.

²⁶ Amove ava, “Che aguata tupri Tūpa rupi” ehi tēi. Ndoicuai rumo oñehe monguiriri ãgua. Evocoiyase ahe ae oyembopa oico. Sembieroza evocoiyase ëgue ehi tēi vahe. ²⁷ Yarecose rumo yande rembieroza icatupri, nimarai vahe yande Ru Tūpa rovai, ahese yaipitiviiro co tirëhi, imer mano vahecuer avei iparaíusa rese. Iyavei ndayayapoi chira mbahe naporai vahe.

2

Ndayamboyoavirati chira ava mboeteisa sereco

¹ Iyavei no, che rivireta, pe peroya vahe yande Yar Jesucristo seco porañete vahe peico, ndapeyeaisu yoavii chira. ²⁻³ Inungar-ra que ava mbahe yar oíquese pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, “Eguapi co tenda aviye catu vahesave” peyera chupe. Ahe pipeve avei co oíquese pe pāhuve iparaísu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña. ⁴ Evocoiyase ëgue peyese, peyapo mbahe ndoyoyai vahe, naporai vahe pe pāhuve ae iyavei peyeapo ava poravosar nungar peico pe piñañemoñeta raisa pipe.

⁵ Che rivireta, che rembiaisu, pesendu aipo ñehesa: Tūpa oiporavo ava iparaísu vahe co ivi pipe ‘toyuvireco’ mbahe yar nungar che reroyasa rereco’ oya, iyavei ‘toipisi’ che remimombehugüer rupi che mbororecuasa oyeupe nara’ oyapave guaisupar upe. ⁶ Pe rumo seroñrosa pipe pemochi ava iparaísu vahe. ¿Ndahei vo mbahe yar mara-mara tēi pe rereco yuvireco yepi? Ahe niha pe mbotiriri mbororecuaro rovai pe reraso yuvireco yepi. ⁷ Ahe avei niha oñehe-ñehe tēi seroñrosa pipe yande Yar yaroya vahe rer imboyeroyapri rese yuvireco.

⁸ Supi eté yayapo mbahe aviye vahe yamboaviyese mborocuaita ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe. ⁹ Acoi yayaisu yoavirati tēise rumo, ahese yayapo angaipa, yayavi mborocuaita Tūpa rovai. ¹⁰ Esepio, acoi ava viroya vahe opacatu mborocuaita, ipare rumo oime que ñepei nomboaviye tupri vahe, ahe oyavi opacatu mborocuaita. ¹¹ Esepio, Tūpa ité niha

aipo ehi: "Ndapeyemboaguasai chira" ehi. Ahe avei aipo ehi: "Ndapeporoyucai chira no" ehi. Yepe acoi ndapeyemboaguasai chira viña, pe poroyuca pipe rumo, peyavi mborocuaita.¹² Evocoiyase peñehe tuprira iyavei peico tupri aveira. Esepia, oporandura yande recocuer rese yande Yar oporocuaita pipe güeru vahe yande reco tupri águia.¹³ Supi eté acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pipe mborandusave curi.

Yamboaviye itera mbahe; ndahei chira yande ñehe tēi

¹⁴ Che rivireta, ¿aviyera pīha acoi ava, "Ayeroya yande Yar rese" ehi tēi vahe, ndoyapoise mbahe aviye vahe yuvireco? ¿Oicatura pīha ahe oñepisiro aipo ohe pipe tēi yuvireco?¹⁵ Inungar-ra oimese que yande rivri, anise yande reindri upe ipanera iturucuarā, semihura ari yacatu rupindar viña.¹⁶ Evocoiyase que pe aipo peyeñora chupe viña: "Aviye, eso tupri eico. Eyeao eso sōhisagüer sui, ecaru tupri" peyera. Ipare rumo ndapemondoise mbahe ipane vahe chupe, ¿aviyera pīha ava upe aipo yande he tēi viña?¹⁷ Ëgüe ehi avei, "Ayeroya yande Yar rese" yande hesa; ndayayapoise rumo mbahe aviye vahe aipo yande hesa pipe, aipo yahe tēi yaico.

¹⁸ Aviyeteramo ava pe pāhu pendar aipo ehira cheu: "Nde ereyeryoa yande Yar rese, che rumo ayapo mbahe tupri" ehi. Che evocoiyase aipo ahera chupe: "Emboyecua ru nde yeroysa mbahe nde rembiapoëhi pipe. Evocoiyase che amboyecuara che yeroysa oime vahe che rembiapo pipe ndeu" ahera.¹⁹ Nde niha aipo, "Che aicua oime ñipei Tūpa" ere. Supi eté aipo ere. Co rumo caruguar avei oicua. Ichui osiquiyepave rumo ahe oririi eté yuvireco.²⁰ ¡Mbia, tapeico eme ndayaracuai vahe! ¿Ereicua vo co nde mbahe apoëhisa nde yeroysa ëgüe ehi tēi vahe?²¹ Esepia, Tūpa oipisi yande ramoi Abraham seco tuprisa pipe oicuavéhese pororecosa nungar guahir Isaac chupe aracahe.²² Indó, Abraham yeroysa omboyecua ité güembiapo catupri reseve. Evocoiyase ëgüe ehi ahe güembiapo tupri pipe omboaviye tupri oyeroysa oico aracahe.²³ Ëgüe ehi yaviye icuachiapri aipo ehi vahe: "Abraham viroya ité Tūpa, evocoiyase, 'Co seco catupri vahe' ehi Tūpa ipisi" ehi. Ahese ava, "Abraham Tūpa mboripar ité" ehi yuvireco chupe.

²⁴ Indó, Tūpa, "Co seco catupri vahe" ehi ava upe sembiapo tupri repiase yepi, ndahei iyeroyasa rese güeraño.²⁵ Ëgüe ehi tupri avei cuña ndipihai vahe Rahab upe. Esepia, ahe omoingue ñuvirío ava ivi repiasar imondopri güeta pipe, ipare oñomi imondo ambuae peri rupi yamotaréhisar sui. Ipipe sui Tūpa oipisi inungar-ra seco ivi tupri vahe viña.²⁶ Ëgüe ehi yande rembiapo catupri ndayamboyecuaise yande yeroysa pipe, ahe inungar avei Espíritu ndasecoise yande rese, yande yeroysa evocoiyase omano tēi eté oico.

3

Yande ñehe resendar

¹ Che rivireta, yipindar ndapeyeapoi chira setá etepri oporombohe vahe peyepâhuve. Esepia, peicua niha yande oporombohe vahe yaicose, Tūpa oporandu catu itera ambuae ava sui yande porombohe agüer rese yandeu curi.² Opacatu yande yayavi setá mbahe rese yepi. Oimese

que ava ndoyavii vahe oñehe, ahe ava seco ūvi tupri vahe. Iyavei oicua tupri opacatu güeco rereco tupri äqua.³ Inungar acoi yamondose cavayu yuru penda sese seroguata äqua. Ahese opacatu cavayu retecuer yaicatu imboyahuva äqua.⁴ Inungar tupri avei carite guasu, yepe tuvicha iyavei yepe ūvitü omoañii opíratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi.⁵ Ëgüe ehi avei yande äpecu, yepe chihimi tēi viña, ipipe rumo yayapo tēi mbahe tuvicha vahe ava upe. Inungar avei que tata chihimi vahe sui tēi yuví guasu opa ocai.⁶ Ëgüe ehi yande ñehesa tata nungar. Iyavei yande äpecu pipe opacatu mbahe-mbahe tēi yamombehu. ¡Evoco mbahe-mbahe tēi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evoco yande ñehe tēisa caruguar suindar.⁷ Ava oicatu opacatu mbahe mimba nimasoi vahe mboaracua äqua, vīrai, mboi iyavei mbahe ipi para guasu pipendar avei no.⁸ Ndipoi eté rumo que ava oipoepi vaherä oñehe. Yandeu ndiyai eté ipoepi äqua. Yande ñehesa oporoyuca vahe nungar ité yepi, mbahe tēi eté.⁹ Co yande äpecu pipe yamboetei yande Yar Tūpa, ipipe avei rumo yamomara ava, ahe ava rumo Tūpa oyapo onungar.¹⁰ Ëgüe ehi eté, yande ñehe pipe yamboetei Tūpa, ipipe avei yaroiro ava. Che rivreta, ndiyai evoco nungar mbahe yayapo yepi.¹¹ ¿Oicatura pīha osē ñepei i ohē vahe sui sēhe vahe, iro vahe avei viña?¹² ¿Ihara pīha higuera ivira rese aceituna viña? ¿Iyavei oicatura pīha uva hī rese oħa higo viña no? ¡Aní, ndoicatui eté! Iyavei ndoicatui ñepei i ohē vahe sui osē i, sēhe vahe sēhe asi vahe reseve.

Mbahecuasa supi eté vahe

¹³ Acoi oimese pe pāhuve yaracua vahe, oyapisaca vahe, tomboynecua catu güeco catuprisa, güeco mbegüesa avei ombahecua tuprisa pipe.¹⁴ Oimese rumo pe pihaive pe poroamotarēhisa mbahe pota raisa pipe, iyavei peyeupe nara tēi mbahe peseca, ahese ndiyai peyembovīha tupri tēi ‘che yaracuá vahe aico’ pe yapave. Esepia, peremira tēira supi eté vahe mbahe rese. ¹⁵ Ëgüe ehi eté evoco nungar aracuasa ndahei Tūpa suindar. Ahe rumo co ūvi pipendar tēi vahe, ava pihañemoñeta sui tēi osē vahe iyavei caruguar suindar tēi avei.¹⁶ Esepia, poroamotarēhisa yande mbahe pota raisa pipe yarecose iyavei yaipotase mbahe yandeyeupe nara tēi, ichui osē ñehepoepisa iyavei opacatu mbahe tēi.¹⁷ Acoi vireco vahe rumo Tūpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asii chiaveira. Iyavei oyemoingatu voi vahe, ahe oporoparaísueresco vahe, nomboyoaviratii vahe güecocuer. Ahe ipihañemoñetasa ñepei reseve vahe iyavei oyapo tupri vahe mbahe.¹⁸ Iyavei acoi oseca vahe mbahe tupri yepi, oipisi itera opiha pipe teco ūvisa.

4

Co ūvi pipendar mbahe raisusa

¹ ¿Que sui pīha ou vavasa iyavei ñehepoepi-episa pe pāhuve? Ahe ou pe mbahe pota raisa sui pereco vahe pe pihañemoñetasa pipe.² Pe peipota rai mbahe. Ipare rumo ndapeicatui sereco äqua. Evoco iyase peporoyuca pe mbahe pota raisa pipe. Ndiyai eté rumo pēu sereco äqua. Ipipe sui peyecoäha, pevava avei no. Ndapeyosui eté rumo

mbahe pe remimbotar. Esephia, ndapeporandui Tūpa upe. ³ Acoi peporanduse rumo sese, ndapeipisii. Esephia, peporandu rai tēi, peipota pe yemboviha ãgua rese nara tēi. ⁴ ¡Pe mbia, peyavi vahe pe recocuer! ¿Ndapeicuai vo acoi ava Tūpa cuaparéhi mborípar tēi yuvirecoi vahe, ahe Tūpa amotaréhimbar yuvirecoi? Ëgüe ehi eté acoi oipota vahe co ivi pipendar mbahe-mbahe tēi pipe güeco ãgua, ahe oyeapo Tūpa amotaréhimbar. ⁵ Supi eté Tūpa Ñehengagüer aipo ehi: “Tūpa osaisu güecatéhisa pipe o Espíritu omondo vahe yande piha pipe” ehi. ⁶ Ahe rumo yande pítivii catu oporoaisusa pipe. Esephia, icuachiapri aracahendar pipe aipo ehi: “Tūpa oyamotaréhi ava oyeecomboivate ai vahe. Oipítivii rumo seco mbegüe vahe saisisave” ehi. ⁷ Sese pemboyeroya catu Tūpa. Peyemoviracua caruguar remimbotar apoéhi ãgua. Ahese ahe oyepepira pe sui. ⁸ Peyemboya Tūpa rese, ahe evocoiyase oyemboyara pe rese. Pe, angaipa viyar, ¡peñemoatiro mbahe peyapo vahe sui! ¡Iyavei pemoatiro pe pihañemoñetasa ñuvirío pereco vahe sui! ⁹ ¡Tatasí pêu, tapeyaseho, perorivete iri eme, pemboasi pe angaipa pe yemboviharéhisave! ¹⁰ Peñenopíha Yar rovai imboyeroyasa pipe. Ahe evocoiyase pe reco mboivatera.

Peroiro eme pe mboetasa

¹¹ Che rivireta, aní chira peñehe mara peyeupe. Acoi oñehe rai vahe iyavei viróiro vahe ambuae Jesús reroyasar, ahe oñehe rai tēi aveira mborocuaita rese seroïrosave. Ëgüe peyese, evocoiyase seroyaéhisa pipe peyemboivate catura mborocuaita sui viña. ¹² Oime rumo ñepeñifo ité ombou vahe mborocuaita yandeu iyavei oporandu vahe yande recocuer rese. Ahe güeraño avei oicatu oporopísiro iyavei oporomocañi ãgua no. Evocoiyase pe, ¡ndiyai pe cotindar reroiro ãgua pêu!

Ndayaicuai mbahe oime vaherã yandeu ayihive

¹³ Pesendu pe aipo peye vahe: “Cûritei, anise ayihive yasora que tecuave, anise que tecua guasuve revo. Aheve yaicora ñepei aravíter yande poravíqui ãgua. Ahese yamogana catura guarePOCHI” aipo peye vahe. ¹⁴ ¡Ndapeicuai rumo mbahe oime vaherã pêu ayihive! ¿Mara ehi piha yande recocuer? Ahe inungar ïvichi oyecua raimi tēi vahe, ipare opañ ocañi. ¹⁵ Iyacatu aipo peyera viña: “Oipotase yande Yar yande reco ãgua, yayapora co nungar mbahe, que ambuae mbahe” peyera yepi. ¹⁶ Pe rumo peñeheñio pe yemboivate aisa pipe mbahe pe rembiaporã rese. Opacatu evocoí nungar mbahe rumo naporai. ¹⁷ Esephia, acoi oicua vahe mbahe tupri apo ãgua, ipare rumo ndoyapoi eté, ahe oyapo angaipa.

5

Imbahe eta vahe paraísusá resendar

¹ ¡Pe mbahe yar, pesendu co: peyaseho iyavei perâse! Esephia, peiporarara mbahe tēi peico. ² Opacatu pe mbahe eta ocañi tēi vaherã. Esephia, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi. ³ Pe oro, pe guarePOCHI opa opochi ati-atí no. Ahe niha pe recoãha ãgua, omboynecua vahe mbahe tēi pêu. Iyavei pe mbahe pota raisa ndoyavii pe roho ocai vahe vireco. Esephia, pemonuha guasu tēi mbahe pereco ati vahe sereco co ari ipa vahe pipe. ⁴ Peyapisaca, acoi oipoho vahe mbahe pêu nara yuvireco, chupe ndapemboepii eté. Sese

sásé tēi yuvireco. Ahe rumo yande Yar ipíratá vahe, ivate catu vahe oicua. ⁵ Co ívi pipe tēi pe peyeecomoendiyai peico iyavei peyembovíha co ívi pipendar mbahe rese inungar guaca imonguirapri yuca água. Ipípe peyemoingatu pe cañi água. ⁶ Pe ñehe pipe pemombaraisu ava ndoyapoi vahe mbahe yuvireco; yepe, “Mara” ndehi yuvireco pēu viña, pe rumo peyucano.

Nemosasa iyavei yeroquisa resendar

⁷ Che rivreta, peñemosano yande Yar yevi iri água rese. Inungar ava omaheti vahe osáro rane güemiti poho água. Esepia, ahe osáro yipindar oqui vahe iyavei ipa oqui vahe mbahe miti aviyé água. ⁸ Pe avei peñemosano, peyemongueréhi catu. Esepia, cōimi eté yande Yar yevi água cute.

⁹ Iyavei che rivreta, peñemoiroi rene peyeupe. Evocoiyase Tūpa ndoporandui chira co mbahe rese pēu. Esepia, mborerecuar guasu íva pendar oyemoingatu voi ohā yandeu porandu água. ¹⁰ Che rivreta, peico catu inungar Tūpa ñehe mombehusar aracahendar yuvirecoi vahe. Ahe oñemosano mbahe rasicuer upe yande Yar rer pipe oñehe água yuvireco. ¹¹ Yande rumo yaicua sovasapri ava oñemosana vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviyé vahe yande Yar oyapo chupe. Yande Yar niha oporoparaísuereco vahe.

¹² Che rivreta, peyapisaca tupri catu co che ñehe rese. Pe ñehe água ndapeiporui chietera que íva rer iyavei que ambuae mbahe pe ñehe reroya uca água. Iyatatu rumo, “Supi eté” peyese, supiño itera; “Aní” peyese, aní chiño itera Tūpa poronupasa pisiéhi água.

¹³ Aviyeteramo que pe pāhu pendar iparaísura oico; toyeroqui. Aviyeteramo oimera que sorivete vahe oico; ahe tosapucai Tūpa upe. ¹⁴ Aviyeteramo que ava imbaheasira oico, toñehe evocoiyase Jesús reroyasar rārosar upe. Ahe tomondo aceite yande Yar rer pipe yuvireco sese. Ipare toviroyeroqui yuvireco. ¹⁵ Acoi oyeroquise oyeroysa pipe sese yuvireco, imbaheasi vahe evocoiyase ocuerara; yande Yar avei omopuhara. Acoi angaipa virecose, oime aveira ñerosa chupe. ¹⁶ Sese pemombehu pe angaipa peyeupe, peyeroqui avei peyese pe yembogüera tupri uca água. Ava aviyé vahe oyeroquise oqueréhisave opacatu güecocuer pipe, ahe iyeroquisa ipíratá ité. ¹⁷ Acoi Tūpa ñehe mombehusar Elías yande nungar avei. Ahe oporandu oyeroquise pipe Tūpa upe, “Toqui eme” ehi. Aipo ehise, ndoquii eté ívi harive mbosapi araviter imombitesa rupi. ¹⁸ Ipare oyeroqui iri, ahese oqui iyavei mbahe miti iha iri.

¹⁹ Che rivreta, acoi oimese oyahuva vahe supi eté vahe sui pe pāhuve, ipare ambuae viroyevise Jesús upe, ²⁰ tapeicua pe acoi viroyevi vahe angaipa viyar secocuerai sui, oipísiro ihā imano rāgürer sui. Iyavei omoime ñerosa tuvichá vahe yangaipa upe. Aipo rupive.

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upé

¹ Che, Pedro, Jesucristo apóstol aicuachía co che ñehe pēu, pe Tūpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upé. ² Supi eté pe yande Ru Tūpa rembiporavo yípisuve peico semimbotar rupi. Evocoiyase oEspíritu Santo pipe pe peha oyeupe nara viroyasar pe reco água ‘imoatiropri toyuvirecoi che Rahir ruví pipe oangaipaguer sui’ oya. Peipisi catu Tūpa porovasasa pe reco tuprī água.

Tūpa suindar mbahe aviye vahe rārosa

³ ¡Imboeteipri tasecoi Tūpa, yande Yar Jesucristo Ru! Ahe niha oporoparaísuecoca pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipipe sui yaicuaño ité oimera mbahe aviye vahe Tūpa suindar yandeu. ⁴ Ipipe sui avei Tūpa oipisi ucara pēu pe mombahesa ivave yapocatuprī nocanii vaherā, ndituyui vaherā iyavei ndopai vaherā ité. ⁵ Pe peyeroya ité Tūpa rese. Sese niha ahe opíratasa pipe pe repi mbahe tēi sui poropísirosa pe reco água. Ahe vireco vahe imoingatuprī ari ipa vahe mboyecua água pēu.

⁶ Co rese peyembovhareteño peico, yepe cüritei pe reco pipe peparaísu pucu raimi tēi setá pe recoáhasa pipe peico viña. ⁷ Esepia, pe yeroyasa Tūpa rese aviye oro, ahe sähasa tata pipe yepi. Ëgüe ehi aveira pe recocuer sähambri tata nungar mbahe yavai vahe pipe, “¿Aviye vahe ité pīha?” hesave. Yañemosase evoco mbahe yavai vahe upé, ahese yande yeroyasa aviye catura oro ocañi tēi vaherā sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesia iyavei imboeteipri yaicora acoi Jesucristo oyevise curi.

⁸ Pe niha pesaisu yande Yar Jesucristo, yepe ndapesepiai viña; cüritei rumo sepiaëhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu. ⁹ Esepia niha, pesupiti pe remiaro poropísirosa apirëhi vahe peico pe yeroyasa pipe.

¹⁰ Aracahe suive ava Tūpa ñehe mombehusar oicua tuprī pota ité co poropísirosa resendar yuvireco ‘¿mara ehi eté pīha co tecocuer?’ oyapave yuvireco. Iyavei oñemoñeta yuvireco Tūpa oporoaisusa pipe pēu mbahe ombou vaherā rese. ¹¹ Cristo Espíritu senondevé oicua uca mbahe Tūpa ñehe mombehusar upé aipo ehi: “Poropísirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pīha evoco mbiá?” ehi; “¿Mbahesera vo oimera co Espíritu remimombehu yandeu?” ehi yuvireco. ¹² Tūpa rumo omboyecua chupe, ndahei chupe nara ité imombehuprī yuvireco, pēu nara ité rumo. Ahe avei niha poropísirosa resendar ñehesa mombehusar omombehu pēu cüritei, Espíritu Santo píratasa pipe imboupri iva pendar yandeu. ¡Tūpa rembiguai avei oicua tuprī pota tēi cüritei yuvireco viña!

Tūpa yande poravo yande reco maranehi água

¹³ Sese pe pihañemoñeta tuprisa pipe pemahemoha tuprira peyese Tūpa porovasasa pēu ombou vaherā rese pe yeroya catu água acoi Jesucristo

oyevise curi. ¹⁴ Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tūpa recocuer cuaēhi viteseve. ¹⁵ Peicora rumo pe reco maranehisa pipe ité. Esepio, Tūpa pe poravo oyeupe nara; ahe ndaseco marai vahe ité. ¹⁶ Supi eté icuachiapri aracahendar pipe aipo ehi imombehu: “Pe tapeico seco maranehi vahe. Esepio, che ndaseco marai vahe aico” ehi.

¹⁷ Tūpa niha opacatu ava upe secocuer rese nomboyoaviratii chira oporandu curi, sese pe, “Che Ru” peye vahe chupe peyembosiquiyera mbahe tēi apoēhi āgua imboeteisave co ivi pipe peico vitese. ¹⁸ Esepio, Tūpa pe pisiro aracahendar pe ramoi suindar aracuasa ēgue ehi tēi vahe sui. Peicua tupri ité niha co poropisirosa reprí nimboepisai eté que mbahe ocañi tēi vaherā pipe inungar oro, anise guareepochira viña. ¹⁹ Imboepisa rumo Cristo ruví maranehi pipe. Ahe seropovēhepri, inungar ovesa nimirai vahe. ²⁰ Ahe Tūpa oiporavo aracahe ivi, iva apoēhi viteseve ēgue ehi vaherā. Cūritei rumo oyemboyecua pēu mbahe tupri āgua. ²¹ Secocuer sui niha peroya Tūpa peico, ahe ombogüerayevi vahe omano vahe pāhu sui, ipare omondo oyemboeteisa, güeco porañetesa avei chupe. Ipipe sui peyeroya Tūpa rese iyavei pesāro co mbahe aviye vahe pisi āgua ichui.

²² Cūritei Tūpa Ñehengagüer supi tupri vahe mboyeroyasa pipe imoatirosa pe recocuer pesaisu vaherā ambuae Jesús reroyasarea. Evocoiyase ēgue peyera peyeaisu catu opacatu pe pihañemoñeta tuprisa pipe, iyavei opacatu pe pīratasa pipe. ²³ Pe niha pereco tecovesa piasu, ndahei pe yesupa omano tēi vahe suindar. Ahe rumo Tūpa Ñehengagüer supi tupri apirēhi vahe reroya pipe. ²⁴ Esepio, icuachiapri aracahendar pipe aipo ehi:

“Opacatu ava inungar caha, iyemboeteisa evocoiyase inungar ipotri.

Ipare ahe caha opa omano, ipotri avei opa ovíapi;

²⁵ Tūpa Ñehengagüer rumo apirēhi vaherā ité yepi” ehi.

Ahe co ñehesa imombehupri poropisirosa resendar pēu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar. ² Inungar pītanimi ocuacua āgua oipota cambi; ēgue peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropisirosa pipe, ³ que peicua itese yande Yar reco aviyesa.

Cristo inungar ita ndopai vahe

⁴ Peyemboa catu yande Yar rese. Ahe inungar ita ndopai vahe. Ava rumo ovirōiroño yuvireco. Tūpa rumo ahe ita oiporavo aviye catu vahe. ⁵ Ēgue ehira pe rereco oyeupe inungar ita ndopai vahe; ipipe sui omopuhara otúparoguā pe rese. Iyavei pahi ndaseco marai vahe nungar peicora semimbotar rupi chupe. Pe evocoiyase Jesucristo rembiapo pipe sui peyapora Espíritu upendar mbahe aviye vahe. Ahe inungar mbahe seropovēhepri aviye vahe Tūpa upe. ⁶ Esepio, icuachiapri aracahendar pipe aipo ehi:

“Che amondo ñepei ita nungar ava aviye vahe tecua Sión ve imoviracua āgua.

Ahe che rembiporavo iporañete vahe, imboeteipri.
Acoi oyeroýá vahe sese, ahe nochí chietera ichui” ehi.

⁷ Pe seroyasar peico vahe upe evocoit aya vahe ité. Seroyasaréhi upe rumo imboaviyes co ñehesa aipo ehi vahe:

“Oí aposar rumo viroíroño co ita yuvireco.

Ahe ita rumo coiyé vîracuasa aviye catu vahe”

ehi. ⁸ Iyavei omboaviye aipo ñehesa:

“Co ita oipihapi oiti uca ava” ehi. Esepio, Tûpa suindar ñehesa reroyaëhi pipe sui oyemondo uca mbahe têi pipe yuvireco. Ëgüe ehi vaherä ité rumo ahe secocuer yuvireco.

⁹ Pe rumo ava oyesuindar nungar iporavopri peico Tûpa uve nara, imborerecuasa upendar pahi, iyavei chupendar ava seco maranehi vahe peico. Ëgüe peye Tûpa reco píratasa mombehü ãgua peico. Esepio, ahe pe renose pítumimbisa nungar pe recocuerai sui tesapesa aviye vahe pipe pe reique ãgua. ¹⁰ Yipindar ndahe vítei eté Tûpa upendar ava peico, cûritei rumo ahe ité peico; yipindar ndaperecoi Tûpa poroparaísuecasa, cûritei rumo pereco ité cute.

Peico catu Tûpa mboetei ãgua

¹¹ Che rivireta, che rembiaisu, peico raimi têi vahe co íví pipe, pepoi opacatu co íví pipendar pe pihañemoñeta raisa sui. Esepio, pemomara uca têi pe recocuer ipipe. ¹² Pereco tupri pe recocuer aviye vahe ava Tûpa ndoicua vítei vahe rovaque. Yepe ava remieroíro peico inungar-ra mbahe têi aposar viña, osepiase rumo pe rembiapo catupri, omboeteira Tûpa yuvireco ahe ari pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co íví pipe: que mborerecuar guasu ívate catu vahe, ¹⁴ anise yivirindar. Ahe pe recua pipendar rárosar imondopri ava naporai vahe mombaraísu ãgua, iyavei ava seco catupri vahe upe, “Aviye nde recocuer” he ãgua. ¹⁵ Esepio, Tûpa oipota pe peyapora mbahe aviye vahe ava mbahe ndoicuau vahe upe, ndayaracuau vahe upe pe rese iñehe-ñehe têiëhi ãgua.

¹⁶ Peico tupri ava rovaque mbiguai têi nungar sui senosepri pe recosa pipe. Ndiyai rumo ipipe peyapo iri mbahe têi. Peico tuprira rumo Tûpa rembiguai pe recosa pipe. ¹⁷ Pemboeteira opacatu ava. Pesaisu catu pe rivireta Jesúz reroyasar; pemboetei Tûpa; pemboyeroya avei mborerecuar guasu.

Yembohesa yande Yar Jesucristo mombaraísu agüer resendar

¹⁸ Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco pôrai vahe avei. ¹⁹ Esepio, aviye catu yañemosase mbahe-mbahe têi ava rembiapo upe Tûpa mboyeroya tuprisa pipe. ²⁰ Mbahe têi aposa pipe rumo pe mombaraísu yuvireco, ndipoi eté evocoiyase ichui mbahe aviye vahe peñemosase evocoit nungar mbahe upe. Co rumo acoi mbahe tupri aposa pipe pe mombaraísu yuvireco, ipare peñemosase chupe, ahe rumo aviye catu itera Tûpa upe. ²¹ Pe paraisu ãgua rese niha Tûpa pe poravo. Esepio, Cristo oyemombaraísu pe recocuer rese. Ahe rane ëgüe ehi pe rese pe secocuer moña ãgua. ²² Ahe ndoyapoi vahe ité angaipa iyavei ndoporombopai vahe ité. ²³ Acoi ava iñehe mara-mara têise yuvireco chupe, nomboyeví eté iñehe raisa. Iyavei acoi omombaraísu yuvireco, “Ayepira sese” ndehi eté. Ahe rumo, “Che

Ru Tūpa seco ñivi vahe oicuara chupe yuvireco” ehiño oyeupe mbahe-mbahe tēi aposar upe. ²⁴ Cristo teieté viraso yande angaipagüer güete pipe curusu rese ‘toyepipi’ angaipa sui yuvireco. Ipipe sui toyuvirecoi teco ñivasave’ oyapave yandeu. Ahe niha yapichapri secoi pe recocuer moingatu ãgua. ²⁵ Esepio, pe niha yipindar inungar ovesa ocañi tēi vahe peico viña. Cûritei rumo peyevi Cristo upe. Ahe pe recocuer osâo cûritei inungar ovesa rârosar.

3

¿Mara ehira ava omenda vahe recocuer yuvireco?

¹⁻² Ëgüe peye aveira cuña, pemboyeroya itera pe mer. Esepio, amove ndoviroya vîtei Tūpa Ñehengagüer yuvireco; pemboyecuase rumo pe reco tuprisa imboeteisa avei chupe, aviyeteramo ahe avei viroyara, yepe ndapeñehei chira chupe viña. ³ Acoi pemboyecua potase pe yemoporañetesa ndahei chira pe rete rese inungar oâca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe. ⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiëhisa pipe. Evocoii nungar aviyete catu ité Tūpa rovaque. ⁵ Ëgüe ehi avei cuña seco catupri vahe güeco porañetesa imboycua aracahe. Ahe oyeroya Tūpa rese yuvireco, omer avei omboyeroya yuvireco. ⁶ Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviyete vahe pe siquiyëhisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepio, ahe nimirata tuprii, iyavei Tūpa omboura güeco tuprisa pipe tecovesa apirëhi vahe oyoya voi pëu. Ëgüe peyese, Tūpa osendu itera pe yeruresa.

Paraíso mbahe tupri aposa rese

⁸ Iyavei na peyera pe opacatu peyese inungar ñepei oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe. ⁹ Oyapose ava que mbahe tēi pëu, anise que oñeha raise, ndapemboyevíi chira chupe. Iyacatu rumo mbahe tuprisa pipe pemboyevíi chupe. Evocoii nungar mbahe apo ãgua niha Tūpa pe poravo ‘toipisi che porovasasa’ oyapave. ¹⁰ Esepio, “Peipotase pe recocuer aviyete tupri ãgua pe yembovhareteta pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviyete vahe.

Peseca teco tuprisa peyeupe nara, peguata supi.

¹² Esepio, supi eté, yande Yar osâo ava seco catupri vahe iyavei osendu oyeupe yeruresa.

Ava mbahe tēi aposar rumo ndoipisi eté” ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerëhise mbahe aviyete vahe apo. ¹⁴ Peparaisuse rumo mbahe pe rembiapo aviyete vahesa rese, ¡sovataspri peico! Peyembosiquiyei rene que ava sui. ¹⁵ Pemboeteíora rumo Cristo pe Yar secosa rese pe piha pipe. Peyemoingatu voira ava pe remiaro rese oporanduse pëu pe querëhisa pipe imombehu tupri ãgua. ¹⁶ Ëgüe peyera rumo pe reco mbegüesa pipe imboeteisave. Peico tuprii pe pihañemoñeta tupri

rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgür sui. ¹⁸ Esepia niha, Cristo teieté omano yande angaipa repirā ñepei reseve. Güeco maranehi pipe ēgue ehi ava recocuerai rese opacatu pe reraso ãgua Vu Tūpa upe. Ahe omano güete rese. Ipare rumo ocuerayevi güeco espíritu pipe. ¹⁹ Güeco espíritu pipe avei oso, omombehu Vu Tūpa remimbotar ava hā soquendapri yuvirecoi vahe upe. ²⁰ Ahe ava Noé recosendar ndiporeroysi vahe yuvireco aracahe. Tūpa osāro güeco mbegüesa pipe secocuer moingatu ãgua viña Noé oyapo viteseve arca oico. Ahe ipipe oñepisiro ochomi tēi yuvireco amarusu sui. ²¹ Ahe i osāhangapo i poroāpiramosa, ahe omboynecua yande ipisíropri yande recosa. Poroāpiramosa rumo i pipe ndahei yande rete moatiro ãgua. Co rumo vaporandura Tūpa upe, yande pihañemoñetasa moatiro ãgua. Ipope sui evocoiyase yañepisirora yande Yar Jesucristo cuerayevisa pipe. ²² Ahe oso ivave oguapi oī Vu acato coti. Opacatu sembiuui eta, mborerecuarea, opacatu imborerecuasa ipírata vahe avei ipovri pendar yuvirecoi.

4

Yandehañeco yandeyese mbahecuada Tūpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoiyase peyemoingatu voi ēgue peye vaherā peico chupe nara. Esepia, acoi ava oyemomborara vahe güete pipe oseya angaipa yuvireco. ² Ipope sui ndoyuvireco iri chira arí rupi ava tēi pihañemoñetasa pipe. Tūpa remimbotar rupi eté rumo oyapo pota mbahe co ivi pipe yuvirecoi vitese. ³ Ēgue peye pucu rane niha pe rembiapo ai pipe peico ava Tūpa reroyasarëhi recocuer nungar rupi tupri. Ahese mbahe-mbahe tēi peyapo pe pihañemoñeta raisa pipe, savaiposa, pietasave pe rāse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico. ⁴ Cûritei rumo pe mboriparer, ndoyembovhai tēi pe rese, ndapeico irise supi semimbotarai apo ãgua. Ahe oñehe-ñehe tēi yuvireco pe recocuer piasu rese. ⁵ Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu ãgua omano vahe upe, oicove vite vahe upe avei curi. ⁶ Sese niha co ñehesa piñrosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirā, iespíritu rumo yuvirecoi apirëhi inungar Tūpa.

⁷ Virovi rumo arí ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tuprisa pipe. ⁸ Co catu opacatu tupri ité peyeaisura pe piha pipe. Esepia, ēgue yahera poroaisusa pipe yande ñero voira seta ava yangaipa vahe upe. ⁹ Peipisi tupri ava yuviraso vahe pe rētave; “¿Mbahe rese piha co ou?” peyei rene pe pihañemoñeta pipe pe piri ou vahe upe. ¹⁰ Ñepei-peí yande yaiporura Tūpa suindar mbahecuada yareco vahe ambuae Jesús reroyasar rese hañeco tupri ãgua. Yaiporu tuprira co Tūpa porovasasa setá vahe yande cuaita mboaviye tupri ãgua. ¹¹ Acoi pemombehuse Tūpa suindar mbahe, pemombehura inungar iñehe ité; acoi peporopítivii potase, peyapoño opíratasa pēu Tūpa ombou vahe pipe. Opacatu mbahe

peyapo vahe peyapo ‘tomboetei ava yuvireco Tūpa yande Yar Jesucristo rembiapo pipe sui’ pe hesa pipe. Esepio, chupendar ité imboeteisa iyavei imborerecoasa. Êgüe tehi apirëhi vaherä ité.

Yemombaraisusa Cristo reroyasar yande recosa pipe

¹² Che rivireta, che rembiais, ndapeyesapiha ucai chira, acoi oimese mbahe-mbahe tēi yande recoähasa pēu ‘ndoyavii, ndipoi chietera evoco nungar mbahe cheu viña’ pe hesa pipe. ¹³ Yayembovhareteñora rumo ipipe. Esepio, yande rereco yande Yar yemombaraisu agüer nungar pipe yuvireco. Evocoiyase yayembovharete itera acoi yande Yar oyevise güeco píratasa pipe. ¹⁴ Iñehe marase yuvireco pēu Cristo reroyasar pe recosa rese, sovasapri peico. Esepio, Tūpa Espíritu güeco porañetesa pipe secoi eté pe rese. ¹⁵ Acoi pe pāhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tēi aposa rese. Ndahei chiaveira que ambuae ava mbahe rese ifñemaneeco tēisa sui ëgüe ehira serecosa. ¹⁶ Co rumo acoi peparaísuse Cristo reroyasar pe recosa pipe, ndapechí chietera. Pesapucaira rumo Tūpa upe imboeteisa pipe serer pereco vahe rese.

¹⁷ Esepio, oyepota ité ari Jesús reroyasar upe rane ité tecocuer rese porandu äqua. Ëgüe ehise yandeu, mbahe tēi catu itera Jesús reroyasarëhi upe. ¹⁸ Yavaise seco catupri vahe upe iñepisiro äqua, ¿mara ehira pīha ava ndaseco pōrai vahe ava angaipa viyar yuvirecoi vahe upe? ¹⁹ Sese peyemomborarase Tūpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hārāo äqua. Esepio, ahe niha yeroyasa ité secoi.

5

Aracuasa Jesús reroyasar upe

¹ Che amboaracua pota pe pāhu pendar Jesús reroyasar rārosar. Inungar avei niha che aico iyavei asepio vahe ité yande Yar mombaraisu agüer. Inungar ahe vireco teco orisa, ëgüe ahe aveira acoi yande Yar oyevise curi. ² Pesāro tupri catu Tūpa upendar ava eta pe remiaro co omundo vahe pēu inungar ovesa rese yangarecuar osāro tupri vahe ovesa; peyapora pe querëhisa pipe ité. Ahe niha Tūpa oipota, ndahei ambuae yande cuaisa pipe tēi, ndahei avei guarePOCHI pota raisave yayapo. Yayapora rumo mboraviqu yande querëhisa pipe ité. ³ Ndapeicoi chira pe remiaro upe inungar que mborerecoar güeco ivatesa pipe oporocuai pírata vahe. Pemboyecuara rumo pe recocuer aviye vahe chupe imbohesa tupri pipe. ⁴ Evocoiyase acoi oyevise yande Yar, yande rārosar ivate catu vahe, ahese peipisira mbahe porerecosa, teco ori porañete apirëhi vahe.

⁵ Iyavei no pe mbia chihivahe, pemboyeroyara ava pe rārosar peico. Iyavei opacatu peyemboyeroyara pe reco mbegüesa pipe peyeupe peico. Esepio,

“Tūpa ava oyecomboivate ai vahe amotarëhimbä secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tūpa píratasa povrive. Evocoiyase pe reco mboivatera curi. ⁷ Opacatu mbahe rese pe pīhañemoñeta atisa pemombehura Tūpa upe. Esepio, ahe pe rārosar ité secoi.

⁸ Pearacua cañii rene peyesui, pemahemoha ari rupi peyese. Esepiá, pe amotaréhimbar Caruguar pe reco momara pota yepi inungar yaguar oñaro vahe oguata tēi oporoeca ‘tamomara ava’ oyapave. ⁹ Sese peyemoviracuara Tūpa rese pe yeroyasa pipe Caruguar upe. Esepiá, peicua niha opacatu rupi avei yande rivireta Tūpa rese yuvirecoi vahe iparaisu co nungar mbahe pipe. ¹⁰ Peparaísumi pare rumo, Tūpa teiteté pe reco mohivi tuppira, iyavei pe reco moviracuara, pe momirata aveira pe yepepi iriéhi água ichui. Ahe niha oporovasasa pipe yande poravo oyeupe nara, yande yaso vaherā supi teco ori ndopai vahesave yande Yar rese yande recosa pipe. ¹¹ Ëgüe tehi tasecoi güeco píratasa apiréhi vahe pipe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che pítiyiisa pipe co ayapo imondo che rembicuachía ndipucuimi vahe pe mboaracua catu água ‘ipipe toicua tupri catu yuvireco co porovasasa oipisi vahe, supi eté omboyecua vahe Tūpa poroaisusa’ che hesave. ¡Peyemoviracua tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pêu. Marcos, che rahir nungar avei imahenduha pe rese. ¹⁴ Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

IMOÑUVIRIOSA PEDRO REMBICUACHIA SAN PEDRO

Pedro mahenduhasa Jesús reroyasar upe

¹ Che, Simón Pedro, apóstol, Jesucristo rembiguai aico. Co aicuachía che ñehe pēu nara, pe peipisi vahe yande Yar rese pe yeroysa aviye vahe inungar ore. Esepia, yande Yar Tūpa, yande Písicosar Jesucristo seco ñivi vahe yuvirecoi. ² Tapeipisi catu porovasasa iyavei teco tuprisa Tūpa, yande Yar Jesús cua tupri pipe.

Jesús reroyasar recocuer

³ Tūpa ombou güeco pírata pipe opacatu mbahe ipane vahe yande recove água, sese yande pihañemoñeta catu água avei yande secocuer cua tupri pipe. Ahe yande poravo güeco porañetes pipe, güembiazo porañete vahe pipe avei. ⁴ Ipipe avei oseyá oñehé imboaviyepirā yandeu; ahe iñehé ñgue ndehi tēi vahe, aviye catu vahe ité. Co yandeu iñehesa pipe sui perecora Tūpa reco aviye vahe peyese pe yepepi água mbahe tēi sui. Ahe acoi oime vahe co ñivi pipe ava remimbotar tēi sui. ⁵ Sese pe peyeroya vahe Jesús rese, peyemomirata catu aveira peyapo vaherá mbahe aviye vahe. Peseca aveira Tūpa remimbotar cua tupri catu água. ⁶ Iyavei peñearo tupri. Ipare peñemosayo aveira mbahe tēi upe. Ipipe sui peyemondo tupri catura Tūpa upe. ⁷ Ipare peyeaisura peyeivri nungar pe recosa pipe. Ipipe sui peseca catu vítera ava raisu tupri água.

⁸ Esepia, perecose evoco nungar mbahe pe recocuer pipe, pembovicha catuse avei, ahese pe recocuer ñgue ndehi tēi chira, peicua tupri catu aveira yande Yar Jesucristo. ⁹ Acoi ndovirecoi vahe rumo evoco nungar mbahe oyese, ahe oyeapo inungar ndasesapisoí vahe, anise mbahe ndosepia tupri vahe, sesaraiño oangaipa rese ñero agüer sui. ¹⁰ Sese che rivireta, peyemoviracua catu Tūpa pe renoisa mboyecua água iporavopri pe recosave. Ñgue peyese, ndapeviapi chietera mbahe tēi pipe. ¹¹ Evoco nungar pipe sui pe pisi tupri omborerecuasa ndopai vahe pipe yande Yar, yande Písicosar Jesucristo.

¹² Sese niha opomomahenduhaño itera evoco nungar mbahe rese, yepe peicua, peicoveño avei mbahe supi tupri vahe rese. ¹³ Aviyeño itera revo che recove viteseve opomomahenduha víte co aracuasa rese. ¹⁴ Esepia, yande Yar Jesucristo oicua uca cōimi che mano água cheu. ¹⁵ Opombohera rumo opacatu che catuguer rupi co tecocuer rese che manore pe mahenduha água.

Co osepia vahe ité Jesús mborerecuasa yuvireco

¹⁶ Co porombohesa oromombelu vahe pēu yande Yar píratasa resendar, iyevi iri água resendar avei, ndahei oreyesui tēi. Ore rumo orosepia vahe ité ore resa pipe yande Yar mborerecuasa. ¹⁷ Orosepia niha yande Ru Tūpa omboeteisse Guahir iyavei omondose chupe seco porañete iri água aipo ehise oñehé güeco porañetes pipe: “Co che Rahir, che rembiaisu ité, sese niha che ayembovharete vichico” ehise. ¹⁸ Ore ité niha aipo ñehesa orosendu iva suindar orocose yande Yar rupi ivitri imboeteipri vahesave.

¹⁹ Ahe ñehesa omboyeucua catu ñehesa aracahendar Tūpa ñehe mombehusar remimombehugüer supi tupri vahe Cristo resendar. Iya ité pēu pe yapisaca tupri ãgua sese; inungar que tataendi pítusave osesape vahe oico acoi osëse voi cõhe rerusras yasitata guasu ou, ëgue ehi co ñehesa pe piha pipe sesape. ²⁰ Peicua catu co mbahe, co ñehesa aracahendar icuachiapri Tūpa suindar ité, ndahei yandeyesui tēi yaicua imombehu ãgua. ²¹ Esepio, ndahei iñehe mombehusar oyesui tēi omombehu yuvireco. Ahe rumo ava seco catupri vahe ité. Tūpa ité omombehu uca oñehe chupe Espíritu Santo píratasa pipe aracahe.

2

Oprombopa vahe porombohesa

¹ Yuvirecove rumo aracahe porombohesar oprombopa tēi vahe Israel ivi rupi. Oime aveira niha pe pâhuve co nungar oprombopa tēi vahe yuvireco. Ahe ñemisa pipe oprombohera co coti tēi vahe ava reco momara tēi ãgua; evocooya güeco pipe oicuacuñora oyar opisirosar. Co rumo güecocuer momba pihaivi ãgua tēi ëgue ehira yuvireco. ² Setá ava oguatara secocuerai rupi. Ipipe sui ambuae ava oñehe rai tēira porombohesa supi tupri vahe rese yuvireco. ³ Mbahe pota raisa pipe pe mbopara yuvireco co porombohesa co coti tēi vahe rese. Icañi rumo oimeño itera yuvireco chupe. Yipisuive ité niha ahe imocañipirā yuvirecoi.

⁴ Esepio, aracahe Tūpa niñeroi eté güembiguai oyemboangaipa vahe upe. Ahe opa ité omundo mbahe tēisave. Ëgue ehi seyapa pítumimbisave, inungar ñapichimbrí carena pipe yapocatupri yuvireco cañisave nara. ⁵ Iyavei acoi Tūpa niñeroi avei ava aracahendar ndaseco pôrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihívi vahe resendar iyavei ava siete yuvirecoi vahe supindar, ahe güeraño ité oipísiro. ⁶ Iyavei opa omocañi tata pipe tecua Sodoma, Gomorra avei; ëgue ehi imbotanimbu tupri ‘na ahe aveira niha ambuae ava che reroyaëhisar upe curi’ oħesave. ⁷ Lot güeraño rumo ahese oipísiro. Ahe mbia aviyé vahe secocuer; ndoyembovhai tēi ambuae ava recocuer mbahe-mbahe tēi yuvirecoi vahe repiase.

⁸ Co mbia aviyé vahe secoise ahe ava pâhuve ari rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo. ⁹ Indó, yande Yar oicua viroyasar renose ãgua mbahe tēi sui; oicua avei mbahe tēi pipe yuvirecoi vahe rereco imombaraisu ãgua ari cañise curi. ¹⁰ Tūpa omombaraisu catu itera acoi ndopoi vahe güemimbotarai sui, viroïro vahe yande Yar mborerecuasa, oyecomboivate ai vahe güemimbotar aposa pipe, acoi osiquieëhisa pipe oñehe rai vahe seco ivate, ipirata vahe rese. ¹¹ Tūpa rembiguai eta iva pendar rumo yepe ipirata catu vahe, omborerecuasa vireco catu vahe avei yuvireco viña, niñehe-ñehe tēi rumo Yar rovai yuvireco sese.

¹² Co ava mbahe mimba nungar tēi ndovirecoimi eté opihañemoñetas yuvireco. Opoco voiño tēi mbahe rese; evocoi nungar yuviroha yucapirā tēi eté. Ahe oñehe rai tēi vahe mbahe güemienducuaëhi rese. Mbahe mimba nungar tupri avei rumo omanora yuvireco güecocuerai pipe. ¹³ Oyemombaraisu uca ambuae ava mombaraisusa pipe sui tēi, “Yayembovhia mbahe yande rembiapo ai rese” ehi tēi eté yuvireco viña.

¡Opromochi pipe tēi rumo yuvirecoi, yuvirasose pe pietasave pe piri, güeco rai reseve oyemboviha oporombopasa tēi pipe yuvireco!

¹⁴ Osepiase cuña, oipota voiño tēi; ndaporambai avei iyemboangaipasa chupe. “Yayapoño mbahe” ehiño ndoyembohe catui vahe upe. Evo-coi nungar oyembohe-mbohe catu mbahe pota raisa reca ãgua oyeupe yuvireco. Ava ocañi tēi vaherā yuvirecoi. ¹⁵ Ocañi tēi secocuer yuvireco Tūpa ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo ãgua guarePOCHI pota raisa pipe yuvireco. ¹⁶ Tūpa rumo oyaca yangaipa rese guaricu omoñehe ucase ava ñehe pipe chupe. Ahese ramo opoi oaracuaëhisa sui.

¹⁷ Co ava oporombohe vahe inungar ïvicutar ipiru vahe. Iva quiha ïvitu remimombo nungar tēi avei. Apirëhi vahe ité imombopirā yuvireco pítumimbi catu vahesave nara. ¹⁸ Esepia, oñehe tuprī ai angahu tēi ava monguerëhi ãgua ava pihañemoñeta raisa rupi seroyevi ãgua. Ipipe sui ombopa tēi ahe ava seco catuprī pota vahe yuvireco evoco nungar mbahe tēi pipe iyevi iri ãgua. ¹⁹ “Opacatu mbahe apo yaicatu yande reco pipe” ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvinose catui eté ichui. Supi eté, yayapoño itese que mbahe tēi, ahe evocoiyase mbiguai nungar ité yande rereco uca. ²⁰ Esepia, acoi oicua vahe yande Yar, yande Písicosar Jesucristo yuvireco, ipipe oyepepi co ïví pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvinose. Ipare mbahe tēi catu yipindar secocuer sui yuvireco chupe. ²¹ Oyeupe Tūpa porocuaita imondoprī aviye vahe cua pare oyepepise ichui, aviye catura revo ndoicuaise co tecocuer ihívi vahe yuvireco viña. ²² Supi tuprī ité yaviye ñehesa sesendar: “Cave rumo ohu iri ogüëhe. Iyavei cuchi oyasu pare, oyevi iri tuyuve oyemboavaete ãgua” ehi vahe.

3

Yande Yar yevisa

¹ Che rívireta, che rembiaisu, co aicuachía iri che ñehe pēu. Ipipe opomopihañemoñeta tuprī uca pota che pe mboaracuasa pipe. ² Peyemomahenduha aracahendar Tūpa ñehe mombehusar seco catuprī vahe ñehengagüer rese, yande Yar Poropísicosar porocuaita rese avei acoi apóstol pe mbohe vahecuer yuvireco.

³ Peicua ranera co ari imombehuprī ipa vahe virovise, oimera ava ahe oviroírora co tecocuer aviye vahe Tūpa suindar güemimbotarai pipe yuvireco ⁴ aipo ehira, “¿Marase tēi vo aipo oura Tūpa Rembiporavo imombehuprī ou vaherā curi? Esepia, yande ramoi opa tēi omano yuvireco. Cúritei opacatu ahe tuprīnō tēi tecocuer aracahe ïví apo suive” ehi tēira yuvireco. ⁵ Ahe nimahenduha potai yuvireco co aracahendar rese. Esepia, Tūpa oyapo oñehe pipe ïva, ïví avei, ahe ïví osē vahe i sui, i pâhuve avei secoi. ⁶ Coiye i pipe avei opa omocañi ïví, ombose amarusu aracahe. ⁷ Cúriteindar rumo ïva, ïví imoingatuprī tata uve nara Tūpa porocuaita rupi. Evoco tata pipe avei ocañi tēira ava mbahe tēi aposar yuvirecoi vahe curi.

⁸ Che rívireta, che rembiaisu, peresarai rene co mbahe sui: yande Yar upe ñepei ari inungar mil aravíter; mil aravíter evocoiyase inungar ñepei arimi tēi chupe. ⁹ Esepia, yande Yar ndiaracahei eté oñehe mboavíye ãgua; inungar amove ava, “Iharacahe tēi” ehi yuvireco viña. Ahe rumo

aviye etepri güeco mbegüesa pipe yandeu. Esepio, ndoipotai que ñepei yepe yande cañi tēi äqua; ahe rumo oipota opacatú tupri ité yande recocuer ñecuñaro äqua.

¹⁰ Yande Yar ari yande resapiha tēira inungar imonda rai vahe ou p̄itu pipe yepi. Ahese iva ocañi tupri tēira viapuguer ipírata vahe pipe curi. Opacatu mbahe yapopri opara yuvirocái. Ipípe sui co ivi opacatu ipor reseve ocañi tēi etera.

¹¹ Opacatu ité niha co mbahe yapopri ocañi tēi vaherá. Sese, jpeye-moviracuño itera pe reco maranehisa rese Tūpa rese pe pihañemoñetasá pipe! ¹² Pesároño Tūpa yepotasa resendar ari, iyavei peyapo opacatu peicatuguer rupi ‘toyepota poyava voi’ pe yapave. Ahe ari pipe iva opara ocañi tēi eté tata pipe. Ipípe sui opacatu mbahe yapopri ticupa tuprira curi. ¹³ Yande rumo yasáro ité iva, ivi ipiasu vahe Tūpa remimombehu. Aheve opacatu ava yuvirecoira güeco aviyesa pipe.

¹⁴ Sese che rembiaisu, pesáro viteseve co tecocuer, êgue peyera opacatu peicatuguer rupi pe reco tupri äqua pe angaipaëhi pipe, pēu Tūpa, “Peyavi mbahe” ehiëhi äqua. ¹⁵ Tapeicua co: yande Yar seco mbegüe yandeu yande p̄isiro äqua. Êgue ehi avei yande rembiaisu Pablo icuachía oyeupe Tūpa ombou vahe mbahecuada pipe pēu. ¹⁶ Opacatu ocuachiar pipe omombelu evoco nungar mbahe pēu, yepe amove yavai senducua äqua yuvireco viña. Sese amove ndoyemoviracua tuprii vahe yande Yar rese iyavei ndoyemboaracua tuprii vahe, ahe co coti tēi virova ñehesa, inungar oyapo ambuae ñehesa icuachiapri Tūpa suindar rese. Ipípe güecocuer omocañi tēi ahe.

¹⁷ Che rivri, che rembiaisu, peicua ité niha evoco mbahe; sese peñearo tuprira pe yembopa ucaëhi äqua ava ndiporeroysi vahe upe Tūpa rese pe recocuer yemoviracuasa sui pe yepepiëhi äqua. ¹⁸ Peicua tupri catura rumo yande Yar Poropísiosar Jesucristo iyavei peicoveño itera iporovasasa pipe. jêgue tehi imboeteipri tasecoi cûritei apirëhi vaherá! Aipo rupive che ñehe pēu.

JUAN REMBICUACHIA YIPINDAR VAHE SAN JUAN

Ñehesa tecovesa resendar

¹ Co cuachiar pipe oromombelu pēu co yipisuive secoi vahe. Ahe orosendu, orosepia avei ore resa pipe ité iyavei oropoco ité sese. Ahe niha Tūpa Ñehe tecovesa resendar. ² Co tecovesa oyemboyeucua, orosepia iyavei ahe secocuer oromombelu. Ahe tecovesa apirēhi oromombelu vahe pēu. Ahe Vu rese secoi vahe oyemboyeucua vahe oreu. ³ Oromombelu co orosepia vahe, orosendu vahe ñepei vahe nungar pe reco âgua ore rese inungar ore oroico yande Ru Tūpa rese, Tahir Jesucristo rese avei. ⁴ Evocoiyase cûritei oroicuachía evocoii mbahe pēu yande yemboviharete catu âgua.

Tūpa tesapesa secoi

⁵ Iyavei Jesucristo ore mbohe co ñehesa rese, ahe oromombelu pēu: yande Ru Tūpa niha tesapesa secoi; ndipoi eté pítumimbisa sese. ⁶ “Che aico tupri Tūpa rese” yahese, yaicoño rumo angaipa pipe, ahe inungar pítumimbi vahe, ahese yande remira tēi iyavei ndayayapoi mbahe supi tupri vahe. ⁷ Yaicose rumo tesapesa pipe inungar yande Ru Tūpa secoi tesapesa, evocoiyase yaico tuprira yandeyeupe. Iyavei suví yande moatiro opacatu angaipa sui.

⁸ Iyavei, “Ndarecoi angaipa che piha pipe” yahe tēise, yande ae yayembopa ipipe. Evocoiyase mbahe supi eté vahe ndayarecoi yandeyese. ⁹ Acoi yamombehuse yande angaipagüer Tūpa upé, ahese ahe omboura oñeroisa yande angaipa rese yandeu iyavei omoatirora opacatu mbahe-mbahe tēi yande sui. Esepia, ahe seco ívi vahe. ¹⁰ Iyavei, “Che ndacheangaipai eté” yahe tupri tēise yaico, evocoiyase Tūpa semirañete ai vahe nungar yareco. Ipípe ndayaroyai iñehengagüer.

2

Jesucristo yande reco moingatusar

¹ Che rahireta, co aicuachía pēu pe angaipaëhi âgua. Que revo ava oime oyemboangaipa vahe pe pâhuve, yareco rumo yande Pítiviisar yande Ru rovai. Ahe Jesucristo, seco ívi vahe. ² Ichui oime avei ñieroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi âgua yande sui.

³ Acoi yayapo tuprise Tūpa porocuaita, ahese supi eté yaicua Tūpa. ⁴ Oime amove ava “che aicua Tūpa” ehi vahe; nomboavíyei rumo iporocuaita. Ahe semirañete ai vahe, ndovirecoi mbahe supi tupri vahe oyese. ⁵ Acoi yamboavíye se iñehengagüer, ahese supi eté yasaisu Tūpa. Ipípe sui yaicua yande reco tupri Jesucristo rese. ⁶ Acoi “aico tupri Tūpa rese” ehi vahe, ahe secoira Jesucristo nungar.

Mborocuaita ipiasu vahe resendar

⁷ Iyavei, che rivireta, ndaicuachiai mborocuaita ambuae ipiasu vahe pēu. Aheño ité mborocuaita pereco vahe yipisuive. Ahe acoi yipindar pesendu vahe. ⁸ Co aicuachía vahe rumo ogüeru mborocuaita ipiasu

vahe. Ahe supi eté tesapesa Jesucristo vireco vahe iyavei pereco vahe avei. Esepio, pítumimbi opara. Tesapesa evocoiyase osesape.

⁹ Oime amove ava “che aico tesapesave” ehi angahu tēi vahe; oyamotarēhiño rumo ambuae omboetasá Tūpa reroyasar. Evoco nungar recocuer pítumimbisave tēi vite. ¹⁰ Acoi osaisu vahe ambuae omboetasá Tūpa reroyasar, ahe secoi tesapesave. Sese nomboangaipa ucai omboetasá. ¹¹ Acoi ndoyambotai vahe omboetasá, pítumimbisa pipe tēi secoi, ndoicuai avei que rupi güecocuer virecora. Esepio, pítumimbi vahe nomboesapísoi.

¹² Che rahireta, co aicuachía pēu nara. Esepio, Tūpa iñero pe angaipa rese pēu Jesucristo recocuer pipe. ¹³ Pe, yesupa peico vahe upé co aicuachía. Esepio, peicua yipisuive oicove vahe. Aicuachía avei pēu, mbia chihivahe. Esepio, pesecopi Caruguar. ¹⁴ Iyavei pe tahireta aicuachía opacatu pēu. Esepio, peicua vahe niha yande Ru Tūpa. Aicuachía avei pēu, pe iyesupa. Esepio, peicua yipisuive oicove vahe. Aicuachía avei pēu, mbia chihivahe. Esepio, peyemoviracua etepri, peipisi avei Tūpa Ñehengagüer pe piha pipe. Ipipe pesecopi Caruguar.

¹⁵ Evocoiyase pesaisu eme co mbahe tēi ivi pipendar. Acoi ava co mbahe tēi osaisu vahe, ahe ndosaisui yande Ru Tūpa yuvireco. ¹⁶ Esepio, opacatu co mbahe tēi ndahei yande Ru Tūpa suindar; ahe rumo co ivi pipendar suindar. Ahe niha opacatu yande piñañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tēisa. ¹⁷ Co ivi pipendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tūpa remimbotar, yuvirecoira apiréhi vaherá ité.

Mbahe supi eté vahe iyavei mbahe ndahei vahe supi

¹⁸ Che rahireta, co ari ipa vahe ité yandeu. Iyavei acoi pesendu “oura Jesucristo amotaréhimbar” ehi vahe, ahe cûritei setá oyemboyecua yamotaréhimbar yuvireco. Sese yaicua ari ipa vahe yepota água. ¹⁹ Ahe oyepepi yande pâhu sui; ndahei eté rumo yande rivri yuvireco Tūpa rese. Esepio, acoi yande rivri itese, ahese opitara yande piri yuvireco viña. Êgüe ehi oyecua ndahei opacatu yande rivri yuvirecoi.

²⁰ Cristo omondo Espíritu Santo pēu. Sese opacatu pe peicua mbahe supi tupri vahe. ²¹ Pe niha peicua co mbahe supi eté vahe. Sese aicuachía co pēu. Esepio, mbahe supi eté vahe sui ndouí temira. ²² Acoi “Jesús ndahei Poropísiosar imboupri” ehi vahe, ahe semira tēi vahe, yamotaréhimbar yuvirecoi. Ahe niha ndoviroyai Tu, Tahir avei yuvireco. ²³ Acoi ava “evoco ndahei Tūpa Rahir” ehi vahe, ndovirecoi Tu oyese yuvireco. Acoi “evoco niha Tūpa rahir” ehi vahe rumo, ahe vireco yande Ru Tūpa oyese yuvireco.

²⁴ Sese yipisuive pesendu vahe ñehesa peyapocatu pe piha pipe. Êgüe peyese, ahese peico tuprira Jesucristo rese, Tu rese avei. ²⁵ Esepio, Jesucristo aipo ehi: “Pe perecora co tecovesa apiréhi vahe peyese” ehi yandeu.

²⁶ Sese co ava pembopa pota vahe resendar aicuachía pēu. ²⁷ Pe pereco Espíritu Santo Jesucristo ombou vahe pēu. Sese ndiyai eté ambuae pe mbohera. Espíritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espíritu Santo pe mbohesa rupi.

²⁸ Iyavei che rahireta, peicoño ité Cristo rese yareco vaherā sese yande yeroysa. Acoi ogüeyise iva sui curi, ahese nayachī chietera sovai ichui. ²⁹ Pe niha peicua Jesucristo seco ívi vahe. Iya peicua avei opacatu oyapo vahe mbahe ihīvi vahe, ahe Tūpa rahir ité yuvirecoi.

3

Tūpa rahir yuvirecoi vahe

¹ Mara ehi rutei Tūpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tūpa, ndoicatui eté yande recocuer cua água. Esepio, ndoicuai Tūpa recocuer yuvireco. ² Che rivireta, yaico ité Tūpa rahir. Yande rumo ndayaicua tupri vítei yande reco água ipare. Cūritei rumo co mbahe yaicua: acoi oyemboye cuase Jesucristo, yaicora inungar. Esepio, yasepio itera opacatu seco reseve. ³ Iyavei opacatu osāro vahe Jesucristo yuvireco, oyepepiño ité opacatu angaipa sui güeco catupri água, inungar ahe secoi.

⁴ Opacatu ava oyemboangaipa vahe, ahe oyaví Tūpa porocuaita. Esepio, angaipa Tūpa porocuaita mboaviyeēhisa yepi. ⁵ Pe rumo peicua Jesucristo ou co ívi pipe yande angaipagüer mocañi água. Ahe niha ndovirecoi eté angaipa oyese. ⁶ Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepiai, ndoicuai avei secocuer yuvireco. ⁷ Che rahireta, peyembopa uca eme ambuae ava upé, acoi oyapo vahe mbahe aviye vahe yepi, ahe secocuer aviye vahe ité inungar Jesucristo. ⁸ Acoi oyapo vahe angaipa, ahe Caruguar suindar. Esepio, Caruguar yipisuive ité oyapo angaipa. Sese ou Tūpa Rahir Caruguar rembiapo mocañipa água.

⁹ Opacatu yuvirecoi vahe Tūpa rese ndoyapoi angaipa. Esepio, ahe vireco ité Tūpa recocuer oyese yuvireco. Sese ndoicatu iri angaipa apo água yuvireco. Esepio, ahe Tūpa rahir ité yuvirecoi. ¹⁰ Icuapri ité Tūpa rahir yuvireco, icuapri avei Caruguar rahir yuvirecoi vahe. Esepio, acoi ndoyapoi vahe mbahe tupri iyavei ndosaisui vahe Tūpa reroyasar, ahe ndahei eté Tūpa rahir yuvirecoi.

Yayeaisura ñepei-peiyande yacatu

¹¹ Co niha ñehesa, acoi pesendu vahe yipisuive, ahe co yayeaisura ñepei-pei. ¹² Ndayaicoi chira inungar Caín, ahe Caruguar remimbohe oyuca vivri. ¿Mahera píha oyuca? Esepio, tívri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Tūpa ndoicuai vahe pe reroírose yuvireco. ¹⁴ Yande rumo yaicua aracacondar yande hā cañi tēi agüer. Cūritei rumo yasē evocoí nungar sui tecovesa apiréhí vahe pipe yande reco água. Esepio, yande niha yasaísui yande rivireta Tūpa rese yuvirecoi vahe. Acoi ndosaisui vahe rumo ahe ihā ocañi tēi vite ité yuvireco. ¹⁵ Opacatu ava ndoyambotai vahe yande rivri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apiréhí vahe oyese. ¹⁶ Jesucristo niha omondo güecocuer manosave yande recocuer repirā. Ichui yande yaicua poroaisusa. Sese yande avei égüe tayahe yande rivireta rese. ¹⁷ Acoi ava vireco tēi vahe mbahe eta oyeupe nara, osepioño tēi rumo vivri upé mbahe ipane vahe, iyavei ndoipítiví, ahe ndovirecoi Tūpa poroaisusa oyese yuvireco. ¹⁸ Che

rahireta, yande poroaisusa rumo ndahei chira yande ñehe pípe tēi, iyacatu rumo yambojecua mbahe yande rembiapo pípe.

Yande yeroyasayareco vahe Tūpa rovai

¹⁹⁻²⁰ Ëgüe yahese, yande yaicua yande recocuer supi eté vahe pípe yaico. Acoi, "Ndahei revo Tūpa rahir aico" yahese, ahese Tūpa rovaque yayemomahenduhara evoco nungar rese: "Tūpa niha tuvichá catu yande pihañemoñetasa sui. Ahe opacatu mbahe oicua." Sese yayeroyara. ²¹ Supi eté che rivireta, yaicua itese yande piha pípe yande reco tupri Tūpa rese, ahese yayeroyaño itera sovai. ²² Ahe avei niha ombou opacatu mbahe yandeu yaporanduse chupe. Esepio, yamboyeroya iporocuaita iyavei yayapo semimbotar yaico. ²³ Co ité iporocuaita: yaroyara Tahir Jesucristo iyavei yayeaisura ñepei-peí Tūpa yande cuaisa rupi tupri. ²⁴ Acoi yaroyase iporocuaita, ahese yaicora Tūpa rese; ahe avei secoira yande rese. Iyavei ahe ombou Espíritu yandeu. Ichui yaicua Tūpa secoi yande rese.

4

Espíritu Tūpa suindar iyavei espíritu Cristo amotarëhimbar

¹ Che rahireta, aní chira peroya opacatu "Espíritu pípe añahe" ehi vahe. Iyacatu rumo pesáha rane '¿Tūpa suindar ité píha?' pe hesa pípe. Esepio, setá vai oporombohe angahu tēi vahe oguata opacatu ivi rupi yuvireco. ² Co rese peicuara ava Espíritu Tūpa suindar vireco vahe: "Jesucristo ou opacatu güete reseve" ehise, aipo ehi vahe vireco Espíritu Tūpa suindar ité. ³ Acoi aipo ndehi vahe rumo, ndovirecoi eté Espíritu Tūpa suindar oyese. Ahe rumo vireco espíritu Cristo amotarëhimbar tēi. Aracaco niha pesendu ñehesa acoi yamotarëhisar espíritu ou vaherā resendar. Ahe cûritei secoi co ivi pípe.

⁴ Che rahireta, pe rumo Tūpa suindar peico. Iyavei pesecopi ité acoi semira tēi vahe peico. Esepio, Espíritu secoi vahe pe rese, ahe ipirata catu Caruguar sui. ⁵ Evoco co ivi pipendar tēi yuvirecoi vahe. Esepio, oñehe mbahe ivi pipendar rese tēi yuvireco. Iyavei ava supindar ae ité oyapisaca iñehe rese yuvireco. ⁶ Yande rumo Tūpa suindar yaico. Acoi oicua vahe Tūpa oyapisaca yande ñehe rese yuvireco. Acoi ndahei vahe Tūpa rahir, ahe yande ñehe ndosendu potai yuvireco. Sese yande yaicuara vireco vahe Espíritu supi eté vahe, yaicua aveira vireco vahe espíritu oporombopa tēi vahe.

Tūpa oporoaisu vahe

⁷ Che rivireta, che rembiaisu, yayeaisu ñepei-peí. Esepio, yeaisusa Tūpa suindar. Opacatu osaisu vahe ava, ahe Tūpa rahir, oicua ité avei Tūpa yuvireco. ⁸ Acoi ndosaisui vahe ava, ahe ndociuai Tūpa yuvireco. Esepio, Tūpa yeaisusa secoi. ⁹ Ëgüe ehi ombojecua oporoaisusa yandeu. Ahe niha, ombou Guahir ñepei vahe co ivi pípe ichui yande recove água. ¹⁰ Ndahei yande rane yasaisu Tūpa. Ahe rane rumo yande raisu iyavei ombou Guahir imano água yande angaipa repirā. Ahe niha poroaisusa supi eté vahe.

¹¹ Che rivireta, che rembiaisu, ëgüe ehi Tūpa yande raisu. Evocoiyase ëgüe yahé aveira yande yayeaisu ñepei-peí yepi. ¹² Ndipoi eté ava osepia vahe Tūpa. Yayeaisuse rumo, Tūpa secoi yande rese. Iporoaisusa evocoiyase oime ité yande rese. ¹³ Ahe ombou oEspíritu yandeu; ipipe

sui yaicua sese yande reco iyavei yaicua ahe secoise yande rese. ¹⁴ Iyavei orosepia vahe, oromombehu: yande Ru ombou Guahir ava ivi pipendar písiro água. ¹⁵ Acoi ava “Jesús niha Tūpa Rahir” ehi vahe, ahe secoi eté Tūpa rese; Tūpa evocoiyase secoi sese.

¹⁶ Ëgüe yahe icua, seroya tupri água co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei secoi sese. ¹⁷ Ëgüe yahe Tūpa poroaisusa mboaviye tupri ichui yande siquiyéehi água acoi oyepotase arí cañi yandeu. Esepia, yande yaico co ivi pipe inungar Jesucristo. ¹⁸ Yasaisu tupri itese Tūpa, ndipoi chira siquiyesa yandeu. Ëgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tupri eté.

¹⁹ Yipindar Tūpa yande raisu. Sese cûritei yande avei yasaisu Tūpa. ²⁰ Amove ava aipo ehi tēi: “Che asaisu Tūpa” ehi. Ahe ramoseve rumo viroîro omboetasa Tūpa reroyasar. Evocoiyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicatui Tūpa ndayasepiae vahe raisu água. ²¹ Jesucristo ombou co porocuaita yandeu: acoi osaisu vahe Tūpa, tosaisu avei omboetasa seroyasar yuvireco.

5

Yande mbahe-mbahe tēi co ivi pipendar recopisa

¹ Opacatu viroya vahe Jesús Tūpa Rembiporavo Poropísiosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco. ² Yande yasaisuse Tūpa, yayapose avei iporocuaita, ahese yaicua yasaisu avei ava Tūpa rahir yuvirecoi vahe. ³ Yamboaviyese Tūpa porocuaita, ahese yamboyecua Tūpa raisusa yaico. Iyavei iporocuaita ndahei yavai etepri yapo água. ⁴ Esepia, opacatu Tūpa rahir yuvirecoi vahe osecopi mbahe-mbahe tēi ivi pipendar Cristo rese yeroyasa pipe yuvireco. ⁵ Acoi oyeroya vahe Jesucristo Tūpa Rahir secosa rese, ahe oicatu co ivi pipendar mbahe-mbahe tēi recopi água yuvireco.

Tūpa rahir recocuer resendar ñehesa

⁶ Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espíritu avei oseco mombehu. Esepia, ahe omombehu mbahe supi eté vahe yepi. ⁷ Evocoiyase oime mbosapi imboyecuasar: ⁸ Espíritu, i, iyavei suvi. Ahe mbosapi oyoya tupri. ⁹ Yaroya revo ava remimombehu; Tūpa remimombehu rumo aviyé catu vahe ité ichui. Esepia niha, ahe Guahir omombehu. ¹⁰ Acoi viroya vahe Tūpa Rahir vireco ité ahe semimombehu opicha pipe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehe Tahir resendar. ¹¹ Co Tūpa remimombehu: ahe ombou yandeu tecovesa apiréhi vahe. Co tecovesa Tahir rese secoi. ¹² Acoi oipisi vahe Tūpa Rahir opicha pipe, ahe vireco avei co tecovesa. Acoi ndoipisii vahe rumo, ndovirecoi eté tecovesa oyese.

Poromboaracuasa ipa vahe

¹³ Co aicuachía pêu, pe pereco vahe Tūpa Rahir, peicua água pe supi eté pereco tecovesa apiréhi.

¹⁴ Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehe osendu. ¹⁵ Evocoiyase

yaicuase ahe osendu yande yeruresa, yaicua avei mbahe yande porandusa ombou vaherā yandeu.

¹⁶ Acoi osepia vahe yande mboetasas Tūpa reroyasar oyemboangai pa vahe, ahe rumo ndahei manosave nara, oyeroquira sese. Evcociyase Tūpa omondora secove ãgua chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pẽu. ¹⁷ Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

¹⁸ Yaicua Tūpa rahir ndoyapoi angaipa yuvireco. Esepia, Tahir osāro evocoi nungar. Ichui Caruguar ndopocoisese. ¹⁹ Sese yaicua yande Tūpa rahir yaico. Iyavei opacatu ava ndovíroyai vahe Tūpa, ahe Caruguar povri pendar tēi yuvirecoi. ²⁰ Iyavei yaicua Tūpa Rahir ogüeru oaracuasa yandeu Tūpa supi eté vahe cua ãgua iyavei yaico co supi eté vahe rese. Ahe niha Tahir Jesucristo, ahe avei Tūpa supi eté vahe iyavei tecovesa apirēhi vahe. ²¹ Che rahireta, peñearo tupri tūpa angahu tēi sui. Aipo rupive co che ñehesa amombehu pẽu.

IMOÑUVIRIOSA JUAN REMBICUACHIA SAN JUAN

Mbahe supi eté vahe iyavei yeaisusa

¹ Che, icuaipri, aicuachía co che ñehe pēu pe Tūpa rembiporavo peico vahe opacatu eipeve peico vahe upe. Che niha supi eté opoaisu. Ndahei rumo che güeraño opoaisu, opacatu oicua vahe porombohesa supi eté vahe avei pe raisu yuvireco. ² Opoaisu ité mbahe supi eté vahe yande piha pipe yareco vahe rese. Ahe ndopai chivaherā ité. ³ Yande Ru Tūpa, yande Yar Jesucristo, Tūpa Rahir, tombou oporovasasa, oporoparaísuerecosa pēu nara. Tombou avei güeco tuprisa, güeco supi eté vahe pipe oporoaisusa pipe avei pēu.

⁴ Che mbovharete aicuase pe pāhu pendar yuvirecoi vahe güecocuer aviyesa pipe. Esepiá, ahe viroya porombohesa supi eté vahe yuvireco. Ahe niha yande Ru Tūpa porocuaita yandeu. ⁵ Iyavei, che rivireta, che rembiaisu, tayayeaisu catu ñepei-peí. Co aicuachía vahe ndahei porocuaita ipiasu vahe. Ahe niha acoi yipindar icuachiapri pēu. ⁶ Co yande yeaisusa, yande guata tupri água Tūpa porocuaita rupi. Co Tūpa porocuaita yipisuve pesendu vahe, ahe omombehu yande yeaisu tupri água yandeu.

Iporombopa serai vahe resendar

⁷ Setá vai oguata ivi yacatu rupi oporombopa tēi vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa tēi vahe Jesucristo amotaréhimbar yuvirecoi. ⁸ Peñearo catu pe poravíqui reprí mocañi tēihéi água. Tapeipisi catu opacatu Tūpa porerecosa peyeupe nara.

⁹ Oime ava oyepipiño vahe Cristo porombohesa sui. Ahe Tūpa ndovirecoi opicha pipe yuvireco. Acoi oyapisaca tupri vahe Cristo porombohesa rese, ahe vireco Tūpa, Tahir avei oyese. ¹⁰ Acoi oyepotase ava oporombopa tēi vahe pēu, ndovirecoi vahe co porombohesa, ndapeipisi chira pe rétave. Iyavei ndapemboaviravei chiaveira. ¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe pēu. Namombehu potai rumo cuachiar pipe. Che teiteté aso pota pēu che ñehe água. Ahese yayembovharetera oyese.

¹³ Iyavei Tūpa rembiporavo oñemonuha vahe coháve opacatu omondo omahenduhasa yuvireco pēu. Aipo rupive co che ñehesa amondo pēu.

IMOMBOSAPISA JUAN REMBICUACHIA SAN JUAN

Gayo recocuer aviye vahe resendar

¹ Che, icuapri, aicuachía co che ñehe ndeu, che mborípar, che rembiaisu, Gayo. Che supi eté oroaisu yepi.

² Che rembiaisu, che rivri, cûrîtei nde recocuer erereco tupri Tûpa rese. Che ayeroqui nde rese opacatu nde reco tupri ãgua iyavei tipo eme mbaherassisa ndeu. ³ Che aviharete asenduse yande rivri ñehe nde recocuer resendar yugueruse cohabe. Ahe aipo ehi yuvireco cheu: “Evocoí Gayo oyemoviracua tupri mbahe supi eté vahe pipe” ehi yuvireco ndeu. ⁴ Ndipoi eté niha ambuae ñehesa asendu vahe che mbovharete catu vahe que che rahireta oguatase co porombohesa supi eté vahe rupi yuvireco.

⁵ Che rivri, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei. ⁶ Ahe omombehu ore ñemonuhasave opacatu nde poroaisusa resendar yuvireco oreu. Eyapo catu mbahe icatupri vahe; eipítivii catu chupe mbahe ipane vahe rese iguataño ãgua Tûpa remimbotar rupi yuvireco. ⁷ Esepia, ahe oguata yuvireco Jesucristo rer pipe. Ndoipisi eté rumo mbahe ipane vahe opítivii ãgua yuvireco ava Tûpa reroyasarëhi sui. ⁸ Sese yande ëgue yahera yaico evocoí nungar upe ñehesa supi eté vahe rese ipítivii ãgua.

Diótrefes recocuerai iyavei Demetrio recocuer aviyesá

⁹ Che aicuachía che ñehe eipeve Tûpa upe oñemonuha vahe upe cuese. Diótrefes rumo ndovíroyai ore mborerecuasa. Esepia, ahe oipota rai mborerecuár güeco ãgua ipâhuve. ¹⁰ Evocoiyase asose eipeve, amboaracuara opacatu Tûpa viroya vahe rovai sembiapo ai rese. Esepia, ahe oñehe-ñehe têi ore rese, ndahei ahe güeraño, ndoipisi potai avei güêtave yande rivireta oyepota vahe. Iyavei ndoipotai ambuae upe ipisi ãgua sëtave. Acoi oipísise, omombo voiño ité ñemonuhasa sui. ¹¹ Che rivri, che rembiaisu, ereicoi rene evocoí ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tûpa suindar. Acoi oyapo vahe rumo mbahe naporai vahe, ahe ndoicuai vahe Tûpa.

¹² Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

Ñehesa ipa vahe

¹³ Che niha amombehu pota setá mbahe ndeu. Namombehu potai rumo cuachiar pipe têi ndeu. ¹⁴ Esepia, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mborípar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepei-peí yande mborípareta upe eipeve. Aipo rupive.

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rivri. Che aicuachía co che ñehe pēu. Pe niha yande Ru Tūpa rembiaisu semienoi peico. Jesucristo niha pe ráro opacatu mbahe-mbahe tēi sui. ²Tūpa tombou catu pēu pe paraisuerecosa pe reco tupri água pe raisusa pipe.

Oporambohe vahe ava mbopa tēi água resendar

³ Che rivireta, che rembiaisu, yipindar chepihañemoñeta ité yande písirosa resendar cuachía água pēu viña. Ipare rumo chepihañemoñeta iri: iyaño revo che aicuachía pe yemovíracua tupri catu água yembohesa yaroya vahe rese. Ahe yembohesa yaroya vahe ñepei reseve imondopri opacatu yandeu Jesucristo rese yaico vahe. ⁴Esepia, amove ava iporamboha serai vahe yuviroique mbegüe angahu pe pâhuve. Aracahe suive rumo Tūpa Ñehengagüer icuachiapri pipe omombehu evoco nungar ava imocañisa tēira yuvireco. Ahe ava ndaseco pôrai vahe, “Tūpa aviyé ité, ndoyapoi chietera mbahe yandeu” ehi tiête yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepei vahe upe yuvireco.

⁵ Che opomomahenduha pota iri acoi peicua tupri vahe rese. Yipindar yande Yar Tūpa vinose yande ramoi eta Egipto sui. Ipare rumo opa omocañi víroyasarëhi. ⁶ Inungar avei Tūpa rembiguai yipindar vahe yuvireco, nomboaviyei vahe ocuaita. Ipipe sui Tūpa osoquenda pítumimbi ndopai vahesave ari cañise nara.

⁷ Iyavei ava Sodoma pendar, Gomorra pendar iyavei ahe tecua ivirindar avei inungar acoi Tūpa rembiguai oyemondo mbahe tēi pipe, ahe avei oyemondo vahe oyemboaguasa-guasa tēi água yuvireco. Iyavei cuimbahe, cuimbahe rese; cuña, cuña rese no. Ipipe sui oiporara tata guasu apirëhi vahe yuvireco. Ahe opita opacatu yande yembosiquiye água.

⁸ Ëgüe ehi avei niha evoco nungar ava pe pâhu pendar. Esepia, ahe oqueraisa nungar reroyasa pipe sui tēi omonguiha vîteño güecocuer oan-gaipa pipe. Iyavei ndoviroyai vahe yande Yar mborererecuasa. Ahe avei oñehe-ñehe tēi vahe iva pendar rese yuvireco. ⁹ Aracahe Tūpa rembiguai ivate vahe Miguel oyepoepi-epi Caruguar rese yuvireco Moisés retecuer rese. Yepe ahe Tūpa rembiguai rerecuar viña, ndiyai rumo chupe ñehe mara água Caruguar upe. Evocoiyase aipo ehi chupe: “¡Tūpa oicuara co rese ndeu!” ehiño. ¹⁰ Evoco iava pe pâhu pendar rumo oñehe tēi vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi água tēi.

¹¹ ¡lparaisu yuvireco! Caín recocuer rupi tupri avei oyapo mbahe yuvireco. Inungar Balaam guarePOCHI pota raisave tēi oyavi güeco yuvireco. Inungar Coré omano oporeroyaëhisa pipe.

¹² Pe peñemonuhase pe yeaisusa pipe pe caru água, ahese ahe avei yuviroique pe pâhuve; noyuvinochi eté ocaru água pe piri. Ndapeicuai

rumo ahe pe recocuer monguiha ãgua tēi yuviroique vahe pe pāhuve. Evocoii inungar ovesa rārosar oyese tēi ihañeco vahe yuvireco. Iyavei ahe inungar iva quiha ndovirecoi vahe i, ivitū remimombo tēi. Ahe avei inungar ivira ndihai vahe ohasa rupi, ipiru vahe, evocoiyase ahe sapohopri. ¹³ Inungar avei acoi iai pipe itu omombo tiyui vahe oyesui yepi. Ëgue ehi avei evocoii mbia rembiaapo poromochisa. Iyavei inungar yasitata amove omocañi vahe guaper co coti tēi oso pītumimbisave, ëgue ehi aveira ava Tūpa sui oyepepi vahe pītumimbisa apirēhīve secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoii nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi iva pendar rehii reseve ¹⁵ opacatu ava recoãha ãgua iyavei icañi mombehu ãgua opacatu mbahe-mbahe tēi aposar upe, opacatu oñehe-ñehe tēi yamotarēhisave yuvirecoi vahe upe avei” ehi. ¹⁶ Ahe mbia niha oporoviroiro yuvireco. Iyavei oseca oyeupe nara mbahe güemimbotar tēi apo ãgua. Ahe oyemboivat ai vahe oñehe pipe tēi yuvireco. Iyavei oñehe tupri ai angahu tēi ambuae ava upe imbahe rerocua ãgua ichui.

Jesús reroyasar upendar poromboaracuasa

¹⁷ Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese ¹⁸ aipo ehi vahe: “Co ari cañi renonde oimera ava viroiro ai vahe Tūpa rembiaapo yuvireco. Iyavei oyapoño itera güemimbotarai yuvireco” ehi vahe. ¹⁹ Ahe ava niha omboyaho-yaho ucara ava Jesús reroyasar yuvireco. Güecocuer ivi pipendar tēi vireco vahe. Ahe niha ndovirecoi Tūpa Espíritu yuvireco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espíritu Santo pe rārosa pipe. ²¹ Peñearo tupri Tūpa pe raisusa pipe. Iyavei pesāro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

²² Pesaisu ava ndoviroya tuprii vahe Jesús. ²³ Amove ava pesecororoyevi voi icañi rāgüer sui. Ambuae peiparaísueroco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepei yangaipa pipe pe viapiëhi ãgua.

Tūpa mboetei tuprisa

²⁴⁻²⁵ Tūpa yande Pisirosar ñepei vahe vireco pīratasa pe rāro angaipa pipe pe viapiëhi ãgua. Ahe avei pe rerecora güecocuer porañetesave pe reco angaipaëhisa pipe. Ichui peicora pe viharetesa pipe. Ahe imboeteipri tasecoi. Ëgue tehi timboyeroyasa seco pīratasa iyavei imborerecuasa yande Yar Jesucristo sui, yipisui, cūritei apirëhī vaherā.

TŪPA REMIMBOYECUA JUAN UPE APOCALIPSIS

Jesucristo yemoporēhisa

¹ Che, Juan, aicuachía mbahe imboavipirā pēu acoi Tūpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pipe imboyecua uca ãgua güembiguai che recose cheu. ² Che supi eté amombehu opacatu mbahe asepia vahecuer iyavei amombehu evocoí Tūpa Ñehengagüer acoi Jesucristo oicua uca tuprī vahe mbahe supi eté vahe.

³ Sorivete catura acoi ava oyeroqui vahe co Tūpa suindar ñehesa rese, acoi ava oyapisaca tuprī vahe sese, viroya vahe avei icuachiapri pipendar yuvireco. Esepia, ari cañi viroví ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cûriteindar apirēhi vahe avei; siete espíritu suindar avei no, ahe senda rovai yuvinohai vahe, ⁵ iyavei Jesucristo suindar, evocoí omombehu tuprī vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tēi mborerecuar sui. Ahe yande raisu iyavei yande písiro yande angaipa sui vuvi pipe, ⁶ iyavei yande rereco mborerecuarā, pahiguā avei no Vu Tūpa upe yande poraviquí ãgua. ¡Égüe tehi imboeteipri tasecoi opíratasa pipe apirēhi vaherá!

⁷ ¡Esepia, Cristo iva quiha rese oura curi!

Ahese opacatu ava osepiara yuvireco, yamotarēhisarer, oicutu vahecuer avei.

Iyavei opacatu tecua ivi pipendar ahese oyaseho tēira yuvireco sepiase. Égüe ehi etera curi.

⁸ “Che aico yipindar iyavei ipandar” aipo ehi yande Yar Tūpa opacatu mbahe mboavaisarēhi evocoí yipivé vahe ité, cûriteindar apirēhi vahe avei.

Juan osepia quer nungar pipe Jesucristo porañeta

⁹ Che, Juan, pe riuehir aico, iyavei che pe nungar Tūpa povrī pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico caha pâhumi para guasu aviterve Patmos serer vahesave Tūpa Ñehengagüer mombehusa pipe sui tēi, Jesucristo recocuer mombehusa pipe sui tēi avei no. ¹⁰ Acoi yande Yar ari pipe Espíritu povrīe aicose, asendu che raquicuei oñehe pírata vahe aviye acoi mimbi ñehe ¹¹ aipo ehi: “Eicuachía mbahe eresepia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

¹² Che evocoiyase ayemboyere sese ‘¿ava pîha oñehe cheu?’ che yapave. Ahese asepia siete tuprī vera hi oro apopri, ¹³ iyavei asepia ipâhuve mbia aviye tuprī ava ité viña, iturucuar ipi rupi tuprī ité sese,

sumbicuasa evocoiyase oro apopri ipochiha rupi tupri ité oyepota. ¹⁴ Iha morochí inungar acoi mbahe saviyu vahe, inungar avei yesapi ñiapirata morochí vahe, sesa evocoiyase aviye tupri ité tata rendigüer. ¹⁵ Ipi evocoiyase sendi yai eté, aviye acoi bronce ocai vahe horno pipe, iyavei iñehe ipíratá iteanga inungar itu riapugüer. ¹⁶ Oacato coti vireco siete tupri yasitata, iyavei iyuru sui osë quise pucu saimbe yoya vahe. Sova evocoiyase aviye ari rendigüer ipíratá vahe.

¹⁷ Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esephia, che yipindar ité aico, ipandar avei. ¹⁸ Aicove vahe ité; yepe amano viña, cûritei rumo aicove iri ndopai chivaherá ité aico. Che areco che mborerecuasa ava recocuer mocañí água. ¹⁹ Sese eicuachía co mbahe eresepia vahe: cûriteindar oime vahe mbahe iyavei mbahe oime vaherá curi. ²⁰ Co acoi ndereicuai vahe eresepia vahe siete yasitata che acato coti, ahe yuvirecoi Tûpa rembiguai siete tecua rupindar che reroyasar rârosar; evocoiyase vera hi oro apopri, ahe yuvirecoi siete tupri tecua pipendar che reroyasar” ehi.

2

Ñehesa siete tupri tecua-tecua pendar Jesús reroyasar upe. Ñehesa Efeso pendar upe

¹ “Eicuachía Tûpa rembiguai Efeso pendar che reroyasar rârosar upe: ‘Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu: ² Che aicua opacatu mbahe pe rembiapo, pe poravíquí píratasa iyavei pe yemovíracuasa. Aicua avei ndapeipotai ava naporai vahe pe pâhuve yuvirecoi vaherá. Pesecoáha avei ava, ore apóstol oroico, ehi têi vahe; ipare peicua iporombopa têisa yuvireco. ³ Che aicua peñemosáño peyemombaraisu peico che raisupave; ndapecuerai eté ipipe. ⁴ Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipindar. ⁵ Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tûpa upe; peyeyeaisu iri catu inungar yipindar. Anise ayevira pêu, arocuapara pe vera hi senda sui acoi ndapeyeviise Tûpa upe. ⁶ Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté. ⁷ ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi oyemovíracua vahe mbahe-mbahe têi apoëhi água, itohu amondora iyira ha tecovesa resendar oime vahe teco orisave che Ru piri, ehi’ erera icuachía chupe.

Ñehesa Esmirna pendar upe

⁸ “Eicuachía avei Tûpa rembiguai Esmirna pendar che reroyasareta rârosar upe: ‘Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pêu aipo ehi: ⁹ Che aicua pe yemombaraisusa, pe paraíusa avei; pe rumo mbahe yar nungar ité peico iva pendar mbahe rese. Aicua avei pe rese ava semira têi vahe, ore Tûpa rembiporavo judío oroico, ehi têi vahe. Ndahei rumo ahe yuvirecoi. Esephia, Caruguar reroyasar têi evocoi yuvirecoi. ¹⁰ Ndapesiquiyei chira pe paraísu água sui. Esephia, Caruguar osoquenda ucara amove pe pâhu pendar secoáha água; pe paraísu rane itera niha diez arí rupi peico. Acoi

peyemoviracua tuprise ité chupe, Cristo rese ité amanora, pe hesave, ahese amondora porerecosa tecovesa pēu. ¹¹ ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tēi apoēhi água, ahe imanore ihā ndoiporarai chira imoñuviriosa manosa pipe, ehi' erera icuachía chupe.

Ñehesa Pérgamo pendar upe

¹² “Ecuachía avei Tūpa rembiguai Pérgamo pendar che reroyasareta rārosar upe: ‘Aipo ehi acoi vireco vahe quise pucu saimbe yoya vahe: ¹³ Che aicua pe recosa. Aheve acoi Caruguar oguapi oĩ; mborerecuar guasu nungar imboyeroyapri secoi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tēi che recocuer mombehu tuprisar Antipas evocoí tecua Caruguar recosave. ¹⁴ Che rumo aicua mbahe pe resendar: eipeve amove ava ndoyepepi potai eté Balaam porombohesa sui yuvireco. Ahe omboaracua Balac israelita mboangaipa uca água, toyuvirohuño mbahe roho seropovēhepri mbahe rahanga upendar tēi, oya, iyavei, toyemboaguasaño yuvireco, oyapave avei. ¹⁵ Iyavei amove ava pe pāhuve ndoyepepi potai eté nicolaíta porombohesa sui yuvireco. ¹⁶ Sese pemboasi pe recocuerai, peyevi Tūpa upe, anise che aso poyava voira pēu, ahese avavara chupe yuvireco che yuru pipe sui osẽ vahe quise pucu piye, ehi. ¹⁷ ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tēi apoēhi água, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oĩ, evocoí ava oipisi vahe güeraño oicuara, ehi' erera icuachía.

Ñehesa Tiatira pendar upe

¹⁸ “Ecuachía avei Tūpa rembiguai Tiatira pendar che reroyasareta rārosar upe: ‘Tūpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu: ¹⁹ Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapo catú aviye vahe. ²⁰ Oime rumo mbahe pe rembiavi: peñemosaño evocoí cuña Jezabel pe pāhu pendar upe, ahe acoi oñehé tēi angahu vahe Tūpa rese viña. Ahe rumo ombopa tēi oporombohesa piye che rembiguai iyemboaguasa-guasa tēi uca água sereco iyavei ohu uca mbahe roho mbahe rahanga tēi upe seropovēhepri yuvireco chupe. ²¹ Che amondo vite tēi ari chupe, tomboasi oangaipa Tūpa upe oyevi água, che yapave viña. Ahe rumo ndopoi potai eté oyemboaguasa tēisa sui. ²² Evocoiyase cûritei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco. ²³ Ipare ayucapara imembri ichui. Ëgüe ehi opacatu che reroyasar oicuara yuvireco che aicua tupri ité opacatu ava pihañemoñetasayavei ñepei-peí pe yacatu amondora pe rembiapogüer reprí pēu. ²⁴ Pe rumo opacatu Tiatira pendar ndaperoyai vahe co porombohe raisa iyavei ndapeyembohei vahe Caruguar suindar aracuasa, ndicuasai yavai vahe, ehi vahe rese, pēu ndarecoi que ambuae che porocuaita. ²⁵ Peyemoviracuaño rumo evocoí mbahe pereco vahe

rese, acoi che ayevise voi vitu curi. ²⁶ Acoi ava oyemoviracua vahe mbahe-mbahe tēi apoēhi ãgua, oyapo vahe che remimbotar mano rupi eté, chupe amondora mborerecuar seco ãgua opacatu ivi rupi ²⁷ inungar che Ru ombou che mborerecuarã cheu; ëgue ehi aveira oporocuai opacatu tecua rupi inungar acoi vara guarePOCHI, mbahe riapiipa uca ãgua, aviyera acoi mahemoinda ñaihu apopri viña. ²⁸ Iyavei amondora yasitata cõhe rerusar chupe. ²⁹ ¡Acoi ava osendu pota vahe, toyapisacaño Espíritu omombehu vahe rese opacatu che reroyasar yuvirecoi vahe upe! ehi' erera icuachía.

3

Ñehesa Sardis pendar upe

¹ "Eicuachía avei Tūpa rembiguai Sardis pendar che reroyasareta rārosar upe: 'Acoi ava vireco vahe siete tupri Tūpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tūpa upe nara, ehi pēu viña; omano vahe nungar tēi rumo peico. ² Peyemopoase catu peico iyavei pemonguerëhi catu acoi viroya vîte vahe. Esepia, oyepepiña pota ité yuvireco viña. Supi eté mbahe pe rembiapo che Ru rovaque, ndahei supi tupri vahe. ³ Peyemomahenduha acoi porombohesa peipisi vahe rese; pepoi rene ichui. Peyevi catu Tūpa upe. Ndapeyemopoaseise rumo, asora pēu inungar imonda rai vahe, ëgue ahera vicho pe resapiha. ⁴ Oime rumo amove ava pe pâhu pendar ndoyapoi eté angaipa yuvireco, evocoiyase inungar ava oguata vahe oturucuar morochi vahe rese, ëgue ehi aveira ahe güeco maranehi pipe oguata che rupi yuvireco. Esepia, ahe chupe iya ité. ⁵ Acoi ava oyemoviracua vahe mbahe-mbahe tēi apoēhi ãgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar piñe sui, asenoira rumo che Ru rovai iyavei sembiguai eta rovaque avei curi. ⁶ ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! ehi' erera icuachía.

Ñehesa Filadelfia pendar upe

⁷ "Eicuachía avei Tūpa rembiguai Filadelfia pendar che reroyasareta rārosar upe: 'Co seco maranehi vahe, supi tupri vahe ité, vireco vahe mborerecuasa aracahendar mborerecuar guasu David nungar, acoi omboise que oquenda, ñepei yepe que ava nomboyai chietera; iyavei acoi omboyase, ñepei yepe que ava nomboi chiete aveira, ahe aipo ehi: ⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pēu pemombehu vaherä che recocuer. Ahe que ñepei yepe ava nomboyai chietera yuvireco. Esepia, yepe pe nimirata tupri vahe, peroya ité rumo che ñehe iyavei ndacheñomi eté ava sui peye. ⁹ Co Caruguar reroyasar semira tēi vahe, ore Tūpa rembiporavo judío oroico, ehi tēi vahe, ndahei rumo ahe eté vahe yuvirecoi. Ahe amoñenopihapa ucara pe rovai, toicua yuvireco che pe raisusa, che yapave. ¹⁰ Esepia, peroya ité che porocuaita, peymoviracua ité evoco mbahe tēi upe peico. Evocoiyase che opoepira acoi ari tecõahasa ouse opacatu ivi rupindar upe curi. ¹¹ Ayevi poyavara. Peyemoviracua catu Tūpa reroyasa pereco vahe rese. Evocoiyase ñepei yepe que ava ndovirocuai chietera Tūpa suindar porerecosa pe sui.

¹² Acoi oyemovíracua vahe mbahe-mbahe tēi apoēhi ãgua yuvireco, ahe che Ru piri nara ité yuvirecoira. Ahe evocoiyase inungar-ra che Ru Tūpa rēta víracuasa ndopai vahe yuvireco. Sese arova ucara che Ru Tūpa rer iyavei che Ru Tūpa recua rer avei no, ahe Jerusalén piasu, evoco ou vaherā iva pendar che Ru Tūpa sui, iyavei che rer ipiasu vahe ité arovara sese no. ¹³ ¡Acoi ava osendu pota vahe, toyapisacaño Espíritu remimombehugüer rese che reroyasareta upe! ehi' erera icuachía.

Ñehesa Laodicea pendar upe

¹⁴ "Ecuachía avei Tūpa rembiguai Laodicea pendar che reroyasareta rārosar upe: 'Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tūpa rembiapo, ahe aipo ehi: ¹⁵⁻¹⁶ Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raimi tēi vahe nungar peico pe rembiapo pipe. ¡Ñepei reseve vahe rumo aipota, ndahei iguayi tēi vahe! Pe recocuer rumo iguayi tēi vahe nungar, sese opomboyevíora cheyesui. ¹⁷ Esepia, pepihañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraíusa che Ru rovaque inungar ndasesapisoí vahe peico. Iyavei ndapeyavíi nditurucuai vahe peico. ¹⁸ Sese opomboaracua; peseca iva pendar oro tatave imoatiropri nungar che sui pe paraísuéhi iri ãgua che Ru rovaque; peseca avei turucuar morochi vahe teco tuprisa peyeupe che suindar nani tupri vahe nungar pipe pe recoéhi ãgua, pe chihéhi ãgua avei iyavei inungar ava oseca mosá güesa upe nara osareco iri ãgua, égue peye aveira. ¹⁹ Che añehe pírata seco mohivi ãgua che rembiaisu upe yepi. Peyemongueréhi catu, pemboasi ité pe recocuer che Ru Tūpa upe pe yeví ãgua. ²⁰ Esepia, inungar que ava oquenda omotara oquendipive ohã viña, égue ahe pe pihave vichico; pesenduse che fihe, pemboira cheu. Che evocoiyase aíquera pe píri, yacarura oyepiri. ²¹ Acoi ava oyemovíracua vahe mbahe-mbahe tēi apoéhi ãgua yuvireco, ahe amboguapi ucara che ipive imoi che porocuaise, inungar che mbahe tēi reco reroyi pare, aguapi che Ru ipive vîte. ²² ¡Acoi ava osendu pota vahe, toyapisacaño Espíritu remimombehugüer rese che reroyasareta upe! ehi imombehu pêu' erera icuachía" ehi Jesús cheu.

4

Tūpa mboeteisa ivave

¹ Ipare asepia mbahe inungar oquenda oyemboi vahe ivave. Ahese evoco fihesa ipírata vahe mimbi nungar yipindar oñehe vahe cheu, ahe asendu iri: "Eyeupi ave. Che evocoiyase mbahe amboyeçuara ndeu mbahe imboaviyepirâ curi" ehi.

² Ahe pipeve voi, Espíritu píratasa pipe aico iyavei asepia tenda ivave, ahe iharive ñepei oguapi oí. ³ Co oguapi vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda. ⁴ Iyavei asepia evoco rese oyere tupri ambuae veinticuatro tenda, ahe iharive oguapi yuvinoi veinticuatro avei icuapri yuvirecoi vahe; iturucuar morochí vahe yuvireco iyavei oáca rese omboyeré tupri oro apopri yuvireco. ⁵ Evocoiyase Tūpa renda sui yuvinose overa-vera vahe, iyavei siapu guasu vahe, osunu vahe no; iyavei siete tupri tataendi sendipa

yuvireco evoco tenda rovai, ahe co siete tupri Tūpa espíritu. ⁶ Evoco tenda rovai oime avei ndoyavii tupri para guasu tīpiu vahe oyecua tupri vahe mbahe ipipe.

Ambuae tenda pāhu rupi oyere tupri Tūpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquiuei coti avei no. ⁷ Yipindar yuvirecove vahe pāhu pendar ahe ndoyavii tupri yagua pīta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vīra guasu oveve vahe. ⁸ Evoco iva pendar irungatu yuvirecove vahe vīreco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pītu rupi aipo ehi yuvireco: “¡Santo, santo, santo ité secoi, yande Yar Tūpa ité, ahe mbahe mboavaais-aréhi, yipivé vahe ité, cūriteindar, apiréhi vahe!” ehi yuvireco.

⁹ Evoco yuvirecove vahe omboetei yuvireco, “Aviye ndeu” ehi co oguapi vahe oī tenda harive ndopai vahe upe. ¹⁰ Ëgüe ehise evocoiyase veinticuatro tupri icuapri yuvirecoi vahe, ahe oñenopiha imboeteisa pīpe sovai yuvireco. Ipare osequi oāca resendar oyere tupri vahe omborerecuasa resendar sovai aipo ehi:

¹¹ “Ore Yar Tūpa, iya ité nde mboeteisa, ndeu sapucaisa nde pīratasa rese. Esepio, nde ereyapo vahe mbahe opacatu; nde remimbotar rupi niha oime opacatu mbahe”
ehi yuvireco chupe.

5

Ovesami upe güeraño iyacatu cuachiar imboyapri mboi āgua

¹ Che asepia cuachiar Tūpa vīreco vahe oacato coti, icuachiapri ipipe coti, ocar coti avei no, imboyapri siete sello pīpe. ² Ipare asepia Tūpa rembiguai seco ivate vahe, ahe oporandu pīrata oico aipo ehi: “¿Ava upe vo iya cuachiar mboi āgua iyavei sello imboyeroyapri mondoro āgua no?” ehi. ³ Ndipoi eté rumo que iva pendar, ivi pipendar, ivivri pendar oicatu vaherā cuachiar pīpira sepia āgua viña. ⁴ Evocoiyase che ayasehó iteanga. Esepio, ndipoi eté que ñepei yepe oime angara aviye vahe cuachiar pīpira sepia āgua viña. ⁵ Ahese icuapri pāhu pendar ñepei aipo ehi cheu: “Ereyaseho iri eme. Esepio niha, evoco ava yagua pīta yahe vahe chupe, Judá suindar, acoi mborerecuuar guasu David suindar avei, ahe niha Caruguar osecoreroyi. Sese iya ité chupe siete sello mondoro cuachiar pīpira āgua” ehi.

⁶ Evocoiyase, asepia Tūpa rovai iva pendar irungatu yuvirecove vahe pāhuve, icuapri yuvirecoi vahe mbiterve, ñepei ava Ovesami nungar ihāi, aviye seropovēhepri. Ahe niha vīreco siete tupri sāchi, siete tupri avei sesa; sesa evocoiyase siete tupri Tūpa espíritu yuvirecoi opacatu ivi rupi imboguatapri. ⁷ Ipare evoco Ovesami oso, oipisi cuachiar evoco tenda harive oguapi vahe yacato coti sui; ⁸ ipisi pare, evoco irungatu yuvirecove vahe, iyavei veinticuatro tupri icuapri, ahe oñenopihapa Ovesami rovai yuvireco. Oyacatu ñepei-peí vīreco arpa yuvireco, itaisi rīru oro apopri, ahe avei vīreco yuvireco, ahe itaisi niha Tūpa reroyasar yeruresa. ⁹ Osapucai ipiasu vahe sapucaisa pīpe aipo ehi yuvireco: “Ndeu iyacatu ité cuachiar pīsi āgua, imboyapri mondoro āgua avei no.

Esepia niha, nde yucapri seropovēhepri ereico.

Evocoiyase nde ruvi pipe eremboepipa Tūpa upe nara opacatu ava ambuae-ae tēi vahe, iñehe ambuae-ae tēi vahe avei, ñepei-peí tecua yacatu rupindar, ivi rupindar avei yuvireco.

¹⁰ Iyavei eremomborerecua uca Tūpa upe nara, erembopahi uca avei no, ipare ahe oporocuaira opacatu ivi rupi yuvireco” ehi osapucai yuvireco.

¹¹ Ipare asepia, asendu avei Tūpa rembiguai rehii ñehe evoco oyere tupri vahe tenda rese yuvireco, iyavei evoco yuvirecove vahe ñehe, icuaipri ñehe avei asendu setá iteanga yuvirecoi. ¹² Ahe aipo ehi pírata yuvireco no:

“¡Co Ovesami yucapirer, ahe chupe iyacatu ité mborerecuasa pisi água, opacatu Tūpa suindar poreretecosa pisi água, mbaecuasa, píratasa, mboyeroyasa, poromboeteisa, iyavei sapucaisa pisi água avei no!” ehi.

¹³ Ahese asendu avei opacatu Tūpa rembiapo ivave yuvirecoi vahe, ivi pipendar, ivivri rupindar iyavei para guasu pipendar, aipo ehi yuvireco: “¡Toime sapucaisa, Tūpa upendar mboyeroyasa, imboeteisa, iyavei píratasa, ahe timondosa apírehí vaherā Tūpa acoi güendave oguapi vahe upe, Tahir Ovesami nungar upe avei no!” ehi.

¹⁴ Evoco irungatu ava yuvirecove vahe, “¡Égüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopihá yuvireco sovai imboeteisave.

6

Siete sello

¹ Ipare asepia acoi Ovesami omondoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pāhu pendar oñehe pírata. Iñehe ndoyavii osunu vahe, “¡Erio!” ehi cheu. ² Ahese asepia cavayu morochi vahe, ahe ava ihari pendar vireco vīrapar. Chupe omundo yeguaca yuvireco. Égüe ehi ahe osē seco pírata catu vahe ava reco reroyi água.

³ Omendorose acoi Ovesami imoñuvíriosas sello, ahese asendu imoñuvíriosas yuvirecove vahe pāhu pendar ñehe, “¡Erio!” ehi vahe cheu.

⁴ Ipare osē cavayu píra vahe, ahe ava ihari pendar oipisi píratasa mbahe tuprisa rerocua água ivi pipendar ava sui ‘toyeyuca-yuca tēi yuvireco’ oyapave. Ipare imondosa quise pucu chupe.

⁵ Omendorose acoi Ovesami imombosapisa sello, ahese asendu imombosapisa yuvirecove vahe pāhu pendar ñehe, “¡Erio!” ehi vahe cheu. Amahe sese, ipare asepia cavayu sū vahe, ahe ava ihari pendar vireco opo pipe mbahe rāhasa. ⁶ Ipare asendu yuvirecove vahe cotindar ñehe, ahe aipo ehi: ‘Nñepi kilo trigo serocuasa guarePOCHI ñepei ari resendar mboravíqui reprí pipe, mbosapi kilo cebada evocoiyase serocuasa avei ñepei ari resendar mboravíqui reprí pipe no. Pemocañi eme mbahe quirá iyavei uva ricuer avei no’ ehi.

⁷ Evoco Ovesami omendorose imoirungatusa sello, ahese asendu ava imoirungatusa ñehe aipo ehi: “¡Erio!” ehi cheu. ⁸ Amahe, ipare asepia cavayu iyu rasí vahe, ahe ava ihari pendar serer Tehōgür. Ipare saquicuei ou vahe oico ahe serer Omano-vahe-recosa. Ahe chupe

yuvireco imondosa teco píratasa ivi imoirungatusa yahocuer rupi iguata água ava yuca água vavasa pipe, tieporéhi pipe, mbaherasi pipe, mbahe ípi pipe avei no.

⁹ Evoco Ovesami omendorose imbopoyandeposa sello, ahese asepia mbahe seropovéhepri rendavrive ava hñ, ahe yucasa vahe yuvireco Túpa Nehengagüer mombehusa sui tēi iyavei Jesús reroyasa sui tēi avei no. ¹⁰ Ahe aipo ehi pírata yuvireco: “Ore Yar Túpa seco maranehi, supi tupri vahe, ¿mbahese vo eremombaraisura ore yucasarer yuvirecoi vahe ivi pipendar ore repisave?” ehi yuvireco. ¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rívireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omendorose imoñepei ovasa sello, ahese oime ivi ririí ipíratá vahe. Ari evocoiyase sū, aviyé acoi turucuar sū vahe mano sendar yemondesa iyavei yasi pírá inungar tuvi, ¹³ yasitata evocoiyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi. ¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pāhu avei no osiri güenda sui yuvireco. ¹⁵ Mborecuareta avei co ivi pipendar yuvirecoi vahe opa tēi oñemi mbahecuar pipe yuvireco, ita guasu pāhu rupi avei yuvireco no, oyoya guasu seco ivate vahe, sundao rerecuareta, mbahe yar seco píratá vahe, iyavei opacatú tupri mbiguai eta, ava ndahei vahe mbiguai avei; ¹⁶ iyavei aipo ehi yuvireco ivitri upe, itape guasu upe avei no, “¡Eviapi ore haríve, toroñemipa tēi Túpa sui iyavei Ovesami sui acoi ombou vahe co poronupasa ipírata vahe oreu! ¹⁷ Esepio, oyepota ité Túpa ñemoirosa oreu. Ndipoi chietera ava oyemovíracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Túpa rembiguai iva pendar yuvinohai vahe irohi coti, norte coti, ari sësa coti, caharu coti avei no omombihu tupri vahe irungatu ivitu yuvirecoi vahe ivi hari rupi ipeyuéhi água, que para guasu pipe angara viña, que ñepei yepe ivira ro angara viña no. ² Ipare asepia avei ambuae Túpa rembiguai iva pendar ou vahe ari sësa coti sui, ahe vireco oyese Túpa oicove vahe rer mondosa. Ahe niha osapucai píratá evoco iungatu tupri Túpa rembiguai iva pendar yuvirecoi vahe upe, oipisi vahe píratasa ivi, para guasu momara água yuvireco, aipo ehi: ³ “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Túpa rembiguai eta upe isiva rese Túpa rer icuachiapri!” ehi.

⁴ Ipare asendu Túpa rer oipisi vahe retacuer: ciento cuarenta y cuatro mil tupri, evoco opacatu doce judío ramoi suindar pāhu sui iporavopri yuvireco. ⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar, ⁶ doce mil tupri Aser suindar, doce mil tupri Neftalí suindar, doce mil tupri Manasés suindar, ⁷ doce mil tupri Simeón suindar, doce mil tupri Leví suindar, doce mil tupri Isacar suindar, ⁸ doce mil tupri Zabulón suindar, doce mil tupri José suindar, ipa evocoiyase doce mil tupri Benjamín suindar.

Ava rehíi iturucuar morochi vahe

⁹ Ipare asephia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhana vahe Tūpa rovai Ovesami rovai avei yuvireco no, ahe ndayaicatui eté ipapapa âgua. Esephia, setá etepri yuvireco iyavei iturucuar morochí vahe pâve; pindo-pindomi vireco opove yuvireco no.

¹⁰ Ipare opacatu guasu oñehe pírata yuvireco aipo ehi:

“¡Poropísirosa yande Ru Tūpa suindar, ahe oguapi vahe oĩ güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai iva pendar yuvirecoi vahe oyere tupri Tūpa renda rese, icuapri rese avei yuvinoha iyavei irungatu yuvirecove vahe rese avei no; ahese oyeaiti omboya ité osiva ivi rese senda rovai Tūpa mboeteisave yuvireco, ¹² aipo ehi:

“¡Égüe tehi!

Sapucaisa, poromboeteisa, mbahecusa, ‘¡Aviye ndeu’ hesa, poromboyeroyasa, mborerecusa,

teco píratasa avei tasecoi yande Ru Tūpa upe!

¡Égüe tehi apírehí vaherā ité yepi!” ehi.

¹³ Ahese icuapri ipáhu pendar aipo ehi cheu cute: “¡Ereicua vo co ava rehii iturucuar morochi vahe pâve yuvirecoi, ereicua que sui píha yugüero?” ehi. ¹⁴ Che evocoiyase, “Nde rumo ereicua” ahe chupe. Ipare ahe aipo ehi cheu: “Co acoi yuvinose tupri vahe ité teco asisa sui yuvireco, inungar oyosei, omomorochi vahe oturucuar, égüe ehi avei güecocuer imomorochi Ovesami ruvi pipe yuvireco.

¹⁵ “Sese Tūpa renda rovai yuvirecoi, chupe mbahe apo âgua ari, pítu rupi avei sêta pipe.

Güendave oguapi vahe oĩ, güecocuer pipe osepira.

¹⁶ Evoco ndiyumbiasi iri chira yuvireco, ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

¹⁷ Esephia, evoco Ovesa secoi Vu renda rovai, ahe osârora ava rehii sereco inungar ovesa rârosar.

Ipare opara viraso tecovesa resendar i ndopai vahesave imboihu âgua. Tūpa evocoiyase omombituhupara imboyasehosa sui yuvireco” ehi.

8

Imoñuvirío ovasa sello iyavei itaisi rapisa oro apoprí

¹ Ipare coiye cute co Ovesami omendorose imoñuvirío ovasa sello cuachiar mboyasa ichui, ahese siú tupri ivave ñepei hora yemombitesa rupive. ² Ichui asephia siete tupri Tūpa rembiguai iva pendar yuvinohai vahe Tūpa rovai, chupe opa imondosa siete tupri mimbi. ³ Ipare ou ambuae Tūpa rembiguai iva pendar oro itaisi rapisa reseve, iyavei ou ohâ itaisi rapisa renda rovai; ipare imondosa tuvichá itaisi chupe oicuavéhe vaherā oyoya tupri opacatu ava Tūpa upendar yeruresa rese oro mbahe reropovéhepri renda harive; ahe Tūpa renda rovai chini vahe.

⁴ Itaisi râtachi evocoiyase oso Tūpa rembiguai iva pendar po sui. Égüe ehi oyepota oso Tūpa recosave, oyoya tupri chupendar yeruresa rese.

⁵ Ipare evocoiyase Tūpa rembiguai iva pendar opoco itaisi rapisa rese, omboapipo mbahe reropovéhepri renda pendar tâtapii pipe. Ipare opa omombo ivi harí rupi. Aheseve voi osunu vahe opororo-roró, overa-vera iyavei ivi orírii.

Siete vahe mimbí

⁶ Evocoiyase siete tupri Tūpa rembiguai iva pendar oyemoingatu voi güemimbi moñehe äqua yuvireco.

⁷ Yipindar vahe Tūpa rembiguai omoñehe güemimbi, ahese imombosa ivi harí rupi amanda iyavei tata oyeseha vahe tuví rese. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihí reseve avei opa yuvirocaí.

⁸ Imoñuviriosa Tūpa rembiguai omoñehe güemimbi. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yohacuer oyeapo tuví. ⁹ Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imocañisa.

¹⁰ Ipare imombosapisa Tūpa rembiguai iva pendar omoñehe güemimbi, ahese yasitata tuvichá vahe ovíapi iva sui ou. Sendi guasu inungar acoi ivira rese tata sendi guasu vahe. Ahe ovíapi iai mombosapisa yahocuer pipe iyavei ivi sui i ohë vahe mombosapisa yahocuer pipe avei no. ¹¹ Yasitata rer evocoiyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

¹² Imoirungatusa Tūpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pítu mombosapisa yahocuer pipe avei no.

¹³ Ipare asepia, asendu avei no víra guasu ovevese iva mbíter rupi, aipo ehi pucu oñehe oico: “¡Too, too! ¡lparaisu catura moco ava yuvirecove víte vahe ivi pipe yuvireco acoi omoñehese ambuae mbosapi Tūpa rembiguai güemimbi yuvireco!” ehi.

9

¹ Tūpa rembiguai imbopoyandeposa omoñehese güemimbi, ahese asepia yasitata ovíapi vahe iva sui ou ivive. Ipare chupe imondosa ivicuar picucu pítmimbi vahe mboisa. ² Ipare omboise ivicuar rovapisa, ichui opúha tâtachi, inungar acoi horno guasu pipe sui osë vahe. Evocoiyase evocoi tâtachi ndosesape uca iri ari upé, níporéhi iri eté mbahe. ³ Iyavei evocoi tâtachi sui opa yuvinose tucru guasu rehii oñemosai opacatu ivi rupi; chupe avei imondosa seco pírata äqua inungar acoi mbaherumbiquiäpe. ⁴ Icuaisa rumo opacatu capihí mbahe rocri iyavei ivíra momaraëhi äqua, égue ehi rumo acoi ava nomboyecuái vahe osiva rese Tūpa rer, chupe nara ité. ⁵ Nimondosai rumo mborocuaita chupe ava yuca äqua. Égue ehi rumo ‘tomombaraisu pucu rane poyandepo yasi rupi sereco’ oyapave tēi, inungar tupri acoi mbaherumbiquiäpe rasicuer.

⁶ Evocoi ari rupi ava oipota tēira omano äqua yuvireco viña. Imanosa rumo que vítera yuvireco ichui.

⁷ Tucru guasu rehii inungar cavayu imoingatupri vavasave nara yepi; oäca rese evocoiyase vireco ndoyavii yeguaca oro apopri, iyavei sova avíye tupri ité ava repiaca. ⁸ Iha ndoyavii cuña ha, sãi evocoiyase ndoyavii tupri yagua píta räi. ⁹ Setecuer evocoiyase oyopia tupri guarepochi apopri, iyavei ipopo riapugüer avíye tupri ité acoi cäreto riapugüer cavayu vinoña vahe vavasave. ¹⁰ Vireco vuguai rese opopiar avíye mbaherumbiquiäpe popiar. Ahe niha vireco opíratasa poyandepo yasi

rupi ava momara ãgua tẽi. ¹¹ Evocoii tucru guasu rerecuar, ahe icuapi*r* iñicuar ipicucu vahe mboi ãgua. Ahe serer hebreo ñehe pípe Abadón; griego ñehe pípe evocoiyase Apolión ehi.

¹² Opa yipindar vahe mbahe-mbahe tẽi; oime vîte rumo co pare ñuvirío mbahe tasi vahe.

¹³ Imoñepei ovasa Tûpa rembiguai omoñehese güemimbi, ahese asendu ñeheisa itaisi rapisa renda oro apopri Tûpa rovaindar irungatu sâchi vahe pâhu sui. ¹⁴ Ahe aipo ehi evocoii imoñepei ovasa Tûpa rembiguai upé: “Eyorapa evocoii irungatu Tûpa rembiguai ñapichimbri iai guasu Eufrates ñivirindar” ehi. ¹⁵ Evocoiyase opa yorasa ava mombosapisa yahocuer yuca ãgua yuvireco. Esepiá, evocoii imoingatupri co ari rupi tuprise nara yuvireco. ¹⁶ Ipare asendu sundao rehii cavayu harive yuvirecoi vahe, ahe setacuer doscientos millones tupri.

¹⁷⁻¹⁸ Ëgüe ehi asepia cavayu rehii che quer nungar pípe, ihari pendar evocoiyase vireco oPOCHIHA rupi tupri oyoepisa guareepochi apopri yuvireco, ahe iparagüer píra vahe tata nungar, sovi vahe, iyu vahe avei no. Cavayu rehii ãca evocoiyase aviye tupri yagua píta ãca, iyuru sui evocoiyase yuvinose-nose tata, tâtachi iyavei azufre. Ipípe sui ava mombosapisa yahocuer opa tupri omano yuvireco. ¹⁹ Esepiá niha, cavayu píratasa iyuru rese chini, suguai rese avei no; ahe suguai ndoyavii tupri ité mboi ãca, ipípe avei ava omomara.

²⁰ Ava rumbírer rumo nomanopa vîtei vahe co mbahe tẽi sui yuvireco, nosecuñaro eté güecocuerai yuvireco. Ndopoi potai eté caruguar mboetei aisa sui, iyavei opacatu mbahe rahanga tẽi oro apopri, guareepochi, bronce, ita, anise ivira apopri mboeteisa sui avei yuvireco. Evocoii mbahe apopri rumo ndosarecoi vahe, ndosendui vahe ité mbahe, ndoguatai vahe avei. ²¹ Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

10

Tûpa rembiguai iva pendar vireco vahe icuachiapri cuachiarmi

¹ Ipare asepia ambuae Tûpa rembiguai iva pendar ipíratá vahe ogüeyise iva sui ou mbahe pítu pâhuve; ahe ñaca rese arco iris oyere tupri. Sova sendí aviye ari, setima evocoiyase ndoyavii tata rendigüer opúha tupri vahe. ² Cuachiarmi oyemboi vahe vireco opove. Opí oacato cotíndar pipe opíro para guasu rese, ambuae opíve evocoiyase opíro ivi rese. ³ Evocoiyase sâse píratá, inungar yagua píta râse; sâsese, evocoiyase siete tupri osunu vahe ñehe oyendu yuvireco. ⁴ Oñehepase, ahese iñehe che aicuachiara viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiai chietera” ehi cheu.

⁵ Evocoiyase Tûpa rembiguai asepia vahecuer, ahe acoi opíro vahe para guasu rese, ivi rese avei opo oacato cotíndar omopuha iva cotí.

⁶ Ichui Tûpa ndopai vahe rer pipe evocoii oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera; ⁷ oyepotase rumo imoñuvirío ovasa Tûpa rembiguai upé güemimbi moñehe ãgua, ahese imboaviyessara Tûpa remimbotar yipindar ndicuasai vahe, ahe acoi omombehu vahe güembiguai oñehe mombehusr upé aracahe” ehi.

⁸ Ñehesa asendu vahe iva sui oñehe iri cheu aipo ehi: “Eso, tereipisi cuachiaimi imboipri Tūpa rembiguai vireco vahe evocoí opíro vahe para guasu rese ohā, ivi rese avei no” ehi. ⁹ Evocoiyase aso Tūpa rembiguai upe, aporandu cuachiaimi rese, ahese ahe aipo ehi cheu: “Ndo co, eipisi, ehu. Nde yuru pipe evocoiyase sêhera eiri nungar, nde aviterve rumo irora” ehi cheu.

¹⁰ Ahese aipisi cuachiaimi cute Tūpa rembiguai sui, ipare ahu; yipindar sêhé che yuru pipe inungar eiri, amocopase rumo, che aviterve iró cheu. ¹¹ Evocoiyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborerecuar rese avei no” ehi.

11

Ñuvirío ava Tūpa recocuer mombehusar

¹ Ipare ombou vara mbahe râhasa yuvireco cheu, ichui aipo ehi yuvireco cheu no: “Erio, teresâha tûparo, mbahe reropovéhepri renda avei, ipare opara ereipapa ipipendar Tūpa mboeteisar retacuer” ehi. ² “Nderesâhai chira rumo ñachimbi pipe tûparo rocar rupi. Esepia, evocoí opa imondosa ava Tūpa ndociuai vahe upe, ahe opíro rora tecua nimarai vahe rese yuvireco cuarenta y dos yasi rupi” ehi. ³ “Ipare ñuvirío ava amondora che recocuer mombehu água opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai. ⁵ Acoi que oimese ovireco mara pota vahe, ahese che reco mombehusar yuru sui osëra tata sapipa água; égue ehira ava omano que che reco mombehusar reco momara potasar. ⁶ Co ñuvirío vireco opíratasa oqui vahe mombita água, acoi ari rupi che reco mombehu viteseve yuvireco; iyavei vireco píratasa i recuñaro água tuvi pipe yuvireco, imombaraisu uca água avei ivi opacatu-catu tēi mbaherasi pipe güemimbotar rupi.

⁷ Omboavíyepase rumo Tūpa reco mombehusa yuvireco, ahese osëra ivicuar guasu ipicucu vahe sui mbahe ípi vai. Ahe ovavara sese, osecopira, ichui oyucara. ⁸ Sehögüer evocoiyase yangarecuavéhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no. ⁹ Ipare mbosapi ari yemombitesa rupi, ava-ava tēi tecua rupindar, ava ambuae-ae tēi vahe, iñehe ambuae vahe iyavei ambuae-ae ivi rupindar osepiaño têira sehögüer yuvireco iyavei ahe noñoti ucai chietera ava upe yuvireco. ¹⁰ Ava yuvirecove vahe ivi pipe, ahe oviharetera yuvireco imano rese. Égue ehira sorivete, iporerecora oyese yuvireco. Esepia, evocoí ñuvirío ava Tūpa ñehe mombehusar imombaraisupirer yuvirecoi.

¹¹ Mbosapi ari yemombite pare rumo, Tūpa opa ombogüerayevi, ahese opúhapa yuvireco. Evocoiyase ava opacatu osepia vahe osiquiyé iteanga yuvireco ichui. ¹² Ipare ahe ñuvirío osendu yuvireco ñehesa ipírata vahe iva suindar aipo ehi vahe: “¡Peyeupipa ave ivate!” ehi. Evocoiyase opa oyeupi ivave yuviraso iva quiha pâhu rupi oamotaréhisareta rembiepiave. ¹³ Aheseve voi oime ivi rírii tuvichá vahe, ichui tecua guasu imbodyesa yahocuer opa onduru; ahese siete mil tupri ava opa omano

yuvireco. Evocoiyase ava rumbirer, osiquiyepave tēi osapucat Tūpa iva pendar upe imboeteisa piye yuvireco.

¹⁴ Opa mbahe-mbahe tēi moñuviriosas cute; ou poyava irira rumo imombosapisa.

Imoñuvirío ovasa Tūpa rembiguai omoñehe güemimbi

¹⁵ Imoñuvirío ovasa Tūpa rembiguai omoñehese güemimbi, ahese oyendu ñehesa ipírata vahe iva suindar aipo ehi vahe:

“Yande Yar Tūpa, Sembiporavo Poropísicosar avei vireco co ivi pendar mborerecuasa opovrīve yuvireco cute.

Ahe evocoiyase mborerecuar apírēhi vaherā itera secoi” ehi.

¹⁶ Evocoiyase veinticuatro tupri icuaipri, evocoí oguapi vahe yuvinoi Tūpa renda rovai, ahe oyeaví omboya ité osiva ivi rese imboeteisa piye yuvireco,¹⁷ aipo ehi:

“Aviye ndeu ore Yar, Tūpa mbahe mboavaisarēhi, nde acoi yipisuive vahe ité,

ereicoveño avei cūritei.

Esepia, nde píratasa tuvichá vahe piye ereporocuai eico.

¹⁸ Ambuae tecua rehíi pendar nde amotarehí ité yuvireco.

Nde ñemoírosa rumo cūritei oyepota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe,

ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi cotí catu vahe upe avei no; iyavei eremocañira co ivi piye mbahe tēi rerusar” ehi yuvireco.

¹⁹ Ahese oyemboi tūparo iva pendar, iyavei oyecua tupri cuachiar porocuaita resendar riru. Ipare overa-vera, siapu guasu, osunu, ivi orírii, amanda osururú avei no.

12

Cuña iyavei mbahe ipi oporomocañi vahe

¹ Evocoiyase iva rese oyecua mbahe poromondiisa tuvichá vahe ambuae mbahe mboyecua água: oime cuña iturucuar inungar arí rendigüer, aviye opíro vahe yasi rese ohã, oáca yeguaca rese doce tupri yasitata vireco. ² Co cuña ipuruha oico, sásé tēi omembrí iha pota água oyesui. Esepia niha, oiporará ité tasicuer. ³ Ipare coiyé oyecua iva rese ambuae mbahe mboyecua tuprisa: mbahe ipi píra vahe, ahe ñaca siete tupri, sáchi evocoiyase diez iyavei vireco yeguaca oáca yacatu. ⁴ Sugual evocoiyase ombotiriri yasitata iva pendar imombosapisa sui ñepei iyahocuer seraso. Ipare opa omombo ivive. Ahe evocoiyase opita osáro cuña imembira pota vahe rovai ohã, “Tahupaño voi imembrí oha ramoseve” ehi viña. ⁵ Ipare co cuña membrí oha cuimbahemi, ahe mborerecuar virecora mbococa guarepochi apopri, ipírata catu vahe secoira opacatu ava ivi rupindar upe. Ichui serocuasa voi serasosa Tūpa rovai. ⁶ Cuña evocoiyase oñemi ivi iporupiréhisave oso. Aheve omoingatu Tūpa iyemboerecua água, eipeve icaru água mil doscientos sesenta arí rupi.

⁷ Oime avei vavasa ivave; ahese Tūpa rembiguai iva pendar ivate catu vahe Miguel güeru ovoya eta ovava água mbahe ipi oporomocañi vahe upe ivoya upe avei yuvireco. ⁸ Ndoicatu eté rumo Miguel recopi água yuvireco. Sese ndipoi eté ivave seco água yuvireco chupe. ⁹ Ëgüe ehi

imboyepepisa mbahe ipi oporomocañi vahe reco píratasa sembiguai eta reseve; opa imombosa ivi pipe yuvireco. Evocoí mboi vai, “Caruguar” ehi vahe yuvireco chupe; “Satanás” ehi avei yuvireco chupe. Evocoí niha ava ombopa-mbopa tēi vahe opacatu ivi pipe yuvireco.

¹⁰ Evocoiyase asendu ñehesa ipírata vahe ivave, aipo ehi vahe: “Cûritei oime poropísirosa, píratasa iyavei yande Tûpa mbororecuasa, Poropísirosa mbororecuasa avei no.

Esepia niha, imboyepepisa iva sui acoi oseca-seca vahe yande rivri Tûpa reroyasareta recocuer momara água pítu, ari yacatu rupi yande Ru Tûpa rovai.

¹¹ Yande rivri osecoreroyi Ovesami ruví piyere pipe sui yuvireco iyavei acoi secocuer mombehu tuprisa pipe sui avei no.

Esepia niha, ndosiquíyei eté güetecuer moçañi água yuvireco.

Ahe rumo oyemoingatu voi eté omano água.

¹² ¡Peyembovíha catu pe iva iguar peico vahe!

Pe rumo, jeparaísu catura ivi pipe, para guasu pipe avei peico vahe!

Esepia niha, Caruguar ogüeyi pêu oñemoirosa pipe, oicuase güeco pucuëhi água” ehi.

¹³ Ipare mbahe ipi oporomocañi vahe oicuase imombopri güecose ivi rese, ahese omoña cuña imembrí cuimbahemi reseve yamotaréhisa pipe.

¹⁴ Evocoí cuña upe rumo imondosaño ñuvirío vira guasu pepo iveve água chupendar ivi imoingatupri ava poréhísave seco água, amombri mbahe ipi oporomocañi vahe sui. Aheve oyopoi mbosapí aravíter yemombitesa rupive. ¹⁵ Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tēi’ oyapave viña. ¹⁶ Iví rumo oime co cuña pítiviisa, ahe oyeca. Ipare opa omoco iai evocoí mbahe ipi oporomocañi vahe rembiapo. ¹⁷ Evocoiyase, oñemoiró iteanga cuña rese, ipare oso ovava ambuae ichuindar rehii rese, ahe omboyeroya vahe ité Tûpa porocuaita yuvireco iyavei yuvirecoi tupri vahe Jesucristo remimombehu rupi. ¹⁸ Ipare mbahe ipi oporomocañi vahe opita para guasu popive ohá.

13

Ñuvirío mbahe ipi vai

¹ Ipare asepia para guasu pipe sui osëse mbahe ipi vai, ahe siete tupri ñaca vahe iyavei diez tupri sâchi. Guâchi yacatu evocoiyase vireco ñepei-peí oyeguaca, iyavei oâca yacatu rese vireco terer Tûpa upe mbahe tēi vahe. ² Co mbahe ipi vai avíye tupri acoi yaguar iparaú vahe; iyavei ipi avíye tupri oso pi, iyuru evocoiyase avíye yagua píta yuru. Mbahe ipi oporomocañi vahe evocoiyase omondo opíratasa iyavei omboiterecuasa chupe. ³ Ñepei mbahe ipi vai áca oyeapicha guasu vahe ndoyavii omano vaherâ ité viña; ahe rumo ocuera tupri iriño evocoiyase opacatu guasu ava sepiase, ndoyembovíhai. Ichui viroya catu yuvireco. ⁴ Omboetei guasu mbahe ipi oporomocañi vahe sereco yuvireco. Esepia, omondo omboiterecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaherâ sese” ehi yuvireco.

⁵ Iyavei mbahe ipi vai upe ipotasa iyemboívate ai água oñeho pipe ava rovaque iyavei Tûpa reroíro água avei no, iyavei mborerecuuar guasu seco

āgua cuarenta y dos yasi rupi. ⁶ Ēgüe ehi iñehe mara-mara tēi Tūpa rese, iñehe-ñehe tēi avei serer maranehi rese, sēta rese, iva pendar rese avei no. ⁷ Imondosa avei chupe vavasa apo uca āgua Tūpa upendar ava eta upe secopi āgua. Ipare imondosa avei mborerecuar seco āgua chupe ava ambuae-ae tēi vahe upe, secua ambuae vahe upe, ambuae-ae tēi iñehe vahe upe, iyavei ambuae ivi rupindar upe avei no. ⁸ Ipare omboetei ai sereco yuvireco opacatu ava ivi pipendar acoi ivi apoēni suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ “Acoi ava oyequenda uca vaherā, oyequenda ucaño itera; iyavei acoi ava omano vaherā quise pucu pipe, ipipeño ité omanora.”

Co pipe oyecua Tūpa rese yeroyasa iyavei ipíratasa ava chupendar rese.

¹¹ Ipare asepia ambuae mbahe ipi vai osē vahe ivivri sui. Co vireco ñuvirio guāchi ndoyavii tupri Ovesa rāchi, mbahe ipi oporomocañi vahe ñehe pipe rumo oñehe oico. ¹² Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rāgüler sui. ¹³ Iyavei oyapo setá mbahe poromondiisa mbahe mboyecua āgua. Iva sui eté niha oiti uca tata ivive imbou opacatu ava rembiepiave. ¹⁴ Ombopa tēi ava ivi pipendar yuvirecoi vahe mbahe poromondiisa pipe evocoi imondosa vahe yapo āgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo āgua imboeteisave. ¹⁵ Ipare imondosa píratasa chupe tecovesa mundo āgua evocoi sahanga upe ‘toñehe, toyuca uca avei ava opacatu omboeteihisar’ oyapave. ¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecopri vahe upe, mbiguai tēi upe, ahe chupe, “Toyecuachía opo oacato cotindarve yuvireco, anise osívave” ehi. ¹⁷ Ahese ava ndipoi eté oicatu vahe mbahe rerocua, anise que mbahe mundo āgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Jya pereco mbahecusa co renducua tupri āgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

14

144,000 ava iporavopri sapucaisa

¹ Ipare asepia Ovesami ivitrí Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco. ² Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, ēgüe ehi siapugüer. ³ Ipare osapucai sapucaisa ipiasu vahe yuvireco Tūpa rovai iyavei iva pendar irungatu yuvirecove vahe rovai, icuaipri eta rovai avei no. Ñepei yepe que iva pendar ndoicatui eté evocoi sapucaisa rese oyembohe vaherā. Ēgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pāhu sui, ahe güeraño tupri ité oicatu osapucai yuvireco. ⁴ Co ava ndoyapoi vahe ité mbahe co coti tēi cuña rese. Esepio, oñearo tupri

güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pāhu sui iyavei inungar yipindar mbahe seropovēhepri Tūpa upe, Ovesami upe avei. ⁵ Ndipoi eté que temira sese. Esepiá niha, ndipoi eté mbahe oyavi vahe yuvireco.

Mbosapi Tūpa rembiguai omombehu iñehe ava upe yuvireco

⁶ Evocoiyase asepia ambuae Tūpa rembiguai iva pendar oveve vahe iva mbiter rupi iyavei vireco Tūpa Ñehengagüer pīsirosa resendar ndopai vahe imombehu água opacatu ava co ivi pipendar upe: opacatu ivi rupindar upe, ava ambuae-ae vahe upe, iñehe ambuae-ae vahe upe, opacatu tecua rupindar upe avei no. ⁷ Ipare oñehe pírata aipo ehi: “Pesiquiye Tūpa sui iyavei pesapucai seco ivatesa rese chupe no. Esepiá niha, cûritei oyepota ari chupe ava recocuer rese iporandu água. Pemboetei catu oyapo vahecuer iva, ivi, para guasu, i ohë vahe avei no” ehi.

⁸ Ambuae Tūpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepiá niha, evocoí opa ombosavaipo opacatu ambuae tecua pendar ohigua yemboaguasa tēisa resendar pipe!” ehi.

⁹ Ipare ambuae Tūpa rembiguai iva pendar imombosapisa, saquicue moña aipo ehi píratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oye-cuachía água osiva rese, que opo rese no, ¹⁰ oipisi itera Tūpa ñemoirosa ipírata vahe ité; ipare omombaraisura setecuer azufre ocai vahe pipe güembigui iva pendareta reco maranehi rovaque, Ovesami rovaque avei no. ¹¹ Tâtachi icaigüer pendar evocoiyase oyeupira ndopai vaherâ, ahese ndipoi chietera pituhusa pítu, ari pipe evocoí mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

¹² ¡Égüe ehira Tūpa rese ité yuvirecoi vahe yeroyasa oyecua ahe acoi iporocuaita mboaviye tuprisar, Jesús reroya tuprisar avei yuvireco!

¹³ Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“Égüe ehi eté —ehi Espíritu imombehu—, opituhura oporavíquisa sui yuvireco. Esepiá, mbahe sembiapo rerâcua osora ivave supi” ehi.

Ivi pipendar recoñhasa

¹⁴ Ahese asepia iva quiha morochí vahe; iharíve ndoyavii ava oguapi vahe oñi. Vireco niha oyeguaca oro apopri oaca rese iyavei mbahe miti asiasa saimbé vahe vireco opove. ¹⁵ Ipare osé ambuae Tūpa rembiguai tūparo sui. Ahe osapucai pírata evocoí iva quiha haríve chini vahe upe: “¡Eyasia nde remiti iyavei emonuha nde rembiasia! ¡Esepiá, nde remiti ivi pendar yaviye ité!” ehi ava recocuer uve chupe. ¹⁶ Evocoiyase evocoí chini vahe oyasia güemiti ivive oico, ahese opa omonuha güembiasia.

¹⁷ Ipare osé ambuae Tūpa rembiguai tūparo sui, ahe avei vireco mbahe miti asiasa saimbé vahe. ¹⁸ Ipare ambuae Tūpa rembiguai osé mbahe reropovēhepri renda sui, ahe tata rese hañecosar secoi. Iyavei oñehe pírata evocoí vireco vahe mbahe miti asiasa upe aipo ehi: “¡Eyasia uva ha apacuar, evocoí oime vahe ivi pipe! ¡Esepiá niha, opa yaviye!” ehi.

¹⁹ Evocoiyase co Tūpa rembiguai inungar oyasia vahe uva ha égüe ehi opa ava ipoha ivi pipendar. Ipare opa oyapocatu Tūpa ñemoirosa râro

água. ²⁰ Ipare inungar uva ha icambeprí tecua cupeve, ēgue ehi co ava imombaraisu; ichui osē tuví evocoí tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

15

ipa siete tupri Tūpa rembiguai güeru mbaherasi yuvireco

¹ Ipare asepia ivave ambuae mbahe mboyecuasa tuvichá vahe poromondiisa: siete Tūpa rembiguai, siete tupri mbaherasi ipa vahe vireco vahe, ahe ipá vahe ité Tūpa ñemoírosa.

² Iyavei asepia para guasu ndoyavii yepiasa oyeseha vahe tata rese. Ahe ipopíve yuvinoha atí mbahe ípi vai recopisar, sahanga recopisar iyavei nomondo uca potai vahe serer cuachía água yuvireco oyese. Ahe vireco Tūpa upendar arpa yuvireco. ³ Ipare osapucai Tūpa rembiguai Moisés sapucaisa yuvireco, iyavei Ovesami sapucaisa aipo ehi: “Tuvichá opacatu mbahe nde rembiapo, che Yar Tūpa opacatu mbahe

mboavaísañehi; nde recocuer supi tupri vahe ité; seco ívi vahe.

¡Too, nde mborerecuar guasu opacatu ívi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei águia.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepiá niha, sepasia nde rembiapo supi tupri vahe” ehi.

⁵ Ipare asepia ivave oyemboise Tūpa rēta imaranehi vahe. Aheve acoi yapocatusa mborocuaita resendar. ⁶ Evocoiyase ichui yuvinosepa evocoí siete Tūpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoiyase oyeumbicua oPOCHIHA rupi tupri yuvireco. ⁷ Ipare ñepei evocoí irungatu iva pendar yuvirecove vahe pāhu pendar omondo siete tupri Tūpa rembiguai upé siete Tūpa ñemoírosa ríru oro apopri, ahe oicove vahe ité, ndopai vahe. ⁸ Ipare Tūpa rēta omboapípo tātachi, evocoí ou vahe Tūpa reco porañetesa iyavei ipíratasa sui. Aheve ndiyai eté que ava upé seique água acoi opase voi eté omomba siete tupri mbaherasi vai vireco vahecuer siete Tūpa rembiguai.

16

Siete Tūpa ñemoírosa ríru

¹ Evocoiyase asendu ñehesa ipírata vahe osē vahe Tūpa rēta pipe sui. Ahe aipo ehi siete Tūpa rembiguai yuvirecoi vahe upé: “Peso, tapeipiyerepa ívi harí rupi evocoí siete tupri mbahe ríru pipendar Tūpa ñemoírosa” ehi.

² Yipindar vahe Tūpa rembiguai opa oipiyere igua ríru pipendar ívi harí rupi; evocoí opacatu ava vireco vahe mbahe ípi vai rer oyese sahanga mboeteisar tēi avei, ahe chupe oime setá caracha vai tasi vahe.

³ Tūpa rembiguai imoñuviriosa opa oipiyere igua ríru pipendar para guasu pipe. Ahe evocoiyase oyeapo omano vahe ruví nungar; ichui opa omano opacatu mbahe yuvirecove vahe ipípe.

⁴ Tūpa rembiguai imombosapisa opa oipiyere igua ríru pipendar iai pipe, i ohé vahe pipe avei no. Ipare opa ahe oyeapo tuví yuvireco. ⁵ Co pare asendu Tūpa rembiguai i rese ihañeco vahe ñehesa aipo ehi:

“Nde seco tupri vahe ité ereico evocoí ava upé erembouse nde ñemoírosa, che Yar Tūpa,

seco maranehi vahe.

Nde yipisuvendar ité ereico.

⁶ Esepio, ahe opa oyuca ndeundar ava iyavei nde ñehe mombehusar yuvireco.

Cûritei rumo eremboihu uca tuví pipe.

¡Evoco nungar upe avíyesu rupi eté!” ehi.

⁷ Asendu avei ambuae ñehesa mbahe reropovëhesa renda sui aipo ehi vahe: “Supi eté, che Yar Tûpa, opacatu mbahe mboavaisarëhi, nde ava recocuer mombaraisusa supi tupri vahe ité iyavei nde reco ívi vahe ité no” ehi.

⁸ Tûpa rembiguai imoirungatusa, opa oipiyere mbahe ríru pipendar ari rese, ipare arí upe imondosa píratasa ava rapípa ãgua. ⁹ Ipare opacatu ité ava yuvirocaipa tupri; ndoyevii eté rumo Tûpa upe iyavei nomboeteiño ité yuvireco. Êgue ehi rumo iñehe mara-mara têiño mbaherasi rerecose Tûpa upe yuvireco.

¹⁰ Tûpa rembiguai imbopoyandeposa oipiyere mbahe ríru pipendar mbahe ípi vai renda rese. Ahese aviyeteramo têi serecuar ipovri pendar avei pítumimbisave yuvirecoi. Ava evocoiyase oñeapecusu-suhi têi yuvireco mbahe rasicuer pâhuve; ¹¹ ndopoíño ité rumo mbahe-mbahe têi aposa sui yuvireco, ahe rumo iñehe mara-mara têiño Tûpa ivate vahe rese oyeupe mbahe tasi vahe pâhuve yuvireco.

¹² Tûpa rembiguai imoñepei ovasa oipiyere mbahe ríru pipendar íai guasu Eufrates pipe. Ahe evocoiyase opa ipiru peri apo ãgua añihivei coti sui mborerecuareta yu ãgua.

¹³ Ipare asepia mbahe ípi oporomocañi vahe, mbahe ípi vai, ndahei vahe Tûpa ñehe mombehusar supi vahe avei, ahe yuvirecoi vahe yuru rupi yuvinose mbosapi caruguar vireque nungar. ¹⁴ Co Caruguar suindar yuvirecoi, ahe oyapo poromondisa mbahe mboyecuasa yuvireco. Ipare opa yuvinose opacatu ívi rupi mborerecuareta monuha ãgua vavasave nara, acoi arí cañi pipe Tûpa mbahe mboavaisarëhi amotarëhisave.

¹⁵ “Peyapisaca tupri che ñehe rese, che aviyeteramo têi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviye vahe pipe. Ahese nochí chietera oico che sui” ehi.

¹⁶ Ipare opa omonuha mborerecuareta hebreo ñehe pipe serer Ar-magedón ve.

¹⁷ Evocoiyase imbosietesa Tûpa rembiguai oipiyere iñemoirosa mbahe ríru sui ivitu rupi. Ipare íva pendar Tûpa rëta pipe sui osë ñehesa ipírata vahe evoco ou vahe senda sui: “¡Opa ité yaposa cute!” ehi. ¹⁸ Ahese oime overa vahe, mbahe siapu guasu vahe iyavei osunu vahe. Ipare ívi oriri ipírata catu vahe opacatu ívi rírii sui ava yuvirecove viteseve ívi pipe.

¹⁹ Tecua guasu oyeca-yeca mbosapi rupi, opacatu tecua evocoiyase opa onduru ívi pipendar. Ipare Tûpa oyemomahenduha evoco tecua guasu Babilonia pendar rembiapo ai rese, evocoiyase omondo oñemoirosa ipírata catu vahe chupe. ²⁰ Opacatu caha pâhu, ivitri avei ocañipa ité yuvireco. ²¹ Iyavei yuviroviapipa íva sui ava harive amanda guasu, ahe iposiigüer cuarenta kilos rutei. Ava rumo iñehe mara-mara têiño vite ité Tûpa upe yuvireco amanda sui têi. Esepio niha, evoco Tûpa poronupasa ivaté catu vahe.

17

Cuña oyemondo-mondo tēi vahé moacánsa

¹ Siete Tūpa rembiguai vireco vahecuer mbahe riru yuvireco, ipāhu pendar ñepei ou aipo ehi cheu: “Erio, amboyecuara co cuña yaguasa serai vahé upe ñemoirosa ndeu, ahe evoco ioguapi i harive oī” ehi. ² “Co cuña rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahé ndopoi potai eté oyemboaguasasa sui yuvireco” ehi cheu.

³ Ipare che quer nungar pipe Espíritu omboyecua vahé cheu, Tūpa rembiguai iva pendar che reraso ava poréhisave. Aheve asepia cuña mbahe ipi vai píra vahé harive chini. Evoco mbahe ipi vai opacatu rupi oyapete tupri ñehesa vai Tūpa amotaréhisa sereco oyese, iyavei vireco siete tupri oāca, diez tupri guâchi. ⁴ Co cuña turucuar, suendi vahé, píra vahé avei no, iyavei oyemoendi yai oro pipe oico, ita iporañete ai vahé pipe, opohir pipe avei no. Vireco igua riru oro apopri. Ipipe omboapipo mbahe yavaeté vahé sereco oyemboaguasa-guasa tēisa; ⁵ iyavei icuachiapri isiva rese terer ndicuasai vahé aipo ehi vahé: “Co Babilonia guasu, cuña yaguasa-guasa tēi vahé si, opacatu ava ivi pipendar secocuer yavaeté vahé si avei no” ehi. ⁶ Ipare aicua evoco cuña osavaipo vahé oī Tūpa reroyasar ruvi pipe iyavei acoi Jesús recocuer mombehusa sui tēi yucaprí vahé ruvi pipe avei no.

Co asepiase che quer nungar pipe, ndache mbovihai eté. ⁷ Ahese ahe Tūpa rembiguai iva pendar aipo ehi cheu: “¿Mahera vo nderevhai eico? Aicua ucara mo ndeu co imombehusa ndicuasai vahé cuña resendar, iyavei acoi mbahe ipi vai vireco vahé siete tupri oāca, diez tupri avei acoi sâchi” ehi. ⁸ “Acoi mbahe ipi vai eresepia vahé ahe yipive secoi vahé, cûritei rumo ndipo iri; osêra rumo ivicuar guasu ipicucu vahé sui omano água renonde curi. Acoi ava ivi pipendar ndovirecoi vahé güerer cuachiar tecovesa resendar pipe yuvireco yipive ivi apoéhiseve, ahe ndovihai chira yuvireco osepiase evoco mbahe ipi vai yipive oicove vahé viña, ndoicove iri rumo, oyevi irira curi.

⁹ “Co rese icuasara uma vireco mbahecua senducua áqua: Co siete tupri vahé ñaca ahe omombehu ‘siete tupri ivitri’ oyapave. Ahe iharive evoco cuña oguapi oī iyavei ahe siete ñaca avei omoporéhi ‘siete tupri mborerecuar’ oyapave. ¹⁰ Cinco tupri mborerecuar evoco ipāhu pendar ndipo iri yuvireco, ñepeiño evocoiyase oporocuai cûritei oico, ambuae rumo ndou vîtei. Ouse rumo ipandar, ou raimi tēira. ¹¹ Mbahe ipi vai secoi vahé yipindar, ndoicove iri cûritei, ahe imbohochosa secoira mborerecuar, yepe siete tupri vahé mborerecuar guasu mboetasa viña, ahe rumo ocañi tēi vaherâ secocuer” ehi.

¹² “Evoco diez tupri vahé sâchi, ahe mborerecuar diez tupri ndoyuviroique vîtei vahé oporocuai vaherâ yuvireco. Oyoya rumo oporocuai raimi tēira mbahe ipi vai reseve yuvireco curi. ¹³ Co diez tupri mborerecuar yuvirecoi vahé oyoya guasura ipihañemoñeta evoco mbahe ipi vai upe omondo vaherâ píratasa iporocuai áqua yuvireco. ¹⁴ Ipare ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvirecoi vahé sese, ahe senoiprí yuvirecoi iyavei iporavopri oyemoviracuaño vahé ité supi oguata áqua yuvireco” ehi.

¹⁵ Iyavei Tūpa rembiguai aipo ehi cheu: “Evoco para guasu eresepia vahe, iharive cuña yaguasa-guasa tēi vahe oguapi oī, ahe ‘ava rehii tecua yacatu rupindar, iñehe ambuae-ae vahe iyavei opacatu ambuae tēi vahe ivi rupindar’ oyapave. ¹⁶ Evoco eresepia diez tupri vahe sāchi mbahe ipi vai rese, ahe ndoyambotai chira cuña yaguasa-guasa tēi vahe; iyavei osequii tuprira seya; ohupara soho, ipare opara osapi. ¹⁷ Tūpa niha omondo ipiha pipe mbahe güemimbotar apo ãgua ‘ahe toyemonguerēhi yuvireco omborerecuasa mundo ãgua mbahe ipi vai upe; tomboaviye rane ité che remimombehuguer yuvireco’ oyapave. ¹⁸ Iyavei evoco cuña yaguasa-guasa tēi vahe eresepia vahe, evoco niha tecua guasu ivi pipendar mborerecuareta vireco vahe opovrive yepi” ehi Tūpa rembiguai cheu.

18

Babilonia viapi agüer

¹ Ipare asephia ambuae Tūpa rembiguai ipirata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi.

² Iyavei oñehe pírata oico aipo ehi:

“¡Oviapi tecua Babilonia cute!

Caruguar yuviroique sese, opacatu caruguar naporai vahe iyavei vĩrai vai nungar yuviroique sese.

³ Esephia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoiyase mborerecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

⁴ Evocoiyase asendu ambuae ñehesa iva sui ou vahe, ahe aipo ehi: “Peyepepi evoco tecua guasu sui, pe peico vahe cheundar evoco yan-gaipa rese imboyoyaëhi ãgua.

Iyavei ñepei yepe taperupiti eme imbaherasisa.

⁵ Esephia niha, yangaipagüer oyepota ité ivave.

Tūpa evocoiyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upe, ñgue peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

⁷ pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esephia niha, ahe aipo ehi opiha pipe oico:

‘Cohave che aguapi vĩte mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

⁸ Sese niha aviyeteramo tēi oura mbaherasisa chupe:

paraisusa, tieporëhi, manosa; ipare sapisara.

Esephia niha, yande Yar Tūpa mbahe mboavaisarëhi secoi, ahe, ‘Tomano’ ehi chupe” ehi.

⁹ Evocoiyase mborerecuar ivi pipendar yuvirecoi vahe co cuña resenderarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovihai chira sese osepiase evo-coi cuña rātachi yuvireco curi. ¹⁰ Opitañora amombrive osiquiyepave, iparaísusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pírata vahe tie viña! Esepia niha, co aviyeteramo tēi ou nde mombaraísu catusa” ehira yuvireco.

¹¹ Evocoiyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovihai chietera evocoii tecua rese yuvireco. Esepia niha, ndipo iri chietera que virocua vaherā imbahe yuvireco ichui, ¹² co opacatu mbahe sep̄i vaherā ahe: oro, guarePOCHI, ita iporañete ai vahe, mbohir sendi vahe, turucuar secose vahe, turucuar sendi vahe, iyavei píraumbi vahe, píra vahe no; iyavei opacatu-catu tēi ivirape sīacua vahe; mbahe-mbahemi marfil apopri, ivira icatupri vahe apopri, bronce apopri, guarePOCHI apopri, mármol avei; ¹³ mbahe serocuapri yahu vahe canela, tembihu moiacuasa; itaisi, mirra, mbahe sīacua vahe; uva ricuer, mbahe quira, trigo cuhi aviye vahe, trigo avei; iyavei mbahe mimba ovosii vahe no, ovesa, cavayu, cāretomi iyavei mbiguai no. ¹⁴ Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehira.

¹⁵ Evocoiyase evocoii mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaísusa repiase yuvireco. Oyaseho tēira iyavei ndoyembovihai tēi chira yuvireco no, ¹⁶ iyavei aipo ehi tēira yuvireco:

“¡Too! ¡Iparaisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi,
píra vahe; oro pipe oyemboetei vahecuer,
itami iporañete vahe pipe iyavei mbohir sendi vahe pipe oyemboetei vahe no.

¹⁷ ¡Aviyeteramo tēi rumo opa ocañi imbahe eta ichui!” ehi.

Evocoiyase opacatu ava carite guasu pipendar rerecuar, ava imbehí ivirindar carite guasu reroguatasar, i rupi oporavíqui vahe oyeupe nara mbahe rereco ãgua, ahe opaño opita amombrive yuvireco ichui ¹⁸ iyavei co tecua rātachi repiase, ahese osapucai pírata tēi yuvireco: “¡Ndipoi eté niha yípisui tecua na ehi vahe!” ehi yuvireco. ¹⁹ Ipare imboasipave omundo ivi cuhi oãcave yuvireco, oyaseho iyavei ndoyembovihai tēi, ipare osapucai tēi yuvireco aipo ehi:

“¡Too! ¡Iparaisu catu tecua guasu pendar!

Esepia niha, evocoii tecua guasu mbahe eta pipe sui ava i rupi oporavíqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

²⁰ Peyemboviháñó evocoii tecua rese, pe iwa pendar, iyavei opacatu chupendar peico vahe, pe no Jesús apóstol peico vahe, opacatu Tūpa ñehe mombehusar peico vahe avei no.

Esepia niha, co tecua omocañisa pipe Tūpa oyapo mbahe tupri pēu nara.

²¹ Ahese Tūpa rembiguai iwa pendar seco pírata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipare ndapesezia iri chietera apirēhi vaherā” ehi.

²² “Ndasendusa iri chietera ocar rupi arpa moñehesar, mimbí moñehesar, iyavei mimbí guasu moñehesar avei no; ndererecoi chietera ava oporaviquí vaherā, ndasendusa iri chiaveira ita mbahe mbocuhisa monarasa nde suindar.

²³ Iyavei ñepei yepe que tataendi ndosesapei chietera ndeu, ndasendusai chiaveira ava aïvu mendasa rupi, yepe niha nde ava upe mbahe mondoso seco pírata etepri vahe opacatu rupi ereico viña.

Iyavei erembopa-mbopa tēi opacatú ambuae tecua rupindar eico nde payesa pipe” ehi

Tūpa rembiguai chupe.

²⁴ Esephia niha, evoco tecua guasu pipe oyecua Tūpa ñehe mombehusar ruvi, Tūpa upendar ava ruvi, iyavei opacatu ava yucaprí vahe iví pipendar ruvi avei.

19

¹ Co pare, asendu ava rehii ñehe pírata iwave aipo ehi vahe:

“jImboeteipri yande Yar tasecoi!

Poropísirosa, teco porañetesia iyavei ipíratasa ahe yande Ru Tūpa suindar.

² Esephia niha, ahe oyapo mbahe supi eté vahe,

Tocañi’ ehise co cuña oyemboaguasa-guasa tēi vahe nungar tecua guasu upe evoco niha oseco momara tēi vahe ava iví pipendar güeco rai pipe; ichui Tūpa osepi oyeupendar” ehi.

³ Ipare aipo ehi iri yuvireco no:

“jImboeteipri yande Yar tasecoi!

Esephia niha, evoco tecua rātachi ndopai chietera” ehi.

⁴ Evocoiyase veinticuatro tupri iva pendar icuapri yuvirecoi vahe iyavei irungatu iva pendar yuvirecove vahe, ahe Tūpa mboeteisa pipe oyeaivi iví rese yuvireco. Ipare aipo ehi yuvireco no: “jÈgue tehi! jImboeteipri yande Yar tasecoi!” ehi. ⁵ Evocoiyase Tūpa renda sui tupri oyeendo ñehesa aipo ehi vahe:

“jPemboetei yande Ru Tūpa opacatu peroya vahe, que seco iví coti catumi vahe, que seco iwave vahe avei, pe pesiquiye vahe imbooyeroya águal!” ehi.

Pieta mendas Ovesami resendar

⁶ Asendu avei ava rehii ñehe, inungar acoi itu guasu riapu, ndoyavii avei osunú guasu vahe aipo ehi:

“jImboeteipri yande Yar tasecoi!

Esephia niha, yande Yar Tūpa opacatú mbahe mboavaisaréhi omboipi oporocuiai.

⁷ Tayayemboviha catu yaico iyavei tayamondo yande viharetesa, yande sapucaisa yande Ru Tūpa upe.

Esephia niha, cûritei oyepota mendas ari Ovesami upendar.

Sembireco evocoiyase opa oyemoingatu oico:

⁸ chupe ipotasa iyemonde água turucuar secose vahe, ndiquihai, sendi vahe pipe.

Esephia niha, co turucuar secose vahe ‘Tūpa rese yuvirecoi vahe recocuer ihívi vahe’ oyapave aipo ehi” ehi.

⁹ Evocoiyase Tūpa rembiguai, “Na ere icuachía: ‘Sorívete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tūpa ñehesa supi tupri vahe ité” ehi.

¹⁰ Ipare añenopiha Tūpa rembiguai rovai imboetei água. Ahe rumo aipo ehiño cheu: “Égüe erei rene. Esepiá, che Tūpa rembiguai tēi aico nde nungar iyavei nde rivireta nungar oguata vahe Jesús ñehengagüer rupi. Emboetei Tūpa” ehi.

Esepiá niha, evocoi Jesús recocuer mombehusar moñehe ucasar, ahe niha acoi omombehu uca vahe Tūpa ñehe mombehusar upe.

Cavayu morochi vahe reroguatasar

¹¹ Evocoiyase asepiá íva oyemboi vahe. Aheve aviyeteramo tēi cavayu morochi vahe oyemboyecua, evocoiyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepiá, güeco ívisa pipe oporocuai iyavei oyapo vavasa. ¹² Sesa evocoiyase ndayavíye eté acoi tata rendigüer; iyavei oäca rese setá vireco oyeguaca, iyavei vireco terer icuachiapri oyese; ahe güeraño ité oicua. ¹³ Iturucuar evocoiyase imopirapri tuvi pipe; serer evocoiyase, “Tūpa Ñehe” ehi.

¹⁴ Sundao rehí íva pendar saquicuerive yuvirecoi. Iturucuar se cose vahe pâve morochí vahe, ndiquihai vahe avei. Ahe cavayu morochi vahe harive yuvirecoi. ¹⁵ Iyuru pipe sui osé quise pucu saimbe vahe opacatu ambuae-ae tecua rupindar momara água. Ahe oyocuaira oamotaréhisar guarepochi apopri opo pendar pipe. Iyavei osecoähara inungar uva opive otiamii vahe yuvireco iyavei omboihura evocoi uva ricuer paraisu catusa resendar pipe. Ahese Tūpa mbahemboavaisaréhi oñemoiro itera chupe. ¹⁶ Oturucuar popi rese vireco icuachiapri ohivipí rese avei aipo ehi vahe: “Mborerescuareta rerecuar guasu iyavei ava Yar ívate catu vahe” ehi.

¹⁷ Ipare asepiá Tūpa rembiguai opúha vahe arisave. Ahe osapucai pírata opacatu vírai mbahe rohoguar upe oveve vahe íva rese: “¡Periol ¡Peñemonuha Tūpa suindar carusa guasusave; ¹⁸ pehu co mborerescuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco íví cotí catumi vahe roho, seco ívate vahe roho avei!” ehi.

¹⁹ Ahese asepiá mbahe ípi vai iyavei mborerescuareta íví pipendar osundao reseve-seve. Ahe oñemonuha yuvireco ovava água evocoi cavayu hari pendar rese iyavei isundao rese avei no. ²⁰ Co mbahe ípi vai yipindar vahe soquendasa, oyoya evocoi Tūpa ñehe mombehusar angahu tēi rese. Ahe acoi oyapo vahe mbahe yavai rai vahe yipindar mbahe ípi vai rovaque, evocoi mbahe yavai rai vahe apo pipe ombopa-mbopa tēi ava, acoi seroyasar vireco vahe mbahe ípi vai rer oyese iyavei omboetei vahe sahanga yuvireco. Evocoiyase co mbahe ípi vai iyavei Tūpa ñehe mombehusar angahu tēi, ahe opa imombosa secove reseve ípa azufre ocai vahe pipe yuvireco. ²¹ Ambuae evocoiyase evocoi cavayu morochi vahe hari pendar yuru pipe sui osé vahe quise pucu pipe opa omano yuvireco. Evocoiyase opacatu vírai mbahe rohoguar opa soho pipe oyemohitaro yuvireco.

¹ Ipare asepia Tūpa rembiguai ogüeyi vahe ou iva sui ívicuar guasu ipicucu vahe mboyasar iyavei carena ipo guasu vahe opove vireco. ² Ipare oipisi mbahe ipi oporomocañi vahe mboi nungar aracahendar, ahe niha Caruguar secoi, Satanás serer vahe; ahe oicuhacua carena pipe mil aravíter rupi imoi. ³ Ahese omombo ívicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopa-mbopa tēi iriēhi ãgua rese acoi osupitise voi mil aravíter. Coiye rumo mil aravíter pare, imosesa raimi tēira.

⁴ Ipare asepia tenda, iharive setá ava oguapi yuvínoi evocoii oipisi vahe omborerecuasa yuvíreco ava upe mbahe rese porandu ãgua. Iyavei asepia ava hā evocoii opa vahecuer oyasia ñaca yuvíreco Jesús recocuer mombehusa sui tēi iyavei Tūpa Ñehengagüer mombehusa pipe sui tēi avei. Ahe ava nomboetei vahe mbahe ipi vai yuvíreco; sahanga avei nomboetei yuvíreco no; iyavei nomondo ucai vahe avei osiva rese serer yuvíreco, opo rese avei. Ahe asepia opa ocuerayevi yuvíreco. Ipare oporocuai Cristo rese mil aravíter rupi yuvíreco. ⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvíreco osupitise voi mil aravíter. ⁶ ¡Sorivete catu acoi ava vireco vahe yipindar cuerayevisa yuvíreco! ¡Esepia niha, ahe Tūpa upendar ité yuvíreco! Imoñuviriosa manosa evocoiyase chupe ndipo iri eté. Ëgüe ehira rumo ahe Tūpa upe naraño ité pahi yuvírecoira, Cristo upe avei. Ipare mborerecuar yuvírecoira sese mil aravíter rupi.

Caruguar recopisa

⁷ Acoi osupitise rumo mil aravíter cute, ahese Caruguar yorasara soquendasa sui. ⁸ Ichui oséra opacatú ava ivi pipendar mbopa-mbopa tēi oico; oséra ivi Gog mbopa tēi ãgua, ivi Magog mbopa tēi ãgua avei. Ipare omonuhara vavasave nara isundao eta. Esepia niha, ahe sehii etepri yuvíreco inungar ivi cuhi para guasu popi rupindar.

⁹ Ëgüe ehi Yugüera ati amombrí sui, oyerepa tupri Tūpa recua rese yuvíreco no, evocoii tecua Jerusalén sembiaisu rese avei. Tūpa rumo ombou tata iva sui, ahe ipipe opa tupri ité osapi. ¹⁰ Caruguar evocoiyase, ava mbopa-mbopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tūpa ñehe mombehusar angahu tēi vahe avei no. Aheve iparaísura pítu, ari yuvíreco apirëhi vaherã.

Tūpa oguapira güendave ava recocuer rese porandu ãgua ari ipa vahe pipe

¹¹ Evocoiyase asepia tenda imboeteipri, morochi vahe. Iharive oime ava oguapi vahe oí. Sovai ivi iyavei iva opa ocañi tupri tēi. Ndoyecua iri eté co coti rupi yuvíreco. ¹² Ipare asepia omano vahecuer seco ivate vahe, seco mbegüemi vahe avei no opüha yuvínoha Tūpa rovai; ahese cuachiar opa ipípirasa yuvíreco, iyavei ambuae cuachiar. Ahe cuachiar tecovesa resendar. Omano vahecuer upe evocoiyase porandusa evocoii cuachiar pipendar mbahe sembiapogüer rese. ¹³ Omano vahecuer opa yuvínose para guasu pipe sui, iyavei tehögüer recosa sui opa yuvínose; ichui opacatú mbahe sembiapogüer rese porandusa yuvíreco chupe no. ¹⁴ Ipare manosa recua opa imondosa tata nungar ipa pipe. Evocoii ipa niha imoñuviriosa manosa. ¹⁵ Aheve opa imondosa acoi ndovírecoi vahe güerer icuachiapri cuachiar tecovesa resendar pipe.

21*Iva piasu iyavei ivi piasu*

¹ Ipare asepio iwa piasu iyavei ivi piasu. Esepio niha, yipindar vahe mbahe opa ité ocañi yuvireco, para guasu avei no. ² Che asepio tecua nimarai vahe, ahe Jerusalén piásu, evocoí ogüeyi vahe Túpa sui ou. Opacatu imoingatusa tupri vahe, inungar acoi cuña omenda água oyemboetei tupri omevi upe. ³ Ipare asendu ñehesa pírata tenda suindar aipo ehi vahe: “Túpa cûritei oicove ava rehii pâhu rupi oico. Ahe oicove vaherá ité sese yuvireco yepi, ahe ava evocoiyase chupe nara ité yuvirecoira. Ahe teieté niha secoira yuvireco chupe.” ⁴ Ahe niha omombituhura opacatu ava resai; iyavei ava nomanoí chietera; ndoyasehoi chira yuvireco; ndipoi chira viharéhisa, tecoasisa avei chupe. Esepio niha, opacatu mbahe oime vahecuer yipindar, ndipo iri eté” ehi.

⁵ Ahese evocoí oguapi vahe tenda harive oí, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepio niha, co ñehesa supi tupri vahe ité, evocoiyase iya ité peyeroya sese” ehi.

⁶ Ipare aipo ehi cheu: “Opa ité yavíye. Che avíye acoi letra omboipi vahe A sui yepi, Z rupi. Esepio, che yipive vahe ité, ipandar avei. Acoi ava ihusei vahe amboihuño têira i tecovesa resendar ndasepii vahe pipe.

⁷ Acoi ava oyemoviracua vahe ité mbahe-mbahe têi apoëhi água, ahe oipisira co mbahe opacatu omahera yuvireco. Evocoiyase che acora chupendar ité, ahe evocoiyase che rahir ité yuvirecoira. ⁸ Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa têi vahe, ipaye serai vahe, mbahe rahanga mboeteisar têi iyavei opacatu ava semira-mira têi vahe, ahe opara yuviraso ipa nungar azufre ocai pírata vahe pipe. Ahe niha imoñuvirío manosa” ehi.

Tecua Jerusalén piásu

⁹ Evocoiyase ou ñepei siete Túpa rembiguai pâhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecuara cuña omenda vaheví ndeu, Ovesami rembirecoví” ehi. ¹⁰ Evocoí che quer nungar pipe Espíritu osepio uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Túpa sui. ¹¹ Ahe tecua sendí iteanga Túpa rendigüer pipe. Sendigüer evocoiyase oyoya tupri ita iporañete vahe rese, oyoya avei ita jaspe serer vahe ipírerimi vahe rese. ¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoiyase ñepei-peí Túpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese. ¹³ Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no. ¹⁴ Tecua guasu áchisa vireco doce tupri ita imoviracuasa. Ahe sese evocoí doce tupri yuvirecoi vahe Ovesami apóstol rer icuachiasa yuvireco.

¹⁵ Evocoí Túpa rembiguai oñehe vahe cheu vireco vara oro apopri tecua râha água, opacatu soquendipí râha água, ñachisa râha água avei no. ¹⁶ Tecua guasu pucucuer oyoya tupri ipigüer rese. Evocoiyase Túpa rembiguai osâha tecua guasu ruvichagüer; osâhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya

pāve tupri ité no. ¹⁷ Ipare osāha ñachisa: osāhase ipigüer sesenta y cinco metro tupri. Evocoī Tūpa rembiguai osāha ava rembiporu pipe.

¹⁸ Tecua āchisa ahe ita porañete vahe Jaspe serer vahe apopri; tecua evocoiyase oro pāve tupri, aviyē vidrio secose catu vahe. ¹⁹ Ñachisa moviracuasa vireco opacatu ambuae ita-itā tēi iporañete vahe pāve: yipindar ivíracuasa jaspe, imoñuviriossa zafiro, imombosapisa ágata; imoirungatusa esmeralda; ²⁰ imbopoyandeposa ónica; imoñepei ovasa, cornalina; imoñuvirío ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirío yovaivesa, amatista. ²¹ Doce tupri vahe oquenda guasu ahe doce tupri mbohir; ñepei-peí oquenda ñepei mbohir sui yapopri. Calle guasu tecua avíter rupindar evocoiyase oro pāve, inungar vidrio yande poréhi tupri vahe ipipe.

²² Ndasepiai eté evocoī tecua guasu pipe ñepei yepe tūparo. Esepiā niha, yande Yar Tūpa mbahe mboavaisaréhi, Ovesami reseve yuvirecoi aheve. ²³ Evocoī tecua guasu ndovireco iri eté ari, yasi güesape água. Esepiā niha, Tūpa ité osesape güendigüer pipe, iyavei Ovesami tataendi nungar secoi aheve yuvirecoi vahe upe. ²⁴ Sendigüer osesapera opacatu tecua rupindar iguatasa rupi, iyavei ava mbahe yar mborerecuar íví pipendar opara güeru omabahe eta porañete vahe yuvireco chupe. ²⁵ Evocoiyase soquendipi nimboyasai chietera ari yacatu rupi. Pítu ndipoi chiaveira aheve. ²⁶ Ipare opara aheve ambuae tecua mbahe eta, porañete vahe omoingue yuvireco; ²⁷ ava angaipa viyar rumo, Tūpa remimbotaréhi oyapo vahe, iporombopa serai vahe, ahe ndoyuviroiquei chietera aheve. Ëgüe ehi rumo acoi ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquer aheve.

22

¹ Ipare Tūpa rembiguai omboyecua iai tecovesa resendar cheu, típiu, oyecua tupri, osē vahe Tūpa iyavei Ovesami renda porañete vahe sui. ² Calle guasu mbiter rupi oso. Iyavei iai íque yacatú oime ívira tecovesa resendar, iha vahe doce yupagüer rupi ñepei aravíter pipe. Iyavei evocoī ívira ro aviyē ai ava opacatu rupindar mbogüera água. ³ Ndipoi chietera aheve que mbahe tēivri pendar. Tūpa renda porañete vahe iyavei Ovesami renda avei chinira evocoī tecua guasu pipe. Aheve sembiguai eta omboeteira yuvireco. ⁴ Osepiara sova iyavei virecora serer osiva rese yuvireco. ⁵ Aheve ndipoi chietera pítu, iyavei ava aheve yuvirecoi vahe ndosecái chietera tataendi. Ndosecái chiaveira que ari güesape água yuvireco. Esepiā niha, yande Yar Tūpa teleté osesapera. Ipare ahe ava mborerecuar apiréhi vaherā ité yuvirecoira sese.

Cōimi eté Jesucristo yevi água

⁶ Ipare Tūpa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yande Yar Tūpa acoi omboyecua tupri vahe mbahe oyesuindar oñeho mombehusar upe, ahe ombou güembiguai íva pendar mbahe omboaviye poyava voi vaherā mboycua água viroyasareta upe” ehi.

⁷ “¡Ayevi poyava voira curi! ¡Sorivete catura acoi ava viroya vahe ñehesa Tūpa suindar mbahe oime vaherā resendar co cuachiar pipe!” ehi.

⁸ Che, Juan, asepia iyavei asendu ité co mbahe. Sendu pare voi, añenopiha evocoi Tūpa rembiguai rovai imboetei ãgua viña. ⁹ Ahe rumo aipo ehiño cheu: “Aní ereñenopiha che rovai. Esepia niha, che Tūpa rembiguai tēi aico, nde nungar, nde rívireta nungar avei evocoi oñehe vahe Tūpa Ñehengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tūpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tūpa suindar mbahe oime vaherā resendar sereco, evocoi icuachiapri cuachiar pipe. Esepia niha, ari cōimi secoi imboavíye ãgua. ¹¹ Acoi ava mbahe tēi aposar, toyapoño mbahe tēi; iyavei acoi ava seco rai vahe, taseco raiño ité oico; acoi ava seco tupri vahe rumo, ahe toyapoño mbahe tupri oico; iyavei acoi ava Tūpa upe oyemondo tupri vahe ité, ahe taseco tupriño avei oico chupe” ehi.

¹² “Supi eté ayevi poyavara, iyavei arura mbahe porerecosa ñepei-peí ava rembiapogüer rupi-rupi amondo vaherā chupe. ¹³ Che aico inungar letra A iyavei Z, yipindar vahe, ipandar vahe avei no; yipive vahe ité apiréhi vaherā” ehi.

¹⁴ “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apiréhi vahe resendar. Ipipe sui oiquera tecua guasu pipe. ¹⁵ Ava rehii ndiporeroysi vahe rumo opitapara ocarve tēi yuvireco, iyavei ava ipaye serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyeroqui vahe, iyavei opacatu ava oipota rai vahe oporombopa-mbopa tēi ãgua yepi” ehi.

¹⁶ “Che, Jesús, amondo che rembiguai iva pendar mbahe mombehu ãgua opacatu che reroyasar upe oñemonuha vahesa rupi-rupi. Che aico mbororecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

¹⁷ Espíritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe iñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüeruño; acoi ava oipota vahe, toipisi i tecovesa resendar ndasepii vahe yuvireco.

¹⁸ Opacatu acoi ava osendu vahe co ñehesa Tūpa suindar mbahe oime vaherā resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboyeapí iri vahe, ahe chupe Tūpa omboyeapí aveira co cuachiar pipendar mbahe-mbahe tēi imombehupri. ¹⁹ Amove que ava virocua vahe co cuachiar pipe sui ñehesa Tūpa suindar, Tūpa avei evocoiyase ndoipotai chira chupe co cuachiar pipe imombehupri ivira ha tecovesa resendar rereco ãgua iyavei co tecua maranehi pipe seique ãgua.

²⁰ Acoi co mbahe mombehusar aipo ehi: “Supi eté ayevi poyavara” ehi.

Ñüe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviye, aipo rupive.